


Ḙlinjil ɛn Ḥaysa Ḙlmɛsix Itawann-as deḡ Arkawal
wa Aynayan



Tamajaq, Tawallammat: Ḙlinjil ɛn Ḥaysa Ḙlmɛsix Itawann-as
deḡ Arkawal wa Aynayan New Testament

**Ɛlinjil ɔn Ƴaysa Ɛlmɔsix Itawann-as deƳ Arkawal wa Aynayan
Tamajaq, Tawallammat: Ɛlinjil ɔn Ƴaysa Ɛlmɔsix Itawann-as deƳ Arkawal wa Aynayan New
Testament**

Le Nouveau Testament en tamajaq tawallammat,  criture latine

copyright   2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 22 Feb 2024 from source files dated 29 Jan 2022
3aaeb7b2-4a3b-51fe-8c2d-ed8c05d4be0f

Contents

Matta	1
Markus	46
Luqa	74
Yaxya	121
Igitan ən Nəmmuzal	152
Kəl-Ərrum	195
1 Kəl-Korent	216
2 Kəl-Korent	236
Kəl-Galatəya	249
Kəl-Efez	256
Kəl-Filib	263
Kəl-Kolosəya	268
1 Kəl-Tesalonik	273
2 Kəl-Tesalonik	278
1 Timotay	281
2 Timotay	287
Titəs	291
Filemona	294
Kəl-Ÿibri	295
Yaqub	309
1 Butros	315
2 Butros	321
1 Yaxya	325
2 Yaxya	330
3 Yaxya	331
Yuday	332
Əlkəttab wa n Ənəfilal	334

Əlinjil wa n Matta

Təhəwt ən Ƴaysa d ətəwəsəmutəg-net y əşşəxəl wa z'agu

Aljadan ən Ƴaysa əd təhəwt-net

Aljadan ən Ƴaysa Əlməsix

¹ Əntanay da esmawan n aljadan ən Ƴaysa Əlməsix, ahaya n ənnəbi Dawəd, d ənnəbi İbrahim:

² İbrahim eraw Isəhaq.

Isəhaq eraw Ƴaqub.

Ƴaqub eraw Ƴahuda əd mədrayan-net.

³ Ƴahuda eraw Fərəs əd Zarax,

anna-nasan esəm-net Tamar.

Fərəs eraw Xasrun.

Xasrun eraw Ram.

⁴ Ram eraw Ƴaminadab.

Ƴaminadab eraw Naşon.

Naşon eraw Salmuna.

⁵ Salmuna eraw Boxaz was anna-net Rahab.

Boxaz eraw Ƴubayd was anna-net Rut.

Ƴubayd eraw Ƴasay.

⁶ Ƴasay eraw Dawəd wa n əmənokal.

Dawəd eraw Suliman was anna-net tantut n Urəyya.

⁷ Suliman eraw Roxoboham.

Roxoboham eraw Abəya.

Abəya eraw Aza.

⁸ Aza eraw Ƴahuşafat.

Ƴahuşafat eraw Ƴuram.

Ƴuram eraw Ƴuzəyas.

⁹ Ƴuzəyas eraw Ƴutam.

Ƴutam eraw Axaz.

Axaz eraw Xizqəyyas.

¹⁰ Xizqəyyas eraw Manaşša.

Manaşša eraw Amun.

Amun eraw Ƴuşəya.

¹¹ Ƴuşəya eraw Ƴakunəya əd mədrayan-net.

Azzaman win den əntanay

a dağ tawağan Kəl-İsrayil

əmməwayan s akal ən Babəylon

əqqalan dağ-as ikefəlan.

¹² Dəffər adi, eraw Ƴakunəya Şalatəyel.

Şalatəyel eraw Zərubabil.

¹³ Zərubabil eraw Abihud.

Abihud eraw Alyaqim.

Alyaqim eraw Ƴazur.

¹⁴ Ƴazur eraw Saduq.

Saduq eraw Xakim.

Xakim eraw Eləyud.

¹⁵ Eləyud eraw Elyazar.

Elyazar eraw Mattan.

Mattan eraw Yaqub.

¹⁶ Yaqub ənta a erawan Yusəf wa izlafan Maryama ta terawat Ƴaysa was itawannu Əlməsix.

¹⁷ DaƷ adi maraw meddan d əkkoz a əllanen gər Dawəd d əmaraw-net Ibrahim. Əllân-tu maraw d əkkoz gər Dawəd d azzaman win ətəwəkfal ən Kəl-Israyil əs Babəylon, əllân-tu deƷ maraw d əkkoz gər ətəwəkfal ən Kəl-Israyil əs Babəylon əd təhəwt ən Ƴaysa.

Təhəwt ən Ƴaysa wa n Əlməsix

¹⁸ Ənta da əmmək was d-iggaz Ƴaysa Əlməsix əddənət: Maryama ta n anna ən Ƴaysa, imirakan dər-əs Yusəf azalaf. Mišan harwa da wər təzlay əs Yusəf, as təga tadist, əs tarna n Infas wa Zəddigan. ¹⁹ Yusəf, imosan aləs oƷadan, wər ira əsəkkərəkəd ən Maryama daƷ aytedan. Awen daƷ a fəl isammarkas daƷ man-net as a dər-əs iƷrəd da wər t-illa i əhan salan-nasan. ²⁰ Isamadran daƷ awen da as t-in-ibaz etəs inafalal-as-du angalos n Əməli daƷ targət, inn-as: «Yusəf, ahaya ən Dawəd, a kay-wər-təggəz tasa n azalaf ən Maryama, fəlas barar wa ihan tadist-net, Infas wa Zəddigan a d-ifal. ²¹ Ad təgrəw barar amaran kay ag-as esəm Ƴaysa fəlas ənta a z'assafsin tamattay-net daƷ bakkadan.» ²² Arat wa kul iga fəl ad andu awal wa d-imal Məššina əs tarrayt n ənnəbi Isayas as inna: ²³ «*Ad tagu təmawat tadist da wər təzday meddan, təgrəw barar. Barar wədi a das-itəwəggu esəm Emanəwel, almaƷna: Məššina illâ Ʒur-na.*»

²⁴ As d-inkar Yusəf daƷ etəs, immozal s arat was t-omar angalos n Əməli, izlaf Maryama. ²⁵ Mišan wər kala a dər-əs inamansa har ihəw barar. As ihəw, ig-as Yusəf esəm Ƴaysa.

2

Tagadəzt ən musanan win dənnəg Əlməsix

¹ Azzaman n Əmənokal Herod a daƷ ihəw Ƴaysa, daƷ əƷrəm ən Betalxam, daƷ amaɖal ən Yahudəyya. Əglatan-du musanan ən manayan a d-əfalnen dənnəg har d-osan Yerusalam. ² Ənnan: «Ma iga əmənokal ən Kəl-Əlyəhud wa ihəwan da səkət? Atri-net a nənay daƷ dənnəg, amaran nəkk-ay-du y a das-nəssəjəd.» ³ Arat wa as t-islam əmənokal Herod, iga aššawaša zəwwəran, ənta harkid Kəl-Yerusalam kul. ⁴ İššədaw-du imuzaran ən limaman, əd musanan n Əttawret, issəstən-tan d adag wa daƷ z'ihəw Əlməsix. ⁵ Ənnan-as: «AƷrəm ən Betalxam a daƷ z'ihəw daƷ amaɖal ən Yahudəyya, fəlas ənnəbi Mika iktâb âs: ⁶ "*Kam amaran Betalxam, ta n amaɖal ən Yahudəyya, təhey iƷərman win aƷaf daƷ akal ən Yahudəyya, fəlas kam a du-z-igməd əmuzar wa z'əgin i tamattay-nin Israyil tizart ta itaggu amadan y aharay-net.*"»

⁷ Təzzar isassaƷra-du əmənokal Herod imusanan win manayan en, imos awen arat igân daƷ əssir, issəstan-tan əd tamert tas igmad aššak as ənta daƷ d-inafalal ətri wa əmalan den. ⁸ Dəffər awen issok-en Betalxam inn-asan: «Aglawat, taknim asawad i dad illa barar wa ihəwan da, as tu-təgrawam, təmməram-i-du təməlam-i dad illa, fəl ad t-akka əssəjədəƷ-as nak da.» ⁹ As dasan-iƷrad əmənokal awal, əglatan. Təzzar oggan atri wa dasan-inafalalan daƷ jənnawan dat awen daƷ dənnəg. Wər imməzzay ətri en ad illa dat-san, azzar-asan, as imal dənnəg adag wa iha barar, izzəkkat. ¹⁰ As ənayan atri as izzəkkat, əknan təfalawist, ¹¹ əggazan-in ehan, ənayan barar d anna-net Maryama, əgaraffen əssəjadan i barar. Dəffər adi, oran ilalan-nasan, əkkasan-as-du daƷ-san šibəddar əganen daƷ urəƷ, d əššin səqqidan əzodnen, əmosnen əzzənəf ən təxəlbəst. ¹² Dəffər awen isannafalal-asan-du Məššina daƷ targət as ad wər əqqəlan Herod. Awen da a fəl obazan tarrayt iyyat əqqəlan akal-nasan.

Ɖdærræg æs Masar æd tawaxlay ən Nazaret

¹³ Dæffær as æglân, inafalal-du angalos n Ɖmæli i Yusæf day targæt, inn-as: «Ɖnkær, tidawax æd barar d anna-net, takka tarmad akal ən Masar taqqama day-as har dak-æmælax assaxa wa du-za-tæqqæla, fêlas barar di ad igmøy Herod æd tanaxay-net.»

¹⁴ Inkar Yusæf, iddew æd barar d anna-net, eway ehad, obaz tarrayt ikka Masar.

¹⁵ Ɖqqiman day Masar den da har aba Herod. Arat wa iga fêl ad andu awal wa d-iga Ɖmæli æs tarrayt n ænnæbi Osay a day inna: «Ɖyre-du barar-in æssærdaxaq-q-idu Masar.»

¹⁶ As issan Herod as imusanan win manayan æmmizrayan batu-net æxlayan-tu, ixašašat, omar s ad tæwænxin bararan ən yayyan kul win æhæwnen day æxræm ən Betalxam, æd xælæyxælayan-net, a d-obazan xur æššin elan har azzaman win den, imos as tamert ten da as das-ænnan musanan win ænta day d-inafalal ætri. ¹⁷ Den day ad inda awal wa d-iga Ɖmæli æs tarrayt n ænnæbi Irmøya a day innâ: ¹⁸ «Tæga-du tækurayt day æxræm ən Rama, imos awen tala n aytedan fêl tæga tæfæyyawt. Awen Raxil ta n tæmarawt ən Kæl-Israyil tæhallit fêl bararan-net. Wær tæra i das-igan ælmaxiza, fêlas bararan æjwaran aba-tan.»

¹⁹ Dæffær tæmattant ən Herod, inafalal angalos n Ɖmæli i Yusæf day targæt, day akal ən Masar. ²⁰ Inn-as angalos: «Ɖnkær, tidawax æd barar di d anna-net, tæqqælax akal n Israyil, fêlas aytedan win æranen tenaxay-net, aba-tan.» ²¹ Inkar Yusæf, iddew æd barar d anna-net, iqqal akal n Israyil. ²² Mišan igraw isalan as Arkalawæs, a imosan æmænokal n akal ən Yahudøyya, day adag n abba-net Herod. Tæzzar tæggaz tasa Yusæf, ab-as ihal iki ən Yahudøyya, ikka akal ən Galilaya id Mæššina a das-d-isannafalalan awen day targæt. ²³ Iгла ixsar day æxræm as itawannu Nazaret. Ɖmmæk en day as ægan aratan win, fêl ad andu awal wa d-iga Ɖmæli æs tarrayt n ænnæbitan as ænnan: «Itawagg-as esæm aw Nazaret.»

3

Ɖsæmmutæg n æššæxæl wa z'agu Ɖlmæsix

Yaxya wa isalmaxan day aman

¹ Elan dæffær awen, issænta Yaxya wa isalmaxan day aman igi ən tælxutbat day taneray ən Yahudøyya. ² Igannu: «Utabat! Illikan as, Taxmar ta n jønnawan tahôz!»

³ Yaxya en day a fêl immægrad ænnæbi Isayas assaxa wad inna: «Alæs iyyan idkâl æmæslî-net day æsuf igannu: "Sæmmutægat abaraqqa y Ɖmæli! Tæsæssiædam tarrayen dat-æs!"»

⁴ Yaxya ilsa tabdoq tægât day anzadan n æmnæs, otâb s æsatæb n agašek. Iddâr s æjwalan æd turawat. ⁵ A t-in-tasin aytedan, ægmâdan-du Yerusalem, d akal ketnet wa n Yahudøyya, d amaðal kul wa n xælæyxælayan n agarew wa n Yordan, ⁶ tutaban day bakkadan-nasan dat tamattay, isalmaq-qan Yaxya day aman day agarew wen. ⁷ Osan-du Farisaytan aggotnen, æd Sadasaytan, y a tan-issælmæx Yaxya day aman. As inay Yaxya arat wen inn-asan: «Xa taššolen šin! Ma kawan-issosanan ædærræg y attadib wa d-izayan ən Mæššina? ⁸ Day adi taggiwat imazalan olaynen tæsættæddim sær-san tætuht-nawan! ⁹ Wær igda ad tægannim day man-nawan: "Nakkanay æzzurrøyya n ænnæbi Ibrahim a næmos," fêlas silakanax-awan as Mæššina ifrâg ad isæmmættøy šihun šin tæhannayam da, ixlæk-du day-asnat æzzurrøyya y Ibrahim! ¹⁰ Agat ænnøyat! Tazæft harwa æmæreda da tæmmotag y a du-tæsæddængær y eškan. Day adi ašek kul wa wær nætiræw aratan olaynen, ad itæwæxtæs, itæwægær-in day tæmsay! ¹¹ Nak, aman a daq qawan-salmaxa, fêl ad sænnæfilælax s awen tætuht-nawan. Mišan wa du-z-asin dæffær-i, awa di-iga day šigrat, wær eweda wala arra ən suxan ən xateman-net. Ɖnta Infas Wa Zæddigan æd tæmsay a daq qawan-z-issælmæx. ¹² Iha ælmital n

awedan ittâfan tesayt y ad izzəzər alkama-net. Işadaw alkama daɣ tadangawt-net, šiɣal amaran ag-enat daɣ təmsay təbilaglat faw.»

Alamay ən Ƴaysa

¹³ Adan en da daɣ d-osa Ƴaysa, igmâd-du akal ən Galilaya, ikka-du agarew wa n Yordan, y ad t-issəlməɣ Yaxya daɣ aman. ¹⁴ Mišan igmay Yaxya d a daɣ-as ikkəs awen. Inn-as Yaxya: «Nak a iddəraran s a di-təssəlməɣa daɣ aman, amaran kay iman-nak a di-d-ikkan?» ¹⁵ Ijjəwwab-as Ƴaysa inn-as: «Əmərədda ardu s arat wədi da, fəlas ilzam-anax ad nassandu arat kul wa ira Məššina.» Təzzar irda Yaxya s əsəlməɣ ən Ƴaysa. ¹⁶ Itawasalmaɣ Ƴaysa ɣas, igmad-du aman, ənnolaman jənnawan daɣ amazay wen da, ogga Infas ən Məššina as d-igmad ijənnawan, iha šaššelan ən tədabert, iwar-tu. ¹⁷ Igmâd-du əməsli ijənnawan inna: «Ənta əddi Barar-in əkne tara, amaran ənta a d-issəndan agna-nin.»

4

Ətəwəjərrab ən Ƴaysa

¹ Təzzar issoka Infas wa Zəddigan Ƴaysa taneray y a daɣ-as t-ajjarrab Iblis. ² As iga Ƴaysa əkkozat təmərwen n əzəl d əkkozat təmərwen n ahad izûm, iggaz-tu gələk. ³ Ihoz-t-idu Iblis a n ənəjjərrəb inn-as: «Kud kay Barar ən Məššina, taməra šihun a s ad əqqəlnat amensay.» ⁴ Mišan inn-as Ƴaysa: «Wərgəɣ ənnan Əlkəttaban: "Aggadəm wərgəɣ imensewan ɣas as itaddar, kalar isuddur-tu ad ilkâm y awal ketnet wa d-ifalan Məššina."»

⁵ Ikka dər-əs Iblis aɣrəm wa zəddigan ən Yerusalam, issəbdad-tu fəl afalla n Ahan wa Zəwwəran n Əlyibada, ⁶ inn-as: «Kud kay Barar ən Məššina, tətərəgge, fəlas ənnan Əlkəttaban: "Ad amər Məššina angalosan daɣ talɣa-nak, əkbəlan-kay daɣ fassan-nasan, fəl a dak-wər-tənkəf təhunt."»

⁷ Inn-as Ƴaysa: «Wərgəɣ za Əlkəttaban di ənnân: "Ad wər tətajjarraba Əməli-nak Məššina."»

⁸ Dəffər awen ikka dər-əs Iblis afalla n ədɣax iknan təzzəgrət, issəswad-tu daɣ taɣmaren kul n əddənet əd təhussay-nasnat, ⁹ inn-as: «Awa togge den kul əkfəɣ-akku as di-təssəjada təɣbadaɣ-i.» ¹⁰ Inn-as Ƴaysa: «Ugag-i, Aššaytan! Wərgəɣ ənnan Əlkəttaban: "Əməli-nak Məššina as za təssəjada, ənta ɣas a za təɣbada."»

¹¹ Amaran oyy-ay Iblis. Əhinan-in angalosan əkkân-du Ƴaysa əssanan daɣ-as.

Ənətti n əššəɣəl daɣ Galilaya

Ƴaysa issənta əššəɣəl-net daɣ Galilaya

¹² As isla Ƴaysa ətərməs ən Yaxya, iqqal akal ən Galilaya. ¹³ Mišan wər iqqim daɣ əɣrəm ən Nazaret. Kalar igla iɣsar daɣ təɣrəmt təgât Kafarnahum, təwârat təgadamayt n agaraw wa n Galilaya daɣ amaɣal ən Zəbulun əd wa n Naftali. ¹⁴ Əmmək en daɣ as inda awal wa d-iga Əməli əs tarrayt n ənnəbi Isayas a daɣ innâ: ¹⁵ «Akal ən Zəbulun əd wa n Naftali, əhanen əsəlim n agaraw wa n Galilaya, fəl təgadamayt ta n ataram ən Yordan, almayna Galilaya, ənta a daɣ əɣsaran aytedan win Kəl-Əlyəhud əd win tan-wər-nəmos! ¹⁶ Tamattay ta təhat šiyyay, tənay ənnur zəwwəran as imalawlaw, aytedan deɣ win əhanen akal wa təlsa təlay ən təmattant, əntanay da ibalazlaz fall-asan ənnur.»

¹⁷ Azzaman en da a daɣ iggaz Ƴaysa šin igi ən təlxutbat igannu: «Utabat, fəlas Taɣmar ta n jənnawan təhöz!»

Ətəwəɣra n əkkoz nalkiman win azzarnen

¹⁸ Əzəl iyyan ijiwankat Ƴaysa fəl təgadamayt n agaraw wa n Galilaya as inay əššin mədrayan, s iyyan esəm-net Simɣon was itawannu Butros, d amadray-net Andrawəs.

Meddan win inabazan ən kifitan a əmosan. As tan-inay fattawan dağ agaraw sangaytan-nasan win abbaz ən kifitan. ¹⁹ Inn-asan Ƴaysa: «Əlkəmat-i, a kawan-aga meddan sər-i du-za-tawaynen aytedan y a tan-assafsa dağ bakkadan-nasan.» ²⁰ Oyyan sangaytan-nasan dağ tamazayt ten da, əlkaman-as. ²¹ As iga Ƴaysa arat ən teklay dəffər awen, inay əşšin mədrayan wiyyad, əmosnen Yaqub d amadray-net Ƴaxya win maddanəs ən Zabaday. As tan-inay nimahan aɣlal n aman d abba-nasan Zabaday, kannin sangaytan-nasan win as tabazan kifitan. Iyr-en Ƴaysa. ²² Amazay wen dağ ad oyyan aɣlal-nasan, əfalan abba-nasan, əlkaman i Ƴaysa.

Isalan tiwəziwizan

²³ Issəwal Ƴaysa akal ən Galilaya ketnet, isasayru dağ nan n əlɣibada ən Kəl-Əlyəhud. Immâl Əlinjil, imosan isalan ən Taymar ta n jənnawan, izuzəy aytedan dağ əkkulluk ən təwərna, d əkkulluk n əlɣib. ²⁴ Emmək en dağ as itawasla Ƴaysa dağ amaɗal ən Surəya kul. A das-du-tamawayan aytedan kul win ərinnen, əd win t-əllanen d əlɣiban a əqqalan, əd win əssəranan kələsuf, əd win əlanen ikərəkkitan əd nəbdan, izuzəy-tan. ²⁵ Əlkâmnat-as təmattiwen aggotnen a d-əfalnen Galilaya, d akal was itawannu «Wa-n-Maraw-Ƴərman», əd Yerusalam, d akal ən Yahudəyya, d amaɗal wa ihan dənnəg ən Yordan.

İşşəxəl wa iga Ƴaysa dat aytedan kul dağ Galilaya əd xələyɣələyan-net

5

İsəssəyri wa azzaran: Təlxutbat ta təgat fəl ədyax

Taymar ta n Məşşina

¹ As inay Ƴaysa şimattiwen şin t-id-osanen den, iwar adyax. Iqqim den da, əhozan-tu nəttulab-net. ² Issənta əsəssəyri n aytedan win əllanen den. Inn-asan:

³ «Əbbilalan aytedan win əlləqqawnen dağ man-nasan, əqbâlan as əddiraran əs Məşşina

fəlas Taymar ta n jənnawan şin-nasan.

⁴ Əbbilalan win hallinen, fəlas a tan-isəddəwət Məşşina.

⁵ Əbbilalan win əssərəsnen iman-nasan, fəlas ad əgrəwan akal wa dasan-issənsa Məşşina.

⁶ Əbbilalan win əknanen deran n awa oɣadan, fəlas ad t-əgrəwan.

⁷ Əbbilalan win hanattatnen i naragan-nasan, fəlas əntanay da a dasan-ihənəttət Məşşina.

⁸ Əbbilalan win as zaddogan wallan-nasan, fəlas ad ənəyan Məşşina.

⁹ Əbbilalan win tagginen alxer, fəlas a dasan-əgu Məşşina esəm bararan-net.

¹⁰ Əbbilalan win tawadgaznen fəl igi n awa oɣadan, fəlas Taymar ta n jənnawan şin-nasan.

¹¹ Təbbilalam kawanay a rabbadan aytedan, ədgâzan-kawan, wər t-illa əzzənəf n əzğən a kawan-wər-əssəwaran, fəl əddəlil-in. ¹² Awalla, dawatat, təfəliwəsam, fəlas təlâm arozan aggotnen dağ jənnawan. Ənnəbitan win dat-wan, da əmmək wədi dağ as tawadgazan.»

Tesəmt d ənnur

¹³ Inn-asan Үaysa: «Kawanay tesəmt a təmosam y əddənet. Amaran as imos as tesəmt ta, ab-as təla tembay, məni əmmək was tat-du-za-tətəwəsuxəl tembay-net? Tesəmt ta, ab-as tənfa wala: wər təhor ar d a din-tətəwəgər sədi, a tat-dayyazan aytedan. ¹⁴ Ənnur n əddənet a təmosam. Ayrəm ikrâsan fəl afalla n ədyağ, wər t-illa awedan a tu-wər-za-nənəy. ¹⁵ Əmmək en dağ a təga fətəla: As tərğa, wər za tətəwəggu daw əxəzu! Kalar ətəwəgga a za tagu dağ adag iknan ahaku fəl ad təsəmmələwləw aytedan kul win əhanen ehan. ¹⁶ Əmmək di dağ as imələwləwet ənnur-nawan, dat aytedan kul, fəl ad ənəyan aratan olaxnen win tətəggim, awəy-du sər-san awen ad əmmâlan tanaya n Abba-nawan di ihan ijənnawan.»

Үaysa d Arkawal wa Irəwan

¹⁷ Inn-asan Үaysa: «Ad wər təxilam assa a d-əge y a din-əkkəsəy awa iktaban dağ Əttawret, madəy Əlkəttaban n Ənnəbitan. Wərgəy adi a d-əkke, kalar assa a d-əgey y a tan-assanda. ¹⁸ Əggiyyəy əsilakanəy-awan as: Iket əllan-tu jənnawan d amaḍal, Əttawret wər t-in-za-təgməd wala tətəbəqqet, amaran wala Үas əsakkal wər t-in-z-igməd iket wər inda arat kul wa dağ-as iktaban. ¹⁹ Awen dağ a fəlas awedan wa imməzrayan wala Үas alwajib wa ogaran təmmədrəyt, omar aytedan s ad agin awen da, awedan wədi ənta a z'agəran eres dağ TaҮmar ta n jənnawan. Mişan as imos as ibbirdag awedan y alwajiban win, isasəy-en y aytedan, wədi ad igrəw adkul dağ TaҮmar ta n jənnawan. ²⁰ Awalla, əmələy-awan âs as wər təgem i Məşşina əbərdəg ogaran wa das-əgan musanan n Əttawret, əd Fərisaytan, wədi wər za təggəzam TaҮmar ta n jənnawan.

Əmazal n awa itawannan: Əlmital dağ batu n alham

²¹ Təslâm as itiwanna y aljadan-nana dağ Əttawret: "*ad wər tagay iman.*"

As iga awedan iman, ad t-ibəz əşşəriya awwaddab. ²² Nak za ənnəy-awan, awedan kul wa iggaz alham n iyyan, wədi ad t-ibəz əşşəriya awwaddab. Awedan dəy kul wa innan y iyyan: "Anafnoz!" Wədi ad itəwəsəbdəd dat Asaggawar wa Zəwwəran as itawannu Sanhedrin fəl ad itəwəşrəy, amaran awedan wa innan y iyyan: "Kay amaros!" Wədi əşşəriya-net Jahannama. ²³ Dağ adi as du-təktey as išşak-kay awedan dağ amazay wa dağ du-tewayə təkutay-nak s adag wa n əsəqqəd ən təkutawen, ²⁴ tayya takutay-nak əddi da, tagla har tənəməsürəfa d awedan wədi, dəffər adi amaran təqqəla taga takutay-nak. ²⁵ As kay-issəwar awedan lahan, takna dər-əs tarmad iket di ad təhâm tarrayt. As wər iga adi, awedan wədi, ad išşəşiwəd batu tədi əlqali. Təzzar inkər əlqali ag-ik dağ fassan ən soji a kay-z-agin dağ kasaw. ²⁶ As iga adi amaran əggəyyəy əsilakanəy-ak as wər du-za-təgmədəy iket wər təyreda arazam n arat kul was kay-əwaran ərruzmatan-net. Wala tamma iyyadda wər din-za-taqqam.

Əmazal n awa itawannan: Əlmital dağ batu n əzzəna

²⁷ Təslâm as itiwanna: "*ad wər tagay əzzəna.*"

²⁸ Nak za ənnəy-awan awedan kul wa igan dağ təntut asawad dağ isidaran ənəmənəsa-net, wədi igâ dər-əs əzzəna dağ əwəl-net. ²⁹ Kud şat-nak ta n əxil a təbukət a dak-təqqəl əssəbab n igi n abakkad, təkəkkəreq-qat-du təgəraq-qat-in, id of-ak təgməd-kay təslət-nak iyyadda, y ad tətəwəgər təxəssa-nak kul dağ Jahannama. ³⁰ Amaran kud əfus-nak wa n əxil a ibukan a dak-iqqəl əssəbab n igi abakkad, təfrəsaq-qin təgəraq-q-in, id of-ak təgməd-kay təslət-nak iyyadda, y ad təggəz təxəssa-nak ketnet Jahannama.»

Əmazal n awa itawannan: Əlmital dağ batu n əməzzəy

³¹ Iglə Үaysa išşəwal, inn-asan: «Itiwanna dəy: "*I izammazzayan tantut-net, akfet-tat şirawt n əməzzəy.*"

³² Nak za silakanax-awan as i izammazzayan tantut-net fəl a wər nəmos igi ən meddan, wədi əsəssugi a tat-iga əzzəna, amaran as izlaf aləs iyyan tantut ta təmməzzayat da, wədi əzzəna a iga ənta da.

Emazal n awa itawannan: Elmital day batu ən təhuday

³³ Təslām dəx as itawanna y aljadan-nana: "Ad wər təhhadam fəl arat, taqqamim wər tu-təmmozalam. Kalar sabdadat arkawalan win fəl təhadam s esəm n Əməli."

³⁴ Nak za ənnəx-awan, ad wər təhhadam fəl arat waliyyan fadda: Gər za əs jənnawan, fəlas edag n əlxəkum ən Məššina a mosan, ³⁵ wala dəx təhədam s amaḍal, fəlas ənta a illan daw daran-net, wala dəx təhədam əs Yerusalam, fəlas ənta a təmosat axrəm n Əmənokal wa Zəwwəran, a t-imosan Məššina. ³⁶ Ad wər təhhaday ənta da s axaf-nak, fəlas wər təfregax əsəmləl n anzaḍ-net waliyyan da, wala dəx əsəkwəl-net. ³⁷ Ganniwat xas: "Ayew" y awa imosan tidət, madex "kala" y awa imosan bahu. Batu a du-təššotam fəl adi kul Aššaytan as du-təha.

Emazal n awa itawannan: Elmital day batu n əzəzəl

³⁸ Təslām as itiwanna: "I d-ikkasan šat n iyyan a du-tətəwəkkəs šat-net ənta da, i d-irzan ešen n iyyan a d-itəwərzə ašen-net."

³⁹ Nak za ənnəx-awan ad wər tətəgazam iman-nawan dəx amaksan. Kalar as dak-iqqas fəl əmdəd-nak wa n əxil, takfaq-qu əmdəd-nak wa hadan. ⁴⁰ As ira awedan a kay-ibəz s əššərixa fəl ad igrəw alxaššaba-nak, takfaq-qu əbərnuz-nak da. ⁴¹ As kay-išahhaššal awedan aggay ən lalan-net har əgim ən takkolt, tawəyax-as-tan har əššin gim ən takkolt. ⁴² I kay-onsayan takfaq-qu, i dağ-ak igmayan əmarwas, a das-tu-wər-təgdəla.

Emazal n awa itawannan: Elmital day batu ən tara n əzənga-nana

⁴³ Təslām as itiwanna: "Iru anammaray-nak, təgzəray azangaw-nak." ⁴⁴ Nak za ənnəx-awan: Iriwat izənga-nawan, ad tətəggim šiwatriwen olaynen y aytedan win kawan-əsasnen, ⁴⁵ fəl ad təqqələm əs tidət da bararan n Abba-nawan wa ihan ijənnawan. Ənta a d-isagmadan təfuk-net fəl aytedan win maksanan əd win olaynen, isawat akonak-net fəl win oxadnen əd win nəmməzray. ⁴⁶ Kud wər tarem ar aytedan win kawan-əranen, awak ma imos aroz wa za təgrəwam dəx awen? Wərgəx aytedan win zarzammen takəsen a əmosnen imaksanan da awen dəx a əgan? ⁴⁷ As imos as imədrayan-nak xas a tarex təsaslamaq-qan, awak ma imos arat immittayan wa təgəx? Wərgəx aytedan win wər nəssen Məššina da adi dəx a taggin? ⁴⁸ Dəx adi kawanay, əqqələt aytedan əkməlne şilat n Abba-nawan wa ihan ijənnawan.»

6

Esəssəyri igân fəl təlmənufəqa dəx əddin

¹ Iгла Ҷайса ишсевал, инн-асан: «Энкəдат д иги н əлхибада имосан сокни. As wər iga adi wər za təgrəwam arozan xur Abba-nawan wa ihan ijənnawan.»

² «As tətəgga takutay y amaddarar, ad wər iqqəl adi arat təsinafalala, zun awa taggin əlmunafiqan dəx nan n əлхибада ən Kəl-Əlyəhud, əd tarrayen, fəl tara n ad əgrəwan adkul xur aytedan. Əggəyyəx əsilakanax-awan as əlmunafiqan win di arozan-nasan əgrəwan-tan. ³ Kay amaran, as tətəgga takutay, ad wər issən əfus-nak wa n zalgat awa itaggu wa n əxil, ⁴ fəl ad təqqəl təkutay-nak əssir. Abba-nak s ənta a ihannayan əssiran, a dak-z-irzəman.»

⁵ «As tətattaram, ad wər tətəggim awa taggin əlmunafiqan ərānen ad tattaran əbdadan dəx nan n əлхибада, əd sammanayan, əgmāyan s awen a tan-ənəyan aytedan. Əggəyyəx əsilakanax-awan as arozan-nasan əgrəwan-tan. ⁶ Kay amaran as tətəgga šiwatriwen, təggəzax dəx ahan-nak edag wa ogaran ənəməggag d aytedan,

təxfəlaq-q-in fəl man-nak, tətəra daɣ əssir s Abba-nak id illa əddi. Abba-nak s ənta a ihannayan əssiran, a kay-z-akfin arozan. ⁷ As tətattaram, ad wər tətəggam awal aggen tēgannam arat iyyanda zun awa taggin aytedan win wər nəssen Məššina, əɣilnen wər dasan-z-aslu Məššina ar s ad taggin awal aggen. ⁸ A tan-wər-tattalalam, fəlas Abba-nawan, issân awas tēddəraram da harwa wər daɣ-as tu-təgmayam.

⁹ Təwatray da tas ihor a tat-tətəggim kawanay:

"Abba-nana wa ihan ijənnawan,
Itəwəsəɣməret esəm-nak di zəddigan,

¹⁰ taset-du Taymar-nak.

Tətəwəmižəlet tara-nak fəl amadal
s əmmək was tətəwamazal daɣ jənnawan.

¹¹ Akf-anax isudar-nana win azalada;

¹² təssurəfəɣ-ana tādłəmt ta nəga
zund əmmək as nakkanay da
nəssoraf i win danaɣ-ədlammen.

¹³ A dana-wər-tagə daɣ aɣarar ən jarrabatan,
kalar agəz-ana daɣ Iblis,
[fəlas taɣmar, əd tarna, əd tanaya ši-nak har faw.
Amin."»]

¹⁴ «As təsurufam y aytedan arak mazalan win dawan-əgan, kawanay da a dawan-issurəf Abba-nawan wa ihan ijənnawan. ¹⁵ Mišan as wər təsurufam y aytedan, wədi Abba-nawan wa ihan ijənnawan wər dawan-z-issurəf arak mazalan win tēgam.»

¹⁶ «As təzumam ad wər təsənnəfiləlam təkənzert zun awa taggin əlmunafiqan, əntanay a samattaynen udmawan-nasan fəl ad əssusənan aytedan kul as əzuman. Əggəyyeɣ əsilakanax-awan as aytedan win di, arozan-nasan əgrāwan-tan harwa əmərədda. ¹⁷ Kay amaran, as təzumax, təšširədaɣ udəm-nak, tagə alwardi, ¹⁸ fəl ad wər əssənan aytedan as təzumax. Abba-nak ɣas a z'issənan daɣ adi, fəlas illa əddi daɣ əssir, ihannay awa itaggin, amaran ənta a dak-z-irzəman.»

Addararat ta nəga əs Məššina

¹⁹ «Ad wər təšadawam tēgərgist daɣ əddənət, a daq-qat za təhlək tamaday əd tənək, razzan deɣ baydagan inan takaran. ²⁰ Kalar šidəwat i man-nawan tēgərgist daɣ jənnawan, a daq-qat wər za təhlək tamaday za wala tənək, wala deɣ assin-tat-in baydagan win razzinen inan takaran. ²¹ Fəlas edag wa təha tēgərgist-nak, ənta a z'iggəz əwəl-nak.»

²² «Šittawen šilat ən fətəla a əmosnat i təɣəssa-nak. As imos as šittawen-nak əhannaynat s əlluɣ, wədi təɣəssa-nak ketnet təha ənnur. ²³ Mišan as imos as šittawen-nak wər əhənnəynat s əlluɣ, wədi təɣəssa-nak ketnet təha šiyyay. Daɣ adi as imos as wala ənnur wa ihan təɣəssa-nak da imos šiyyay, wədi ad tēggəza šiyyay wər nəmməkkan! ²⁴ Wər t-illa i ifrāgan əššəɣəl y əššin muzaran. Wa ɣas ikyad iyyan daɣ-san, iru wa hadan, madəɣ abbardag y iyyan, alku wa hadan. Wər təfregax ad təɣbədə Məššina, tagla deɣ tozāla dəffər əddənət.»

²⁵ «Daɣ adi ənneɣ-awan a kawan wər təššəwəš təməddurt, gər awa za tatsim, wala awa za tašwim, wala awa za talsim. Iman-nawan wərgəɣ ogaran imensewan, təɣəssa-nawan deɣ togar isəlsa? ²⁶ Əswədət daɣ gədad a taggadnen daɣ alhawa, wərmad nabbalan za wər tiləyan, wər šidiwan wala daɣ tədangawen, mišan issodar-tan Abba-nawan wa ihan ijənnawan. Kawanay wərgəɣ togaram-tan almaqam sen ɣur Məššina? ²⁷ Məni daɣ-wan wa ifragan s aššawaša-net əšitəy ən təɣrəst-net əs wala ellaf ən šat? ²⁸ Mafel as kawan-təššəwəš talɣa ən səlsa? Ənzərat-in daɣ əmmək was du-daggalnat təjigawen daɣ əsuf. Wərmad šaqqalnat wala zattinat

isælsa, ²⁹ mišan ənnəx-awan, wala Əmənokal Suliman harkid təgərgist-net kul, wər kala ad ewad wala iyyadda daɣ-asnat daɣ təhussay ən talassay. ³⁰ Dad isalsu Məššina yel əs təməwit tədi, s azalada ibdād, tufat ad itəwəsərxu daɣ təjəngərert; manəmmək as kawan-wər-z-assalsu, kəl əzəgzan əndərran!»

³¹ «Daɣ adi ad wər təššəwəšam təgannim: "Ma za natšu?" Madeɣ: "Ma za našəw?" Madeɣ: "Ma za nalsu?" ³² Aratan win kul aytedan win wər nəssen Məššina a ozalnen daɣ agamay-nasan, amaran kawanay Abba-nawan wa ihan ijənnawan, issân as təddiraram sər-san. ³³ Əgməyat təzzar Taɣmar ta n Məššina d aqqad dat-əs, as iga adi aratan win di kul a kawan-tawəkfin əntanay da. ³⁴ Daɣ adi a kay-wər-iššəwəš arat wa d-izayan tufat, fəlas tufat ad təššəwəš əd təməɣutar-net. Əzəl kul ila šiməɣutar-net a das-əgdānen.»

7

Alxal wa iwaran ənalkim ən Ƴaysa, gar-es əd Məššina d aytedan

¹ Iɣla Ƴaysa iššəwal-asan, inna: «Ad wər tannim ark arat s awedan fəl a sər-wan wər itəwənnu kawanay da. ² Fəlas əmmək was təkəkamam, ənta as za tətəwəxkəmam kawanay da, amaran təsəkət tas təkəkatam y aytedan, ənta as dawan-z-ikət Məššina. ³ Mafel tahannaya tezawt ta təhat šat n amadray-nak, kay amaran wər din-təgrəɣ šiləlt ta təhat šat ta-nak. ⁴ Manəmmək as za tanna y amadray-nak, "ayy-i a dak-əkkəsa tezawt ta daɣ šat-nak", kay amaran šiləlt a təhat šat ta-nak? ⁵ Əlmunafiq, əkkəs təzzar šiləlt ta təhat šat-nak, əddi ad za tannaflaya daɣ tazawt ta təhat šat n amadray-nak təkəkəsaɣ-as-tat!

⁶ A din-wər-təggaray arat zəddigan madeɣ arat ilân almaqam i maksanan fəlas wər əzlayan əd dan a kawan-du-milallaynen y a kawan-ədədan, madeɣ iladayan hallaknen aratan win əlanen almaqam.

⁷ Ansəyat Məššina, a kawan-akfu; əgməyat, ad təgrəwam; aɣriwat-tu a dawan-akkawan; ⁸ fəlas i onsayan, ad itəwəkfu, i igmayan ad igrəw, i iɣran deɣ Məššina a das-akkawan. ⁹ Məni daɣ-wan wa daɣ z'igməy barar-net tagəlla akf-ay təhunt? ¹⁰ Wala igməy daɣ-as isan akf-ay taššolt? ¹¹ Dad zamməs wala kawanay an nəllubas da təssānam tehakkay n awa olaɣan i bararan-nawan, manəmmək as kawan-wər-z-akfu Abba-nawan wa ihan ijənnawan awa tu-tonsayam?

¹² Taggiwat y aytedan arat kul was təram a dawan-t-agin. Ənta da da arat wa ihan əššəriɣa wa n Əttawret, d Əlkəttaban n Ənnəbitan.

Igi daw aɣaf

¹³ Əggəzat s əmi wa kəruzan s ənta a itawayan əs taɣmar ta n Məššina! Iket ilwi ig-ay əmi wa itawayan s əhluk, iket əsənnəfləy təg-ay tarrayt ta tətawayat s əhluk, amaran əggətan aytedan win as ənta as taggazan. ¹⁴ Mišan iket takrazt ig-et əmi wa itawayan əs təməddurt, iket deɣ əsəməɣitər təg-ay tarrayt ta tətawayat əs təməddurt, amaran wər əggətan aytedan win tan-garrawnen.

¹⁵ Ənkədat y ənnəbitan win bahu. As kawan-du-tasin əmosan zun ayfəd, mišan əs tidət iridalan a əmosan əknanen ašsar. ¹⁶ Arat wa du-saxsalan as tan-za-təzdəyam. Awak aɣyanab itāwankad-du daɣ tazzayt? Wala itāwankad-du fig daɣ təgaroft? ¹⁷ Əmmək en daɣ as ašək isxân a d-itarawan âratän olaɣnen, amaran ašək wər nəsxə itaraw-du win wər noleɣ. ¹⁸ Ašək isxân wər ifreg ara n âratän wər noleɣ wala deɣ ifrag ašək wər nəsxə ara n âratän olaɣnen. ¹⁹ Ašək kul wa wər nətirəw âratän olaɣnen, wədi ətəwəxtas a itawaggu, itəwəgər daɣ təmsay. ²⁰ Daɣ adi illikan as ənnəbitan win bahu awa du-saxsalan as tan-za-təzdəyam.»

²¹ «Wər igda i di-igannin: "Əməli, Əməli!" Wər izzogaz awen awedan Taɣmar ta n jənnawan, kalar kundaba i itamazal əs tara n Abba-nin ihân ijənnawan. ²² Əzəl

wa ilkaman aytedan aggotnen a di-annin: "Ɛməli, Ɛməli! Awak wərgex esəm-nak as nəmal y aytedan isalan win fall-ana du-təzazzabbe? Awak wərgex ənta əs nəstax kələsuf? Nəga sər-əs təlməxjujaten aggotnen?" ²³ Ɛddi a dasan-anna: "Wər kala a kawan-əzdayax. Ugagat-i inəmməzray ən Məşşina!"»

²⁴ «Dağ adi awedan kul wa issəsaman y awal-in wa, immozal-tu, wədi iha əlmital n aləs n əməli ən tayttay ikrasan ehan-net fəl təsəlit. ²⁵ Iwat akonak, əgan əngəytan əssohatnen, əgarnat-du təzəkwen, əstaban y ahan en, mišan wər uda fəlas təsəlit a fəl ibna. ²⁶ Amaran awedan kul wa issəsaman y awal wa əge da, iqqim wər t-immozal, wədi iha əlmital n aləs wər nəla tayttay, ikrasan ehan-net fəl əzazəl. ²⁷ Iwat akonak, əgan əngəytan əssohatnen, əgarnat-du təzəkwen, istab awen y ahan wa nad, ibarajjat, ilyam-in ketnet.»

Tanaya ən Ɛaysa

²⁸ As iğrad Ɛaysa alfaydaten šin, təqqim tamattay isimaklal sər-əs əmmək was itaggu əsəssəğri-net. ²⁹ Fəlas ig-asan əsəssəğri n awedan ilân tanaya wər əlen musanan-nasan win Ɛttawret.

8

Təlməxjujaten əd tanaya ən Ɛaysa

Ɛzuzəy n awedan iğrâw kətru

¹ As d-izzəbbat Ɛaysa adğax wen, təlkâm-as tamattay tagget. ² Ihin-in Ihoz-t-idu awedan təgrâw təwərna ən kətru, issəjad dat-əs, inna: «Ɛməli, as tarex adi təfrâğax a di-təzzuzəyax, izdaga.» ³ Izzal-in Ɛaysa əfus-net, idas-tu inna: «Arex adi əzzəy tizdaga!» Amazay wen da dağ izzay aləs wen dağ kətru, zəddig. ⁴ Inn-as Ɛaysa: «Ɛnəy za, ad wər təməla y awedan waliyyan arat wa igan da, amaran aglu tassaknağ iman-nak y əlimam, taga takutay ta kay-issəwar əşşərixa n ənnəbi Musa, ad iqqəl adi y aytedan təgəyya ən təməzzəyt-nak.»

Ɛzuzəy n amaşşaxal ən kabtan ən Kəl-Ɛrrum

⁵ Amazay wa da dağ in-itaggaz Ɛaysa tayrəmt ən Kafarnahum, ənta dağ t-in-ikka kabtan iyyan ən sojitan n Ɛrrum, onsay-tu, ⁶ inn-as: «Ɛməli, amaşşaxal-in a din-oyye isrâd dağ ağaywan, ibdân, idgâz wəllen.» ⁷ Inn-as Ɛaysa: «Nak iman-in a tu-z-akkin əzzuzəyaq-qu.» ⁸ Inn-as kabtan en: «Ɛməli, nak wər əwedax ad təggəzax ehan-in. Annu arat ɣas ad izzəy amaşşaxal-in. ⁹ Ɛssâna dağ adi fəlas awedan a əmosax a dağ əttafan wiyyad tanat, əttâfaq-qat nak iman-in dağ sojitan win daw-i əllanen. As ənnəx y iyyan: "Aglu", ad aglu, as ənnəx y iyyan: "Iyyaw", a di-d-asu. As ənnəx y əkli-nin: "agu awa", ad t-agu.» ¹⁰ As isla Ɛaysa y awa inna kabtan en, isammaklal sər-əs, inna y aytedan win das-əlkammen: «Ɛggəyyəx əsilakanax-awan as: wər ənayax awedan waliyyan dağ Kəl-Israyil igân əzəgzan ewâdan wa iga aləs a.»

¹¹ «Ɛsilakanax-awan as aytedan aggotnen a d-əfəlan dənnəg d ataram, nəyimin d Ibrahim, d Isəhaq, əd Yaqub, ədrəwan dər-san iməgura dağ Taymar ta n jənnawan. ¹² Mišan Kəl-Ɛlyəhud aggotnen s əntanay as tətawasamatag Taymar ta, win di a din-təwəbdəğan sədi dağ šiyyay, ad hallin əddadan idədwən-nasan fəl təmagraz.»

¹³ Amaran inna Ɛaysa i kabtan wa nad: «Ɛqqəl ağaywan-nak, aget-ak Məşşina arat wa dağ-as təgmaya fəl əzəgzan-nak.» Təzzar izzay amaşşaxal ən kabtan wen dağ amazay wen da.

Tədaggalt ən Butros

¹⁴ Dəffər adi ikka Ɛaysa ehan ən Butros. Inay tədaggalt ən Butros təsrâd, tənnid, ¹⁵ idas əfus-net, təwat fall-as tanaday, tənkar-du a tu-təsimeğurit.

Æzuzəy ən Ƴaysa aytedan aggotnen

¹⁶ As tuda təfuk, əmmewayan-as-du aytedan aggotnen əssiranan kələsuf. Ixrad Ƴaysa asatəy ən kələsuf winad əs təfert iyyadda. Izzozay dəy imiranan kul win əllanen den. ¹⁷ Emmək wen dəy as inda awal wa d-iga Əməli əs tarrayt n ənnəbi Isayas a dəy innâ: «Ənta a idkalan əlxiban-nana, idkal fəl iri-net šiwərnawen-nana.»

Ləkkum i Ƴaysa

¹⁸ As inay Ƴaysa tamattay təxilayxalay-tu, omar inəttulab-net s a dər-əs idawan əxrəsan əs tagadamayt ta hadat n agaraw. ¹⁹ Ikk-ay-du əmusan n Əttawret iyyan inn-as: «Əššex, a dak-əlkəməy s adag kul wa təkkeç.» ²⁰ Inn-as Ƴaysa: «Izagazan əlân enwan, igədad dəy əlân šisəllula, mišan nak Ag Aggadəm wər ələy wala edag a dəy əssənsəy eçaf-in.» ²¹ Inn-as ənalkim-net iyyan: «Əməli, akf-i turagat n ad agla har din-ənbələy abba-nin təzzar.» ²² Mišan inn-as Ƴaysa: «Əlkəm-i tayyay inəmməttan ad ənbəlan inəmməttan-nasan.»

Æzərəz ən Ƴaysa tazafa

²³ Dəffər adi iggaz Ƴaysa axlal n aman, ənta əd nəttulab-net, əqlan. ²⁴ Wala a ihogan təgar-du tazafa labasat fəl agaraw, ad əggatnat tənazzamaren axlal. As itaggu awen Ƴaysa ənta insâ. ²⁵ Əhazan-t-in nəttulab-net, a tu-sankaran dəy etəs gannin-as: «Əməli, agəz-ana! Nakkanay nəjwâr nəhlâk!» ²⁶ Inn-asan: «Mafel təhiwan tasa togdat d awa, kəl əzəgzan irkaman?» Inkar-du Ƴaysa, isannarçam y ađu d agaraw, əxradan adrur d əsəssəmmi. ²⁷ Arat wa iqqan içafawan-nasan, ad gannin: «Ma imos wa dəy awedan, as wala ađu d agaraw da ittâf dəy-san tanat.»

Æzuzəy ən Ƴaysa əššin aytedan əgrâwan kələsuf

²⁸ As iwar Ƴaysa aganna wa hadan n agaraw, dəy akal ən Gadaratan, əssəlkadan-as-du əššin aytedan əssiranan kələsuf, əgmadan-du sər-əs izəkwan. Aytedan win awa əgan dəy tallabəst, wər t-illa i ihalan a d-akəy dəy adag wen. ²⁹ Saçaren-as-du gannin: «Ma dəy-na tare, Barar ən Məššina? Awak assa du-təge y a dana-təsəkkərure da wər du-tewed təmastant?» ³⁰ Ənta illât-tu əsəgən aggen ən ladayan ədânnen dəy igəg-nasan dən, ³¹ onsayan kələsuf win Ƴaysa ənnan-as: «As dana-təstəy, təssukəç-anəy əsəgən en ən ladayan en.» ³² Inn-asan: «Aglat!» Təzzar əgmadan kələsuf meddan win əššin en, əkkan iladayan əggazan-tan. Amazay wen da dəy d-əwafan ladayan win den kul fəl azadaga ən təkəşwart, çartattawan ad tifataqqən dəy agaraw, əlammazan-tan aman. ³³ Təzzar ozalan madanan ən ladayan winad s əxrəm, əssoçalan arat kul wa igan den y aytedan, d awa igan fəl meddan win əssəranan kələsuf en. ³⁴ Den dəy a d-əxradan kəl əxrəm wen agamad, əssəlkadan-du i Ƴaysa, onsayan-tu ad igməd akal-nasan.

9

Æzuzəy ən Ƴaysa anabdon

¹ Təzzar iggaz Ƴaysa axlal n aman, içras agaraw, ikka təçrəmt-net Kafarnahum. ² Ewayan-as-du aytedan anabdon ihân təssut-net. As inay Ƴaysa əzəgzan-nasan, inna y anabdon: «A kay wər iššəwəš wala barar-in! Ibakkadan-nak tiwasarafan-ak!» ³ Təzzar ənnan arat dəy musanan n Əttawret wiyyad dəy man-nasan: «Aləs wa əmadraw a itaggu!» ⁴ Inn-asan Ƴaysa issânan dəy awa samadranan: «Mafel tətəggim arak medranan win dəy wallan-nawan?» ⁵ Awak ma ogaran tərçəsəy gər i innan: "Ibakkadan-nak tiwasarafan-ak", meç ak i innan: "Əbdəd jəwənkət?" ⁶ Amaran areç ad təssənam as nak Ag Aggadəm, ələy dəy əddənət tanaya a di-təšišawadat ad əssurəfa y awedan ibakkadan-net.» Təzzar inna Ƴaysa y anabdon:

«Ebdæd, tædkæla tæssut-nak takkaḡ aḡaywan-nak.» ⁷ Ibdad aləs wen ikka aḡaywan-net. ⁸ As ənayat tamattiwen arat wen, təḡrad-tanat tasa iguz, ad tagginat tæmmalen i Məššina a ikfan tarna togdat d awen y aggadəm.

Ḡaysa æd Matta æd nasbakkadan

⁹ Ifal Ḡaysa edag wen, illam-du dagma n aləs iyyan igân esəm Matta, iqqiman daḡ adag wa n əzərzəm n əzrəf wa n takəs, inn-as: «Elkəm-i!» Təzzar ibdad Matta ilkam-as. ¹⁰ Əzəl iyyan, iha Ḡaysa aḡaywan ən Matta, ənta d aytedan aggotnen ən nəzzərzam ən takəsen æd nasbakkadan, idrâw dər-san imensewan ənta æd nəttulab-net. ¹¹ Ənayan Farisaytan arat wa, ənnan i nəttulab-net: «Mafel idrâw əššex-nawan æd nəzzərzam ən takəsen æd nasbakkadan?» ¹² Isl-asan Ḡaysa, inna: «Aytedan win wər nəla əḡəli, wər əddəraran s anasmagal, imiranan a sər-əs əddərarnen. ¹³ Agliwat tæssənam almayna ən batu ta iga Məššina as inna: "Təhanint a are, wərgəḡ šikutawen." Wər d-oseḡ fəl a d-aḡraḡ aytedan win ḡur iga as oḡâdan, kalar inasbakkadan as d-əmmozaala y a tan-d-aḡra əqqəlan inalkiman-in.»

Amagrad wa iga Ḡaysa daḡ batu n əzum

¹⁴ Təzzar əkkan-in nəttulab ən Yaxya Ḡaysa ənnan-as: «Mafel nakkanay æd Farisaytan nətuzam faw, amaran kay inəttulab-nak wər tuzaman?» ¹⁵ Ijjəwwab-asan Ḡaysa inn-asan: «Ak ilagatan a ḡur illa amazlay zakanzaran? Mišan əlkâman adan a ḡur-san z'ammadkal əmazlay: əddi amaran ad z'uzaman. ¹⁶ Wər t-illa i z'iwətan šikəst taynayət daḡ tabdoḡ waššarat, fəlas əddi šikəst ta din-təttəwatat, a du-təzəkkəwənzəz tabdoḡ ta waššarat, təzzar təššit-as azarru wəllen. ¹⁷ Wər t-illa deḡ i z'agin esmad n alḡanab aynayan daḡ gədad, fəlas as iga adi, ad abbaqqen gədad win, təzzar affatu daḡ esmad æd gədad. Kalar arat wa ihoran, ad itəwəggu esmad wa aynayan daḡ bəyaḡ aynaynen, əmmək wədi daḡ as z'ixləs esmad harkid bəyaḡ.»

Əssənkər ən Ḡaysa təbarart daḡ tæmattant d əzzuzəy-net tantut

¹⁸ Iššəwal-asan Ḡaysa den daḡ as d-osa iyyan daḡ muzaran ən Kəl-Əlyəhud, issəjad dat-əs, inn-as: «Təbarart-in a aba əmərədda, mišan ya, əssanaḡ âs as du-tose tæssəwəraq-qat əfus-nak, a du-tənkər.» ¹⁹ Təzzar inkar-du Ḡaysa, ilkam-as, əddəwan dər-əs nəttulab-net.

²⁰ Təllat-tu təntut təgat maraw elan d əššin igammad-tat əzni, təhoz-du Ḡaysa sa sər təḡərden, tədas təbənək ən təkadkat-net, ²¹ fəlas tənna a təga daḡ man-net: «Iḡda ḡas ad ədəsa təkadkat-net, ad əzzəya.» ²² Imalallay-in Ḡaysa inay-tat, inn-as: «Ad wər təḡšəda təbarart-in! Əzəḡzan-nam sər-i a kam-izzozayan.» Amazay wen da daḡ təzzay təntut ten.

²³ Dəffər awen ikka Ḡaysa ehan n əmuzar ən Kəl-Əlyəhud wanad. As din-ewad Ḡaysa, inay imawatan ən təsənsəḡ šin təfəyyawt, d aytedan nijarwaynen, əḡân tərmuḡ. ²⁴ Inna: «Awedan kul irdəḡet! Təbarart di wər tat-aba, etəs ḡas a təga!» Təzzar əgan-tu aḡjab. ²⁵ As tətawasardaḡ tamattay ten, iggaz Ḡaysa ehan wa təha təbarart ta aba, obaz əfus-net, issənkər-tat-du. ²⁶ Wazawazan salan n awa igan den, daḡ akal ketnet.

Əzuzəy ən Ḡaysa əššin məddəryal

²⁷ As ifal Ḡaysa edag wen, əlkâman-as əššin məddəryal, saḡaren gannin: «Ya Ag ənnəbi Dawəd! Hənəttət-ana!» ²⁸ As din-ewad aḡaywan, iggaz ehan, əhozan-t-in məddəryal win den, inn-asan: «Təzzigzanam as əfragay igi n arat wa təram əddi?» Ənnan-as: «Awalla, Əməli.» ²⁹ Təzzar idas šittawen-nasan, igannu: «Itəwəgḡiwet-awan arat wa inamannakan d əzəḡzan-nawan.» ³⁰ Den daḡ ad əḡrawan asawad-nasan. Ig-asan Ḡaysa tarḡəmt tæssohet, inn-asan: «Ənkədat y ad issən a imosan

awedan day awa dawan-äge da.» ³¹ Mišan as əglaŋ, əzəwwazawazan isalan-net day akal ketnet.

Əzuzəy ən Ƴaysa awedan əgrâwan kələsuf, immidad əmi-net

³² Əfalan Ƴaysa Ƴas immeway-du sər-əs awedan as immidad əmi-net, id əggəsuf a t-izdaƳan. ³³ İkkas Ƴaysa əggəsuf wen Ƴas, iggaz awedan was immədəd əmi-net den šin awal. İsimaklal awen əs tamattay, ad təgannu: «Arat wa wər kala tətawanay tulat-net day İsrayil!» ³⁴ Farisaytan amaran əntanay gannin: «Əmənokal ən kələsuf a t-ikfan fərregat n ikus ən kələsuf day aytedan.»

Təwatray ta n əzəmmizəl ən maššaxalan

³⁵ İllil Ƴaysa iƳərman əd təƳarmaten kul, isasaƳru day nan n əlƳibada ən Kəl-Əlyəhud, itaggu isalan n Əlinjil imosan isalan ən TaƳmar ta n Məššina, izuzəy deƳ aytedan day əzzənəfan kul ən təwərnawen d əlƳiban. ³⁶ As inay tamattay, təggaz-tu təhanint-net, fəlas arkanay a ənnayan, tiwayyan əd man-nasan, əmosan zun ayfəd wər nəla amadan. ³⁷ Təzzar inna i nəttulab-net: «Ƴarat təggət, mišan wər əggətən maššaxalan win tat-z-aləynen. ³⁸ Day adi əttərat s esəm ən məššis ən Ƴarat ta, a d-assaglu imaššaxalan a tat-olaynen.»

10

Əzəmmizəl ən nəttulab win maraw d əššin

¹ İƳra-du Ƴaysa əs man-net inəttulab-net win maraw d əššin, ikf-en tarna n ikus ən kələsuf day aytedan, d əzuzəy n a təqqal təwərna, d a iqqal əlƳib. ² Əntanay da esmawan ən nəmmuzal win maraw d əššin: Wa azzaran esəm-net SimƳon, itawann-as Butros, d Andrawəs wa n amadray-net, əd YaƳub wa n ag Zabaday, əd Yaxya wa n amadray-net, ³ əd Filibus, əd Bartulamawəs, əd Tuma, əd Matta wa izarzaman takəsen, əd YaƳub wa n ag Alfay, əd Tadday, ⁴ əd SimƳon was itawannu wa İsggatakken, əd Yahuza was itawannu İsxarəyuti s ənta a z'agin Ƴaysa day fassan.

İsəssəƳri wa n əššin: ƏššəƳəl ən nalkiman d alyazab-nasan

Ammaran win iga Ƴaysa inalkiman-net

⁵ Əntanay da da maraw nəttulab d əššin win izammazal Ƴaysa dəffər as tan-omâr inn-asan: «Ad wər tətakkim aytedan win wər nəmos Kəl-Əlyəhud, wala deƳ təggəzam aƳrəm waliyyan ən Kəl-Samarəya. ⁶ Kalar akkiwat Kəl-İsrayil, win əmosnen zun ayfəd əssiggalnen. ⁷ Agliwat a dasan-tətaggim isalan n âs TaƳmar ta n jənnawan təhöz-du. ⁸ Zuzəyat imiranan, a du-təsankaram inəmməttan, təzzuzəyam aytedan win igrav kətru, təzzəzdəgam-tan, ad tətâkkasam kələsuf day aytedan. Bannan as tətawakfam, day adi kawanay da hakkiwat bannan. ⁹ Ad wər tətawayam urəƳ, wala azrəf, wala deƳ a təqqəl tafelt day nəfdan-nawan, ¹⁰ wala deƳ aƳrəƳ day əšikəl-nawan, wala təkadkat ta n sanatat, wala təsəsəlt ta n sanatat, wala tallaq. Əssənət as edag tosam ad tətəwəsəməgurem fəlas imaššaxalan-in a təmosam, amaran amaššaxal kul ila alxaq n ad igrəw a itša. ¹¹ As du-təggazam aƳrəm, madeƳ taƳrəmt, təgməyam awedan wa inahaggan d a Ƴur-əs təssəgənam, taqqamim Ƴur awedan wədi da har assaƳa a day təgmadam aƳrəm wədi. ¹² As du-təggazam ehan tannim: "Alxer fall-awan!" ¹³ Kud aytedan n ahan wədi nihaggan d a Ƴur-san təssəgənam, wədi təwatray n alxer ta dasan-təgam a fall-asan təqbel, mišan as wər nahaggan d a Ƴur-san təssəgənam, wədi təwatray ten wər za təqbel fall-asan. ¹⁴ As wər tətawaqbalam, wər itawasasam deƳ i batu-nawan day aƳrəm wədi, made day aƳaywan wədi, təgmadam-tu, tabbakbakam-in əgodrar-net wa iwaran idaran-nawan. ¹⁵ ƏggəyyeƳ əsilakanax-awan as, əzəl wa n tabadday, aytedan n aƳrəm wədi, ad agin alƳazab ogaran wa z'agin win amađal ən Sədom əd Gamora.»

Amagrad ən Ƴaysa s awa z'igrəwan inalkiman-net

¹⁶ «Æssənat as zimazalaq-qawan təmosam zun ayfəd əhānen ammas ən ridalan, daɣ adi iliwat tayttay tagim ənnəyat zun awa tagginat taššolen, talim əd tədəbren a wər iwer a imosan lahan. ¹⁷ Ænkədat y aytedan, fəlas a kawan-əssəbdədan dat saggawaran n əššəriɣa, a kawan-əggatan əs ləkkad daɣ nan n əlɣibada ən Kəl-Əlyəhud. ¹⁸ Ad tətəwəsəbdədam dat naxkiman əd mənokalan fəlas kawan-iwar esəm-in, təqqəlam šiggəyyawen-in y-asan əntanay d aytedan win wər nəmos Kəl-Əlyəhud. ¹⁹ Mišan assaɣa wad za tətəwəggim daɣ fassan, a kawan-wər-iššəwəš əmmək was za təššiwəlam, wala deɣ awa za tannim, fəlas arat wa za tannim a fall-awan d-azzabbat daɣ amazay wa da daɣ tərām tənna-net, ²⁰ id wərgə kawanay a z'iššəwələn, kalar Infas wa Zəddigan n Abba-nawan, a daɣ-wan išawalan. ²¹ Ad səttərməsan aytedan imədrayan-nasan səssugin iman-nasan, səttərməsan abbatan bararan-nasan səssugin iman-nasan, affallagan bararan fəl marwan-nasan səssugin iman-nasan. ²² Awedan kul a kawan-igzər fəlas kawan-iwar esəm-in, mišan wa daɣ-wan izmaran har təzərəst, wədi ad iɣləs. ²³ As tətawasasam daɣ əɣrəm taddarragam s iyyan. Əggəyyeɣ əsilakanax-awan as wər du-za-təxrədam iɣərman n Israyil harwa da as du-z-əqqəla nak Ag Aggadəm.»

²⁴ «Attalami wər oger əššex-net, wala deɣ ogar əkli məššis. ²⁵ Igda y attalami ad agdu d əššex-net, akli deɣ igd-as ad agdu əd məššis. Dad zamas əmuzar n aɣaywan əgan-as esəm Aššaytan ən Baɣalzabul, manəmmək as wər z'agin arak batuten i kəl aɣaywan-net?»

A kawan-wər-təggəz tasa

²⁶ «Daɣ adi a tan-wər-tiksadam. Arat kul wa iɣbaran ad itəwəsənəfiləl, amaran əssir kul ad affaggu. ²⁷ Arat wa dawan-ənnə daɣ šiyyay, anniwat-tu ezal a mallan. Amaran arat kul wa dawan-itawasataktakan anniwat-tu s afalla. ²⁸ Ad wər tiksadam win naqqinen taɣəssa n awedan ɣas, amaran wər əfregan aɣšud ən wala i man-net. Kalar iksadat Məššina a ifragan ahluk ən təɣəssa harkid man, aggadl-en daɣ Jahannama. ²⁹ Awak wərgəɣ əššin gəɖad tefelt iyyadda a nazzan? Dər iga awen da za, wər tan-iha i z'əgmədan man ar əs turagat n Abba-nawan Məššina. ³⁰ Kawanay amaran wala anzadan ən ɣafawan-nawan da kul əɖdunan. ³¹ Daɣ adi ad wər tiksadam wala, fəlas ɣur Məššina togaram igəɖad əlqimat!»

Ƴaysa ilas awal daɣ batu n awa z'agin fəl nalkiman-net

³² «Awedan kul wa iggəyyen dat aytedan as nak a t-ilan, wədi nak da a fall-as aggayyɣ dat Abba-nin ihan ijənnawan. ³³ Mišan wa di-inkuran dat aytedan, wədi nak da ad t-unkarax dat Abba-nin ihan ijənnawan.»

³⁴ «Ad wər təɣilam assa a d-əgeɣ ewāya-du alxer s əddənət: kala kala wər d-ewayax alxer, əməgər a d-ewayax. ³⁵ Ose-du y ad zənnəməzrəyax aləs d abba-net, zənnəməzrəya təbarart d anna-net, zənnəməzrəya deɣ tədaggalt əd təntut ən barar-net, ³⁶ əqqələn kəl aɣaywan n awedan izənga-net. ³⁷ I igan y abba-net madəɣ anna-net tara togarat ta di-iga, wədi wər ihor əd tišit n ənalkim-in. I igan i barar-net madəɣ təbarart-net tara togarat ta di-iga, wədi wər ihor əd tišit n ənalkim-in. ³⁸ I wər nədkel təgəttawt-net, agu imateran-net, ilkəm-i, wədi wər ihor əd tišit n ənalkim-in. ³⁹ Awedan wa wər nəkəttəw ar iman-net daɣ əddənət ta, wədi ad affatu daɣ alaxirat. Amaran wa iqbalan ad isaffatu iman-net daɣ əddənət ta fəl əddəlil-in, wədi a tan-igrəw.»

⁴⁰ «I dawan-igan isəxlak, wədi nak as tan-iga, amaran i di-tan-igan, wədi wa di-d-izammazalan as tan-iga. ⁴¹ I igan isəxlak y ənnəbi ən Məššina fəl tišit-net ənnəbi, wədi ad igrəw arozan win igarraw ənnəbi. Amaran i igan isəxlak y alɣadil ən Məššina, fəl əddəlil ən təlɣudəla-net, wədi ad igrəw arozan win igarraw alɣadil.»

⁴² Ëggöyyey əsilakanax-awan as, i iššəşwan wala ablu n aman sammodnen y iyyan day nalkiman-in win ogarnen təmmədrəyt, fəlas imos ənalkim-in, wədi illikan as ad igrəw arozan-net.»

11

Awa d-izdaran

¹ As iğrad Ƴaysa ammar ən nəttulab-net win maraw d əşšin, ifal edag wen, ad isasaxru itaggu təlxutbat day xərman win əhanen akal wen.

Idufan aggotnen win tawagğanen day əsəssəyri ən Ƴaysa

Ƴaysa əd Yaxya wa isalmağan aytedan day aman

² Yaxya wa isalmağan aytedan day aman, iha kasaw as isla awa itaggu Əlməsix, izammazal-du sər-əs arat day attalamitan-net, ³ y ad t-əssəstənan annin-as: «Ak kay a imosan was nəqqəl y a d-asu, meyx ak ad nəqqəl y iyyan?» ⁴ Ijjəwwab-asan Ƴaysa inn-asan: «Əqqələt Yaxya təssuxələm-as awas təsallim, d awa təhannayam, tannim-as: ⁵ Iməddərxal əhannayan, inəbdan jawanken, aytedan win igraw kətru əzzayan zaddogan, imzagan əgrawan tesalay, inəmməttan nakkaran-du day təmattant, şiləqqawen dey sallanat y Əlinjil. ⁶ İbbilal awedan wa wər igmed əzəgzan-net fəlas wər iga aşşak day awa əmosa.»

⁷ As əqlan attalamitan ən Yaxya, issənta Ƴaysa amagrad i tamattay day batu ən Yaxya, inn-asan: «Ma imos arat was təkkan əsuf y a tu-tənəyam? Awak telant isiwəliwil ađu? Kala! ⁸ Day adi ma imos wa təkkan y a t-id-tənəyam? Awak aləs ilsən tabdoq təkkan şihussay? Kala! Ənəyat za, aytedan win əqqannen şibədday şin hossaynen, win di inan ən mənokalan a əhan. ⁹ Adi za ma təkkan y a t-id-tənəyam? Awak ənnəbi? Wəllen z'əs ənnəbi. Amaran Yaxya ogar tişit n ənnəbi fadda. ¹⁰ Fəlas Yaxya ənta a fəl ənnan Əlkəttaban: "Ənəy za nak a dat-ək assaglay anammazul-in a z'aknin tarrayt-nak."

¹¹ Ëggöyyey əsilakanax-awan as wər kala a d-ihəw awedan ogaran Yaxya wa isalmağan day aman. Dər iga awen da wala xas wa ogaran təmmədrəyt day Taymar ta n jənnawan, da ogar Yaxya. ¹² A d-obazan xur adan win day itaggu Yaxya wa isalmağan day aman təlxutbat, har harwa da, Taymar ta n jənnawan təmiqqas əd tallabəst təsohet, gammayan kəl əşşur d abbaz-net. ¹³ Amaran Əlkəttaban n Ənnəbitan kul d Əttawret, əməlan Taymar ta n Məşşina, har azzaman ən Yaxya. ¹⁴ Kud təqbəlam awa dawan-ənney əddi, wədi əssənat as Yaxya, ənta a imosan İlyas was ittəmal assa-net. ¹⁵ Wa isallin, issəsəmet!»

¹⁶ «Mas z'ammattalax aytedan n azzaman win nəha da? Olən əd bararan əqqimnen day əssuk, saxaren i midawan-nasan, ¹⁷ gannin-asan: Nəwat-awan tende, mişan wər təwəyam! Nəg-awan isakkan ən təfəyyawt, mişan wər təlem! ¹⁸ Ənney-awan adi fəlas Yaxya osa-du, wərmad itattu za wər isəssu, təzzar ənnan aytedan: Aljayn a t-izdağan. ¹⁹ Amaran, nak Ag Aggadəm, ose-du ətatta əsassa, mişan ənnan aytedan: "Ənawat aləs wen n amawwalay en, isassin esmad s igət, imos əmidi ən nabazan ən takəsen d ark aytedan!" Masnat ta du-təfalat Məşşina amaran, imazalan n aytedan win əhanen tarrayt ta n Məşşina a sataddinen aqqad-net.»

Erruxmatan win iga Ƴaysa i xərman win ənkurnen ammaran-net

²⁰ Təzzar issoyal Ƴaysa təgna labasat i xərman win day əganat taşşam ən təlməxjupaten, id tətubt a wər əgen. ²¹ Inna: «İket alyazab iqqâl-awan kəl-əxrəm ən Koradzin! İket alyazab iqqâl-awan kəl-əxrəm ən Betsayda! Fəlas təlməxjupaten şin xur-wan əganen ənnar əgənat day əxrəm ən Tir əd wa n Sidon, wədi irəw as əqqanan isəlsa ən bəhu əqqiman day ezəd, imos awen əsənnəfiləl n as əhdən.

²² Awen day a fêlas ênneç-awan: Alçazab wa za tagim êzêl wa n tabadday ad agêr wa z'agin aytedan n êçrêm ên Tir êd wa n Sidon. ²³ Kawanay aytedan n êçrêm wa n Kafarnahum, adis ad tammadkalam s aljannat? Kalar Jahannama a day za têtewêgaram, fêlas têlmêçjujaten ſin çur-wan êganen âs ênnar êgânat day êçrêm ên Sêdom, wêdi har azalada ill-ay. ²⁴ Awen day a fêlas ênneç-awan: Alçazab wa za tagim êzêl wa n tabadday ad agêr wa z'agin aytedan n akal ên Sêdom.»

Emmæk was za nakkawan i Çaysa

²⁵ Iгла Çaysa iſſêwal inna: «Êgeç-ak têmmalen ya Abba, Êmêli ên jênnawan d amadal fêl açabar wa têgeç aratan win i musanan, êd malan ên tayttay, têsannafalalaç-qan y aytedan win wêr nêzlay êd bararan; ²⁶ id adi da a imosan agna-nak ya Abba!»

²⁷ «Arat kul ig-ay Abba-nin day êfus-in, wêr t-illa i issanan awa êmosa ar Abba, wêr t-illa dey i issanan awa imos Abba ar nak an Barar-net d awedan was areç a das-tu-sênnêfilêla. ²⁸ Akkiwat-i-du ketnawan win êddaznen, ewayan êzuk, a kawan-akfa têsanfawt. ²⁹ Bardagat-i têlkamam i tara-nin, tabêzam fall-i masnat, id nak mêſſis ên talmat a mosa, êwêl-in dey wêr t-iha zazwar ên man. Êddi ad za têgrêwam têsanfawt i man-nawan, ³⁰ fêlas lêkkum i tara-nin isinaflay, êgêggi-nin dey i fêsuson.»

12

Tamazaq day batu n êzêl wa n têsanfawt ên Kêl-Êlyêhud

¹ Azzaman en da, êzêl iyyan ên têsanfawt ên Kêl-Êlyêhud, issiwal Çaysa ſiwêgas n alkama ênta êd nêttulab-net. Iggaz gêlêk inêttulab-net, a du-rassaban ſiçaxanen, tattin-tanat. ² As ênayan Farisaytan awen, ênnan i Çaysa: «Ênêy! Inêttulab-nak taggin arat xarâman day êzêl wa n têsanfawt.» ³ Inn-asan Çaysa: «Ak têçaray a wêr têgem awa iga ênnêbi Dawêd assaxa wad t-iggaz gêlêk, ênta êd midawan-net? ⁴ Awak wêrgeç iguz a êgan ehan ên Mêſſina, êtſan ſigêlwen ſin êmosnen takutay têskâtat i Mêſſina, imos awen arat fall-asan xaraman? ſigêlwen ſin den ilimaman ças as têxalal tattay-nasnat. Awak têçaray a wêr têgem adi? ⁵ Mêç ak têçaray a wêr têgem day Êttawret as êzêl wa n têsanfawt, ilimaman wêr êssêfraran êſſêrêdan n êzêl wa n têsanfawt id êzêl wêdi ſaqqalan day Ahan wa Zêwwêran n Êlyibada, miſan wêr fall-asan imos awen lahan? ⁶ Êggêyêç-awan as wa illan da, ogar Ehan wa Zêwwêran n Êlyibada. ⁷ Ênnar têgrâm almaçna ên batu ta tênnat: "Nak têhanint a areç, wêrge takutay." Wêdi wêr za têbêzam s êſſêriçxa aytedan wêr iwer lahan. ⁸ Ênneç-awan adi fêlas nak Ag Aggadêm a ixkaman fêl êzêl wa n têsanfawt.»

⁹ Ifal Çaysa edag wen, ikka ehan n êlyibada ên Kêl-Êlyêhud n êçrêm wen da. ¹⁰ Ehan wen ih-ay alês as immût êfus-net. Ênnan Farisaytan i Çaysa: «Ak xalal êzuzêy n awedan day êzêl wa n têsanfawt?» Arat wen imos tênagmayt a das-êgân fêl ad t-êbêzan s êſſêriçxa. ¹¹ Inn-asan Çaysa: «Mêni day-wan wa z'ilân tilay iyyadda, amaran têqqêl anu day êzêl wa n têsanfawt, aqqam wêr day-as tat-d-ikkê? ¹² Awedan za, ogar tilay almaçam wêllen! Day adi xalal igi ên tênfa y awedan day êzêl wa n têsanfawt.» ¹³ Têzzar inna Çaysa y alês wa: «Êzzêl êfus-nak.» Izzal-tu, izzay, ola êd wa hadan. ¹⁴ Êçlan Farisaytan, ad timêſêwwiran fêl têmêwit tas z'agin iman ên Çaysa.

Çaysa, ênta a imosan Ênaxbid wa imal ênnêbi

¹⁵ As isla Çaysa awen, igmad edag wen. Têlkam-as tamattay têgget. Izzozay imiranan kul. ¹⁶ Miſan irçam-asan fêl amel y awedan waliyyan awa imos. ¹⁷ Arat wen iga fêl ad andu awal wa iga ênnêbi Isayas as inna: ¹⁸ Ênta da ênaxbid-in wa sannafrana, s ênta a êknêç tara, isifalawas iman-in. A fall-as du-zêzzêbbe Infas-in di

Zəddigan, ad immal i təmattiwen n əddənet kul əşşəriya wa-nin. ¹⁹ Wər z'ammastan d awedan waliyyan, za wər fall-as z'isəxərət, wala aslin-as aytedan işawal dəx tarrayen. ²⁰ Wər z'arzu alawag ən telant illigwen, za wər z'anxu fətəla təbukət i təmattant; almayna as wər z'agu təkma waliyyat i nərkam. Awen dəx a z'itaggu iket wər issəbdad əşşəriya; ²¹ aginat dəx-as tamattiwen n əddənet kul attama-nasnat.

Əməqqəs ən Yaysa əd Farisaytan

²² Təzzar immeway-du aləs iyyan əs Yaysa, as immidad əmi-net, imos dəx əmədderxəl, fəlas əggəsuf a t-izdəyan. İzzozay Yaysa aləs wen, işşewal iswad dəx. ²³ İsimaklal awen wəllən əs tamattay ketnet, ad təgannu: «Ma iqqal ak Ag ənnəbi Dawəd wa əttəmalan awa?»

²⁴ Mişan as əslan Farisaytan y awen, ənnan: «Aləs en Aşşaytan Baçalzabul wa n əmənokəl ən kələsuf a t-ikfan fərregat n ikus ən kələsuf dəx aytedan.» ²⁵ Mişan ya issan Yaysa dəx awa samadranan, inn-asan: «Təxmar kul tas əmməgaran məssawəs gar-essan, tədi əbərəjji a za tagu. Wər t-illa əxrəm, wala dəx aqaywan, as z'ammazrayan məssawəs, aqqam wər ibarajjat. ²⁶ As imos as Aşşaytan isattay iman-net, wədi iman-net a dər imməgar. Dəx adi manəmmək as za tihag təxmar-net? ²⁷ Amaran kud nak tarna ən Baçalzabul as takkasax kələsuf dəx aytedan, inalkiman-nawan za, ma ilan tarna tas tan-takkasan? Adi da fəlas əntanay iman-nasan as kawan-z-əbəzan s əşşəriya. ²⁸ Mişan as imos as Infas ən Məşşina as takkasax kələsuf dəx aytedan, wədi Təxmar ta n Məşşina tos-iwan-du. ²⁹ Wər t-illa i ifrâgan iguz n ahan n aləs n əməqqerəd, iyrəd aqqa ən təla-net, ar s ad t-ikrâd təzzar. Dəffər as t-ikrâd amaran ad z'ifræg aqqa ən təla-net. ³⁰ Wa dər-i wər nəddew, wədi azangaw-nin a imos, wa di-wər-nəllil dəx s əşidəw, wədi əzəwwəziwəz a itaggu.»

³¹ «Awen da fəl dawan-ənnəx: A iqqal abakkad, wala alfawaxiś, kul ad təwəsurəfan y awedan, mişan ikus ən tarna y Infas wa Zəddigan, ənta wər z'itəwəsurəf y awedan. ³² As di-ibyak awedan nak Ag Aggadəm, ifrâg ad igrəw təsureft, mişan as ibəyak awedan Infas wa Zəddigan, wərmad z'igrəw təsureft dəx əddənet, za wər tat-z-igrəw dəx alaxirat.»

³³ «As təlam aşək isxân, a dəx-as təgrəwam âratân olaynen, as təlam aşək wər nəsxə, a dəx-as təgrəwam âratân əbrarnen; fəlas âratân win itaraw aşək, əntanay as itawazday. ³⁴ Xa taşşolen şin da! Manəmmək as za tannim a olayxan, ənta kawanay təknam tallabast? Wərgəx awa idkaran əwəl n awedan, ənta a d-igammadan imi-net? ³⁵ Awedan wa olayxan, əllux wa ihan əwəl-net a dəx d-itakkas awa olayxan, mişan anallabus ənta, talbast ta təhat əwəl-net a dəx d-itakkas awa labasan. ³⁶ Amaran nak ənnəx-awan əzəl wa n tabadday awedan kul kundaba ibdad fəl batuten ən bannan şin iga. ³⁷ Fəlas awalan-nak a kay-tagaznen dəx əşşəriya, amaran əntanatay harwa da a kay-tabaznen s əşşəriya.»

³⁸ Ənnan arat dəx musanan n Ettawret əd Farisaytan: «Əşşex, nəra dəx-ak a dana-tassakna təlməxjujat təmosat alyalamat.» ³⁹ Inn-asan Yaysa: «Aytedan n azzaman win, inəllubas, wər nəksud Məşşina, amaran gammayan təlməxjujat! Kala! Təlməxjujat ta dasan-tətawaggat iyyadda xas, a tat-imosan ta n ənnəbi Yunəs. ⁴⁰ Ənta əmmək wa dəx as iga Yunəs karad jilan, əd karad hadan dəx tədüst ən kifə wa zəwwəran, əmmək wen dəx as nak da Ag Aggadəm ad aga karad adan gər mawetan n amađal. ⁴¹ Əzəl wa n tabadday, ad d-ənkəran aytedan n əxrəm ən Ninif, əzzəbəzan aytedan n azzaman win y əşşəriya fəlas əntanay əhəddi a əgan əzəl wa dasan-iga Yunəs təlxutbat, imal-asan awal ən Məşşina. Əssənət za as, wa illan da əmərədda, oğar Yunəs mişan tugayam əs tətubt. ⁴² Əzəl wa n tabadday, a du-tənkər təmənokalt tas kala təxkam fall akal n agala igân esəm Şəba, taggayyat fəl aytedan n azzaman win, təzzəbəz-tan y əşşəriya fəlas d ad iraz amađal a du-təgmad fəl ad təssəsəm

y awal ən tēla n əgərri wa itaggu əmənokal Suliman. Əssənət za as, wa illan da əmərədda, ogar ənnəbi Suliman mišan tugayam s a das-təssəsəmam.»

⁴³ «As igmad aggəsuf awedan, iras aggəsuf wen idaggan əqqurnen igammay id imal, iqqim wər t-igrew, ⁴⁴ ad annu dəx man-net: "Nak a za, ad əqqələx ehan-in wa d-əgmada." As t-id-iqqal a t-id-asu wər itawaggaz, ifrâd, iyrad amaknaw. ⁴⁵ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanâd, əzdəxan-tu. Tagu tağara n awedan wen ağşud ogaran was kala tu-təga. Awen da a z'igrəwan inəllubas n azzaman win.»

Anna əd mədrayan ən Ƴaysa win tidət

⁴⁶ A išşewal Ƴaysa i tamattay den da, tēlla anna-net den əd mədrayan-net. Əbdâdan sədi dat ahan, ərân a das-annin arat. ⁴⁷ Inna awedan iyyan i Ƴaysa: «Ənəy, anna-nak əd mədrayan-nak, əbdâdan-ak dat ahan ərân a dak-annin arat.» ⁴⁸ Inn-as Ƴaysa: «Ma imosan anna-nin? Ma imosan imədrayan-in?» ⁴⁹ Təzzar izzal Ƴaysa ifassan dənneğ nəttulab-net, inna: «Ənəyat, anna-nin əd mədrayan-in əntanay da, ⁵⁰ id awedan kul wa itamazalan tara n Abba-nin ihan ijənnawan, ənta a imosan amadray-nin, madəx təmadrayt-in, madəx anna-nin.»

13

Əsəssəyri wa n karad: Əlmitalan dəx batu ən Tağmar ta n Məşşina

Əlmital wa n ənənbəl n amasa

¹ Əzəl wen, igmad Ƴaysa ehan, igla, iqqim dəx təgadamayt n agaraw. ² Təddew-du fall-as tamattay tagget, har as iggaz aɣlal n aman iqqim dəx-as, təbdad tamattay ketnet dəx təgadamayt n agaraw. ³ Imməgrad-asan dəx aratan aggotnen s əlmitalan. Inn-asan: «Kala ad ikka əmagyak iyyan tawagost-net, y a tat-inbəl. ⁴ Dəx anabal wa itaggu den imosan anabas n amasa, ertaknat təblalen şiyyad fəl tama ən tarrayt, osan-du gədad, ətşan-tanat. ⁵ Şiyyad ertaknat dəx adag əhanat təhun, amaran wər t-ihə amaɣal igdân. Idwal-du amasa wen tarmad, fəlas wər daw-əs illa amaɣal aggen. ⁶ As təggəzzay təfuk, təssəqqad awa d-idwəlan dəx amasa wen. Iqqur fəlas ikewan-net a wər nəggug dəx amaɣal. ⁷ Şiblalen şiyyad ertaknat dəx təfəssəx. Ədwalnat təfəssəx şin, əlmaznat amasa wa d-idwəlan den. ⁸ Mišan ya arat dəx təblalen en irtak dəx amaɣal olağan. Igməd-du, idwal, iga şiyəğanen. Şiblalen şin den akkiyyat teraw temeday ən tablalt, şiyyad sədisat təmərwən, şiyyad karadat təmərwən. ⁹ Wa isəllin, isəsəmet!»

Əddəlil wa fəl itaggu Ƴaysa əlmitalan

¹⁰ Dəffər awen əhozan-t-in nəttulab-net ənənan-as: «Mafəl tətamagrada y aytedan win s əlmitalan?» ¹¹ İjjawwab-asan Ƴaysa inn-asan: «Taggəx-asan əlmitalan win, id kawanay təgrâwam masnat dəx əssiran ən Tağmar ta n jənnawan, əntanay amaran wər tat-əgrewan. ¹² Fəlas wa ilan, a das-itəwəşitu awa ila, annafly. Wa wər nəla amaran, arat n awa ila da a dəx-as attarmas. ¹³ Awen da a fəl dasan-tamagrada s əlmitalan, id əswâdan mišan wər hənnəyan, əssisaman mišan wər sallin, za wər gərrin. ¹⁴ Əntanay a fəl tēnda batu ta iga ənnəbi Isayas əssağa wad inna: "Ad taknim əsəsəm, mišan wər za tagrim wala. Taknim əsawad mišan wər za tənəyam wala. ¹⁵ Fəlas iwəllan ən tamattay ta ab'as əlan tafrəyt, əngəm agrin. Əgan iman-nasan imzagan, şittawen-nasan dəx əymasan-tanat, fəl ad ib'as hannayan əs şittawen-nasan, ib-as sallin əs təməzzugen-nasan, ib'as gərrin əs wallan-nasan. Ugayan əs tətubt, əngəm əzzuzəyaq-qan."»

¹⁶ «Kawanay amaran təbbilalam id şittawen-nawan əhənnaynat, təbbilalam id şiməzzugen-nawan sallinat. ¹⁷ Əggəyyəx əsilakanəx-awan as sidaranən ənnəbitan

aggotnen d aytedan win oʻxadnen aggotnen anay n awa tēhannayam, mišan wēr t-ənayan, sidaranan dex tesalay y awas tēsallim, mišan wēr das-əslen.»

Esəssəgri ən ʒaysa əlmital wa n ənabal n amasa

¹⁸ «Day adi kawanay səsəmat y almaʒna n əlmital wa n ənabal n amasa. ¹⁹ Amasa wa irtakan fəl tama ən tarrayt, əlmital a imos n awedan wa islan i salan ən Taʒmar ta n Məššina wēr tan-igra, asa-du Iblis ikkəs awa itawanbalan day əwəl-net. ²⁰ Amasa wa irtakan day amaḍal əhānat tēhun, əlmital a imos n awedan wa islan y awal ən Məššina, iqbāl-tu əddi da əs man filawasnen, ²¹ mišan wēr ila awen ekay. Awedan wa wēr imos ar məššis ən təmazayen. Igda ʒas a tu-təməl təssust, madeʒ təddəguzt təgāt fəl əddəlil n Awal ən Məššina, ad ayyu əzəgzan əddi da. ²² Amasa wa irtakan day təfəssaʒ, əlmital a imos n awedan wa islan y Awal ən Məššina, mišan aššawašatan n əddənet, d adakal wa təga təgərgist n əddənet tayttay-net, əssəfalan-du dənnəg Awal wen, igdal-as awen a d-awəy tənfa. ²³ Amasa amaran wa irtakan day amaḍal olaʒan, əlmital a imos n awedan wa islan y Awal ən Məššina, igr-ay. Awedan wədi a d-awəy tənfa təmosat temeday n ənətfus, iyyat təqqəl sədisat təmərwen, iyyat amaran təqqəl karadat təmərwen.»

Əlmital wa n alkama d arak yel wa day-as d-idwalan

²⁴ Iga ʒaysa i tamattay əlmital iyyan. Inna: «Taʒmar ta n jənnawan tēha əlmital n aləs inbalan amasa olaʒan day tawagost-net. ²⁵ As ənsan aytedan osa-du azangaw-net, inbas ark amasa day tawagost ten, ijawankat. ²⁶ As tədwal tawagost, təga šiyəʒanen, inafalal-du ənta da ark amasa wanad. ²⁷ Osan-du eklan n aləs wa ilan tawagost ten, ənnan-as: "Məššikkana, wərgəʒ amasa wa olaʒan a tənbala day tawagost-nak? Ənnəs za taʒara n arak yel wa day-as d-idwalan den?" ²⁸ Inn-asan aləs wen: "Adi azangaw-nin iyyan a t-igan." Ənnan-as eklan: "Meqqal tareʒ ad naglu nəʒrəd-du alabay ən yel wa wēr noləʒ en?" ²⁹ Inn-asan: "Kala! Fəlas təksəda a əgəʒ a tu-tənakkadam har ammarsal alkama iman-net. ³⁰ Ayyiwat-tan ad ədwəlan kul har du-tawəd ʒarat. As inta əmiləy ən təwəgas, ad annaʒ i maššəʒalan win talaynen, ad izaran s arak yel wa, har t-əʒrədan tewəʒnay iqqəl šibolasen, itəwəsəqqəd, alkama amaran agin-tu day tədangawt-in."»

Əlmital wa n təblalt n amasa ən mutard

³¹ Ig-asan ʒaysa əlmital iyyan, inn-asan: «Taʒmar ta n jənnawan tola d amasa n annabat igān esəm mutard inbal awedan day tawagost-net. ³² Amasa wa n mutard ənta a ogaran imasan kul təmmədrəyt. Mišan as idwal, ad agər annabatan kul win fərgan, iqqəl ašək, har as a d-asin gəḍad ad taggin šisəllula day zəlan-net.»

Əlmital wa n xamira

³³ Ig-asan əlmital iyyan, inn-asan: «Taʒmar ta n jənnawan tola əd xamira tərway təntut day karadat annafəʒaten n agel n alkama har ikuf agel ketnet.»

Əddəlil wa fəl itaggu ʒaysa əlmitalan

³⁴ Aratan win den kul igann-en ʒaysa i tamattay s əlmitalan. Wēr dasan-inna arat waliyyan wēr nəmos əlmital, ³⁵ fəl ad andu awal ən Məššina wa imal ənnəbi assəʒa wad inna: «Ad aray imi-nin, əššiwəla s əlmitalan, əməlaʒ aratan win əʒbarnen harwa ʒur ənətti n əddənet.»

Esəssəgri n əlmital wa n alkama d arak yel wa day-as d-idwalan

³⁶ Dəffər awen ifal ʒaysa tamattay, igla ikka ehan. Əhozan-t-in nəttulab-net ənnan-as: «Sassagr-anaʒ əlmital wa n arak yel wa d-idwalan day tawagost.» ³⁷ Inn-asan: «Wa inbalan amasa wa olaʒan, adi Ag Aggadəm. ³⁸ Tawagost, adi əddənet, amasa wa olaʒan amaran immittal aytedan win əbbərdagnen i Taʒmar ta

n Məşşina, arak yel immittal aytedan win əlkammen i tarrayt ta n Iblis. ³⁹ Azangaw wa inbalan ark amasa, adi Iblis, ƣarat amaran adi əzəl wa n tabadday. Aytedan win talaynen, adi angalosan. ⁴⁰ Ənta əmmək wa daƣ as d-itawankad arak yel daƣ tawagost, itəwəsəqqəd, əmmək wədi daƣ a z'itəwəggin əzəl wa tabadday y aytedan. ⁴¹ A d-assagla nak Ag Aggadəm angalosan-in a z'əkkəsnen daƣ Taƣmar-in aratan kul win takkasnen əzəgzan daƣ aytedan, d aytedan win nəmməzray ən Məşşina. ⁴² Təzzar əgəran-tan daƣ amahander ən təmsay, ad hallin əddadan idədwan-nasan fəl təmagraz. ⁴³ Eddi daƣ ad z'agin aytedan win oƣadnen əmələwəwəw wa n təfuk, daƣ Taƣmar ta n Məşşina di n Abba-nasan. I isallin aslet!»

Elmital wa n ərrəzəƣ iƣbâran

⁴⁴ «Taƣmar ta n jənnawan tola harwa da d ərrəzəƣ iƣbâran daƣ tawagost, isaffaggay d awedan iyyan, ilas-tu aƣabar. Awa iga daƣ təfalawist, igla izzənz-in awa ila kul, izzənza tawagost ten.»

Elmital wa n əljuhər wa n ələsəl

⁴⁵ «Taƣmar ta n jənnawan tola harwa da d amassatag igammayan əljuhər wa ihossayan. ⁴⁶ As igraw əljuhər iyyan ihossayan, wa n ələsəl, igla izzənz-in awa ila kul izzənz-ay.»

Elmital wa n sangay wa n abbaz ən kifitan d almaƣna-net

⁴⁷ «Taƣmar ta n jənnawan tola harwa da əd sangay zəwwəran n abbaz ən kifitan itiwagaran daƣ agaraw, obaz-du kifitan əmosnen əzzənəfan. ⁴⁸ As idnay, ərkabant-idu nabazan ən kifitan əs təgadamayt, əqqiman, ədkalan-du izmaman a daƣsan taggin kifitan win olaxnen, əggaran-in win wər nənfa wala. ⁴⁹ Awen daƣ a z'agin əzəl wa n tabadday. A d-asin angalosan, əskətan-in inəmməzray ən Məşşina, zəmməzəyan-tan d aytedan win oƣadnen, ⁵⁰ əgəran-tan daƣ amahander ən təmsay, ad hallin əddadan idədwan-nasan fəl təmagraz.»

Elmital wa n məşşis n aƣaywan

⁵¹ Igla ƴaysa išşəwal inn-asan: «Ak təgrâm awa ənne da kul?» Ənnan-as: «Awalla.» ⁵² Təzzar inn-asan: «Daƣ adi, əmusan n Əttawret kul wa itawasasaƣran y ad iqqəl ənalkim ən Taƣmar ta n jənnawan, ola əd məşşis n aƣaywan, a d-itakkasan daƣ təla-net aratan win aynaynen əd win waşşarnen isataƣmal-tan.»

Awa d-izdaran

⁵³ As iƣrad ƴaysa əsəssəƣri wa igan s əlmitalan en, igmad akal wa ihozan agaraw, igla.

Əsəssəƣri ən ƴaysa, itittəy ətəwəşşak-net

Iba n əzəgzan daƣ Nazaret

⁵⁴ As d-osa aƣrəm wa daƣ idwal ad isasaƣru aytedan daƣ ahan-nasan wa n əlƣibada. Awa sər-san iga awen daƣ əsəmməkləl, har əqqiman gannin: «Mənis t-idu-təggaz masnat togdat d awa, əd təlməxujaten šin itaggu da?» ⁵⁵ «Ak awa wərgəƣ ag aləs wa ikarrasan inan? Wərgəƣ anna-net esəm-net Maryama, imədrayan-net iyyan Yaƣub, iyyan Yusəf, iyyan Simƣon, iyyan Yahuza? ⁵⁶ Wərgəƣ šimədrayen-net kul əllanat ƣur-na? Daƣ adi məni iguz wa das-d-əgan aratan win da kul?» ⁵⁷ Awen daƣ a dasan-igdalan əzəgzan sər-əs. Mišan inn-asan ƴaysa: «Ənnəbi wər itəwəlku ar daƣ aƣrəm wa daƣ idwal d aƣaywan-nasan.» ⁵⁸ Amaran iqqim da wər iga təlməxujaten aggotnen daƣ adag wen, fəlas əzəgzan a sər-əs wər əgen aytedan win den.

14

Etəwənyay ən Yaxya wa isalmağan aytedan day aman

¹ Azzaman en da a day isla Herod Antifas wa n əmuzar n akal ən Galilaya, isalan ən Ƴaysa. ² Təzzar inna Herod y aytedan-net: «A igan da Yaxya wa isalmağan aytedan day aman, a d-inkaran den day təmattant! Awen da fəl ila tarna n igi ən təlməxjujaten.» ³ Arat wen inn-ay Herod fəlas azzaman dat awen omâr s ətərməs ən Yaxya, itawakrad itawagga day kasaw, fəl əddəlil ən Herodəyas təmosat tağur Filibus imosan amadray ən Herod a da, ⁴ fəlas Yaxya a igannin i Herod: «Xaram fall-ak azalaf ən təntut di.» ⁵ Eway-du awen əs Herod as ira ikus ən man ən Yaxya, mišan iksud tamattay təgât i Yaxya iduf n as ənnəbi a imos. ⁶ As d-ixlay əzəl wa n təhəwt ən Herod, isassaga saksas, təga elles ən Herodəyas eweğ iknan šihussay dat naftayan. Təzzar oggām-tat Herod ⁷ har as ihad-as âs, a das-agu arat kul wa day-as təgmay. ⁸ As təššəwwar anna-net tənn-as ad tannu i Herod eğaf ən Yaxya a təra. Tənkar təbarart tənn-i Herod: «Akf-i attabla da da iha ağaf ən Yaxya wa isalmağan aytedan day aman.» ⁹ Arat wa təgmay təbarart ten eway-du s əmənokal Herod as əğşadan man-net. Mišan omar s a das-itəwəggu arat wa təgmay den, fəl əddəlil ən təhuday ta das-iga d əddəlil ən naftayan-net. ¹⁰ Issəgla awedan y a d-ifrəs eğaf ən Yaxya day kasaw. ¹¹ Immeway-du ağaf n ənnəbi en day attabla, itawakfa i təbarart, təzzar təkfiy y anna-net. ¹² Osan-du nalkiman ən Yaxya ədkalan tağəssa-net, ənbalan-tat-in. Eqlan əmalan i Ƴaysa.

Əšətši wa iga Ƴaysa səmmos gim n aləs

¹³ As isla Ƴaysa isalan win, igmad edag wen, iha aɣlal n aman. Iгла ɣas-net ikka edag issufan a din-ikitayyen. Təsla tamattay ta təhat šixarmaten šin ɣələyğəlayan awen, təlkam-as idaran-net. ¹⁴ As d-izzəbbat aɣlal inay tamattay tagget, təggaz-tu təhanint-net, ad izuzəy imiranan-nasan. ¹⁵ As təga takəst, əhozan-t-idu nəttulab-net ənnan-as: «Edag issufan awa, amaran əzəl igla, day adi suɣəl tamattay a, ad təgməy id təzzənza a tətša day təɣarmaten.» ¹⁶ Inn-asan Ƴaysa: «Wər təga addararat s ad aɣlin, šatšat-tan kawanay iman-nawan da!» ¹⁷ Ənnan-as: «Nakkanay ya wər nəla da ar səmmosat təgəlwen d əššin kifitan.» ¹⁸ Inn-asan Ƴaysa: «Awəyat-itand-u.» ¹⁹ Omar tamattay s ad taqqam day yel illan den, təzzar idkal səmmosat təgəlwen šin den d əššin kifitan win, iggəzzay ijənnawan, iga igodan i Məššina. Ikaramkaram šigəlwen šin den, ikf-enat i nəttulab, a tanat-tuzanan i tamattay. ²⁰ Ətšan aytedan en ketnasan har əyyəwanan. Əššədawan-du nəttulab ikarammutan win du-tawaglaznen, ədnayan maraw əzmaman d əššin. ²¹ Aytedan win ətšanen den əmosan edag ən səmmos gim n aləs, əllanat deɣ tədoden den əd bararan.

Əjəwəнки ən Ƴaysa fəl aman

²² Wala a ihogan omar Ƴaysa inəttulab-net s ad əggəzan aɣlal n aman izaran-as-in əs təgadamayt ta hadat n agaraw iket di ad itasallam tamattay. ²³ As əğradan aytedan teklay, iggəzzay Ƴaysa adɣağ y ad agu šiwatriwen day adag ikitayyan. Illa den da ɣas-net har iga ahad. ²⁴ As itaggu awen da aɣlal iggug-in day agaraw, əbbatnat-tu tənazzamaren sa əd sa fəlas aɣu issohen a dər imməqqas. ²⁵ As təga tilkamət n ahad, ikka-du Ƴaysa inəttulab-net ijiwankat fəl aman. ²⁶ As t-oggan ijiwankat-du fəl aman, ərmağan. Ənnan: «Awen əggəsuf!» Sakkarayan fəl awa əgan day tərəmməq. ²⁷ Mišan tamazayt ten da a dasan-iššəwal Ƴaysa inn-asan: «Ad wər təğşədam, nak awa! Təgmədet-kawan tasa!» ²⁸ Den day a das-inna Butros: «Kud kay adi Əməli, tamərağ-i s a din-jəwənkey fəl aman əssəlkadağ-ak-in.» ²⁹ «Iyyaw!» Inn-as Ƴaysa. Izzəbbat Butros aɣlal, ijawankat fəl aman innəmad Ƴaysa. ³⁰ Mišan as din-igra assahat n aɣu wa igan den, təggaz-tu tasa, əggəzan-tu aman šin alamaz.

Isaxxarat inna: «Ɛməli agəz-i!» ³¹ Tarmad as das-in-izzal Ƴaysa əfus-net, ibaz-t-idu. Inn-as Ƴaysa: «Ɛzəgzan-nak irkam wəllen, ma daɣ-ak igan aššak?» ³² Ɛggazan aɣlal ɣas, idrar aɣu. ³³ Ɛssəjadan-as aytedan win əhanen aɣlal en, gannin: «Illikan as kay a imosan Barar ən Məššina.»

Ɛzuzəy ən miranan

³⁴ As əɣrasan agaraw, ewadan akal ən Ganazaret. ³⁵ As əssanan kəl akal en as Ƴaysa awen, əmalan y aytedan ən kallan win ɣələyɣələyan n edag wen, a sər-əs du-tamawayan miranan kul. ³⁶ Ad itawansay ad ayyu aytedan ədəsan kuddeɣ təbənək ən təkadkat-net, amaran i tat-idasan ad izzəy.

15

Ɛssuxəl ən Ƴaysa təgna i Farisaytan

¹ Dəffər awen əfalan-du Farisaytan əd musanan n Ɛttawret Yerusalem, əkkan Ƴaysa, ənnan-as: ² «Mafəl wər əlkeman nəttulab-nak y aɣadaten šin dana-d-oyyan marawan-nana, wər əširidan ifassan-nasan dat tattay?» ³ Inn-asan Ƴaysa: «Kawanay za, mafəl tətamazrayam alwajiban ən Məššina, fəl ləkkum y aɣadaten-nawan?» ⁴ Wərgə Məššina a inna: "Səymər abba-nak d anna-nak"? Inna deɣ: "Awedan wa išaffaraššen abba-net, madeɣ anna-net, wədi a daɣ-as təwəkkəsan man"? ⁵ Mišan kawanay təgannim y aytedan, as inna awedan y abba-net madeɣ anna-net: "Arat wa kay-z-akfaɣ imos tadhəlt-nak, əssinsaɣ-qu y ad t-aga takutay," ⁶ əddi ab-as ihhəššal y awedan wədi saɣmar n abba-net wala anna-net. Ɛmmək di da as təgam aɣadat-nawan daɣ adag n Awal ən Məššina. ⁷ Ɛlmunafiqan! Tidət a imos awal wa iga Məššina daɣ batu-nawan əs tarrayt n ənnəbi Isayas as inna: ⁸ "Tamattay ta, iləs ɣas as di-təssəɣmar, mišan iwallan-nasan əggugan-i wəllen. ⁹ Ɛlɣibada wa di-taggin, ibbinnan, fəlas wər səsəɣrin ar alwajiban a d-ənzaman aytedan daɣ ɣafawan-nasan."»

¹⁰ Iɣra Ƴaysa tamattay inn-as: «Səsəmat-i, tagrim awa dawan-z-anna da: ¹¹ Wərgəy awa itaggazan s əmi n aggadəm a t-isamadasan, kalar awa d-igammadan imi-net.»

Ɛsəssəgri ən Ƴaysa awal wa iga fəl Farisaytan

¹² Dəffər awen əhozan-t-in nəttulab-net, ənnan-as: «Ak təgreq-in as batuten-nak, əššakan-tanat Farisaytan wəllen.» ¹³ Inn-asan Ƴaysa: «Annabat kul wa wər inbel Abba-nin ihân ijənnawan, wədi a d-itəwəlbəy. ¹⁴ Ayyat-tan ɣas! Awen iməddəryəl əlwaynen wiyyad. Ɛməddəryəl ilwāyan iyyan amaran, agadal a taggin ketnasan daɣ anu.» ¹⁵ Iššəwal Butros inn-as: «Sassagr-anax əlmital wədi.» ¹⁶ Inna Ƴaysa: «Awak kawanay da harwa da wər təlem əgərri? ¹⁷ Awak wər təgrem as arat kul wa iggazan s əmi n aggadəm, akkay a z'agu əs tədist, dəffər adi inɣəl-in daɣ əsuf? ¹⁸ Mišan wa d-igammadan imi, wədi əwəl a d-ifal, amaran ənta a isamadasan aggadəm. ¹⁹ Ɛssənat as əwəl ənta a du-gammadnat arak ənnəyaten, d igi ən man, d igi n əzzəna, d igi ən tədoden madeɣ igi ən meddan, əd šikra, əd təgəyya ən bahu, əd šizmit. ²⁰ Aratan win di əntanay a samadasnen aggadəm. Mišan tettay əs fassan wər nərrud, wər təsammas aggadəm.»

Ɛzəgzan ən təntut ta n wələt Kanan

²¹ As ifal Ƴaysa edag wen, ikka amaɣal ən Tir əd Sidon. ²² Təhin-in təntut n iyyat daɣ Kananitatan təzdayat akal en da, təkkâ-du Ƴaysa təsikaray təgann-as: «Ya Ɛməli, Ag əmənokəl Dawəd, hənəttət-i! Təbarart-in a izday aggəsuf a tat-izayazzaban wəllen.» ²³ Mišan wər inna Ƴaysa i təntut en wala. Idgaz awen inəttulab əhozan-t-in onsayan-tu ənnan-as: «Suxəl tantut ta dana-təlkamat da təsikaray.» ²⁴ Inna Ƴaysa: «Nak wər du-tawazammazalay ar əs Kəl-Israyil, əmosnen zun ayfəd

æssiggalnen.» ²⁵ Dær iga awen da ya tækk-ay-du tæntut en, tæssəjad-as tænn-as: «Æmæli, æssən daχ-i!» ²⁶ Inna Ƴaysa: «Wær olex i idkalan amensay ən bararan, igər-t-in i dan!» ²⁷ Tænn-as tæntut en: «Tidət-nak Æmæli, dær iga awen da ya idan ækəmmi a taggin awa d-irattakan daχ adag wa daχ tattin mæssawsan, tattin-tu.» ²⁸ Inn-as Ƴaysa: «Ya tantut! Æzəgzan-nam i zəwwəran! Itəwəgget-am awa tareχ!» Amazay en da a daχ təzzay elles ən tæntut en.

Æzuzəy ən Ƴaysa aytedan daχ təwərnawen aggotnen

²⁹ Dæffər awen igmad Ƴaysa edag wen, ikka təgadamayt n agaraw wa n Galilaya, təzzar iwar adχaχ, iqqim. ³⁰ Tækk-ay-du tamattay tagget, a sər-əs du-tewayat iməggudal, əd mæddəryal, əd nəbdan, d aytedan as əmmidadan mawan-nasan, əd miranan wiyyad aggotnen. Aytedan win, tawasansin dat Ƴaysa, izuzəy-tan. ³¹ Isammaklal əs tamattay anay wa təga aytedan as əmmidadan mawan-nasan əššewalan, tənay inəbdan əgrāwan šiyurad-nasan, tənay iməggudal jiwanken s əlluχ, tənay imæddəryal hannayan. Ad taggin aytedan təmmalen y Æmæli n Israyil.

Æšətši ən Ƴaysa əkkoz gim n aləs

³² Iyra-du Ƴaysa inəttulab-net inn-asan: «Təh-i təhanint ən tamattay a. Karad adan a yur-i əgan, amaran ab'as t-illa a ətšan. Wær areχ a tan-ayya aglin wær əreman arət, fəlas əddi mijas a tan-aggadlu gələk daχ tarrayt.» ³³ Ennan-as nəttulab-net: «Məni du-za-nəgrəw za daχ əsuf a šigəlwen siyyawannen tamattay togdāt d awa?» ³⁴ Inn-asan Ƴaysa: «Mənəket təgəlwen təlam?» Ennan-as: «Ëssayat təgəlwen a nəla d arət ən kifitan win madrornen.» ³⁵ Omar tamattay s ad təyrəd təyimit. ³⁶ Idkal-du əssayat təgəlwen en əd kifitan win den, iga igodan i Məššina, amaran ikaramkaram-tan ikf-en i nəttulab, əzunən-tan i tamattay. ³⁷ Aytedan en ketnasan əyyəwanan əglazan-du, har as əssa əzmaman win zawwarnen a du-tawatkarnen daχ karammutan win d-əglazan. ³⁸ Aytedan win ətšanen den, əmosan əkkoz gim n aləs as wær əhenat tədoden əd bararan. ³⁹ Dæffər awen issəllam Ƴaysa tamattay, iggaz aylal n aman, ikka akal ən Magadan.

16

Agamay ən Farisaytan əd Sadusaytan daχ Ƴaysa a dasan-agu təlməxjujat

¹ Ekkan-du Farisaytan, əd Sadusaytan Ƴaysa ərān ad t-ajjarraban, gammayan daχ-as a dasan-agu təlməxjujat təmosat alχalamat a du-təfālat Məššina. ² Inn-asan: «As iga əlməz, tənayam ijənnawan zaggaχan ad tannim: "Tufat za ad agu əzəl ihossayan." ³ As affaw amaran, tənayam ijənnawan zaggaχan əhānat-tan šiyay ad tannim: "Azalada ad agu əzəl ibrāran." As təswadam daχ jənnawan, ad təssənam awa dər z'alu alhawa dæffər awen, mišan awa itaggin daχ azzaman win wær təssənam almayna-net! ⁴ Aytedan n azzaman win, inəllubas, wær nəksud Məššina, amaran gammayan təlməxjujat! Kala! Təlməxjujat ta dasan-tətawaggat iyyadda χas, a tatimosan ta n ənnəbi Yunəs.» Den da a tan-ifal Ƴaysa, igla.

Isəmmutəg ən Ƴaysa inalkiman-net

Emel ən Ƴaysa i nalkiman-net əddəlil n assa-net əddənət

Xamira wa n Farisaytan əd Sadusaytan

⁵ Ekkan nəttulab tagadamayt ta hadat n agaraw. As ewadan, əgran-in əs əttəwan-in igi n allaw ən təgəlla. ⁶ Inn-asan Ƴaysa: «Ənkədət wəllen i xamira ən Farisaytan, əd wa n Sadusaytan.» ⁷ Təzzar ad gannin nəttulab gar-essan: «Awa wær t-inna ar fəlas wær neway tagəlla.» ⁸ Issan Ƴaysa daχ awen inn-asan: «Mafəl təššewalam gar-ewwan fəlas wær təlem tagəlla, kəl əzəgzan əndarran? ⁹ Awak əgərri a wær təgem

harwa da? Wær təkəttəwam səmmosat tēgəlwen šin ətšan səmmos gim n aləs, d əket n əzmaman win du-tədnayam daɣ gəlzan-nasan? ¹⁰ Meɣ ak tətəwam-in əssayat tēgəlwen šin əššətšanən əkkoz gim n aləs! Mənəket əzmaman win zawwarnen a du-tədnayam əzəl wen? ¹¹ Nak a dawan-əney: "Ənkədat i xamira ən Farisaytan, əd wa n Sadusaytan". Manəmmək as wær tēgrem as wərgəɣ tagəlla as dawan-əhey batu-net?» ¹² Den daɣ ad əgran as wərgəɣ xamira ən Farisaytan, əd wa n Sadusaytan a fəl dasan-imməgrad den, kalar əsəssəɣri-nasan as dasan-inna a das-ənkədan.

Emel ən Butros awa imos Ƴaysa

¹³ Ikkâ Ƴaysa amaɗal ən Qaysarəya wa n əmuzar Filibus as issəstan Ƴaysa i nəttulab-net, inn-asan: «Ak daɣ iduf n aytedan, ma əmosa nak Ag Aggadəm?»

¹⁴ Ənnan-as: «Wiyyad za gannin kay Ƴaxya wa isalmaɣan aytedan daɣ aman. Wiyyad gannin kay ənnəbi Ilyas. Wiyyad amaran a gannin kay ənnəbi Irməya a təmosa, madəɣ iyyan daɣ ənnəbitan win hadatnen.» ¹⁵ Inn-asan Ƴaysa: «Kawanay za, ma tənnam ma mosa?» ¹⁶ Inn-as Simɣon Butros: «Əlməsix a təmosa, barar ən Məššina di n Amaɣlol.» ¹⁷ Inna Ƴaysa i Simɣon Butros: «Təbbilala ya Simɣon, ag Yunəs, fəlas arat wədi wərgəɣ kay a daɣ-as issosanan iman-nak, kalar Abba-nin di ihan ijənnawan a dak-isannafalalan. ¹⁸ Nak amaran əney-ak: Kay Butros təhunt a təmosa, amaran təhunt ta, ənta a fəl z'əkrəsəɣ Əlkənisat-in. Əlkənisat ta, tarna ən təmattant da wær təfreg a das-təɣšəd wala. ¹⁹ A kay-akfa təsassarut ən Taɣmar ta n jənnawan. Arat kul wa təssəxrama daɣ əddənət dada, ijənnawan da a daɣ-san ixram, arat deɣ wa təssəxlala daɣ əddənət dada, ijənnawan da a daɣ-san ixlal.» ²⁰ Təzzar iga i nəttulab-net ammar a daɣ idgâz, s ad wær əmelan y awedan waliyyan as ənta a imosan Əlməsix.

Emel wa azzaran iga Ƴaysa y aɣazab-net əd təmattant-net

²¹ A obazan ɣur əzəl wen, ənta ad iggaz Ƴaysa šin əsəssəgri ən nəttulab-net as iwâr-tu iki ən Yerusalam, y ad agu aɣazab aggen, a das-z-agin muzaran ən Kəl-Əlyəhud, əd muzaran ən limaman, əd musanan n Əttawret, təwəggin man-net, inkər-du deɣ daɣ təmattant əzəl wa n karad. ²² Təzzar iwat-tu Butros s ahal, iššewal fall-as, inn-as: «Əməli, ihənəttətət-ak Məššina daɣ arat wa təmaləɣ əddi! Kala wær kay-z-igrəw adi!» ²³ Mišan imalallay-in Ƴaysa Butros, inn-as: «Əfəl dəffər-i Aššaytan! Təqqaləɣ-i təsənkəft daɣ əššəɣəl wa di-d-ewayan s əddənət, fəlas imedranan-nak, wərgəɣ Məššina a d-əfalan, kalar imedranan n aggadəm ɣas a əmosan.»

Tarrayt ən wa ilkaman i Ƴaysa

²⁴ Dəffər awen inna Ƴaysa i nəttulab-net: «Wa iran a di-ilkəm, wədi igmədet tara ən man-net, agu imateran-net, idkəl tēgəttawt-net, ilkəm-i. ²⁵ Əssənət as awedan wa wær nəgəmməy ar aggaz ən man-net, wədi ad t-əgmədan, mišan wa iqbala ad t-əgmədan fəl əddəlil-in, wədi a tan-igrəw. ²⁶ Ma z'aknu y awedan ad igrəw əddənət ketnet, ənta amaran temsay a ikka? Awak mas ifrag awedan tehakkay-net y a sər-əs agəz iman-net daɣ təmsay? ²⁷ Əssənət as nak Ag Aggadəm a d-asa ələɣ tanaya n Abba-nin, əddewa d angalosan-net, əddi amaran, awedan kul ad t-akfu maruzat n awa ewadan mazalan-net. ²⁸ Əggəyyeɣ əsilakanəɣ-awan as wiyyad daɣ aytedan win əbdadnen da wær tan-z-iba iket wær ənayan assa-nin nak Ag Aggadəm əmosəɣ əmənokəl.»

17

Ətəwənaɣ ən tanaya ən Ƴaysa

¹ As əgan sədis adan dəffər awen, iddew Ƴaysa əd Butros, əd Ƴaqub, əd Ƴaxya imosan amadray ən Ƴaqub en da, ikka dər-san adɣəɣ zagren ɣas-nasan. ² Den da ad

imməttay azzahir-net dat-san, imalawlaw udəm-net s ənnur olan əd wa n təfuk, əgan səlsa-net təməllay təsiraqqet wəllen, təkna əsəməxməx. ³ Əhinan-in oggân ənnəbi Musa, d ənnəbi Ilyas as du-nafalalan, mişawalan əd Ƴaysa. ⁴ Iggad-du Butros inna i Ƴaysa: «Əməli, olay as nəlla da! Kud tarex adi, ad əkrəsa karad həktan dəx adag wa. Iyyan i-nak, iyyan in Musa, iyyan in Ilyas.» ⁵ Harwada išşewal Butros as tan-təlsa təgarak təmīlawlawat, təqqal-asan zun telay. Igməd əməsli tagarak ten, inna: «Awa Barar-in wa əknəx tara; ənta a d-issəndan agna-nin. Səsəmat-as!» ⁶ As əslan nəttulab i batu ten, ərməxan wəllen, fataqqen əssəjadan. ⁷ Ihoz-tan-in Ƴaysa, idas-tan, inn-asan: «Ənkərat, təgmədət-kawan tasa!» ⁸ Ədkalan-du nəttulab isawadan-nasan wər hənneyan ar Ƴaysa.

⁹ Tazabben-du adxax en da, as tan-omar Ƴaysa, inn-asan: «Ad wər təməlam y awedan waliyyan awa tənayam da, iket wər d-ənkera nak Ag Aggadəm dəx təmattant.» ¹⁰ Əssəstanan nəttulab Ƴaysa, ənnan-as: «Mafel za gannin musanan n Əttawret: "Kundaba osa-du Ilyas təzzar as du-z-asu Əlməsix?"» ¹¹ Ijjəwwab-asan Ƴaysa inn-asan: «Awalla za ar a d-asu Ilyas, annazzam aratan kul. ¹² Amaran əssosanaq-qawan as Ilyas, osâ-du, mişan wər t-əqbelan aytedan, kalar əgan-as awas əran. Əmmək en dəx as illikan as a di-zəxğəzzəban nak Ag Aggadəm.» ¹³ Əgran nəttulab as Yaxya wa isalməxan aytedan dəx aman, as iha Ƴaysa batu-net den.

Barar wa təgraw tazakarkarat əd tarna ta ila əzəgzan

¹⁴ As d-izzabbat Ƴaysa əd nəttulab-net win karad en adxax, əhozan-du tamattay, ikk-ay-du aləs iyyan igaraffat dat-əs, ¹⁵ inn-as: «Əməli, hənəttət i barar-in, tazakarkarat a tu-təgrawat, amaran ixxizzab wəllen fəlas faw da itudu dəx təmsay, madəx aman. ¹⁶ Ewayaq-qu əs nəttulab-nak y ad t-əzzuzəyan, mişan indar-asan.» ¹⁷ Inna Ƴaysa: «Xa! Iket iba n əzəgzan, iket əşşur dəx aytedan n azzaman a! Awak har əmmay əddewa dər-wan, əzizaydara dər-wan? Awəyat-i-du barar sa da!» ¹⁸ Iharaşşat Ƴaysa aggəsuf wa ihan barar en, təzzar igmad-tu. Izzay barar dəx amazay wen da. ¹⁹ Əhozan-in nəttulab Ƴaysa ənnan-as: «Mafel nakkanay indâr-anəx ikus n aggəsuf wen?» ²⁰ Inn-asan: «Adi za aşşaddat ən rəkkəm n əzəgzan-nawan! Əggəyyəx əsilakanəx-awan as ənnar təlâm dəx əzəgzan a ogdân əd wala imi ən təzuxay n əşənnan, har tənnam y ədxax en: "Əgməd edag di takka wen", ad ammazal s adi. Əddi wər t-illa arat as dawan-z-indər igi-net. ²¹ [Amaran əzzənəf n aggəsuf wen, wər igəmməd awedan ar əs təwatriwen, d əzum.»]

Emel wa n əşšin iga Ƴaysa y alyazab-net əd təmattant-net

²² Əzəl iyyan əddewan nəttulab ən Ƴaysa dəx akal ən Galilaya as dasan-inna: «Nak Ag Aggadəm əjwâra ad əggâzax ifassan n aytedan, ²³ agin iman-nin, təzzar ənkəra-du dəx təmattant əzəl wa n karad.» Təxşad batu ten iman-nasan wəllen.

Amana wa itawarzaman y Ahan wa Zəwwəran n Əlyibada

²⁴ Iгла Ƴaysa əd nəttulab-net har ewadan Kafarnahum. Ənkaran aytedan win zarzamnen amana y Ahan wa Zəwwəran n Əlyibada, əhozan-in Butros, əssəstanan-tu ənnan-as: «Awak əşşex-nawan arazam a wər itəggu amana y Ahan wa Zəwwəran n Əlyibada?» ²⁵ Inn-asan Butros: «Awalla za ar irazzam-tu». Iggaz Butros ehan, azzar-as Ƴaysa awal issəstan-tu inn-as: «Ma tənne kay Simxon, ma irazzaman takəsen d amana i mənokalan n əddənət? Awak maddanəsan a dasan-tan-razzamnen, meyx aytedan sa hadan?» ²⁶ Inn-as Simxon: «Aytedan sa hadan a dasan-tan-razzamnen.» Inn-as Ƴaysa amaran: «Dəx adi maddanəs ən mənokalan wər tan-iwer arazam ən wala. ²⁷ Mişan ya fəl ad wər nəqqəl təsənkəft y əzəgzan n aytedan win zarzamnen, aglu akku agaraw, təgəra dəx-as azabzab wa n abbaz ən kifitan. Kifi wa tobazax

əstizarat, aru imi-net, a daḡ-as in-tagəza tefelt n əzrəf wa mallan. Tefelt ten əkkəst-tat-du, tagla takfaḡ-asan-tat, ad təqqal ərruzmatan n amana wa-nin, əd wa-nak.»

18

Əsəssəyri wa n əkkoz: Təməddurt ta tənammakat əd Taymar ta n Məššina

Eres d ədkul

¹ Amazay wen daḡ a daḡ din-əhozan nəttulab Ƴaysa, ənnan-as: «Ma imos za wa ogaran daḡ Taymar ta n jənnawan?» ² Təzzar iḡra-du Ƴaysa arat ən barar, issəbdad-tu gar-essan, ³ inna: «Əggəyyeḡ əsilakanax-awan âs as wər təsammattayam alxal, təqqəlam zun bararan, wədi wər ilkem a təggâzam Taymar ta n jənnawan. ⁴ Awen daḡ a fəlas awedan kul wa issərasan iman-net, zun arat ən barar wa, wədi illikan as ənta ogaran daḡ Taymar ta n jənnawan.»

Əsənkəd y igi ən bakkadan

⁵ «Amaran i iḡbalan barar šilan wa fəl əddəlil-in, wədi nak iman-nin as di-iḡbal. ⁶ Mišan i iḡqalan əssəbab n abakkad y iyyan daḡ aytedan win sər-i əzzəgzannen, əmosnen zun bararan madrornen, wədi of-as ad itəwəqqən əzəzəd zəwwəran ən təhənt daḡ iri-net, itəwəgər daḡ ammas n agaraw əmazal wa iga əddi. ⁷ Iket alḡazab ill-ay y aytedan n əddənət! Əddəlilan aggotnen a t-əllanen tan-sisuginen ibakkadan! Illikan as ad t-əməlan əddəlilan win den har faw, mišan iket alḡazab ill-ay y awedan wa dasan-d-iḡqalan əssəbab! ⁸ Kud əfus-nak madəḡ adar-nak a kay-sisuginen ibakkadan, wədi əfrəs-tan-in, təgəraq-qan-in sədi. Id of-ak təggəza aljannat təgeḡ əfus, madəḡ təgeḡ adar y ad tələḡ əššin fassan, d əššin daran, tətəwəgəra dər-san daḡ Jahannama. ⁹ Amaran kud šat-nak a təbukat a dak-təqqəl əssəbab n igi n abakkad, wədi kəkkərət-tat-du, təgəraq-qat-in sədi, id of-ak ad təgeḡ šat daḡ aljannat, y ad tələḡ sanatat šittawen tətəwəgəra dər-əsnat daḡ təmsay an Jahannama.»

Əlmital wa n tilay ta təssəggalat

¹⁰ «Ənkədat! Ad wər talkim iyyan daḡ aytedan win madrornen di, fəlas silakanax-awan as angalosan-nasan əhân ijənnawan, faw əllan ḡur Abba-nin. ¹¹ [Nak Ag Aggadəm oseḡ-du gammayax aytedan win əxraknen y a tan-əḡləsa.»]

¹² «Ma tənnam kawanay y awen? Awak amadan ilân temeday ən tilay, har daḡ-asnat təssəggal iyyadda, wərgəḡ ad ayyu tazayat təmərwen əd tazayat šin hadatnen ədânnat, təzzar azəl iswəd i ta təssəggalat? ¹³ Əggəyyeḡ əsilakanax-awan âs as d-igraw tilay ta n iyyadda en, ogar tədəwit ta z'agu fəl əddəlil-net, i ta z'agu fəl əddəlil ən tazayat təmərwen əd tazayat šin wər nəssəgəl. ¹⁴ Əmmək en daḡ as abba-nawan ihân ijənnawan, wər ira ad ihlək waliyyan daḡ aytedan win madrornen di.»

Awax danax-iwar igi-net y amadray-nanax igân abakkad

¹⁵ Iḡla Ƴaysa iššəwal inna: «As kay-idlam amadray-nak, takkaq-qu daḡ adag a daḡ təmosam ḡas-nawan, təsəssagraq-qin lahan-net. Kud za issəsam-ak itub, wədi zun as amadray-nak a du-təgrawaḡ a kay-igmâdan. ¹⁶ Mišan as ugay s a dak-issəsam, tiddawa d awedan iyyanda, madəḡ əššin, təqqəlaq-qu. Əmmək en daḡ as "batu kul ad taknu əqqimnat-as sanatat təgəyyawen madəḡ karadat." ¹⁷ Amaran as ugay s ad ilkəm y awal wa das-əgan aytedan win di, təməlay almasalat tədi y Əlkənisat. As ugay s ad ilkəm y awa das-təna Əlkənisat, wədi ag-as iduf wa təgeḡ y aytedan win wər nəssen Məššina, madəḡ tagax-as iduf wa təgeḡ y aytedan win zarzamnen takəsen. ¹⁸ Əggəyyeḡ əsilakanax-awan as arat kul wa təssəxramam daḡ əddənət ta, wədi ijənnawan da a daḡ-san ixram. Amaran wa təssəxlalam daḡ əddənət ta, wədi

ijënnawan da a daɣ-san ixlal. ¹⁹ Ɛsilakanax-awan deɣ âs as namardan əşšin daɣ-wan daɣ əddənet da da əttaran s esəm n Abba-nin ihân ijënnawan, wədi arat kul wa daɣ-as əgmayan, a dasan-t-akfu. ²⁰ Fəlas edag wa daɣ əmmənayan əşšin, madex karad daɣ-wan s esəm-in, wədi əssənat as əlle gar-essan əddi da.»

Daɣ batu ən təsureft: Ɛlmital wa n əkli wa wər təha təhanint

²¹ Təzzar ihoz-in Butros Ƴaysa issəstan-tu inn-as: «Ɛməli, har mənəket təklaten as di-iwar ad əssurəfa y amadray-nin a di-idlâman? Awak har əssayat təklaten?»

²² Inn-as Ƴaysa: «Wər dak-ənnə har əssayat təklaten, kalar a dak-ənnə surəf-as əssayat təmərwen ən təklat har əssa.

²³ Ɛmmək en daɣ as Taɣmar ta n jënnawan, təha əlmital n əmənokal ad iyrân eklan-net, irâ ad issəxrəd ərrəzəxan-net. ²⁴ As issənta, itawayra-du iyyan daɣ eklan en, a ɣur ila igiman ən giman ən tafelt. ²⁵ Mišan akli wen wər ifreg ərruzmatan n əzrəf en. Awen daɣ a fəl omar məşşis s a din-itəwəzənzū ənta əd taɣurəs əd maddanəs d awa ila kul, əqqəlan ərruzmatan n ərrəzəxan win ɣur-əs ila. ²⁶ Təzzar ifataqqad əkli en issəjad dat məşşis, inn-as: "Ag-i təzaydart, məşşi, a dak-ərzəməɣ awa ɣur-i tələɣ kul." ²⁷ Arat wen eway-du əs məşşis as tu-təggaz təhanint-net. Təzzar issoraf-as awa ɣur-əs ila, oyy-ay. ²⁸ Azzama a din-igmâd əkli wen, ifâl-in məşşis, immənay d iyyan daɣ midawan-net daɣ əşşəxəl wər irwes ar temeday ən tafelt n əzrəf. Təzzar obaz-as tarzam, inn-as: "Ɛrzəm-i azrəf wa daɣ-ak ələɣ!" ²⁹ Təzzar ifataqqad əmidi-net wen, onsay-tu inn-as: "Ag-i təzaydart, a dak-ərzəma." ³⁰ Mišan ugay əkli wen, isassaga fadda əmidi-net en daɣ kasaw y ad t-izzərzəm əmarwas wa t-iga. ³¹ As ənayan midawan-net daɣ əşşəxəl awa igan den, əxşadan man-nasan wəllen, əqlan əgan isalan win kul i məşşis. ³² Təzzar isassaxr-ay-du məşşis inn-as: "Illikan as kay amaksan! Nak əssorafax-ak awa ɣur-ək əle kul fəlas di-tonsayax awen. ³³ Kay da, iwâr-kay a kay-təggəz təhanint n əmidi-nak, tagax-as əhənətta zun wa dak-əgeɣ nak." ³⁴ Təzzar iggaz alham məşşis, isassaga akli en daɣ kasaw. Itawattaf har iyrad arazam n awa ɣur-əs ila ketnet.» ³⁵ Inn-asan Ƴaysa: «Ɛmmək en daɣ as Abba-nin ihân ijënnawan wər dawan-z-issurəf as imos âs akkiyyan daɣ-wan wər isurif s əwəl iyyanda i mədrayan-net daɣ əzəgzan.»

Awa iga Ƴaysa daɣ Yahudəyya

19

Ƴaysa iha tarrayt ən Yerusalam

Ɛsənti

¹ Dəffər as iyrâd Ƴaysa alfaydaten šin, ifal akal ən Galilaya, ikka akal ən Yahudəyya ihân aganna wa hadan n agarew wa n Yordan. ² Ɛlkamnat-as tamattiwen aggotnen, a tanat-izuzəy den da.

Azalaf d əməzzəy

³ Ɛhozan-t-in Farisaytan əgan-as əsəstan imosan tənagmayt, ənnan-as: «Awak xalal y aləs əzəməzzəy ən təntut-net fəl a iqqal əddəlil?» ⁴ Inn-asan Ƴaysa: «Wərgəy təxrâm as əstizarat as d-ixlak Ɛmaxlak əddənet,

"ixlak-du aytedan, ixlak-kan-du əmosan yay əd təntay."»

⁵ «Inna: "Adi daɣ a fəl iffal aləs abba-net, d anna-net, irtəy əd təntut-net, əqqəlan arat iyyanda."»

⁶ «Ēmmək en daɣ as ad ib-as əmosan əššin, kalar ad əqqəlan taɣəssa iyyadda. Daɣ adi, awa issərtay Məššina a tu-wər-izəmməzzəy awedan.» ⁷ Ēnnan-as: «Daɣ adi, mafel as omar ənnəbi Musa ad tətəwəkfu širawt n əməzzəy i təntut, tətəwəzəməzzəy?» ⁸ Inn-asan: «Aššaddat ən təggərməmt a fəl kawan-ikfa Musa turagat n ad təzaməzzayam šidoden-nawan. Mišan arat wədi wərgəɣ ənta a igan əstizarat. ⁹ Amaran nak əsilakanəɣ-awan as i izamməzzayan tantut-net, a das-wər-nətəggu meddan, izlaf iyyat, wədi əzzəna a iga əddi.»

¹⁰ Ēnnan-as nəttulab-net: «Adi za, kud awen daɣ a illan gər aləs əd təntut, wədi ofa i wər nəzlef fadda.» ¹¹ Inn-asan: «Awal wa, wərgəɣ aytedan kul əqbəlan-tu, kalar wər t-iqbel ar win ikfa Məššina fərrəgat n əlqəbulat-net. ¹² Fəlas əllan-tu əddəlilan gaddalnen azalaf əmosnen as: meddan wiyyad as d-əhəwan da wər əfregan azalaf, wiyyad dəffər a igan ad tawazaman, əllān-tu deɣ win as iman-nasan as sannafranan iba n azalaf fəl ad wər əlen daɣ əššəɣəl ar wa n Taɣmar ta n jənnawan. Wa ifragan əlqəbulat n adi, əqbəlet-tu.»

Igi ən Ƴaysa šiwatriwen i bararan

¹³ Təzzar a du-tawayan aytedan bararan, fəl a tan-issəwər Ƴaysa ifassan-net, ittər-asan. Əššəwalan nəttulab fəl aytedan win den. ¹⁴ Mišan inn-asan Ƴaysa: «Ayyiwat bararan a di-d-akkin, a tan-in-wər-təwəɣam fall-i; fəlas Taɣmar ta n jənnawan šin aytedan win šilaten-nasan.» ¹⁵ Issəwar-tan ifassan-net, ittər-asan, dəffər awen obaz tarrayt-net, igla.

Əməšiwəl ən Ƴaysa d aləs iyyan aynayan n əməgğərgəs

¹⁶ Təzzar ihoz-in aləs iyyan aynayan Ƴaysa, inn-as: «Əššəx, ma imos arat olāɣan was as t-əgeɣ ad əgrəwəɣ təməddurt ta təɣlalət?» ¹⁷ Inn-as Ƴaysa: «Mafel as di-təsastana daɣ batu n awa olaɣan? Məššina ɣas a olaɣan. Amaran as tareɣ ad təgrəwa təməddurt ta təɣlalət, təlkəma y alwajiban-net.» ¹⁸ Inn-as aləs wen: «Ma mosan za alwajiban win den?» Inn-as Ƴaysa: «Adi za, ad wər tagaɣ iman; ad wər tagaɣ əzzəna; ad wər takəra; ad wər taga təgəyya ən bahu fəl awedan waliyyan; ¹⁹ səxmər abba-nak d anna-nak; agu y əšəqqəɣ-nak tara ta təgeɣ i man-nak.»

²⁰ Inn-as aləs wen: «Aratan win di kul əssibdadaq-qan. Ma di-in-iqqiman harwa?» ²¹ Inn-as Ƴaysa: «As tareɣ ad təqqəlaɣ awedan ikmālan, tagla tazzanəɣ-in təlanak, takfaɣ inəzzan-net i tələqqawen, əddi ad təgrəwəɣ ərrəzəɣ a dak-z-ansin daɣ alaxirat. Dəffər adi amaran tagla-du təlkəmaɣ-i.» ²² As isla aləs wen i batu ten, inkar, igla əɣšādan man-net, fəlas ərrəzəɣ aggen a ila.

Efsan d arozan

²³ Den daɣ ad inna Ƴaysa i nəttulab-net: «Əgğəyyəɣ silakanəɣ-awan as izzəwat fəl əməgğərgəs iguz ən Taɣmar ta n jənnawan. ²⁴ Awalla, silakanəɣ-awan as ogar tərɣəsəy ta iga fəl aɣam aradaɣ daɣ təbuday n ənazmay, i ta iga fəl əməgğərgəs iguz ən Taɣmar ta n Məššina.» ²⁵ As əslan nəttulab y awen, isammaklal sər-san wəllen, ənnan: «Daɣ adi, ma ifragan ad iɣləs daɣ təmsay?» ²⁶ Iswad daɣ-san Ƴaysa, inn-asan: «Arat wədi muxal a imos ɣur aytedan, mišan ɣur Məššina arat kul ifrāg igi.»

²⁷ Den daɣ ad iššəwal Butros inna: «Nakkanay za? Awak wərgəɣ noyya arat kul, nəlkam-ak? Daɣ adi ma daɣ-na z'agin?» ²⁸ Inn-asan Ƴaysa: «Əgğəyyəɣ əsilakanəɣ-awan as: As tawašašanayan aratan kul, əqqima nak Ag Aggadəm daɣ adag-in, a t-imosan təxawit ən taɣmar-in di təlat tanaya, əddi kawanay a di-əlkammen ad taqqamim fəl marawat təxiwa ən taɣmar əd sanatət, təsrəɣam i tawšeten ən Kəl-Israyil an marawat əd sanatət. ²⁹ Awedan kul wa ifalan aɣaywan-nasan, əd mədrayan-net, əd təmədrayen-net, d abba-net, d anna-net əd bararan-net, madəɣ

amaðal-net fæl æddælil-in, wædi ad igræw temeday n ənətfus n aratan win den, igræw deẏ tæmæddurt ta tæẏlalət. ³⁰ A aggen daẏ win əhanen eẏaf əmərədda, ilkâm ad əggəzan ələqqam; amaran a aggen daẏ win əhanen ələqqam əmərədda, ilkâm ad əggəzan eẏaf.»

20

Elmital wa n maššaxalan win afarag n alẏanab

¹ Iгла ẏaysa iššewal inna: «Ēnta da a wa dər tola Taẏmar ta n jənnawan: A d-inkər awedan ilân afarag n alẏanab əzəl iyyan aẏôra, ira ad idkəl imaššaxalan y afarag-net. ² Inamarda əd maššaxalan win âs, əzəl kul a tan-akfu tefelt n əzrəf, təzzar issok-en afarag. ³ As təga ədəgəlšet ilas-du agamad, inay imaššaxalan wiyyad wər nəgrew əššəẏəl harwa əqqiman daẏ asammanay n əẏrəm. ⁴ Inn-asan: "Kawanay da agliwat təšẏəlam daẏ afarag-in, a dawan-agay ərruzmatan olâẏnen." ⁵ Ēqlan maššaxalan, əkkan afarag-net. Dəffər awen ilas igmad-du ẏur ammasnazal, igmad-du deẏ əs tazzar. Amaran i d-igmad ad agu zun awen da. ⁶ As təga takəst zagret ilas-du agamad, inay imaššaxalan wiyyad əqqimnen, inn-asan: "Mafel təklâm ad təqqimam əddi, wər tahem wala?" ⁷ Ēnnan-as: "Agaraw a wər nəga i danaẏ-iššəšaxalan." Inn-asan: "Agliwat kawanay da təšẏəlam daẏ afarag-in n alẏanab."»

⁸ «As tuda təfuk, inna məššis n afarag wen y əmuzar ən maššaxalan-net: "Aẏra-du imaššaxalan kul təzəma y akkiyyan alxaq-net. Izar əs win ədkala daẏ tilkamat, təssəlkəmay əs win ədkalaẏ əstizarat." ⁹ Osan-du win əssəntanen əššəẏəl takəst zagret, akkiyyan daẏ-san igraw tefelt n əzrəf. ¹⁰ Dəffər awen təssəẏlay-du əs win əšẏalnen əstizarat, əgân iduf n as ad əgrəwan a ogaran awa əgrawan meddan win. Mišan əntanay da akkiyyan daẏ-san igraw tefelt. ¹¹ As əgrawan ərruzmatan-nasan, əssoẏalan təgna məššis n afarag wen. ¹² Ēnnan: "Aytedan win tətkaḷay əs tilkamat, alwaq iyyanda ẏas a əšẏalan, amaran təšašagdaq-qan dər-na nakkanay a əklanen nəšẏâl, təkaggay-ana təfuk." ¹³ Təzzar iššewal məššis n afarag y iyyan daẏ-san, inn-as: "Ēmidi-nin, nak wər dak-əgeẏ arət waliyyan wər noẏed. Wərgə kay iman-nak a dər namarda fəl tafelt iyyadda n əzrəf daẏ əzəl? ¹⁴ Daẏ adi abəz azrəf wa imosan alxaq-nak, tagla. Kud nak a iran ad šašagdaẏ alxaq-nak əd wa n meddan win ətkalaẏ daẏ tilkamat, tədi nak a təqqal. ¹⁵ Awak nak wər z'agaẏ awa areẏ s ərrəzəẏan-in? Məẏ ak manjaẏ a təgeẏ as əmosaẏ aləs olâẏan?"» ¹⁶ Inna ẏaysa: «Ēmmək en daẏ as win əhanen eẏaf əmərədda, ilkâm ad əggəzan ələqqam; amaran win əhanen ələqqam əmərədda, ilkâm ad əggəzan eẏaf.»

Emel wa n karad iga ẏaysa y alyazab-net əd təmattant-net

¹⁷ Iggəzzay ẏaysa, ikka Yerusalem ənta əd nəttulab win maraw d əššin. Iwar dər-san tama, da jiwanken fəl tarrayt, inn-asan: ¹⁸ «Səsəmat: Nakkanay da əggəzzaynen əs Yerusalem da. Den daẏ ad z'ətəwəgga nak Ag Aggadəm daẏ fassan ən muzaran ən limaman, əd musanan n Ēttawret. Aytedan win a di-əxkəman təmattant. ¹⁹ A di-agin daẏ fassan n aytedan wər nəmos Kəl-Ēlyəhud, a daẏ-i tajaban, ayyawanani šiwwit. Dəffər awen attaytayan-i fəl təgəttawt, ib-i, ənkəra-du daẏ təmattant əzəl wa n karad.»

Alyazab d əššəẏəl

²⁰ Təhoz-in taẏur Zabaday ẏaysa, təddew əd maddanəs. Təgaraffat y a tu-tansəy. ²¹ Inn-as: «Arət iyyan a tareẏ?» Tənn-as: «Bararan-in a n əššin a as daẏ-ak are a di-tagay arkawal n as ad əggəzan idaggan ətkâlnen: iyyan daẏ əẏil-nak, wa hadan daẏ zalgat-nak, daẏ Taẏmar-nak.» ²² Inna ẏaysa: «Wər təssenam almayna n arət wa təgməyam əddi. Awak təfrâgam a dər-i tədrəwam alyazab wa z'aga daẏ alwaq wər nəggug?» Ēnnan-as: «Awalla, nəfrâg a dər-ək tu-nədrəw.» ²³ Inn-asan ẏaysa:

«Awalla, illikan as tæfrâgam a dær-i tædrëwam alyazab wa. Mišan daḡ batu ən wa z'aqqamin daḡ əḡil-in wala zalgat-in, wərgex nak a t-ihakkin, kalar idaggan win di in win as tan-isammatag Abba-nin.»

²⁴ Æslan maraw nættulab win hadatnen y awen, əşşakan əşşin mædrayan win den. ²⁵ Tæzzar iyr-en-du ʔaysa, əhozan-t-in, inn-asan: «Təssânam as imuzaran ən tæmattiwen saknin tarna y aytedan win as azzaran, amaran aytedan win daḡ-san attafnen əlxəkum saknin aytedan win as azzaran taḡmar. ²⁶ Mišan kawanay ad wər tagim adi gar-ewwan. Kalar as ira iyyan daḡ-wan ad ilu almaqam, iqqəlet zun amaşşaxal-nawan. ²⁷ Amaran wa daḡ-wan iran tizart, iqqəlet akli-nawan. ²⁸ Æmmək en daḡ as nak Ag Aggadəm wər d-oseḡ əddənet y a di-əşşəlan aytedan. Kalar assa a d-əge y ad əşşəla y aytedan, akfa iman-nin fəl ad səddərfex əs tæmattant-in aytedan aggotnen daḡ bakkadan-nasan.»

Æzuzəy ən ʔaysa əşşin mæddəryal

²⁹ Igmad ʔaysa əd nættulab-net aḡrəm wa n Yerikaw, təl-kâm-asan tamattay tagget. ³⁰ Ællân mæddəryal den əşşin, əqqiman fəl afay ən tarrayt. Æslan âs ʔaysa a itakayan den, ədkalan əməsli-nasan ad gannin: «Hənəttət-anax, Æməli, Ag ənnəbi Dawəd!» ³¹ Təsannaryaman-asan tamattay fəl ad affastin, mišan əşşotan adakal ən maslan-nasan gannin: «Hənəttət-anax, Æməli, Ag Dawəd!» ³² Izzəkkat ʔaysa, iyr-en, inn-asan: «Mas taram a dawan-t-aga?» ³³ Ænnan-as: «Æməli, asawad-nanax as nara agaraw-net.» ³⁴ Təggaz təhanint-nasan ʔaysa, idas şittawen-nasan. Amazay wen daḡ a tan-d-iqqal asawad-nasan, tæzzar əlkaman-as.

21

Adan win əlkammen ən ʔaysa daḡ Yerusalem

Iguz ən ʔaysa Yerusalem imos əmənokal

¹ As din-ihoz ʔaysa əd nættulab-net Yerusalem, daḡ ənəmihaz ən taḡrəmt ta n Betfajay, dagma n ədḡax was itawannu wa n "Eşkan ən Zaytun", izammazal ʔaysa əşşin nættulab, ² inn-asan: «Akkiwat taḡrəmt ten dat-wan den. Tosâm-tat-in ḡas, tənâyam tajat təqqanat təlât əhulel. Ariwat-tan-du təl-wəyam-i-tan-du. ³ As dawan-inna awedan arat, tannim-as: "Æməli a sər-san iddəraran." Eddi a kawan-ayyu taglim dær-san amazay wen da.» ⁴ Arat wa iga fəl ad andu awal wa d-imal Məşşina əs tarrayt n ənnəbi as inna: ⁵ «Anniwat y əḡrəm wa n Səyon: Ænəy! Æmənokal-nak izây-kay-du. Ikna əsərəs ən man-net. Iwân tâjat, əhulel fadda, imosan ara n əmudar a fəl itamaway əzuk.»

⁶ Æglan nættulab əmmožalan awa as tan-omar ʔaysa. ⁷ Ælwayan tajat d əhulel-net i ʔaysa. Ædfaran fall-asan isəlsa-nasan, iwan ʔaysa əhulel. ⁸ Təgla-du tamattay tægget wəllen ad tətissəw i ʔaysa isəlsa-net fəl tarrayt, wiyyad farrasan-du ilədlad tissəwan-as-tan fəl tarrayt. ⁹ Tamattay ta təl-kamat i ʔaysa, əd ta das-tazzarat, tət-kâl əməsli-net təgannu:

«Ozana!

Təmmal y ahaya n əmənokal Dawəd!

Iga Məşşina albaraka daḡ

wa d-osan s esəm n Æməli!

Ozana! Təmmal i Məşşina

daḡ jənnawan win ədkalnen!»

¹⁰ As d-iggaz ʔaysa Yerusalem, aytedan n əḡrəm ketnasan nijarwayan gannin: «Ma imos aləs en?» ¹¹ Ad təgannu tamattay: «Adi za ənnəbi ʔaysa imosan ag əḡrəm ən Nazaret ta n akal ən Galilaya.»

Assa ən ʔaysa Ehan wa Zəwwəran n Ælyibada

¹² Iggaz Ƴaysa aɣalla wa iɣlayan Ehan wa Zəwwəran n Əlyibada. Iɣrad daɣ-as asataɣ n aytedan kul win massatagan, harkid win mazanzan. Isabbanbay tebəren šin fəl sansin kəl sanji izərfan-nasan, isabbanbay deɣ šisəqqima ən massatagan ən tədəbren. ¹³ Təzzar inn-asan: «Iktâb as: "Ehan-in a das-itəwəggu esəm ehan n əlyibada." Kawanay amaran təgâm-tu "əsəlyəs ən baydagan".» ¹⁴ Əhozan-in məddəryal, əd məggudal Ƴaysa daɣ Ahan wa Zəwwəran n Əlyibada en da, izzozaytan. ¹⁵ Mišan ənkarən muzaran ən limaman əd musanan n Əttawret əššakan wəllen aratan simaklalnən win iga Ƴaysa den. Əššakan deɣ šixaraten šin taggin bararan daɣ Ehan wa Zəwwəran n Əlyibada gannin: «Ozana! Təmmal y ahaya n əmənokal Dawəd!» ¹⁶ Awen a fəl ənnan i Ƴaysa: «Təsâlla y awa gannin da?» Amaran inn-asan Ƴaysa: «Awalla. Awak teɣaray a wər təgem daɣ Əlkəttaban batu ta tənnat: "Kay a d-ewayan əs bararan, əd janɣayan a dak-agin təmmalen!"» ¹⁷ Dəffər awen ifal-tan Ƴaysa, igmad Yerusalem, edwa taɣrəmt ta n Betanəy insa daɣ-as.

Alayan ən Ƴaysa ašək wa n fig

¹⁸ As affaw iqqal-du Yerusalem harwa aɣôra, ifray i gələk daɣ tarrayt. ¹⁹ Inay ašək ən fig immar-t-in mišan wər daɣ-as in-ogez ar ifərkak ɣas. Təzzar inna y ašək wen: "Tammazayət d igi n aratan har faw daɣ əddənət!" Amazay wen daɣ ad iqqur ašək en. ²⁰ As ənayan nəttulab-net awen, isammaklal sər-san, ad gannin: «Manəmmək as iqqur ašək ən fig wen imi iyyanda?» ²¹ Inn-asan Ƴaysa: «Əggəyyey əsilakanay-awan âs as təzzəgzanam, wər təgem a imosan aššak, wərgex awa əgeɣ y ašək a ɣas as za təfrəgam igi-net. Kalar ad təfrəgam ad tannim y adɣax wa: "Əgməd adag di təfətəqqe daɣ agarew", agu deɣ awen da. ²² Arat kul wa tonsayam Məššina s əzəgzan, a tu-təgrəwam.»

Əsəstan igân daɣ batu ən tarna ən Ƴaysa

²³ Ikka Ƴaysa Ehan wa Zəwwəran n Əlyibada, a daɣ-as isasayru. Əhozan-t-in muzaran ən limaman, əd muzaran ən Kəl-Əlyəhud ənnan-as: «Awak ma təmos tarna tas tətaggaɣ aratan win? Ma kay-ikfan tarna ta?» ²⁴ Inn-asan Ƴaysa: «Nak da a dawan-agax əsəstan iyyanda. As təjjəwwabam y əsəstan-in, a dawan-əməla da d-əgrawax tarna n igi n aratan win tagga da. ²⁵ Ənta da əsəstan-in: "Awak əsəlməɣ wa iga Yaxya aytedan daɣ aman Məššina a ɣur d-ifal awen meɣ aggadəm?"» Təzzar ad tinəmənnin gar-essan: «As nənna: "Məššina a ɣur d-igraw turagat n awen", a danaɣ-annu: "Mafel za wər sər-əs təzzəgzanam?" ²⁶ As das-nənna amaran: "Aggadəm a ɣur d-igraw Yaxya tarna ten", wədi a dana-təššək tamattay, fəlas ketnet təkkâs aššak as Yaxya ənnəbi a imos.» ²⁷ Təzzar ənnan i Ƴaysa: «Wər nəssen.» Inn-asan Ƴaysa: «Nak da za wər dawan-z-əməla wa di-ikfan tarna n igi n aratan win.»

Əlmital wa n bararan win əššin

²⁸ Iгла Ƴaysa iššewal inn-asan: «Ma tənnam s əlqissat ta? Aləs iyyan a ilan əššin bararan. Ihoz-in barar-net wa azzaran, inn-as: "Aglu barar-in təşxəla daɣ afarag-nana wa n alɣanab azala." ²⁹ Inn-as barar-net wen: "Wər di-ihə adi." Mišan ya dəffər awen, imməgraz barar en tugəyt ta iga y abba-net, təzzar igla ikka afarag-nasan. ³⁰ Ihoz-in aləs wen barar-net wa n əššin igmay daɣ-as arat wa igmay daɣ wa azzaran. Ig-as barar-net wen aljawab igân əs saymar, inn-as: "Awalla Abba-nin, ad akkaɣ afarag-nana!" Mišan iqqim da wər t-ikka. ³¹ Awak ma imos daɣ bararan en wa immozalan tara n abba-nasan?» Ənnan-as: «Adi za barar wa azzaran!» Əddi a dasan-inna Ƴaysa: «Əggəyyey əsilakanay-awan za as, inabazan ən takəsen əd təkarwaten, da a dawan-izaran ətəwəqbal daɣ Taymar ta n Məššina. ³² Ənney-awan adi fəlas Yaxya, os-iwan-du, issəkn-iwan awa kawan-iwaran əmərədda gar-ewwan əd Məššina, mišan wər sər-əs təzzəgzanam. Amaran inabazan ən takəsen, əd təkarwaten, əzzigzanan

sər-əs. Kawanay iman-nawan tənâyam awen, mişan wər sər-wan d-eway təmagrist waliyyat n arak mazalan-nawan əngəm za təzzəgzənam sər-əs.»

Elmital wa n magyakan n alyanab

³³ Səsəmat y əlqissat iyyat təmosat əlmital: «Məşşis n aɣaywan iyyan a inbalan alyanab daɣ amadal-net, issəɣlay-tu afarag, izzəɣaz daɣ-as tagdayt ta daɣ itawazmu alyanab. Issəkraş ogga ihhoken as z'iggâr awedan wa ogazan afarag en. Təzzar issəɣfar afarag-net en i magyakan wiyyad, išşokal. ³⁴ As du-tahoz tamert ta n əmiləy n alyanab, izammazal eklan-net əş magyakan win əɣfarnen afarag-net, y a das-d-awəyan adagar-net daɣ alyanab. ³⁵ Mişan obazan magyakan win eklan win, əgan y iyyan daɣ-san šiwwit, əgan iman ən wa hadan, ad əggaran wa n karad əş təhun har t-aba. ³⁶ Ilas məşşis n afarag izammazal sər-san eklan wiyyad ogarnen win den igət, mişan əgan-asan meddan win əɣfarnen afarag en awa daɣ əgan i win din-izammazal dat awen. ³⁷ Təzərəst n awen, as sər-san izammazal barar-net, fəlas inna daɣ man-net: "Dad zamas barar-in awa immikkan as ad t-əssəxməran!" ³⁸ Mişan as ənayan magyakan win barar-net namannan gar-essan: "Ənta əddi amakkasu n afarag. Əndawat a tu-nanɣu kərəz, ad nəkkusət afarag." ³⁹ Təzzar obazan-tu, əkkasan-tu daɣ afarag, ənɣan-tu kərəz.»

⁴⁰ Inn-asan Ƴaysa: «Awak as d-osa məşşis n afarag n alyanab wen, ma z'agu i magyakan n alyanab win den?» ⁴¹ Jajjayan aytedan ənnan-as: «As d-osa za, ad iɣrəd tenaɣay ən maksanan win di, issəɣfar afarag-net i magyakan wiyyad a das-du-za-tawaynen tənfa daɣ tamert-net.»

⁴² Inn-asan Ƴaysa: «Awak teɣaray a wər təgem daɣ Əlkəttaban as: *"Təhunt ta din-əgaran makrasan, ənta a təqqalat təhunt ta təkbalat ehan, arat wen Əməli a d-ifal, amaran isimaklal sər-na"?*»

⁴³ «Awen daɣ a fəlas əmələɣ-awan as Taɣmar ta n Məşşina a daɣ-wan tattarmas, tətəwəkfu i tamattay ta daɣ-as du-za-tawəyat tənfa. ⁴⁴ Awedan wa udan fəl təhunt ten, ad addagdag, wa fəl tuda deɣ a tu-təlkəş.»

⁴⁵ As əslan muzaran ən limaman əd Fərisaytan y əlmitalan win iga Ƴaysa den, əgran as əntanay a fəl imməgrad. ⁴⁶ Ad gammayan əmmək was tu-za-səttərməsan, mişan əksudan tamattay, fəlas təga i Ƴaysa iduf n as ənnəbi a imos.

22

Elmital wa n təkərst

¹ Ilas Ƴaysa ig-asan əlqissat iyyat təmosat əlmital, inn-asan: ² «Taɣmar ta n jənnawan, təha əlmital n əmənokəl iyyan isassagan saksas daɣ təkərst ən barar-net. ³ Izammazal eklan-net y ad əməlan y aytedan win as ira a d-əggəzan saksas wen, mişan ugayan s a d-asin. ⁴ Ilas əzəmmizəl n eklan-net wiyyad y ad annin y aytedan win den: "Nak sammatagaɣ iməgura-nin, əgzamaɣ izəgran-in, əd haran-in win əddəratnen, arat kul immotag əmərədda, aɣliwat-du amaran ad nassantu saksas." ⁵ Mişan əgmədan batu-net, wiyyad əkkan šiwəgas-nasan, wiyyad əkkan idaggan win daɣ satagan, ⁶ təzzar obazan win hadatnen inammazalan win den, əgan-asan tarşəxşad, ənɣan-tan kərəz. ⁷ Iggaz alham labasan əmənokəl, issəgla sojitant-net, əɣradan tenaɣay ən maggan ən man win den, əɣradan əsəqqəd n əɣrəm-nasan ketnet.»

⁸ «Təzzar inna y eklan-net: "Imutag za win saksas əgân, mişan meddan win den, wər əhoran əd məgura win. ⁹ Daɣ adi, aɣliwat takkim idaggan win daɣ əmmənaynat tarrayen, taɣrim-du aytedan kul win tənayam, a d-akkin saksas." ¹⁰ Təzzar əgla eklan win den, əgran-du aytedan kul win ənayan, gər za win olaynen, wala win əmosnen imaksanan, har iɣrad adag wa n saksas en adanay n aytedan. ¹¹ Iгла-du əmənokəl y ad inəy əljəməɣat ta du-təddewat den i təkərst. Inay daɣ meddan win

ellanen den iyyan wər nəlsa tabdoq tas ihor a du-tətəwəqqən əs təkərest. ¹² Inn-as əmənokal: "Obaz, kay ak mas du-təggazax edag a wər təqqena tabdoq tas ihor a du-tətəwəqqən əs təkərest?" Wər du-təgmed tefert waliyyat imi n aləs wen. ¹³ Den day ad inna əmənokal i maşşaxalan-net: "Abəzat-tu, təxrədam kerrad ən daran-net əd fassan-net, təgəram-t-in sədi day şiyay, day adag wa day hallin aytedan, əddâdan idədwān-nasan fəl təmagraz." ¹⁴ Inna Yaysa: «Aytedan aggotnen a du-tawaxranen, mişan wər day-san əggətan win tawasanafrannen.»

Arazam n amana i Qaysara

¹⁵ Dəffər awen maşawwaran Farisaytan, ad gammayan əmmək as əgan i Yaysa taftaw, ərân a tu-səssugin batu a tu-za-tagit day xunan. ¹⁶ Zammazalan-du arat day nalkiman-nasan, d aytedan wiyyad əwarnen aganna n əmənokal Herod y ad annin i Yaysa: «Əşşex, nəssân as əməggi ən tidət a təmosa, amaran təsasaxra əs tidət awas dana-iwar igi-net day tarrayt ta n Məşşina. Wər t-illa i təkşuda day awa təganna, fəlas wər təzlāya day almaqam n aytedan. ¹⁷ Day adi, nərə day-ak a dana-təməla: Awak xalal arazam n amana y əmənokal wa zəwwəran Qaysara, me wər xalal?» ¹⁸ Mişân igra Yaysa əşşur-nasan, inn-asan: «Mafel tətajjarrabam-i, əlmunafiqan win? ¹⁹ Sakniwat-i tefelt n əzrəf tas itawarzam amana.» Təzzar təmməway-as-du tafelt. ²⁰ Inn-asan Yaysa: «Ma ilan eyaf d esəm win əwarnen tefelt ta?» ²¹ Ənnan-as: «In Qaysara.» Təzzar inn-asan Yaysa: «Ənəyat za, agiwat i Qaysara awa kawan-issəwar, tagim i Məşşina awa kawan-issəwar.» ²² Isammaklal sər-san aljawab wen, oyyan Yaysa əqlan.

Əsəstan day batu n azalaf day alaxirat

²³ Əzəl wen day a d-osan Sadusaytan, əmosnen aytedan əganen iduf n as wər tu-təlla tanakra dəffər təməttant. Əhozan-in Yaysa, əssəstanan-tu, ²⁴ ənnan-as: «Əşşex, ənnəbi Musa inna: "As aba awedan wər igrew barar, wədi amadray-net a iwar ad izləf tantut ta d-oyya den, fəl ad agu əzzurrəyya y əmidi-net wa aba den."»

²⁵ «Ənta nakkanay, əhân-anax əssa mədrayan. Izlaf wa dasan-waşşaran ketnasan, aba-tu da wər ila barar, oyya-du tantut-net y amadray-net. ²⁶ Iga awen da fəl amadray-net wen, igraw wa n karad, xasil a tat-zallafan itiba-tan da wər dər-əs əlen bararan, har əyradan fəl əssa-essan. ²⁷ Dəffər as tan-aba ketnasan, aba tantut ten. ²⁸ Day adi əzəl wa n tabadday, ma imos day əssa mədrayan win den was za təqqəl təntut ten tağurəs, dad zamas ketnasan əzlâfan-tat.»

²⁹ Inn-asan Yaysa: «Iket n alxata tətəfām-tu, fəlas wərmad təssanam awa ənnan Əlkəttaban, wala dəx təssanam awa dər togda tarna ən Məşşina. ³⁰ Əssənət əs əzəl wa n tabadday, wər t-illa azalaf i meddan wala şidoden. Kalar təməddurt a z'agin şilat ən ta əgan angalosan day jənnawan. ³¹ Day batu amaran ta təqqalat tanakra ən nəmməttan, awak edes a kawan-wər-iga as təxrâm awa a dawan-inna Məşşina day Əlkəttaban? Wərgəx a inna: ³² "Nak a imosan Əməli n Ibrahim, Əməli n İsəhaq, Əməli ən Yaqub?" Məşşina wər imos Əməli ən təməxxa, kalar Əməli ən win əddarnen a imos.» ³³ Tamattay ta təslat y aljawaban win den, isimaklal sər-əs wəllen əsəssəxri wa iga Yaysa den.

Alwajiban win ogarnen

³⁴ As əslan Farisaytan as Yaysa iga aljawab isifastan Sadusaytan, əmmənayan. ³⁵ Inkar iyyan day-san imosan əmusan n əşşərixa, ira ad agu tənagmayt i Yaysa. İssəstan Yaysa inn-as: ³⁶ «Əşşex, ma imos alwajib wa ogaran day Əttawret?» ³⁷ Inn-as Yaysa: «Ənta da alwajib wa ogaran: "Iru Əməli-nak Məşşina s əwəl iyyanda, əd man ərdânen, tireq-qu dəx əs tayttay-nak kul." ³⁸ Ənta da da alwajib wa ogaran alwajiban kul, imos dəx wa azzaran. ³⁹ Amaran alwajib da wa ilkaman i wen, a

dər-əs olân: "Agu y əşəqqaq-nak tara ta təgeç i man-nak." ⁴⁰ Alwajiban win əşšin a, əntanay a daç iqqan arat kul wa ihan Əlkəttaban.»

Əlməsix əd Dawəd

⁴¹ Əqlan Farisaytan win den əllân den da, əmminayan. Issəstan-tan Үaysa amaran, ⁴² inn-asan: «Ma imos iduf-nawan daç Əlməsix? Ma tənnam ma imos abba-net?» Ənnan-as: «Adi za Ag əmənokal ənnəbi Dawəd!» ⁴³ Inn-asan Үaysa: «Daç adi, manəmmək as t-içra ənnəbi Dawəd əs tilalt n Infas wa n Məşşina s esəm wa n: "Əməli"? Fəlas a inna: ⁴⁴ "Inna Əməli y Əməli-nin: 'iyyaw qamu daç əçil-in, har əçrədaç əsərəs ən zəngə-nak, agaç-qan daw daran-nak.'" ⁴⁵ Dad zamas içr-ay Dawəd s esəm wa n Əməli, daç adi manəmmək as z'iqqəl barar-net?»

⁴⁶ Wər t-illa awedan waliyyan ilfâdan i Үaysa wala təfert iyyadda n aljawab y əsəstan wa iga den. Amaran a obazan çur əzəl wen, ab'as t-illa awedan ihalan a das-agu əsəstan waliyyan.

23

Үaysa iggâz šin məssəsəçra n Əttawret əd Farisaytan

¹ Den daç ad işşewal Үaysa i tamattay, əd nəttulab-net, inn-asan: ² «Imusanan n Əttawret, əd Farisaytan, əntanay a sasəçrinen aytedan əşşəriçə wa d-oyya ənnəbi Musa. ³ Daç adi mazalat aratan kul win kawan-sasəçrin, tabbardagam y awa dawan-gannin. Mişan ad wər tətəggim imazalan win taggin, fəlas awa gannin, wər idrew arat d awa tamazalan. ⁴ Əzuk zəwwəran as izzəwat aggay-net a sawaran aytedan, əntanay amaran wər tu-z-ədəsan əs wala idədwan-nasan. ⁵ Imazalan-nasan kul wər əmosan ar soknit. Awen daç a fəlas šira šin təkannaren-nasan, əgan-tanat ši zawwarnen wəllen, əzzəzwaran deç šin taqqanan daç təgəltam-nasan, fəl ad ilenat anay wəllen. Šibənək ən təkadkaden-nasan deç əbâlan-asnat başakşakan zagrotnen, əlânen anay wəllen. ⁶ Ərân təçimit daç daggan n aytedan win tawasəçmarnen daç əməçura əd daggan win əlanen almaçam daç nan n əlyibada ən Kəl-Əlyəhud. ⁷ Ərân a dasan-taggin aytedan assalam ən saçmar daç sammanayan, ərân deç a tan-çarrin aytedan s esəm wa n "Əşşex-in".»

⁸ «Mişân kawanay, ad wər tagim i man-nawan esəm wa n Əşşex, fəlas kawanay Əşşex iyyanda a təlam, amaran ketnawan imədrayan a təmosam. ⁹ Ad wər təçarrim deç iyyan daç-wan s esəm wa n abba daç əddənət, fəlas Abba iyyanda a təlam, a t-imosan: Abba wa ihan ijənnawan. ¹⁰ Ad wər təraddim deç itawann-awan "Əşşex", fəlas Əşşex iyyanda a təlam, a t-imosan Əlməsix. ¹¹ Wa daç-wan imosan əmuzar, wədi ad iqqəl zun amaşşaxal-nawan. ¹² I idkalan iman-net, ad t-issərəs Məşşina, i əssərəsan iman-net deç ad t-idkəl Məşşina.»

¹³ «İket alyazab iqqâl-awan, ya imusanan n Əttawret, əd Farisaytan win əlmunafıçan! Kawanay a əmosnen y aytedan zun təsəhərt təçfâlat gar-essan əd Taçmar ta n jənnawan. Fəlas kawanay iman-nawan da wər təggezam Taçmar ta n jənnawan, təgdalam deç iguz-net i win t-əranen.»

¹⁴ [«İket alyazab iqqâl-awan, ya imusanan n Əttawret, əd Farisaytan win əlmunafıçan! Təttatim eharay ən tədoden šin as aba meddan-nasnat, amaran tətəggim imaddan zagrotnen wər nəmos ar sokni. Awen daç a fəlas attadib wawan, ad agər attadiban kul tallabəst.»]

¹⁵ «İket alyazab iqqâl-awan, ya imusanan n Əttawret, əd Farisaytan win əlmunafıçan! Təşakalam, təssiwalam idaggan kul, fəl amaçal əd gərwan, təgâmmayam kuddeç awedan iyyanda təssərdam s ad ilkəm y əsəssəçri wa n Əttawret. Amaran as sər-əs təssərdam awedan, a tu-tagim aw Jahannama, har as alyazab wa z'agu, a d-agu əşšin nədfisan fəl wa-nawan.»

¹⁶ «Iket alɣazab iqqâl-awan, ya imuzaran əddirɣalnen! Kawanay a ganninen: As ihad awedan s Ahan wa Zəwwəran n Əlɣibada, wədi wər imos wala, mišan as ihad s urəɣ wa ihan Ehan wa Zəwwəran n Əlɣibada, wədi tahuday-net təglâ. ¹⁷ Iməskilan ən məddəɣal! Awak urəɣ a ogaran almaqam, meɣ ak edag wa zəddigan s ənta a izzazdagan urəɣ? ¹⁸ Madeɣ tannim: "As ihad awedan əs majmar wa zəwwəran n əsəqqəd ən təkutawen, wədi tahuday-net wər təmos wala, mišan as ihad əs təkutay ta təwarat majmar, wədi tahuday-net təglâ." ¹⁹ Iməddəɣal win! Awak takutay a togarat almaqam, meɣ majmar wa tat-izazdagan? ²⁰ Əssənət as awedan wa ihadan əs majmar wa zəwwəran n əsəqqəd ən təkutawen, wədi awa iwaran majmar da ihâd sər-əs. ²¹ Awedan wa ihadan s adag wa zəddigan n Ahan wa Zəwwəran n Əlɣibada, wədi edag wa zəddigan as ihâd əd Wa t-ihan. ²² Amaran awedan wa ihadan əs jənnawan, wədi təxawit ta n taɣmar ən Məššina as ihâd, əd wa fall-as iqqiman.»

²³ «Iket alɣazab iqqâl-awan ya imusanan n Əttawret əd Farisaytan win əlmunafiqan! Tətâkkasam təməssədək daɣ ənniɣnaɣ, əd ɣanit d alkemun, amaran toyyam aratan win ogarnen assahat daɣ əlqanun, a tan imosan: əššəriɣa, təhanint d əzəɣzan. Aratan win di əntanay a azzarnen, iwâr-kawan a tan-tammazalam, da wər din-təglemam win hadatnen. ²⁴ Imuzaran əddirɣalnen! Təzazdaram aman y a daɣ-san təkkasam šizəbbawen, amaran təlammazam aɣəm iɣrâdan!»

²⁵ «Iket alɣazab iqqâl-awan ya imusanan n Əttawret əd Farisaytan! Əlmunafiqan! Təzazdagam afalla n əsəlkəw d əɣəzu, mišan ammas-nasan ijirgan fəlas idnay tarkəbt d arak deranan. ²⁶ Farisay iddirɣalan! Zəzdəɣ təzzar ammas n əsəlkəw d əɣəzu, əddi ad z'izdag afalla-net ənta da.»

²⁷ «Iket alɣazab iqqâl-awan ya imusanan n Əttawret əd Farisaytan win əlmunafiqan! Tolâm əd zəkwan a fəl tiwasalsanen arat mallan, hossayan daɣ azzahir, amaran ammas-nasan ədnayan-tu ɣasan ən nəmməttan, d əzzənəfan kul ən tadjarganen əmmidasnen. ²⁸ Əmmək en daɣ a təgam kawanay da. Daɣ azzahir za, toɣâdam, mišan iwallan-nawan, wər ədkeran ar təlmənufəqa əd talbast.»

²⁹ «Iket alɣazab iqqâl-awan ya imusanan n Əttawret əd Farisaytan win əlmunafiqan! Təkârrasam izəkwan y ənnəbitan, tədâllagam izəkwan n aytedan win oɣadnen, ³⁰ amaran təgannim: "Ənnar du-nəggâz azzaman win d-əggazan marawan-nana, wər dər-san za nənəmənnək daɣ tanaɣla ta əgan azni n ənnəbitan."

³¹ Əmmək en daɣ as təsattaddam tišit-nawan ihayawan n aytedan win ənɣanen ənnəbitan. ³² Daɣ adi səkkəsəwat awa din-əɣlaman marawan-nawan. ³³ Iket ən taššolen! Əzzənəf ən taššolen šin iha assam wa labasan! Manəmmək as za taddarragam y attadib an Jahannama? ³⁴ Awen daɣ a fəl kawan-d-əssokax ənnəbitan, əd malan-ən-tayttay, əd musanan n Əttawret. Ad tagim iman ən wiyyad tattaytayam-tan fəl təgəttawen, tagim šiwwit n ələkkud i wiyyad daɣ nan-nawan win əlɣibada, təlləmam gər ɣərman tədgəzam-tan, ³⁵ fəl a kawan-iwər alxaq kul n əzni wa təwanɣalan daɣ tədləmt, a d-obazan ɣur Habila wa n alɣadil, har əlimam Zakarayya wa n ag Barakəya wa tənɣam gər edag wa zəddigan əd majmar wa zəwwəran n əsəqqəd ən təkutawen daɣ Ahan wa Zəwwəran n Əlɣibada. ³⁶ Əggəyyeɣ əsilakanax-awan as aratan win əmalax əddi, kul ad agin fəl aytedan n azzaman win!»

Təkurat fəl Yerusalam

³⁷ «Xa aytedan ən Yerusalam, iket təgam iman n ənnəbitan, tənɣam deɣ əs təgur ən təhun win sər-wan d-izammazal Məššina! Awak har mənəket taklaten, gammaya d a kawan-d-əššidəwa s əmmək as du-təšadaw təkəjit ikərətan-net daw əfrutan-net, mišan tugayam s awen! ³⁸ Ənəyat za, ehan-nawan ad itəwəyyu issûf. ³⁹ Fəlas əsilakanax-awan as wər di-za-tələsam anay a obazan ɣur əmərədda har əzəl wad za tannim: "Wa d-osan s esəm n Əməli, iɣrâw arraxmat!"»

24

Esässəyri wa n səmmos: Ahluk ən Yerusalem d əyrud n əddənet

Esənti

¹ As iḡrad Ƴaysa batuten šin den, igmad Ehan wa Zəwwəran n Elḡibada, igla. Ehozan-t-in nəttulab-net y a t-in-sassagrin təməkrust n Ahan wa Zəwwəran n Elḡibada wen. ² Mišan inn-asan Ƴaysa: «Təhannayam əkərrus wa? Əggəyyeḡ əsilakanax-awan as awa təhannayam da, ketnet wər daḡ-as du-z-aqqam təhunt təwârat təmidit-net, ketnet ad itəwəjjəbbəjjət.» ³ Dəffər awen igla, iqqim fəl ədḡax wa n Eškan ən Zaytun. Ehozan-t-in nəttulab-net ḡas-nasan, ənnan-as: «Əməl-anax əmmay ad z'agu arət wədi, təmələx-anax aḡalamat ta za tassaknit assa-nak, d əyrud n əddənet.»

Aḡalamaten n əyrud n əddənet

⁴ Inn-asan Ƴaysa: «Ənkədat. A kawan-wər-issəxrək awedan waliyyan. ⁵ Fəlas aytedan aggotnen a du-z-asinen əttâfan esəm-in, akkiyyan daḡ-san igannu imos Əlməsix. Amaran ad əssəxrəkən s awen aytedan aggotnen. ⁶ Ad taslim i tərmuḡ ən məgiran, əd salan ən məgiran. Mišan ənkədat y a kawan-issərməḡ awen, fəlas aratan adi as kundaba əgan. Mišan wərgəḡ əntanay a mosnen təzərəst n əddənet. ⁷ Ad əknəsnaat addawlaten gar-essanat, əknəsnaat taḡmaren gar-essanat. Iməl-tu laz labâsan, əd nəgəynəgəyan n amaḡal daḡ daggan aggotnen. ⁸ Mišan aratan win kul, wər əmosan ar ənətti ən təlawayt təhât əlmital ən ta du-tətizarat əs tətut tətəgəzət amzur.

⁹ Əddi ad za tətəwəggim daḡ təssust labasat, ad tətəwanḡim, tətəwəgzaram daḡ təməttiwen n əddənet kul, fəlas kawan-iwar esəm-in. ¹⁰ Arət wen a d-awəy s aytedan aggotnen a tan-igməd əzəgzan-nasan, ad tinəməkəddilan, nəməgzəran. ¹¹ Ad t-əməlan ənnəbitan ən bahu aggotnen, a z'əssəxrəknen aytedan aggotnen. ¹² Ad tətittəy talbast har as taššam n aytedan a daḡ-san təfnəz tara wəllen. ¹³ Mišan wa daḡ-wan izmaran har təzərəst, wədi ad iḡləs. ¹⁴ Isalan n Əlinḡil, imosan isalan ən Taḡmar ta n Məššina win da, ad təwəməlan daḡ əddənet ketnet, fəl ad aslinat təməttiwen kul n əddənet təgəyya ta. Əddi amaran a du-za-tawəd təzərəst.»

¹⁵ Igla Ƴaysa iššəwal inn-asan: «As tənayam "taxxaramt ta səksədat" ta imal ənnəbi Danəyel, təha edag wa zəddigan, – wədi wa iḡarrin, agret! – ¹⁶ Əddi aytedan win akal ən Yahudəyya, addəggənet s ədḡaxan; ¹⁷ Awedan wa iqqiman daḡ adag wa n afalla n ahan-net, a du-wər-azzabbat y a din-idkəl ar-es ihân ehan-net. ¹⁸ Awedan wa ihan tawəgost-net, a du-wər-iqqəl aḡaywan-net igmây isəlsa-net! ¹⁹ İket aḡazab ad t-əginat tədoden šin əganen šidusen əd šin sankasnen daḡ adan win den! ²⁰ Əgməyat daḡ Məššina a fəl du-wər-imazayyat ədəggəg-nawan əd tamert n asamed irtayan d akonak, madəḡ əzəl wa n təsanfawt. ²¹ Fəlas adan win den, a tu-təməl təssust labasat as, a du-tənta əddənet wər tətəwanay ši wər toger; amaran wər ilkem deḡ ad tətəwanay tulat-net dəffər awen. ²² Kundaba as adan win den ikf-en Əməli təzərəst, wədi wər t-illa i daḡ-san du-z-irəgan. Kalar ad təwəzzəgzəlan fəl əddəlil n aytedan win tawasanafrannen. ²³ Əddi amaran, as dawan-inna awedan: "Ənəyat! Əlməsix illa da", madəḡ: "İlla den", a das-wər-təzzəgzənam! ²⁴ Fəlas ad t-əməlan əlməsixan ən bahu, əməlan-tu deḡ ənnəbitan ən bahu. Ad taggin aḡalamaten simaklalnən, əd təlməḡjujaten əmmittaynen, har as ənnar əfragan awen, əssəxrəkən aytedan harkid win isannafran Məššina. ²⁵ Daḡ adi ənkədat əd man-nawan! Aratan win, əgeḡ-awan-tan daw aḡaf!

²⁶ Amaran as dawan-itawanna: "Ənəyat, Əlməsix den iha teneray", a tu-wər-takkim. Madəḡ itawann-awan: "Ənəyat, iha daḡ ahan edag wa ogaran ilḡi", kaššeday, ad wər təzzəgzənam wala daḡ batuten šin di. ²⁷ Əssənət as, assa-nin nak Ag Aggadəm

ola d essam a du-z-assantin əbələzləz da d-inta dənnəg, har da d-iraz ataram. ²⁸ Edag təggaz təmaxsayt, a daḡ-as iddawan jadaran.»

Tewaylay n Ag Aggadəm

²⁹ Iгла Ҷайса ишсəwal, inn-asan: «Tarmâd dəffər adan ən təssust ta labasat en, ad alsinat šiyyay təfuk, tallit dəḡ igməd-tat ənnur-net, ərəkən-du etran, nəgəynəgəynat təxəllak šin əlanen tarna daḡ jənnawan. ³⁰ Eddi a du-za-tənəfiləl alyalamat-in nak Ag Aggadəm daḡ jənnawan. Šimattiwen kul n əddənət ad səkkirəynat, təzzar ənəynat-i nak Ag Aggadəm as du-z-asa əheḡ šignawen, əknəḡ təla ən tarna əd tanaya. ³¹ Təzzar insəḡ in asak, zəmmizəla nak Ag Aggadəm angalosan-in, əššidəwan-du aytedan win əsannafrana daḡ təḡəmmar an əkkozat n əddənət.»

Təssunt ta n ašək ən fig

³² Inn-asan: «Abəzat alfaydat s əlmital wa n ašək ən fig. Igda ad hussəyan lədlad-net, iggaz-du šin tanazra, ad təssənam as tamert ta n akasa təhōz. ³³ Zund əmmək en daḡ əs as tənayam aratan kul win dawan-əmaləḡ əddi, təssənam as aḡrud n əddənət ihoz, wər illa gar-ewwan dər-əs arat. ³⁴ Eḡgəyyeḡ əsilakanəḡ-awan as tamattay ta da n azzaman win nəha da, ad tənəy ənətti n aratan kul win dawan-əmalə da. ³⁵ Ijənnawan d amaḡal ilkam ad ib'as t-əllan, mišan batuten-in əllanat-tu har faw.»

Ezəl wala alwaq wa n tanakra n alaxirat, wər tawassanan

³⁶ Iгла Ҷайса ишсəwal inn-asan: «Ezəl amaran wala alwaq wa daḡ z'agu awa dawan-əmalə da, wər t-illa i daḡ-san issānan, gər za angalosan a əhanen ijənnawan, wala Barar iman-net. Wər t-illa i daḡ-san issānan ar Abba ḡas. ³⁷ Awa igan daḡ azzaman n ənnəbi Nux, a z'agin daḡ adan win daḡ du-z-asa nak Ag Aggadəm. ³⁸ Təssānam as adan dat alwabil, aytedan tātтин, sassin, zāllafan, zāzlafan har əzəl wa daḡ iggaz Nux aylal n aman. ³⁹ Wər əgen aššak daḡ arat waliyyan, har d-ewad alwabil, iḡrad-tan ebət ketnasan. Zun awen daḡ a z'agin ḡur assa-nin nak Ag Aggadəm. ⁴⁰ Eddi əššin magyakan nimašḡalnen daḡ tawagost iyyadda, ad ammadkal iyyan, itəwəyyad-du wa hadan. ⁴¹ Sanatat tədoden taddanen daḡ adag iyyanda, ad tammadkal iyyat, tətəwəyyad-du ta hadat.»

Elmital wa n məššis n aḡaywan d abaydag

⁴² Inn-asan: «Daḡ adi ənkədat, fəlas wər təssənam əzəl wa daḡ du-z-asu Əməlinawan. ⁴³ Təssānam wəllən əs ənnar issān məššis n aḡaywan amazay wa daḡ du-z-idəl abaydag, ahad wədi ad akəy isəmmutəḡ y a das-igdəl terazay n ahan-net. ⁴⁴ Awen daḡ a fəlas kawanay da, səmmutəḡat, fəlas nak Ag Aggadəm, a d-asa daḡ assayət ta wər tordem.»

Elmital wa n əkli wa olaxan əd wa wər noley

⁴⁵ Iгла Ҷайса ишсəwal inn-asan: «Daḡ adi akli iḡdālan, ilān əḡərri, ənta a isannafran məššis izzuzər-tu y eklan-net win hadatnen y a tan-ihakku imensewan daḡ alwaq was ihor. ⁴⁶ Ibbilal əkli wen, as d-iqqal məššis, ogaz-t-id iha əššəḡəl wa daḡ q-id-oyya den. ⁴⁷ Eḡgəyyeḡ əsilakanəḡ-awan as akli wen, ad t-izzuzər məššis i təla-net kul. ⁴⁸ Mišan ənnar imos ark əkli, inna daḡ man-net: "Məšši illolat-in," ⁴⁹ təzzar ad iggat imidawan-net, idarraw d aytedan win tamaswadnen, itinəməšəw dər-san esmad, ⁵⁰ wədi ilkām a t-id-iḡdər məššis daḡ əzəl d amazay wər orda. ⁵¹ Təzzar ad t-iggāt məššis har t-iksən, aḡ-ay dad tawaggin əlmunafiqan. Den da ad əllan aytedan win hallinen əddadan idədwan-nasan fəl təmagraz.»

25

Elmital wa n marawat təmawaden wər nəzday meddan

1 Igla Ƴaysa iššewal i nöttulab-net, inn-asan: «Æzəl wədi assa ən Taɣmar ta n jənnawan, ad iggəz əlmital ən marawat təmawaden wər nəzday meddan, ədkalnen ibelan-nasnat əzəl ən təkrest, əssəlkadnat y amazlay. 2 Səmmosat daɣ-asnat za wər əlenat tayttay, səmmosat amaran əlānat-tat. 3 Šin wər nəla tayttay za, as ədkalnat ibelan-nasnat, wər ewaynat widi wa n əsərxī-nasan. 4 Šin əlanen tayttay amaran, as ədkalnat ibelan-nasnat, ewaynat šitəkan iha widi wa n əsərxī-nasan. 5 Illolat-in amazlay, har as obaz-tanat etəs ketnasnat. 6 As iga adawannay, təga-du təxərit, itawanna: "Amazlay əddi, ərdəxat-du səlkədat-as!" 7 Təzzar ənkarnat-du təmawaden šin marawat en ketnasnat, sammatagnat ibelan-nasnat. 8 Ənnanat šin wər nəla tayttay i šin hadatnen: "Ibelan-nana əggazan šin təmattant, akfimat-ana-du daɣ widi." 9 Ənnanat-asnat šin əlanen tayttay: "Kala, widi-nana wər danax-ewed dər-əkmat. Aglimat akkimat imassatagan ən widi tazzanzimat-du widi i belan-nakmat." 10 As əglatan y a d-azzanzinat widi, osa-du əmazlay, əggaznat fall-as səmmosat təmawaden šin sammatagnen edag wa daɣ itaggu saksas, tətawahar-du təsəhərt n ahan. 11 Dəffər awen, ewadnat-du təmawaden šin hadatnen, ad saxaratnat y amazlay, ganninat-as: "Mandam! Mandam! Aləm-ana!" 12 Təzzar inn-asnat amazlay: "Əggəyyeɣ əsilakanax as wər kamət-əzdayax." 13 Igla Ƴaysa iššewal inn-asan: «Daɣ adi ənkədat, fəlas wərmad təssānam əzəl, za wala assaxat ta du-z-asa.»

Əlmital wa n təsəgras n urəx

14 «Batu ta təqqalat Taɣmar ta n jənnawan, təha əlmital n aləs išakalan. Iɣra-du eklan-net, a tan-isaxlaf ərrəzəxan-net. 15 Ikfa iyyan daɣ-san səmmosat təsəgras ən dinaran n urəx, ikfa wa hadan sanatət, ikfa iyyadda y əkli wa n karad, a daɣ ewal awen əs da du-təqqal fərregat-nasan, amaran iššokal. 16 Tarmad as igla wa issəxlaf səmmosat təsəgras, iššəxal urəx wen, igraw-du fall-as səmmosat təsəgras šiyjad ən dinaran. 17 Wa issəxlaf sanatət deɣ igla, išxal, igraw-du fall-asnat sanatət šiyjad. 18 Wa wər nəgrew ar təsəgrəst iyyadda, igla iga anu daɣ amaɗal inbal daɣ-as təsəgrəst ta iylaf den.

19 As təga tərut dəffər awen, osa-du məššissan, ad isaxrad ərrəzəxan win tan-issəxlaf. 20 İbdad-du wa issəxlaf səmmosat təsəgras, eway-du səmmosat šin fall-asnat d iššota. Inn-as: "Məšši, səmmosat təsəgras a di-təssəxlafa, amaran əgrawa-du fall-asnat səmmosat šiyjad. Əntanatay da." 21 Inn-as məššis: "Alafəyet! İllikan as akli olāxan a təmosa, təmosax deɣ awedan ən təfləst. Təssiknax adi daɣ arət wər nəggət. Dəffər awa a kay-əssəxləfəx a aggen. İyyaw taga təfalawist ta əgeɣ nak an məšşik!"»

22 «Wa issəxlaf sanatət təsəgras deɣ ibdad-du, inna: "Məšši, sanatət təsəgras a di-təssəxlafa, amaran əgrawa-du fall-asnat sanatət šiyjad. Əntanatay da." 23 Inn-as məššis: "Alafəyet! İllikan as akli olāxan a təmosa, təmosax deɣ awedan ən təfləst. Təssiknax adi daɣ arət wər nəggət. Dəffər awa a kay-əssəxləfəx a aggen. İyyaw taga təfalawist ta əgeɣ nak an məšşik!"»

24 «Dəffər awen amaran, ibdad-du wa issəxlaf təsəgrəst iyyadda, inna: "Məšši, əssānax as aləs labasan a təmosa, tətəlaya-du xarat daɣ adag a daɣ wər tənbelə, tətəlaya-du deɣ tənfa daɣ adag a daɣ wər tənbesax amasa waliyyan. 25 Adi da fəl di-təggaz tasa-nak, əgley ənbala təsəgrəst ta di-təssəxlafa. Əmərədda ənta da." 26 Inn-as məššis: "Kay arək əkli a təmosa, təmosa deɣ anaffaraššay! Dad zamas təssānax as ətəlaya-du xarat daɣ adag a daɣ wər ənbela, ətalaya-du deɣ tənfa daɣ adag a daɣ wər ənbəsx amasa waliyyan, 27 wədi, ənnâr di təssinsax azrəf-in daɣ bank, as du-z-əqqələx əgrāwa-du fall-as tətəyt, ətkəlaq-q-idu." 28 Inna məššis: "Daɣ adi abəzat-du daɣ-as təsəgrəst tədi, takfim-tat i wa ilan marawat. 29 Fəlas awedan kul wa ilan, wədi a das-itəwəšitu awa ilə, annafay, amaran wa wər nəla, arət n arət

wa ila da, a daɣ-as attarmas. ³⁰ Akli amaran wa wər nənfa wala, əgərat-t-in dəffər ahan daɣ šiyyay. Den da ad əllan aytedan win hallinen əddadan idədwān-nasan fəl təmagraz."»

Ɛššəriya wa n əzəl wa n tabadday

³¹ Igla Ƴaysa iššewal inn-asan: «As d-əqqala nak Ag Aggadəm əheɣ tanaya-nin, əddewa-du d angalosan kul, ad əqqama fəl təxawit-in ta n tanaya. ³² Šimattiwen n əddənet kul a d-idawnat, əbdədnat dat-i. A tanat-zamazzaya s əmmək as isakkat amadan ayfad-net daɣ wəlli, ³³ agaɣ ayfad daɣ əɣil-in, aga wəlli daɣ zalgat-in. ³⁴ Den daɣ ad z'anna nak an əmənokal i win əhanen aɣil-in: "Ayewat kawanay win as iga Abba-nin arraxmat, ad təgrəwam taɣmar ta dawan-tətawasamatagat harwa ɣur ənətti n əddənet. ³⁵ Fəlas iggâz-i gələk, təššətšam-i; iggâz-i fad, təššəšwam-i; əqqalax ənaftax, təsammagarem-i. ³⁶ Ɛzlama, təssəlsam-i; ərina, təssanam daɣ-i; əggazax kasaw, təssəslamam-i-in." ³⁷ Den daɣ a di-z-annin aytedan win oɣadnen: "Ɛməli, əmmay a kay-nənay ih-ik gələk nəššətš-ik, wala ih-ik fad, nəššəšəw-ik? ³⁸ Ɛmmay kay-nənay təmosax ənaftax nəsammarat-kay, wala təzlâma nəssəls-ik? ³⁹ Ɛmmay kay-nənay tərina, wala taheɣ kasaw, əngəm nəssən daɣ-ak, wala nəssəsləm-kay-in?" ⁴⁰ Den daɣ a dasan-z-anna nak an əmənokal: "Ɛggəyyey əsilakanax-awan as dad zamas təgâm aratan win di y iyyanda daɣ mədrayan-in win əknanen təmmədrəyt di, wədi nak as tan-təgam."»

⁴¹ «Dəffər awen amaran annax i win əhanen zalgat-in: "Ugagat-i imawaran ən tulɣant. Agliwat əggəzat Jahannama, tətivasamatagat y Iblis, d angalosan win das-əlkanen. ⁴² Fəlas iggâz-i gələk, mišan wər di-təššətšam; iggâz-i fad, mišan wər di-təššəšwam. ⁴³ Ɛqqâlax ənaftax, mišan wər di-təsammagarem; əzlama, mišan wər di-təssəlsam. Ɛrina, əggaza kasaw, mišan wər daɣ-i təssenam za wər di-in-təssəslamam." ⁴⁴ Təzzar annin-i: "Ɛməli, əmmay a kay-nənay ih-ik gələk, wala ih-ik fad, wala təmosax ənaftax, wala təzlama, wala tərina, wala tahe kasaw, nəqqim wər daɣ-ak nəssen?" ⁴⁵ Ɛddi a dasan-z-anna: "Ɛggəyyey əsilakanax-awan as, dad zamas wər təgem aratan win di y iyyanda daɣ win əknanen təmmədrəyt di, wədi nak iman-in as tu-wər-təgem." ⁴⁶ Den da ad z'akkin aytedan win edag n attadib iɣlâlan, win oɣadnen amaran əgrəwan təməddurt ta təɣlalat.»

26

Emel wa n əkkoz iga Ƴaysa i təmattant-net d igi wa fall-as z'agin aytedan eyaf

¹ As iɣrad Ƴaysa alfaydaten šin kul, inna i nəttulab-net: ² «Təssânam as amud wa n Akkay, ab-as-in əššin adan, amaran əddi daɣ ad za təwəsətərməsa nak Ag Aggadəm, y ad təwətəytəya fəl təgəttawt.» ³ As itaggu awen imuzaran ən limaman, əd muzaran ən Kəl-Əlyəhud əddewan daɣ aɣarɣar n aɣaywan ən Kayif s ənta a imosan Ɛlimam wa Zəwwəran, ⁴ ənamardan fəl təmərkəst tas z'abəzan Ƴaysa, agin iman-net. ⁵ Dər iga awen da ya gannin: Ad wər nagu adi daɣ adan n əmud, fəl ad wər ijənnəjərwəy awen tamattay.

Iba ən Ƴaysa əd tanakra-net daɣ təmattant

Ɛtərməs ən Ƴaysa d ətəwətəytay-net d iba-net

Ɛtəwənyal n alwardi fəl Ƴaysa daɣ Betanəy

⁶ Iha Ƴaysa taɣrəmt ən Betanəy iqqim daɣ ahan ən Simɣon was kala a t-igraw kətru, ⁷ as du-tosa təntut iyyat təhoz-t-in daɣ amazay a daɣ isiɣamar itattu. Tantut ten teway butalay igân daɣ təhənt təknât šihussay, iha alwardi iyyan ilân almaqam wəllen. Təzzar ad tənaqqal alwardi wen fəl aɣaf ən Ƴaysa, imos awen aɣalamat ən saɣmar. ⁸ As ənayan nəttulab arat wen, əššakan-tu wəllen, ənnan: «Ma infa

əhluk n alwardi a? ⁹ Alwardi wa ilan almaqam a, ənnâr inazzan a din-itawagga azrəf aggen, təwəkfin nazzan-net i tələqqawen.» ¹⁰ Igr-in Ƴaysa awen, inn-asan: «Mafəl təxaşşadam iman i təntut ta? Əmazal olâxan a di-təga da; ¹¹ fəlas şiləqqawen faw da əllânat xur-wan, nak amaran wərge faw əlley xur-wan. ¹² Alwardi wa, tanaçla a tu-təga fəl təxəssa-nin fəl a di-təsəmmutəg y əzəkka-nin. ¹³ Əggəyyey əsilakanax-awan as edag a daç ittəmal Əlinjil daç əddənet ketnet, a daç-as attamal awa təga təntut a, tətəwəkta-du.»

Iguz ən Yahuza şimərkas şin as z'attarmas Ƴaysa

¹⁴ Əzəl wen da ad inkar iyyan daç nəttulab win maraw d əşşin igân esəm Yahuza was itawannu Isxarəyuti, ikka imuzaran ən limaman, ¹⁵ inn-asan: «Ma di-za-takfim a dawan-t-aga daç fassan nak iman-in?» Təzzar inamarda dər-san, əkfan-tu karadat təmərwen ən tafelt n əzrəf. ¹⁶ A obazan xur amazay wen da, ad iggaz şin agamay ən tamazayyat ta daç z'agu Ƴaysa daç fassan.

Imutag n amensay n əmud wa n Akkay

¹⁷ As d-ewad əzəl wa azzaran n əmud wa daç tamatşinat təgəlwen şin wər iha xamira, əhozan-in nəttulab Ƴaysa, ənnan-as: «Mənid tareç a dak-nəsəmmutəg imensewan n amud wa n Akkay?» ¹⁸ Inn-asan: «Əggəzat açrəm, takkim awedan iyyan illan den, tannim-as: "Inn-ak Əşşex, alwaç ən təmattant-in ihôz. Kay a xur za nammansaw daç əmud wa n Akkay nak əd nəttulab-in."» ¹⁹ Əmmozalan nəttulab awas tan-omar Ƴaysa, sammatagan imensewan win Akkay. ²⁰ As tuda təfuk, inaxama Ƴaysa əd nəttulab-net an maraw d əşşin. ²¹ Tattin den daç as inna: «Əggəyyey əsilakanax-awan as, iyyan daç-wan a di-z-agin daç fassan.» ²² Batu ten, teway-du sər-san as əxşadan man-nasan wəllen, a das-igannu akkiyyan daç-san: «Əməli, əngəm wərgex nak a kay-z-agin daç fassan?» ²³ Itajawwab-asan, igann-asan: «Wa di-z-agin daç fassan, ədrawa dər-əs da da daç əxəzu iyyanda. ²⁴ Tidət as nak Ag Aggadəm a di-iba s əmmək wa əmalan Əlkəttaban daç batu-nin. Mişan ya, iket alçazab ad t-agu wa di-igan nak Ag Aggadəm daç fassan! Awedan wədi, a das-afu fadda a du-wər-iggez əddənet.» ²⁵ Təzzar işşewal Yahuza s ənta a tu-z-agin daç fassan, inn-as: «Əngəm wərgex nak as təgannaç əddi, Əşşex?» Inn-as Ƴaysa: «Kay iman-nak as tənney adi.»

Tadrəwt ta təkamat iga Ƴaysa əd nəttulab-net

²⁶ Amazay wen daç a daç tattin den, a daç d-idkal Ƴaysa tagəlla, iga igodan i Məşşina, irza tagəlla ten, izun-tat i nəttulab-net, inn-asan: «Atşiwat da. Təxəssa-nin adi.» ²⁷ Dəffər awen, idkal-du təkabart, iga igodan i Məşşina, ikf-asan-tat, inn-asan: «Aşwat daç-as ketnawan, ²⁸ fəlas azni-nin adi, isitaddan azni wa n arkawal ən tassaç gər Məşşina əd tamattay-net. Azni wa ad inçəl fəl ad əgrəwan aytedan aggotnen təsureft ən bakkadan-nasan. ²⁹ Əsilakanax-awan as a obazan xur əmərədda wər z'ələsa tessay n esmad n alçanab wa, iket wər d-ewad əzəl wa daç z'aşwa wa aynayan nak dər-wan daç Təçmar ta n Abba-nin.» ³⁰ Təzzar əssəggadan daç təmmalen a d-əgmadnen Azzabur, as tanat-əçradan, əkkan adçay wa n Eşkan ən Zaytun.

Emel ən Ƴaysa ətəwəyya-net d ətəwənkər-net

³¹ Əhân tarrayt den da as dasan-inna Ƴaysa: «Ahad ada, ketnawan as dawan-z-əqqələç əssəbab n ad iwəliwəl əzəgzan-nawan, fəlas ənnan Əlkəttaban: "Ad əwətaç amadan, iba-tu, təzzar wəziwəznat ayfad-net."» ³² Mişan dəffər ətəwəsənkər-in daç təmattant, a dawan-in-izarayç s akal wa n Galilaya, əqqələç-awan daç-as.» ³³ İşşewal Butros, inn-as: «Kud iwəlawal əzəgzan-nasan ketnasan daç batu-nak, da wa-nin wər ilkem ad iwəlawal.» ³⁴ Inn-as Ƴaysa: «Əggəyyey silakanax-ak as ahad ada, as z'açru əkəji açora, təggâdaç-i har karadat təklaten.» ³⁵ Inn-as Butros: «Kud iqqal

as ətəwənxə kərəz a za nagu nak dər-ək, da wər kay-z-əggəda.» Ənnan nəttulab ketnasan awen da.

Təwatray ən Ƴaysa daƷ Gatsemanay

³⁶ Ewad dər-san Ƴaysa afarag n eřkan ən zaytun as itawannu Gatsemanay, inn-
asan: «Qamiwat əddi da, ad akkay edag en, ad aga řiwatriwen.» ³⁷ Izzənkaz fall-
asan Ƴaysa, iddew əd Butros, d əřřin meddan ən maddanəs ən Zabaday, təzzar əssəntan
man-net ayřud, iřřəwař. ³⁸ Den daƷ a dasan-inna: «Awa əgan man-in daƷ ayřud,
əbukay a di-aba. Ad wər təfəlam da, ad nakəy nak dər-wan.» ³⁹ Təzzar iga fall-
asan arat n əzənkəz, issəjad, ittar, inna: «Abba-nin, kud immikkan adi təssəgəgəƷ-i
təkabart ta n aƷazab di! Dər iga awen da ya, wərgəƷ awa areƷ nak a itaggin, kalar
awa tareƷ kay a z'əgin.» ⁴⁰ Dəffər awen iqqal-du Ƴaysa inəttulab-net win karad en,
os-en-du ənsān. Inna i Butros: «DaƷ adi indar-awan ad tagim alwaq iyyanda tokāyam
nak dər-wan! ⁴¹ Akəyat, tansəyam Məřřina a kawan-oggazan daƷ jarrabatan n İblis.
Tidət as ənnəyat n aggadəm təsidadan igi n awa olaƷan, miřan igdal-as rəkkəm ən
təƷəssa-net awen.» ⁴² İlas əzənkəz fall-asan, ad itaggu řiwatriwen, inna: «Ya Abba-
nin, kud wər t-illa əmmək as di-təƷlay təkabart ta n aƷazab di, kud ilzām-i a tat-
ařwa, wədi tagiwet tara-nak!» ⁴³ İlas iqqal-in inəttulab-net win karad, ogaz-tan-in
əqqālan etəs, fəlas awa dasan-iga etəs daƷ iguz ab-as əfragan arra ən řittawen-
nasan. ⁴⁴ İlas ifal-tan, ikka den, iga təwatray-net ta n karadat, a daƷ inna arat wa
inna dat awen. ⁴⁵ Dəffər awen iqqal-du inəttulab-net, inn-asan: «Kawanay harwa
da tənsām, təsanfim! Ənəyat! Alwaq ihoz-du wa daƷ za təwəgga daƷ fassan ən
nasbakkadan nak Ag Aggadəm. ⁴⁶ Ənkərat-in əndawat! Ənəyat! Wa di-z-əgin daƷ
fassan, ewad-du.»

Ətərməs ən Ƴaysa

⁴⁷ İřřəwal harwa da, as d-ewad Yahuza, imosan iyyan daƷ nəttulab-net win maraw
d əřřin, iddew əd təmmattay tagget a d-əssiglan muzaran ən limaman əd muzaran
ən Kəl-Əlyəhud. Tamattay ten tewāy řikabiwen əd təburəgen. ⁴⁸ Wa tu-z-əgin daƷ
fassan, imāl-asan aƷalamat tas z'itəwəssən, inn-asan: «Wa zalamme daƷ meddan
en, əssənət as ənta, tabəzam-tu.» ⁴⁹ Osa-du Yahuza Ʒas, ihoz-in Ƴaysa, inn-as:
«Ma təxlakay Əřřex?» Təzzar izalammat-tu. ⁵⁰ Inn-as Ƴaysa: «Əmidi-nin, arat
wa kay d-ewayan, ag-ay.» Təzzar ewadan-du, obazan Ƴaysa. ⁵¹ Amazay wen da
a daƷ d-ilbay iyyan daƷ nəttulab ən Ƴaysa takoba-net, iwat sər-əs akli n Əlimam
wa Zəwwəran, ifras-du təməzzuk-net. ⁵² Təzzar inn-as Ƴaysa: «SuƷəl takoba-nak
tətərut, fəlas aytedan kul win řaqqalnen əs takoba, takoba as z'ammatin. ⁵³ Wər
tordeƷ as əfrāgəƷ ad əgməya tilalt daƷ abba-nin assagl-i-du əmərədda a ogaran
maraw gənan n angalosan d əřřin? ⁵⁴ Miřan as iga adi, mas z'andu awa ənnan
Əlkəttaban, a əmalnen as awa kul ilzām ad andu ř əmmək wa da?» ⁵⁵ Təzzar
inna Ƴaysa i tamattay: «Mafel tosam-i-du tewāyam řikabiwen, əd təburəgen y a
di-tabəzam, zun as təgmāyam əjajəb iyyan n abaydag? Nak wərgəƷ əzəl kul niƷama
dər-wan daƷ Ahan wa Zəwwəran n ƏƷibada, sasayra daƷ-as, amaran wər di-tobezam.
⁵⁶ Miřan əssənət as awa igan da ketnet iga fəl ad andu awa ənnan Əlkəttaban.» Den
daƷ a t-əfalan nəttulab-net ketnasan, əddəggagan.

Təbadday ən Ƴaysa dat Asaggawar wa Zəwwəran

⁵⁷ Aytedan win obaznen Ƴaysa, ewayan-tu əs Kayif s ənta a imosan Əlimam wa
Zəwwəran. Ənta a Ʒur əmmənanayan musanan n Əttawret, əd muzaran ən Kəl-
Əlyəhud. ⁵⁸ Iga Butros i Ƴaysa ləkkum zagren, har ewad ayalla n ayaywan n
Əlimam wa Zəwwəran, iggaz-tu, inayama əd mařřayalan, iswad y ad inəy awa z'əgin.
⁵⁹ Ənkəran muzaran ən limaman, d Asaggawar wa Zəwwəran ketnet, ad gammayan

awedan iqqalan tægəyya ən bahu fəl ʔaysa, fəl ad əgrəwan tarrayt n igi ən man-net. ⁶⁰ Mišan šigəyyawen aggotnen ən bahu šin fall-as taggin da, ab-asan-du daḡ-asnat əddəlil issohen a fəl itawənḡa. Xasil osanat-du tægəyyawen šiyyad sanatat, ⁶¹ ənnanət: «Awedan wa a inna: "İfrâgəḡ əjəbbərəjji n Ahan wa Zəwwəran n Əlyibada ən Məššina, ələsaq-qu akaras daḡ karad adan."» ⁶² Təzzar ibdad Əlimam wa Zəwwəran, inna i ʔaysa: «Kay wər təganna wala daḡ təḡəttas šin dak-tawagginen da?» ⁶³ Mišan igla ʔaysa iffista. İlas Əlimam wa Zəwwəran inn-as: «Əgmâya daḡ-ak dat Məššina di İddaran, a danəḡ-təməla kud kay a imosan Əlməsix, Barar ən Məššina wala.» ⁶⁴ Inn-as ʔaysa: «Awalla kay iman-nak a innan adi. Amaran əmələḡ-awan as, a obazan ḡur əmərədda, a di-tənəyam nak Ag Aggadəm, əqqima daḡ əḡil n Əməli ən Tarna, tənəyam-i deḡ əzaya-du, əwâra šigaraken a n jənnawan.» ⁶⁵ Təzzar izazzarrat Əlimam wa Zəwwəran takatkat-net fəl awa əgan man-net daḡ aḡşud, inna: «Aləs wa amadraw a iga i Məššina. Awak ma nəkka i tægəyyawen šiyyad? Wər təsəllim y əmadraw wa iga da? ⁶⁶ Ma tənnam?» Ənnan-as ketnasan: «Aləs wa, əšşəriḡa-net təmattant.» ⁶⁷ Təzzar ad sutufan fəl udəm-net, əggâtan-tu, taqqasan-as, ⁶⁸ gannin-as: «Əlməsix, dad zamas kay ənnəbi, əməl-ana wa kay-iggatan!»

Şigget ən Butros ʔaysa

⁶⁹ As itaggu awen, Butros iqqim dat ahan, daḡ aḡalla n aḡaywan wen. Təhozt-in təməşşəḡalt iyyat n aḡaywan en da, tənn-as: «Kay da, tətidaḡəḡ əd ʔaysa wa n akal ən Galilaya.» ⁷⁰ Mišan iggad Butros awen dat aytedan kul, inna: «Wər əssenəḡ almaḡna ən batu-nam.» ⁷¹ Təzzar idag Butros sa sər əmi n aḡaywan, tənəy-tu təməşşəḡalt iyyat, tənna y aytedan win əllanen den: «Aləs wen, itidaw əd ʔaysa wa n aḡrəm ən Nazaret.» ⁷² İlas iggad-tu ihad inna: «Wər əzdayəḡ aləs wen.» ⁷³ As iga arət n amazay dəffər awen, əhozan-du meddan wiyyad əbdâdnən den, ənnan i Butros: «İllikan as kay da iyyan daḡ aytedan win daḡ den a təmosa, fəlas awal-nak da immûn.» ⁷⁴ Təzzar ad ihad Butros igannu: «Məššina ya təlyânəḡ-i kud bahu a əgeḡ as wər əzdayəḡ aləs wen.» Amazay wen daḡ ad iḡra əkəji aḡora. ⁷⁵ İkta-du Butros tənna ta das-iga ʔaysa: «Dat taḡaray n əkəji aḡora, a di-tunkara har karadat taklaten.» Təzzar igmad sədi, ad ihallu fəl awa iga daḡ təməgraz.

27

İsuki wa iga Asaggawar wa Zəwwəran ʔaysa Bilatəs

¹ As affaw aḡôra, immənəy asaggawar ən muzaran ən limaman, əd muzaran ən Kəl-Əlyəhud ketnasan, ad taggin šinaden daḡ batu ən ʔaysa y a das-tətəwəxkəm təmattant. ² Əkradan-tu, ewayan-tu s ənaxkim Bilatəs.

İba ən Yahuza

³ Yahuza wa igan ʔaysa daḡ fassan, as inay as ʔaysa itawaxkam-as attadib ən təmattant, udanat daḡ-as təməgraz, eway-du karadat təmərwən ən tafelt n əzrəf šin igraw y tanat-issuḡal i muzaran ən limaman, əd muzaran ən Kəl-Əlyəhud. ⁴ Inn-asan: «Nak əgeḡ abakkad. Awedan wər nəḡşed wala, a əge daḡ fassan, y ad itəwənḡu!» Mišan ənnan-as: «Nakkanay wər nəzlay daḡ tədi! Batu tədi kay a təqqal!» ⁵ İgar Yahuza azrəf wen daḡ Ahan wa Zəwwəran n Əlyibada, igla, išşolay iman-net aşək. ⁶ Əkkəmən-du muzaran ən limaman azrəf wen, ənnan: «İşşəriḡa-nana issixərəm fall-ana igi n əzrəf wa daḡ əssənduq wa iha ərrəzəḡ n Ahan wa Zəwwəran n Əlyibada, fəlas azrəf wa azni a d-igmad.» ⁷ Əgan šinaden, əzzənzən daḡ əzrəf wen tawagost as itawannu: «Tawagost n akanaw», y a tat-agin edag ən zəkwan n aytedan win wər ilə akal. ⁸ Awen daḡ a fəlas tawagost ten, har azalada itawann-as: «Tawagost ta n əzni.» ⁹ Əmmək en daḡ as inda awal wa iga ənnəbi İrməya, as inna: «İdkalan-du karadat

təmərwen ən tafelt, əmosnen əlqimat tas t-ədkadan maddanəs n Israyil. ¹⁰ *Əzzənzən sər-əsnat tawagost ta n akanaw, s əmmək was di-omar Əməli.»*

Tebadday ən Ƴaysa dat Bilatəs

¹¹ Itawasabdad Ƴaysa dat ənaxkim Bilatəs. Issəstan-tu ənaxkim, inn-as: «Awak kay daƳ a imosan əmənokal ən Kəl-Əlyəhud?» Inn-as Ƴaysa: «Kay iman-nak as tənneƳ adi.» ¹² Mišan wər inna Ƴaysa wala daƳ batu ən lahanan win t-əssəwaran muzaran ən limaman əd muzaran ən Kəl-Əlyəhud. ¹³ Təzzar inn-as Bilatəs: «Wər təsəlla i lahanan aggotnen win kay-əssəwaran aytedan win?» ¹⁴ Mišan wər das-inna Ƴaysa wala təfert iyyadda daƳ batuten šin. Arat wen isammaklal wəllen s ənaxkim.

¹⁵ Imos alƳadat n ənaxkim as id d-iƳlay əmud wa n Akkay ad ikkəs amaskasaw was tara tamattay agamad. ¹⁶ Azzaman en, ill-ay amaskasaw a fəl təga masnat, igân esəm Ƴaysa Baryabbas. ¹⁷ Təzzar inna Bilatəs y aytedan win əddewnen den: «Ma imos daƳ meddan win was taram a dawan-t-əkkəsə? Awak Baryabbas, me Ƴaysa was itawannu Əlməsix?» ¹⁸ Bilatəs issân as aššaddat ən manzaƳ a fəl əgan muzaran ən limaman Ƴaysa daƳ fassan. ¹⁹ Amazay wa daƳ iqqim Bilatəs daƳ adag wa n əššəriƳa den, ənta as sər-əs du-təzammazal taƳurəs tənn-as: «Aləs di oƳâd, ad wər təggəza batu-net, fəlas əndod, ənâya daƳ targət alƳazab aggen fəl əddəlil-net.»

²⁰ Ənkaran muzaran ən limaman, əd muzaran ən Kəl-Əlyəhud, əssərđan tamattay s ad təgməy ad itəwəkkəs Baryabbas, təwəkkəsən man daƳ Ƴaysa. ²¹ İššewal ənaxkim, inn-asan: «Ma imos daƳ əššin meddan win di was taram ad t-əkkəsə?» Ənnan-as: «Baryabbas.» ²² Inn-asan Bilatəs: «Ma z'aga za i Ƴaysa, was itawannu Əlməsix?» Ənnan-as ketnasan: «Itəwətəytəyet fəl tətəttawt!» ²³ Mišan ya inn-asan ənaxkim: «Mafel za? Ma iƳšad?» İqqal-asan awen as sahhaken imaslan-nasan wəllen, ənnan: «Itəwətəytəyet!» ²⁴ Inay Bilatəs as wər d-ixəssəl wala daƳ awen, amaran tənajarwayat tətittəy, idkal-du aman, iššorad sər-san ifassan-net dat tamattay, inna: «Nak ərruda daƳ əzni n aləs di. Batu tədi kawanay a tətqqal!» ²⁵ Təjajjayat tamattay kul tənna: «İwəret-ana alxaq n əzni-net nakkanay əd bararan-nana!» ²⁶ Təzzar ikkas-asan-du Bilatəs Baryabbas, Ƴaysa amaran isassag-as tenaƳay labasat s ələkkud, ikf-ay i sojitan y ad t-attaytayan.

Təmakkakkayt ən sojitan daƳ Ƴaysa

²⁷ Təzzar ewayan sojitan n ənaxkim Bilatəs Ƴaysa, əkkan dər-əs ammas n aƳarƳar n aƳalla n ahan wa n əššəriƳa. Əššədawan-du sojitan kul win əllanen den, əƳalayƳalayan-tu. ²⁸ Əkkasan daƳ-as tabdoq-net, əssəlsan-tu əbərnuz igan təzuƳay təsimaƳmayat zun wa lasan mənokalan, imos awen təhələlet daƳ-as. ²⁹ Əzdän təkəbbut zun ta n mənokalan təgat daƳ šənnanan, əssəwaran-tat y aƳaf-net, əgan agabal ən telant daƳ əfus-net wa n əƳil. Təzzar a dat-əs tigərəffen, taggan daƳ-as təmakkakkayt, gannin-as: «Oyy-ik, əmənokal ən Kəl-Əlyəhud!» ³⁰ A fall-as sutufan, tabazan-du agabal ən telant wen, əggatan sər-əs eƳaf-net. ³¹ Dəffər as daƳ-as əyyəwanan igi ən təmakkakkayt, əkkasan daƳ-as əbərnuz wa t-əssəlsan den, əssoƳalan-tu isəlsa-net, ewayan-tu y ad itəwətəytəy.

İtəwətəytay ən Ƴaysa əd təmakkakkayt ta daƳ-as tətawaggat

³² Əhân tarrayt as əmmənəyan əd SimƳon, imosan aləs n aƳrəm ən Qərwan, šahhaššalan-tu agƳay ən tətəttawt ta fəl z'itəwətəytəy Ƴaysa. ³³ Ewadan edag as itawannu Golgota, almaƳna n awen «Edag wa n Təkəyya». ³⁴ Əkfan-t-in esmad n alƳanab irtāyan d eƳay. İram-tan Ƴaysa, uƳay əs tassay-nasan. ³⁵ Dəffər as t-əttəytayan fəl tətəttawt, ad tuzanan šibədday-net əs təsəƳeren.

³⁶ Təzzar əqqiman ewalan-tu. ³⁷ Əššəlayən dənnəg aƳaf-net əsəllum, a fəl iktâb as: «Awa Ƴaysa WA N Əmənokal ən Kəl-Əlyəhud», imos awen arat isidaganan əddəlil

wa fəl immut. ³⁸ Tawataytayan dagma-net əššin meddan ən jujab ən baydagan. Iha iyyan aḡil-net, wa hadan zalgat-net. ³⁹ A daḡ-as tajaban aytedan win tallamen den, taggin-as arak batuten, ⁴⁰ gannin: «Dew! Kay wərgex tənney təfragay əjəbbərəjji n Ahan wa Zəwwəran n Əlyibada, təlasaq-qu akaras daḡ karad adan? Kud kay Barar ən Məššina tassafsay iman-nak, tazzabbe-du təgəttawt di!» ⁴¹ Emmək en da as daḡ-as taggan muzaran ən limaman, əd musanan n Əttawret əd muzaran ən Kəl-Əlyəhud tamakkakkayt əntanay da, gannin: ⁴² «Aləs wa isafsin aytedan, wər ifreg əsəfsi ən man-net! Kud ənta a imosan əmənokal n Israyil, azzabbatet-du təgəttawt ten! Əddi a sər-əs nəzzəgzən. ⁴³ Iga attama-net daḡ Məššina. Agəzet-tu Məššina əmərədda, kud ir-ay. Fəlas a inna: "Nak Barar ən Məššina a mosa."» ⁴⁴ Ijujab ən baydagan win dagman-əs əttəytaynen, da əhân šin-net s əmmək en da.

Iba ən Ƴaysa

⁴⁵ Əlsanat šiyyay akal ketnet, a obazan Ƴur ammasnazal, har dəffər tazzar. ⁴⁶ Ƴur attayan ən tazzar, idkal Ƴaysa əməli-net wəllen, inna: «Eli, Eli, lama sabaxtani?» Almaḡna n awen: "Əməli-nin, Əməli-nin, mafel toyvey-i əd man-in?" ⁴⁷ Əslan-as arat daḡ aytedan win əbdadnen den, ənnan: «Awen ənnəbi Ilyas a iḡarru.» ⁴⁸ Tarmad as ozal iyyan daḡ-san, idkal-du təduft, issəlməq-qat daḡ esmad n alḡanab ikkizbaran wəllen, ittal-tat d əmi n alawag ən telant, izzal-t-in i Ƴaysa y ad ašəw. ⁴⁹ Mišan ənkaran win hadatnen ad gannin: Ayy-ay, ad nəssən a d-asu Ilyas assafs-ay. ⁵⁰ Amazay wen da, a daḡ ilas Ƴaysa ikus n əməli issohen, əgmadan-tu man. ⁵¹ Assayət ten da a daḡ izzərrat əfər wa zəwwəran imosan anaxer gər adag wa zəddigan əd wa ogaran tazdak daḡ Ahan wa Zəwwəran n Əlyibada, issərrat-du anaxer wen Ƴur afalla har eres. Inagaynagay amaḡal, ad tasarratnat təsələten. ⁵² Ənnolaman zəkwan, ənkaran-du nəməttan aggotnen əmosnen inaxəbidan ən Məššina, ⁵³ əgmadan-du izəkwan. Dəffər tanakra ən Ƴaysa, əggazan aḡrəm wa zəddigan ən Kəl-Əlyəhud a t-imosan Yerusalām. Inəmməttan win den nifalalan y aytedan aggotnen. ⁵⁴ As inay kabtan əd sojitan win ogazen Ƴaysa ənəgəynəgəy wa iga amaḡal, d aratan win əganen den, təggaz-tan tasa zəwwərat, ənnan: «Illikan as Barar ən Məššina awen!» ⁵⁵ Əllanat tədoden aggotnen den, əbdadnen sədi, əswādnat. Šidoden šin den harwa daḡ akal ən Galilaya ad əddəwnat əd Ƴaysa əssānnat daḡ-as. ⁵⁶ Təh-enat Maryama Madəl, əd Maryama ta n anna ən Yaquub əd Yusəf, d anna ən maddanəs ən Zabaday.

Ətəwəgga ən Ƴaysa daḡ əzəkka

⁵⁷ Ill-ay aləs n əməgğergəs igân esəm Yusəf, n aḡrəm n Arimatay, imosan iyyan daḡ məzzəgzan əs Ƴaysa. Osa-du Ƴur agadal ən təfuk, ⁵⁸ ikka Bilatəs, igmay daḡ-as taḡəssa ən Ƴaysa. Təzzar omar Bilatəs s ad itəwəyyu Yusəf awəy taḡəssa ən Ƴaysa. ⁵⁹ Idkal Yusəf taḡəssa ten, ig-et daḡ šifit təhossayat. ⁶⁰ Eway-tat, issəns-et daḡ əzəkka aynayan imosan akazam isisaga i man-net. Təzzar isaxḡararad-du təhənt zəwwərat, ihar sər-əs imi n əzəkka, igla. ⁶¹ Təlla Maryama Madəl den, əd Maryama ta hadat, əqqimnat daḡ tənəmiwəla n əzəkka wen.

Ətəwigaz n əzəkka

⁶² As iga əzəl wa dəffər awen, imosan əzəl wa dəffər əsəmmutəg n əzəl wa n təsanfawt ən Kəl-Əlyəhud, əglaḡ muzaran ən limaman, əd Farisaytan, əkkan Bilatəs, ⁶³ ənnan-as: «Ya əmuzar, nəkittəw as anasbahu en harwa da iddar ad inna y aytedan: "Dəffər karad adan a du-təwəsankara daḡ təməttant." ⁶⁴ Daḡ adi amər s ad itəwigəz əzəkka wen har əzəl wa n karad, fəl a du-wər-asin nalkiman-net akəran taḡəssa-net, ad gannin y aytedan: "Itawasankar-du daḡ təməttant." Bahu wa, as iga, ad aḡər wa azzaran.» ⁶⁵ Inn-asan Bilatəs: «Ənta əddi da! Idawat əd təsəgərt ən sojitan,

təzəzzigəzam-tan əzəkka əs tēməwit tas tēram.» ⁶⁶ Təzzar əkkan əzəkka, əxfalan-tu əxradan əzəzzəwi wəllen i tēhunt ta tu-təharat, zazzagazan-tu i sojitan wen den.

28

Tanakra ən Yaysa day tēmattant

Ezəkka wər tu-təha təyəssa ən Yaysa

¹ Dəffər as okay əzəl wa n tēsanfawt ən Kəl-Əlyəhud, affaw ağora n alxad, təgla Maryama Madəl, əd Maryama ta hadat, y a d-ənəynat əzəkka. ² Ihin-in amaḍal iga ənəgəynəgəy issohen fəlas iyyan day angalosan n Əməli a d-izzabbe day jənnawan, ihoz-in əzəkka, isaxğararad tēhunt zəwwərat ta tu-təharat, iqqim fall-as. ³ İla azzahir a n essam, təga tabdoq-net tēməllay təsiraqqet. ⁴ Təga taysəst day sojitan win ogaznen əzəkka, fəl awa dasan-təga tasa day iguz, zun tan-əgmâdan man. ⁵ İşşewal angalos, inna i tədoden şin din-osanen əzəkka wen: «Kamatay a kamat-wər-təggəz tasa, fəlas əssanax as Yaysa as tēsaggadmat wa itawataytayan fəl təgəttawt. ⁶ Wər illa da, fəlas itawasankar-du day tēmattant s əmmək was imal awen. Aglimat-du ad tənəymat edag was kala a day-as tənsa təyəssa-net, ⁷ taglimat tarmad tēməlmət i nəttulab-net as itawasankar-du day tēmattant. Azzar-asan-in əs Galilaya. Den da a tu-za-tənəyam. Adi da as are a dakmat-t-anna.»

Əmənəy ən tədoden əd Yaysa dəffər tanakra-net

⁸ Əfalnat əzəkka tarmad, təh-enat tasa, mişan ya əfilawasnat wəllen, ozalnat əganat isalan i nəttulab-net. ⁹ Əglānat den da, as əmmənəynat əd Yaysa, inn-asnat: «Ma təxlakmat.» Əhoznat-t-in, gabarratnat idaran-net, əssəjadnat-as. ¹⁰ Təzzar inn-asnat Yaysa: «A kamat-wər-təggəz tasa! Aglimat tannimat i mədrayan-in, ad akkin Galilaya. Den day a di-z-ənəyan.»

Arat was ənnan sojitan ənāyan-tu əd tanat ta əgan muzaran ən Kəl-Əlyəhud

¹¹ Harwada əhānat tarrayt, as d-ewadan arat day sojitan win ogaznen əzəkka ağrəm, əssoğalan i muzaran ən limaman awa igan ketnet. ¹² Təzzar əmmənəyan muzaran ən limaman, əd muzaran ən Kəl-Əlyəhud, əgan şinaden, əkfan sojitan win azrəf aggen. ¹³ Ənnan-asan: «Anniwat: "İnəttulab-net a d-osanen ehad, nənsa, okaran təyəssa-net." ¹⁴ As isla ənaxkim Bilatəs arat wa, a tu-nəsassagru awa imos, taqqamim da wər kawan-igrew wala.» ¹⁵ Ədkalan sojitan azrəf, əmmožalan s arat wa dasan-itawannan den. Əlqissat ta tawazawaz day Kəl-Əlyəhud, amaran har azalada suşulan-tat.

Əlməsix əd nəttulab-net dəffər tanakra-net day tēmattant

Ənəməğraw ən Yaysa əd nəttulab-net win maraw d iyyan day Galilaya

¹⁶ Əglan nəttulab win maraw d iyyan, əkkan Galilaya, əggəzzayan adğax wa dər tan-isannamawal Yaysa. ¹⁷ As ənəyan Yaysa, əssəjadan-as. Mişan wiyyad day-san əgan day-as aşşak.

Awa issəwar Yaysa inəttulab-net

¹⁸ Təzzar ihoz-tan-in Yaysa, işşewal-asan, inna: «Tiwakfa tağmar kul day jənnawan, tiwakfaq-qat dəx fəl amaḍal: ¹⁹ Day adi agliwat, takkim şimattiwen kul n əddənet tagim-tanat inalkiman-in. Salməyat-tan day aman s esəm n Abba, əd Barar, d İnfas wa Zəddigan. ²⁰ Sassayriwat-tan ləkkum y aratan kul win as kawan-omara. Nak amaran əssənət as əlle şur-wan faw, har əxrud n əddənet.»

Elinjil wa n Markus Esemmutæg y əşşəxəl ən Ƴaysa

Isalan win iga ənnəbi Ƴaxya

¹ Ēnta da tēsəntit n Elinjil ən Ƴaysa Ēlməsix, Barar ən Məşšina. ² Ēnta en da a fəl inna ənnəbi Isayas daƷ əlkəttab-net: «*Ēnəy za a dat-ək assaglay anammazul-in a z'aknin tarrayt-nak.* ³ *Idkâl əməsli-net daƷ əsuf igannu: "Səmmutəgat abaraqqa y Ēməli! TəsəssiƷədam tarrayen dat-əs!"*»

⁴ Adi da a fəl d-osa Ƴaxya, iggaz əsuf ad itaggu y aytedan təlxtubat, igann-asan ad təwəsəlməƷan daƷ aman imos awen arat issiknan tətubt-nasan, fəl ad əgrəwan təsufəft ən bakkadan-nasan. ⁵ A t-in-tasin aytedan aggotnen a din-gammadnen akal ketnet wa n Ƴahudəyya d aytedan kul n əƷrəm wa n Yerusalām. Ētutaban daƷ bakkadan-nasan dat tamattay, isalmaƷ-qan daƷ aman daƷ agarew was itawannu Ƴordan.

⁶ As itaggu awen izlâg Ƴaxya asalsaw igân s anzadan n əmnəs, otâb s əsatəb n agaşek. Iddâr s əjwalan əd turawat. ⁷ Itaggu təlxtubat, igannu i tamattay:

"A dəffər-i d-asu ələs
s awa di-iga daƷ şigrat,
wər eweda wala enez
y ad ara i suƷan ən Ʒateman-net.

⁸ Nak, aman a daƷ-qawan salmaƷa,
mişan ənta Infas Wa Zəddigan
a daƷ-qawan z'issəlməƷ."

ĒtəwəsəlməƷ ən Ƴaysa daƷ aman d ətəwəjərrab-net

⁹ Adan en da a daƷ d-osa Ƴaysa, igmâd-du Nazaret təmosat taƷrəmt tēhât akal ən Galilaya. Ikka edag wa daƷ isalmaƷ Ƴaxya aytedan daƷ agarew wa n Ƴordan, issəlməƷ-qu Ƴaxya. ¹⁰ Igmâd-du Ƴaysa aman Ʒas ogga ijənnawan as ənnolaman, izzəbbat-du fall-as Infas wa Zəddigan, iha şaşşelan ən tədabert. ¹¹ Igmâd-du əməsli ijənnawan, inna: «*Kay a imosan Barar-in əkneƷ tara, təssinda-du agna-nin.*»

¹² Tamazayt tenda a daƷ issoka Infas wa Zəddigan Ƴaysa taneray. ¹³ Iga daƷ-as əkkozat təmərwen n əzəl, itajarrab-tu Iblis. Itinəmərzig əd wəxsan, əssânan daƷ-as angalosan.

Eşşəxəl ən Ƴaysa daƷ akal ən Galilaya əd ƷələyƷəlayan-net

Iguz ən Ƴaysa akal ən Galilaya

¹⁴ Dəffər ətərməs ən Ƴaxya wa isalmaƷan aytedan daƷ aman, ad ikka Ƴaysa akal ən Galilaya, a daƷ-as immal əmazal wa d-ifalan Məşšina. ¹⁵ Igannu i tamattay: "Təmastant tēnda, TaƷmar ta n Məşšina tēhōz. Utabat, təzzəgzənam s Elinjil."

Inəttulab win azzarnen ən Ƴaysa

¹⁶ Ēzəl iyyan illil Ƴaysa tagadamayt n agaraw wa n Galilaya as ogga SimƷon d amadrəy-net Andrawəs, fattawan daƷ agaraw sangaytan-nasan win as tabazan kifitan, fəlas inabazan ən kifitan a əmosan. ¹⁷ Inn-asan Ƴaysa: "Ēlkəmat-i, a kawan-aga meddan sər-i du-za-tawaynen aytedan y a tan-assafsa daƷ bakkadan-nasan." ¹⁸ Oyyan sangaytan-nasan daƷ tamazayt ten da, əlkaman-as. ¹⁹ Iga Ƴaysa y adag en arat n akkay, inay Ƴaqub d amadrəy-net Ƴaxya win maddanəs ən Zabaday, əntanay

da əhân aɣlal n aman; kannin sangaytan-nasan win as tabazan kifitan. ²⁰ Iɣr-enu daɣ amazay wen da. Oyyan abba-nasan Zabaday əd maşşaxalan-net daɣ əɣlal, əlkaman i Ƴaysa.

Əsəssəɣri ən Ƴaysa daɣ Kafarnahum

²¹ Ikka Ƴaysa əd nəttulab-net taɣrəmt təgât Kafarnahum. Ewad-du əzəl wa n təsanfawt ɣas, iggaz Ƴaysa ehan n əlɣibada ən Kəl-Əlyəhud, a daɣ-as isasaɣru. ²² Isammaklāl əs tamattay əmmək was itaggu əsəssəɣri-net, fəlas ig-asan əsəssəɣri n awedan ilân tanaya wər əlen musanan n Əttawret. ²³ Wala a ihogan idkal aləs iyyan iha aggəsuf əməsli-net daɣ ahan n əlɣibada ad igannu: ²⁴ "Ma daɣ-na tareɣ, Ƴaysa wa n Nazaret? Əngəm assa a du-təgeɣ y a danaɣ-təhləka? Əssânaɣ awa təmosa: Kay a imosan Əmizdag wa d-izammazal Məşşina". ²⁵ Iharaşşat-tu Ƴaysa, inn-as: "Fastu, təgmədaɣ aləs di!" ²⁶ Təzzar izazzakarkar aggəsuf aləs en, izyak, igmad-tu. ²⁷ Əhagan aytedan ketnasan ad tinəmənnin gər-essan: "Ma imos awa? Ma təmos masnat ta wər nəzday a, təddewat əd tanaya! Awedan wa, wala kələsuf əttâfan tənna-net". ²⁸ Tarmad as təwazawaz sallat ən Ƴaysa daɣ Galilaya ketnet.

Əzuzəy ən Ƴaysa aytedan aggotnen

²⁹ Igmad-du Ƴaysa ehan n əlɣibada ən Kəl-Əlyəhud ɣas, ikka ehan ən Simɣon d Andrawəs iddew əd Yaquub əd Yaxya. ³⁰ As itaggu awen tədaggalt ən Simɣon təzizalallat-tat tanaday. Os-in Ƴaysa ɣas təttemal-as. ³¹ Təzzar os-et-in, ibaz əfus-net, issəbdad-tat, təwat fall-as tanaday, a tan-təsiməgurit.

³² As tuda təfuk, a sər-əs du-tamawayan aytedan kul win ərinnen əd win əhan kələsuf. ³³ Iddew-du əɣrəm ketnet dat əmi n ahan wen. ³⁴ Izzozay Ƴaysa aytedan aggotnen əgrawnat təwərnawen wər nola, ikkas deɣ daɣ wiyyad kələsuf aggotnen. Amaran igaddal i kələsuf en emel n awa imos, id masnat a əgan as ənta a imosan Əlməsix.

Emel ən Ƴaysa Əlinjil daɣ Galilaya

³⁵ Əzəl wa hadan, inkar-du Ƴaysa datazal, igmad, ikka edag issufan ad itattar. ³⁶ Dəffər awen, igla Simɣon d aytedan win ɣur-əs əllanen, a das-saggadan. ³⁷ As t-in-osan, ənnan-as: «Aytedan kul saggadan-ak.» ³⁸ Təzzar inn-asan Ƴaysa: "Akkiwat-ana şixarmaten şin dana-ɣalayɣalaynen, a daɣ-asnat aga təlxutbat əntanatay da, fəlas adi da a fəl d-əmmoza." ³⁹ Illil Ƴaysa akal ən Galilaya ketnet, itaggu təlxutbat daɣ nan n əlɣibada ən Kəl-Əlyəhud, itakkas deɣ kələsuf daɣ aytedan.

Əzuzəy ən Ƴaysa aləs igrâw kətru

⁴⁰ Osa-du awedan iyyan təgraw təwərna ən kətru, igaraffat dat Ƴaysa, onsaytu, inn-as: «As tareɣ adi, təfrâgaɣ a di-təzzuzəyaɣ, izdaga.» ⁴¹ Ihanattat-as Ƴaysa. Izzal-in əfus-net, idas-tu, inn-as: "Areɣ adi, əzzəy tizdaga." ⁴² Izzay awedan wen daɣ tamazayt ten da, zəddig. ⁴³⁻⁴⁴ Issəllam-tu alwaq wen da, dəffər as das-irɣâm wəllen inn-as: «Ənəy za, ad wər təməla y awedan waliyyan arat wa igan da, amaran aglu tassaknaɣ iman-nak y əlimam, taga takutay ən tazdak ta kay-issəwar əşşərixa n ənnəbi Musa, ad iqqəl adi y aytedan təgəyya ən təməzzəyt-nak.» ⁴⁵ Mişan igla aləs en ɣas, iggaz şin əzəwwəziwəz ən salan n awa igan, har ab'as ifrag Ƴaysa iguz n əɣrəm hannayan-tu aytedan. Awen daɣ a fəl iggaz əsuf a daɣ-as t-in-tasin aytedan, a sər-əs du-gammadnen şisədag kul.

2

Əməstan ən Ƴaysa əd musanan n Əttawret

Əməstan daɣ batu ən təsureft ən bakkadan

¹ Adan dæffer awen, iqqal ʒaysa aɣrəm ən Kafarnahum. ʒslan aytedan as iha ehan wa daɣ isaggan ɣas, ² əkkan-t-idu s igət, har as ab'as t-iha adag, wala ɣas dat əmi n ahan. A dasan-itaggu təlɣutbat. ³ Itaggu təlɣutbat da da, as das-d-immeway anabdon misawayan meddan əkkoz. ⁴ Mišan orn-asan a t-in-awədan fəl igət n aytedan. ʒwaran afalla ən taɣazamt, əftayan əsəfəl daɣ tənəmiwəla n adag wa iha ʒaysa. Təzzar əssərasan-du anabdon wa daɣ təxərəbbet ta əgan den, izilallat daɣ təssut-net. ⁵ As inay ʒaysa əzəgzan-nasan, inna y anabdon wen: "Barar-in, ibakkadan-nak tiwasarafan-ak."

⁶ Awen as itag əqqiman arat daɣ musanan n ʒttawret. ʒslan y awa inna ʒaysa da ɣas ad tihənzəmnen daɣ man-nasan gannin: ⁷ «Wa aləs ma t-issəhalan igi n awal wa? Arat wa, əmadraw. Ma ifragan əsurəf ən bakkadan ar Məššina ɣas?» ⁸ Issan ʒaysa daɣ tamazayt tenda awa samadranan, təzzar inn-asan: «Mafəl tətihənzəmmem adi daɣ wallan-nawan? ⁹ Ma ogaran tərɣəsəy gər ad tanna y anabdon: "Tiwasarafan-ak bakkadan-nak", meɣ ak a das-tanna: "ʒbdəd, tədkəla təssut-nak, təjəwenke?" ¹⁰ Amaran, areɣ ad təssənam as nak Ag Aggadəm ələɣ daɣ əddənət tanaya a di-təšišawadat ad əssurəfa y awedan ibakkadan-net.» Təzzar inna ʒaysa y anabdon: ¹¹ «ʒbdəd, tədkəla təssut-nak, takkaɣ aɣaywan-nak.» ¹² Ibdad aləs wen tamazayt ten da, idkal təssut-net. Igməd əswədan daɣ-as aytedan kul, isimaklal sər-san awen, əmmālan Məššina gannan: «Wər kala ad nənay arat šilat ən wa.»

ʒməstan daɣ batu ən tədrəwt əd nasbakkadan

¹³ Igməd ʒaysa aɣrəm, ilas tewaɣlay ən tagadamayt n agaraw wa n Galilaya. A t-in-tasin aytedan s igət, isasaɣr-en. ¹⁴ Ijiwankat as inay aləs iyyan igân esəm Lebi ag Alfay iqqim daɣ adag n əššəɣəl-net imosan əzərzəm n əzrəf ən takəsen, inn-as ʒaysa: "ʒlkəm-i." Ibdad Lebi ilkam-as. ¹⁵ Innəftaɣ ʒaysa i Lebi. Idraw ʒaysa ənta əd nəttulab-net d aytedan aggotnen ən nəzzərzam ən takəsen əd nasbakkadan. Aytedan šilat ən win, əggətan win lakkammen i ʒaysa.

¹⁶ As ənayan musanan n ʒttawret ən taggayt ta n Farisaytan ʒaysa idrâw əd nasbakkadan əd nəzzərzam ən takəsen, ənnan i nəttulab-net: "Mafəl idarraw əlfəqqi-nawan əd nəzzərzam ən takəsen əd nasbakkadan?" ¹⁷ Isl-asan ʒaysa, inn-asan: «Aytedan win wər nəla əɣəli, wər əddəraran s anasmagal, imiranan a sər-əs əddərarnen. Nak wər d-əmmozala s aytedan win ɣur iga as oɣâdan, kalar inasbakkadan as d-əmmozala y a tan-d-aɣra əqqəlan inalkiman-in.»

ʒməstan daɣ batu n əzum

¹⁸ ʒzəl iyyan ad əzuman nəttulab ən Yaxya əd win Farisaytan, osan-du aytedan wiyyad ʒaysa, ənnan-as: «Mafəl tuzaman nəttulab ən Yaxya əd win Farisaytan, amaran win-nak wər tuzaman?» ¹⁹ Inn-asan ʒaysa: «Manəmmək as z'aklin lagatan a ɣur illa əmazlay əs mawan-nasan? Kalar iket illa ɣur-san wər z'aklin əs mawan-nasan. ²⁰ Mišan ilkâm əzəl a ɣur-san z'ammadkal əmazlay, əzəl wədi amaran ad uzaman.

²¹ Wər t-illa i z'iwətan daɣ tabdoq waššarat šikəst taynayət. As iga adi, ad təkəwənzəz šikəst tədi, təššit-tu tabdoq ten azarru wəllen. ²² Wər t-illa deɣ i z'agin esmad n əzzəbib aynayan daɣ gədad. Fəlas as iga adi, ad ukafan abbaqqen, affatu daɣ esmad wədi, igədad deɣ əxšədan. Kalar esmad n əzzəbib wa aynayan ibəyaɣ aynaynen a daɣ itawaggu.»

ʒməstan daɣ batu n əzəl wa n ʒssəbət imosan əzəl ən təsanfawt

²³ ʒzəl iyyan ən təsanfawt ən Kəl-ʒlyəhud, ijiwankat ʒaysa ənta əd nəttulab-net daɣ təwəgas n alkama. Jiwanke n nəttulab-net rassaban-du šixayənən, tattin-tanat. ²⁴ Təzzar sassagran-in Farisaytan ʒaysa awen, ənnan-as: "ʒnak awa taggin nəttulab-nak! Mafəl taggin arat xarâman daɣ əzəl wa n təsanfawt?" ²⁵ Inn-asan: «Ak təɣaray

a wər tægem awa iga ənnəbi Dawəd assaxa wad imaxatar, təzzar iggaz-tu gələk ənta əd midawan-net? ²⁶ Awak wərgex iguz a iga ehan ən Məššina daɣ azzaman win daɣ imos Abiyatar Əlimam wa Zəwwəran, təzzar itša daɣ təgəlwen šin əmosnen takutay təkātət i Məššina, əs limaman ɣas as təxalal tattay-nasnət? Fadda ikfa daɣ-asnət imidawan-net.» ²⁷ Inn-asan deɣ: «Aggadəm wərgex ənta a d-itawaxlakan fəl əddəlil n əssəbət, kalar əssəbət a du-tətawaxlakat fəl tənfa n aggadəm. ²⁸ Daɣ adi nak Ag Aggadəm a ixkaman fəl əzəl wa n təsanfawt.»

3

Əməstan daɣ batu n əzuzəy iga ɣaysa daɣ əzəl ən təsanfawt

¹ Ilas ɣaysa iguz n ahan n əlɣibada ən Kəl-Əlyəhud wa n Kafarnahum. Illa aləs den as immūt əfus-net. ² Təzzar əgaran daɣ-as Fərisaytan šittawen y ad əssənan kud ad izzuzəy awedan daɣ əzəl wa n təsanfawt fəl ad t-əxtəsan s awen. ³ Inna ɣaysa y aləs was immūt əfus-net da: «Ənkər, əbdəd daɣ ammas n əljəməɣat.» ⁴ Amaran inna y əljəməɣat: «Awak daɣ awa inna Əttawret əzəl wa n təsanfawt igi n arət olāɣan a daɣ-as xalalan, meɣ ak igi ən wa wər noleɣ? Awak ereg n awedan daɣ təmattant, meɣ ak šiyyit-net ihlək?» Wər tan-iha i das-innân arət. ⁵ Issəlal-tan ɣaysa asawad-net ih-ay alham, təɣšād taɣart ta əgan wallan-nasan iman-net wəllen. Təzzar inna y aləs wen: «Əzzəl əfus-nak.» Izzal-tu, izzay iqqal əmmək-net. ⁶ Əgmadan Fərisaytan ɣas, əkkan arət daɣ aytedan ən Herod, wa n ən əmənokəl ən Galilaya, a dər-san tinəməšəwwiran fəl təməwit tas z'agin iman ən ɣaysa.

Tosa-du tamattay tagget ɣaysa

⁷ Iddew ɣaysa əd nəttulab-net, ikka təgadamayt n agaraw wa n Galilaya. Təddew dər-əs tamattay tagget, s iyyat akal ən Galilaya a du-təgmad, iyyat akal wa n Yahudəyya, ⁸ iyyat aɣrəm ən Yerusalam, iyyat akal n Adumay əd mədlan win əwarnen aganna wen sen n agarew wa n Yordan, iyyat imədlan win əhoznen aɣrəm ən Tir əd wa n Sidon a du-təgmad. Aytedan win kul, tesalay n aratan win itaggu ɣaysa a tan-du-tewayat. ⁹ Awa təga tamattay daɣ igət, inna ɣaysa i nəttulab-net a das-səmmutəgan aɣlal n aman y a t-iggəz as tu-təsas tamattay. ¹⁰ Fəlas izzozay daɣ-san aytedan aggotnen, eway-du awen as fall-as tanabdaɣan aytedan kul win ərinnen, gammayan d ades-net. ¹¹ Amaran aytedan win əhan kələsuf, əntanay id ənayan ɣaysa a das-əssəjədan, zayyakan gannin: «Kay a imosan Barar ən Məššina,» ¹² mišan iraqam-asan ɣaysa wəllen fəl amel n awa imos.

Əsənnəfrən ən ɣaysa maraw d əššin daɣ nəttulab-net

¹³ Ikka ɣaysa afalla n adɣax iyyan, iɣr-in meddan win əhanen agna-net, osan-tin. ¹⁴ Isannafran daɣ-san maraw d əššin win dər z'itidaw, ig-asan esəm inəmmuzal. Isinafran-tan deɣ y ad əmmālan Isalan n Əlinjil; ¹⁵ ikf-en deɣ tarna n ikus ən kələsuf daɣ aytedan. ¹⁶ Əntanay əddi ismawan ən maraw meddan d əššin win isannafran: Simɣon was iga esəm Butros, ¹⁷ əd Yaquub d amadray-net Yaxya win maddanəs ən Zabaday, win as iga esəm Bohanargas, almaɣna n adi: Maddanəs ən teqqaq; ¹⁸ d Andrawəs əd Filibus əd Bartulamawəs əd Matta əd Tuma əd Yaquub wa n ag Alfay, əd Tadday əd Simɣon was itawannu wa Isaggatakken, ¹⁹ əd Yahuza Isxarəyuti was ənta a z'isəttərməsən ɣaysa.

Iduf wa əgan aytedan wəyyad daɣ ɣaysa

²⁰ Dəffər awen, iqqal-du ɣaysa ehan wa daɣ issəgan daɣ Kafarnahum. Təlas fall-as tamattay tiddawt s awa təga daɣ igət, ab'as wala alwaq a daɣ igraw əs tattay ənta əd nəttulab-net. ²¹ Əslan marwan-net awen, əkkan-t-idu y ad t-əbəzan, aglin dər-əs fəlas gannin: «Awa arət a t-immaran.»

²² EƷƷadan-du musanan n Ettawret wiyyad a d-əƷmadnen Yerusalem, ad gannin: «Awa Aššaytan BaƷalzabul, wa n əmənokal ən kələsuf a t-ihan, ənta a t-ikfan fərregat n ikus ən kələsuf daƷ aytedan.» ²³ Təzzar iƷr-en-du Ʒaysa, ig-asan tangalt a daƷ dasan-innâ: «Manəmmək as z'ikkəs Aššaytan daƷ aytedan kələsuf-net s ənta as əlkaman? ²⁴ TaƷmar tas əmməƷaran məssawəs Ʒar-essan, tədi əbərəjji a za tagu. ²⁵ AƷaywan iyyanda deƷ as əmməzrayan məssawəs, wədi əbərəjji a z'agu. ²⁶ Zun d əmmək di daƷ as, kud Aššaytan iman-net a dər imməƷar, wədi taƷmar-net wər za tihag. Əbərəjji a za tagu, təƷrəd. ²⁷ Awalla wər t-illa i ifrâƷan iguz n ahan n aləs n əməqƷerəd, iƷrəd aqƷa ən təla-net, ar s ad t-ikrâd təzzar. Dəffər as t-ikrâd amaran ad z'ifrəƷ ad iƷrəd aqƷa ən təla-net. ²⁸ EƷƷəyyeƷ əsilakanaf-awan as, wər t-illa abakkad d alfawaxiš as wər ifrəƷ Məššina a t-issurəf y awedan ²⁹ ar alfawaxiš imosan ikus ən tarna y Infas wa Zəddigan, fəlas abakkad adi iƷallalan fəl awedan.» ³⁰ Batu ta ig-asan-tat Ʒaysa fəlas tənna a taggin: «Ih-ay agƷəsuf.»

Anna əd mədrayan ən Ʒaysa win tidət

³¹ Tosa-du anna ən Ʒaysa əd mədrayan-net, əbdadan dat əmi n ahan, zammazalan sər-əs awedan y a dasan-t-id-aƷru. ³² TəqƷim tamattay tagget Ʒur Ʒaysa, təƷilayƷalay-tu as das-itawanna: «Təbdâd-ak anna-nak əd mədrayan-nak dat ahan, sastanan dər-ək.» ³³ Inna Ʒaysa: «Ma imosan za anna-nin, ma imosan imədrayan-in?» ³⁴ Təzzar issəlal asawad-net tamattay ta Ʒur-əs təqƷimat da təƷilayƷalay-tu, inna: «Əntanay da da anna-nin əd mədrayan-in, ³⁵ fəlas awedan kul wa itamazalan tara ən Məššina, ənta a imosan amadray-nin, madəƷ təmadrayt-in, madəƷ anna-nin.»

4

Igi ən Ʒaysa əlmitalan agƷotnen əmmigradnen əs TaƷmar ta n Məššina

Əlmital wa n əmagyak

¹ Ilas Ʒaysa tewaƷlay ən təƷadamayt n agaraw wa n Galilaya, ad isasaƷru aytedan. Təddew-du fall-as tamattay tagget, har as igƷaz aƷlal n aman a d-ihân imi n agaraw da da, iƷqim daƷ-as. Tamattay amaran ketnet təqƷim-du təbdâd daƷ əsəlim n agaraw. ² A tat-isasaƷru aratan agƷotnen s əlmitalan. Inn-asan daƷ əsəssəƷri-net: ³ «Səsəmat! Əmagyak iyyan a iglan y ad inbəl tawagost-net. ⁴ DaƷ anabal wa itaggu den imosan anabas n amasa, ərtaknat təblalen šiyad fəl tama ən tarrayt, osan-du Ʒədad ətšantanat. ⁵ Ərtaknat šiyad daƷ amaƷal əhanat təhun. Idwal-du amasa wen tarmad fəlas wər illa daw-əs amaƷal agƷen daƷ əƷlan kewan, ⁶ mišan as təƷƷəzay təfuk, illəsway, iƷqur fəlas wər iha amaƷal a daƷ in z'ugagan kewan-net. ⁷ Šiyad ərtaknat daƷ təfəssaƷ. Ədwalnat təfəssaƷ šin, əlməznat amasa wa d-idwalan den, igdal-asnat awen ara. ⁸ Mišan ya arat daƷ təblalen en irtak daƷ amaƷal olaƷan. IƷmad-du, idwal, iga šixaxanen. Šixaxanen-net šiyad akkiyyat əhanat-tat karadat təmərwen ən təblalt. Šiyad sədisat təmərwen, šiyad temeday.» ⁹ Dəffər awen inn-asan Ʒaysa: «Wa isallin, issəsəmet.»

Əssiran win əqƷalnen TaƷmar ta n Məššina

¹⁰ As təfal tamattay Ʒaysa, ənkaran-du nəttulab-net win maraw d əššin d aytedan wiyyad a dər-əs tidawnen, əssəstanan-tu d almayna n əlmitalan win itaggu. ¹¹ Inn-asan: «Kawanay təƷrâwam masnat daƷ əssiran ən TaƷmar ta n Məššina, mišan aytedan win hadatnen arat kul tangalen as dasan-itatamal. ¹² *Adi a d-ewayan as əswâdan, mišan wər hənnəyan, əssisaman, mišan wər Ʒərrin. Id ənnar wər iga adi, utaban, təwəsurəfan-asan bakkadan-nasan.*»

Almayna n əlmital wa n əmagyak

¹³ Inn-asan deḡ: «Awak əgərri a wər təgem wa daḡ əlmital? Daḡ adi manəmmək as za tagrim əlmitalan win hadatnen? ¹⁴ Əmagyak wa n ihogan, əlmital a imos n awedan immalan awal ən Məššina y aytedan. ¹⁵ Amasa wa irtakan fəl tama ən tarrayt, əlmital a imos n aytedan win əslanen y awal ən Məššina mišan a d-asu Aššaytan den da ikkəs-tu daḡ wallan-nasan. ¹⁶ Amasa wa irtakan daḡ amaḡal əhanat təhun, əlmital a imos n aytedan win as, as əslan y awal ən Məššina ad t-əqbalan əddi da əs man filawasnen, ¹⁷ mišan wər ila awen ekay. Aytedan win wər əmosan ar məssawəsan ən təmazayen. Igda ḡas a tu-təməl təssust, madəḡ təddəguzt təgât fəl əddəlil n Awal ən Məššina, ad ayyin əzəgzan əddi da. ¹⁸ Amasa wa irtakan daḡ təfəssaḡ, əlmital a imos n aytedan win əslanen y Awal ən Məššina, ¹⁹ mišan aššawašatan n əddənət, d adakal wa təga təgərgist n əddənət taytwen-nasan, d ark deranan wiyyad aggotnen, əssəfalan-du dännəg Awal wen, igdal-as awen a d-awəy tənfa. ²⁰ Amasa wa irtakan amaran daḡ amaḡal olaḡan, əlmital a imos n aytedan win as, as əslan y Awal ən Məššina, a sər-əs əzzəgzənan, iqqəl-asan tənfa, təmosat karadat təmərwen n ənətfus, iyyat təqqəl sədisat təmərwen, iyyat amaran təqqəl temeday.»

Səsəmat s əlluy

²¹ Inn-asan ḡaysa deḡ: «Awak fətəla tərḡât idakkal-tat awedan ag-et daw əḡəzu madəḡ daw tessat? Wərgəḡ ətəwəsəwar a tətawaggu edag ihhoken? ²² Wər t-illa a iḡbâran, wər za nənəfiləl; wala iyyan imosan əssir, wər za naffaggu. ²³ Wa isallin, aslet!» ²⁴ Inn-asan deḡ: «Taggat əsəsəm olâḡan y əmazal wa d-ifalan Məššina! Təsəkət tas təkkatam y aytedan ənta as dawan-z-ikət Məššina, iššit-awan deḡ fall-as. ²⁵ Fəlas wa ilan, a das-itəwəšitu awa ila; wa wər nəla amaran, arat n awa ila da a daḡ-as attarmas.»

Əlmital wa n tadwala n amasa

²⁶ Inn-asan deḡ: «Taymar ta n Məššina təha əlmital n awedan inbâlan amasa daḡ tawagost-net. ²⁷ Gər z'insâ wala okây, gər z'ehad wala ezal; amasa wədi a d-igməd, ad idaggal. Wər issen məššis əmmək was d-igməd wala was idaggal, ²⁸ fəlas amaḡal, gar-es əd man-net as d-itakkas tənfa. Yel a d-itizaran agamad, dəffər awen agu šixāḡanen, amaran ədwəlnat-du daḡ-asnat təblalen. ²⁹ Təḡḡâ təbzəst ḡas, idkâl-du məššis əlmoši, assantu daḡ allay-net; fəlas tamert n allay a təgat.»

Əlmital wa n amasa nannabat igân esəm mutard

³⁰ Dəffər awen inn-asan ḡaysa: «Mas za nammattal Taymar ta n Məššina? Ma imos əlmital wa tat-isassagran? ³¹ Taymar za ta n Məššina təha əlmital n amasa n annabat igân esəm mutard ogaran imasan kul təmmədrəyt. ³² Mišan dər iga awen da, as itawanbal, ad idwəl, agər annabatan kul win nebəlan təzzəgrət. Agu izəlan əgânen təzzəgrət ta n as a daḡ-san agin gəḡad šisəllula.»

³³ Əlmitalan aggotnen šilat ən win di as dasan-immal ḡaysa awal wa d-ifalan Məššina, a daḡ ewâl awen s awas əfragan əgərri-net. ³⁴ Wər t-illa a inna i tamattay əs wərgəḡ əlmitalan a daḡ-qu inna, mišan as iqqal ḡas-net ənta əd nəttulab-net a dasan-iməl almaḡna n əlmitalan win di ketnasan.

Igi ən ḡaysa təlməḡjujaten

ḡaysa ila tarna fəl tazafa

³⁵ Əzəl wənda, as d-ihoz ahad, inna ḡaysa i nəttulab-net: «Nəḡrəset əs tagadamayt ta hadat n agaraw.» ³⁶ Əfalan tamattay, matakwayan nəttulab-net, ewayan-tu daḡ əḡləl n aman wa da daḡ iqqim da. Əddəwan dər-əs əḡlalan n aman wiyyad. ³⁷ Əglân as d-igar aḡu issohen fəl agaraw. Ad sattabnat tənazzamaren y əḡləl, taggazan-t-id aman har ibuk y ad idnəy. ³⁸ As itaggu awen, ḡaysa ənta issomat adafor insâ daḡ ələqqam n əḡləl. Təzzar əssənkarant-tu nəttulab-net daḡ etəs, ənnan-as: «Əlfəqqi!

Awak zələy a wər tège daɣ a danaɣ-atšin aman?» ³⁹ Inkar-du Ƴaysa, isannaryam y aɗu, inna y agaraw: «Ǝdrər, taffasta!» Təzzar izzəkkat aɗu, iɣrad arat kul adrur. ⁴⁰ Təzzar inn-asan: «Ma kawan-issərmaɣan? Awak əzəgzan a wər təgem harwa da?» ⁴¹ Təggaz tasa zəwwərat inəttulab, ad tinəmənnin: «Kawanay ak, ma imos wa daɣ awedan, s aɗu d agaraw da ittâf daɣ-san tanat?»

5

Ƴaysa ila tarnə fəl kələsuf

¹ Ewad-in Ƴaysa əd nəttulab-net əsəlīm n agaraw wen sen, daɣ akal ən Garassen-atan. ² Izzəbbat-du Ƴaysa aɣlal n aman ɣas, igmad-du sər-əs əmeskel iyyan izəkwan. ³ Izəkwan en da a daɣ ixsar, amaran indâr y aytedan kerrad-net, əs wala isassaran. ⁴ Ǝyəwanan kerrad ən fassan-net əs sassaran, asəɣan idaran-net əs təzabagawen, mišan ad iɣtəs awen kul. ⁵ Iha izəkwan en da d ədɣaɣan ehad-ezal, izayyak, italay iman-net əs təhun.

⁶ Mišan, as ogga Ƴaysa daɣ igəg, ozal-du sər-əs, issəjad-as. ⁷ Idkal aggəsuf wa ihan aləs wa əməsli-net wəllen inna: «Ma daɣ-i tareɣ Ƴaysa, Barar ən Məššina di n Amadkol? Ǝgmaya daɣ-ak fəl Məššina, a di-wər-təzəɣɣəzzəba.» ⁸ Innâ awen, fəlas das-inna Ƴaysa: «Aljayn wa labasan, əgməd d aləs di!» ⁹ Təzzar issəstan-tu Ƴaysa, inn-as: «Ma esəm-nak?» Inn-as aggəsuf: «Esəm-in Egan, fəlas igət a nəga.» ¹⁰ Ad itansay aggəsuf wen Ƴaysa fəl a tu-wər-ikkəs daɣ akal en.

¹¹ As itaggu awen, idân əsəgən aggen ən ladayan fəl tasaga ən təkəşwart təhozat den. ¹² Ad tansayan kələsuf en Ƴaysa gannin-as: «Sukanay iladayan en, a tan-nəggəz.» ¹³ Ird-asan Ƴaysa s awen. Ǝgmadan kələsuf aləs wen, əggazan iladayan. Ǝddəggagan-du ladayan en fəl azadaga ən təkəşwart, ad titərəggen daɣ agaraw. Ǝtsan-tan aman, əmosan edag n əššin gim.

¹⁴ Təzzar ozalan madanan ən ladayan win, əgan isalan y əɣrəm wen əd ɣələyɣələyan-net. Ǝgla-du aytedan y ad ənəyan awa igan den. ¹⁵ Osan-du Ƴaysa, ənəyan aləs was kala ad t-əhan kələsuf; iqqim, ilsâ, təqqâl-t-idu tayttay-net, təzzar təggaz-tan tasa. ¹⁶ Egan daɣ-san aytedan win əggəyyatnen y awen, isalan kul n awa itawaggan y aləs en, d awa igrawan iladayan, ¹⁷ təzzar ad tansayan Ƴaysa a dasan-igməd akal-nasan.

¹⁸ Itaggaz Ƴaysa aɣlal n aman as d-inkar aləs wa əgmadan kələsuf, a t-itansay ad t-ayyu a dər-əs idaw. ¹⁹ Wər das-irda Ƴaysa s awen, eges ya inn-as: «Aglu əqqəl ehan-nawan d aytedan-nak, təmələɣ-asan arat kul wa dak-iga Ǝməli s əhənətta-net.» ²⁰ Təzzar igla aləs en, ikka akal igân esəm «Wa-n-Maraw-Ƴərman» ad immal arat kul wa das-iga Ƴaysa. Aytedan kul win das-əslanen isannahal sər-san awen əsəmməkləl.

Ƴaysa ila tarnə fəl təwərna əd təmattant

²¹ Iqqal Ƴaysa, iɣras agaraw s əsəlīm-net wa hadan. Təlas fall-as tamattay tagget tiddawt. ²² Təzzar osa-du aləs igân esəm Jayɣus, imosan iyyan daɣ muzaran n ahan n əlɣibada ən Kəl-Ǝlyəhud. Inay Ƴaysa ɣas, issəjad dat-əs. ²³ Onsay Ƴaysa, inn-as: «Tabarart-in a ɣur təlla təmattant, areɣ daɣ-ak a sər-əs nidaw təssəwəraq-qat ifassan-nak ad təzzəy.» ²⁴ Igla Ƴaysa, iddew dər-əs. Təlkâm-as tamattay tagget, tətənbəday fall-as.

²⁵ Tamattay en, tah-et təntut təgât maraw elan d əššin igammad-tat əzni. ²⁶ Tənây alɣazab aggen daɣ fassan ən nasmagalan aggotnen. Awa təla kul as daɣ-san tu-tənɣa. Mišan edag n ad təggudəy, tətəyt fadda a fall-as təga təwərna-net. ²⁷ Tantut ten kala da təslâ y awa gannin aytedan əs Ƴaysa. Təggaz-in tamattay ta təhat šiɣərden ən Ƴaysa, tədas takadkat-net, ²⁸ fəlas tənna daɣ man-net: «As ədasa kuddeɣ isəlsa-net, ad əzzəy.» ²⁹ Da da ad tədas təkadkat-net ənta daɣ-as izzəkkat əzni wa daɣ-as

inaqqalan, tēfray i tēxəssa-net as tēzzay daχ tēwərna ten. ³⁰ Tamazayt ten da a day ifray ʔaysa i tarna iyyat as t-in-təgməd. Imalallay-du tamattay, inna: «Ma idasan isəlsa-nin.» ³¹ Ənnan-as nəttulab-net: «Tahannaya tamattay ta fall-ak tətənadəyat, eges tēganna "Ma di-idasan?"» ³² Dər iga awen da ya issələl ʔaysa tamattay asawad-net y ad inəy wa t-idasan. ³³ Təzzar tərmaχ təntut, təndaw-tat taysəst, fəlas təssân daχ tēməzzəyt ta tēga den. Təkka-du ʔaysa, təssəjad dat-əs, təmal-as tidət ketnet. ³⁴ Inn-as: «Tabarart-in əzəgzan-nam sər-i a kam-izzozayan. Aglu daχ alxer, təzzaya daχ tēwərna-nam.»

³⁵ Harwada iššewal ʔaysa as d-osan aytedan a d-əfalnen aχaywan ən Jayχus wa n əmuzar n ahan wa n əlχibada ən Kəl-Əlyəhud, ənnan-as: «Tabarart-nak wər tēdder, igd-ak tēdgāzaχ Əššex.» ³⁶ Mišan wər-in-iger ʔaysa tenbay daχ awa itawannan den, inna y əmuzar n ahan wa n əlχibada ən Kəl-Əlyəhud: «Ad wər tərmeχa, əttəf χas əzəgzan-nak.» ³⁷ Igdal ʔaysa i tamattay a dər-əs tidaw. Iglə, wər iddew ar əd Butros əd Yaqub əd Yaxya wa n amadray ən Yaqub. ³⁸ Əddewan əd Jayχus wa n abba ən tabarart s aχaywan-net. As din-osan inay ʔaysa tanajarwayat n aytedan hallinen, sikalalan. ³⁹ Iggaz-in fall-asan, inn-asan: «Mafel tənjarwayam tēhallim? Təbarart-nawan wər tat-aba, etəs χas a tēga.» ⁴⁰ Təzzar əgan-tu ajjab. Issərdaq-qan ketnasan, wər d-iqqim ar imarwan ən tabarart əd nəttulab-net win dər d-iddew, təzzar iggaz dər-san edag wa daχ tənsa tēxəssa ən tabarart. ⁴¹ Ibaz əfus-net, inn-as: «Talita qum!» Alməχna n awen: «Tabarart ənneχ-am, ənkər-du!» ⁴² Tənkər-du tabarart daχ tamazayt tenda, təjawankat. Tabarart ten, maraw elan-net d əššin. Awa sər-san iga awen daχ əsəmməkləl, əhagan. ⁴³ Iryam-asan ʔaysa wəllen fəl amel n awen y awedan waliyyan, dəffər adi inn-asan a tat-akfin a tətša.

6

Tunkart n aytedan ən Nazaret ʔaysa

¹ Igməd ʔaysa edag wen, iddew əd nəttulab-net, ikka aχrəm wa daχ idwal. ² As əzəl wa n təsanfawt, iggaz ʔaysa ehan n əlχibada ən Kəl-Əlyəhud a daχ-as isasaχru. Isammakləl awen s aytedan aggotnen win das-əssəsammen, har əqqiman gannin: «Mənid d-issan wa daχ awedan aratan win? Ma təmos masnat ta tu-tətawakfat da, as itaggu təlməχjujaten?» ³ Awak awa wərgəχ əmakras ən nan wa n ag Maryama, əməqqar ən Yaqub əd Yosas əd Yahuda əd Simχon? Wərgəχ šimədrayen-net da da əxsarnen gər-ena da!» Awen daχ a dasan-igdaləlan a sər-əs əzzəgzənan. ⁴ Inn-asan ʔaysa: «Ənnəbi wər itəwəlku ar daχ aχrəm wa daχ idwal, əd šəqqəχan-net d aχaywan-nasan.» ⁵ Igdal-as awen a χur-san agu təlməχjujaten. Imiranan wər nəggət χas a issəwar ifassan-net, izzozay-tan. ^{6a} Isimakləl sər-əs iba n əzəgzan-nasan.

Əzəmmizəl wa iga ʔaysa inəttulab win maraw d əššin

^{6b} Illil ʔaysa šixarmaten šin əhoznen Nazaret, isasaχru aytedan. ⁷ Əzəl iyyan iχra-du ʔaysa inəttulab-net win maraw d əššin, ikf-en tarna fəl kələsuf, a tan-izamazal s əššin əššin. ⁸ Omar-tan, inn-asan: «Ad wər tawəyam arət waliyyan daχ əšikəl-nawan, ar tallaq. Ad wər tawəyam allaw, wala aχrəg, wala tefelt daχ nəfdan-nawan. ⁹ Əsələt iχateman-nawan, amaran ad wər tawəyam sanatat təkədkaden. ¹⁰ Ehan was tənneftəyam, a tu-wər-təgmədədam s iyyan iket tēhām aχrəm wədi. ¹¹ As wər tətawaqbalam, wər itawasasam dəχ i batu-nawan daχ adag wədi, as tu-təgammadam təbbikbakam-in əgodrar-net wa iwaran idaran-nawan, ilkâm ad aggayyat awen fall-asan.» ¹² Əglan nəttulab ad taggin təlχutbat y aytedan fəl ad utaban. ¹³ Takkasan dəχ kələsuf aggotnen daχ aytedan, ill-ay widi zaggayan i miranan aggotnen, zuzəyan-tan.

ʔaysa əd Yaxya wa isalməχan daχ aman

Iduf wa əgan aytedan daɣ Ƴaysa

¹⁴ Isla əmənokal Herod isalan ən Ƴaysa, fəlas sallat-net a tewadat edag kul, amaran gannin sər-əs aytedan: «Awen Yaxya wa isalmaɣan daɣ aman a d-inkaran daɣ təmattant! Adi a fəl ila tarna n igi ən təlməxjujaten.» ¹⁵ Gannin wiyyad: «Awen ənnəbi Ilyas.» Wiyyad deɣ gannin: «Awen iyyan daɣ ənnəbitan win ərəwnen.» ¹⁶ As isla Herod y aratan win tawanninen den əs Ƴaysa inna: «Yaxya wa isalmaɣan daɣ aman was d-əssəfrasax eɣaf-net, ənta a d-inkaran daɣ təmattant.»

Isalan ən təmattant ən Yaxya wa isalmaɣan daɣ aman

¹⁷ Herod iman-net a omaran s ad attarmas Yaxya, issəkrad-tu, isassag-ay daɣ kasaw. Igâ Herod awen fəl əddəlil n azalaf-net Herodəyas təmosat taɣur Filibus, amaran Filibus amadray ən Herod en daɣ a imos. ¹⁸ Ənta Yaxya iyyəwan tənna i Herod: «Xaram fall-ak ad tərəkəba daɣ amadray-nak taɣurəs.» ¹⁹ Təzzar təgzar Herodəyas Yaxya fəl awen da, ad təgammay d a daɣ-as təkkəs iman, mišan wər təgrew təməwit n awen, ²⁰ fəlas Herod a iksudan Yaxya. Issân as aləs n alɣadil a imos n əmizdag, adi a fəl t-ogaz. Ira ad isasam i batuten-net, mišan ya, i dasnat-isla, ad t-iššəwəš wəllen awa igannu Yaxya.

²¹ Awen daɣ a igan, har sər-əs təgraw Herodəyas tarrayt xur aɣalay n əzəl wa daɣ ihəw Herod. Əzəl wen isassaga daɣ-as Herod saksas zəwwəran, migaren-as-du muzaran n əlxəkum-net, əd muzaran ən sojitan-net, d aytedan win əlanen tenbay daɣ akal wa n Galilaya. ²² Təggaz-du elles ən Herodəyas ad təggax. Oggām Herod əd naftaxan-net eweɣ-net, təzzar inn-as: «Əgməy daɣ-i awa tareɣ kul, a dam-t-akfa.» ²³ Iгла har das-ihad, inn-as: «Arat kul wa daɣ-i təgmaya, a dam-t-akfa kuddeɣ iqqal a dər-əm uzana akal-in daɣ ammas.» ²⁴ Təgmad, tənna y anna-net «Ma daɣ-as z'əgməya?» Tənn-as anna-net: «Əgməy daɣ-as eɣaf ən Yaxya wa isalmaɣan aytedan daɣ aman.» ²⁵ Tarmad as du-təqqal təmawat ten əmənokal Herod, tənn-as: «Eɣaf ən Yaxya wa isalmaɣan aytedan daɣ aman as əreɣ a di-tu-takfa əmərədda insâ daɣ attabla.» ²⁶ Arat wen iɣšad iman n əmənokal wəllen, mišan wər ira a das-ugəy fəl əddəlil ən təhuday ta das-iga d əddəlil ən naftaxan-net. ²⁷ Issəgla daɣ tamazayt ten da iyyan daɣ sojitan-net win tu-tagaznen, inn-as a das-d-awəy eɣaf ən Yaxya wa isalmaɣan daɣ aman. Iгла soji, ifras-du eɣaf ən Yaxya daɣ kasaw. ²⁸ Eway-t-id daɣ attabla, ikf-ay i təmawat ten. Tabarart deɣ təkf-ay y anna-net. ²⁹ As əslan nalkiman ən Yaxya awen, əgla, ədkalan taɣəssa-net, ənbalan-t-in.

Əsəssəɣri d əššətši win iga Ƴaysa i tamattay

Ƴaysa əd nəttulab-net

³⁰ Iqqalan-du nəmmuzal winad izammazal Ƴaysa da, əssoɣalan-as isalan n arat kul wa əgan, d awa sassaxran aytedan. ³¹ Inna Ƴaysa i nəttulab-net: «Ayewat, akkiwat-anax edag issufan fəl ad tassanfim a əndərran.» Arat wen inn-asan-tu fəlas aytedan win tan-du-tasinen əd win gallinen, a əganen igət, was arat n amazay daɣ ətšan nəttulab-net, da wər t-əgrewan. ³² Təzzar əggazan aɣlal n aman, əgla, əkkan edag issufan a din-ikitayyen.

³³ Oggan-tan aytedan aggotnen as əgla, əzdayan-tan. Iga-du uzzal n aytedan daɣ xərman kul win əhoznen den, azzaran-in i Ƴaysa əd nəttulab-net s adag wa əkkan. ³⁴ As d-izzəbbat Ƴaysa aɣlal n aman, inay tamattay tagget, təggaz-tu təhanint-nasan, fəlas əmosan zun ayfəd wər nəla amadan. Təzzar a tan-isasaxru aratan aggotnen.

Əššətši ən Ƴaysa səmmos gim n aləs

³⁵ As gəzzul əzəl, əhozan-t-idu nəttulab-net, ənnan-as: «Edag issufan awa, amaran əzəl igla; ³⁶ suɣəl tamattay a, ad təgməy id təzzənza a tətša daɣ ɣawnatan əd taɣarmaten win əhoznen.» ³⁷ Inn-asan Ƴaysa: «Šatšat-tan kawanay iman-nawan

da!» Ænnan-as: «Awak a tarex ad nœdkæl sanatat tœmad n œrrœyal n œzrœf wa mallan nazzanza-du ſigœlwen œtſan aytedan win?» ³⁸ Inn-asan: «Æssœnat-du mœnœket tœgœlwen tœlam.» As d-œssanan awa t-illan œqqalan-t-id œnnan-as: «Sœmmosat tœgœlwen d œſſin kifitan.»

³⁹ Tœzzar omar-tan s ad agin aytedan tœzunen, sœxximin-tan den da daŷ yel. ⁴⁰ Æqqiman aytedan œmosan tœzunen. Tœzunen en ſiyyad œmosnat temeday temeday n awedan, ſiyyad œmosnat sœmmosat sœmmosat tœmœrwen. ⁴¹ Amaran idkal Ŷaysa sœmmosat tœgœlwen ſin den d œſſin kifitan win, iggœzzay ijœnnawan, iga igodan i Mœſſina, ikaramkaram ſigœlwen ſin den, ikf-enat i nœttulab-net y a tanat-uzanan i tamattay. Æzunan-asan deŷ kifitan winad n œſſin a. ⁴² Ætſan aytedan en ketnasan har œyyœwanan. ⁴³ Æſſedawan-du nœttulab œn Ŷaysa awa d-iqqiman daŷ tœgœlwen œd kifitan, œdkaran daŷ-as maraw œzmaman d œſſin. ⁴⁴ Æddukad œn sœmmos gim n alœs a œhanen tamattay ta tœtſat den.

Teklay œn Ŷaysa fœl aman

⁴⁵ Wala a ihogan omar Ŷaysa inœttulab-net s ad œggœzan aŷlal n aman, izaran-as-in œs tœgadamayt ta hadat n agaraw œs tœxrœmt ta n Betsayda, iket di ad itasallam tamattay. ⁴⁶ Issœgla tamattay ŷas, ikka adŷaŷ iyyan y a fall-as agu ſiwatriwen. ⁴⁷ As iga ahad, aŷlal n aman wa œhan nœttulab œn Ŷaysa isigaraygaray daŷ agaraw, Ŷaysa amaran œnta iwâr adŷaŷ ŷas-net itattar. ⁴⁸ Ogg-en œbbillanan d œsœgli n œŷlal fœl aman, fœlas aŷu a dœr d-œmmœqqasan. As tœga tilkamat n ahad ikk-en-du Ŷaysa ijiwankat fœl aman. As zama tan-okây, ⁴⁹ oggan-tu ijiwankat fœl aman, œŷilan aggœsuf, sakkarayan. ⁵⁰ Ketnasan issirmaq-qan anay wa t-œgan. Miſan tamazayt ten da a dasan-iſſewal Ŷaysa inn-asan: «Ad wœr tœŷſœdam, nak awa! Tœgmœdet-kawan tasa!» ⁵¹ Iggaz-du fall-asan aŷlal ŷas, idrar aŷu. Iga sœr-san awen œsœmmœklœl labasan, ⁵² fœlas wœr œgren almaŷna œn tœmœxjujat ta iga Ŷaysa œs tœgœlwen id iwallan-nasan a garmommen.

Æzuzœy œn Ŷaysa imiranan daŷ akal œn Ganazaret

⁵³ As œŷrasan agaraw, ewadan akal œn Ganazaret, œndayan aŷlal n aman daŷ tœſœſwit. ⁵⁴ Ægmadan aŷlal n aman ŷas, œssanan aytedan as Ŷaysa awen. ⁵⁵ Tœzzar ozalan daŷ akal ketnet, edag as œslan as ih-ay a sœr-œs du-tawœyan imiranan daŷ tœssœwen. ⁵⁶ Edag osa Ŷaysa, gœr za aŷrœm wala taŷrœmt wala iŷawnatan n œsuf, a d-awœyan aytedan imiranan s adag wa imosan asammanay, ansœyan Ŷaysa ad ayyu aytedan œdœsan kuddeŷ tœbœnik œn tœkadkat-net. I tat-idasan deŷ ad izzœy.

7

Tazdak d ammadas

Alwajiban œn Mœſſina d ammadas

¹ Æddewan Farisaytan ŷur Ŷaysa œntanay d arat daŷ musanan n Ættawret a d-œgmadnen Yerusalem. ² Ænayan arat daŷ nœttulab œn Ŷaysa tattin œs fassan œmmidasnen, almaŷna wœr nœrrud.

³ Ænta Farisaytan œd Kœl-Ælyœhud kul wœr tœttin iket wœr œſſœradan ifassan-nasan har tœŷœmmar, imos awen alyœadat œn marawan-nasan. ⁴ Wœr tœttin deŷ as d-œgmadan assamanay n aytedan, iket wœr œzzœzdagan. Ættâfan deŷ ſiyyad alyœadaten aggotnen, œmosnen œzœzdœg œn kassan, œd tœkan, œd tœŷeren œd tœssuwen ſin daŷ tattin. ⁵ Adi a fœl œssœstanan Farisaytan œd musanan n Ættawret Ŷaysa, œnnan-as: «Mafœl wœr œlkeman nœttulab-nak y alyœadaten œn marawan-nana, tattan œs fassan œmmidasnen?» ⁶ Inn-asan Ŷaysa: «Ælmunafiŷan! Tidœt a imos awa sœr-wan inna œnnœbi Isayas s œmmœk was itiwaktab as: "Tamattay ta, ilœs ŷas as di-tœssœŷmar; miſan iwallan-nasan

əggugan-i wəllen. ⁷ *Əlyibada wa di-taggin, ibbinnan, fəlas wər səsəyrin ar alwajiban a d-ənzaman aytedan daχ yafawan-nasan."*

⁸ Emmək en da a təgam kawanay da, toyyam alwajiban ən Məşşina, təlcamam y alxadaten n aytedan.» ⁹ Inn-asan Yaysa deχ: «Şiyyit tolâχat a təgam y alwajiban ən Məşşina, fəl ləkkum y alxadaten-nawan! ¹⁰ Wərgex ənnəbi Musa a inna: "Səxmər abba-nak d anna-nak" inna deχ: "Awedan wa işaffaraşšen abba-net, madeχ anna-net, wədi a daχ-as təwəkkəsan man."» ¹¹⁻¹² Mişan kawanay təgannim: «Ifrâg awedan ad annu y abba-net madeχ anna-net: "Tadhəlt tas daχ-i təgam ənnəyat-net, əssəwaraq-qat aganna təmos addawal." Daχ adi awedan wədi wər tu-toyyem s amaknaw n arat y abba-net wala anna-net. ¹³ Təməwit tədi da as təgam alxadat-nawan daχ adag n Awal ən Məşşina, təsasəyrin-tat i bararan-nawan. Tətaggim deχ wiyyad aratan aggotnen şilat n adi.»

Ammadas wa n tidət

¹⁴ As iga Yaysa batu ten i Farisaytan əd musanan n Əttawret, iχra tamattay, inn-as: «Səsəmat-i ketnawan, tagrim awa dawan-z-anna da. ¹⁵ Wər t-illa arat itaggazan taχəssa n aggadəm, ifrâgan əsəmmədəs-net. Kalar awa t-id-igammadan a tat-isamadasan. ¹⁶ Wa isallan, aslet!»

¹⁷ As imməzzay Yaysa əd tamattay, iggaz ehan, əssəstanan-tu nəttulab-net d almaχna n iggi wa iga den. ¹⁸ Inn-asan: «Awa zaχnin kawanay da, wər təlem əgərri? Wər təgrem as, wər t-illa arat itaggazan taχəssa n aggadəm ifrâgan əsəmmədəs-net, ¹⁹ fəlas wərgex əwəl-net a itaggaz. Kalar tadist-net a itaggaz, dəffər adi inχəl-in daχ əsuf.» Emmək wa da as issəxlal Yaysa imensewan kul. ²⁰ Inn-asan deχ: «Awa d-igammadan əwəl n aggadəm, ənta a t-isamadasan, ²¹ fəlas əwəl n aggadəm a du-gammadnat arak ənnəyaten a tu-tawaynen s igi ən tədoden madeχ igi ən meddan əd şikra, d igi ən man, ²² d igi n əzzəna, əd tara n əddənet, əd tişit n amaksan, əd təkaddilt, d igi n aratan win ogarnen taxxaramt, əd manjaχ, əd şizmit, d ədkul ən man, əd təmətəkwəyən kul şin iba ən təla n almaχna. ²³ Aratan win di labasnen kul əwəl n aggadəm a du-gammadan, amaran əntanay a tu-samadasnen.»

Yaysa əd təntut iyyat wər nəmos təlyəhut

²⁴ Ifal Yaysa edag wen ikka amaçal ən Tir. Os-in χas iggaz ehan iyyan, fəlas wər ira a fall-as tagu masnat; mişan indar-as ad aqqam wər fall-as təga masnat. ²⁵ Kalar iraz-in χas təsl-ay təntut iyyat təlât tabarart iha aggəsuf, təkək-ay-du, təssəjad-as. ²⁶ Təntut ten wər təmos iyyat daχ Kəl-Əlyəhud, ələsəl-net Kəl Fenisəya əd Kəl Surəya. Tonsay Yaysa a das-ikkəs aggəsuf daχ tabarart-net. ²⁷ Təzzar inn-as Yaysa: «Ayyu bararan ad ayyawanan təzzar, fəlas wər oley i daw-san idkalan amensay-nasan igər-t-in i çan.» ²⁸ Tənn-as təntut: «Tidət-nak Əməli, mişan ya, idan da əkəmmi a taggin awa d-irattakan daχ bararan, tattin-tu.» ²⁹ Inn-as Yaysa: «Aglu, təqqələχ aχaywan-nam; tabarart-nam igmad-tat aggəsuf fəl əddəlil ən batu ta di-təge da.» ³⁰ Təqqal aχaywan-net, tos-in tabarart-net təzzilallat daχ tessat, igmâd-tat aggəsuf, təzzây.

Əzuzəy wa iga Yaysa aləs immizagan, indây deχ iləs-net

³¹ Dəffər adi igmad Yaysa akal ən Tir, irzag Sidon os-in akal wa n Galilaya iga sər-əs tarrayt ta təmmarat akal Wa-n-Maraw-Çərman. ³² Den daχ a sər-əs d ewayan aytedan aləs immizagan, as indây iləs-net. A tu-tansayan y ad t-issəwar ifassan-net, izzuzəy-tu. ³³ Iddew dər-əs Yaysa, igmad dər-əs aytedan, təzzar iga idədwān-net daχ təməzzugen n əmzag en, dəffər adi issəwar-tan imətman-net, idas sər-san iləs n əmzag en. ³⁴ Amaran iggəzzay Yaysa ijənnawan, ihanaffat, inn-as: «Effata!» Almaχna: Nuləm. ³⁵ Tamazayt tenda a daχ ənnolamnat təməzzugen n əmzag en, itawayya-du iləs-net, işşewal s iləs isrâdan. ³⁶ Dəffər awen omar Yaysa aytedan

s ad wər əmelan awa igan den y awedan waliyyan, mišan iket itamar-tan s awen sanahalan-tu emel. ³⁷ Iga sər-san awen əsəmməkləl labasan, gannin: «Awa itaggu kul iknâ əlluḡ. Wala imzagan issəsl-en, išašawal deḡ win as əndayan ilsawan-nasan.»

8

Əšətši wa iga ʔaysa əkkoz gim n aləs

¹ Adan en da a deḡ təlas tamattay tagget tiddawt fəl ʔaysa. Tamattay en wər təla a tətša. İyra ʔaysa inəttulab-net, inn-asan: ² «Aytedan a təh-i təhanint-nasan. Karad adan a ɣur-i əgan, amaran ab'as t-illa a ətšan. ³ As tan-əssoka iɣawnatan-nasan wər əreman arat, a tan-aggadlu gələk deḡ tarrayt, id wiyyad deḡ-san igəg a d-əgmadan.» ⁴ Ənnan-as nəttulab-net: «Məni du-z-igrəw awedan deḡ əsuf a šiğəlwen siyyawannen tamattay togdât d awa?» ⁵ Issəstan-tan ʔaysa, inn-asan: «Mənəket təgəlwen təlam?» Ənnan-as: «Əssayat.» ⁶ Omar ʔaysa tamattay s ad təxrəd təximit. İdkal-du əssayat təgəlwen šin, iga igodan i Məššina, i karamkaram-tanat, ikf-enat i nəttulab-net y a tanat-uzanan i tamattay en. Əzun-an-atanat. ⁷ Əlân deḡ arat ən kifitan win madorren. Iga ʔaysa igodan i Məššina inna i nəttulab-net, a tan-uzanan əntanay da y aytedan. ⁸ Aytedan en əyyəwanan əglazan-du, har as əssa əzmaman win zawwarnen a du-tawadkarnen deḡ karammutan win d-əglazan. ⁹ Əddukad n əkkoz gim n aləs a ətšanen den. As tətša tamattay, issəllam-tat ʔaysa. ¹⁰ Tamazayt ten da a deḡ iggaz aɣlal n aman ənta əd nəttulab-net, ikka akal ən Dalmanuta.

Agamay ən Farisaytan deḡ ʔaysa a dasan-agu təlməxjujat

¹¹ Osan-du arat deḡ Farisaytan, mašawalan dər-əs, gammayan deḡ-as təlməxjujat təmosat aɣalamat a du-təfâlat Məššina, imosan awen jarraba-net. ¹² Iga ʔaysa təhənəffet zagret, inna: «Mafəl gammayan aytedan n azzaman win təlməxjujat a du-təfâlat Məššina? Əggəyyeḡ əsilakanax-awan as, wər ilkem a dawan-tətiwagga təlməxjujat waliyyat.» ¹³ Təzzar ifal-tan, ilas iguz n əɣlal n aman, ikka əsəlīm wa hadan n agarew.

Əsəmmətər ən ʔaysa inəttulab-net

¹⁴ Əttəwan-in nəttulab a d-awəyan allaw ən təgəlla. Tagəlla iyyadda ɣas a təhat aɣlal-nasan. ¹⁵ Isəmmatar-tan ʔaysa, inn-asan: «Ənkədat wəllen i xamira ən Farisaytan əd wa n əmənokəl Herod!» ¹⁶ Ad tinəmənnin nəttulab-net gar-essan: «Awa wər t-inna ar fəlas wər nəla tagəlla.» ¹⁷ İssan ʔaysa deḡ awen, inn-asan: «Mafəl təššewalam deḡ iban təla-nawan tagəlla? Awak əgərri a wər təgem harwa da? Awak iwallan-nawan a əganen taɣart tas ab'as təgərrim?» ¹⁸ Awak šittawen a wər təlem əs tənayam, wala deḡ šiməzzugen əs təslam? Awak tatawt a din-təgam ¹⁹ iket n əzmaman a du-tədnayam deḡ karammutan win du-təglaz tamattay assaxa wad əzunax səmmosat təgəlwen i səmmos gim n aləs?» Ənnan-as: «Nəkittəw as maraw əzmaman d əššin a du-nədnay. ²⁰ Šiğəlwen šin əssayat za, šin əzuna y əkkoz gim n aləs, mənəket əzmaman a du-tədnayam deḡ karammutan win du-tawaglaznen?» Ənnan-as: «Əssa.» ²¹ Amaran inn-asan: «Eges harwa da wər təgrem wala?»

Əzuzəy ən ʔaysa əmədderyəl iyyan

²² Os-in ʔaysa ənta əd nəttulab-net taɣrəmt ən Betsayda. Əlwayan-du sər-əs aytedan aləs n əmədderyəl, onsayan-tu ad t-idəs izzuzəy-tu. ²³ İbaz ʔaysa əfus n əmədderyəl en, ilway-tu har dər-əs igmad taɣrəmt. İssəwar imətman-net šittawen-net, issəwar-tu ifassan-net, inn-as: «Awak təhannayax arat meḡ?» ²⁴ İdkal əmədderyəl eɣaf-net, inna: «Hannayax aytedan, mišan olân-i d eškan jiwankatnen.» ²⁵ İlas ʔaysa əsəwər ən fassan-net šittawen n əmədderyəl en. İqqal-t-id asawad-net

ketnet, izzay, innəflay daɣ arat kul. ²⁶ Issəlləm-tu Ƴaysa inn-as: «Ad wər təqqəla taɣrəmt ten, aglu akku aɣaywan-nak.»

Ƴaysa itawassan as Ǝlməsix a imos

²⁷ Dəffər awen iddew Ƴaysa əd nəttulab-net əkkan šiɣarmaten əhanen amaɗal as itawannu Qaysarəya wa n əmuzar Filibus. Ǝglân as tan-issəstan Ƴaysa, inn-asan: «Ak daɣ iduf n aytedan, ma əmosa?» ²⁸ Ǝnnan-as: «Wiyyad a gannin Yaxya wa isalmaɣan aytedan daɣ aman a təmosa, wiyyad a gannin ənnəbi Ilyas, wiyyad deɣ a gannin iyyan daɣ ənnəbitan.» ²⁹ «Kawanay za, ma tənnam ma əmosa?» Inn-as Butros: «Kay a imosan Ǝlməsix.» ³⁰ Issənkad-tan Ƴaysa inn-asan: «Tidət a imos adi mišan a tu-wər-təmələm y awedan waliyyan.»

Iki ən Ƴaysa Yerusalām

Ǝtəməl wa azzaran n alyazab wa z'inəy Ǝlməsix ən Məššina

³¹ Den da ad issənta Ƴaysa əsəssəɣri ən nəttulab-net, inn-asan: «Nak Ag Aggadəm, kundaba ənaya alyazab aggen, unkaran-i muzaran ən Kəl-Ǝlyəhud əd muzaran ən limaman əd musanan n Ǝttawret, təwəggin man-nin, ənkara-du deɣ daɣ təmattant əzəl wa n karad.» ³² Ig-asan i batu en igi isisagran wəllen. Təzzar iwət-tu Butros s ahal, iššewal fall-as fəl awa inna den. ³³ Mišan imalallay fall-as Ƴaysa, iswad daɣ nəttulab-net win hadatnen, iharaššat Butros, inn-as: «Ǝfəl dəffər-i, Aššaytan, fəlas imedranan-nak, wərgəɣ Məššina a d-əfalan, kalar imedranan n aggadəm ɣas a əmosan.»

Ləkkum i Ƴaysa Ǝlməsix

³⁴ Dəffər awen iɣra-du Ƴaysa tamattay əd nəttulab-net, inn-asan: «Wa iran a di-ilkəm, wədi igmədet tara ən man-net, agu imateran-net, idkəl təgəttawt-net, ilkəm-i. ³⁵ Ǝssənət as awedan wa wər nəgəmməy ar aggaz ən man-net, wədi ad t-əgmədan, mišan wa iqbala ad t-əgmədan fəl əddəlil-in d əddəlil n Ǝlinjil, wədi ad iɣləs. ³⁶ Ma z'aknu y awedan ad igrəw əddənət ketnet, ənta amaran temsay a ikka? ³⁷ Awak mas ifrag awedan tehakkay-net y a sər-əs agəz iman-net daɣ təmsay? ³⁸ Awedan kul wa isakkarakad ləkkum y-i, madeɣ isikarakad-tu əsuxəl n awal-in daɣ azzaman win, daɣ iggət iba ən təksəda ən Məššina, wədi nak da, Ag Aggadəm, a di-təsəkkərəkəd əlqəbulat-net əzəl wa du-z-əqqəla ələɣ tanaya n Abba-nin, əddewa d angalosan a zaddoggen.»

9

¹ Ilaş Ƴaysa inn-asan: «Ǝggəyyeɣ silakanax-awan as, wiyyad daɣ-wan əbdādnen da, wər tan-z-iba wər ənayan assa ən Taɣmar ta n Məššina igân əs tarna.»

Ǝnəfilal ən tanaya ən Ƴaysa Ǝlməsix

Tanaya ən Ƴaysa Ǝlməsix

² Sədis adan dəffər awen, iɣra-du Ƴaysa Butros əd Yaqub əd Yaxya, iddew dər-san əntanay ɣas s ədɣax iyyan zagren. Ǝllân den da, as imməttay azzahir ən Ƴaysa dat-san. ³ Malawlawan səlsa-net. Ǝgan təməllay təsiraqqet wəllen əs kala wər tətawanay šilat-net daɣ əddənət. ⁴ Təzzar oggan ənnəbi Ilyas d ənnəbi Musa, mişawalan əd Ƴaysa. ⁵ Iggad-du Butros inna i Ƴaysa: «Ǝššex, olâɣ as nəlla da! Ad nəkrəs karad həktan. Iyyan i-nak, iyyan in Musa, iyyan in Ilyas.» ⁶ Wər din-igra Butros axaras wa iga den fəl awa iga daɣ tərəmmeq ənta əd nəttulab win hadatnen. ⁷ Tamazayt ten da a dənnəg-san du-tənafalal təgərak, təls-en telay-net; təzzar iga-du awal daɣ tagarak en da, inna: «Awa Barar-in wa əkneɣ tara, səsəmat-as.» ⁸ Wala a ihogan, waraxwaraxan nəttulab, wər hənneyan awedan waliyyan a ɣur-san illân ar Ƴaysa.

Assa n Ilyas

⁹ Tazabben-du adɣaɣ en da as dasan-inna ʔaysa: «Ad wər tēməlam awa tənayam da y awedan waliyyan iket wər d-ənkera nak Ag Aggadəm daɣ tēmattant.» ¹⁰ Ettafan taryəmt ta dasan-iga den, mišan tinəməsəstinan gər-essan d awa issoka ʔaysa əs «tanakra daɣ tēmattant» ta imal den. ¹¹ Əssəstanan-tu, ənnan-as: «Mafəl gannin musanan n Ettawret: "Kundaba osa-du Ilyas təzzar as du-z-asu Əlməsix?"» ¹² Inn-asan: «Tidət-nasan as kundaba osa-du ənnəbi Ilyas təzzar, annazzam aratan kul; mišan ya, mafel iktâb as Ag Aggadəm kundaba inay alyazab aggen, itəwəsəknu məlka?» ¹³ A kawan-əssusənaɣ âs ənnəbi Ilyas osâ-du, amaran əgân-as aytedan arat kul wa ərən, imos as awen da a iktaban daɣ batu-net.»

Əzuzəy ən ʔaysa barar iha aggəsuf

¹⁴ As d-iqqal ʔaysa əd nəttulab-net win karad ogga inəttulab-net win hadatnen təxilayɣalay-tan tamattay tagget, tənkhâr tamazaq gar-essan əd musanan n Ettawret. ¹⁵ Togga tamattay ʔaysa ɣas, isammaklal sər-san awen, ozalan sər-əs a tu-saslaman. ¹⁶ Inna ʔaysa i nəttulab-net: «Ma dər-san təmməzaɣam?» ¹⁷ Inn-as aləs iyyan daɣ tamattay en: «Əlfəqqi, ewâya-du sər-ək barar-in iha aggəsuf labasan, indâyan iləs-net. ¹⁸ As daɣ-as d-inkar, a t-aggadlu, ad isakafkaf isamakyak, təzzar issəf. Əgmâya daɣ nəttulab-nak a daɣ-as t-əkkəsan, mišan indar-asan» ¹⁹ Inn-asan ʔaysa: «Xa! Iket iba n əzəgzan daɣ aytedan n azzaman a! Awak har əmmay əddewa dər-wan, zizaydar dər-wan? Awəyat-i-du barar.» ²⁰ Təzzar ewayan-as-t-id. Da da ɣas ad inay aggəsuf ʔaysa, ənta ad izazzakarkar barar, ifataqqat, ad itizəbərdil, isakafkaf. ²¹ Issəstan ʔaysa abba ən barar, inn-as: «Əmmay du-t-igaz awa šin agaraw?» Inn-as: «Harwa mədrəy. ²² Əyyəwan-tu aggəsuf təməgirt daɣ təmsay madəɣ aman y ad t-anɣu. Kud təfrâgəɣ a təkneɣ daɣ awa, təhənəttəɣ-ana, tilalaɣ-ana.» ²³ Inn-as ʔaysa: «Kud təfrâga ya? Arat kul əfragəɣ igi-net i wa sər-i izzəgzanan.» ²⁴ Idkal abba ən barar əməsli-net daɣ tamazayt ten da, inna: «Əzzigzanaɣ, agəz-i daɣ iba n əzəgzan.» ²⁵ As inay ʔaysa uzzal ən tamattay iggâd-du sər-əs, iharaššat aggəsuf, inn-as: «Aljayn wa igaddalan awal, izamazag, omaraq-qay s ad təgməda barar di; amaran a tu-wər-tələsaɣ iguz!» ²⁶ Izyak aggəsuf, iga i barar en əzəzzəkərkər labasan, amaran igmad-tu. Wər iha adag barar en itimətəkwəyan, zun t-aba, har ənnan aytedan aggotnen: «Aba-tu.» ²⁷ Mišan ibaz-t-id ʔaysa s əfus, issənkar-t-id, ibdad barar. ²⁸ As iggaz ʔaysa ehan iyyan, əssəstanan-tu nəttulab-net wər iqqim awedan waliyyan, ənnan-as: «Aljayn wa n ihogan, mafel indâr-anəɣ ikus-net daɣ barar en?» ²⁹ Inn-asan: «Əzzənəf n aggəsuf wen, wər t-itəkkəs ar šiwatriwen.»

Ətəməl wa n əššin n alyazab wa z'inəy Əlməsix ən Məššina

³⁰ Igmad ʔaysa edag wen ənta əd nəttulab-net, ərzagan akal ən Galilaya, mišan wər ira ad issən awedan waliyyan dad illa, ³¹ fəlas əsəssəɣri a itag inəttulab-net. Igann-asan: «Nak Ag Aggadəm əjwâra ad əggâzaɣ ifassan n aytedan, agin iman-in, mišan karad adan dəffər iba-nin, a d-ənkəra daɣ tēmattant.» ³² Mišan wər əgren nəttulab-net batu ta dasan-iga den, amaran tah-en tasa n əsəstan-net.

Adkul wa n tidət

³³ Ewad-in ʔaysa ənta əd nəttulab-net aɣrəm ən Kafarnahum. Əggazan-in ehan ɣas issəstan-tan, inn-asan: «Ma təmməzaɣam daɣ tarrayt?» ³⁴ Wər das-ənnen arat, fəlas tamazaq a əgan gər-essan daɣ tarrayt, ərân ad əssənən wa daɣ-san ogaran. ³⁵ Iqqim ʔaysa, inna i nəttulab-net win maraw d əššin a t-id-ihazan, inn-asan: «Wa daɣ-wan iran tizart, iwâr-tu ad agu iman-net daw aytedan kul, aget iman-net akli-nasan.» ³⁶ Ibaz-du ʔaysa əfus n arat ən barar iyyan ilân den, issəbdad-tu gar-essan, ibaz-t-id izalammat-tu, inn-asan: ³⁷ «I iqbalan barar šilan wa fəl əddəlil-in, wədi nak

iman-nin as di-iqbal; wa di-iqbalan deḡ, werge nak a iqbal, wa di-d-izammazalan a iqbal.»

I wər nəgəmməy təkma-nana, wədi əmidi-nana a imos

³⁸ Inn-as Yaxya: «Əşşex, nənây aləs iyyan itakkasan kələsuf daḡ aytedan s esəm-nak, nənn-as a wər iləs igi n awen, fəlas wər danax-ihā əs ləkkum y-ak.» ³⁹ Inn-as Үaysa: «A das-wər-təgdəlam igi n adi, fəlas wər t-illa awedan as z'agin təlməxjujat s esəm-in, annu sər-i a labasan dəffər adi. ⁴⁰ I wər nəgəmməy təkma-nana, wədi əmidi-nana. ⁴¹ Amaran əggəyyeḡ silakanax-awan as, i kawan-işşəşwan wala ablu n aman fəlas a kawan-iwar esəm n Əlməsix, wədi illikan as ad igrəw arozan-net.»

Ləkkum i Үaysa Əlməsix

⁴² «I iqqalan əssəbab n abakkad y iyyan daḡ aytedan win sər-i əzzəgzannen, əmosnen zun bararan madrornen, wədi of-as ad itəwəqqən əzəzəd zəwwəran ən təhənt daḡ iri-net itəwəgər-in daḡ agaraw əmazal wa iga əddi. ⁴³⁻⁴⁴ Kud kay əfus-nak a ibukan a dak-iqqəl əssəbab n igi n abakkad, təfrəsaq-q-in; id of-ak ad təggəza aljannat təgeḡ əfus, y ad təleḡ əşşin fassan təggəzaḡ təmsay an Jahannama. ⁴⁵⁻⁴⁶ Kud deḡ adar-nak a ibukan a dak-iqqəl əssəbab n igi n abakkad, təfrəsaq-q-in; id of-ak ad təggəzaḡ aljannat təgeḡ adar y ad təleḡ əşşin daran təggəzaḡ təmsay an Jahannama. ⁴⁷ Amaran kud şat-nak a təkukat a dak-təqqəl əssəbab n igi n abakkad, təkəkkəreq-qat-du; id of-ak ad təggəza Taḡmar ta n Məşşina təgeḡ şat y ad təleḡ sanatat şittawen, tətəwəgəra dər-əsnat daḡ təmsay an Jahannama, ⁴⁸ təmosat edag as wərmad tamattatnat təwəkkawen-net, wala deḡ təmsay-net.»

⁴⁹ «Awedan kul ad itəwəzəzdəḡ əs təmsay, zun d əmmək as tətəggaz təsəmt imensewan fəl a tan-təggəz tenbay. ⁵⁰ Təsəmt arat olāḡan a təmos, mişan as tat-təgmad tenbay-net, awak ma imos arat wa daḡ-as z'itəwəggin təqqəl-tat-du? Təqqəlet təməddurt-nawan a ilān tenbay zun təsəmt, amaran iməlet alxer gar-ewwan.»

10

Isalan n əməzzəy

¹ Ifal Үaysa edag wen ikka akal ən Yahudəyya ihān aganna wa hadan n agarew wa n Yordan. Təlas fall-as tamattay tiddawt, a tat-isasayru imos awen arat itaggu faw da. ² Əhozan-t-in Fərisaytan əgan-as əsəstan imosan tənəgməyt, ənnan-as: «Awak xalal y aləs ad izəmməzzəy tantut-net meḡ wər xalal?» ³ Inn-asan Үaysa: «Mas imos alwajib wa dawan-d-oyya Ənnəbi Musa daḡ batu tədi?» ⁴ Ənnan-as: «Ənnəbi Musa ikfā turagat n ad tətəwəktəb şirawt n əməzzəy i təntut, tətəwəzəməzzəy.» ⁵ Inn-asan Үaysa: «Aşşaddat ən taggarmamt ən wallan-nawan a fəl dawan-d-oyya Musa alwajib wədi. ⁶ Dər iga awen da ya,

əs tizarat as d-ixlak Məşşina əddənet,
"ixlak-du aytedan,
ixlak-kan-du əmosan yay əd təntay."

⁷ Adi da a fəl iffəl aləs
abba-net d anna-net,
irtəy əd təntut-net,

⁸ əqqələn fəl əşşinissan arat iyyanda.

Əmmək en daḡ as
ad ib-as əmosan əşşin aytedan,
kalar ad əqqalan taḡəssa iyyadda.

⁹ Daḡ adi, awa issərtay Məşşina a tu-wər-izəmməzzəy awedan.»

¹⁰ As iggaz Ƴaysa ehan, əssəstanan-tu nəttulab-net əntanay da əd batu ten. ¹¹ Inn-asan: «I izammazzayan tantut-net, izlaf iyyat, wədi əzzəna a iga əddi. ¹² Tantut dey ta təmməzzayat d aləs-net, izlaf-tat iyyan, ənta da əzzəna a təga di.»

Bararan əd Taymar ta n Məşşina

¹³ A du-tawayan aytedan bararan əs Ƴaysa fəl a tan-issəwər ifassan-net ittər-asan, mişan əşşewalan nəttulab fəl aytedan win den. ¹⁴ Inay Ƴaysa awen Ƴas išşak-ku, inn-asan: «Ayyiwat bararan a di-d-akkin. A tan-in-wər-təwəxam fall-i, fəlas Taymar ta n Məşşina şin aytedan win şilaten-nasan. ¹⁵ Əggəyyey əsilakanax-awan as, i wər nəga i Taymar ta n Məşşina əlqəbulat şilat ən ta das-iga barar, wədi wər das-ilkem a tat-iggaz.» ¹⁶ Təzzar ad itizələmmit Ƴaysa bararan win den, isawar-tan ifassan-net, itattar-asan.

Aləs n əməgğergəs əd Taymar ta n Məşşina

¹⁷ As zama imitakway Ƴaysa daƳ adag wen iraz-du sər-əs aləs iyyan sər-əs d-ozâlan, igaraffat dat-əs, inn-as: «Əşşex olâxan, mas di-iwar igi-net y ad əgrəwa təməddurt ta təxlalat?» ¹⁸ Inn-as Ƴaysa: «Mafel as di-təgannaƳ Əşşex olaƳan? Wər t-illa i olâxan ar Məşşina. ¹⁹ Alwajiban-net təssânaq-qan, ih-en as: "Ad wər tagaƳ iman, ad wər tagaƳ əzzəna, ad wər takəra, ad wər taggəyyey əs bahu, ad wər taga təkma y awedan, səxmər abba-nak d anna-nak."» ²⁰ Inn-as aləs wen: «Əlfəqqi, aratan win di kul harwa da mədrəya as tan-əssəbdada.» ²¹ Təzzar idak-ku Ƴaysa s asawad təha tara, inn-as: «Arat iyyanda a dak-in-iqqiman əmərədda: Aglu zanz-in təla-nak kul, takfaƳ inazzan-net i tələqqawen, ad təgrəwaƳ ərrəzəƳ a dak-z-ansin daƳ alaxirat. Dəffər adi amaran tagla-du təkəmaƳ-i.» ²² Isla aləs en i batu ten Ƴas, izakkanzar. Inkar, igla əxşâdan man-net fəlas ərrəzəƳ aggen a ila.

²³ Issəlal Ƴaysa asawad-net tamattay ta tu-təxalayxalayət den, amaran inna i nəttulab-net: «Iket əzzəwi ig-ay iguz ən Taymar ta n Məşşina fəl win əggərgasnen.» ²⁴ Batu ten, təqqan iƳafawan ən nəttulab-net, ilas Ƴaysa inn-asan: «Bararan-in, iket əzzəwi ig-ay iguz ən Taymar ta n Məşşina! ²⁵ Ogar tərƳasay ta iga fəl aƳam aradaƳ daƳ təbuday n ənazmay, i ta iga fəl əməgğergəs iguz ən Taymar ta n Məşşina.» ²⁶ Batu ta təsammaklal wəllen əs nəttulab, təzzar ad tinəmənnin: «Adi za ma ifragan ad ixləs daƳ təmsay?» ²⁷ Iswad daƳ-san Ƴaysa inna: «Muxal a imos adi Ƴur aytedan, mişan Məşşina wər sər-əs t-imos, fəlas arat kul ifrâk-ku.»

Alak wa z'igrəw ənalkim ən Ƴaysa

²⁸ Təzzar inn-as Butros: «Nakkanay za? Awak wərgəƳ noyya arat kul nəlkam-ak?» ²⁹ Inn-asan Ƴaysa: «Əggəyyey silakanax-awan as, awedan kul wa ifalan fəl əddəlil-in d əddəlil n Əlinjil ehan-net madəƳ imədrayan-net madəƳ şimədrayen-net madəƳ anna-net madəƳ abba-net madəƳ bararan-net madəƳ şiwəgas-net, ³⁰ wədi awedan ad igrəw harwa da əmərədda, temeday n ənətfus ən nan madəƳ imədrayan madəƳ şimədrayen madəƳ annaten madəƳ bararan madəƳ şiwəgas. Amaran adi ketnet ad t-igrəw iddew-as d aƳazab, igrəw dey təməddurt təxlalat daƳ alaxirat. ³¹ Amaran a aggen daƳ win əhanen eƳaf əmərədda, ilkâm ad əggəzan ələqqam, win əhanen ələqqam dey əmərədda, ilkâm a əggəzan eƳaf.»

Ətəməl wa n karad n aƳazab wa z'inəy Əlməsix

³² Iha Ƴaysa tarrayt ənta əd nəttulab-net, azzar-asan, taggəzzayan əs Yerusalam. As itaggu awen əşşiwaşan nəttulab-net, taha dey tasa aytedan win das-əlkammen. Ilas Ƴaysa ikus ən nəttulab-net win maraw d əşşin daƳ aytedan y a dasan-iməl arat a fall-as z'agin daƳ alwaq wər nəggug. ³³ Inn-asan: «Səsəmat: Nakkanay da əggəzzaynen əs Yerusalam da. Den da ad za təwəgga nak Ag Aggadəm daƳ fassan ən muzaran

ən limaman, əd musanan n Ǝttawret. Aytedan win a di-əxkəman təmattant, agin-i daɣ fassan n aytedan wər nəmos Kəl-Ǝlyəhud, ³⁴ a daɣ-i tajaban, əssutəfan fall-i, ayyawanan-i šiwwit, agin iman-in, mišan a d-ənkəra daɣ təmattant əzəl wa n karad.»

Ǝsəssəyri igân daɣ batu ən tizart

³⁵ Ǝnkaran nəttulab əššin win maddanəs ən Zabaday əmosnen Yaɣub əd Yaxya, əhozan-du Ǝaysa, ənnan-as: «Ǝššex, a daɣ-ak nəgməy arat as nəra a danaq-qu-taga.»

³⁶ Inn-asan: «Mas təräm a dawan-t-aga?» ³⁷ Ǝnnan-as: «Nəra daɣ-ak ad aqqam iyyan daɣ-na daɣ əxil-nak, aqqam wa hadan daɣ zalgat-nak alwaq wad za təggəza tanayana-k.» ³⁸ Inn-asan Ǝaysa: «Wər təssenam almayna n arat wa təgmayam əddi. Awak təfragam a dər-i tədrəwam alɣazab wa z'aga daɣ alwaq wər nəggug?» ³⁹ Ǝnnan-as:

«Awalla, nəfrâg a dər-ək tu-nədrəw.» Inn-asan: «Tidət a imos as təfrâgam a dər-i tədrəwam alɣazab wa, tagim deɣ təmattant ta z'aga. ⁴⁰ Amaran daɣ batu ta təqqalat wa z'aqqamin daɣ əxil-in wala zalgat-in, wərgəɣ nak a t-ihakkin. Kalar idaggan win in win as tawasammatagan.»

⁴¹ Ǝslan maraw nəttulab win hadatnen y awen, əššakkan Yaɣub əd Yaxya. ⁴² Təzzar iyr-en-du Ǝaysa inn-asan ketnasan: «Təssânam as aytedan win tawattafnen daɣ tišit ən muzaran ən təmattiwen saknin tarna y aytedan win as azzaran, amaran aytedan win daɣ-san attafnen əlxəkum saknin aytedan win as azzaran taɣmar. ⁴³ Mišan kawanay ad wər tagim adi gar-ewwan. Kalar as ira iyyan daɣ-wan ad ilu almaqam, wədi iqqəlet zun amašşaxal-nawan. ⁴⁴ Amaran wa daɣ-wan iran tizart, wədi iqqəlet zun akli n awedan kul, ⁴⁵ fəlas nak Ag Aggadəm wər d-oseɣ əddənet y a di-əšxəlan aytedan. Kalar assa a d-əge y ad əšxəla y aytedan, akfa iman-nin fəl ad səddərfəɣ əs təmattant-in aytedan aggotnen daɣ bakkadan-nasan.»

Ǝzuzəy wa iga Ǝaysa Bartimay

⁴⁶ Iglə Ǝaysa əd nəttulab-net har din-ewadan aɣrəm wa n Yerikaw. As iggaz Ǝaysa šin agamad n əɣrəm wen ənta əd nəttulab-net əd tamattay tagget, ill-ay əməddərxəl iyyan igân esəm Bartimay ag Timay iqqiman fəl afay ən tarrayt itansay.

⁴⁷ Da da ɣas ad isla as Ǝaysa wa n əɣrəm ən Nazaret awen, ənta ad idkal əməsli-net ad igannu: «Ya Ǝaysa, Ag ənnəbi Dawəd, hənəttət-i.» ⁴⁸ Ǝrɣaman-as aytedan aggotnen y ad affastu, mišan isahhakat əməsli-net wəllen, igannu: «Ya Ǝaysa, Ag Dawəd, hənəttət-i.» ⁴⁹ Izzəkkat Ǝaysa, inna: «Aɣriwat-i-t-id». Itawayra əməddərxəl,

itawann-as: «Dawat, təbdəda, iɣarr-ik.» ⁵⁰ Igar-in əməddərxəl asalsaw-net wa n afalla, iggad, innəmad Ǝaysa. ⁵¹ Issəstan-tu Ǝaysa inn-as: «Mas tareɣ a dak-k-aga?» Inn-as əməddərxəl: «Ǝššex, a əreɣ a di-d-iqqəl asawad-in.» ⁵² Təzzar inn-as Ǝaysa:

«Aglu, izzozay-kay əzəgzan-nak sər-i.» Iqqəl-t-id asawad-net daɣ tamazayt ten da, obaz tarrayt, iggaz tamattay ta təlkatat i Ǝaysa.

Igitan ən Ǝaysa daɣ əɣrəm ən Yerusalām əd xələyɣələyan-net

11

Igi ən Ǝaysa i Yerusalām iguz n əmənokəl

¹ As din-ihoz Ǝaysa Yerusalām ənta əd nəttulab-net, daɣ ənəmihaz ən təɣrəmt ta n Betfajay əd ta n Betanəy, dəgma n ədɣax was itawannu wa n "Eškan ən Zaytun"; izammazal əššin daɣ nəttulab-net. ² Inn-asan: «Akkiwat taɣrəmt ten dat-wan den. Təggâzam-tat-in ɣas tənâyam əhulel n əzdan iqqanan, as wər kala ad ittəwan. Ariwat-tu, təlwəyam-t-idu. ³ Amaran as dawan-inna awedan: "Ma tətəggim əddi?" Tannim-as: "Ǝməli a sər-əs iddəraran." Amaran a t-id-issuxəl tarmad.» ⁴ Ǝglan nəttulab win den osan-in əhulel iqqân fəl tarrayt dat əmi n ahan iyyan; a tu-tarin.

⁵ Təzzar ənnan-asan aytedan əllânen den: «Ma tətəggim əddi? Mas tətərim əhulel di?» ⁶ Əjjəwwaban-asan nəttulab s awa dasan-inna Ƴaysa. Amaran tawayyan, oran əhulel, əglan dər-əs.

⁷ Əlwayan-t-id i Ƴaysa. Ədfaran-as fall-as isəlsa-nasan, iwan-tu. ⁸ Ad tissəwan aytedan aggotnen i Ƴaysa isəlsa-nasan daƳ tarrayt, wiyyad Ƴattasan-du ilədlad wər əhen şənnanan tissəwan-as-tan. ⁹ Aytedan win das-azzarnen əd win das-əlkammen, ketnasan siƳaren, gannin:

«Ozana! Təmmal i Məşşina!

Iga Məşşina albaraka

daƳ wa d-osan s esəm n Əməli.

¹⁰ Iga Məşşina albaraka

daƳ taƳmar ta du-təzayat,

taƳmar n amaraw-nana Dawəd.

Ozana! Təmmal i Məşşina

daƳ jənnawan di ədkalnen!»

¹¹ Iggaz Ƴaysa aƳrəm ən Yerusalām, ikka Ehan wa Zəwwəran n ƏlƳibada, izaggazda arat kul wa daƳ-as itaggin. As iga awen da idgâz-t-id ahad, igmad aƳrəm ənta əd nəttulab-net win maraw d əşşin, əkkan Betanəy.

Ƴaysa ilyan aşək iyyan as itawannu fig

¹² As əzəl wa hadan, igmâd-du Ƴaysa əd nəttulab-net Betanəy, as ifray i gələk.

¹³ Ogga daƳ igəg aşək ən fig inzâran. Ikk-ay y ad issən erâw. As t-in-osa, wər t-iha ar ifərkak fəlas tamert n ara-net a wər nəga. ¹⁴ Təzzar işşewal Ƴaysa s aşək wen, inna: «TəƳrədət əddənet wər iles awedan tettay n ara-nak.» Arat wa inna Ƴaysa den sallan-as nəttulab-net.

AsataƳ ən Ƴaysa kəl jola daƳ Ahan wa Zəwwəran n ƏlƳibada

¹⁵ As d-ewad Ƴaysa əd nəttulab-net Yerusalām, iggaz aƳalla wa iƳlayan Ehan wa Zəwwəran n ƏlƳibada a daƳ-as isattay imassatagan əd mazanzan; isabbanbay tebərən şin fəl sansin kəl sanji izərfan-nasan, isabbanbay deƳ şisəqqima ən massatagan ən tədəbren. ¹⁶ Təzzar igdal y awedan waliyyan ad irzəg Ehan wa Zəwwəran n ƏlƳibada ewây arat. ¹⁷ Inna y aytedan daƳ əsəssəƳri wa tan-itaggu: «WərgəƳ iktâb as, inna Məşşina: "Ehan-in, a das-itəwəggu esəm ehan n əlƳibada i tawşeten kul". Kawanay amaran təgâm-tu "əsəlyəs ən baydagan".»

¹⁸ Əslan muzaran ən limaman əd musanan n Əttawret y awen Ƴas, ad gammayan təməwit tas z'agin iman ən Ƴaysa, mişan tah-en tasa-net fəlas tamattay ketnet a təsannahalat təggəma n əsəssəƳri-net. ¹⁹ As d-ihoz ahad, igmad Ƴaysa əd nəttulab-net aƳrəm.

TaƳart ən fig d əzəgzan əd təwatriwen

²⁰ As affaw əzəl wa hadan, iha Ƴaysa əd nəttulab-net tarrayt ən Yerusalām as d-əllaman dəgma n aşək ən fig wanâd, ənayan-tu iqqur ketnet harkid kewan-net.

²¹ Ikta-du Butros aşək wen, inna i Ƴaysa: «Əşşex, ənak fig wa təlyana, ketnet iqqur.»

²² Təzzar inn-asan Ƴaysa: «Zəgzənat əs Məşşina. ²³ ƏggiyyeƳ əsilakanay-awan as, i innan y ədƳay en: "Əgməd edag di təfətəqqe daƳ agarew", amaran as inna awen wər iga aşşak daƳ əwəl-net, izzigzan as awa inna da ad agu; awedan wədi a das-agu Məşşina awa daƳ-as igmay əddi. ²⁴ DaƳ adi, əmalay-awan as: arat kul wa tonsayam Məşşina daƳ təwatriwen-nawan, wədi zəgzənat as təgrâwam-tu, əddi a dawan-t-akfu Məşşina.»

²⁵ «Amaran as tətattaram, kud ill-ay arat a iqqal wər noley tətâtəfam daƳ man y awedan, təssurəfam-as təzzar, əddi Abba-nawan wa ihan i jənnawan ənta da a

dawan-issurəf ark mazalan-nawan. ²⁶ [Mišan as wər tössurufam y aytedan, wədi wər dawan-z-issurəf Abba-nawan wa ihan ijənnawan ark mazalan-nawan.】

Ma ikfan ʔaysa turagat ta ila

²⁷ Ilas-du ʔaysa ənta əd nəttulab-net tewaxlay n əxrəm ən Yerusalem. Isaxlay ʔaysa daɣ Ahan wa Zəwwəran n Əlxibada as t-id-osan muzaran ən limaman, osan-t-id deɣ musanan n Ettawret əd muzaran ən Kəl-Əlyəhud, ²⁸ ənnan-as: «Awak ma təmos tarna tas tətaggax aratan win? Ma kay-ikfan tarna n igi-nasan?» ²⁹ Inn-asan ʔaysa: «A dawan-agax əsəstan iyyanda. As di-təjjəwwabam, a dawan-əməla wa di-ikfan tarna n igi n aratan win tagga da. ³⁰ Əməlat-i, awak əsəlməx wa iga Yaxya aytedan daɣ aman Məššina a xur d-ifal awen meɣ aggadəm?» ³¹ Təzzar ad tinəməšəwwiran gər-essan, gannin: «As das-nənnan: "Məššina a d-ifal" a danax-annu: "Mafel za wər təzzəgzanam s awa dawan-inna Yaxya?" ³² Wər das-za-nannu za: "Aggadəm".» Wər əhelan tənna n awen fəlas tamattay ketnet tətəf as, Yaxya ənnəbi a imos. ³³ Təzzar ənnan i ʔaysa: «Wər nəssen». Inn-asan ʔaysa: «Daɣ adi nak da wər dawan-z-əməla wa di-ikfan tarna n igi n aratan win.»

12

Əlmital wa n magyakan n alyanab

¹ İššewal-asan ʔaysa daɣ əlmitalan, inn-asan: «Aləs iyyan a inbalan eškan n əzzəbib, issəɣlay-tan afarag. İxaz daɣ-as tagdayt ta daɣ za itawazmu əzzəbib, ikras deɣ ogga ihokken as z'iggar awedan wa itagazan afarag. Təzzar issəɣfar afarag-net en i magyakan wiyyad, iššokal. ² As du-tewad tamert ta n əmiləy n əzzəbib, izammazal iyyan daɣ eklan-net əs meddan win xur-əs əxfarnen afarag-net y a xur-san d-awəy adagar-net. ³ As tan-in-osa əkli en, əbazan-tu, əgan-as šiwwit, əsoɣalan-tu məššis isikarayray ifassan. ⁴ Izammazal sər-san iyyan akli. As tan-in-osa, sabbasan eɣaf-net, əgan-as tar šəxšad. ⁵ Ilas məššis n afarag izammazal sər-san akli-net iyyan. As tan-in-osa, əbazan-tu, ənɣan-tu kərəz. Dəffər adi izammazal sər-san daɣ tanamazray wiyyad eklan-net aggotnen. Wiyyad za əggatan-tan har tan-əksanan, wiyyad ənɣan-tan kərəz. ⁶ Ab'as d-iqqim i məššis n afarag ar barar-net wa ikna tara. Izammazal-tu sər-san daɣ tilkamat, fəlas a inna daɣ man-net: "Immikkan as ad əssəxməran barar-in." ⁷ Mišan as ənayan magyakan win əxfarnen afarag barar wen, namannan gar-essan: "Ənta əddi amakkasu n afarag. Əndawat a tu-nanxu kərəz, ad nəkkusət afarag." ⁸ Təzzar əbazan-tu, ənɣan-tu kərəz. Əgaran-in tafəkka-net sədi y afarag.»

⁹ «Daɣ adi ma z'agu məššis n afarag wen? Wərgəy assa a du-z-agu ənta iman-net, agu iman ən magyakan win, issəɣfər afarag-net i wiyyad aytedan? ¹⁰ Awak teɣaray a wər təgem daɣ Əlkəttaban as: "Təhunt ta din-əgaran makrasan, ənta a təqqalat təhunt ta təkbalat ehan, ¹¹ arat wen Əməli a d-ifal, amaran isimaklal sər-na!"»

¹² Ad gammayan muzaran win den əmmək was za sətərməsan ʔaysa fəlas əgrân as əntanay a issoka s əlmital wen; mišan ya wər əhelan awen fəlas tamattay a əksudan. Adi fəl t-oyyan, əglan.

Tənaɣmayt daɣ batu n amana

¹³ Dəffər awen əssokan-t-id arat daɣ Farisaytan d aytedan wiyyad əwarnen aganna n əmənokəl Herod fəl a das-agin tənaɣmayt, s a tu-sassannin arat fəl t-əbazan. ¹⁴ Osan-t-id ənnan-as: «Əššəx, nəssân as əməggi ən tidət a təmosa, amaran wər t-illa i təksuda daɣ awa təganna, fəlas wər təzləya daɣ almaqam n aytedan. Təsasaxra əs tidət awas dana-iwar igi-net daɣ tarrayt ta n Məššina. A kay-nəssəstən, awak xalal arazam n amana y əmənokəl wa zəwwəran Qaysara meɣ wər xalal? A tu-nərzəm, meɣ wər tu-za-nərzəm?» ¹⁵ Inn-asan ʔaysa igrân təlmənufəqa-nasan:

«Mafel tətajarrabam-i? Akfiwat-i-du tefelt n əzrəf a tat-ənəya.» ¹⁶ Əkfan-as-tat-in, təzzar inn-asan: «Ma ilan udəm d esəm win tat-əwarnen?» Ənnan-as: «In Qaysara.» ¹⁷ Inn-asan: «Adi za agiwat i Qaysara awa kawan-issəwar, tagim deş i Məşşina awa kawan-issəwar.» Isammaklal sər-san aljawab wa tan-ikfa Үaysa da.

Isalan əgânen daş batu ən tanakra daş təmattant

¹⁸ Dəffər awen osan-du Sadusaytan Үaysa, əmosnen aytedan əttâfnen as wər tu-təlla tanakra dəffər təmattant. Əssəstanan-tu, ənnan-as: ¹⁹ «Əşşex, ənnəbi Musa iktâb as: "As aba aləs oyya-du tantut dər wər ila barar, ilzâm amadray-net a tat-izləf fəl ad agu əzzurrəyya y əmidi-net wa aba den."»

²⁰ Ənta kala a t-əllan əssa mədrayan. Izlaf wa dasan-waşşaran ketnasan, aba-tu wər d-oyya a imosan barar. ²¹ Izlaf wa n əşşin təntut ta şur aba əmidi-net den. Ənta da aba-tu wər d-oyya ara. Iga wa n karad awen da. ²² Əssa mədrayan win, ketnasan əgan awen da, wər tan-iha i d-oyyan ara. Dəffər as tan-aba ketnasan, aba tantut ten ənta da. ²³ Awak əzəl wa n tabadday, ma imos daş əssa mədrayan win den was za təqqəl təntut ten taşurəs, dad zamas ketnasan əzlâfan-tat?»

²⁴ Inn-asan Үaysa: «Kawanay alxata a təttafam, fəlas wərmad təssanam awa ənnan Əlkəttaban, wala deş təssanam awa dər togda tarna ən Məşşina, ²⁵ fəlas əzəl wa n tabadday, wər t-illa azalaf i meddan wala şidoden. Kalar təməddurt a z'agin şilat ən ta əgan angalosan daş jənnawan. ²⁶ Amaran daş batu ta təqqalat inəmməttan əd tanakra-nasan: awak təşaray a wər təgem daş Əttawret awa inna Məşşina y ənnəbi Musa şur ənəfilal wa das-iga şur təfsəq. Wərgəş a das-inna Məşşina: "Nak a imosan Əməli n İbrahim, d İsəhaq, əd Yaqub?"»

²⁷ Məşşina wər imos Əməli ən təməxxa, kalar Əməli ən win əddarnen a imos. Daş adi alxata zəwwəran a təham.»

Tamazaq təgât daş batu n alwajib wa ogaran

²⁸ İhoz-du iyyan daş musanan n Əttawret issisaman y əməşiwal wa iga Үaysa da əd Sadusaytan, d aljawab oggâm wa dasan-iga Үaysa, inna i Үaysa: «Ma imos alwajib wa ogaran daş alwajiban kul win danaş-ikfa Məşşina?» ²⁹ Inn-as Үaysa: «Ənta da alwajib wa ogaran: "Səsəmat Kəl-İsrayil! Əməli-nana Məşşina, ənta şas Əməli. ³⁰ Iru Əməli-nak Məşşina s əwəl iyyanda əd man ərdânen. Tireq-qu s awa təleş kul daş tayttay əd təşurad."» ³¹ «Amaran alwajib wa ilkaman i wədi as: "Agu y əşəqqaqş-nak tara ta təgeş iman-nak."»

³² Təzzar inna əmusan n Əttawret wen i Үaysa: «Tidət-nak Əşşex! Məşşina iyyanda, amaran wər t-illa iyyan ar ənta. ³³ Amaran as t-ira awedan s əwəl iyyanda, ir-ay deş s awa ila kul daş tayttay əd təşurad, ira deş əşəqqaqş-net s əmmək was ira iman-net, wər tu-təlla takutay tətirəkəmmet wala takutay iyyat wər oger adi.»

³⁴ Da daş ad isla Үaysa i batu təgât s əgərri ta iga aləs a ənta a das-inna: «Kay, wər kay-iggug iguz ən Taşmar ta n Məşşina.» Ab'as t-illa i ihalan əsəstan ən Үaysa.

Isalan əqqalnen Əlməsix d ənnəbi Dawəd

³⁵ Isasayru Үaysa daş Ahan wa Zəwwəran n Əlyibada as iga əsəstan wa, inna: «Awak wərgəş a gannin musanan n Əttawret, Əlməsix Ag əmənokal ənnəbi Dawəd a imos? ³⁶ Dawəd za iman-net as t-isassanna İnfəs wa Zəddigan daş batu n Əlməsix: "Əməli Məşşina inna y Əməli-nin: Qamu daş əşil-in, har əşrədaş əsərəs ən zəngə-nak, agaş-qan daw daran-nak."»

³⁷ Dawəd iman-net as iyra Əlməsix s esəm wa n Əməli, daş adi manəmmək as z'iqqəl barar-net?» Batu ta iga Үaysa da, toggam-tat tamattay tagget ta das-təssəsəmat.

Tarşəmt ən Үaysa fəl ləkkum i musanan n Əttawret

³⁸ Inna Ƴaysa i tamattay daɣ əsəssəxri wa tat-itaggu den: «Agəzat iman-nawan daɣ musanan n Əttawret. Ərân ad saɣlayan əzlâgan šikadkaden zagrotnen, d ətəwəsəslam igân əs saɣmar daɣ sammanayan n aytedan. ³⁹ Ərân deɣ təximit daɣ daggan win əlanen almaqam daɣ nan win əlɣibada ən Kəl-Əlyəhud d iguz ən daggan n aytedan win tawasaymarnen daɣ məgura. ⁴⁰ Taɣan awa əlanat tədoden šin as wər ədderan meddan-nasnət, taggin deɣ imaddan zagrotnen wər nəmos ar sokni. Ilkâm a dasan-itəwəxkəm attadib labasan.»

Takutay ta tolayət

⁴¹ Iqqîm Ƴaysa daɣ Ahan wa Zəwwəran n Əlɣibada, illa dat-əs əssənduq wa daɣ itiddaw ərrəzəɣ n Ahan wa Zəwwəran n Əlɣibada, iswâd daɣ tamattay tətəggu daɣ-as azrəf. Sartakan daɣ-as məggərgas aggotnen azrəf aggen. ⁴² Tosa-du təntut ən tələqqay as wər idder aləs-net, təssertak daɣ-as sanatat təfelen as wər tewed əlqimat-nasnət ərrəyal. ⁴³ Təzzar iɣra-du Ƴaysa inəttulab-net əs man-net inn-asan: «Əggiyyeɣ silakanax-awan as, təntut ən tələqqay ta, əs wər idder aləs-net, togar aytedan a ketnasan tehakkay, ⁴⁴ fəlas ketnasan azrəf was wər əddəran a daɣ əkfən, mišan ənta harkid əlləqqu-net təkəl-du ərrəyalan s əntanay ɣas a fəl təssən, təkfen.»

13

Əsəssəxri igâ Ƴaysa inəttulab-net

Əsəssəxri igâ Ƴaysa daɣ batu n əbərəjji n Ahan wa Zəwwəran n Əlɣibada

¹ Igammad Ƴaysa Ehan wa Zəwwəran n Əlɣibada as das-inna iyyan daɣ nəttulab-net: «Əššex, ənak šihussay ən təhun šin as ikras ahan a! Šihussay n ahan!» ² Inn-as Ƴaysa: «Təhannayax ehan a zəwwəran a? Wər daɣ-as du-za-taqqam təhənt təwârat təmidit-net. Ketnet ad itəwəjəbbərejjet.» ³ Dəffər awen, iqqîm Ƴaysa fəl ədɣax wa n Eškan ən Zaytun, daɣ tənəmiwəla n Ahan wa Zəwwəran n Əlɣibada, as t-issəstan Butros əd Yaqub əd Yaxya d Andrawəs, wər əqqiman nəttulab win hadatnen, ənnan-as: ⁴ «Əməl-anax əmmay ad z'agu arət wa tənneɣ ihogan? Ma za təqqəl alɣalamat ta za tassaknit as ibuk y igi?»

Əsəssəxri igâ Ƴaysa daɣ batu n əzəl wa ilkaman

⁵ Inn-asan Ƴaysa: «Ənkədat, a kawan-wər-issəxrək awedan waliyyan, ⁶ fəlas aytedan aggotnen a du-z-asinen əttafan esəm-in, akkiyyan daɣ-san igannu imos Əlməsix, əssəxrəkən s awen aytedan aggotnen. ⁷ Amaran as təslam i tərnuq ən məgiran, əd salan ən məgiran, a kawan-wər-issərməɣ awen. Aratan di kundaba osan-du, mišan wərgəɣ əntanay a əmosnen təzərəst n əddənət. ⁸ Ad əknəsnat addawlaten gar-essanat, əknəsnat taymaren gar-essanat, əməlan-tu nəgəynəgəyan n amaɖal daɣ daggan aggotnen əd laz labâsan. Mišan aratan win kul, wər əmosan ar ənətti ən təlawayt təhât əlmital ən ta du-tətizarat əs təntut tətəggazat amzur.»

⁹ «Kawanay amaran ənkədat əd man-nawan. Ad tattarmasam, tətəwəsəbdədam dat saggawaran n əššəriɣa, təwəgginat-awan təwit daɣ nan n əlɣibada ən Kəl-Əlyəhud. Ad tətəwəsəbdədam dat naxkiman əd mənokalan fəlas kawan-iwar esəm-in, akf-iwan adi tarrayt n a fall-i taggayyem, ¹⁰ fəlas tawšeten kul n əddənət kundaba əslenat i salan n Əlinjil. ¹¹ As tətərmasam, tətəwasəbdədam daɣ adag n əššəriɣa, a kawan-wər-iššəwəš awa za tannim. Agat ɣas batu ta kawan za tətəwakfit daɣ assaxat tədi da, fəlas wərgəɣ kawanay iman-nawan a tat-igan; kalar Infas wa Zəddigan a tat-z-agin daɣ mawan-nawan. ¹² Ad səttərməsən aytedan imədrayan-nasan səssugin iman-nasan, səttərməsən abbatan bararan-nasan səssugin iman-nasan, affallagan bararan fəl marwan-nasan səssugin iman-nasan. ¹³ Awedan kul a kawan-igzər fəlas kawan-iwar esəm-in, mišan wa daɣ-wan izmaran har təzərəst, wədi ad iɣləs.»

¹⁴ «As tēnāyam "taxxaramt ta sēksēdat" tēha edag was wēr immēkkan a tu-tēha – Agret awedan wa iḡarrin isalan win! – aytedan win d-ogaz adi daḡ akal ən Yahudēyya, win di addaggaganet s ədḡaḡan; ¹⁵ wa iqqiman daḡ adag wa n afalla n ahan-net, a du-wēr-azzabbat y a din-idkəl arāt ihân ehan-net. ¹⁶ Wa ihan tawagost-net a du-wēr-iqqəl aḡaywan y a din-idkəl asalsaw-net. ¹⁷ Iket aḡazab ad t-agināt tēdoden šin əganen šidusen əd šin sankasnen daḡ adan win di!»

¹⁸ «Əgməyat daḡ Məššina a du-wēr-imazayyat adi əd tamert n asamed irtâyan d akonak, ¹⁹ fēlas aḡazab sēksēdan a du-z-asin daḡ adan win di as a d-ixlak Məššina əddənet wēr kala tētawanay tulat-net, za wēr ilkem du-tosa tulat-net. ²⁰ Kundaba as adan win di ikf-en Əməli tēzərəst, wədi wēr t-illa i daḡ-san du-z-irəgan. Kalar ad tēwəzzəgzəlan fəl əddəlil n aytedan win tawasanafrannen.»

²¹ «Əddi amaran, as dawan-inna awedan: "Ənəyat! Əlməsix illa da", madəḡ: "Illa den", a das-wēr-təzzəgzənam! ²² Fēlas ad t-əməlan əlməsixan ən bahu, əməlan-tu dəḡ ənnəbitan ən bahu. Ad taggin aḡalamaten əd təlməḡjujaten, har as ənnar əfragan awen, əssəxrəkan aytedan harkid win isannafran Məššina. ²³ Daḡ adi ənkədat əd man-nawan! Aratan di ketnasan əgəḡ-awan-tan daw aḡaf.»

Əsəssəḡri igâ Ḡaysa daḡ batu ən tawaxlay-net əddənet

²⁴ «Dəffər təssust ta za tagit daḡ adan win di, ad alsinat šiyay təfuk, igməd ənnur tallit, ²⁵ ərtəkan-du etran, nəḡəynəḡəynat təxəllak šin əlanen tarna daḡ jənnawan, ²⁶ alwaḡ wədi da ad za tēwənəya nak Ag Aggadəm as du-z-asa əhəḡ šignawen, daḡ tarna-nin tagget, əd tanaya-nin, ²⁷ tēzzar zəmmizəlay angalosan əs təḡəmmar an əkkozat n əddənet, y a d-əššidəwan aytedan kul win sannafranaḡ.»

²⁸ Inn-asan: «Abəzat alfaydat s əlmital wa n ašək ən fig. Igda ad hussəyan lədlad-net, iggaz-du šin tanazra, ad təssənam as tamert ta n akasa tēhōz. ²⁹ Zund əmmək en daḡ əs as tēnāyam aratan win dawan-əmalay əddi, təssənam as aḡrud n əddənet ihoz, wēr illa gar-ewwan dər-əs arāt. ³⁰ Əḡḡəyyəḡ əsilakanaḡ-awan as tamattay ta da n azzaman win nəha da, ad tənəy ənətti n aratan kul win dawan-əməla da. ³¹ Ijənnawan d amaḡal ilkam ad ib'as t-əllan, mišan batuten-in əllanat-tu har faw.»

Əsəssəḡri daḡ issinkad Ḡaysa inəttulab-net

³² «Əzəl amaran wala alwaḡ wa daḡ z'agu awa dawan-əməla da, wēr t-illa i daḡ-san issānan, ḡər za angalosan a əhanen ijənnawan, wala Barar iman-net. Wēr t-illa i daḡ-san issānan ar Abba. ³³ Ənkədat, təsəmmutəgam, fēlas wēr təssenam assaḡat ta daḡ z'agu adi. ³⁴ Iha adi əlmital n aləs išakalan. As iggaz šin teklay iga šinaden n aḡaywan-net daḡ fassan n eklan-net. Akkiyyan imal-as əššəḡəl was t-iwar igi-net. Inna i wa ogazan imi n ahan ad inkəd. ³⁵ Daḡ adi ənkədat, fēlas wēr təssenam alwaḡ wa daḡ du-z-asu məššis n aḡaywan, kud alməz, wala adawannay n ahad, wala datazal, wala aḡora. ³⁶ A kawan-du-wər-asu daḡ alwaḡ daḡ as wēr təswedam, aḡəz-kawan-du tənsām. ³⁷ Awa dawan-ganna da, ketnawan as dawan-tu-ganna, a t-imosan as: Ənkədat.»

Isalan ən təmattant ən Ḡaysa

14

Ətəwənyal n alwardi fəl Ḡaysa

¹ Əššin adan a din-aba daḡ əmud wa n Akkay d əmud wa daḡ tamatšinat təḡəlwen šin wēr iha xamira. Imuzaran ən limaman əd musanan n Əttawret harwa da gammayan tēmərkest tas z'abəzan Ḡaysa aḡin iman-net, ² fēlas a gannin: «Ad wər nagu adi daḡ adan n əmud, fəl a du-wēr-awəy ənəjərway əs tamattay.»

³ Awen as itaggu Ḡaysa ənta iha taḡrəmt ta n Betanəy, imigarat i Simḡon was kala a t-igraw kətru. Itamansaw den da as du-t-osa tēntut tēwāyat butalay igân daḡ tēhunt

mallat, iha alwardi iknan šizada d əzzəwi as itawannu nar. Tosa-du ɣas tərza imi ən butalay wa teway da, ad tənəqqal alwardi wen fəl aɣaf ən Ƴaysa. ⁴ Arat wen iga alham daɣ arat daɣ aytedan win əllanen den, ad tinəmənnin gər-essan: «Ma infa əhluk n alwardi a? ⁵ Wərgəy ifrâg a din-anzu əlqimat ən karadat təmad n əzəl n əššəxəl, itəwəkfu awen i tələqqawen?» Ad suɣulan təntut ten tagna.

⁶ Mišan inn-asan Ƴaysa: «Akfat-tat əməslag! Mafəl das-təɣaššadam iman? Əmazal olâɣan a di-təga da, ⁷ fəlas šiləqqawen faw da əllānat ɣur-wan, id təram adi təfrāgam a dasnat-tilalam; nak amaran, wərgə faw əlley ɣur-wan. ⁸ Təntut ta awa təfrag, təg-ay. Tənyal fall-i alwardi y ad təsəmmutəg taɣəssa-nin y əzəkka harwa dat alwaq. ⁹ Əggiyyey silakanay-awan as, edag a daɣ ittəmal Əlinjil daɣ əddənet ketnet, a daɣ-as attamal awa təga təntut ta, tətəwəkta-du.»

Əsəttərməs ən Yahuza Ƴaysa

¹⁰ Den da ad inkar Yahuza Isxarəyuti wa n iyyan daɣ nəttulab ən Ƴaysa win maraw d əššin, ikka imuzaran ən limaman fəl a dasan-iməl təməwit tas z'agu Ƴaysa daɣ fassan-nasan. ¹¹ Isaddawat-tan awen, təzzar əgan-as arkawal n ad t-akfin azrəf. Ad igammay Yahuza təməwit tas z'agu Ƴaysa daɣ fassan.

Əsəmmutəg n əmud wa n Akkay

¹² Əzəl wa azzaran n əmud wa daɣ tamatšinət təgəlwen šin wər iha xamira, əzəl s ənta a daɣ tawagzaman jəɣal win amud wa n Akkay, ənnan nəttulab i Ƴaysa: «Mənid tareɣ a dak-nəsəmmutəg imensewan n amud wa n Akkay?» ¹³ Təzzar issoka Ƴaysa əššin daɣ nəttulab-net Yerusalam, inn-asan: «Əggəzat aɣrəm, ad tammanayam d aləs ewâyan ətəkin idkâran aman. Əlkəmat-as. ¹⁴ Ehan wa iggaz, annat i məššis, "Inn-ak Əššex: 'Məni edag daɣ ahan-nak wa daɣ za nammansaw nak əd nəttulab-in daɣ amud wa n Akkay?'" ¹⁵ A kawan-assaknu daɣ suru-net ehan wa n afalla elwân, əhân-tu mutag kul, iknâ. Əddi da a dana-za-təsəmmutəgam imensewan win Akkay.» ¹⁶ Əqlan nəttulab, əkkan aɣrəm. As din-ewadan ənayan awa da dasan-imal Ƴaysa. Təzzar sammatagan imensewan win Akkay.

Ətəməl ən təkaddilt

¹⁷ As tuda təfuk osa-du Ƴaysa, iddew əd nəttulab-net win maraw d əššin. ¹⁸ Isiɣamar Ƴaysa ənta əd nəttulab-net den da tamansawan as dasan-inna: «Əggəyyey əsilakanay-awan as, iyyan daɣ-wan a dər-i idrâwan da da a di-z-aggin daɣ fassan.» ¹⁹ Iɣšad awen iman-nasan, akkiyyan daɣ-san inna i Ƴaysa: «Əngəm wərgə nak?» ²⁰ Inn-asan: «Iyyan daɣ-wan, kawanay inəttulab-in win maraw d əššin, a dər-i idrâwan əmərədda daɣ əxəzu iyyanda a z'agin adi.» ²¹ Illikan as nak Ag Aggadəm a di-iba s əmmək iman-net wa əmalan Əlkəttaban daɣ batu-nin, mišan ya, iket alɣazab a t-inəy awedan wa di-igan daɣ fassan. Awedan wədi, a das-afu fadda a du-wər-iggez əddənet.

Əsəbdəd ən saktan ən tassaɣ ta təynəyat

²² Tattin da da as idkal Ƴaysa tagəlla, iga igodan i Məššina, irza tagəlla ten, izun-tat i nəttulab-net, inn-asan: «Atšiwat da, taɣəssa-nin adi.» ²³ Dəffər awen idkal təkabart, iga igodan i Məššina, amaran ikf-asan-tat, namaglazan awa tat-ihan ketnasan. ²⁴ Amaran inn-asan: «Adi azni-nin isitaddan arkawal ən tassaɣ gər Məššina əd tamattay-net. Azni wa, ad inɣəl fəl tənfa n aytedan aggotnen. ²⁵ Əggəyyey silakanay-awan as, wər z'ələsaɣ tessay n esmad n alɣanab, iket wər d-ewed əzəl wa daɣ z'ašwa wa aynayan daɣ Taɣmar ta n Məššina.» ²⁶ Dəffər awen issəggad Ƴaysa əd nəttulab-net daɣ təmmalen a d-əgmadnen Azzabur. As tanat-əɣradan, əkkan adɣay wa n Eškan ən Zaytun.

Emel ən Ƴaysa šigget ta tu-z-agu Butros

²⁷ Inna ʔaysa i nöttulab-net: «Ketnawan ad iwəliwəl əzəgzan-nawan id ənnan ʔlkəttaban: "Ad əwətaʔ amadan, iba-tu, təzzar wəziwəznat ayfad-net."

²⁸ Mišan dəffər ətəwəsənkərin daʔ təmattant, a dawan-in-izaray s akal wa n Galilaya, əqqələʔ-awan daʔ-as.»

²⁹ Təzzar inn-as Butros: «Kud iwalawal əzəgzan-nasan ketnasan, da wa-nin wər z'iwəliwil.» ³⁰ Inn-as ʔaysa: «Əggəyyeʔ silakanay-ak as, ahada da, as z'agu əkəji y aʔora sanatat təxər, taggādaʔ-i har karadat tāklaten.» ³¹ Mišan izazzawat Butros daʔ batu-net, inna: «Kud iqqal as ətəwənyə kərəz a za nagu nak dər-ək, da wər kay-z-əggəda. Ənnan nöttulab ketnasan awen da.»

Gatsemanay

³² Dəffər awen iddew dər-san ʔaysa s afarag n eškan ən zaytun igân esəm Gatsemanay. As din-ewadan, inn-asan: «Qamiwat da da iket di ad tagga šiwatriwen.»

³³ Izzənkaz fall-asan, iddew əd Butros əd ʔaqub əd ʔaxya. Tamazayt tenda a daʔ əssəntan man-net aʔşud, išşəwaş. ³⁴ Inn-asan: «Awa əgan man-in daʔ aʔşud, əbuka a di-aba. Ad wər təfəlam da, amaran a kawan-wər-ibəz etəs.» ³⁵ Izzənkaz fall-asan a əndərran, issəjad ad itattar, igmay daʔ Məşşina kud immikkan a t-issəgəg awa t-id-izayan daʔ alwaq wen. ³⁶ Inna daʔ təwatray-net: «Ya Abba-nin, arat kul təfrāgay igi-net. Səgəg-i ta daʔ takabart n alʔazab, dər iga awen da ya, taget tara ta-nak, wərgəʔ ta-nin.»

³⁷ Dəffər awen iqqal-du ʔaysa inöttulab-net win karad en, ogaz-tan-du ənsân. Issənkətan, inna i Butros: «Simʔon, kay adis etəs a təgəʔ? Indar-ak ad taga wala ʔas alwaq iyyanda tokāya? ³⁸ Akəyat, tansəyam Məşşina a kawan-oggazan daʔ jarrabatan n Iblis. Tidət as ənnəyat n aggadəm təsidaran igi n awa olaʔan, mišan igdal-as rəkkəm ən təxəssa-net igi n awen.»

³⁹ Ilas əzənkəz fall-asan, iga təwatray ta daʔ iga ihogan. ⁴⁰ Dəffər adi ilas-in tewaylay ən nöttulab-net win karad, os-en-in ənsân, fəlas awa dasan-iga etəs daʔ iguz ab-as əfragan arra ən şittawen-nasan. Wər əssenən a das-ənnan. ⁴¹ As dasan-d-iga tewaylay ta n karadat, inn-asan: «Harwa da tənsâm, təsanfim? Batu za təxrad. Əssənət âs alwaq ewad-du wa daʔ za təwəgga nak Ag Aggadəm daʔ fassan ən nasbakkadan. ⁴² Ənkərat-in əndawat! Ənəyat! Wa di-z-agin daʔ fassan ewad-du.»

Təkaddilt ta iga ʔahuza ʔaysa d ətərməs ən ʔaysa

⁴³ Harwada išşewal ʔaysa as d-osa ʔahuza wa n iyyan daʔ nöttulab-net win maraw d əşşin, iddew əd tamattay a d-əssiglan muzaran ən limaman əd musanan n ʔttawret əd muzaran ən Kəl-ʔlyəhud. Tamattay ten tewây şikabiwen əd təburəgen.

⁴⁴ Əməkəddəl wa igan ʔahuza imâl i tamattay ten əmmək was z'əzdəyan ʔaysa, əs tənna ta dasan-iga: «Aləs was di-tənayam as tu-zalamməʔ, ənta ʔaysa. Abəzat-tu, taglim dər-əs, tagim dər-əs ənnəyat.» ⁴⁵ Osa-du ʔahuza ʔas, ihoz-in ʔaysa, inn-as: «Əşşəx?» Təzzar izalammətat-tu. ⁴⁶ Təggad-in tamattay əs ʔaysa, təbaz-tu. ⁴⁷ Iha-du iyyan daʔ nöttulab ən ʔaysa, ilbay takoba-net iwət sər-əs akli n ʔlimam wa Zəwwəran, ifras-du təməzzuk-net. ⁴⁸ Təzzar inna ʔaysa i tamattay ten: «Awak nak əjajəb iyyan n abaydag a əmosa as di-du-tətakkim tewayam şikabiwen əd təburəgen y a di-təbəzam? ⁴⁹ Wərgəʔ əzəl kul əlley gar-ewwan, sasayra daʔ Ahan wa Zəwwəran n ʔlyibada, mafel wər di-təbəzam? Əssənət za as, awa igan da, igâ fəl ad andu awa sər-i ənnan ʔlkəttaban.»

⁵⁰ Den da a t-əfalan nöttulab-net ketnasan, əddəggagan fall-as. ⁵¹ İlkam əmawad iyyan i tamattay en, ilsa afər ihossayan daw wər iqqen arat. Əggadan-in sər-əs meddan y ad t-əbəzan, ⁵² oyy-asan-du afər wa ilsa, ozal wər ilsa arat.

Təbadday ən ʔaysa dat Asaggawar wa Zəwwəran

⁵³ Immeway Ƴaysa s Əlimam wa Zəwwəran a ƣur əddewan muzaran ən limaman, əd muzaran ən Kəl-Əlyəhud, əd musanan n Əttawret. ⁵⁴ Iga Butros i Ƴaysa ləkkum zagren har iggaz ammas n aƣalla n aƣaywan n Əlimam wa Zəwwəran. Iqqim ad isukus ƣur maşşaxalan n Əlimam wa Zəwwəran əqqimnen əs təmsay tərƣât den.

⁵⁵ As itaggu awen, imuzaran ən limaman d Asaggawar wa Zəwwəran ketnet gammayan i z'aggayen fəl Ƴaysa fəl ad əgrəwan tarrayt n igi ən man-net, mişan wər t-əgrewan, ⁵⁶ fəlas aytedan aggotnen a d-ənkarnen əgan fəl Ƴaysa şiggəyyawen əmosnen bahu, mişan wər tanat-təha ši tənimmannakat əd tahadat. ⁵⁷ Ənkaran-du wiyyad daƣ-san əssəwaran-tu bahu, ənnan: ⁵⁸ «Nəsl-âs as inna: "Ehan wa Zəwwəran n Əlyibada, s aytedan a t-əkrasnen, a tu-jəbbərəjjeƣ, əssəbdəda daƣ karad adan iyyan wər əkresan aytedan."» ⁵⁹ Mişan batu ta dâ, əmmizrayan daƣ-as.

⁶⁰ Təzzar inkar Əlimam wa Zəwwəran, ibdad daƣ ammas n əljəmaƣat, issəstan Ƴaysa, inn-as: «Awak arat a wər təgənnə daƣ təƣəttas şin dak-tawagginen da?»

⁶¹ Mişan igla Ƴaysa iffista, wər das-inna wala. Ilas Əlimam wa Zəwwəran, inn-as: «Awak kay a imosan Əlməsix, Barar ən was nətaggu təmmalen?» ⁶² Inn-as Ƴaysa: «Awalla əmosaq-qu; amaran a di-tənəyam nak Ag Aggadəm əqqima daw əƣil n Əməli ən Tarna, tənəyam-i deƣ əzaya-du, əheƣ igarakan əgmâda-du ijənnawan.» ⁶³ As isla Əlimam wa Zəwwəran y awen, izazzarrat təkadkat-net fəl awa əgan man-net daƣ əƣşud, inna: «Awak ma nəkka i təgəyyawen şiyad? ⁶⁴ Təslâm y əmadraw wa iga da i Məşşina! Ma tənnam?» Ənnan ketnasan əşşəriƣa-net təmattant. ⁶⁵ A fall-as sutufan wiyyad daƣ-san, əƣmasan-as, ad t-əggâtan, gannin-as: «Kay ya ənnəbi, əməl wa kay-iwatan.» Dəffər awen itawakfa i magazan n Ahan wa Zəwwəran n Əlyibada a das-tagin şiqqas.

Ikus ən Butros tazdəyt i Ƴaysa

⁶⁶ Harwa da iqqim Butros daƣ ammas n aƣalla en da, as du-tosa iyyat daƣ tamaşşaxalan n Əlimam wa Zəwwəran, ⁶⁷ tənay-tu isukus əs təmsay, təzaggazday, tən-as: «Kay da, iyyan daƣ aytedan win əddewnen əd Ƴaysa wa n aƣrəm ən Nazaret!» ⁶⁸ Mişan iggad Butros as t-izdây, inna: «Wərmad əssânaƣ awa daƣ-i təşşewala, za wər t-əgreƣ.» Təzzar igmad aƣalla, ikka imi-net. Iƣra əkəji aƣora da tamazayt ten da.

⁶⁹ Tənay-tu təmaşşaxalt təlas tənna y aytedan əbdâdnen den: «Aləs wa, iyyan daƣ-san a imos.» ⁷⁰ Ilas Butros iggad Ƴaysa.

Arat n amazay dəffər awen, ənnan aytedan əbdâdnen den, əntanay dâ, i Butros: «Illikan as kay da iyyan daƣ-san a təmosa, fəlas kay da in akal ən Galilaya.» ⁷¹ Ad ihhad Butros, igannu: «Məşşina ya təlƣanaƣ-i kud bahu a əge. Əhâdaƣ-awan as wər əzdayaƣ aləs was təgannim əddi.» ⁷² Da da ƣas ad inna Butros awen, ənta ad iga əkəji y aƣora təƣaray ta n sanatat, ikta-du Butros batu ta das-iga Ƴaysa, as das-inna: «As z'agu əkəji y aƣora sanatat təƣər, təgeƣ-i karad ikusan i təzdəyt.» Təzzar əƣşadan man ən Butros wəllen iggaz şin tala.

15

Təbadday ən Ƴaysa dat ənaxkim Bilatəs

¹ As affaw aƣôra əmmənayan muzaran ən limaman əd muzaran ən Kəl-Əlyəhud əd musanan n Əttawret, almaƣna Asaggawar wa Zəwwəran ketnet, sassakradan Ƴaysa, ewayan-tu, əgan-tu daƣ fassan n ənaxkim Bilatəs. ² Issəstan-tu Bilatəs, inn-as: «Awak kay daƣ a imosan əmənokəl ən Kəl-Əlyəhud?» Inn-as Ƴaysa: «Kay iman-nak as tənneƣ adi.» ³ Ad sawaran muzaran ən limaman Ƴaysa ark igitan aggotnen. ⁴ Ilas-tu Bilatəs əsəstan, inn-as: «Təsalla y aratan kul win kay-əsawaran da. Kay ma tənneƣ?» ⁵ Iqqim Ƴaysa wər das-iles tənna n arat. Isammaklal awen əs Bilatəs.

⁶ Id d-iḡlay əmud wa n Akkay a d-ikkəs ənaxkim Bilatəs amaskasaw was tara tamattay agamad. ⁷ As itaggu awen ill-ay aləs igan esəm Baryabbas, ihân kasaw ənta əd nəffəllag wiyyad əs kala jannajarwayan tamattay har əgan iman n awedan daḡ awen. ⁸ Tənkərar tamattay ad təgammay daḡ Bilatəs a das-əgu tənəfust ta ḡur-əs təlmad. ⁹ Inn-asan Bilatəs: «Awak tara a təgam a dawan-əkkəsəḡ əmənokal ən Kəl-Əlyəhud daḡ fassan?» ¹⁰ Ənta Bilatəs issân as aššaddat ən manzaḡ ən muzaran ən limaman Ḡaysa a fəl t-əgan daḡ fassan. ¹¹ Mišan əgan-du muzaran ən limaman daḡ tamattay ad tədgəz Bilatəs y a das-d-ikkəs Baryabbas, wərgəḡ Ḡaysa. ¹² Ilas Bilatəs awal, inn-asan: «Daḡ adi mas təram ad t-aga y aləs was təgannim da əmənokal ən Kəl-Əlyəhud?» ¹³ Əlasan adakal ən maslan-nasan ad gannin: «Taytay-tu fəl təgəttawt, a t-iba!» ¹⁴ Inn-asan Bilatəs: «Mafəl za? Ma iḡšad?» Mišan sahhaken wəllen imaslan-nasan, ad gannin: «Taytay-tu fəl təgəttawt!» ¹⁵ Issof Bilatəs ləkkum y awa təra tamattay. Ikkas-asan-du Baryabbas daḡ kasaw, Ḡaysa amaran isassag-as tenaḡay labasat s ələkkud dəffər adi amaran ixkam-as ətəwətəytay fəl təgəttawt.

Tamakkakkayt ən sojitan daḡ Ḡaysa

¹⁶ Ewayan sojitan Ḡaysa s ammas n aḡarḡar n aḡalla n ahan wa n əššəriḡa. Əḡran-du sojitan kul win hadatnen. ¹⁷ Əssəlsan-tu əbərnuz zaggəḡan wa lasan mənokalan, əssəwaran-as deḡ almat ən təkəbbut zun ta n mənokalan təgât daḡ šənnanan. Imos awen igi daḡ-as tamakkakkayt. ¹⁸ A tu-saslaman, gannin-as: «Oyy-ik, əmənokal ən Kəl-Əlyəhud!» ¹⁹ Ad əggatan eḡaf-net s agabal ən telant, sutufan fall-as, tigərəffen sajan-as. ²⁰ As daḡ-as əḡradan igi ən təkəkkakkayt tətəyat əd təsəssəlka, əkkəsən fall-as əbərnuz zaggəḡan wa t-əssəlsan, əssoḡalan-tu isəlsa win-da-net, əḡlan dər-əs, əḡmədan dər-əs aḡrəm y ad t-attaytayan fəl təgəttawt.

Ətəwətəytay ən Ḡaysa fəl təgəttawt

²¹ Əmmənayan sojitan əd Simḡon wa n əḡrəm ən Qərwan wa erawan Alaskandər əd Rufus ifâl-du šiwəgas. Šahhaššalan-tu agḡay ən təgəttawt ta fəl z'itəwətəytəy Ḡaysa. ²² Ewayan Ḡaysa s adag as itawannu Golgota, almaḡna n awen «Edag wa n Təkəyya.» ²³ Əkfan-tu esmad n əzzəbib irtāyan d amagal imosan əzzənəf ən taḡəlbast ifannazan talawayt, mišan ugay Ḡaysa əs təssay-nasan. ²⁴ Təzzar ətaytayan-tu sojitan fəl təgəttawt, əzunan isəlsa-net əs təšəḡeren. ²⁵ Ədəḡəlšet as t-əttaytayan fəl təgəttawt. ²⁶ Əttaytayan dənnəg-əs əsəllum a fəl iktâb əddəlil wa sər-əs d-ewayan təmattant. Əsəllum en, iktâb fall-as as: «Awa Əmənokal ən Kəl-Əlyəhud.» ²⁷ Ijjiyat Ḡaysa d əššin jujab ən baydagan ətəwətəytay. Iyyan itawataytay daḡ əḡil ən Ḡaysa, wa hadan itawataytay daḡ zalgat-net. ²⁸ Əmmək en da as tənda batu ta tənnat daḡ Əlkəttaban: «*Ad uddan daḡ maggan ən təkma.*»

²⁹ A das-taggin aytedan win du-takaynen den ark batuten, siwəliwilan iyafawan-nasan, gannin-as: «Dew! Kay wa innan ad təjəbbərəjjeḡ Ehan wa Zəwwəran n Əlyibada tələsaq-qu akarəs daḡ karad adan, ³⁰ əmərədda safsu iman-nak, tazzabbəḡ-du təgəttawt di.» ³¹ Əmmək en daḡ as imuzaran ən limaman əd musanan n Əttawret da əḡân daḡ-as tamakkakkayt, tinəməninn gar-essan: «Ənta wa issəfsan aytedan, wər ifreg əsəfsi ən man-net. ³² Kud ənta Əlməsix a imos, wa n əmənokal n Israyil, azzabbatet-du təgəttawt əmərədda ad nənəy adi, nəzzəgzən sər-əs.» Meddan win dər ijjiyat Ḡaysa ətəwətəytəy əntanay da əhân šin-net.

Agamad ən man Ḡaysa

³³ As iga ammasnazal, əlsanat šiyay akal ketnet har təga tazzar. ³⁴ As təga tazzar, idkal Ḡaysa əməsli-net, inna: «Eli, Eli, lama sabaxtani?» Almaḡna n adi: «Ya Əməli-in,

Ya Æmæli-nin, mafel toyyex-i æd man-in?»

³⁵ Æslan-as arat daꝥ aytedan win æbdadnen den, ad gannin: «Sæsemat! Iꝥarru ænnæbi Ilyas!» ³⁶ Ozal-in sær-æs awedan iyyan, issælmaꝥ-du tæduft daꝥ bænegær, ittaltat d æmi n agabal, izzal-as-tat-in y a tat-aššæw, igannu: «Sællanat, ad næssæn a t-id-asu ænnæbi Ilyas, ikkæs-t-idu fæl tægøttawt ta» ³⁷ Amazay wen da ad ikkas Ƴaysa æmæslissohen, amaran ægmadan-tu man. ³⁸ Assaꝥat ten da ad izzærrat æfær wa zæwwæran imosan anaꝥær gær adag wa zæddigan æd wa ogaran tazdak daꝥ Ahan wa Zæwwæran n Ælyibada. Issærrat-du anaꝥær wen Ƴur afalla har eres.

³⁹ As inay kabtan æn sojitan æn Kæl-Ærrum ibdâdan den æmmæk was ægmadan man Ƴaysa, inna: «Illikan as alæs wa Barar æn Mæššina.» ⁴⁰ Æbdâdnat deꝥ tædoden šiiyyad sædi, æswâdnat daꝥ awa igan den. Šidoden en tæh-enat Maryama Madæl, æd Maryama ta terawat Yaꝥub wa ændærran æd Yosas, d iyyat tægât esæm Salma. ⁴¹ Harwa iha Ƴaysa akal wa n Galilaya as das-ælkamnat, ædhâlnat-tu s awa æfragnat. Æbdâdnat deꝥ tædoden šiiyyad den aggotnen a d-æddewnen æd Ƴaysa æs Yerusalem.

Ætæwægga æn tæꝥæssa æn Ƴaysa daꝥ æzækka

⁴² As tokay takæst n æzæl wa n ælgæmæt, simutugan aytedan y æzæl wa n tæsanfawt; ⁴³ ikka Yusæf wa n æꝥræm n Arimatay ehan æn Bilatæs. Yusæf alæs a imos itiwasaꝥmaran ihân Asaggawar wa Zæwwæran, imos deꝥ awedan igân attama daꝥ assa æn Taꝥmar ta n Mæššina. Ænta a igan æmazal æn taholat imosan as ikka Bilatæs, igmay daꝥ-as tæꝥæssa æn Ƴaysa. ⁴⁴ Isammaklal æs Bilatæs tærrub n agamad wa ægan man Ƴaysa. Isassaꝥra-du kabtan wanâd, issæstan-tu kud itidda iba æn Ƴaysa wala. ⁴⁵ As das-iga kabtan wa isalan n iba æn Ƴaysa, ikfa Bilatæs Yusæf turagat n ad idkæl tæꝥæssa æn Ƴaysa. ⁴⁶ Izzænza-du Yusæf šifit ta tæhossayat, ikkas-du Ƴaysa fæl tægøttawt, ig-ay daꝥ-as, tæzzar ig-ay daꝥ æzækka imosan akazam, isaꝥꝥararad-du tæhunt zæwwærat ihar sær-æs imi-net. ⁴⁷ Tælla Maryama Madæl den æd Maryama ta terawat Yosas, æswâdnat daꝥ adag wa daꝥ tætawægga tæꝥæssa æn Ƴaysa den.

Tanakra æn Ƴaysa daꝥ tæmattant

16

Emel wa iga angalos tanakra æn Ƴaysa daꝥ tæmattant

¹ As okay æzæl wa n tæsanfawt, tænkær Maryama Madæl æd Maryama ta terawat Yaꝥub æd Salma æzzænzanat-du aꝥutan æzodnen y a tan-æsælælnat tæꝥæssa æn Ƴaysa. ² Æglanat aꝥôra, Ƴur gæmmud æn tæfuk æzæl wa n alxad, ækkanat æzækka. ³ Æglânat tinæmænninat gær-essanat: «Nakkanatay a da ma dana-z-isæꝥꝥæruædan tæhunt ta tæharat æzækka?» ⁴ Ædkalnat asawad-nasnat, ænaynat as, tæhunt tanad, tætiwasæꝥararad sædi. Tæhunt ten da za tækna tæzzæwwært.

⁵ Æggaznat æzækka, ænaynat daꝥ-as alæs n æmawad n æsamlal, iqqîm daꝥ æꝥilnasnat, ærmaꝥnat. ⁶ Inn-asnat: «Ad wær tærmæꝥmat. Ƴaysa wa n Nazaret, wa itawataytayan fæl tægøttawt as tæsaggadmat. Wær illa da. Inkar-du daꝥ tæmattant. Ænakmat edag was kala a daꝥ-as tænsa tæꝥæssa-net. ⁷ Æmæreðda aglimat tæmælnat i nættulab-net, harkid Butros, as a dasan-in-izar s akal wa n Galilaya. Den da a tu-zatænøyam s æmmæk was dawan-t-inna.» ⁸ Tæzzar ægmadnat-du æzækka ozâlnat, tæga daꝥ-asnat tæysæst, isimaklal sær-æsnat awa igan den. Awa æganat daꝥ tææmmæq wær t-illa i s ænnanat arat daꝥ tarrayt.

Ænæfilal æn Ƴaysa y aytedan aggotnen

⁹ Aꝥora n æzæl wa n alxad a d-inkar Ƴaysa daꝥ tæmattant, iga ænæfilal-net wa azzaran i Maryama Madæl, tas kala daꝥ-as ikkas æssa kælæsuf. ¹⁰ Tægla tæga isalan y aytedan win as kala tidawan æd Ƴaysa. As itaggu awen æꝥšâdan man-nasan, hallin

iba-net. ¹¹ Mišan as əslan as iddâr, tənây-tu, ugayan s ad əzzəgzənan awen. ¹² Dəffər awen inafalal Ƴaysa əs təməwit iyyat y əššin daƣ nalkiman-net jiwankatnen daƣ əsuf. ¹³ Təzzar əqqalan Yerusalām əmalan awen i nalkiman win hadatnen, mišan əntanay da wər dasan-itawazagzan awen.

Əzəmmizəl wa iga Ƴaysa i nəttulab-net s əddənet ketnet

¹⁴ Dəffər awen inafalal-du Ƴaysa i nəttulab-net win maraw d iyyan daƣ amazay a daƣ tattin. Isoƣal-tan təgna n iba n əzəgzan-nasan əd taggarmamt ən wallan-nasan, fəlas wər əzzəgzanan y aytedan win t-ənaynen dəffər tanakra-net daƣ təmattant. ¹⁵ Inn-asan: «Agliwat, tilalam əddənet ketnet təmmâlam isalan n Əlinjil y id t-illa awedan. ¹⁶ I izzəgzanan, itawasalmaƣ deƣ daƣ aman s esəm-in ad igrəw efsan. Amaran wa ugayan s əzəgzan, ad t-iwər attadib ən Məššina. ¹⁷ Əntanatay da alƣalamaten šin za təwənəynen fəl aytedan win sər-i əzzəgzannen: Ad əkkəsən kələsuf daƣ aytedan əs tarna n esəm-in, əššiwəlan awalan ən tawšeten wər əzdayan, ¹⁸ amaran kud ədkalan taššolen əs fassan-nasan wala əšwan sənsəg da wər dasan-z-iƣšəd adi wala. As əssəwaran ifassan-nasan imiranan, ad əzzəyan.»

Tewaylay ən Ƴaysa ijənnawan

¹⁹ Ig-asan Əməli Ƴaysa batu ten ƣas, immədkał əs jənnawan, iqqim daƣ əƣil ən Məššina. ²⁰ Əntanay amaran, əglał ad əmmalan isalan n Əlinjil daƣ adag kul. Illil-asan Əməli s əššəƣəl wen, isataddu awa gannin s alƣalamaten əmosnen təlməƣjumatən šin taggin.

Elinjil wa n Luqa Esanti

1-3 Ya Tayofil wa əknex saɣmar, aytedan aggotnen a əktabnen isalan n awa ɣur-nax igan, s əmmək iman-net was dana-tan-əssoxalan aytedan win tan-əggəyatnen əs šittawen-nasan harwa ɣur ənətti-nasan, əqqalan aytedan əşxəlneŋ daɣ amel n awal ən Məššina. Awen da fəl di-d-iggaz nak da, dəffər as əššiggarax isalan di kul s əllux a d-ibazan ɣur ələsəl-nasan, a dak-in-aga y-asan akatab innizzaman, ⁴ fəl ad təkəkəsax aššak as təssunen šin tətəwasasaxra əttiddanat.

Təhəwt ən Ƴaysa əd təmmədrəyt-net

Ətəməl ən təhəwt n ənnəbi Ƴaxya wa isalmayan aytedan daɣ aman

⁵ Elan win daɣ imos Herod əmənokəl n akal ən Yahudəyya, ill-ay əlimam iyyan igân esəm Zakarayya ihân taggayt ən limaman win hayawan n Abəya. Tantut-net tahayawt ən Harun, esəm-net Elizabet. ⁶ Ənta dər-əs əmosan alɣadılan dat Məššina, əgân y alwajiban n Əməli d alamaran-net ləkkum daɣ wər əlen lahan waliyyan. ⁷ Wər əlen barar waliyyan fəlas Elizabet a wər nətilu bararan, əgmâdan-tan deɣ elan wəllen.

⁸ Əzəl iyyan itaggu Zakarayya dat Məššina əššəxəl wa taggin limaman fəlas taggayt ən limaman ta iha as d-issəxlay igi n awen. ⁹ Əbaznat-tu taşaxeren, əmosnen as, ənta a z'iggəzan edag wa zəddigan daɣ Ahan wa Zəwwəran n Əlxibada n Əməli, issəqqəd daɣ-as ađutan fəl majmar wa iskatan y awen. Šišaxeren šin imos igi-nasnat alɣadat ən limaman. ¹⁰ As iga alwaq wa daɣ taqqadan ađutan, tamattay ketnet təbdâd daɣ təfərray n Ahan wa Zəwwəran n Əlxibada, tətattar.

¹¹ Wala a ihogan inafalal-as-du angalos n Əməli ibdâd daɣ əxil ən majmar wa n əsəqqəd n ađutan. ¹² Inay Zakarayya angalos ɣas irmax, təggaz-tu tasa. ¹³ Mišan inn-as angalos: «Zakarayya! A kay wər təggəz tasa fəlas Məššina iqbâl mansay-nak, tantut-nak Elizabet ad təgrəw barar, amaran ag-as esəm Ƴaxya. ¹⁴ Ad taddawex, təfəliwəsax; təsəddəwət deɣ təhəwt-net aytedan aggotnen, ¹⁵ amaran ad iqqəl awedan zəwwəran dat Əməli. Wər mad as z'aşu esmad n alɣanab wala deɣ esmad waliyyan. Ad t-idnəy Infas Wa Zəddigan harwa da iha tadist n anna-net. ¹⁶ Ad d-issuxəl Kəl-İsrayil aggotnen Əməli-nasan Məššina. ¹⁷ Ənta a du-z-izaran y Əməli imos anammazul-net, igrâw Infas Wa Zəddigan əd tarna šilat ən win igraw ənnəbi İlyas, fəl a d-awəy alxer gər aytedan əd bararan-nasan, awəy-du inəmməzray s ad ilen tayttay ta əlan aytedan win əxdalnen. Təməwit tədi as z'isəmmutəg y Əməli tamattay təsimatagat i ləkkum y-as.»

¹⁸ Təzzar inna Zakarayya y angalos: «Məni alɣalamat ta di-za-təssusənat as adi ad agu? Ənta nak aɣmar waššaran a əmosa, tantut-in deɣ əglân daɣ-as elan wəllen.»

¹⁹ Inn-as Angalos: «Awa nak Jibril, akli ən Məššina wa dat-əs ibaddadan. Ənta a di-d-izimmazalan sər-ək y a dak-agax isalan hossaynen win di. ²⁰ Amaran dad zamas wər təzzəgzanax isalan win dak-əgeɣ da, as z'andinen daɣ alwaq-nasan, ad ammadad əmi-nak. Wər za tələsax awal iket wər d-osa əzəl wa daɣ z'agu arat wədi.»

²¹ Awen as itaggu tamattay təqqâl i Zakarayya, əqqānan ɣafawan-nasan y awa t-in-isahhagan daɣ adag wa zəddigan. ²² As t-id-igmad, indar-as a dasan-iššiwəl fəlas imi-net a immədadan, a dasan-isidugun. Əssanan as arat iyyan a das-d-inafalalan.

²³ As issənda adan-net win əššəxəl daɣ Ahan wa Zəwwəran n Əlxibada, iqqal aɣaywan-net. ²⁴ Dəffər awen təga tantut-net Elizabet tadist, təzzar təgdal i man-net ətəwənay har təga səmmosat təlil, təgannu: ²⁵ «Awa igi n Əməli! Ənta daɣ-i issanan, ikkas-i asakor wa di-əggatan aytedan.»

Ætamæl ən təhəwt ən Ƴaysa

²⁶ Təha Elizabet tallit-net ta n sədisat as izammazal Məššina angalos Jibril s əxrəm as itawannu Nazaret ihân akal ən Galilaya. ²⁷ Issok-ay təmawat iyyat wər nəzday meddan harwada tēgât esəm Maryama. Amaran Maryama təsimarkas d aləs igân esəm Yusəf, imosan arat dəɣ əzzurrəyya n əmənokal Dawəd wa n ənnəbi. ²⁸ Os-et-du angalos, inn-as: «Maryama, ma təxlaka! Æməli izizabbat-du fall-am arraxmat-net. Issân dəɣ-am.» ²⁹ Iqqan awal wen eɣaf ən Maryama, idgaz-tat, təzzar ad təsamadran awa imos almaɣna n assalam wen.

³⁰ Inn-as angalos: «A kam-wər-təgəz tasa Maryama, Məššina izizzabbat-du fall-am arraxmat-net. ³¹ Ad taga tadist, tēgrəwa barar, tagaɣ-as esəm Ƴaysa. ³² Ad itəwəsəxmər, agu esəm Barar ən Məššina di n Amadkol. Ad t-akfu Æməli Məššina taɣmar n amaraw-net Dawəd, ³³ izar i hayawan ən Yaqub har faw, amaran təmənukəla-net ad təɣləl.»

³⁴ Tənnə Maryama y angalos: «Manəmmək as z'agu adi ənta nak harwada wər əzdaya meddan?» ³⁵ Inn-as angalos: «A fall-am d-azzabbat Infas wa Zəddigan, talsim tanaya ən Məššina di n Amadkol, təqqəl-am zun telay, awen da fəlas barar wa za tileɣ ad agu esəm Æmizdag agu dəɣ esəm Barar ən Məššina. ³⁶ Ənâm təšəqqaq-nam Elizabet! Əglân dəɣ-as elan wəllen mišan tēga tadist ən barar. Ənta tas itawannu wər tətīlu bararan, tallit-net ta n sədisat a təha əmərədda, ³⁷ fəlas wər t-illa a imosan muxal fəl Məššina.»

³⁸ Tənn-as Maryama: «Nak taklit n Æməli, itəwəgget-i awa tənneɣ.» Təzzar ifal-tat angalos.

Iki ən Maryama Elizabet

³⁹ Tənkə Maryama dəɣ adan en da, təhəz təkka taɣrəmt iyyat n akal ən Yahudəyya imosan akal n ədɣaɣan. ⁴⁰ Tos-in ehan ən Zakarayya, təssəslam fəl Elizabet. ⁴¹ Da da ɣas ad təsla Elizabet y assalam ən Maryama ənta ad izabaggat barar wa ihan tadist n Elizabet, təzzar idnay-tat Infas wa Zəddigan. ⁴² Tədkal Elizabet əməsli-net, tənna: «Togara šidoden kul agaraw n arraxmat, barar dəɣ wa du-z-igmədan tadist-nam igrâw arraxmat. ⁴³ Awak nak ma əmosa as di-du-tətasu anna n Æməli-nin? ⁴⁴ Da da ɣas ad əsleɣ y assalam-nam ənta ad izabaggat barar wa ihan tadist-in fəl tədəwit. ⁴⁵ Təbbilalaɣ kam təzzigzanat as, awa dam-inna Æməli ad andu.»

Təmmal ta tēga Maryama i Məššina

⁴⁶ Tənnə Maryama:
«Əwəl-in immâl adkul n Æməli,
⁴⁷ Iman-in isidawat-tan Məššina
di n Æməɣlas-in.
⁴⁸ Fəlas asawad a din-iga
dəɣ təmmədrəyt ən təkliit-net.
A ibazan ɣur əmərədda
aytedan n azzaman kul ad annin əbbilalaɣ.
⁴⁹ Fəlas Wa ilan Tarna ig-i aratan zawwarnen.
Esəm-net i zəddigan.
⁵⁰ Itihənəttit y aytedan n azzaman kul
win t-əksudnen.
⁵¹ Iga əfus-net imazalan ən təla ən tarna.
Iziwazawaz aytedan win ədkalnen iman-nasan.
⁵² Ikkas daw muzaran taɣmar-nasan,
idkal šiləqqawen.
⁵³ Isayyawan win əlluznen dəɣ awa izodan,
oyya iməggərgas əqquran fassan-nasan.

⁵⁴ Idhal Kəl-Israyil n eklan-net,

fəlas itihənəttit

⁵⁵ y Ibrahim d əzzurrəyya-net har faw,

imos awen arkawal iga i marawan-nana.»

⁵⁶ Təmal Maryama ħur Elizabet har təga edag ən karadat təlil amaran təqqal aḡaywan-net.

Təhəwt ən Yaxya wa isalməyan day aman

⁵⁷ Osa-du alwaq n iguz n əmzur fəl Elizabet, təgraw barar. ⁵⁸ Əslan mahharagan-net əd šəqqəḡan-net əhənəttə zəwwəran wa das-iga Məššina da, əddəwen əntanay da.

⁵⁹ As əzəl wa n əttam osan-du y ad səmməmkədan barar. Ərân a das-agin esəm Zakarayya, esəm wa daḡ iga abba-net. ⁶⁰ Mišan tənn-asan anna-net: «Kala kala! Ad agu esəm Yaxya.» ⁶¹ Ənnan-as: «Esəm ya wədi wər tələḡ əšəqqəḡ a t-igân!»

⁶² Təzzar ad sidugunan y abba ən barar, y a dasan-iməl esəm was ira ad t-agu barar-net. ⁶³ Isaddagan-asan Zakarayya a t-id-akfin əsəllum. Iktab fall-as: «Esəm-net Yaxya.» Isammaklal sər-san awen ketnasan. ⁶⁴ Təzzar okay əmədəd Zakarayya amazay wen da, immora iləs-net, ad itaggu təmmalen i Məššina.

⁶⁵ Təggaz tasa aytədan kul win əxsarnen daḡ ihəz-nasan, wazawazan salan n awa igan den daḡ akal ən Yahudəyya ketnet wa n ədḡaḡan. ⁶⁶ Aytədan kul win əslanen awen ətaffan-tu daḡ wallan-nasan, gannin: «Ma z'iqqəl wa da barar?» İllikan as issiwar-tu Əməli əfus-net.

Təmmal ta iga Zakarayya i Məššina

⁶⁷ İdnyay İnfəs wa Zəddigan Zakarayya wa n abba ən barar, isannafalal-as Məššina awal-net, ad igannu:

⁶⁸ «Təmmal i Məššina,

Əməli n Israyil,

fəlas masnat a iga daḡ tamattay-net,

isaddarf-tat.

⁶⁹ İkkas-ana-du daḡ ahan n əkli-net

Dawəd Amaylas ilân tarnə,

⁷⁰⁻⁷¹ a dana-z-əgəzan daḡ zəngə-nana,

ikkəs-ana daḡ fassan ən maksanan-nana kul.

İmos awen arkawal iga daḡ mawan n ənnəbitan-net

win irəw, isinafran.

⁷² Əmmək wədi as issəkna təhanint-net

i marawan-nana,

issənda arkawal ən tassaḡ-net

zəddigan.

⁷³ Arkawal wen ihâd fall-as

y amaraw-nana Ibrahim as,

⁷⁴ a danəḡ-assafsu daḡ zəngə-nana,

fəl a tu-nəḡbəd ši wala tasa ən waliyyan.

⁷⁵ Nəzəddig noḡâd iket nəddar.

⁷⁶ Amaran kay barar-in,

a kay iwər esəm ənnəbi ən Məššina di n Amədkol,

kay a du-z-izaran y Əməli

fəl a dat-əs takna tarrayt-net,

⁷⁷ təssusəna tamattay-net

as əfsan əllân ħur təsureft ən bakkadan.

⁷⁸ Awen itagḡ-ay Əməli-nana Məššina

fəl əssəbab ən təhanint tagget ta tu-təhat.
 Adi a fəl dana-du-z-asu Əlməsix
 ola əd gəmmud ən təfuk,
⁷⁹ fəl ad imələwləw ənnur-net
 fəl aytedan win əqqimnen daɣ šiyyay,
 əhân telay ən təmattant,
 izəzzəluləɣ takkolen-nana daɣ tarrayt ta n alxer.»

⁸⁰ Ad idaggal Yaxya, tətawad-t-id tayttay-net. Izdaɣ ikallan ən saffan har əzəl wad issosan Kəl-İsrayil fəl man-net.

2

Təhəwt ən Ƴaysa

¹ Azzaman win daɣ z'ihəw Ƴaysa a daɣ omar Qaysara Ogəstəs wa n əttəbəl n Ərrum s ad uddanan aytedan kul win taɣmar-net. ² Tuddant ten ənta a tazzarat. As təga Kirinəyas a imosan əmuzar n akal wa n Surəya.

³ Aytedan kul gallin ad uddanan. Əkkulluk n awedan ikka aɣrəm ən marawan-net. ⁴ Adi fəl igmad Yusəf ənta da aɣrəm wa n Nazaret ihân akal ən Galilaya, igəzzay s aɣrəm n aljad-net əmənokal Dawəd a t-imosan aɣrəm ən Betalxam, ihân akal ən Yahudəyya, ⁵ fəl a daɣ-as uddan. Iddew əd Maryama dər isimarkas. As itaggu awen da təga tadist. ⁶ Əhân Betalxam as fall-as iga alwaq n iguz n əmzur. ⁷ Təggaz Maryama amzur n aɣafadday-net. Itaggu awen dəgma n əsəgən n aharay osaxan d ahan wa ɣur əzzəbben fəlas edag a wər əgrewan daɣ ahan en. Təttal barar daɣ əfər, təssəns-ay daɣ əɣlal ilân den.

Ənəfilal wa d-iga angalos i madanan

⁸ Akal en əhân-tu madanan əssimbarnen eharay-nasan. ⁹ Den da a d-inafalal dat-san angalos n Əməli, təsammalawlaw tanaya n Əməli edag wa əhan, əgan tərəmməq zəwwərat. ¹⁰ Inn-asan angalos: «Ad wər tərməɣam, isalan olaxnen a dawan-d-ewaya a du-z-awəynen tədəwit tagget əs tamattay ketnet. ¹¹ Azalada Əməylas-nawan ihəw daɣ aɣrəm n Dawəd. Ənta a imosan Əlməsix Əməli. ¹² Ənta da awas tu-za-təzdəyam: "Ad tənəyam ajanɣay ittalan daɣ əfər, isrâd daɣ əɣlal."»

¹³ Wala a ihogan inafalal-du agan zəwwəran n angalosan ɣur wen, əmmâlan Məşşina gannin:

¹⁴ «Təmmal i Məşşina daɣ jənnawan, alxer daɣ əddənət y aytedan win əhanen agna-net.»

¹⁵ Əqqalan angalosan ijənnawan ɣas, namannan madanan: «Əndawat Betalxam, ad nənəy awa danaɣ-imal Əməli da.» ¹⁶ Təzzar əglañ əhâzan. Osan-in Maryama əd Yusəf d ajanɣay, isrâd daɣ əɣlal. ¹⁷ As ənayan madanan barar, əsoxalan awa dasan-itawannan sər-əs. ¹⁸ Aytedan kul win əslanen y awa ənnan madanan isimaklal sər-san awen. ¹⁹ Maryama ənta, tətât isalan en kul daɣ man-net, tənəzzar daɣ-san. ²⁰ Təzzar əqqalan madanan əmmâlan adkul ən Məşşina, taggin-as təmmalen fəl aššaddat n arat kul was əslan əd wa ənayan, əs ketnet iga s əmmək wa daɣ as dasan-ittəmal.

²¹ As əzəl wa n əttam, itawasamankad barar, itawagg-as esəm Ƴaysa, imos as esəm wa da a imal angalos y anna-net dat igi-net tadist.

Əməwəy ən Ƴaysa s Ahan wa Zəwwəran n Əlyibada

²² As d-ewad alwaq ən zazdag wa imal Əttawret n ənnəbi Musa, iddew Yusəf əd Maryama s aɣrəm ən Yerusalam fəl ad əzzəzdəgan iman-nasan. Ewâyan deɣ barar y ad tagin da təɣlift ən Məşşina, ²³ s əmmək as iktâb daɣ əşşəriɣa n Əməli as «Barar

kul wa n aɣafadday, ad iskət y Ɛməli.» ²⁴ Yusəf əd Maryama issiwar-tan əşşəriɣa n Ɛməli daɣ tarrayt n əzəzdəg-nasan ad akfin təzəgzəmt ən sanatat tədəbren šin əsuf madəɣ sanatat šin əɣrəm.

²⁵ Aɣrəm ən Yerusalem ixsâr daɣ-as aləs igân esəm Simɣon n alɣadil n əmiksad ən Məššina. Igâ attama n Ɛnəssesməd a du-z-asin assafsu Israyil. Simɣon en izzibbad-du fall-as Infas wa Zəddigan, ²⁶ s ənta a das-isannafalan as wər tu-z-iba wər inay Ɛlməsix n Ɛməli.

²⁷ Eway-t-id Infas ən Məššina s Ahan wa Zəwwəran n Ɛlɣibada. Imazayyat-du əd marwan ən Ƴaysa tamazalan s alɣadat ta tan-issəwar əşşəriɣa daɣ batu ən barar-nasan. ²⁸ Idkal Simɣon barar, iga təmmal i Məššina, inna:

²⁹ «Ɛmərədda Ɛməli ad tayyaɣ akli-nak

ad t-iba daɣ alxer,

id awa di-tənnex inda,

³⁰ fəlas ənaya əs šittawen šin-da-nin

Ɛmaɣlas wa dana-du-təssoka,

³¹ wa du-təsammataɣay i təmattiwen kul,

³² imos ənnur

as z'ikkəsan daɣ šiyyay

aytedan win wər nəmos Kəl-Ɛlyəhud,

awəy-du deɣ adkul əs tamattay-nak Kəl-Israyil.»

³³ Abba-net d anna-net əqqânan ɣafawan-nasan y aratan win sər-əs tawanninen da. ³⁴ Təzzar ittar-asan Simɣon a dasan-igan albaraka, amaran inna i Maryama anna ən Ƴaysa: «Ɛssən as barar a isinafran-tu Məššina fəl ad d-awəy aɣadal əd tanakra ən Kəl-Israyil aggotnen, iqqəl əssəbab n ənəməzray gər aytedan. ³⁵ Ɛmmək wədi as z'isəffəggu awa ihan iwallan n aytedan aggotnen. Kam iman-nam a kam-izzuzər əwəl zun tu-tərzâg takoba.»

³⁶ Təll-ay deɣ tənnəbit iyyat təknât tuşaray təgât esəm Xənnətu wələt Fanwal ən tawşet ta n Aššir, ədâsan əssa elan n azalaf daɣ təmmədrəyt-net. ³⁷ A aba aləs-net wər təles azalaf, har təga əttamat təmərwen n awatay d əkköz. Faw təha Ehan wa Zəwwəran n Ɛlɣibada. Təɣbâd Məššina ehad ezal, tətuzam, tətattar. ³⁸ Tamazayt tenda a daq-qan du-tosa, təga igodan i Məššina. Ad tətəggu isalan ən Ƴaysa y aytedan kul win əganen attama n ad d-izəzzəbbət Məššina tədarfit-net fəl Yerusalem.

³⁹ As əssəndan marwan ən Ƴaysa igi n arat kul wa tan-issəwar əşşəriɣa n Ɛməli, əqqalan aɣrəm-nasan Nazaret ihan akal ən Galilaya.

⁴⁰ Idaggal barar, itilu tayttay d əgərri, izazabbat-du fall-as Məššina arraxmat-net.

Assa ən Ƴaysa Ehan wa Zəwwəran n Ɛlɣibada imos aw maraw elan d əššin

⁴¹⁻⁴² Awatay kul əggizzayan marwan ən Ƴaysa s aɣrəm ən Yerusalem y əmud was itawannu wa n Akkay, imos awen alɣadat n əmud wen. As iqqal Ƴaysa aw maraw elan d əššin əddewan dər-əs s əmud wen.

⁴³ As əɣradan adan win amud, əqqalan aɣaywan, Ƴaysa amaran iqqim-in daɣ Yerusalem wər əssenən daɣ awen. ⁴⁴ A əɣilan iha alɣamaɣat ən məššikal win dər əddewan. As əgan əşikəl n əzəl, a das-saggadan daɣ šəqqayən-nasan əd təməzdəyt-nasan. ⁴⁵ Mišan wər t-əgrewan, təzzar əqqalan Yerusalem, saggadan-as.

⁴⁶ As əzəl-nasan wa n karad gar-essən dər-əs, osan-t-id daɣ Ahan wa Zəwwəran n Ɛlɣibada iniɣama əd musanan n Ɛttəwret, issisam-asan, isastan-tan deɣ. ⁴⁷ Aytedan kul win əslanen y awa igannu, təsimaklal sər-san tayttay-net d alɣawaban-net. ⁴⁸ As t-ənayan marwan-net əhagan, tənn-as anna-net: «Barar-in ma imos awa dana-təge da? Nak d abba-nak təššiwaš-ana taɣara-nak, nosa edag kul nəsaɣɣad-ak.» ⁴⁹ Inn-asan: «Ma fel za as di-təsaggadam? Masnat a wər təgem as təlzâm-i təɣimit daɣ ahan n Abba-nin?» ⁵⁰ Mišan wər əgren awa dasan-inna den.

⁵¹ Iddew Ƴaysa əd marwan-net, zagadayan əqqalan aƣrəm ən Nazaret, ibbirdag-
asan. Anna-net tət̄t̄af aratan en kul daƣ man-net. ⁵² Idaggal Ƴaysa, tət̄itt̄əy t̄əla-net
əgərri, ikannu gərrezat i Məššina d aytedan.

Ƴaysa əd Yaxya wa isalmayan daƣ aman

3

Təl̄xutbat ən Yaxya

Təsəntit n əššəƣəl ən Yaxya

¹ Awatay wa n maraw əd səmmos ən Qaysara Tabirəyas da taƣmar, Fons Bilatəs a
imosan əmuzar n akal wa n Yahudəyya, amaran Herod ixkâm fəl akal wa n Galilaya,
amaqqar-net Filibus ixkâm fəl wa n Iturayya əd wa n Tərakonit, Lisanəya ənta ixkâm
fəl akal wa n Abila. ^{2a} Xânan əd Kayif əntanay əmosan ilimaman win zawwarnen.
^{2b} Awatay wen da a d-izzəbbat awal ən Məššina fəl Yaxya ag Zakarayya daƣ əsuf.
³ Dəffər awen illil Yaxya ikallan kul win ahanen attayan n agarew wa n Yordan,
itaggu y aytedan təl̄xutbat, igann-asan ad təwəsəlməƣan daƣ aman imos awen arat
issiknan tətubt-nasan, fəl ad əgrəwan təsurreft ən bakkadan-nasan.

⁴ Emmək əddi was tənda batu ta iktab Ənnəbi Isayas, as inna: «*Aləs iyyan idkâl
əməsli-net daƣ əsuf igannu: "Səmmutəgat abaraqqa y Əməli! Təsəssiƣədam tarrayen
dat-əs! ⁵ Id t-illa ənahoy ketnet ad inbəl. Idƣaxan əd gefan ad ərəsan, tarrayen šin
əfraynen ad aƣədnat, ibaraqqa win wər nogda ad agdin ⁶ Inəy awedan ketnet əlƣillas
wa d-izazzabbat Məššina."*»

Təl̄xutbat ən Yaxya

⁷ Adi a fəl igannu Yaxya i təmattiwen šin t-idu-tasinen y a tanat-issəlməƣ daƣ aman:
«*Xa taššolen šin! Ma kawan-issosanan ədərrəg y attadib ən Məššina wa d-izayan.*
⁸ Daƣ adi taggiwat imazalan olaxnen təsəttəddim sər-san tətubt-nawan! Wər igda ad
təgannim daƣ man-nawan: "Nakkanay əzzurrəyya n ənnəbi Ibrahim a nəmos", fəlas
silakanay-awan as Məššina ifrâg ad isəmməttəy šihun šin təhannayam da, ixlək-
du daƣ-asnat əzzurrəyya y Ibrahim! ⁹ Agat ənnəyat! Tazəft harwa əmərədda da
təmmotag y a du-təsəddəngər y eškan. Daƣ adi ašək kul wa wər nətirəw aratan
olaxnen ad itəwəxtəs, itəwəgər-in daƣ təmsay.»

Emmək was za nagu alxal wa imal Yaxya

¹⁰ A tu-sastanan aytedan, gannin-as: «*Daƣ adi mas danay-iwar a tu-nagu?» ¹¹ Inn-
asan: «Awedan wa ilan əššin səlsa, akf-et iyyan i wa tu-wər-nəla; wa ilan a itša,
akfet daƣ-as wa tu-wər-nəla.»*

¹² Inabazan n amana əntanay da, tasin-du Yaxya fəl a tan-issəlməƣ daƣ aman,
ənnan-as: «*Əššəx, mas danay-iwar a tu-nagu?» ¹³ Inn-asan: «Ad wər təzzərzəmam
a ogaran awa dawan-itawannan.»*

¹⁴ Əssəstanan-tu dəƣ sojitan, ənnan-as: «*Nakkanay za, mas danay-iwar a tu-
nagu?» Inn-asan: «Ad wər tərəkəbam daƣ awedan waliyyan azrəf-net, wala dəƣ
təssəwəram-tu bahu. Agdat s alxaq-nawan.»*

Assa n Əlməsix

¹⁵ Aytedan kul win əslanen y awa igannu Yaxya, əgân attama; akk awedan
isamadranan daƣ əwəl-net kud Yaxya en da a imosan Əlməsix wala. ¹⁶ Awen da fəl
dasan-inna Yaxya ketnasan: «*Nak, aman a daƣ qawan-salmaƣa, mišan izay-du aləs s
awa di-iga daƣ šigrat, wər eweda wala arra ən suƣan ən ƣateman-net. Ənta Infas Wa
Zəddigan əd təmsay a daƣ qawan-z-issəlməƣ. ¹⁷ Iha əlmital n awedan ittâfan tesayt
y ad izzəzər alkama-net. İšadaw alkama daƣ tadangawt-net, šiyal amaran ag-enat
daƣ təmsay təbilaglat faw.»*

Iguz ən Yaxya kasaw

¹⁸ Iгла Yaxya daḡ amel n Elinjil, itaggu y aytedan ənnəsixatan wiyyad aggotnen.

¹⁹ Herod amaran wa n əmənokal n akal ən Galilaya əruḡmatan a das-iga daḡ batu ən Herodəyas təmosat tayur amadray ən Herod en da igân esəm Filibus, ig-âs dey wiyyad əruḡmatan fəl arak mazalan labasnen kul win hadatnen iga. ²⁰ Işşota Herod fəl arak mazalan win den kul igi ən Yaxya daḡ kasaw.

Etəwəsəlməḡ ən ʔaysa day aman

²¹ As tawasalmaḡan aytedan kul daḡ aman, itawasalmaḡ daḡ-san ʔaysa ənta da. Itattar alwaḡ wen da as ənnolaman jənnawan, ²² izzəbbat-du fall-as Infas wa Zəddigan iha şaşşelan ən tədabert, igmad-du əməsli ijənnawan, inna:

«Kay a imosan Barar-in əkney tara, təssinda-du agna-nin.»

Aljad ən ʔaysa Elməsix

²³ İla ʔaysa edag ən karadat təmərwən n awatay as issənta əşşəḡəl-net. Ettâfan aytedan as ag Yusəf wa n ag Heli.

²⁴ Heli ənta ag Mâtat, Mâtat ag Lebi, Lebi ag Malki, Malki ag Yannay, Yannay ag Yusəf,

²⁵ Yusəf ag Matasiyas, Matasiyas ag Amos, Amos ag Nahum, Nahum ag Xasli, Xasli ag Naggay.

²⁶ Naggay ag Matti, Matti ag Matasiyas, Matasiyas ag Samḡi, Samḡi ag Yosax, Yosax ag Yoda,

²⁷ Yoda ag Yohanan, Yohanan ag ʔaysa, ʔaysa ag Zərubabil, Zərubabil ag Assalat, Assalat ag Nayri,

²⁸ Nayri ag Malxi, Malxi ag Addi, Addi ag Kosam, Kosam ag Almadama, Almadama ag Er,

²⁹ Er ag ʔaysa, ʔaysa ag Alyazar, Alyazar ag Yorim, Yorim ag Mâtat, Mâtat ag Lebi,

³⁰ Lebi ag Simḡon, Simḡon ag Yahuda, Yahuda ag Yusəf, Yusəf ag Yunam, Yunam ag İlyakim,

³¹ İlyakim ag Malaya, Malaya ag Mayna, Mayna ag Mâtat, Mâtat ag Natan, Natan ag Dawəd,

³² Dawəd ag Yasay, Yasay ag ʔubayd, ʔubayd ag Boxaz, Boxaz ag Sala, Sala ag Nasun,

³³ Nasun ag ʔaminadab, ʔaminadab ag Admin, Admin ag Arni, Arni ag Xasrun, Xasrun ag Farəs, Farəs ag Yahuda,

³⁴ Yahuda ag Yaḡub, Yaḡub ag İsəhaḡ, İsəhaḡ ag İbrahim, İbrahim ag Terax, Terax ag Naxur,

³⁵ Naxur ag Sarux, Sarux ag Raggaw, Raggaw ag Falax, Falax ag ʔabbir, ʔabbir ag Salax,

³⁶ Salax ag Kaynam, Kaynam ag Arfakşad, Arfakşad ag Sam, Sam ag Nux, Nux ag Lamax,

³⁷ Lamax ag Matusala, Matusala ag Henox, Henox ag Yarit, Yarit ag Malelyal, Malelyal ag Kaynam,

³⁸ Kaynam ag Enus, Enus ag Set, Set ag Adəm, Adəm ənta Məşşina t-id-ixlakan.

4*Etəwəjərrab ən ʔaysa*

¹ Igmad ʔaysa tamawen n agarew wa n Yordan idkâr-tu Infas wa Zæddigan. Infas wa da a t-issokan teneray. ² Iga daɣ-as ækkozat tæmærwæn n æzæl itajarrab-tu Iblis. Adan win kul ig-en wær itša wala, as æɣradan ih-ay laz.

³ Inn-as Iblis: «Kud kay Barar ən Mæššina, tamæra tæhunt ta s ad tæqqæl amensay.»

⁴ Inn-as ʔaysa: «Wærgæɣ ænnan Ælkættaban: "Awedan wær itæddær æs mensewan ɣas."»

⁵ Ikka dær-æs Iblis edag iknan æhuki, issæswad-tu daɣ taɣmaren kul n æddænæt daɣ ellaf ən šat. ⁶ Amaran inn-as: «A kay-akfa taɣmaren en kul æd tæhussay-nasnat fælas tiwakfanat-i hakkaq-qanat deɣ i was tanat-æreɣ. ⁷ Daɣ adi as di-tæssæjada ad tægræwæɣ awen kul.» ⁸ Inn-as ʔaysa: «Wærgæɣ ænnan Ælkættaban: "Æmæli-nak Mæššina as za tæssæjada, ænta ɣas a za tæɣbæda."»

⁹ Tæzzar ikka dær-æs Iblis Yerusalem, issæbdad-tu fæl afalla n Ahan wa Zæwwæran n Ælɣibada, inn-as: «Kud kay Barar ən Mæššina tætæreɣge, ¹⁰ fælas ænnan Ælkættaban: "Ad amær angalosan-net a kay agæzan daɣ æššur," ¹¹ iktâb deɣ as: "A kay-ækbælan daɣ fassan-nasan fæl a dak-wær-tænkæf tæhunt."» ¹² Inn-as ʔaysa: «Wærgæɣ za Ælkættaban di ænnân: "Ad wær tætajarraba Æmæli-nak Mæššina."»

¹³ As t-iɣrad Iblis æjærræb, igla oyy-ay har sær-æs ilæs agaraw ən tarrayt.

Æššæɣæl ən ʔaysa daɣ Galilaya

Isalan ən Taymar ta n Mæššina

Æsæssæɣri ən ʔaysa daɣ Nazaret

¹⁴ Dæffær awen, iqqal ʔaysa akal ən Galilaya, tæh-ay tarna n Infas wa Zæddigan. Tæffæzzat sallat-net daɣ akal en ketnet. ¹⁵ Isasæɣru aytedan daɣ nan win ælɣibada ən Kæl-Ælyæhud, ketnasan æssiɣmaran-tu.

¹⁶ Osa deɣ ʔaysa Nazaret, æɣræm wa daɣ idwal. As æzæl wa n tæsanfawt iggaz ehan wa n ælɣibada ən Kæl-Ælyæhud imos awen arat itaggu faw. Ibdad y ad æɣru awal ən Mæššina. ¹⁷ Itawakf-ay-in ælkættab wa n ænnæbi Isayas. Ikkas y ælkættab aɣða wa iga, olam fæl adag a daɣ iktab as: ¹⁸ «Iwâr-i Infas n Æmæli, fælas isinafran-i y ad æmælay isalan n Ælinjil i tælæqqawen. Izimazal-i-du y ad agæɣ isalan i win tawattafnen, ægræwan iman-nasan, æzzuzæyæɣ imæddæɣæl, aytedan win tawadgaznen deɣ aga-qan daɣ tara ən man-nasan, ¹⁹ æmælay awatay taha arraxmat n Æmæli.»

²⁰ As iɣrad ʔaysa tæɣaray ihar ælkættab, issoɣal-tu y amaššæɣæl n ahan wa n ælɣibada ən Kæl-Ælyæhud, iqqim. Ægaran daɣ-as aytedan kul win ællanen den šittawen.

²¹ Amaran inn-asan: «Azalada awal ən Mæššina was tæslam da, inda.» ²² Ketnasan æmmâlan-tu. Simaklalnæ sær-san batuten olaɣnen šin du-gammadnen imi-net, ad gannin: «Ak awa wærgæɣ ag Yusæf?»

²³ Inn-asan ʔaysa: «Illikan as a di-du-tassaktim iggi wa innan: "Anasmagal, zuzæy iman-nak," tæzzar tannim-i: "Agu daɣ akal-nak da da awas næsla as tægêq-qu daɣ æɣræm ən Kafarnahum."» ²⁴ Inn-asan deɣ: «Æggæyyæɣ silakanæɣ-awan as wær t-illa ænnæbi itiwaqbalan daɣ æɣræm wa daɣ idwal. ²⁵ Amaran a dawan-æmæla tidæt: Daɣ elan n ænnæbi Ilyas akal n Israyil æhânat-tu tædoden aggotnen æs wær ædderan meddan-nasnat. Elan en da a daɣ iga akonak karad elan d aganna wær iwet, iga laz labasan daɣ akal ketnet. ²⁶ Dær iga awen da ya, wær izammazal Mæššina ænnæbi Ilyas æs waliyyat daɣ tædoden en. Kalar izammazal-tu s iyyat tæxsârat daɣ tæɣræmt ta n Saræfta tæhât akal ən Sidon. ²⁷ Æhân deɣ kætrutan aggotnen akal n Israyil daɣ elan n ænnæbi Elisayas, mišan wær tan-iha i itawazozayan ar Naɣman wa n akal ən Suræya.»

²⁸ As æslan aytedan win æhanen ehan n ælɣibada y awen, iggaz-tan alham labasan. ²⁹ Æbdadan, ægan ifassan da ʔaysa, ækkasan-tu daɣ æɣræm, ewayan-tu s afalla n ædɣæɣ wa fæl ikras æɣræm y ad t-ægæran daɣ æɣæɣi, iba-tu. ³⁰ Mišan illam ʔaysa gar-essan igla.

Ēššəxəl ən Ƴaysa daƷ Kafarnahum

³¹ Dəffər awen iras Ƴaysa əs təxrəmt təgât Kafarnahum təhât ənta da akal wa n Galilaya, ad isasaxru aytedan daƷ ahan n əlxibada ən Kəl-Ēlyəhud daƷ jilan win təsanfawt. ³² Isimaklal sər-san əmmək was isasaxru, fəlas əsəssəxri-net in awedan ilân tanaya.

³³ Ehan n əlxibada wen, ih-ay aləs iha aggəsuf. Idkal aləs wen əməsli-net, ad igannu: ³⁴ «Xa! Ƴaysa wa n Nazaret, ma daƷ-na tarex? Ēngəm assa a du-təgey y a dana-təhləka? ĒssanaƷ awa təmosa: Ēmizdag wa d-izammazal Məššina.» ³⁵ Iharaššat-tu Ƴaysa, inn-as: «Fəstu, təgmədaƷ aləs di!» Təzzar iggədla aggəsuf aləs en gər aytedan, amaran igmad-tu wər das-ixšed arət. ³⁶ Ēhagan aytedan ketnasan, ad tinəmännin gar-essan: «Ma imos almaƷna n awal n aləs wa? Kələsuf da ittâf daƷ-san tanat, itamar-tan əs tanaya, gammadan aytedan.» ³⁷ Təwazawaz sallat ən Ƴaysa daƷ id t-illa adag daƷ akal en kul.

³⁸ As igmad Ƴaysa ehan n əlxibada ən Kəl-Ēlyəhud, ikka ehan ən SimƷon. As itaggu awen tədagğalt ən SimƷon təfrâyat, tənnid wəllen, təzzar əgmayan daƷ-as aytedan a tat-izzuzəy. ³⁹ Inaz-in fall-as Ƴaysa, isannaryam i tanaday, təzzar təwat fall-as. Tənkər daƷ təmazayt ten da a tan-təsimeğurit.

⁴⁰ As tuda təfuk, ewayan-du sər-əs aytedan imiranan-nasan əgânen šiwərnawen əmosnen əzzənəfan. Akk iyyan issəwar-tu ifassan-net, izzozay-tu. ⁴¹ Gammadan dəƷ kələsuf aytedan aggotnen, saƷaren kələsuf en, gannin: «Kay Barar ən Məššina», mišan isannaryam-asan, igdal-asan awal, id masnat a əgan as ənta a imosan Ēlməsix.

⁴² As affaw, igmad Ƴaysa aƷrəm, ikka edag issufan. A das-təsaggad tamattay har t-in-tosa. Ad gammayan təməwit tas das-z-əgdəlan a tan-ifəl. ⁴³ Mišan inn-asan: «Iwâr-i ad əməla Ēlinjil, imosan isalan ən Taymar ta n Məššina, i Ʒərman win hadatnen əntanay da, fəlas adi da a fəl d-əmmozała.» ⁴⁴ Təzzar igla Ƴaysa, itaggu təlxutbat daƷ nan n əlxibada ən Kəl-Ēlyəhud win n akal ən Yahudəyya.

5

Inəttulab ən Ƴaysa win azzarnen

¹ Ēzəl iyyan ibdâd Ƴaysa daƷ təšəšwit n agaraw wa n Ganazaret, tətanabdaƷ fall-as tamattay fəl ad aslin y awal ən Məššina wa immal. ² Inay Ƴaysa əššin əxlalan n aman daƷ təšəšwit n agaraw. İxlalan win əgmâdan-tan məssawsan, takkasan təjjərgənt daƷ sangaytan-nasan win as tabazan kifitan. ³ Təzzar iggaz daƷ-san wa n SimƷon, igmay daƷ-as a din-izzənkəz fəl təšəšwit, amaran iqqim ad isasaxru tamattay.

⁴ As iraz daƷ əsəssəxri inna i SimƷon: «Akku kay əd midawan-nak dad zagrotan aman, təgəram sangaytan-nawan, tabəzam kifitan.» ⁵ Inn-as SimƷon: «Ēššex, ahad iƷrâdan a nəga nəšxâl eges wər nəbez wala, mišan ya zama adi a tənneƷ, adi za ad əgəra sangaytan daƷ aman.» ⁶ Ēgan awa dasan-inna Ƴaysa, təzzar əbazan kifitan s awa əgan daƷ igət har əbukan sangaytan-nasan y azarru. ⁷ Ad tallafan i midawan-nasan win əhanen aƷlal n aman wa hadan y a d-aglin a dasan-ilalan. Osan-du, ədnayan əššin əxlalan win den har əbukan y ədəkəyyi.

⁸ As inay SimƷon Butros awen, issəjad i Ƴaysa, inn-as: «Ya Ēməli, nəməggəg dər-i fəlas anasbakkad a əmosa.» ⁹ Innâ awen fəlas ənta əd midawan-net ketnasan as əhagan Ʒur anay-nasan igət ən kifitan win əbazan. ¹⁰ Eheg wa iga SimƷon den, ənta a iga Yaqub əd Yaxya win maddanəs ən Zabaday dər idrâw əššəxəl. Təzzar inna Ƴaysa i SimƷon: «Ad wər tərmeƷa, a obazan Ʒur əməərədda, təqqalam meddan a sər-i du-za-tawaynen aytedan y a tan-assafsa daƷ bakkadan-nasan.»

¹¹ Amaran əsoƷalan ixlalan-nasan təgadamayt n agaraw, oyyan arət kul əlkaman-as.

Təmazaq əd Farisaytan

Əzuzəy ən Yaysa aləs igrâw kətru

¹² İha Yaysa ayrəm iyyan, as t-inay aləs as təlsa təwərna ən kətru elam-net ketnet. İkk-ay-du issəjad dat-əs, onsay-tu, inn-as: «Əməli, as tarex adi, təfrâgax a di-təzzuzəyax, izdaga.» ¹³ İzzal-in Yaysa əfus-net, idas-tu, inn-as: «Arex adi, əzzəy tizdaga!» Amazay wen dağ ad izzay dağ kətru. ¹⁴ Təzzar issənkad-tu Yaysa, inn-as: «Ənəy za, ad wər təməla y awedan waliyyan awa igan da, amaran aglu tassaknağ iman-nak y əlimam, taga takutay ən tazdak ta kay-issəwar əşşərixa n ənnəbi Musa, ad iqqəl adi y aytedan təgəyya ən təməzzəyt-nak.»

¹⁵ Dər iga awen da ya, təgla sallat ən Yaysa tətittəy, tətiddaw fall-as tamattay tagget fəl a das-təssəsəm, izzuzəy deş şiwərnawen-nasan. ¹⁶ Mişan ənta, itakku idaggan əssufnen y a dağ-san ixbəd Məşşina.

Tarna ən Yaysa

¹⁷ Əzəl iyyan isasağru Yaysa, əqqiman Farisaytan əd musanan n Əttawret a d-əgmâdnen şixarmaten kul şin n akal ən Galilaya əd wa n Yahudəyya əd Yerusalam. As itaggu awen Yaysa igrâw çur Əməli tarna n əzuzəy n aytedan. ¹⁸ Har d-osan meddan wiyyad misawaynen aləs n anabdon dağ təssut. Ad gammayan a dər-əs əggəzan, assansin-tu dat Yaysa. ¹⁹ As dasan-aba təməwit as dər-əs əggəzan fəl igət n aytedan, əwaran afalla ən tağazamt, olaman əsəfəl-net, əssərasan-tu dağ-as iha təssut-net har təssənsan dağ ammas ən tamattay, dat Yaysa.

²⁰ As inay Yaysa əzəgzan-nasan, inna y anabdon wen: «İbakkadan-nak tiwasarafan-ak.» ²¹ Əslan musanan n Əttawret əd Farisaytan y awen ças, ad gannin dağ man-nasan: «Ma imos aləs wa itaggin amadraw da? Ma ifragan əsurəf ən bakkadan ar Məşşina ças?»

²² İssan Yaysa awa samadranan, inn-asan: «Mafəl tətihənzəmmem adi dağ wallan-nawan? ²³ Ma ogaran tərçəsəy gər i innan: "Tiwasarafan-ak bakkadan-nak" meç ak i innan: "Əbdəd jəwənkət?" ²⁴ Amaran arex a təssənam as nak Ag Aggadəm ələç dağ əddənet tanaya a di-təşişawadat ad əssurəfa y awedan ibakkadan-net.» Təzzar inna Yaysa y anabdon: «Əbdəd, tədkəla təssut-nak, takkaç açaywan-nak.»

²⁵ İbdad aləs wen tamazayt ten da dat aytedan kul, idkal təssut-net, iqqal ehan-net, immâl Məşşina. ²⁶ Aytedan kul isimaklal sər-san awen wəllen. Əmmâlan Məşşina, təh-en tasa gannin: «Azalada nənây aratan as wər kala ətawanayan!»

Awa inna Yaysa əs nasbakkadan

²⁷ İgmad Yaysa edag en, ogga aləs iyyan igân esəm Lebi iqqim dağ adag wa n əzərzəm n əzrəf ən takəs, inn-as: «Əlkəm-i.» ²⁸ İbdad Lebi, oyya awa iha kul, ilkam i Yaysa.

²⁹ Dəffər awen iga Lebi i Yaysa iməgura zawwarnen dağ ahan-net. Ədrawan d aytedan aggotnen ən nəzzərzəm ən takəsen d aytedan wiyyad.

³⁰ Ənayan Farisaytan əd musanan-nasan win Əttawret awen ças gatantanan, ad gannin i nəttulab ən Yaysa: «Mafəl tədrâwam əd nəzzərzəm ən takəsen əd nasbakkadan?» ³¹ Inn-asan Yaysa: «Aytedan wər nəfray, wər əddəraran s anasmagal, imiranan a sər-əs əddərarnen. ³² Nak wər d-oseç fəl əddəlil n aytedan win çur iga as oğadân, kalar əmazal ad-əgeç fəl a d-açraç inasbakkadan əs tətubt.»

Awa inna Yaysa s əzum

³³ Dəffər awen ənnan-as Farisaytan əd musanan n Əttawret: «İnəttulab ən Yaxya əd win Farisaytan tuzaman faw, tattaran, win-nak amaran tattin sassin.» ³⁴ Inn-asan Yaysa: «Awak təfrâgam ad təzzuzəmam ilagatan a çur illa əmazlay? ³⁵ Mişan əlkâman adan a çur-san z'ammakal əmazlay. Adan win di, ad uzaman.»

³⁶ Ig-asan ʔaysa tangalt iyyat, inn-asan: «Wər t-illa i du-z-ikkəsan šikəst dəx tabdoq taynayət y a tat-iwət dəx iyyat waššarat, fəlas as iga adi, ad iḡšəd tabdoq ta taynayət, šikəst dəx ta dəx-as d-ikkas wər tənnəha əd tabdoq ta waššarat. ³⁷ Wər t-illa dəx i z'agin esmad n alḡanab aynayan dəx gədad. I igan adi ad abbaqqen gədad win, təzzar affatu dəx esmad əd gədad. ³⁸ Kalar esmad n alḡanab aynayan, ibəyax aynaynen a dəx itawaggu. ³⁹ Awedan išwân esmad n alḡanab waššaran, wər z'iru dəffər adi tessay ən wa aynayan, fəlas ad annu: "Wa waššaran a izodan.»

6

ʔaysa d əzəl wa n təsanfawt

¹ Əzəl iyyan imosan əzəl wa n təsanfawt ən Kəl-Əlyəhud, ijiwankat ʔaysa dəx təwəgas n alkama, rassaban-du nəttulab-net šiḡaxanən, tifəffərən-tanat gər fassan-nasan, tattin-tanat. ² Təzzar ənnan-asan arat dəx Farisaytan: «Mafəl tətəggim arat xarâman dəx əzəl wa n təsanfawt?» ³ Ijjəwwab-asan ʔaysa, inn-asan: «Ak təḡaray a wər təgem awa iga ənnəbi Dawəd əzəl wa t-iggaz gələk ənta əd midawan-net? ⁴ Awak wərgəx iguz a iga ehan ən Məššina, idkal šiḡəlwen šin əmosnen takutay təkātāt i Məššina əs limaman ḡas as təxalal tattay-nasnāt, itša dəx-asnāt, ikfa dəx-asnāt dəx aytədan-net?» ⁵ Inn-asan ʔaysa dəx: «Nak Ag Aggadəm a ixkaman fəl əzəl wa n təsanfawt.»

⁶ Əzəl iyyan ən təsanfawt ən Kəl-Əlyəhud, iggaz ʔaysa ehan n əlḡibada ən Kəl-Əlyəhud ad isasaxru. Ehan-en ih-ay aləs as immût əfus-net wa n əxil. ⁷ Əgaran dəx-as musanan n Əttawret əd Farisaytan šittawen fəl ad əssənan kud ad izzuzəy awedan dəx əzəl wa n təsanfawt wala, fəl tara n ad əgrəwan əddəlil əs təxtəst-net.

⁸ ʔaysa ənta issân awa ihan iman-nasan. Inna y aləs was immût əfus-net: «Ənkər, əbdəd dəx ammas n əljəməxāt.» Inkar aləs, ibdad. ⁹ Təzzar inn-asan ʔaysa: «Əssistanaq-qawan, awak xalal dəx əzəl wa n təsanfawt igi n arat olâxan meḡ igi n a labasan, ereg n awedan dəx təmattant meḡ awak šiyyit-net iba-tu?» ¹⁰ Issəlaltan ʔaysa asawad-net ketnasan, amaran inna y aləs was immût əfus-net: «Əzzəl əfus-nak» Iga awa das-inna, izzay əfus-net.

¹¹ Arat wen iga dəx-san alham labasan, ad tinəməšiwirən gar-essan fəl awa z'agin i ʔaysa.

ʔaysa isassayru inəttulab-net

Əsənnəfrən ən ʔaysa inəttulab win maraw d əššin

¹² Adan en da a dəx ikka ʔaysa adḡax iyyan y a fall-as agu šiwatriwen. Iga fall-as aḡad iḡrâdan itattar. ¹³ As affaw iḡra-du inəttulab-net, isannafran dəx-san maraw d əššin, ig-asan esəm inəmmuzal. ¹⁴ Ismawan-nasan da: Simḡon was iga esəm Butros d amadray-net Andrawəs; Yaquub, Yaxya, Filibus, Bartulamawəs, ¹⁵ Matta, Tuma, Yaquub wa n ag Alfay, Simḡon was itawannu wa Isaggatakken, ¹⁶ Yahuz wa n ag Yaquub əd Yahuzə Isxarəyuti wa z'akkaddalan ʔaysa.

ʔaysa əd tamattay

¹⁷ Dəffər awen izzəbbat dər-san ʔaysa adḡax, ibdad dəx ataxas iyyan a dəx təbdâd tamattay tagget ən nalkiman-net əd tamattay tagget a du-təfâlat akal ən Yahudəyya əd Yerusalam əd ḡərman win Tir əd Sidon əhanen tagadamayt n agaraw wa zəwwəran. ¹⁸ Aytədan en osân-du fəl ad əssəsəman y awa isasaxru ʔaysa, təwəzuzəyan dəx dəx təwərnawen-nasan. Izzozay dəx-san dəx win əhan kələsuf. ¹⁹ Tamattay en ketnet təgəmmay d ades ən ʔaysa fəlas tarna t-id-təgəmmadat təzuzəy-tan ketnasan.

Əššin əzzənəfan n aytədan a t-əllanən

²⁰ Iswad ʔaysa dəx nəttulab-net, inna:

«Təbbilalam kawanay
win sallaqqawnen iman-nawan dat Məşşina
fəlas Taymar ta n Məşşina ši-nawan.

²¹ Təbbilalam kawanay
win iha laz əmərədda
fəlas ad tayyawanam.

Təbbilalam kawanay
win hallinen əmərədda
fəlas ad tadzim.

²² Təbbilalam kawanay
win əkyadan aytedan,
əkkâsan-kawan dağ ammas-nasan,
rabbadan-kawan, ƣaşşadan ismawan-nawan
fəlas di-təlkəmam nak Ag Aggadəm.

²³ Dawatat, təfəliwəsam əzəl wədi,
fəlas təlâm arozan aggotnen dağ jənnawan.
Arat wa dawan-əgan əddi
ənta iman-net a əgan marawan-nasan y ənnəbitan.

²⁴ Mişan kawanay iməggərgas
iket alƣazab iqqâl-awan,
fəlas awa əran man-nawan iha ifassan-nawan.

²⁵ Iket alƣazab iqqâl-awan
kawanay win əyyəwannen əmərədda,
fəlas ad tullazam.
Iket alƣazab iqqâl-awan
kawanay win dazzino əmərədda,
fəlas a dağ-wan tagu təfəyyawt, talim.

²⁶ Iket alƣazab iqqâl-awan
kawanay win əmmalan aytedan;
a dida a əgan marawan-nasan y ənnəbitan win bahu.»

Tara n aytedan

²⁷ «Kawanay win di-əssəsammen amaran, ənnəƣ-awan: "Iriwat izənga-nawan, ad tətamazalam əlluƣ i win kawan-əkyadnen. ²⁸ Tattarat a igan arraxmat i win kawan-sawarnen allaxanat, tansəyam Məşşina a igan alxer i win dawan-tagginen tarşəxşad. ²⁹ As dak-iqqas awedan, takfaq-qu amdəd-nak wa hadan. As dağ-ak irkab awedan əbərnuz-nak, alƣaşşaba-nak da ayy-as-tu. ³⁰ I kay-onsayan takfaq-qu. Ad wər təgməya dağ awedan a kay-d-issuƣəl awa dağ-ak irkab."»

³¹ «Arat was təram a dawan-t-agin aytedan, agat-asan-tu kawanay da. ³² Kud wər tarem ar aytedan win kawan-əranen, awak ma imos aroz wa za təgrəwam? Wala ark aytedan da ərân aytedan win tan-əranen. ³³ Kud wər tətəggim a olaƣan ar i win dawan-tu-tagginen, awak ma imos aroz wa za təgrəwam? Wala arak aytedan taggin adi. ³⁴ Kud dəƣ wər təsəmərwisam ar aytedan win as tordam as a dawan-ərzəman, awak ma imos aroz wa za təgrəwam? Ark aytedan da tinəməkfin imarwasan garəssan fəlas əssânan as a tan-d-iqqəl awa sammarwasan ketnet.»

³⁵ «Kalar iriwat izənga-nawan, ad tətəggim y aytedan awa olaƣan, tətizəbənem i win dağ-wan əgməynen əzəbəna. Tagim adi ketnet da wər təgəm attama n a dawan-itəwəggu. Əddi ad igat aroz-nawan, təqqələm bararan ən Məşşina di n Amadkol fəlas ənta itaggu əlluƣ y aytedan win wər iha agoda əd win maksanan. ³⁶ Təggəzet-kawan təhanint ta təhat Abba-nawan.»

³⁷ «Ad wər tannim ark arat s awedan fəl a sər-wan wər itəwənnu. Ad wər təssəwəram awedan lahan fəl a kawan-wər-itəwəsəwər kawanay da. Sirufat, ad

təgrəwam təsureft. ³⁸ Hakkat, ad tətəwakfim. Təsəkət tolâxat, tədkârat, təssiksakat har təfətənxəl a dawan-z-itəwəggin daɣ səbbətəran-nawan. Təsəkət tas təkkatam y aytedan ənta as dawan-z-ikət Məşşina.»

³⁹ Ig-asan deɣ Ƴaysa tangalt, inn-asan: «Awak əmədderyəl ifrâg alaway n iyyan əmədderyəl? As iga adi wərgəɣ ketnasan as z'uden daɣ anu? ⁴⁰ Attalami wər oger əşşex-net, mişan attalami kul wa issəxtaman, ad agdu d əşşex-net. ⁴¹ Mafəl təhannaya tezawt ta təhat şat n amadray-nak, kay amaran wər din-təgreɣ şiləlt ta təhat şat ta-nak? ⁴² Manəmmək as təganna y amadray-nak: "Ayy-i a dak-əkkəsəɣ tezawt ta təhat şat-nak?" As iga awen, kay iman-nak wər təhənnəya şiləlt ta təhat şat ta-nak. Əmunafiq, əkkəs təzzar şiləlt ta təhat şat-nak, əddi ad za tannaflayəɣ daɣ tazawt ta təhat şat n amadray-nak, təkəkəsəɣ-as-tat!»

⁴³ «Wər t-illa aşək isxân itârawan âratân əbrarnen, wala iyyan wər nəsxə itârawan âratân olaɣnen. ⁴⁴ Əkkulluk n aşək âratân-net as itawazday. Wər tənimidan aratan ən fig daɣ tazəyət, wala deɣ itanamad aɣyanab daɣ tamət. ⁴⁵ Awedan wa olaɣan, əlluy wa ihan əwəl-net a daɣ d-itakkas awa olaɣan, mişan anallabus ənta, talbast ta təhat əwəl-net a daɣ d-itakkas awa labasan. Awa idkaran əwəl n awedan a d-igammadan imi-net.»

Enalkim wa n tidət əd wa n bahu

⁴⁶ «Ma fel as di-təgannim: "Əməli, Əməli!" Mişan wər tətəggim awa dawan-ganna?»

⁴⁷ «Awedan kul wa di-d-itasin isasam y awal-in, itamazal s awa ənneɣ, a dawan-əmələ awedan wa s tu-z-ammattala. ⁴⁸ Immittalaq-qu s awedan ikarrasan ehan. Iɣaz wəllen har ewad təsəlit, ikras-du fall-as ehan-net. Dəffər awen osa-du əngəy issohen, irzak-ku mişan wər t-isammatakway fəlas təsəlit a fəl d-ikras.»

⁴⁹ «Amaran awedan wa isasaman y awal-in mişan wər sər-əs itəmizil, iha əlmital n awedan ikrasan ehan-net da wər t-iɣez. Osa-du əngəy, istab-as. Ibarajjat, iɣrad ahluk.»

7

Təhanint n Əlməsix

Əzuzəy ən Ƴaysa akli ən kabtan iyyan

¹ As iɣrad Ƴaysa emel ən salan win den kul i tamattay en, iggaz təɣrəmt ən Kafarnahum.

² Təɣrəmt ten ih-et kabtan iyyan ən sojitan n Ərrum ilân akli-net ikna tara irinan, ibuk y iba. ³ As isla kabtan en isalan ən Ƴaysa, izammazal sər-əs arət daɣ muzaran ən Kəl-Əlyəhud fəl a t-ansəyan a d-asu izzuzəy akli-net. ⁴ Osan-in Ƴaysa, onsayan-tu, ənnan-as: «Aləs a, ihôr a das-tagəɣ tənəfust ta, ⁵ fəlas irâ tamattay-nana, ənta fadda a danəɣ-issəkranan ehan-nana wa n əlɣibada.»

⁶ Təzzar iddew dər-san Ƴaysa. As din-ihoz Ƴaysa ehan, izammazal-du sər-əs kabtan en imidawan-net y a das-annin: «Əməli, ad wər təsəlliyəɣəɣ iman-nak, nak wər əwedəɣ ad təggəzəɣ ehan-in. ⁷ Adi da fəl kay-in-wər-oseɣ nak iman-in. Annu arət ɣas ad izzəy amaşşəɣal-in. ⁸ Əssâna daɣ adi fəlas awedan a əmosəɣ a daɣ əttafan wiyyad tanat, əttâfaq-qat nak iman-in daɣ sojitan win daw-i əllanen. As ənneɣ y iyyan: "Aglu", ad aglu, as ənneɣ y iyyan: "Iyyaw", a di-d-asu. As ənneɣ y əkli-nin: "agu awa", ad t-agu.» ⁹ As isla Ƴaysa y awen, isammaklal sər-əs, imalallay-in aytedan win das-əlkammen, inna: «Ənneɣ-awan, wala Kəl-İsrayil wər daɣ-san ənəyəɣ awedan igân əzəgzan ewâdan wa iga aləs a.»

¹⁰ As din-əqqalan meddan win əmmozaɣnen ehan, osan-in akli wa irinan izzây.

Əsənkər ən Ƴaysa əmawad iyyan daɣ təmattant

¹¹ Dæffer awen ikka ʒaysa aʒræm iyyan igân esəm Nayn, æddewan dær-æs nættulab-net æd tamattay tagget. ¹² As din-ihoz imi n aʒræm immənay d aytedan aggotnen ewaynen ənəmmettən y a t-in-ənbəlan. Aləs wa n ənəmmettən en, wær tēla anna-net ar ənta, abba-net deʒ wær idder.

¹³ As tat-inay ʒməli tēsahhanatat-tu, inn-as: «Ayyu tala.» ¹⁴ Ikka-du ənəmmettən, idas tēssut ta daʒ immeway, əbdadan aytedan win t-ewaynen, tēzzar inna: «ʒməwad ənneʒ-ak: ʒnkar!» ¹⁵ Iqqim-du aləs wa aba, iššewal, issoʒal-tu ʒaysa y anna-net.

¹⁶ ʒməyan aytedan kul, ad əmmalan Məššina gannin: «ʒnnəbi zəwwəran a d-inafalalan daʒ-na, Məššina osa-du tamattay-net fəl a daʒ-as issən.»

¹⁷ Tēzzar tēffəzzat sallat ən ʒaysa daʒ akal ən Yahudəyya ketnet, æd kalla win tu-ʒalayʒalaynen.

ʒaysa æd Yaxya wa isalmaʒan aytedan daʒ aman

¹⁸ Igraw Yaxya isalan win den kul ʒur attalamitan-net. Iʒra-du əššin daʒ-san, ¹⁹ izammazal-tan s ʒməli ʒaysa y a das-annin: «Awak kay da was nəqqəl y a d-asu, meʒ ak ad nəssəgəd y iyyan?» ²⁰ As din-osan ʒaysa, ənnan-as: «Yaxya wa isalmaʒan daʒ aman a dana-d-izammazalan sər-ək, inn-ak: "Awak kay da was nəqqəl y a d-asu, meʒ ak ad nəssəgəd y iyyan?"»

²¹ Assaʒat ten da iman-net, izozay daʒ-as ʒaysa aytedan aggotnen daʒ təwərnawen æd təlawayyen æd kələsuf, issəsəwad deʒ iməddəʒal aggotnen. ²² Ijjəwwab ʒaysa i meddan win sər-əs d-əmmozaalnen, inn-asan: «ʒqqəlat Yaxya tēssuʒəlam-as awa tənəyam d awas təslam, tannim-as: Iməddəʒal əhannayan, inəbdan jawanken, aytedan win igraw kətru əzzayan zaddogan, imzagan əgrawan tesalay, inəmməttan nakkarand-du daʒ təmattant, šiləqqawen deʒ sallanat y ʒlinjil. ²³ Ibbilal awedan wa wær igmed əzəgzan-net fəlas wær iʒa aššak daʒ awa əmosa.»

²⁴ As əgla meddan win d-izammazal Yaxya, issənta ʒaysa amagrad i tamattay daʒ batu ən Yaxya, inna: «Ma imos arat was təkka əsuf y a tu-tənəyam? Awak telant isiwəliwil aʒu? Kala! ²⁵ Daʒ adi ma təkka y a t-id-tənəyam? Awak aləs ilsân tabdoq təkna t šihsay? Kala! ʒnəyat za aytedan win əlsanen tabdoq ta təhossay, əgân deʒ tēməddurt daʒ ənniflayan, inan ən mənokalan a əhan. ²⁶ Adi za ma təkka y a t-id-tənəyam? Awak ənnəbi? Wəllen z'âs ənnəbi. Amaran Yaxya ogar tišit n ənnəbi fadda. ²⁷ Fəlas Yaxya ənta a fəl ənnan ʒlkəttaban: "ʒnəy za a dat-ək assaʒlay anammazul-in a z'aknin tarrayt-nak."

²⁸ ʒnneʒ-awan, wær kala a d-ihəw awedan ogaran Yaxya; dər iʒa awen da wala ʒas wa ogaran tēmmedrəyt daʒ Taʒmar ta n Məššina, da ogar Yaxya.»

²⁹ Aytedan win əslanen y awal ən Yaxya, harkid nabazan n amana, kul əqbalan as tarrayt ta n Məššina ənta a toʒadat, adi a fəl ərdan issəlməq-qan Yaxya daʒ aman. ³⁰ Mišan Farisaytan æd musanan n ʒttawret, əntanay əssəknan əs tugəyt ta əgan s a tan-issəlməʒ Yaxya daʒ aman, iba ən tərəddawt-nasan s awa ixtas Məššina.

³¹ Inna ʒaysa: «Mas z'ammattalay aytedan n azzaman win nəha da? Awak ma dər olan? ³² Olân æd bararan əqqimnen daʒ əssuk tinəməʒrin gannin: "Nəwat-awan tende, mišan wær təwəyam! Nəg-awan isakkan ən təfəyyawt, mišan wær təlem!"»

³³ «ʒnneʒ-awan adi fəlas Yaxya wa isalmaʒan aytedan daʒ aman as d-osa, issigat əzum wær isəssu deʒ esmad n alʒanab, tənnam əgəəsuf a t-izdayan. ³⁴ Amaran, nak Ag Aggadəm ose-du, ətatta əsassa, mišan tənnam: "ʒnawat aləs wen n amawwalay en, isassin esmad s igət, imos əmidi ən nabazan ən takəsən d ark aytedan!"»

³⁵ Masnat ta du-təfalat Məššina amaran, aytedan kul win əhanen tarrayt ta n Məššina, əntanay a sataddinen aqqad-net.

Agaraw wa təga təntut iyyat təsureft ən bakkadan-net

³⁶ Igmay Farisay iyyan dağ Ƴaysa a çur-əs atšu. Təzzar ika Ƴaysa ehan ən Farisay wen, saççamaran ad tamansawan. ³⁷ Wala a ihogan tərəz-du təntut iyyat ən tanasbakkadt təhât ayrəm en da, təslât as Ƴaysa imigarat i Farisay wen. As du-tosa tewây butalay n alwardi. ³⁸ Təmal-du dəffər Ƴaysa, çur daran-net ad təhallu har təssəbdag idaran ən Ƴaysa əs məttawan-net, təmmas-tan əs jəkkad-net. A dasan-tətamallat tənəqqal fall-asan alwardi.

³⁹ As inay Farisay wa isimuguren Ƴaysa awen, inna dağ man-net: «Ənnar imos aləs a ənnəbi, issən as təntut ta tu-təddasat da, tanasbakkadt.» ⁴⁰ Inn-as Ƴaysa: «Simçon, a dak-annaç arat.» Inn-as Simçon: «Şiwəl, Əşşex!»

⁴¹ Inn-as Ƴaysa: «Kala a t-illa aləs iyyan irwâsan əşşin meddan. Iyyan irwâs-tu səmmosat təmad ən tamma n əzrəf, wa hadan irwâs-tu səmmosat təmərwen. ⁴² Dad wər əlen as ərzaman, oyy-asan awa tan-irwas. Awak ma tənney məni dağ-san wa tu-z-iren wəllen?» ⁴³ Inn-as Simçon: «Ordeç as was oyya əmarwas wa aggen.» Inn-as Ƴaysa: «Tidət-nak.»

⁴⁴ Amaran imalallay-in tantut təzzar inna i Simçon: «Təhannayaç tantut ta? As d-əggazaç ehan-nak wər di-təkfeç aman əs əşşorada idaran-in, mišan ənta təssəbdak-kan əs məttawan-net təmas-tan əs jəkkad-net. ⁴⁵ As d-oseç ehan-nak wər di-du-təssəlkada, mišan ənta a d-oseç tətamallat i daran-in fəl saçmar a di-təga. ⁴⁶ Kay wər təzwayaç eçaf-in, mišan ənta idaran-in a fəl tənçal alwardi. ⁴⁷ Adi a fəl dak-ənney: tara zəwwərat ta di-təssəkna təsitadda as ibakkadan-net tiwasarafan-as kul kuddeç əggətan; mišan awedan wa igrawan təsureft n a əndərran, ənta tara-net ši əndərrat.»

⁴⁸ Təzzar inna Ƴaysa i təntut ten: «İbakkadan-nam tiwasarafan-am.» ⁴⁹ Ad gannin aytedan win dər-əs ədrawnen imensewan dağ man-nasan: «Ma imos wa dağ awedan as wala ibakkadan isuruf-tan y aytedan?» ⁵⁰ Amaran inna Ƴaysa i təntut ten: «Əzəçzan-nam a kam-içlasan, aglu dağ alxer.»

8

Ƴaysa isasaçru əs tangalen d əlmitalan

Aytedan win tidawnen əd Ƴaysa

¹ Dəffər awen illil Ƴaysa içərman əd təçarmaten immâl y aytedan Əlinçil, imosan isalan ən Taçmar ta n Məššina. Əddewan dər-əs nəttulab-net win maraw d əşşin. ² İddew deç əd tədoden as šiyyad kələsuf a dağ-asnat ikkas, šiyyad šiwərnawen a daç-qanat izzozay. Əmosnat Maryama Madəl, s ənta a d-əçmadan əssa kələsuf, ³ əd Jannata ta n təntut ən Xuza wa innəttafan əd taçawşiwen n əmənokal Herod, əd Suzana əd šiyyad şidoden aggotnen. Ketnasnat ədhâlnat Ƴaysa əd nəttulab-net s awa əlanat.

Əlmital wa n əmagyak

⁴ Wər t-illa ayrəm a du-wər-gəmmədan aytedan takkin-du Ƴaysa, təzzar təga fall-as tiddawat tagget, ig-asan əlmital wa: ⁵ «Kala ad igla əmagyak iyyan y ad inbəl amasa-net. Daç anabal wa itaggu den imosan anabas n amasa, ərtaknat təblalen šiyyad fəl tama ən tarrayt, təzzar əkkokalan dağ-asnat aytedan, ətşan-tanat gəçad. ⁶ Şiyyad ərtaknat daç adag əhanat təhun. As d-əçmadnat, əçqurnat fəl iba ən bəddug. ⁷ Şiyyad ərtaknat daç təfəssaç, ədwalnat dər-əsnaç, əlmaznat-tanat. ⁸ Şiyyad

ærtaknat daɣ amaɗal olâɣan, tæzzar ædwalnat. Ækkulluk ən tæblalt terâw temeday n iyyat.» As inna Ƴaysa awen idkal æmæsli-net inna: «Wa isallin, isəsəmet!»

Ma fel isasayru Ƴaysa s əlmitalan?

⁹ Dæffer awen æssəstanan-tu nəttulab-net d almaɣna n əlmital wa iga den. ¹⁰ Inn-asan: «Kawanay tægrâwam masnat daɣ æssiran ən Taɣmar ta n Məššina, mišan aytedan win hadatnen tangalen as dasan-ittəmal æssir wa, fəl ad iqqəl as "əswâdan, mišan wər hənnəyan; əssisaman mišan wər gərrin."»

Almaɣna n əlmital wa n əmagyak

¹¹ Iгла Ƴaysa iššewal, inn-asan: «Əlmital wədi almaɣna-net da: amasa əlmital a imos n Awal ən Məššina. ¹² Amasa wa irtakan fəl tama ən tarrayt, əlmital a imos n aytedan win əslanen y awal ən Məššina, mišan ad d-asu Iblis ikkəs-tu daɣ wallan-nasan fəl ad wər əzzəgzənan, əgrəwan efsan. ¹³ Amasa wa irtakan daɣ təhun, əlmital a imos n aytedan win əslanen y Awal ən Məššina, əqbalan-tu əs man filawasnen, mišan wər ila awen ekay, əzəgzan-nasan wər itihag. As tawajarraban, a tan-igməd. ¹⁴ Amasa wa irtakan daɣ təfəssaɣ, əlmital a imos n aytedan win əslanen y awal ən Məššina əqbalan-tu, mišan as tan-ədgəzan aššawašatan n əddənet əd tara n əddənet d arak deranan, əssəfalan-du dənnəg awal wen, ad igdəl awen y əzəgzan-nasan alkamalat. ¹⁵ Amasa wa irtakan amaran daɣ amaɗal olâɣan, əlmital a imos n aytedan win əslanen y awal ən Məššina əlân iwəllan olâɣnen lammodnen, tæzzar əqbalan-tu, əttəfan-tu s əlluɣ, təgmad-tan-du tənfa fəlas əzmâran y arat kul.»

Tangalt ta n fətəla

¹⁶ Inn-asan Ƴaysa deɣ: «Wər t-illa awedan isarɣin fətəla tæzzar isəbbənbəy fall-as əɣəzu madəɣ ag-et daw tessat. Kalar əšiləy a tat-itaggu təšəššiləyt-net fəl ad ənəyan aytedan win du-taggzan ehan s ənnur-net. ¹⁷ Wər t-illa a iɣbâran əs wərgəɣ ad affaggu, wala iyyan istâran əs wərgəɣ a d-inənəfiləl, itəwəssən ezal a mallan.

¹⁸ Daɣ adi ənəkədat y əmmək was təsasamam. Awedan wa ilan, a das-itəwəšitu awa ila; wa wər nəla amaran, arat n awas iɣl il-ay da a daɣ-as attarmas.»

Imarwan ən Ƴaysa win tidət

¹⁹ Tosa-du anna ən Ƴaysa əd mədrayan-net, mišan orn-en a t-in-awədan fəl igət ən tamattay. ²⁰ Itawann-as: «Anna-nak əd mədrayan-nak əbdâdan-ak, ərân anay-nak.»

²¹ Mišan inn-asan Ƴaysa: «Anna-nin əd mədrayan-in aytedan win sasammen y awal ən Məššina, tamazalan s awa inna.»

Tarna ən Ƴaysa

Ƴaysa ila tarna fəl aɗu

²² Əzəl iyyan iggaz Ƴaysa aɣlal n aman ənta əd nəttulab-net. Inn-asan: «Nəxrəset agaraw əs tagadamayt-net ta hadat.» Tæzzar əgłan.

²³ Əgłân fəl aman as din-ibaz etəs Ƴaysa. Wala a ihogan igar-du aɗu issohen fəl agaraw, ad idakkar əɣlal aman, əggazan zega n a tan-atšin aman. ²⁴ Əhozan-du nəttulab Ƴaysa, a tu-sankaran daɣ etəs, gannin as: «Əššəx, Əššəx, nəhlak.» Inkar-du Ƴaysa isannarɣam y aɗu əd tanazzamaren takkinen ijənnawan, tæzzar ibdad aɗu, idrar arat kul. ²⁵ Amaran inn-asan Ƴaysa: «Ma iga əzəgzan-nawan?» Issirmaq-qan awen, isimaklal sər-san. Ad tinəmənnin: «Ma imos wa daɣ awedan as wala aɗu d aman ittâf daɣ-san tanat?»

Ƴaysa ila tarna fəl kələsuf

²⁶ Dæffer awen ewadan-in akal ən Garassenatan inimaylayan agaraw d akal wa n Galilaya. ²⁷ Da da ɣas a d-izzəbbat Ƴaysa aɣlal n aman ənta a das-d-issəlkad aləs iyyan əhân kələsuf. Aləs wen in əɣrəm ihan akal en da. Irəw as issənsa isəlsa, igmad

aḡaywan, ixsar daḡ zəkwan. ²⁸ Inay Ƴaysa ɣas, ad itakkas imaslan labasnen, təzzar issəjad i Ƴaysa, idkal əməsli-net wəllen inna: «Ya Ƴaysa wa n Barar ən Məşşina di n Amadkol ma daḡ-i tareḡ? Onsâyaq-qay a di-wər-təzəḡḡəba.»

²⁹ Innâ awen fəlas Ƴaysa a omaran aggəsuf wa t-ihan s a t-id-igməd. Iyyəwan-du sər-əs aggəsuf en əsənkər, karradan-tu aytedan əs sassaran əd təzabagawen mišan ad ixtəs awen kul, awəy-tu aggəsuf s əsuf. ³⁰ Issəstan-tu Ƴaysa, inn-as: «Ma esəm-nak?» Ijjiwwab-as inn-as: «Esəm-in Egan.» Inn-as aləs en awen fəlas kələsuf aggotnen a t-əhanen. ³¹ Ad tansayan kələsuf win t-əhanen Ƴaysa a tan-wər-issuku anu wa wər nəla eder. ³² Illât-tu əsəgən aggen ən ladayan ədânnen fəl tasaga ən təkəşwart. Onsayan kələsuf Ƴaysa y a tan-akfu turagat n ad əggəzan iladayan en, ikf-asan-tat. ³³ Əgmadan kələsuf aləs en, əggəzan iladayan. Təzzar ozalan-du ladayan fəl azagada ən təkəşwart ad titərəgtərigan daḡ agaraw, tattan-tan aman.

³⁴ As ənayan madanan ən layadayan awa igan den, ozalan, əgan isalan n awen daḡ əḡrəm en əd ɣələyɣələyan-net. ³⁵ Əglaan aytedan y ad ənəyan awa igan. As din-osan Ƴaysa ogazan-in ɣur-əs aləs wa əgmadan kələsuf, iqqim ɣur daran-net, ilsâ, təqqâl-t-idu deḡ tayttay-net, təzzar təggaz-tan tasa. ³⁶ Əgan daḡ-san aytedan win əgəyyatnen y awen isalan n əmmək was itawasafsa aləs wa daḡ tawakkasan kələsuf.

³⁷ Mišan ənkarand-aytedan kul win akal ən Garassenatan ad gammayan daḡ Ƴaysa a tan-ugag fəlas tasa a tan-təggəzat zəwwərat. Iggaz Ƴaysa aɣlal n aman iqqal. ³⁸ Onsay-tu aləs wa əgmadan kələsuf ad t-ayyu a dər-əs idaw, mišan issoḡal-tu Ƴaysa inn-as: ³⁹ «Əqqəl ehan-nak, təməla y aytedan iket n arraxmat ta dak-iga Məşşina da.» Təzzar igla ad immal daḡ əḡrəm en ketnet arat kul wa das-iga Ƴaysa.

Ƴaysa ila tarna fəl təwərnawen əd təmattant

⁴⁰ As iqqal Ƴaysa əsəlim wa hadan n agaraw, təssəlkad-as-du tamattay as ketnet təqqâl-as. ⁴¹ Alwaq wen da a d-osa aləs iyyan igân esəm Jayɣus imosan iyyan daḡ muzaran n ahan n əlɣibada wa n Kəl-Əlyəhud ən təḡrəmt ten. Issəjad dat Ƴaysa, ad t-itansay ad idawan s ahan-net, ⁴² fəlas elles təmosat wələt maraw elan d əşşin, s ənta ɣas a ila, a təbukat y iba.

Iddew dər-əs Ƴaysa, tətanabdaḡ fall-as tamattay. ⁴³ Tamattay en tah-et təntut təgât maraw elan d əşşin igammad-tat əzni. Tənyə təla-net kul daḡ nasmagalan, mišan wər t-illa awedan ifrâgan əzuzəy-net. ⁴⁴ Təhoz-du Ƴaysa sa sər təḡərden, tədas təbənək ən təkadkat-net, izzəkəkət əzni wa tat-igammadan tamazayt ten da. Təzzay.

⁴⁵ Təzzar inna Ƴaysa: «Ma di-idasan?» Iggad awedan kul as t-idâs, amaran inn-as Butros: «Əşşex, tamattay a ketnet as kay-taɣalayɣalay, təsâs-kay.» ⁴⁶ Mišan ya inna Ƴaysa: «Awedan iyyan idâs-i fəlas əfrâya i tarna iyyat as di-təgmad.» ⁴⁷ As təssan təntut ten as təffigga, təkka-du Ƴaysa təndaw-tat taysəst, təssəjad dat-əs, təmal-as dat aytedan kul əddəlil wa fəl tu-tədas əd təməzzəyt ta təga tamazayt ten da. ⁴⁸ Inn-as Ƴaysa: «Tabarart-in, əzəgzan-nam sər-i a kam-izzozayan, aglu daḡ alxer.»

⁴⁹ Harwada išşewal Ƴaysa as d-osa awedan iyyan a d-ifalan aḡaywan ən Jayɣus wa n əmuzar n ahan wa n əlɣibada ən Kəl-Əlyəhud, inn-as: «Allek aba-tat, mazzay d əddaguz n Əşşex.» ⁵⁰ Isla Ƴaysa y awen, inna i Jayɣus: «Ad wər tərməɣa, zəgzen ɣas, allek ad təzzəy.»

⁵¹ As din-ewad Ƴaysa ehan ən Jayɣus, igdal y aytedan ad t-əggəzan, wər oyya ar Butros əd Yaxya əd Yaqub d abba ən təbarart d anna-net. ⁵² Aytedan kul win əllanen den, hallan, sikalalan fəl təbarart mišan inn-asan Ƴaysa: «Ayyiwat tala, təbarart wər tat-aba, etəs ɣas a təga.» ⁵³ A daḡ-as tajaban fəlas əssânan as wər tədder. ⁵⁴ Təzzar iggaz Ƴaysa fəl təbarart, ibaz əfus-net, iyr-et, inn-as: «Tabarart ənker-du!» ⁵⁵ Əqqalan-tat-du man-net təbdad-du daḡ tamazayt ten da, təzzar omar-tan

Yaysa s a tat-akfin a tətša. ⁵⁶ Əhagan marwan ən təbarart, mišan irxam-asan Yaysa fəl amel n awen y awedan waliyyan.

9

Yaysa əd nəttulab-net win maraw d əššin

Əzəmmizəl ən Yaysa inəttulab-net

¹ İyra-du Yaysa inəttulab-net win maraw d əššin, ikf-en tarna d əlxəkum fəl kələsuf kul, ikf-en deş fərregat n əzuzəy ən təwarnawen. ² İzammazal-tan y ad agin isalan ən Taşmar ta n Məššina, əzzuzəyan deş imiranan. ³ Inn-asan: «Ad wər tawəyam wala daş əşikəl, gər z'iqqal tallaq wala aşrəg, wala allaw, wala azrəf, wala deş a okāyan təkadkat iyyadda. ⁴ As din-tosam aşrəm, ehan wa təggazam isammagarat-kawan, zabbatat daş-as har təgmədam aşrəm wədi. ⁵ Aşrəm təggazam wər kawan-əqbelan aytedan-net, as tu-təgammadam təbbikbakam-in əgodrar-net wa iwaran idaran-nawan, ilkām ad aggayyat awen fall-asan.»

⁶ Əqlan nəttulab, əllilan şixarmaten, ad əmmālan Əlinjil daş adag kul, zuzəyan daş-as deş imiranan.

Iduf wa iga Herod daş Yaysa

⁷ İsla Herod wa n amuzar n akal ən Galilaya aratan kul win itaggu Yaysa əd nəttulab-net, iqqan awen eşaf-net fəlas əllan-tu aytedan ganninen əs Yaysa: «Awen Yaxya wa isalmaşan aytedan daş aman a d-inkaran daş təmattant.» ⁸ Wiyyad gannin: «Awen ənnəbi İlyas a d-izzəbben.» Wiyyad deş gannin: «Awen iyyan daş ənnəbitan win ərəwnen a d-inkāran daş təmattant.»

⁹ İna Herod: «Yaxya, nak iman-in a d-issəfrasan eşaf-net, daş adi ma imos aləs wa fəl sallay aratan win?» Ad igammay Herod d anay ən Yaysa.

Əşətši ən Yaysa səmmos gim n aləs

¹⁰ Əqqalan-du nəmmuzal, əssoşalan i Yaysa awa əgan kul. Təzzar igmad dər-san aytedan s adag issufan a din-ikitayyen, ihan anamod ən təşrəmt ta n Betsayda. ¹¹ Mišan təsla tamattay awen, təlkam-as. İg-asan Yaysa marxaba, təzzar işşewal-asan daş salan ən Taşmar ta n Məššina, izzozay daş-san win əddərarnen s awen.

¹² As təbuk təfuk y agadal, əhozan-t-idu nəttulab-net win maraw d əššin, ənnan-as: «Suşəl tamattay a, ad takku şixarmaten əd şawnatan win əhoznen, ad təgməy id tənşə d a tətša fəlas edag issufan awa.» ¹³ Inn-asan: «Satşat-tan kawanay iman-nawan da!» Ənnan-as: «Nakkanay wər nəttef ar səmmosat təgəlwen d əššin kifitan, kundaba za ad nəglā nazzanza-du imensewan i təxlək a kul.» ¹⁴ Edag ən səmmos gim n aləs a əllanen den. İna Yaysa i nəttulab-net: «Saşşamiwat aytedan kul, tagim-tan şiximten ən səmmosat səmmosat təmərwen n awedan.» ¹⁵ Əgan nəttulab awen da, saşşaman aytedan kul. ¹⁶ Təzzar idkal Yaysa səmmosat təgəlwen şin den d əššin kifitan win, iggəzzay ijənnawan, iga igodan i Məššina amaran ikaramkaram şigəlwen şin, iga awen da i kifitan, ikf-en i nəttulab-net y a tan-uzanan i tamattay. ¹⁷ Ətşan aytedan en ketnasan har əyyəwanan. Tawaşadawan-du karammutan win du-tawaglaznen, tawadnayan daş-san maraw əzmaman d əššin.

Awa inna Butros əs Yaysa

¹⁸ Əzəl iyyan itattar Yaysa şas-net, wər şur-əs illa ar inəttulab-net, dəffər awen issəstan-tan, inn-asan: «Awak daş iduf n aytedan, ma əmosa?» ¹⁹ Ənnan-as: «Wiyyad a gannin Yaxya wa isalmaşan aytedan daş aman a təmosa, wiyyad a gannin: ənnəbi İlyas, wiyyad deş a gannin iyyan daş ənnəbitan win ərəwnen a d-inkāran daş təmattant.» ²⁰ Təzzar inn-asan: «Kawanay za ma tənnam ma əmosa?» İnn-as

Butros: «Ēlməsix ən Məššina a təmosa.» ²¹ Issənkad Ƴaysa nəttulab-net, omar-tan s ad wər əməlan y awedan waliyyan isalan win den. ²² Inn-asan: «Nak Ag Aggadəm ilzâm-i ad ənəyax arkanay aggen, unkaran-i muzaran ən Kəl-Ēlyəhud əd muzaran ən limaman əd musanan n Ēttawret, təwəggin man-in, ənkəra-du dəx dəx təməttant əzəl wa n karad.»

Ləkkum i Ƴaysa

²³ Dəffər awen inn-asan ketnasan: «Wa iran a di-ilkəm, wədi igmədet tara ən man-net, agu imateran-net idkəl təgəttawt-net akk əzəl, ilkəm-i. ²⁴ Ēssənət as awedan wa wər nəgəmməy ar aggaz ən man-net, wədi ad t-əgmədan, mišan wa iqbalan ad t-əgmədan fəl əddəlil-in, wədi ad ixləs. ²⁵ Ma z'aknu y awedan ad igrəw əddənət ketnet, ənta issixrak iman-net, iffota dəx alaxirat? ²⁶ Awedan kul wa isakkarakad ləkkum y-i, madəx isikarakad-tu əsuxəl n awal-in, wədi nak da, Ag Aggadəm, a di-isəkkərəkəd əlqəbulat-net əzəl wa du-z-əqqəla aheç tanaya-nin, təmosat tanaya ta n Abba, təmos dəx ta n angalosan a zaddoggen. ²⁷ Ēggəyyey əsilakanax-awan as, wiyyad dəx-wan əbdâdnən da da, wər tan-z-iba wər ənayan Taçmar ta n Məššina.»

Ētəwənanay ən tanaya ən Ƴaysa

²⁸ Edag n ətəm adan dəffər igi wa dasan-iga Ƴaysa batuten šin den, inkar iddew əd Butros əd Yaxya əd Yaqub s ədçax iyyan fəl a fall-as ansəy Məššina.

²⁹ Itattar den da as imməttay udəm-net, təzzar əgan səlsa-net təməllay tətassamat. ³⁰⁻³¹ Ēhinan-in oggân ənnəbi Musa d ənnəbi Ilyas dəx tanaya ən Məššina, mišawalan əd Ƴaysa dəx batu n agamad wa z'agu əddənət a z'attaddin dəx Yerusalam əs təməttant-net.

³² As itaggu awen Butros əd midawan-net ibâz-tan-in etəs. As d-ənkaran ənayan tanaya ən Ƴaysa, ənayan dəx əššin meddan win dər innəbdad. ³³ As iggaz ənnəbi Musa d Ilyas šin əgəlli, inna Butros i Ƴaysa: «Ēššex, olâx as nəlla da. Ēndawat ad nəkrəs karad həktan: iyyan i-nak, iyyan in Musa, iyyan in Ilyas.» Wər issen Butros a igannu den. ³⁴ Igannu Butros awen da as du-tənafalal təgarak iyyat, təlsa Ƴaysa d ənnəbitan əššin win dər innəbdad. As təlsa Butros əd midawan-net, təggaz-tan tasa. ³⁵ Igməd-du əməsli təgarak ten, inna:

«Awa Barar-in
wa sannafranax,
səsəmat-as.»

³⁶ As tənda batu ten, wər hənnəyan nəttulab ar Ƴaysa. Ēffəstan fəl awen, wər t-illa awedan əs t-əmâlan dəx adan en.

Ēzuzəy ən Ƴaysa barar iha aggəsuf

³⁷ As əzəl wa ilkaman i wen, izzəbbat-du Ƴaysa əd nəttulab-net win karad en adçax, təzzar təssəlkad-as-in tamattay təgget. ³⁸ Wala a ihogan idkal aləs iyyan dəx ammas ən tamattay en əməsli-net, inna: «Ya Ēššex, onsayaq-qay a di-təhənətteç i barar-in, ənta ças a ələç. ³⁹ Aljayn a t-itabazan, təzzar ad izayyak, itizəbərdil, isakafkaf. Gərrid as t-itayyu, issikn-ay alçazab. ⁴⁰ Onsəyax inəttulab-nak a dəx-as t-əkkəsan, indar-asan.»

⁴¹ Təzzar inna Ƴaysa: «Xa! Iket iba n əzəgzan d əššur dəç aytedan n azzaman a! Awak har əmmay əddewa dər-wan, əzmâraç-awan? Awəy-du barar-nak.» ⁴² As d-ihoz barar Ƴaysa, iggədl-ay aggəsuf, ad itizəbərdil. Iharaššat Ƴaysa aggəsuf, ikkas-tu dəç barar, izzay, issoçal-tu y abba-net. ⁴³ Aytedan kul təsimaklal sər-san təzzəwwərt ən tarna ən Məššina.

Emel ən Ƴaysa təməttant-net

Harwada isimaklal s aytedan arat kul wa iga Ƴaysa den, as inna i nəttulab-net: ⁴⁴ «Təggəzet batu ta šiməzzugen-nawan, təttafam-tat: "Nak Ag Aggadəm əjwâra ad

əggâzaḡ ifassan n aytedan."» ⁴⁵ Mišan wər əgren batu ta dasan-iga den, ittinkal-asan almaḡna-net fəl a tat-wər-agrin, amaran tah-en tasa n əsəstan-net.

Tamazaq gər nəttulab

⁴⁶ Tənkər tamazaq gər nəttulab ən Ƴaysa daḡ batu ən wa daḡ-san ogaran almaḡam. ⁴⁷ Issân Ƴaysa awa samadranan, a di fəl d-idkal arat ən barar iyyan issəbdad-tu dəḡma-net, ⁴⁸ amaran inn-asan: «I iḡbalan barar a, fəl əddəlil-in, nak a iḡbal. I di-iḡbalan deḡ, wa di-d-izammazalan a iḡbal. Wa daḡ-wan wər nəmos arat, ənta a zəwwəran.»

Esəstan daḡ batu n aləs itakkasan kələsuf daḡ aytedan

⁴⁹ Inna Yaxya i Ƴaysa: «Əššəx, nənây aləs iyyan itakkasan kələsuf daḡ aytedan s esəm-nak, nənn-as ad wər iləs igi n awen, fəlas wər danaḡ-iha əs ləkkum y-ak.» ⁵⁰ Inn-as Ƴaysa: «A das-tu-wər-təḡdəlam, fəlas i wər nəḡəmməy təkma-nawan, wədi əmidi-nawan.»

Iki ən Ƴaysa Yerusalām

Arat wa ilzaman ənalkim ən Ƴaysa d alak wa das-insan

Tuḡəyt ən təxrəmt iyyat ən Samarəya s əlqəbulat ən Ƴaysa

⁵¹ As d-əhozan adan win daḡ z'assandu Ƴaysa arat wa ixtas Məššina, a t-imosan əmədkəl-net əs jənnawan, isaggatakkat y iki n əxrəm ən Yerusalām. ⁵² Issəḡla inammazalan dat-əs, əkkan təxrəmt iyyat n akal ən Samarəya y a das-aknin edaḡ n əzəbbi. ⁵³ Mišan ugayan aytedan ən təxrəmt ten s a dasan-iməḡurət fəlas ikkâ Yerusalām.

⁵⁴ As inay Yaḡub əd Yaxya win nəttulab-net awen, ənnan: «Əməli, tareḡ ad nannu i təmsay a fall-asan du-tazzabbat, təsərrəkəmmət-tan?» ⁵⁵ İmalallay-tan-in Ƴaysa, isannarḡam-asan, ⁵⁶ təzzar okayan əs təxrəmt iyyat.

Awa ihan ləkkum i Ƴaysa

⁵⁷ Jiwanke as inna aləs iyyan i Ƴaysa: «A dak-əlkəma s adag kul wa təkke.» ⁵⁸ Inn-as Ƴaysa: «İzagazan əlân enwan, igəḡad deḡ əlân šisəllula, mišan nak Ag Agḡadəm wər ələḡ wala edaḡ daḡ əssənsa əḡaf-in.»

⁵⁹ Inna Ƴaysa y iyyan aləs: «Əlkəm-i.» Təzzar inn-as: «Əməli, akf-i turagat n ad aḡla har din-ənbəlaḡ abba-nin təzzar.» ⁶⁰ Mišan inn-as Ƴaysa: «Ayyu inəmməttan ad ənbəlan inəmməttan-nasan, kay amaran, aḡlu taga y aytedan isalan ən Tayḡmar ta n Məššina.»

⁶¹ Inn-as iyyan aləs: «Əməli, areḡ a dak-əlkəma, mišan akf-i turagat n ad nəməḡḡa d aytedan-in šiwatriwen təzzar.» ⁶² Inn-as Ƴaysa: «Awedan wa issəntan daḡ ləkkum y-i, mišan wər iga awen s əwəl iyyanda, wədi wər ihor əd Tayḡmar ta n Məššina.»

10

Əzəmmizəl wa iga Ƴaysa inəttulab win əssayət təmərwən d əššin

¹ Dəffər awen isannafran Əməli wiyyad inəttulab əmosnen əssayət təmərwən d əššin, izammazal-tan s əššin əššin y a das-in-izaran əs ḡərman əd daggan win as ibuk y a tan-immər. ² Inn-asan: «Ḳarat təḡḡət, mišan wər əḡḡətan maššəḡalan win tat-z-aləynen. Daḡ adi əttərat s esəm ən məššis ən ḡarat ta, a d-assaḡlu imaššəḡalan a tat-olaynen. ³ Aḡlat! Zimazalaḡ-ḡawan təmosam zun jamaran əhanen ammas ən ridalan. ⁴ Ad wər təwəyam azrəf wala aḡrəḡ wala təsəsəl ta n sanatat. A kawan-wər-səllulen assalaman daḡ tarrayt.»

⁵ «Ehan tēggazam, tēgəram fall-as assalam tēzzar. ⁶ Kud ih-ay awedan n alxer, wədi a kawan-iqbəl, igrəw alxer-nawan. Kud deɣ wər t-iha, wədi takəyam d alxer-nawan. ⁷ As tēgrawam ehan n awedan n alxer, təxsəram daɣ-as. Tatšim, tašwim awa kawan-itawakfan, fəlas amaššaxal kul ihor d alxaq-net. Ad wər tilalam inan.»

⁸ «Aɣrəm a din-tosam deɣ əqbalan-kawan məssawəs, tatšim arat was kawan-sammagaren, ⁹ tēzzuzəyam imiranan win t-əhanen, tēzzar tannim y aytedan-net: "Taymar ta n Məššina tēhōz-kawan-du." ¹⁰ Mišan aɣrəm a din-tosam wər kawan-əqbelan məssawəs, ilalat tarrayen-net tēgannim: ¹¹ "Tēggiyem as wala aboqqa n əɣrəm-nawan wa iwaran idaran-nana da nəbbikbakk-in, mišan əssənat as Taymar ta n Məššina tēhōz." ¹² Ənneɣ-awan, əzəl wa n tabadday, aytedan n əɣrəm wədi, ad agin alɣazab ogaran wa z'agin win əɣrəm wa n Sədom.»

¹³ «Iket alɣazab iqqâl-awan kəl-aɣrəm ən Koradzin! Iket alɣazab iqqâl-awan kəl-aɣrəm ən Betsayda! Fəlas təlməɣjujaten šin ɣur-wan əganen ənnar əgānat daɣ əɣrəm ən Tir əd wa n Sidon, wədi irəw as əqqanan isəlsa ən bəhu əqqiman daɣ eɣəd, imos awen əsənnəfiləl n as əhdän. ¹⁴ Awen daɣ a fəlas, alɣazab wa za tagim əzəl wa n tabadday ad agər wa z'agin aytedan n əɣrəm ən Tir əd wa n Sidon. ¹⁵ Kawanay aytedan n əɣrəm wa n Kafarnahum, adis ad tammadkalam s aljannat? Kalar Jahannama a daɣ za tətəwəgaram.»

¹⁶ Inna ɣaysa deɣ i nəttulab-net: «Awedan wa dawan-issəsaman, nak as issəsam; wa kawan-inkuran deɣ, nak a inkur. Amaran wa di-inkuran, wədi wa di-dizammazalan a inkur.»

Tewaylay ən nəttulab ən ɣaysa win əssayət təmərwen d əššin

¹⁷ As d-əqqalan nəttulab win əssayət təmərwen d əššin, əknân təfalawist, gannin i ɣaysa: «Əməli, wala kələsuf əttâfan tənna-nana as dasan-nəɣra esəm-nak!»

¹⁸ Tēzzar inn-asan ɣaysa: «Hannayax Aššaytan as d-ifataqqat daɣ jənnawan zun essam. ¹⁹ Əssənat as əkfeq-qawan tarna fəl taššolen əd təzurdam d awa ila azangaw-nana Iblis kul daɣ tarna. Wər t-illa a ifrâgan a dawan-agu təkma. ²⁰ Mišan a kawan-wər-isəfəliwəs as əttâfan kələsuf tənna-nawan, kalar isəffəliwəset-kawan akatab wa əgan əsmawan-nawan daɣ aljannat.»

Tədəwit ən ɣaysa

²¹ Assaxat ten da ad ikna Infas wa Zəddigan əsəddəwi ən ɣaysa, tēzzar inna: «Əgeɣ-ak təmmalen ya Abba, Əməli ən jənnawan d amaɖal fəl aɣabar wa tēgeɣ aratan win i musanan, əd malan ən tayttay, təsannafalalaq-qan y aytedan win wər nəzlay əd bararan; id adi da a imosan agna-nak ya Abba. ²² Arat kul ig-ay Abba-nin daɣ əfus-in, wər t-illa i issanan awa əmosa ar Abba, wər t-illa deɣ i issanan awa imos Abba ar nak an Barar-net d awedan was areɣ a das-tu-sənnəfiləla.»

²³ Imalallay-in ɣaysa inəttulab-net, iššewal-asan əntanay ɣas, inn-asan: «Əbbilalnat šittawen šin hannaynen awa tēhannayam! ²⁴ Silakanax-awan as sidaranan ənnəbitan aggotnen əd mənokalan anay n awa tēhannayam, mišan wər t-ənayan, sidaranan deɣ tesalay y awas təsallim, mišan wər das-əslen.»

Awa izlayan ənalkim ən ɣaysa d aytedan win hadatnen

Əsəstan wa iga əmusan n Əttawret i ɣaysa

²⁵ Dəffər awen inkar-du əmusan n əššəriɣa iyyan iga i ɣaysa əsəstan imosan tənagmayt, inn-as: «Əššex, mas di-ilzam igi-net, y ad əgrəwa tēməddurt ta təɣlalət?»

²⁶ Inn-as ɣaysa: «Ma iktaban daɣ Əttawret? Ma daɣ-as təɣreɣ?» ²⁷ Ijjəwwabas, inn-as: «Iktâb daɣ-as as: "Ad tireɣ Əməli-nak Məššina s əwəl iyyanda, əd man ərdânen, tireq-qu əs təɣurad-nak kul əd tayttay-nak kul, tireɣ deɣ əšəqqax-nak əs

təmawit tas tarex iman-nak."» ²⁸ Inn-as Ƴaysa: «Aljawab-nak oḡâd, taggu adi da ad tæddæra.»

Elmital wa n aw Samaræya wa olaxan

²⁹ Mišan dad ira æmusan wen ad aknu batu-net, inna i Ƴaysa: «Ma imosan za æšæqqax-in?»

³⁰ Ijjæwwab-as Ƴaysa s ælmital wa, inn-as: «Alæs iyyan a d-igmadan aḡræm æn Yerusalem, iras ikka wa n Yerikaw har t-ægrawan baydagan. Æbazan daḡ-as awa ila, æggâtan-tu, as t-oyyan illa gær tæmæddurt d iba. ³¹ Imazayyat d awen d as d-iga ælimam iyyan tarrayt ten. Inay alæs wen, iḡlay-tu. ³² Illam-du iyyan daḡ Kæl-Lebi ænta da den, inay-tu, iḡlay-tu. ³³ Mišan as d-illam aw Samaræya iyyan den iššokalan, inay-tu, tæggaz-tu tæhanint-net. ³⁴ Ikk-ay-du, iššorad ibusan-net s azzayt d esmad n alḡanab, ittal-tan, tæzzar issæwan-tu tæsænæyt-net, eway-tu s azazzabbaw, issan daḡ-as. ³⁵ As affaw, idkal-du æššin dinaran n æzræf ikf-en y alæs wa innættafan d azazzabbaw, inn-as: "Æssæn daḡ alæs di, as d-æqqala, nak a dak-z-irzæman arat kul wa fall-as tænḡeḡ, kud ænta ogar adi."»

³⁶ Amaran inna Ƴaysa y æmusan n Ættawret wen: «Mæni daḡ meddan win karad a, was tordeḡ as ænta a igan y alæs wa ænḡan baydagan a amazal wa itaggu awedan y æšæqqax-net?» ³⁷ Inn-as: «Wa das-ihanatten.» Inn-as Ƴaysa: «Adi za aglu, taga kay da zun d awen daḡ.»

Maryama æd Marta

³⁸ Iгла Ƴaysa daḡ æšikæl-net ænta æd nættulab-net har iggaz taḡræmt iyyat innæftay i tæntut tægât esæm Marta. ³⁹ Tantut ta tæla tæmadrayt-net tægât esæm Maryama. Tæqqim Maryama ḡur daran n Æmæli Ƴaysa, tæssisam y awa igannu. ⁴⁰ Marta amaran, išimašan-tat æššæḡæl n æsæmmæguri æn Ƴaysa.

Wala ihogan tæhoz-du Ƴaysa, tænn-as: «Æmæli, awak zælæyat a wær tægeḡ daḡ as di-toyya tamadrayt-in d æššæḡæl ketnet ḡas-in? Ann-as a di-tilal.» ⁴¹ Inn-as Ƴaysa: «Marta, Marta! Æššiwašan-kam aratan aggotnen, æssiggadan tayttay-nam. ⁴² Ænta arat iyyanda as tæga addararat olâḡ a t-imosan æsæsæm y awal-in, ænta a tæsannafran Maryama, amaran wær daḡ-as z'ættærmæs.»

11

Tæwatray æn Ƴaysa

¹ Æzæl iyyan itattar Ƴaysa daḡ adag iyyan. As issænda, inn-as iyyan daḡ nættulab-net: «Æmæli, susæn-ana tæwatray zun awa iga Ƴaxya i nættulab-net.» ² Inn-asan Ƴaysa: «As tætattaram, tannim:

"Abba,

Itæwæsæḡmæret esæm-nak di zæddigan,
taset-du taḡmar-nak.

³ Akf-anax akk æzæl isudar-nana,

⁴ tæssuræfaḡ-anax ibakkadan-nana,

zund æmmæk as nakkanay da

næsuf i win danaḡ-æganen ark mazalan.

A dana-wær-taga daḡ alḡarar æn jarrabatan n Iblis."»

Gælleyat daḡ tæwatriwen

⁵ Inn-asan Ƴaysa deƷ: «Məni daƷ-wan wa z'ilen əmidi, as-ay-du adawannay n ahad ann-as: "Zəbənət-i-du karadat təgəlwen, ⁶ fəlas iyyan daƷ midawan-in a di-d-inneftayan, wər əleƷ a t-əššətšə." ⁷ Təzzar ann-as-du daƷ ammas n ahan: "A di-wər-tədgəza, ehan-in əmərədda ixfâl, nak əd bararan-in nəqqâl s etəs, wər əfrega a din-əbdədaƷ akfaƷ-qay arət."

⁸ ƏnneƷ-awan, kud wər d-inker akf-as-tanat fəlas imos əmidi-net, da ad d-inkər akf-ay arət kul was iddərər fəlas wər t-isakkarakad mansay wa t-iga den.»

Əzəgzan əs təwatriwen

⁹ Amaran nak ənneƷ-awan: «Ansəyat Məššina a kawan-akfu; əgməyat, ad təgrəwam. Kawkawat təsəhərt a dawan-tannalam; aƷrat-tu, a dawan-akkawan. ¹⁰ Awalla i onsayan ad itəwəkfu; i igmayan, ad igrəw, i iƷran deƷ Məššina, a das-akkawan.

¹¹ Məni daƷ-wan wa daƷ z'igməy barar-net isan, akf-ay taššolt? ¹² Wala igməy daƷ-as təkəkit akf-ay təzardəmt? ¹³ Kud kawanay an nəllubas təssānam tehakkay n awa olaƷan i bararan-nawan, manəmmək as kawan-wər-z-akfu Abba-nawan wa ihan ijənnawan Infas wa Zəddigan as das-tu-tonsayam?»

Iyyat təmazaq əd Farisaytan

Tarna ən Məššina meƷ tarna n Iblis

¹⁴ Dəffər awen ikkas Ƴaysa daƷ aləs iyyan aggəsuf a das-igaddalan awal. Igməd-tu aggəsuf Ʒas iššewal, isammaklal awen əs tamattay. ¹⁵ Mišan ad gannin wiyyad daƷ-san: «Awen Aššaytan BaƷalzabul, wa n əmənokal ən kələsuf a t-ikfan fərregat n ikus ən kələsuf daƷ aytedan.»

¹⁶ Wiyyad deƷ arān ad t-ajjarraban, gammayan daƷ-as a dasan-agu təlməƷjujat təmosat alƷalamat a du-təfələt Məššina. ¹⁷ Ƴaysa ənta issān awa samadranan, adi a fəl dasan-inna: «TaƷmar kul tas əmməgəran məssawəs gar-essan, əbərəjji a za tagu, təzzar əbərəjjen Ʒawnatan-net s iyyan iyyan. ¹⁸ Təgannim nak Aššaytan BaƷalzabul a di-ikfan fərregat n ikus ən kələsuf daƷ aytedan; kud adi a igan wədi manəmmək as za tihag taƷmar-net ənta iməggar əd man-net? ¹⁹ Amaran kud nak tarna ən BaƷalzabul as takkasay kələsuf daƷ aytedan, inalkiman-nawan za ma ilan tarna tas tan-takkasan? Adi da fəlas əntanay iman-nasan as kawan-z-əbəzan s əššəriƷa.

²⁰ Kud amaran nak tarna ən Məššina as takkasay kələsuf, daƷ adi TaƷmar ta n Məššina tos-iwan-du. ²¹ Aləs n əməqqərəd otāban fəl təzoli, ogāz ehan-net, wədi təla-net wər tat-in-ikka wala. ²² Mišan as t-id-ibag iyyan a t-ogaran assahat, orn-ay; a daƷ-as ibəz təzoli-net ta fəl iffəlla, irkəb daƷ-as təla-net, uzan-tat. ²³ Wa dər-i wər nəddew, azangaw-nin a imos; wa di-wər-nəllil deƷ s əšidəw, wədi əzəwwəziwəz a itaggu.»

Tewaylay ən kələsuf

²⁴ «As igmad aggəsuf awedan, ad irəs aggəsuf wen idaggan əqqurnen, igammay id imal, iqqim wər t-igrew, ad annu daƷ man-net: "Nak a za, ad əqqələƷ ehan-in wa d-əgmada." ²⁵ As t-id-iqqal, a t-id-asu ifrād, immotag. ²⁶ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanād, əzdəƷan-tu. Tagu taƷara n awedan wen aƷšud ogaran was kala tu-təga.»

Əbbələl wa n tidət

²⁷ Iššewal Ƴaysa den da as təkəl təntut iyyat əməsli-net, tənn-as: «Təbbilal təntut ta kay-terawat, əd fəfan win tənkasay.» ²⁸ Mišan inn-as Ƴaysa: «Aytədan win ogarnen əbbələl da əssəsammen y awal ən Məššina, tamazalan awa inna.»

AlƷalamat ta n Yunəs

²⁹ As inay Ƴaysa aytedan tiddawan fall-as, inn-asan: «Aytedan n azzaman win, inellubas; gammayan tælməxjujat! Kala! Tælməxjujat ta dasan-tətawaggat iyyadda Ƴas, a tat-imosan ta n ənnəbi Yunəs. ³⁰ Emmək was kala ad iqqal Yunəs alƳalamat y aytedan n əxrəm ən Ninif, əmmək en da as z'əqqəla nak Ag Aggadəm alƳalamat y aytedan n azzaman win. ³¹ Əzəl wa n tabadday, a du-tənkər təmənokalt tas kala təxkam fall akal n agala igân esəm Şeba, taggayyat fəl aytedan n azzaman win, təzzəbəz-tan y əşşərixa fəlas d ad iraz amaḍal a du-təgmad fəl ad təssəsəm y awal ən təla n əgərri wa itaggu əmənokal Suliman. Əssənət za as, wa illan da əmərədda, ogar ənnəbi Suliman mişan tugayam s a das-təssəsəmam. ³² Əzəl wa n tabadday, ad d-ənkəran aytedan n əxrəm wa n Ninif, əzzəbəzan aytedan n azzaman win y əşşərixa fəlas tətubt a əgan əzəl wa dasan-iga Yunəs təlxtubt, imal-asan awal ən Məşşina. Əssənət za as, wa illan da əmərədda, ogar Yunəs mişan tugayam əs tətubt.

Ənnur əd şiiyyay

³³ Wər t-illa awedan isarxin fətəla təzzar ixbər-tat, madəx ag-et daw əxəzu, kalar əsəwər a tat-itaggu edag ihhoken fəl ad ənəyan aytedan win du-taggaznen ehan s ənnur-net. ³⁴ Şat, şilat ən fətəla a təmos i təxəssa-nak. As imos as şat-nak təhannay s əlluş, wədi təxəssa-nak ketnet təha ənnur; mişan as imos as şat-nak wər təhənnəy s əlluş, wədi təxəssa-nak ketnet təha şiiyyay. ³⁵ Daş adi agu ənnəyat əd man-nak, ənnur wa kay ihan a tu-wər-alsinat şiiyyay. ³⁶ Amaran kud təxəssa-nak ketnet təha ənnur, wər tat-iha adag ihân şiiyyay; wədi ad təmələwlew ketnet, zun təhəx edag təsimalawlaw fətəla.»

Təlmənufəqa ən Farisaytan əd musanan n Əttawret

³⁷ Işrad Ƴaysa awal Ƴas igmay daş-as Farisay iyyan a Ƴur-əs ammansaw. Os-in Ƴaysa ehan ən Farisay wen, iggaz edag wa daş əskaran mensewan, isayxamar, ad itattu. ³⁸ Isammaklal əs Farisay en awas issənta Ƴaysa tettay wər işşorad ifassan-net awa tənna alƳadat-nasan. ³⁹ Təzzar inn-as Əməli Ƴaysa: «Kawanay Farisaytan, təzazdagam afalla n əsəlkəw d əxəzu, as iga awen, ammas ən wallan-nawan wər ədnayan ar tarkəbt əd talbast. ⁴⁰ Aljahilan! Wərgəx wa d-igan afalla ən təxəssa, ənta a d-igan ammas-net da? ⁴¹ Daş adi əkətət i təlaqqawen awa ihan ikassan-nawan, əddi arat kul a dawan-izdag. ⁴² Iket alƳazab iqqâl-awan ya Farisaytan, fəlas təhakkam awa imosan təməssədək-nawan daş ənnixnaş d əzzənəfan ən yelatan kul win fərgan, as iga awen, tətamazrayam əşşərixa ən Məşşina əd tara-net, s əntanay əs kawan-iwar ləkkum y-asan, da wər din-təglemam win hadatnen!

⁴³ Iket alƳazab iqqâl-awan kawanay Farisaytan, fəlas tərâm təximit daş adag wa ilan almaqam daş nan n əlxibada ən Kəl-Əlyəhud, d a kawan-saslaman aytedan daş sammanayan. ⁴⁴ Iket alƳazab iqqâl-awan, fəlas tolâm əd zəkwan wər nəmmun, fəl itijəwənkit awedan wər issen, samadasan-tu.»

⁴⁵ Inna iyyan daş musanan n Əttawret i Ƴaysa: «Əşşex, daş awa tənney əddi, nakkanay da, təgəx-ana arak batu.» ⁴⁶ Inn-as Ƴaysa: «Iket alƳazab iqqâl-awan kawanay da, imusanan n Əttawret, fəlas təsawaram aytedan əzuk as izzəwat aggay-net; kawanay amaran wər tu-za-tədəsəm əs wala idədwən-nawan.

⁴⁷ Iket alƳazab iqqâl-awan fəlas təkarrasam izəkwan hossaynen y ənnəbitan as imarawan-nawan a tan-ənyanen. ⁴⁸ Emmək wədi as təggiyyem fəl awa əgan, tərḍam sər-əs fəlas əntanay za ənyan-tan, kawanay amaran təkrasam izəkwan-nasan.

⁴⁹ Awen daş a fəl inna Məşşina daş masnat-net wər nəla təzərəst: "A sər-san zəmmizəlay ənnəbitan əd nəmmuzal, ad agin iman ən wiyyad daş-san, zəxəzzəban win hadatnen." ⁵⁰ Adi as, aytedan n azzaman win, əhân-tan man n ənnəbitan kul win tanwanyanen, wa n ənətti n əddənet har azalada. ⁵¹ Awalla, illikan as, aytedan n azzaman win, əhân-tan man n aytedan di kul, a d-ibazan Ƴur man win Habila

har win Zakarayya, wa ənğan daɣ Ahan wa Zəwwəran n Əlɣibada, gər majmar wa zəwwəran n əsəqqəd ən təkutawen d adag wa zəddigan.

⁵² Iket alɣazab iqqâl-awan ya imusanan n Əttawret, fəlas təharam tarrayt ta tətawayat awedan əs masnat ən Məššina; kawanay iman-nawan wər-tat-təggezam, təgdalam deɣ iguz-net i win t-əranen.»

⁵³ As ifal Ƴaysa ehan wen, əssintan musanan n Əttawret əd Farisaytan daɣ əddəguz-net wəllen, taggin-as isəstanan aggotnen, ⁵⁴ daɣ gammayan a tu-sassannin arat a tan-z-akfin tarrayt əs təxtəst-net.

12

Əsəmmutəg

A kay-wər-təggəz tasa n əzəgzan əs Ƴaysa

¹ As itaggu awen təddew tamattay təkənət igət fəl Ƴaysa, har əqqiman aytedan tinəməkukulan. İššewal Ƴaysa, azzar əs nəttulab-net, inn-asan: «Ənkədat i xamira wa n Farisaytan a t-imosan təlmənufəqa. ² Arat kul wa iɣbaran ad itəwəsənəfiləl, amaran əssir kul ad affaggu. ³ Daɣ adi, a tənnam daɣ šiyyay, ad itəwəslu ezal a mallan. A təsammataktakam deɣ daɣ ammas ən nan-nawan, ad attamal fəl fallatan-nasan.

⁴ Kawanay imidawan-in, ənneɣ-awan: Ad wər tiksadam aggadəm əs fərregat-net wər t-okay ikus ən man daɣ təxəssa. ⁵ A dawan-əmələɣ wa za tiksadam: İksadat Məššina a inaqqin, ila deɣ tarna n a kawan-igər daɣ Jahannama. Awalla, ənneɣ-awan ənta en da as kawan-iwar a tu-tiksadam.

⁶ Wərgəɣ səmmos gədad a din-nazzinen sanatat təfelen? Dər iga awen da za, wər tan-iha i din-itataw Məššina. ⁷ Kawanay amaran wala anzadan ən ɣafawan-nawan da kul əddunan. Daɣ adi ad wər tiksadam wala, togaram igədad aggotnen əlqimat.

⁸ Ənneɣ-awan, awedan kul wa iggəyyen dat aytedan as nak Ag Aggadəm a t-ilan, nak da, ad əggəyyəɣ dat angalosan ən Məššina as nak a t-ilan. ⁹ Mišan wa di-inkuran dat aytedan, wədi nak da ad t-unkarəɣ dat angalosan ən Məššina. ¹⁰ Awedan deɣ wa di-ibyanak nak Ag Aggadəm, ifrəg ad igrəw təsureft; mišan awedan wa ikkasan tarna y Infas wa Zəddigan, wədi wər z'igrəw təsureft.

¹¹ As təmmewayam əs nan n əlɣibada win Kəl-Əlyəhud, madəɣ əs mənokalan madəɣ əs muzaran y ad tətəwəšrəɣam; a kawan-wər-iššəwəš əmmək was za təkəkəsam iman-nawan, wala awa za tannim, ¹² Infas wa Zəddigan a kawan-z-issusənan daɣ assaɣat tədi da awas inahagga a tu-tannim.»

Əlmital n əməgğergəs wa wər nəla əgərri

¹³ Inna-du awedan iyyan i Ƴaysa daɣ ammas ən tamattay: «Əššex, annu y əmaqğar-in a dər-i uzan təkəsət-nana.» ¹⁴ Inn-as Ƴaysa: «Aləs, ma di-igan əlqalinawan, wala tuzanaɣ-awan təkəsət?»

¹⁵ Təzzar inna Ƴaysa i tamattay: «He kawanay! Agəzat iman-nawan daɣ a imosan əwwəli fəlas kud iggərgəs awedan, da təməddurt-net wər təqqen daɣ ərrəzəɣ-net.»

¹⁶ Təzzar ig-asan əlmital wa, inna: «Siwəgəs n əməgğergəs iyyan a əganen igi olāɣan. ¹⁷ Ad isamadran gar-es əd man-net, igannu: "Awak ma z'agəɣ? Nak ab'as ələɣ edag a daɣ əgəɣ attayam-in." ¹⁸ Təzzar inna: "Əssanaɣ awa z'aga. Ad arzaɣ šidangawen-in, əkrəsəɣ šin tanat-ogarnen, əššidəwəɣ daɣ-asnat attayam-in kul d awa ələɣ." ¹⁹ Amaran annaɣ i man-in: "Ya mandam, tələɣ ərrəzəɣ aggen a dak-igân elan aggotnen, sanfu, tatša, tašwa, tannaflaya." ²⁰ Mišan inn-as Məššina: "Ameskel! Ahad a da a kay-z-əgmədan man-nak. Ma z'igrəwan awa təššədəwəɣ? ²¹ Awen daɣ a igarrawan awedan wa išadəwan əddənət fəl man-net amaran wər iššədaw wala daɣ talɣa ta gar-es əd Məššina."»

Iba n aššawaša

²² Dæffer awen inna ʔaysa i nættulab-net: «Awen da fæl dawan-ænneḡ: A kawan-wær-tæššewəš tæmæddurt gær awa za tatsim, wala awa za talsim, ²³ fêlas iman-nawan ogaran imensewan almaqam, taḡessa-nawan deḡ togar isêlsa almaqam.

²⁴ Enzêrat daḡ æḡrutan, wærmad nabbalan za wær tiləyan, wærmad êlân isæḡbar za wala šidangawen mišan issodar-tan Mæššina. Tofâm-tan za s aggen. ²⁵ Mæni daḡwan wa ifragan s aššawaša-net æšitəy ən tæḡræst-net æs wala ellaf ən šat? ²⁶ Dad zama as wær tæfregam igi n a ogdân d awa tæmmædrəyt, ma fel as kawan iššewəš awa hadan? ²⁷ Enzêrat daḡ æmmæk was du-daggalnat tøjigawen: wærmad šaqqalnat wala zattinat isêlsa, mišan ænneḡ-awan wala Êmænokal Suliman harkid tægærgist-net kul wær kala ad ewad wala iyyadda daḡ-asnat šihussay ən talassay. ²⁸ Dad isalsu Mæššina yel æs tæmæwit tædi, s azalada ibdâd, tufat ad itewæsærḡu daḡ tøjængerert; manæmmæk as kawan-wær-z-assalsu, kæl æzægzan ænderran!

²⁹ Daḡ adi a kawan-wær-ædgəzan medranan n awa za tatsim, wala awa za tašwim, wala deḡ iššewəšan-kawan. ³⁰⁻³¹ Aratan win di kul aytedan win wær næssen Mæššina, a ozalnen daḡ agamay-nasan. Mišan kawanay, ædgəzat daḡ agamay ən Taḡmar ta n Mæššina. Aratan win di kul a kawan-tawakfin æntanay da, fêlas Abba-nawan issân as tæddiraram sær-san.

³² Tæsægert n ayfad-in a kamat-wær-tæggəz tasa, fêlas Abba-nakmat igrâz-as wêllen a kamat-akfu taḡmar-net.

³³ Zanzat-in awa tælām, tækətam-tu i tælaqqawen, tagim i man-nawan fartamanitan wær nætəmændu, tæššidəwam daḡ jənnawan ærrəzəḡ wa wær næḡærrəd, wær mad t-in-z-ihazan baydagan wala deḡ tæḡšəd-tu tamaday. ³⁴ Edag wa tæggaz tægærgist-nawan, ænta a z'ægəzan wallan-nawan.»

Assa n Ag Aggadəm

³⁵ «Êqqêlat aytedan otâbnen, æs æḡḡânat fətêlaten-nasan. ³⁶ Talim d eklan æqqâlnen y ad d-ifêl mæššissan takræst fêl a sær-æs in-æbdədan da da ad d-izzəkkat daḡ æmi n ahan. ³⁷ Êbbilalan eklan win d-ogaz mæššissan okâyan. Silakanay-awan as, ad atəb ænta iman-net, isæḡḡimen, isæmmənsəw-tan. ³⁸ Gær z'iqqâl-du adawannay n ahad wala deḡ ammas n ahad, eklan win d-ogaz mæššissan okâyan æbbilalan.

³⁹ Wærgəḡ kawanay iman-nawan tæssânām as, ænnâr issân mæššis n aḡaywan amazay wa daḡ du-z-idêl abaydag, akəy isæmmutəḡ y a das-igdêl terazay n ahan-net? ⁴⁰ Sæmmutəḡat za kawanay da, fêlas nak Ag Aggadəm ad d-asa daḡ assaxat tas wær tordem a daḡ-as d-asa.»

⁴¹ Tæzzar inn-as Butros: «Êmêli, nakkanay ḡas a fêl tægəḡ tangalt tædi, meḡ aytedan kul?»

⁴² Ijjəwwab-as æmêli ʔaysa inn-as: «Êmaššaxal wa iḡdalan ila deḡ ægærri ænta a isannafran mæššis izzuzər-tu i maššaxalan-net win hadatnen fêl a tan-ihakku idəgran-nasan daḡ sudar daḡ alwaq wa igmadan y awen. ⁴³ Ibbilal ækli wen as d-iqqal mæššis, ogaz-t-id iha æššəḡel wa daḡ q-id-oyya den. ⁴⁴ Êggəyyeḡ æsilakanay-awan as, ad t-izzuzər mæššis i tæla-net kul.

⁴⁵ Mišan ænnar inna ækli wædi daḡ man-net: "Mæšši illolat-in," tæzzar ad iggat imaššaxalan æd tæmaššaxalen win hadatnen, itattu, issasu esmad har ammaswad, ⁴⁶ ækli wædi, ilkâm a t-id-iḡdər mæššis daḡ æzêl d amazay wær orda, tæzzar ad t-iggat har t-iksən, ag-ay dad tawaggin aytedan win wær næḡdel.

⁴⁷ Amaran ækli wa issanan awa ira mæššis, iqqim wær t-iga madəḡ wær iga ænnəyat n igi-net, a das-təwəgginat tæwit aggotnen. ⁴⁸ Mišan ækli wa wær næssen awa ira mæššis, amaran iga arat ihoran d æwəddəb, a das-təwəgginat tæwit wær næggət. Awedan igrawan a aggen, a daḡ-as itewəḡməy a aggen. I itawasaxlafan a aggen, a daḡ-as itewəḡməy a ogaran awa itawasaxlaf.»

Enəməzray d əşşərixa wa d-izayan

⁴⁹ Dəffər awen inna Ƴaysa: «Oseɣ-du fəl ad assarɣa temsay daɣ əddənət. Sidaranax ad imos as tərɣâ. ⁵⁰ Amaran ilkâm daɣ-i ətəwəsəlmaɣ, s iket wər t-əgeɣ əknan-i man-in əddəguz.

⁵¹ Tordâm as, assa a d-əgeɣ fəl a d-awəyax alxer s əddənət? Kala kala, ənəməzray a sər-əs d-ewayya. ⁵² Id a ibazan ɣur əmərədda, səmmos aytedan n ahan iyyanda ad nəməzrəyan, əwaran karad aganna fəl əşšin, əşšin deɣ əwəran aganna fəl karad. ⁵³ Ad inəməzrəy aləs əd barar-net, barar deɣ inəməzrəy d abba-net, tənəməzrəy təntut əd tabarart-net, tabarart deɣ tənəməzrəy d anna-net, tənəməzrəy tədaggalt əd təntut ən barar-net, tənəməzrəy deɣ təntut əd tədaggalt-net.»

⁵⁴ Inna Ƴaysa deɣ i tamattay: «Wərgex as tənayam tagarak as du-təgməd daɣ ataram ad tannim əddi da: "Akonak izay-du." Təzzar agu adi da. ⁵⁵ As tənayam deɣ əhud as d-igar, ad tannim: "Ad tagu tuksay." Təzzar agu adi da. ⁵⁶ Əlmunafiqan, təssânam emel n alɣalamaten šin əganen fəl amaɣal əd šin əganen daɣ jənnawan, mišan adis wər təgrem azzaman win fall-awan əganen da?

⁵⁷ Mafel za wər təgrem kawanay iman-nawan awa oɣadan? ⁵⁸ Masalan as kay-ixra awedan s adag n əşşərixa, təgməya təməwit əs tənamaknam daɣ tarrayt. As wər təgeɣ adi, a kay-ilwəy har kay-issəbdəd dat əlqali. Əlqali amaran a kay-agu daɣ fassan ən soji wa kay-z-igəran daɣ kasaw. ⁵⁹ Əsilakanax-ak âs: Wər du-za-təgməda iket wər tərzema. Wala tamma iyyadda wər din-za-taqqam.»

13*Addararat əs tətubt*

¹ Harwada işşewal Ƴaysa as d-ənkarən aytedan əllanən den, əsoɣalan-as isalan ən meddan wiyyad ən Galilaya as isisaga ənaxkim Bilatəs iman-nasan alwaq a daɣ taggin šikutawen daɣ Ahan wa Zəwwəran n Əlɣibada daɣ Yerusalam.

² Inn-asan Ƴaysa: «Awak tordâm as, Kəl-Galilaya win di ogaran Kəl-Galilaya kul win hadatnən tišit ən nəsbakkadan fəl as əgan arak təməttant tədi? ³ Ənneɣ-awan, kala! Amaran kawanay da, as wər tətubam, ad təhləkam ketnawan.

⁴ Ma tənnam za s aytedan win maraw d əttam win fəl ibarajjat suru was itawannu Silowam daɣ əxrəm ən Yerusalam, inɣ-en? Tordâm as, ogaran Kəl-Yerusalam kul win hadatnən tišit ən nəsbakkadan? ⁵ Ənneɣ-awan, kala! Amaran, kawanay da, as wər tətubam, ad təhləkam ketnawan.»

⁶ Ig-asan Ƴaysa tangalt iyyat, inn-asan: «Kala inbal aləs iyyan ašək as itawannu fig daɣ afarag-net n alɣanab. As təga tamert n ara-net, os-ay-du y ad d-inkəd aratan-net, mišan wər daɣ-as igrew wala. ⁷ Təzzar inna y amašşaxal wa innəttafan d afarag: "Ənəy! Əmərədda karad elan a əgeɣ tasa-du, gammaya-du aratan n ašək wa, mišan wər kala daɣ-as əgrawa wala. Daɣ adi əxtəs-t-in! Ma ikannu daɣ amaɣal wər t-idu-təgəmməd tənfa." ⁸ Inn-as amašşaxal wen: "Məşši, are daɣ-ak a tu-tayya tenewa da ɣas, ad əɣəzax amaɣal wa t-ixlayan, ənɣəla daɣ-as tamaqqost. ⁹ Iha mijas awatay wa d-izayan ad arəw, as wər erew, təssəxtəsaq-q-in."»

Təməzzəyt ən təntut iyyat daɣ əzəl ən təsanfawt

¹⁰ Əzəl iyyan ən təsanfawt isasaxru Ƴaysa daɣ ahan n əlɣibada ən Kəl-Əlyəhud. ¹¹ Təlla təntut iyyat den təlât maraw elan d əttam issirantat aggəsuf, imos əruru-net təganzay, wər təfreg aqqad ən tabadday-net. ¹² As tat-inay Ƴaysa, ixr-et-du, təzzar inn-as: «Təntut, təwərna-nam təzzayax daɣ-as!» ¹³ Issəwar-tat ifassan-net, toɣad təbadday-net alwaq wen da, ad təmmâl Məşşina.

¹⁴ Mišan iggaz alham əmuzar n ahan n əlɣibada wen fəlas izzozay Ƴaysa awedan daɣ əzəl ən təsanfawt, inna əmuzar en i tamattay: «Wərgex sədis adan as imməkkan

a daḡ-san iteweggu əşşəxəl? Asiwat-du daḡ-san təgməyam təməzzəyt, wərgex əzəl wa n təsanfawt!»

¹⁵ Inn-as Ƴaysa: «Elmunafiqan, məni daḡ-wan wa wər nətəkkəs tewaxnay y azgar-net madex itræg ajad-net daḡ əzəl wa n təsanfawt y a t-id-aşşəşəw? ¹⁶ Tahayawt n ənnəbi Ibrahim ta amaran, ikrâd Iblis a ilân maraw elan d əttam, adis wər imməkkan ad tətəwəzuzəy daḡ əzəl ən təsanfawt?»

¹⁷ As inna Ƴaysa awen, təbaz təkarakit aytedan kul win nəmməzray-net, aytedan sa hadan amaran, ketnasan sidawen-tan mazalan əknanen şihussay win itaggu.

Elmital n amasa n annabat igân esəm mutard əd wa n xamira

¹⁸ Inna Ƴaysa: «Ma dər tola Taḡmar ta n Məşşina? Mas tat-z-ammattala? ¹⁹ Tolâ d amasa n annabat igân esəm mutard, idkal awedan inbal-tu daḡ afarag-net, idwal, iqqal aşək, ad taggin gədad şisəllula daḡ zəlan-net.»

²⁰ Inn-asan Ƴaysa dəx: «Mas z'ammattala Taḡmar ta n Məşşina? ²¹ Tola əd xamira tərway təntut əd karad annafaxaten n agel n alkama har ikuf agel ketnet.»

Tarrayt ta n Taḡmar ta n Məşşina

Iguz ən Taḡmar ta n Məşşina

²² Iгла Ƴaysa, illil iḡərman əd təḡarmaten, isassaxru aytedan, idâg sa sər Yerusalam.

²³ Inn-as awedan iyyan: «Əməli, awak aytedan wər nəggət xas a z'assafsu Məşşina?» Təzzar inna Ƴaysa i tamattay: ²⁴ «Imi ən Taḡmar ta n Məşşina i kəruzan, daḡ adi ballanat təgməyam d iguz-net. Ənnəx-awan aytedan aggotnen a z'əgməynen d iguz-net, mişan a dasan-indər.

²⁵ As ijwar məşşis n aḡaywan iḡfal-in fəl man-net təsəhərt n ahan, kawanay təbdâdam dat-əs, ad təggəzam şin əkukəw, təgannim: "Mandam, aləm-anax!" Ann-awan: "Wər kawan-əzdayax za wər əssena da du-təfalam."

²⁶ Alwaq wədi a das-tannim: "Wərgex nədraw dər-ək tettay əd tassay, təsisaxra dəx daḡ xərman-nana?" ²⁷ Mişan a dawan-annu: "Nak wər kawan-əzdayax. Ketnawan imaggan ən talbast a təmosam, ugagat-i."

²⁸ As tənayam Ibrahim d Isəhaq əd Yaqub d ənnəbitan kul əqqiman daḡ Taḡmar ta n Məşşina, ənta kawanay iman-nawan tətawastaxam daḡ-as, ad talim, ad tədaddam idədwən-nawan fəl təmagraz. ²⁹ Ad d-əgmədan aytedan dənnəg d ataram əd tamasna d agala, təzzar nəximin ədrəwan iməgura daḡ Taḡmar ta n Məşşina.

³⁰ Ənəyat za! Aytedan win əhanen ələqqam əmərədda ad izaran, win azzarnen dəx əmərədda ad əggəzan ələqqam.»

Igi n ənnəyat əd Herod

³¹ Alwaq wen da t-id-əhozan arat daḡ Farisaytan, ənnan-as: «Əgməd edag a, fəlas əmənokəl Herod ira igi ən man-nak.»

³² Inn-asan Ƴaysa: «Aglat tannin y awaqqas wa igan Herod: "Takkasax kələsuf daḡ aytedan, zuzəyax imiranan azalada əd tufat, amaran əzəl wa n karad ad assanda əşşəxəl-in." ³³ Dər iga awen da ya, əşşil a imos ad agla daḡ əşikəl-in, azalada əd tufat əd tufat ten, fəlas wər imməkkan ad iba ənnəbi daḡ adag wər nəmos Yerusalam.»

Tala ən Ƴaysa fəl Yerusalam

³⁴ Inna Ƴaysa: «Xa aytedan ən Yerusalam, iket təgam iman n ənnəbitan, tənḡam dəx əs təgur ən təhun win sər-wan d-izammazal Məşşina! Awak har mənəkət taklaten, gammaya d a kawan-d-əşşidəwa s əmmək as du-təşadaw təkəjit ikərətan-net daw əfrutan-net, mişan tugayam s awen! ³⁵ Ənəyat za, Məşşina a daḡ-wan idkəl ifassan-net, iqqəl ahan-nawan əməjir. Amaran ənnəx-awan, wər di-za-tələsam anay iket wər d-osa əzəl wa daḡ za tannim: "Wa d-osan s esəm n Əməli, igrâw arraxmat."»

14

Ezuzəy ən Ƴaysa aləs iyyan daɣ əzəl ən Kəl-Əlyəhud wa n təsanfawt

¹ Əzəl iyyan ən təsanfawt, iggaz Ƴaysa ehan n iyyan daɣ muzaran n Farisaytan fəl a ɣur-əs atšu. Əgaran daɣ-as Farisaytan əllānen den šittawen. ² Illa aləs iyyan den as ibəyaxat alam-net ketnet, iqqîm dat Ƴaysa. ³ Issəstan Ƴaysa imusanan n Əttawret əd Farisaytan, inn-asan: «Awak əzuzəy n awedan daɣ əzəl wa n təsanfawt xalâl, meɣ wər xalâl?»

⁴ Mišan wər das-ənnen wala. Amaran idas Ƴaysa əmiran en, izzozay-tu, issəgl-ay. ⁵ Təzzar inn-asan: «Məni daɣ-wan was z'ihannayan barar-net madeɣ azgar-net har iqqəl daɣ anu əzəl wa n təsanfawt, aqqam wər t-id-ikkəs daɣ-as tamazayt tədi da?»

⁶ Wər əssenən a das-ənnan daɣ batuten šin iga da.

Idaggan win saymar

⁷ Igr-in Ƴaysa əsənnəfran wa əgan naftaxan idaggan win taggazan aytedan win tawasaxmarnen təzzar ig-asan ahol, inn-asan: ⁸ «As daɣ-ak igmay awedan izazlayan a das-in-təməgureɣ, ad wər təsənnəfrənax edag wa taggazan aytedan win tawasaxmarnen fəlas mijas igmây daɣ awedan iyyan a kay-ogaran almaqam a das-in-iməguret, ⁹ təzzar as-ik-du məššis n ahan wa kawan-d-iɣran əs məgura-net, ann-ak: "Əgməd edag y aləs wa." Təbəz-kay təkarakit, takkax dəffər aytedan taqqama. ¹⁰ Kalar as daɣ-ak itawagmay a din-tasax iməgura, takka dəffər aytedan taqqama. Əddi, as d-osa məššis n ahan, a dak-annu: "Əmidi-nin, zənkəz-du s adag ofân wədi." Akf-ik adi ətəwəsəɣmar ɣur naftaxan kul win hadatnen.

¹¹ Fəlas awedan kul wa idkalan iman-net, ad itəwəsərəs, wa issərəsan iman-net deɣ ad itəwədkəl.»

¹² Dəffər awen inna Ƴaysa i Farisay was innəftax: «As du-təɣarraɣ aytedan y a tan-tašsatšax ezal madeɣ ehad, a du-wər-tayra imidawan-nak, wala imədrayan-nak wala išəqqaxan-nak wala imahharagan-nak ən məggərgas, fəl a kay-du-wər-ayrin əntanay da, əzəl iyyan, ərzəman-ak awa dasan-təgeɣ. ¹³ Kalar as iqqal as təsatšax aytedan, šatšu šiləqqawen əd nəbdan əd məggudal əd məddəryal. ¹⁴ Təbbilalax as təgeɣ adi, fəlas əntanay wər əfregan a dak-ərzaman. Ərruzmatan-nak a tan-təgrəwa əzəl wa n tanakra n alɣadilan.»

Əlmital wa n məgura win zawwarnen

¹⁵ As isla iyyan daɣ naftaxan i batu ten, inna i Ƴaysa: «Ibbilal awedan wa z'atšin daɣ məgura win z'aginen daɣ Taymar ta n Məššina.»

¹⁶ Inn-as Ƴaysa: «Aləs iyyan a itaggan iməgura zawwarnen, igmay daɣ aytedan aggotnen a t-id-asin. ¹⁷ As d-əmməgnen mensewan, izammazal akli-net y ad annu i naftaxan: "Asiwat-du, imensewan əmərədda əmmotagan."»

¹⁸ «Mišan əggazan-tu ketnasan s iyyan iyyan əd sur. Inn-as wa azzaran: "Səket əzzənza tawagost, kundaba oseq-qat ənəyaq-qat. A di-wər-təššəkax." ¹⁹ Inn-as-du iyyan: "Səket d-əzzanza maraw zəgran y agayak, amaran areɣ a tan-ərəma. A di-wər-təššəka." ²⁰ Inn-as-du iyyan: "Səket əzlafa, daɣ adi wər əfrega a kay-in-asax.»

²¹ «As d-iqqal əkli, iga i məššis isalan kul win den. Iggaz alham labasan məššis n aɣaywan, amaran inn-as: "Aglu tarmad, tilalax ayɣrəm, tidawa-du əd tələqqawen əd nəbdan əd məddəryal əd məggudal."»

²² «As d-iqqal əkli, inna i məššis: "Məšši, əgeɣ awa di-tənneɣ, mišan ehan harwa da ih-ay adag." ²³ Inn-as məššis: "Əgməd ayɣrəm, tilalax əd tarrayen əd tamawen ən fərgan, təšəhhəššəlay aytedan a d-asin fəl ad idnəy ahan-in. ²⁴ Illikan as aytedan win as əzzara əgmaya daɣ-san a di-d-asin, wər tan-iha i z'irəman imensewan-in.»

Əššərədan win əhanen ləkkum i Ƴaysa

²⁵ Imalallay-in ʔaysa tamattay təknaṭ igəṭ ta dər-əs təddewat, inn-asan:

²⁶ «Awedan wa iran a di-ilkəm, ənta wər di-iga tara togarat ta iga y abba-net, d anna-net əd təntut-net əd bararan-net əd mədrayan-net əd tēmədrayen-net d ənta iman-net, wədi wər ifreg ad iqqəl anattalib-in. ²⁷ I wər nəger iri y ad idkəl təgəttawt-net, agu imateran-net ilkəm-i, wədi wər ifreg ad iqqəl ənalkim-in. ²⁸ Id nənna masalan ad ira iyyan daɣ-wan ad ikrəs ehan imosan suru. Wərgəɣ təɣimit a itaggu, ixsəb awa t-ikrasan təzzar, issən kud ila azrəf a t-issindan wala? ²⁹ As wər iga awen, as t-issənta akaras har t-orna əsəndi-net, a daɣ-as agin aytedan kul win t-ənaynen tamakkakkayt, ³⁰ annin: "Awedan wa, issənta akaras n ahan, orn-ay ad t-isəkkəsəw."

³¹ Madəɣ nənna masalan, əmənokal iyyan as inkar əməgər gar-es d iyyan. Wərgəɣ təɣimit a z'agu təzzar, isəmmədrən, issən kud ənta wa ilan maraw əgim n aləs, ifrəg terazay n əmənokal wa hadan ilān ənta sanatat tēmərwen n əgim n aləs? ³² As inay as wər t-ifreg, harwa da iggu əmənokal wa hadan as tu-z-issuku inəmmuzal, igməy daɣ-as alxer.

³³ Kawanay da za əmmək di da, i daɣ-wan wər nəmməzzay d awa ila kul, wər ifreg ad iqqəl anattalib-in. ³⁴ Tesəmt arat olāɣan a təmos, mišan as tat-təgməd tembay-net, mənəni tēməwit tas tat-za-tətəwəsuxəl? ³⁵ Ab-as tat-təha tənfa waliyyat y amaɖal wala dəɣ tah-et tənfa i tamaqqost. Tanaxla ɣas a din-za-tətəwəggu. Wa isallin, aslet!»

15

Isalan əkkānen aytedan win əxraknen

Elmital ən tilay ta aba

¹ Osan-du nabazan n amana əd nasbakkadan kul ʔaysa y a das-əssəsəman. ² Əggazan Farisaytan əd musanan n Əttawret šin əgətəntən, gannin əs ʔaysa: «Awedan wa iqbāl inasbakkadan, idarraw dəɣ dər-san imensewan.»

³ Təzzar ig-asan ʔaysa əlmital wa, inna: ⁴ «As ila iyyan daɣ-wan temeday ən tilay har daɣ-asnat təssəggal iyyadda, awak wərgəɣ ad ayyu tazayat tēmərwen əd tazayat šin hadatnen ədānnat, təzzar azəl iswəd i ta təssəggalat har tat-d-igrəw? ⁵ As tat-d-igrəw, a tat-issəwər izeran-net fəl awa iga daɣ tədəwit, ⁶ as d-iqqal aɣaywan a d-aɣru imidawan-net əd mahharagan-net, ann-asan: "Ayewat, tagim tədəwit ta əgəɣ, fəlas agaraw a d-əgəɣ tilay-nin ta təssəggalat."

⁷ Ənnəɣ-awan zund əmmək di daɣ as, təfalawist ta z'agin win əhanen ijənnəwan fəl tətubt n anasbakkad iyyanda, togar ta tan-za-təsəssugu tazayat tēmərwen n alɣadil əd taza as ɣur iga as wər əddəraran əs tətubt.»

Tamma n əzrəf ta aba

⁸ «Madəɣ nənna masalan, təntut iyyat a tələt marawat tammaten n əzrəf har daɣ-as aba iyyat. Wərgəɣ ad tassaryu fətəla, təfrəd ehan-net ketnet, təswəd-as s əlluɣ iket wər tat-təgrəw? ⁹ As tat-təgrəw, a du-tayru šimidawen-net əd tamahharagen-net, tann-asnat: "Agimat tədəwit ta əgəɣ, fəlas agaraw a d-əgəɣ tamma-nin ta daɣ-i aba." ¹⁰ Ənnəɣ-awan zund əmmək di daɣ as, tətubt n anasbakkad iyyanda təsifəliwis angalosan ən Məššina.»

Barar wa ixrakan

¹¹ Inn-asan ʔaysa dəɣ: «Aləs iyyan a ilan əššin bararan. ¹² As əzəl iyyan inna wa mədrəyan y abba-net: "Abba, akf-i adagar-in daɣ təkəsīt." Izun-asan abba-nasan təla-net.

¹³ Arat n adan dəffər awen, inkar barar wa əndarran iššədaw awa ila kul, ikka akal iyyan iggugan. Ilkam i tara ən man-net, ad iɣəššad awa ila. ¹⁴ As inɣa awa ila kul, osa-du laz labasan akal wa iha, təzzar iggaz šin təməɣatirt. ¹⁵ Iɣla, išɣal y awedan

iyyan n akal en da. Issok-ay šiwegas-net y a das-idən day-asnat iladayan-net. ¹⁶ Awa das-iga laz day iguz, isidaran tettay ən šetša win tattin ladayan, mišan wər t-illa i das-tan-ikfân.

¹⁷ Amaran isammadran day man-net, inna: "Awak wərgex imaššaxalan n abba-nin əggətan mišan ketnasan əlân a ətšan har t-id-əgləzan, ənta nak inaqq-i laz da! ¹⁸ Ad ənkəray, əqqəla abba-nin, annay-as: 'Abba, əmmizrayay Məššina, kay dey əbbodaraq-qay, ¹⁹ ab-as əhora d a di-itəwənnu barar-nak, ag-i iyyan day maššaxalan-nak."

²⁰ Təzzar inkar iqqal abba-net. İzây-in ehan day igəg as t-ogga abba-net, təggaz-tu təhanint-net, ozal sər-əs, izalammat-tu, a das-itamallat.

²¹ Təzzar inna barar y abba-net: "Abba, əmmizrayay Məššina, kay dey əbbodaraq-qay, ab-as əhora d a di-itəwənnu barar-nak." ²² Mišan inna abba-net y eklan-net: "Tarmâd awəyat-du takatkat ta təhossayat, təzzəzləgam-as-tat, tagim təsəndərt day adad-net, təssəsəlam-tu. ²³ Tabəzam-du əhəri wa iddəren, təgzəməmə-tu, ad natšu, nagu saksas, ²⁴ fəlas barar-in wa, šilat n as t-aba, amaran əmərədda idar-du; kala ixrak, amaran əmərədda igraw-du." Amaran əssəntan day saksas.

²⁵ As itaggu awen, barar-net wa n aɣafadday iha šiwegas. As d-iqqal, ihoz-du aɣaywan, isla i səwat d awex. ²⁶ İyra-du iyyan day eklan-nasan, issəstan-tu d awa itaggan den? ²⁷ Inn-as əkli: "Amadray-nak a d-iqqalan, igzam abba-nak əhəri wa iddəren, fəlas tewaxlay a t-id-iga barar-net wər ila malad."

²⁸ İggaz-tu alham, uɣay s iguz n ahan. İqqab-du abba-net ad t-itansay. ²⁹ Eges inna y abba-net: "Wərgex a ilan elan əşxələx-ak, wər kala əmməzrayay tənna-nak, harkid awen, wər kala di-təkfex wala ɣas eɣayd əgzama aga fall-as saksas nak əd midawan-in. ³⁰ Rurek amaran wa iɣšadan eharay-nak day təkarwaten ənta, osa-du ɣas təgazamaɣ-as əhəri wa iddəren."

³¹ Inn-as abba-net: "Barar-in, kay fawda təlley ɣur-i, awa əley ketnet i-nak. ³² Mišan immikkan ad naddawat nagu saksas, fəlas amadray-nak, šilat n as t-aba, amaran əmərədda idar-du; kala ixrak, amaran əmərədda igraw-du."»

16

Taryəmt fəl tara n əddənet

Amaššaxal wa ilan tayttay

¹ Inna ɣaysa i nəttulab-net: «Kala a t-illa aləs iyyan n əməgğergəs ilân amaššaxal isinattaf d ərrəzəx-net, amaran itawann-as iɣašsat-tu. ² Təzzar isassaɣr-ay-du, inn-as: "Ma imos awa fall-ak sallax? Əməl-i awa təgeɣ y ərrəzəx-in, nak ab-as areɣ əššəxəl-nak."

³ Inna amaššaxal wa gar-es əd man-net: "Awak əmərədda ma z'aga as di-ikkas amuzar-in day əššəxəl? Nak, wər əfregay aɣayak, mansay dey isikarakad-i. ⁴ Əssânaɣ awa z'aga as kud tawakkasa day əššəxəl-in da, a di-əqbalan aytedan day nan-nasan."

⁵ Təzzar isassaɣra-du aytedan win irwas aləs was işxal s iyyan iyyan. Inna i wa azzaran: "Ma kay irwas əmuzar-in?" ⁶ Inn-as: "Temeday ən tanaw ən wədi wa n azzayt." Inn-as amaššaxal: "ɣam, tədkəla širawt-nak ta n əmarwas, təktəbəx fall-as tarmâd səmmosat təmərwən ən tanaw." ⁷ Dəffər awen inna y iyyan: "Kay za ma tətawarwasay?" Inn-as: "Temeday ən bəhu n alkama." Inn-as: "Ədkəl širawt-nak ta n əmarwas, təktəbəx fall-as əttamat təmərwən."

⁸ Təmərkest ten, isl-et aləs wa işšəşxalan ark amaššaxal wen, təzzar ad t-immâl fəl təla-net tayttay. Tidət a imos as aytedan win wər nəksud Məššina, ogaran win t-əksudnen təla ən tayttay day taɣawšiwən šin əllanen gar-essan.

⁹ Nak za ənnəx-awan: Agiwat imidawan s ərrəzəxan ən bannan win n əddənet ta; əddi as kawan-əgmadan, ad tətəwəqbalam dəx adag ən təməxsurt ixlâlan.

¹⁰ Awedan wa təha təfləst dəx arat əndərran, wa zəwwəran da təh-ay dəx-as. Wa wər təha təfləst dəx a əndərran, wa zəwwəran da, wər dəx-as tu-təha. ¹¹ Dəx adi, da kawan-wər-təha təfləst dəx ərrəzəx ən bannan wa n əddənet ta, ma kawan-z-izəzzigəzan ərrəzəx wa n tidət, wa ihan alaxirat. ¹² Amaran kud wər kawan-təha təfləst dəx arat wa wər təlem, ma kawan-z-akfin arat wa təlam dəx alaxirat?

¹³ Wər t-illa amaşşayal ifrâgan ad işxəl y əşşin muzaran. Wa xas ikyad iyyan, iru wa hadan; madəx abbardag y iyyan, alku wa hadan. Wər təfregam ad təxbədam Məşşina, taglim dəx tozâlam dəffər əddənet.»

¹⁴ Əssisaman Farisaytan y awa inna Yaysa den kul, taggin dəx-as tamakkakkayt fəlas imaran n əzrəf a əmosan.

¹⁵ Inn-asan Yaysa: «Kawanay təsaknim dat aytedan as alyadilan a təmosam, Məşşina amaran issân awa ihan iwallan-nawan; fəlas arat wa əzzəzwaran aytedan, Məşşina ənta tagəlfat a t-iga.»

Əttawret d Əlinjil

¹⁶ «Əttawret d Əlkəttaban win Ənnəbitan əntanay xas a tawasasayrinen har əzəl wa d-osa Yaxya wa isalməxan aytedan dəx aman. Əddi amaran ad əggəzan salan win Əlinjil şin ətəwəgga, əmosnen isalan n assa ən Tayxmar ta n Məşşina, amaran ad igammay awedan kul iguz-net s assahat əd tallabəst. ¹⁷ Dər iga awen da za, ogar tərhasay ta iga ad iba ijənnawan d amađal, ta iga ad iba wala xas əsakkal iyyanda n Əttawret.

¹⁸ Adi a fəlas, aləs kul wa izamməzayan tantut-net, izlaf iyyat, wədi iga əzzəna. Aləs dəx wa izlafan tantut təmmizzayat, ənta da igâ əzzəna.»

Əməgğəgəs iyyan əd təlaqqay təgât Lazarəs

¹⁹ Inn-asan Yaysa dəx: «Kala ad t-illa aləs iyyan n əməgğəgəs n aməyyawan əs faw izlâg isəlsa win hossaynen, əzzəwatnen, faw dəx inniflay issiksas. ²⁰ As itaggu awen, dat əmi n ahan-net, isrâd aləs iyyan ən təlaqqay igân Lazarəs, əs əlsânat şiqqas elam-net. ²¹ Isidaran tettay ən kərəmrəman win du-rattaknen dəx mensewan n əməgğəgəs en. Wala idan, tasin-t-idu talləxan şiqqas-net. ²² Har əzəl wad aba taləqqay ten, təzzar ewayan-tu angalosan s ənnəbi İbrahim dəx əljənnat. Əməgğəgəs ənta da, aba-tu itawanbal-in. ²³ İha Jahannama, itaxəzzab dəx-as as idkal asawad-net, ogga İbrahim dəx igəg, illâ xur-əs Lazarəs. ²⁴ Ad iyarru İbrahim, igann-as: "Ya Abba İbrahim, hənəttət-i, təzəmmizəla-du sər-i Lazarəs y ad issəlməx kuddəx imi n adad-net dəx aman, issəsməd-i sər-əs iləs-in, fəlas əlxəzab a tagga dəx təmsay ta."

²⁵ Mişan inn-as İbrahim: "Barar-in, Akta-du as kay təgrâwəx arat kul wa tərəx dəx təməddurt-nak, as iga awen, Lazarəs ənta wər inay ar əlxəzab. Amaran əmərədda ənta as tawaknan man, kay tətəxəzzaba. ²⁶ Wa dəffər adi as, illâ əxəxi wər nəla eder gar-ena dər-wan, fəl ad wər iru waliyyan dəx-na a kawan-in-akku, ifrəg adi, wala dəx ifrəg waliyyan dəx-wan a dana-d-akku."

²⁷ Inna əməgğəgəs: "Dəx adi Abba, əgmâya dəx-ak ad təzəmmizəla Lazarəs s ayaıwan n abba-nin, ²⁸ fəlas ələx səmmos mədrayan, y a dasan-iryəm fəl a du-wər-əggəzan əntanay da edag n əlxəzab wa."

²⁹ Mişan inn-as İbrahim: "İmədrayan-nak əttâfan əlkəttab wa n Əttawret d Əlkəttaban n ənnəbitan win hadatnen, əlkəmanet-asan." ³⁰ Inna y İbrahim: "Kala kala Abba-nin İbrahim, adi wər igda, mişan as tan-in-iqqal awedan a d-inkâran dəx nəmməttan, ad utaban." ³¹ Mişan inn-as ənnəbi İbrahim: "As wər əssəsəman

y ənnəbi Musa d ənnəbitan win hadatnen, wər z'utaban kuddeḡ ig-asan awedan a d-inkâran daḡ nəmməttan isalan."»

17

Əsəssəyri ən Ƴaysa daḡ batu n abakkad əd təsureft d əzəgzan

¹ Əzəl iyyan inna Ƴaysa i nəttulab-net: «Wər t-illa a tu-wər-əməlan aratan as za səssuginen aytedan ibakkadan, mišan iket aḡazab ill-ay y awedan wa dasan-d-igan əssəbab. ² A das-afu ad itəwəqqən əzəzəd zəwwəran ən təhunt daḡ iri-net itəwəgər-in daḡ agarew, tişit n əssəbab n abakkad i wala iyyanda daḡ aytedan win madrornen di. ³ Ağat ənnəyat əd man-nawan!»

As kay-idlam amadray-nak, tərḡəməḡ-as. Kud imməgraz, təssurəfəḡ-as. ⁴ Kud imos as ig-ak əssəyat tadlamen daḡ əzəl, ig-ak-du əssa assatan igammay təsureft daḡ əzəl wen da, da surəf-as.»

⁵ Ənnan nəmmuzal y Əməli Ƴaysa: «Şitu əzəgzan-nana.» ⁶ Inn-asan Əməli Ƴaysa: «As təlam əzəgzan oğdân əd wala imi ən təzuyay n əşənnan ad təfrəgam ad tannim y aşək wa: "Əlbəy-du iman-nak, taḡta daḡ agaraw en", agu awa tənnam.»

Tangalt n amaşşayal wa wər nəla maruzat

⁷ «Məni daḡ-wan wa du-z-adəw akli-net iddânan madəḡ igayyakan, ann-as: "Ayo tarmad tammansawaḡ!" ⁸ Wərgəḡ tənna a das-za-tagim: "Sanḡ-i a ətşəḡ təzzar, tawəyay-i-t-id, təşḡəla har atşa, aşwaḡ, dəffər adi amaran tatşa taşwa kay." ⁹ Awak aləs en ad iggudəy y əkli-net fəlas iga awas t-omar? ¹⁰ Kawanay da za, as təgam arat kul was tətawamaram, tannim: "Nakkanay wər nəmos ar eklan, wər nəga ar awas danay-iwar igi-net."»

Assa n Ag Aggadəm

Agoda iga aləs iyyan n aw Samarəya i Məşşina

¹¹ Ƴur iki ən Ƴaysa Yerusalam, illam gər akal wa n Samarəya əd wa n Galilaya. ¹² As d-iggaz taḡrəmt iyyat, əssəlkədan-as-du maraw meddan igrâw kətru, əbdadan-as-in daḡ igəg. ¹³ Ədkalan imaslan-nasan, ənnan-as: «Ya Ƴaysa, Əşşex-nana, hənəttət-ana!»

¹⁴ Iswad daḡ-san, inn-asan: «Ağlat saknat iman-nawan i limaman.» Əğlân əkkân ilimaman y a dasan-əməlan, as əzzayan zaddogan. ¹⁵ As din-igra iyyan daḡ-san təməzzəyt ta iga den, iqqal Ƴaysa, idkâl əməsli-net, immâl Məşşina. ¹⁶ As t-in-osa issəjad dat-əs, a das-itigudəy. Aləs en in akal ən Samarəya.

¹⁷ Inna Ƴaysa: «Wərgəḡ marawessan as əzzayan, zaddogan, ma əgan taza win hadatnen? ¹⁸ Adis wər tan-iha i d-iqqâlan iggudəy i Məşşina ar ənaftaḡ wa?»

¹⁹ Amaran inna Ƴaysa y aləs wen: «Əbdəd, aḡlu, əzəgzan-nak a kay-iḡlasan.»

Assa ən Taymar ta n Məşşina

²⁰ Ƴaysa, as t-əssəstanan Farisaytan d alwaq wa du-za-tasu Taymar ta n Məşşina, inn-asan: «Taymar ta n Məşşina wər du-tətəggu assa ilân anay. ²¹ Wər mad z'itəwənnu: "Ənta da", wala "Ənta den". Əssənət as, Taymar ta n Məşşina təlla gar-ewwan.»

Assa n Ag Aggadəm

²² Dəffər awen inna Ƴaysa i nəttulab-net: «Əlkâman adan a daḡ za təsəddirənam anay ən tawaḡlay-nin nak Ag Aggadəm, kuddeḡ anay n əzəl iyyanda, mišan wər di-za-tənəyam.

²³ Amaran a dawan-itəwənnu: "Ənta den" madəḡ "Ənta da". Ad wər taglim, wala təlkəmam y awen. ²⁴ Əbələzləz a itaggu essam daḡ jənnawan, isəmmələwləw tama n amadəl ta har ta, a dər z'alu assa-nin nak Ag Aggadəm daḡ əzəl-in. ²⁵ Mišan dat adi,

ilzâm-i nak Ag Aggadëm anay n alxazab aggen, unkaran-i dex aytedan n azzaman win.

²⁶ Awa igan day azzaman n ënnëbi Nux, a z'agin day adan win day du-z-asa nak Ag Aggadëm. ²⁷ Azzaman win den, aytedan tattin, sassin, zallafan, zâzlafan har ëzël wa d-iggaz Nux aylal n aman, tëzzar osa-du alwabil, ihlak-kan ketnasan. ²⁸ Zun d awen da dex a igan day azzaman ën Lot. Aytedan tattin, sassin, zanzan, satagan, nabbalan, gayyakan, karrasan, ²⁹ har ëzël wad igmad Lot aÿrëm ën Sëdom, tëzzar issofay-du Mëššina fël aÿrëm en adaxas-ën-tahart ibilaglagan, ihlak aytedan-net ketnasan. ³⁰ Zun d adi da a z'agin ëzël wa du-za-tëwësënëfilëla nak Ag Aggadëm. ³¹ Ëzël wëdi, awedan wa iqqiman day adag wa n afalla n ahan-net, amaran ëhân lalan-net ehan-net, a du-wër-azzabbat y a tan-in-idkël. Wa ihan tawagost-net dex, ad wër iqqël aÿaywan. ³² Aktiwat-du awa igrawan taÿur Lot. ³³ Id awedan wa wër nëgëmmëy ar aggaz ën man-net day ëddënet ta, ad affatu day alaxirat; mišan wa isaffatan iman-net day ëddënet ta, ad iÿlës.

³⁴ Ënnëÿ-awan ahad wëdi, ad ënsân ëššin aytedan day tessat iyyadda, ammadkal iyyan, itëwëyyad-du wa hadan. ³⁵ Ad taddinat sanatat tëdoden day adag iyyanda, tammadkal iyyat, tëtëwëyyad-du ta hadat. ³⁶ Ad ëhân ëššin meddan tawagost iyyadda, ammadkal iyyan, itëwëyyad-du wa hadan.»

³⁷ Ëssëstënan nëttulab Ýaysa ënnan-as: «Ëmëli, wëdi arat mënid z'agu?» Inn-asan: «Edag tëggaz tëmaxsayt, a day-as iddawan jadaran.»

18

Ëlmital n ëmašray ëd tëntut as wër idder alës-net

¹ Iga Ýaysa i nëttulab-net ëlmital iyyan a day ira a tan-issusën as, ihor ad tansayan Mëššina faw, a day-as wër ëkkësan attama.

² Inn-asan: «Aÿrëm iyyan a iha ëmašray wër nëksud Mëššina, wër issëÿmar dex awedan waliyyan. ³ Amaran aÿrëm en, tëh-ay tëntut as wër idder alës-net a du-tëtäsit ëmašray en, tëgann-as: "Akf-i alxaq-in day amakkarad-in." ⁴ As iga tamert itugëy-as, inna gar-es ëd man-net: "Kud wër ëksudax Mëššina, wala ëssiÿmarax awedan waliyyan, ⁵ da tantut ta, tëdgaz-i. A tat-akfa alxaq-net fël a day-as ëgrëwax iman-in."»

⁶ Tëzzar inna Ëmëli Ýaysa: «Tësallam y awa inna arak ëmašray wa? ⁷ Tordâm as Mëššina wër z'akfu aytedan win isannafran alxaq-nasan, tu-tansaynen hallan ehad ezal? Tordâm as a fall-asan-in isahhagu tadhëlt-net? ⁸ Ënnëÿ-awan, a tan-akfu alxaq-nasan tarmad. Mišan harkid adi, ëzël wa du-z-ëqqëla nak Ag Aggadëm, awak a d-agëzax day ëddënet aytedan ëzzigzannen?»

Tilwat n ëlyillas

Ëlmital wa iga Ýaysa fël Farisay d ënabaz n amana

⁹ Dëffër awen, iga Ýaysa ëlmital y aytedan ëttâfnen iman-nasan day tišit n alxadilan, as iga awen olkân aytedan, inn-asan:

¹⁰ «Kala ad ëggëzzayan meddan ëššin s Ahan wa Zëwwëran n Ëlyibada fël ad agin šiwatriwen. Iyyan Farisay, wa hadan anabaz n amana. ¹¹ Farisay za, ibdad ad itattar, igannu day man-net: "Ya Mëššina, ëggodayax-ak as wër oley d aytedan win hadatnen ëmosnen inarkaban ëd nëmmëzray ëd maggan n ëzzëna, wala dex oley d anabaz n amana wa. ¹² Ëssa adan kul, tuzama day-san ëššin. Takkasax tëmëssëdëk day awa garrawa kul."»

¹³ Mišan anabaz n amana ënta, ibdad-in day igëg, wër ihel wala adakal n asawad-net sa sër jënnawan, iggât idmaran-net fël awa ëgan man-net day aÿšud, igannu: "Ya Mëššina tëggëzet-kay tëhanint-in nak n anasbakkad."»

¹⁴ Ænneḡ-awan, anabaz n amawan wa, iqqal ehan-net igrâw taqqat dat Məššina, mišan Farisay wen ənta wər igrew taqqat dat Məššina; fəlas i idkalan iman-net, ad t-issərəs Məššina, i issərəsan iman-net ad t-idkəl Məššina.»

Təwatray ən Ƴaysa i bararan

¹⁵ Harkid bararan win janḡayan tawayan-tan-du aytedan əs Ƴaysa fəl a tan-issəwər ifassan-net, ittər-asan. Ænayan nəttulab-net awen, əššewalan fəl aytedan win den. ¹⁶ Mišan iḡr-en-du Ƴaysa əs man-net, inna i nəttulab-net: «Ayyat bararan a di-dakkin, a tan-in-wər-təwəḡam; Taḡmar ta n Məššina, šin aytedan win šilaten-nasan. ¹⁷ Æggəyeyə silakanay-awan as, awedan wər nəḡa i Taḡmar ta n Məššina əlqəbulat šilat ən ta das-iga barar, wədi wər das-ilkem a tat-iggaz.»

Ëddənet meḡ alaxirat

¹⁸ Issəstan əmuzar iyyan ən Kəl-Ëlyəhud Ƴaysa, inn-as: «Ëššex olāḡan, mas di-iwar igi-net y ad əgrəwa təməddurt ta təḡlalət?» ¹⁹ Inn-as Ƴaysa: «Mafel as di-təḡanna Ëššex olāḡan? Wər t-illa i olāḡan ar Məššina. ²⁰ Təssānəḡ alwajiban-net: Ad wər tagay əzzəna, ad wər tagay iman, ad wər takəra, ad wər tagay təḡyya ən bahu, səḡmər abba-nak d anna-nak.» ²¹ Inn-as aləs wen: «Aratan win di kul harwa da mədrəya as tan-əssəbdada.» ²² As isla Ƴaysa y awen, inn-as: «Arat iyyanda a dak-in-iqqiman əmərədda: Aglu zanz-in awa tələḡ kul, tuzanəḡ inazzan-net i tələqqawen ad təgrəwəḡ ərrəzəḡ a dak-z-ansin day alaxirat. Dəffər adi amaran tagla-du təlkəməḡ-i.» ²³ As isla y awen, əḡšadan man-net wəllen fəlas təḡərgist tagget a iga.

²⁴ As inay Ƴaysa as, əḡšadan man n aləs en wəllen, inna: «Iket əzzəwi ig-ay iguz ən Taḡmar ta n Məššina fəl win əggərgasnen. ²⁵ Ogar tərḡasay ta iga fəl aḡam araday day təbuday n ənazmay, i ta iga fəl əməggərgəs iguz ən Taḡmar ta n Məššina.» ²⁶ Təzzar ənnan-as aytedan win das-əssəsammen: «Adi za ma ifragan ad iḡləs day təmsay?» ²⁷ Inn-asan Ƴaysa: «Awa imosan muxal ḡur aytedan, Məššina ifrāk-ku.»

²⁸ Inn-as Butros: «Nakkanay za, a oyyanen awa nəla kul, nəlkam-ak?» ²⁹ Inn-asan Ƴaysa: «Ëggəyeyə əsilakanay-awan as, wər t-illa i din-z-ayyin ehan-net madəḡ tantut-net, madəḡ imədrayan-net, madəḡ imarwan-net madəḡ bararan-net fəl əddəlil ən Taḡmar ta n Məššina, ³⁰ əs wərgəḡ ad igrəw inədfusan-nasan day harwa əmərədda, igrəw dəḡ təməddurt ta təḡlalət day azzaman win əlkammen.»

Ihəz n alyazab wa z'inəy Ƴaysa

³¹ Ikkas Ƴaysa inəttulab-net win maraw d əššin day aytedan, inn-asan: «Səsəmat: nakkanay da əggəzzaynen əs Yerusalem da, amaran den da ad z'andu arat kul wa əktaban ənnəbitan day salan-in nak Ag Aggadəm. ³² Ad tawagga day fassan n aytedan wər nəmos Kəl-Ëlyəhud, agin day-i tamakkakkayt, agin-i šisəssəlka, əssutəfan fall-i, ³³ ayyawanan-i šiwwit, agin iman-in, təzzar ənkara-du day təməttant əzəl wa n karad.»

³⁴ Mišan wər t-illa a əgrān nəttulab-net day awa inna den, ittinkal-asan almaḡna-net, wər əḡren awa day dasan-iššewal.

Ëzuzəy ən Ƴaysa əməddəryəl iyyan

³⁵ As d-ihoz Ƴaysa aḡrəm wa n Yerikaw, okay fəl əməddəryəl iyyan iqqiman fəl afay ən tarrayt, itansay. ³⁶ As isla əməddəryəl i tamattay ta fall-as tətakayat da, issəstan d awa imos awen. ³⁷ Itawann-as: «Ƴaysa wa n əḡrəm ən Nazaret a itakayan.» ³⁸ Amaran idkal əməsli-net, igannu: «Ya Ƴaysa wa n Ag ənnəbi Dawəd, hənəttət-i!» ³⁹ Sannaryaman-as aytedan win azzarnen y ad affastu, mišan idkal əməsli-net wəllen, igannu: «Ya Ag Dawəd, hənəttət-i!»

⁴⁰ Təzzar izzəkkat Ƴaysa, omar s a das-d-attalway. As t-id-osa, issəstan-tu, inn-as: ⁴¹ «Mas tarex a dak-k-aga?» Inn-as əmədderxəl: «Əməli, a əreş a di-d-iqqəl asawad-nin.» ⁴² Inn-as Ƴaysa: «Iqqəlet-kay-du asawad-nak, əzəgzan-nak a kay-işlasan.» ⁴³ Iqqal-du asawad əmədderxəl tamazayt ten da, igla ilkam i Ƴaysa, immâl Məşşina. Aytedan kul win ənaynen awa igan den, əntanay da əmmâlan Məşşina.

19

Zakkəyas wa n anabaz n amana

¹ Iggaz Ƴaysa aşrəm ən Yerikaw, okay daş ammas-net y ad t-irdəş. ² Aşrəm en ih-ay aləs igân esəm Zakkəyas imosan əmuzar ən nabazan n amana n əməgğergəs. ³ Ad igamma y d anay ən Ƴaysa, mişan təgdal-as-tu tamattay fəlas təgzəlay a iga. ⁴ Təzzar ozal, azzar i tamattay, iftan aşək igân esəm sikamor fəl ad inəy Ƴaysa fəlas den da a du-z-akəy. ⁵ As d-ewad Ƴaysa edag wen, idkal asawad-net, inn-as: «Zakkəyas, zabbat-du tarmâd, azalada kundaba əzzəbbəş daş aşaywan-nak.» ⁶ Izzəbbat-du Zakkəyas tarmâd, iqbal awen, iflawas. ⁷ As ənayan aytedan awen, gatantanan ketnasan, gannin: «İzzəbbat şur aləs n anasbakkad.» ⁸ Amaran ibdad Zakkəyas dat Əməli Ƴaysa, inn-as: «Ya Əməli, ad akfaş təzunt ən təla-nin i tələqqawen, kud deş ill-ay i daş ətşəş arat, a das-t-əssuxəla imos əkkoz nədfusan.» ⁹ Təzzar inna Ƴaysa: «Azalada, ehan wa iggaz-t-id əlşillas, fəlas aləs wa, ənta da ahaya n ənnəbi İbrahim a imos. ¹⁰ Nak Ag Aggadəm oseş-du gammayaş aytedan win əxraknen y a tan-əşləsa.»

Əşşəşəl ən Ƴaysa daş Yerusalam

Tangalt ta n tammaten

¹¹ Əssisaman aytedan y awa igannu Ƴaysa ketnet. Ig-asan Ƴaysa tangalt iyyat fəlas ihoz Yerusalam amaran əşilan alwaq wad za tənəfiləl Taşmar ta n Məşşina ewad-du. ¹² Inn-asan: «Kala ikka aləs iyyan n ag əket akal iyyan iggugan y a daş-as d-igrəw təmənukəla, iqqəl-du. ¹³ Dat teklay-net, işra-du maraw daş eklan-net. Akk iyyan daş-san ikf-ay tamma inn-asan: "Agiwat daş-asnat jola har d-əqqəla." ¹⁴ Amaran aləs en, wər t-əren aytedan n akal-net. As igla, əssəşlan inəmmuzal s əmənokəl wa zəwwəran y a das-annin: "Aləs di, wər nəra ad iqqəl əmənokəl-nana."

¹⁵ Mişan igraw taşmar, iqqal-du akal-net. Isassaşra-du eklan-net winâd ikfa tamatten da, fəl ad issən awa sər-san d-iggazan daş jola-nasan. ¹⁶ Os-ay-du wa azzaran, inn-as: "Məşşi, tamma ta di-təkfəş əgrawa-du fall-as marawat şiyad." ¹⁷ Inn-as məşşis: "Alafəyet! Illikan as akli olâşan a təmosa. Zamas təh-ik təfləst daş awa wər nəgğət, adi za a kay-əzzuzəraş i maraw şərman." ¹⁸ Os-ay-du wa n əşşin, inn-as: "Məşşi, tamma ta di-təkfəş əgrawa-du fall-as səmmosat şiyad." ¹⁹ Inna i wa: "Kay, ad tizarəş i səmmos şərman." ²⁰ Os-ay-du wa n karad, inna: "Məşşi, tamma ta di-təkfəş ənta da. Akamas a tat-əgeş daş əlkəşifa-nin, ogazaq-qat. ²¹ Təksəda a kay-əgeş, fəlas əssənaş as aləs labasan a təmosa. Tədakkalaş a wər təssənsa, tətalaya deş tawagost wər tənbelə." ²² Inn-as məşşis: "Kay, ark əkli a təmosa, awa d-igmadan imi-nak as kay-z-abəzaş. Dad təssanaş as əmôsaş awedan labasan, idakkalan a wər issənsa, italay deş tawagost wər inbel, ²³ ma fel as wər təgeş azrəf-in daş bank, əddi as du-z-əqqəla əgrâwa fall-as tətəyt." ²⁴ Təzzar inna y aytedan win əllanen den: "Abəzat daş-as tamma ta ittaf, takfım-tat i wa ilan marawat." ²⁵ Ənnan-as: "Məşşikkana, wərgəş ilâ marawat?" ²⁶ İjjəwwab-asan, inna: "Silakanəş-awan as, wa ilan, wədi a das-itəwəşitu awa ila; amaran wa wər nəla, arat n arat wa ila da, a daş-as attarmas."

²⁷ Amaran aytedan win zənga-nin, wər nəra ad əqqəla əmənokəl-nasan, awəyat-tan-du, təgzəmam-tan dat-i.»

Ihaz ən Ƴaysa Yerusalām

²⁸ As inna awen, iggaz eƣaf ən nəttulab-net, iggəzzay əs Yerusalām. ²⁹ As din-ihoz taƣrəmt ta n Betfajay əd ta n Betanəy, dəgma n ədƣaƣ was itawannu wa n "Eškan ən Zaytun", izammazal əššin daƣ nəttulab-net. ³⁰ Inn-asan: «Akkiwat taƣrəmt ten dat-wan den. As tat-in-təggazam, ad tənəyam əhulel n əzdan iqqānan əs kala wər ittəwan. Ariwat-t-id, təlwəyam-t-idu. ³¹ As kawan-issəstan awedan, inn-awan: "Xa, ma tətəggim əddi?" Tannim-as: "Əməli a sər-əs iddərarān."» ³² Əglañ nəttulab win den, ənayan arat kul s əmmək wa daƣ as dasan-t-inna Ƴaysa. ³³ Tāran əhulel, as dasan-ənnan məssawəs: «Xa, ma tətəggim əddi?» ³⁴ Ənnan-asan nəttulab win əššin en: «Əməli a sər-əs iddərarān.»

³⁵ Əlwayan-t-id i Ƴaysa. Ədfaran-as fall-as isəlsa-nasan, əssəwanan-as-tu. ³⁶ Imatakway, a das-tissəwan aytedan isəlsa-nasan daƣ tarrayt-net. ³⁷ As d-ewad Ƴaysa edag wa daƣ təzagaday tarrayt adƣaƣ wa n Eškan ən Zaytun, daƣ ənəmi haz ən Yerusalām, ədkalan nalkiman-net ketnasan imaslan-nasan, əssəggadan daƣ təmmalen i Məššina daƣ batu ən təlməxjujaten kul šin ənayan. ³⁸ Gannin: «Iga Məššina albaraka y əmənokal wa d-osan s esəm n Əməli. Attadet alxer əd tanaya daƣ jənnawan win ədkalnen!»

³⁹ Təzzar ənnan Farisaytan əhanen tamattay en i Ƴaysa: «Əššex, ərƣəm i nalkiman-nak!» ⁴⁰ Inn-asan Ƴaysa: «Ənney-awan, as əffəstan, šihun a, a za səƣƣərətneñ.»

Awa iqqalan i Yerusalām

Tala ən Ƴaysa fəl Yerusalām

⁴¹ As din-ihoz Ƴaysa aƣrəm ən Yerusalām, ogg-ay, iggaz fall-as šin tala; ⁴² igannu: «Ya Yerusalām, ənnar kam dâ, təssānaƣ əmmək was za təgrəwaƣ alxer azalada; mišan wər tu-təssena, fəlas aƣabar a dam-iga. ⁴³ Əlkâman adan a daƣ kam-za-xəliƣələyan zənga-nam, agin-am afarag issohen n əməgər, ədgəzan-kam fəl gannatan kul. ⁴⁴ Addagdagan-kam, kam d aytedan-nam. Wər daƣ-am du-z-ayyin təhunt təwârat iyyat, fəlas tugayaƣ s ad tagraƣ assa wa dam-d-iga Məššina y dam-əgu arraxmat-net.»

Asataƣ ən Ƴaysa imassatagan daƣ Ahan wa Zəwwəran n Əlƣibada

⁴⁵ Dəffər awen, iggaz Ƴaysa aƣalla wa iƣlayan Ehan wa Zəwwəran n Əlƣibada, a daƣ-as isattaƣ imassatagan. ⁴⁶ Igann-asan: «Wərgəƣ iktâb as, inna Məššina: "Ehan-in ad iqqəl ehan ən təwatriwen." Kawanay amaran təgâm-tu "əsəlxəs ən baydagan"?"»

⁴⁷ Akk əzəl isassaƣru Ƴaysa daƣ Ahan wa Zəwwəran n Əlƣibada. Ad gammayan muzaran ən limaman əd musanan n Əttawret əd muzaran ən Kəl-Əlyəhud d igi ən man-net, ⁴⁸ mišan ab-asan təməwit tas z'agin awen, fəlas aytedan kul əknân-as əsəsam.

20

Əsəssəƣri ən Ƴaysa daƣ Ahan wa Zəwwəran n Əlƣibada

Ma ikfan Ƴaysa tarna ta ila?

¹ Əzəl iyyan isassaƣru Ƴaysa aytedan daƣ Ahan wa Zəwwəran n Əlƣibada, immal-asan Əlinjil as t-id-osan muzaran ən limaman əddəwan əd musanan n Əttawret əd muzaran ən Kəl-Əlyəhud, ² ənnan-as: «Əməl-ana da du-təgrawa tarna n igi n aratan win tətəgga da? Ma dak-kat-ikfan?» ³ Inn-asan: «Nak da a dawān-agəƣ əsəstan iyyan, amaran əməlat-i: ⁴ Awak əsəlməƣ wa iga Ƴaxya aytedan daƣ aman, Məššina a ƣur d-ifal awen meƣ aggadəm?»

⁵ Təzzar namaşawwaran gar-essan, ənnan: «As das-nənnə "Məşşina a ħur d-ifal" a danaħ-annu: "Mafel za wər təzzəgzənam s awa inna?" ⁶ As das-nənnə "Aggadəm a ħur d-ifal", tamattay ta, ketnet as dana-za-tanħu əs zabaw ən təgur, fəlas təkəkəs aşşak as Yaxya ənnəbi a imos.» ⁷ Ənnan-as amaran: «Wər nəssen wa ħur d-ifal.» ⁸ Inn-asan Ƴaysa: «Nak da za, wər dawan-z-əmələħ dad d-əgrawaħ tarna n igi n aratan win.»

Elmital ən magyakan n alħanab

⁹ Amaran imalallay-in Ƴaysa tamattay ig-as əlmital wa, inna: «Kala ad ila aləs iyyan afarag n alħanab. Təzzar issəħfar afarag-net en i magyakan wiyyad, išşokal, ig-in tamert tagget. ¹⁰ As du-tewad tamert ta n əmiləy n alħanab, izammazal sər-san iyyan daħ eklan-net y a t-id-akfin adagar-net daħ awa d-eraw afarag, mişan əgan-as šiwwit, əssoħalan-tu məşşis isikarayray ifassan. ¹¹ Izammazal sər-san iyyan akli. Ənta da, əgan-as šiwwit, safallasan-tu, əssoħalan-tu wər eway wala. ¹² As taklat ta n karadat, izammazal sər-san iyyan akli. Ənta da sabbasan-tu, əstaxan-tu. ¹³ Dəffər awen inna məşşis n afarag: "Awak ma z'aga? A sər-san zəmmizəla ruray wa əkneħ tara, mijas ənta a t-əssəħməran." ¹⁴ Mişan as ənayan magyakan win əħfarnen afarag barar-net izay-tan-du, namannan gar-essan: "Ənta əddi amakkasu n afarag. Anħiwatanaq-qu kərəz, fəl ad təqqəl təkəsət şin-nana." ¹⁵ Əkkasan-tu daħ afarag, ənħan-tu kərəz.» Amaran inna Ƴaysa i tamattay: «Əmərədda ma tordam ma z'agu məşşis n afarag i win den meddan? ¹⁶ Adi za ad aglu ənta iman-net, agu iman ən magyakan win, issəħfər afarag-net i magyakan wiyyad.» Əslan aytedan y awen ħas, ənnan: «Məşşina ya wər təgeħ adi!»

¹⁷ Təzzar idak-kan Ƴaysa s asawad, inn-asan: «Daħ adi ma imos almaħna ən batu ta tənnat daħ Əlkəttaban: "*Təhunt ta din-əgaran makrasan, ənta a təqqalat təhunt ta təkbalat ehan*"? ¹⁸ Awedan kul wa udan fəl təhunt ta, ad addagdag, wa fəl tuda deħ a tu-təlkəş.»

¹⁹ Əgran musanan n Əttawret əd muzaran n limaman as əntanay a fəl iga Ƴaysa əlmital wen, təzzar əgməyan d abbaz-net amazay wen da, mişan wər əgen awen, fəlas tamattay a əksudan.

Arazam n amana i Qaysara

²⁰ Adi a fəl ewalan Ƴaysa, ənkâdan-as. Əssokan-t-idu meddan əgânen iman-nasan almat alħadilan, fəl a tu-şəşşiwəlan sassannin-tu arat wər nətəwənnu, abəzən-tu sər-əs, agin-tu daħ fassan n əmuzar n akal d əlxəkum-net. ²¹ Əssəstanan Ƴaysa, ənnan-as: «Əşşex, nəssân as awa təganna d awa təsassaħra oħâd; wər tətəgga təmərit gər aytedan. Təsasaħra əs tidət awas danaħ-iwar igi-net daħ tarrayt ta n Məşşina. ²² Amaran əməl-ana, awak xalal-ana arazam n amana y əmənokəl wa zəwwəran Qaysara meħ?»

²³ Igra Ƴaysa tənagmayt-nasan, inn-asan: ²⁴ «Saknat-i tefelt n əzrəf. Ma ilan udəm d esəm win t-əwarnen?» Ənnan-as: «In Qaysara.» ²⁵ Inn-asan: «Adi za agiwat i Qaysara awa kawan-issəwar, tagim deħ i Məşşina awa kawan-issəwar.» ²⁶ Indarasan a tu-səssugin ark awal dat aytedan. Isammaklal sər-san aljawab wa dasan-iga den, əffəstan.

Əsəstan igân daħ batu ən tanakra daħ təmattant

²⁷ Dəffər awen osan-t-id arat daħ aytedan ən taggayt ta n Sadusaytan. Sadusaytan əttâfan as wər tu-təlla tanakra dəffər təmattant. Əssəstanan-tu, ²⁸ ənnan-as: «Əşşex, inna ənnəbi Musa daħ Əttawret: "As aba aləs, oyya-du tantut dər wər ila barar, a tat-izləf amadray-net fəl ad agu əzzurrəyya y əmidi-net wa aba den." ²⁹ Amaran kala a t-əllan əssa mədrayan. Izlaf wa dasan-waşşaran ketnasan, aba-tu wər ila barar. ³⁰ Izlaf wa n əşşin tantut ta d-oyya əmaq qar-net, ənta da aba-tu wər

d-oyya ara. ³¹ Wa n karad deɣ awen da. Ɛssa mædrayan en ketnasan igraw-tan awen da, wær tan-iha i d-oyyan ara. ³² Dæffer awen, aba tantut ænta da. ³³ Awak æzæl wa n tabadday, ma imos daɣ æssa mædrayan win den was za tæqqæl tæntut ten taɣuræs, dad zamas ketnasan æzlâfan-tat?»

³⁴ Inn-asan Ƴaysa: «Daɣ æddænet ta næha da, zallafan meddan, tawazlafnat tædoden, ³⁵ mišan aytedan win isannaha Mæššina æd tanakra daɣ tæmattant fæl ad æggæzan aljannat, win di wær dasan-t-illa azalaf gær za meddan wala šidoden. ³⁶ Id ab-as daɣ-san tælkam tæmattant, olân d angalosan, æqqalan bararan æn Mæššina id tanakra a d-ægan daɣ tæmattant. ³⁷ Amaran daɣ awa iqqalan tanakra æn næmmættan, ænnæbi Musa ænta iman-net as isattadda awen daɣ Ɛttawret, daɣ batu æn tæfsæq, assaɣa wad inna Mæššina imos "Ɛmæli n Ibrahim, d Isæhaq æd Yaquub." ³⁸ Daɣ adi Mæššina wær imos Ɛmæli æn tæmæxxa, kalar Ɛmæli æn win æddarnen a imos, fælas ɣur-æs aytedan kul æddâran.»

³⁹ Ennan wiyyad daɣ musanan n Ɛttawret i Ƴaysa: «Ɛššex, tægêɣ awal olâɣan.»
⁴⁰ Dæffer adi ab-as æhalan æsæstan-net d arat waliyyan.

Ɛsæstan igân daɣ batu n awa imos Ɛlmæsix

⁴¹ Dæffer awen issæstan-tan Ƴaysa inn-asan: «Manæmmæk as itawannu Ɛlmæsix Ag æmænokal ænnæbi Dawæd a imos? ⁴² Ɛnta Dawæd iman-net as sær-æs inna daɣ ælkættab wa n Azzabur: "Inna Ɛmæli y Ɛmæli-nin: 'Qamu daɣ æɣil-in, ⁴³ har aga izænga-nak daw daran-nak."»

⁴⁴ Daɣ adi dad zamas Dawæd iman-net iɣra Ɛlmæsix s esæm wa n Ɛmæli, manæmmæk as z'iqqæl barar-net?»

Ɛnnækud i tælmænufæqa æn musanan n Ɛttawret

⁴⁵ Harwada æssîsaman aytedan kul, as inna Ƴaysa i nættulab-net: ⁴⁶ «Ɛnkædat i musanan n Ɛttawret, ærân æsæɣløy æzlâgan šikadkaden zagrotnen, d ætæwæsæslam igân æs saɣmar daɣ sammanayan, ærân tæɣimit daɣ daggan win ælanen almaqam daɣ nan win æɣibada æn Kæl-Ɛlyæhud, æd daggan n aytedan win tawasaxmarnen daɣ mægura. ⁴⁷ Tattan eharay æn tædoden šin as aba meddan-nasnat, as iga awen, taggin imaddan tahaginen wær næmos ar sokni. Ilkâm a dasan-itæwæxkæm attadib labasan.»

21

Takutay æn tæntut as aba alæs-net

¹ Idkal Ƴaysa asawad-net, inay imæggærgas taggin azræf wa ækkatan daɣ æssænduq wa daɣ itiddaw ærræzæɣ n Ahan wa Zæwwæran n Ɛɣibada. ² Inay deɣ tantut iyyat æn tælaqqay as wær idder alæs-net as tæga daɣ æssænduq en sanatat tæfelen. ³ Tæzzar inna: «Ɛggæyyeɣ silakanax-awan as, tantut ten æn tælaqqay en as wær idder alæs-net en, togar aytedan a ketnasan tehakkay. ⁴ Fælas ketnasan awas wær æddæran a ækfan, ænta amaran, addararat-net a daɣ tædkal awa tæla kul tækat-tu.»

Assa n æzæl wa ilkaman

Ɛbæræjji wa ilkaman daɣ Ahan wa Zæwwæran n Ɛɣibada

⁵ Ɛššewalan aytedan wiyyad daɣ batu n Ahan wa Zæwwæran n Ɛɣibada, æmmâlan adalag wa iga æs tæhun hossaynen d aratan win ækfan aytedan daɣ tækutawen-nasan. Inna Ƴaysa: ⁶ «A wa tæhannayam da, ælkâman adan a daɣ-as du-wær-za-taqqam tæhant tæwârat tæmidit-net, ketnet ad itæwæjæbbæræjjæt.»

Ɛnkædat y awa ilkaman

⁷ Tæzzar æssæstanan-tu, ænnan-as: «Ɛššex, æmmay ad z'agu wædi arat? Ma za tæqqæl alɣalamat ta za tassaknit as ibuk y igi?»

⁸ Inn-asan ʔaysa: «Ēnkədat ad wər tətəwəsəxrəkam, id aytedan aggotnen a du-z-asinen əttafan esəm-in. Akkiyyan daɣ-san igannu: "Nak a imosan Ēlməsix", "Taqqan tewad." A dasan-wər-təlkəmam. ⁹ As təslam i tərmuq ən məgiran d əlfəllagatan, ad wər təššəwəšam fəlas, aratan di kundaba izâran-du, mišan wər dasan-za-təlkəm təzərəst n əddənət əddi da.»

¹⁰ Inn-asan deɣ: «Ad əknəsnaat addawlaten gar-essanat, əknəsnaat taɣmaren gar-essanat, ¹¹ əməlan-tu nəgəynəgəyan n amaɖal labasnen; iməl-tu laz əd təwərnawen əssiksadnen daɣ daggan aggotnen, əməlan-tu deɣ aratan əssiksadnen d aɣalamaten əsimaklalten daɣ jənnawan.

Ētəwədgaz ən nalkiman

¹² Mišan dat adi kul, ad tattarmasam, tətəwəzəxəzzəbam, tammawayam əs nan win əɣibada ən Kəl-Ēlyəhud, tətəwəggim da kasaw, tətəwəsəbdədam dat mənokalan əd naxkiman, tətəwəsəstənam fəlas kawan-iwar esəm-in. ¹³ A kawan-akfu adi tarrayt n a fall-i taggayem.

¹⁴ Daɣ adi sansiwat taytween-nawan, ad wər təsəmmutəgam awa za tannim y ad təkkəsam iman-nawan, ¹⁵ fəlas a kawan-akfa masnat n awal əd təla n əgərri as tu-wər-illa azangaw-nawan a dasan-z-ifrəgan wala deɣ ifrəg isəbbəhəw-nawan. ¹⁶ Wala imarwan-nawan a kawan-səttərməsən, səttərməsən-kawan mədrayan-nawan əd šəqqəyan-nawan əd midawan-nawan, təwənɣin wiyyad daɣ-wan kərəz. ¹⁷ A kawan-əgzəran aytedan kul fəlas kawan-iwar esəm-in, ¹⁸ mišan wər dawan-z-iɣšəd adi wala a odgan əd təzuɣay n əmi n əššənnan. ¹⁹ Zəmmerat-nawan as za tagəzam iman-nawan.

Ētəwəšray wa ilkaman daɣ əyrəm ən Yerusalam

²⁰ As tənayam əyrəm ən Yerusalam ɣilayɣalayan-tu gənan ən sojitan, təssənam as ijwâr itiwadagdag. ²¹ Əddi, aytedan win ahanen akal ən Yahudəyya, win di addaggaganet s ədɣayan. Win əhanen əyrəm ən Yerusalam, əgmədanet-tu, win t-əgmədnen əs saffan-net, a t-idu-wər-əqqəlan, ²² fəlas adan win di, ad əqqəlan adan a daɣ z'awwaddab Məššina aytedan, fəl ad andin aratan kul win ənnan Ēlkəttaban.

²³ İket aɣazab ad t-əginat tədoden šin əganen šidusen əd šin sankasnen daɣ adan win den, fəlas ad tagu təssust labasat daɣ akal, azzabbat-du attadib ən Məššina fəl tamattay ta. ²⁴ Arat daɣ tamattay ta ad itəwənɣu əs takoba, awa hadan ikfəl əs kalkan kul, əggəznat təməttiwen wər nəmos Kəl-Ēlyəhud əyrəm ən Yerusalam, a tu-tataftafnat har tandu təmastant ta tanat-ikfa Məššina.

Assa n Ag Aggadəm

²⁵ Ad təwənəyan aratan saksodnen əmosnen aɣalamaten as z'əginen da təfuk əd təllit d etran. Ad əššəwəšnat təməttiwen n əddənət wəllen, iqqən əməsli labasan wa tagginat tanazzamaren n aman ən gərwan iɣafawan-nasan. ²⁶ Aytedan a tan-tanɣu tasa n aratan win hannayan əzayan-du əddənət fəlas ad təwəsənəgəynəgəynat təxəllak šin əlânen tarna daɣ jənnawan. ²⁷ Alwaq wədi, a di-ənəyan aytedan nak Ag Aggadəm as du-z-asa, əheɣ tagarak, əleɣ tarna əd tanaya tagget.

²⁸ As əntan aratan win di, təsəmmutəgam, annalamanet man-nawan, fəlas alwaq ən tədarfit-nawan ihôz.»

Ēlmital wa iga ʔaysa s ašək ən fig

²⁹ Ig-asan ʔaysa əlmital, inn-asan: «Ēnzərat-in daɣ ašək ən fig d eškan win hadatnen. ³⁰ As əggazan šin tanazra, ad təssənam kawanay iman-nawan as tamert ta n akasa təhôz. ³¹ Zund əmmək en daɣ âs as tənayam aratan win dawan-əmaləɣ əddi, təssənam as Taymar ta n Məššina təhôz. ³² Əggəyyey əsilakanəɣ-awan as tamattay ta da n azzaman win nəha da, ad tənəy ənətti n aratan kul win dawan-əməla da. ³³ İjənnawan d amaɖal ilkâm ad ib'as t-əllan, mišan batuten-in əllanat-tu har faw.»

Sæmmutægat, tænkædam

³⁴ «Ænkædat fæl man-nawan! Ad wær ixsæd igæt ən tattay æd tassay n esmad æd medranan n æddænet ænnøyaten-nawan, ag-awan æzæl wædi aɣadar, ³⁵ zun wa tætaggu taftaw y awedan. Arat wædi ad agu fæl aytedan kul win æwarnen tesayt n amaɗal. ³⁶ Daɣ adi agat ænnøyat, ad têtansayam Məššina alwaq kul a kawan-issæfragan ikus ən man-nawan daɣ awa d-izayan ketnet, tæfrægam a dat-i tæbdædam nak Ag Aggadəm.»

Æššəɣəl ən Ƴaysa daɣ Ahan wa Zəwwəran n Ƴlyibada

³⁷ Faw isasaɣru Ƴaysa aytedan daɣ Ahan wa Zəwwəran n Ƴlyibada, amaran as iga ahad, ad adəw adɣaɣ igân esəm wa n Eškan ən Zaytun. ³⁸ Id affaw, a d-ənzəyan aytedan kul s Ahan wa Zəwwəran n Ƴlyibada y a das-əssəsəman.

Tamattant æd tanakra ən Ƴaysa Ƴlməsix**22***Tadrəwt ən Ƴaysa ta tælkamat æd nættulab-net imensewan**Anu ən tæɣdært wa itawaxazan i Ƴaysa*

¹ Amud wa daɣ tattin aytedan šigəlwen šin wær iha xamira, was itawannu wa n Akkay, ihôz. ² Imuzaran ən limaman æd musanan n Ƴttawret gammayan tæmərkest tas z'agin iman ən Ƴaysa, mišan æksudan ad t-anɣin ijənnəjərwəy awen tamattay.

³ Iggaz Aššaytan Yahuza was itawannu Isxarəyuti imosan iyyan daɣ nættulab ən Ƴaysa win maraw d əššin. ⁴ Iglə, ikka imuzaran ən limaman æd muzaran n aytedan win ogaznen Ehan wa Zəwwəran n Ƴlyibada, imašawal dər-san daɣ batu n əmmək was z'agu Ƴaysa daɣ fassan-nasan. ⁵ Isaddawat-tan awen; ərɗan s ad t-akfin azrəf. ⁶ Ird-asan, tæzzar ad igammay tæməwit tas z'agu Ƴaysa daɣ fassan daɣ amazay a ɣur-əs wær tælla tamattay.

Imutag n əmud wa n Akkay

⁷ As d-ewad æzæl n əmud wa n tægəlwen šin wær iha xamira, wa daɣ tawagzaman jəɣal win əmud wa n Akkay, ⁸ izammazal Ƴaysa Butros æd Yaxya, inn-asan: «Aglat tæsæmmutægam-anəɣ imensewan win əmud wa n Akkay.»

⁹ Ƴnnan-as: «Mənid tareɣ a tan-nəsæmmutæg?» ¹⁰ Inn-asan: «As din-təggazam aɣrəm, ad tammanayam d aləs a d-iktâran ətəkin-net. Ƴlkəmat-as s ahan wa z'iggəz, ¹¹ tannim i məššis n ahan wædi: "Inn-ak Ƴššex: 'Məni tu daɣ ahan-nak edag wa n naftayan, wa daɣ za nammansaw nak æd nættulab-in daɣ əmud wa n Akkay?'" ¹² A kawan-assaknu daɣ suru-net, ehan wa n afalla, elwân, əhân-tu mutag kul. Ƴddi da ad za tæsæmmutægam imensewan.»

¹³ Ƴglan, ənayan arat kul s əmmək was dasan-t-inna Ƴaysa; tæzzar ad simutugan imensewan win Akkay.

Imensewan win əmud wa n Akkay

¹⁴ As iga alwaq ən tattay, inaxama Ƴaysa æd nəmmuzal-net, əggazan šin tattay. ¹⁵ Tæzzar inn-asan: «Ƴkneɣ dərən ən tædrəwt ta dər-wan əgeɣ imensewan n əmud wa, harwa wær əɣɣəzzaba. ¹⁶ Silakanəɣ-awan as, wær di-ilkem a tan-ələsa tettay iket wær d-osa æzæl wa daɣ z'andu almaɣna-nasan daɣ Taymar ta n Məššina.»

¹⁷ Tæzzar idkal-du Ƴaysa təkabart iha esmad n alɣanab, iggoday i Məššina, inna: «Abəzat təkabart ta, tənəməɣləzəm awa tat-ihan, ¹⁸ fəlas əsilakanəɣ-awan as, wær ilkem ad əšweɣ esmad n alɣanab, iket wær du-tosa Taymar ta n Məššina.»

Ƴsəbdəd ən mensewan win əmosnen isaktan n Ƴməli

¹⁹ Dëffër awen idkal Ƴaysa tagëlla, iga igodan i Məššina, irz-et izun-asan-tat, inn-asan: «taḡəssa-nin adi, tətīwakfat fəl əddəlil-nawan. Tuzanat-tat əs təməwit ta da, imos adi isaktan-in.»

²⁰ Zund əmmək en da âs as ətšan, idkal təkabart, inn-asan: «Təkabart ta, arkawal wa aynayan ən tassaḡ a təmos gər Məššina əd tamattay-net. Arkawal wa, azni-nin a z'inḡəlan fəl tənfa-nawan a t-isattaddan.»

Emel ən Ƴaysa ətəwəkəddal wa z'itəwəggu

²¹ «Fadda ənəyat, aləs wa di-z-aggin daḡ fassan, illa da da, idrâw dər-i. ²² Illikan as nak Ag Aggadəm a di-iba əs təməwit ta d-ixkam Məššina harwa dat alwaḡ, mišan iket alḡazab ad t-inəy awedan wa di-igan daḡ fassan.»

²³ Təzzar ad tinəməsəstinan nəmmuzal-net gar-essan əd wa daḡ-san z'agin wen daḡ arat.

Ma imos wa daḡ-wan ogaran

²⁴ Dëffër awen tənkar tamazaḡ gar-essan təḡât daḡ batu ən was əttafan as ənta a daḡ-san ogaran.

²⁵ Inn-asan Ƴaysa: «Imənokalan ən təmattiwen n əddənet saknin tarna y aytedan win as azzaran, zamazalan fall-asan deḡ əlxəkum-nasan; mišan dər iga awen da əttâfan as imadhalan n aytedan a əmosan. ²⁶ Mišan kawanay, ad wər tagim awen. Kalar, wa daḡ-wan ogaran almaḡam, iqqəlet zun wa daḡ-wan mədrəyan. Wa daḡ-wan azzaran, iqqəlet zun amaššəḡal. ²⁷ Awak ma ogaran awedan wa iqqiman itattu əd wa das-išḡalan? Wərgəḡ wa iqqiman itattu? Mišan nak imosan əmuzar-nawan aheḡ-qawan əmosa zun amaššəḡal-nawan.»

Əššəḡal wa ilkaman daḡ nəttulab win maraw d əššin

²⁸ «Kawanay win da, a d-əqqimnen təl-kâmam-i daḡ jarrabatan win ənaya. ²⁹ Adi as, tehakkay ta di-iga Abba-nin taḡmar, ənta a dawan-z-aga y-as nak əmərədda. ³⁰ Fəl a dər-i tədrəwam tettay əd tassay daḡ taḡmar-in, taqqamim fəl təsəqqima ən təmənukəla y ad təšrəḡam i tawšeten marawat əd sanatat šin Israyil.»

Emel ən Ƴaysa ikus wa das-z-agu Butros tazdəyt

³¹ «Simḡon, Simḡon! Ənkəd! Aššaytan igmây turagat n a dawan-agu əsəkənsəki wa itawaggin y alkama. ³² Mišan nak onsâyəḡ-ak Məššina fəl a kay-wər-igməd əzəḡzan wa sər-i təḡəḡ. Amaran as di-du-təqqala, təsəssuḡəḡ əzəḡzan ən mədrayan-nak.»

³³ Inn-as Simḡon Butros: «Əməli, nak simataga s a dər-ək idawa kuddeḡ əs kasaw, əd təmattant.»

³⁴ Mišan inn-as Ƴaysa: «Butros, silakanəḡ-ak as, wər z'ayru əkəji aḡora ahada da wər di-təggeda har karadat təklaten.»

Ənnəkud i təməḡutar šin d-əzaynen

³⁵ Dëffër awen inna Ƴaysa i nəmmuzal-net ketnasan: «Alwaḡ wa kawan-zammazala wər tewayam azrəf, wala aḡrəḡ, wala təsəsəlt ta n sanatat, awak ill-ay arat a din-todânam?» Ənnan-as: «Kala.»

³⁶ Inn-asan: «Əmərədda za, wa ilan azrəf awəyet-tu, wa ilan aḡrəḡ awəyet-tu. Wa wər nəla takoba, azzanzet-in əbərnuz-net, azzanzet-du. ³⁷ Silakanəḡ-awan as, awa fall-i itawannan daḡ Əlkəttab ən Məššina n as "iddun daḡ maggan ən təkma." Kundaba inda. Awalla, arat kul wa fall-i itawannan ad andu.»

³⁸ Ənnan-as: «Əməli, sanatat təkabiwen da.» Inn-asan: «Ayyat batu di, wər di-təḡrem.»

Ətərməs ən Ƴaysa d əššəriḡa wa das-itawaggan

Təwatray ən Ƴaysa

³⁹ Igmad ʔaysa, iddêw əd nəttulab-net, ikka adɣaɣ wa n Eškan ən Zaytun, imos awen arat itaggu faw. ⁴⁰ As din-ewadan, inn-asan: «Ansəyat Məššina a kawan-ogazan daɣ jarrabatan n Iblis.» ⁴¹ Ēnta amaran izzənkaz-in fall-asan, əddukad ən taggor ən təhunt, igaraffat ad itattar, ⁴² igannu: «Abba, kud immikkan adi, təssəgəgəɣ-i təkabart ta n alyazab di! Dər iga awen da ya, taɣet tara ta-nak wərgəɣ ta-nin.»

⁴³ Amaran inafalal-as angalos y ad t-isəssuhət. ⁴⁴ Təzzar ədgazan man ʔaysa, idgaz wəllən daɣ təwatriwen, har təqqal tarraft-net šilat n əzni, ad tətattab daɣ amaɗal.

⁴⁵ As iɣrad šiwatriwen, ibdad, iqqal-du inəttulab-net, os-en-du issins-en əɣšud ən man. ⁴⁶ Inn-asan: «Mafel tənsâm? Ēnkərat tansəyam Məššina a kawan-ogazan daɣ jarrabatan n Iblis.»

Ētərməs ən ʔaysa

⁴⁷ Harwada iššewal-asan as tan-təggaz tamattay təgget as azzar Yahuza wa n iyyan daɣ nəttulab-net win maraw d əššin. Ihoz-du Yahuza ʔaysa y ad t-izələmmət.

⁴⁸ Mišan inn-as ʔaysa: «Adis kay Yahuza, təzələmmet as di-za-təsəssuga daɣ fassan, nak Ag Aggadəm?»

⁴⁹ As ənayan nəttulab win hadatnen awa ibukan y igi da, ənnan: «Ēməli, ma iqqal nəššəšɣəl šikabiwen-nana?» ⁵⁰ Təzzar iwat iyyan daɣ-san akli n Ēlimam wa Zəwwəran, ifras-du təməzzuk-net ta n əɣil. ⁵¹ Mišan iharašsat-tan ʔaysa, inn-asan: «Ayyat adi!» Təzzar idas təməzzuk n əkli wen, izzozay-tat, təqqəl əmmək-net.

⁵² Amaran inna i muzaran ən limaman əd muzaran n aytedan win tagaznen Ehan wa Zəwwəran n Ēlyibada əd muzaran ən Kəl-Ēlyəhud, əs ketnasan osân-du y ad t-əbəzan: «Awak əjajəb iyyan n abaydag a əmosa as sər-i du-tewayam šikabiwen əd təburəgen? ⁵³ Wərgəɣ əzəl kul ərtāya dər-wan daɣ Ahan wa Zəwwəran n Ēlyibada mišan wər di-tobezam? Ēmərədda za alwaq-nawan a d-ewadan, kawanay əd taɣmar ta n Iblis əd šiyyay-net.»

Ikus ən Butros tazdəyt i ʔaysa

⁵⁴ Təzzar obazan ʔaysa, ewayan-tu s aɣaywan n Ēlimam wa Zəwwəran. Ig-asan Butros ləkkum zagren. ⁵⁵ As din-osan, tətawasarɣa təmsay daɣ ammas n aɣalla, əqqiman sər-əs aytedan. Iggaz-tan-in Butros.

⁵⁶ Tənay-tu təmaššaɣalt iyyat iqqim əs təmsay, təzaggazd-ay wəllən, amaran tənna: «Aləs wa, ənta da, iddew əd ʔaysa.» ⁵⁷ Mišan iggad Butros awen, inna: «Tantut, wər t-əzdaya.» ⁵⁸ Arat n amazay dəffər awen, inay-tu iyyan awedan, inn-as: «Kay da, iyyan daɣ-san.» Mišan inn-as Butros: «Xa aləs wa, kala wər t-əmosa.» ⁵⁹ As iga adag n alwaq dəffər awen, inna aləs iyyan s assahat: «Illikan as aləs wa iddew dər-əs, fəlas ənta da in akal ən Galilaya.» ⁶⁰ Inn-as Butros: «Xa aləs, wər əssenay awa daɣ-i təššewalax.» Harwa da iššewal Butros alwaq wen da as iɣra əkəji aɣora. ⁶¹ Təzzar imalallay-in Ēməli ʔaysa iswad daɣ Butros. Den da a d-ikta Butros awal wa das-iga Ēməli, as das-inna: «Wər z'aɣru əkəji aɣora azalada wər di-təkkesay tazdəyt har karadat təklaten.»

⁶² Təzzar Igmad Butros, ad ihallu fəl awa əgan man-net daɣ əɣšud.

Tamakkakkayt ən sojitan daɣ ʔaysa

⁶³ Alwaq wen, meddan win əttafnen ʔaysa, əgân daɣ-as tamakkakkayt, əggâtan-tu. ⁶⁴ Ēgan-as abanaban, a das-gannin: «Kay ya ələwli! Ēməl wa kay-iwatan.» ⁶⁵ A das-taggin batuten šiyyad aggotnen labasnen.

Təbadday ən ʔaysa dat Asaggawar wa Zəwwəran

⁶⁶ As affaw aɣôra, immənay Asaggawar wa Zəwwəran ən muzaran ən Kəl-Ēlyəhud, əhân-tu əmuzaran ən limaman əd musanan n Ēttawret, itawasabdad dat-san ʔaysa.

⁶⁷ Ēnnan-as: «Kud kay Ēlməsix, təmələɣ-ana?» Təzzar inn-asan: «Kud dawan-əmala

da wər di-za-təzzəgzənam, ⁶⁸ kud kawan-əssəstana dəx wər di-za-tajjawwabam. ⁶⁹ Mišan a obazan xur əmərədda, Nak Ag Aggadəm ad aqqama dəx əxil ən Məşşina di n Əməli ən Tarna.»

⁷⁰ Ənnan-as ketnasan: «Dəx adi kay Barar ən Məşşina?» Inn-asan: «Kawanay iman-nawan as tənnam əmosaq-qu.» ⁷¹ Təzzar ənnan: «Ma nəkka y iyyat təgəyya? Wərgəx nakkanay iman-nana nəslâ y awa d-igmadan imi-net?»

23

Təbadday ən Yaysa dat Bilatəs

¹ Tənkər aljamaxat ketnet, teway Yaysa əs Bilatəs wa n ənaxkim. ² A xur-əs tu-yattasan gannin: «Aləs wa, as t-in-nosa isaxrak tamattay-nana. Igaddal dəx y aytedan ad ərzəman amana i Qaysara wa n əmənokal wa zəwwəran, harwa igannu ənta a imosan Əlməsix, əmənokal.»

³ Awen da a fəl t-issəstan Bilatəs, inn-as: «Awak kay dəx a imosan əmənokal ən Kəl-Əlyəhud?» Inn-as Yaysa: «Kay iman-nak as tənneç adi.» ⁴ Inna Bilatəs i limaman win zawwarnen əd tamattay: «Wər hənneyax əddəlil waliyyan a fəl obaxay aləs a.» ⁵ Mišan ədgazan wəllen dəx təxəttas-net, gannin: «Ijinəjərwəy aytedan əs səssəxritan-net dəx akal ən Yahudəyya ketnet. Issənta-du awen dəx Galilaya har awas d-ewad Yerusalam da.»

Təbadday ən Yaysa dat əmənokal Herod

⁶ Isla Bilatəs y esəm wa n Galilaya xas, issəstan kud Yaysa in akal ən Galilaya wala. ⁷ As issan as taxmar ta n Herod a das-tazzarat, issok-as-tu fəlas iha Yerusalam dəx adan en. ⁸ Herod isidawat-tu wəllen anay ən Yaysa, irəw ira anay-net fəl əddəlil n aratan win sər-əs isallu. Igâ dəx attama n a dat-əs agu Yaysa təlməxjujat. ⁹ Ig-as isəstanan aggotnen, mišan wər das-inna Yaysa wala.

¹⁰ As itaggu awen, imuzaran ən limaman əd musanan n Əttawret əllân den, siçaren da təxəttas ən Yaysa. ¹¹ A das-itaggu Herod əd sojitan-net şisəssəlka, taggin dəx-as tamakkakkayt; əzzəzlagan-tu takatkat təkknât əbələzləz, amaran issoçal-tu Herod i Bilatəs. ¹² Eway-du awen əzəl wen da as immedaw Bilatəs əd Herod, id dat awen nimagzaran.

Ətəwəxkam ən təmattant i Yaysa

¹³ İşşədaw-du Bilatəs ilimaman win zawwarnen əd muzaran ən Kəl-Əlyəhud win hadatnen əd tamattay, ¹⁴ inn-asan: «Tewayam-du sər-i aləs a, tənnam isafallag aytedan. Əsraçax-as dat-wan, mišan wər ənaya əddəlil waliyyan a fəl t-əbaza dəx aratan win tu-təssəwaram. ¹⁵ Wala dəx inay-tu dəx-as Herod, fəlas issoçal-anaq-q-id. Amaran ənəyat! Aləs wa, wər iga arat waliyyan a t-issiwaran təmattant. ¹⁶ Dəx adi a das-səssuga şiwwit, amaran ayyaq-qu.»

¹⁷ Təll-ay alçadat təmosat as i d-içlay əmud wa n Akkay, iwâr Bilatəs a dasan-ikkəs awedan iyyan dəx kasaw. ¹⁸ Jajjayan adakal ən maslan-nasan ketnasan dəx jənnawan gannin: «Agu iman n aləs di, təkəkəşax-ana-du Barçabbas.» ¹⁹ Barçabbas wen, ənəjərwəy as kala ad t-əgan aytedan dəx əxrəm n Yerusalam d igi ən man n awedan a fəl iggaz kasaw.

²⁰ İlas-asan Bilatəs awal fəlas tara a iga ad ayyu Yaysa. ²¹ Mišan əqlan siçaren dəx jənnawan, gannin: «Taytay-tu fəl təgəttawt! Taytay-tu fəl təgəttawt!» ²² Ig-asan Bilatəs tənna ta n karadat: «Mafel za? Ma içşad? Wər hənneyax əddəlil waliyyan a t-issiwaran təmattant. Dəx adi a das-səssuga şiwwit xas, ayyaq-qu.»

²³ Mišan əşşotan şixaraten wəllen, gammayan dəx-as ad itəwətəytəy Yaysa fəl təgəttawt. Əçlaban Bilatəs əs takat. ²⁴ Təzzar ixtas Bilatəs i Yaysa əşşəriçə wa dəx-as təgməy tamattay ten. ²⁵ İkkas aləs wa dəx-as gammayan, iggâzan kasaw fəl

ənəjerway n aytedan d igi n man n awedan. Ҳaysa amaran, ig-ay daҗ fassan-nasan, y a daҗ-as itəwəxkəm awas əran.

Tamattant ən Ҳaysa

Iki ən Ҳaysa edag wa daҗ z'itəwətəytəy

²⁶ Ҳəzərgazan sojitan Ҳaysa. Ҳəglân dər-əs as əmmənəyan d aləs iyyan n əxṛəm ən Qərwan igân esəm Simxon a d-ifâlan šiwəgas, təzzar əbazan-tu, sassawayan-tu təgəttawt ta fəl z'itəwətəytəy Ҳaysa, ilkam-as dər-əs. ²⁷ Təlkâm-as tamattay tagget, əhânat tədoden aggotnen a fall-as hallinen, sikalalnat. ²⁸ Iswad-in daҗ-asnat Ҳaysa, inn-asnat: «Aššet Yerusalām, ayyimat fall-i tala. Kalar alimat fəl man-nakmat, əd maddannəkmat, ²⁹ fəlas əlkâman adan a daҗ z'itəwənnu: "Əbbilalnat tədoden šin wər nətilu bararan, əd šin əs kala wər tan-ələnat, əd šin əs kala wər əsənkasnat." ³⁰ Adan win-di ad annin aytedan y ədxaҗan: "Bərəjjətət fall-ana", annin i kašwaran: "Alsawat-ana"; ³¹ fəlas dad itawagga əmazal wa y ašək wa ibdagan, wədi ma d-innəyan wa iqquran?»

Ҳtəwətəytəy ən Ҳaysa fəl təgəttawt

³² Ҳllan meddan den əššin ən nəsgufa labasnen s əntanay da tiwazargazan s adag ən təməttant.

³³ As ewadan sojitan edag igân esəm Təkəyya, əttəytəyan Ҳaysa fəl təgəttawt, əssəxtan-tat dər-əs. Ҳgan awen da i meddan win əššin en. Iyyan əgan-tu daҗ əxil ən Ҳaysa, wa hadan əgan-tu daҗ zalgat-net. ³⁴ Inna Ҳaysa: «Ya Abba, surəf-asan; wər əssenən awa taggin.»

Ҳzunan tabdoq ən Ҳaysa əs təšaṗeren. ³⁵ Tamattay təbdâd den təswâd. Imuzaran amaran əgân tamakkakkayt daҗ Ҳaysa, gannin: «Ҳnta wa issəfsan aytedan, assafset iman-net kud ənta a imosan Ҳlməsix, Tafrənt ən Məššina.»

³⁶ Sojitan da, əgân daҗ-as tamakkakkayt. Tihazan-t-in, tazzalan-as-in bənəgər. ³⁷ Gannin-as: «Kud kay əmənokal ən Kəl-Ҳlyəhud a təmosaҗ, tassafsəҗ iman-nak.» ³⁸ Ҳttəytəyan deҗ dənnəg-əs əsəllum a fəl iktâb as: «Awa Ҳmənokal ən Kəl-Ҳlyəhud.»

Meddan win əššin ən nəsgufa

³⁹ A das-itaggu iyyan daҗ meddan ən jujab ən baydagan win dəgman-əs tawataytəy-nen ark batuten, igann-as: «Wərgəҗ kay Ҳlməsix? Safsu za iman-nak, tassafsəҗ-ana.»

⁴⁰ Isannarṗam-as wa hadan, inn-as: «Kay təksəda a wər təge Məššina, kay wa obaz əššəriṗa imosan təməttant wa t-ibazan? ⁴¹ Nakkanay əššəriṗa wa danaҗ-itawaggan oṗâd, awa dər əhoran mazalan-nana a danaҗ-itawəxkaman, mišan aləs wa, ənta wər iga ark amazal waliyyan.» ⁴² Təzzar inna i Ҳaysa: «Ҳaysa, aktəw-i-du as du-təqqala taheҗ taṗmar-nak.» ⁴³ Inn-as Ҳaysa: «Ҳggəyeyəҗ əsilakanəҗ-ak as, azalada ad nənəməgəz aljannat nak dər-ək.»

Tamattant ən Ҳaysa Ҳlməsix

⁴⁴ Awen itaggu attəyan n ammasnazal. Təzzar əlsanat šiyyay amaḗal ketnet har təga tazzar, ⁴⁵ fəlas təfuk a igmad ənnur. Afər deҗ wa izamməzəyan edag wa zəddigan əd wa ogaran tazdak daҗ Ahan wa Zəwwəran n Ҳlyibada, izzərrat daҗ ammas. ⁴⁶ Təzzar ikkas Ҳaysa əməsli issohen, inna: «Abba, əgeҗ iman-in gər fassan-nak.» Inna awen ṗas əgmədan-tu man.

⁴⁷ As inay kabtan ən sojitan ən Kəl-Ҳrrum win əttəytəy-nen Ҳaysa awa igan den, iga təmmal i Məššina, amaran inna: «Illikan as aləs wa alṗadil.» ⁴⁸ Ҳddəwan aytedan aggotnen den y ad ənəyan awa z'agin. As t-ənəyan, əqqalan əggâtan idmaran-nasan fəl awa əgan man-nasan daҗ əṗsud. ⁴⁹ As itaggu awen, imidəwan ən Ҳaysa kul, əhânat tədoden šin das-d-əlkamnen harwa daҗ akal ən Galiləya, əbdâdan sədi, əswâdan.

*Tanakra ən Ƴaysa daɣ tɛmattant**Ɖtɔwɛgga ən Ƴaysa daɣ əzəkka*

⁵⁰ Ill-ay aləs igân Yusəf ihân Asaggawar wa Zəwwəran ən muzaran ən Kəl-Ɖlyəhud, imosan awedan olâɣan n alɣadil. ⁵¹ Ɖnta wər irda əs tanat ta əgan muzaran win, wala dɛɣ s arat wa igan. Yusəf wa, in əɣrəm ən Kəl-Ɖlyəhud igân esəm Arimatay, amaran igâ attama-net daɣ assa ən Taxmar ta n Məššina. ⁵² Ikka Yusəf Bilatəs wa n ənaxkim n akal, igraw-du ɣur-əs turagat n ad itkəl taɣəssa ən Ƴaysa. ⁵³ Təzzar ikkas-tat-du fəl tɛgəttawt, ig-et daɣ šifit, ig-et daɣ əzəkka imosan akazam əs wər kala a daɣ-as itawagga ənəmmettən. ⁵⁴ Awen itaggu daɣ əzəl wa daɣ simutugan aytedan y əmud wa n təsanfawt, ibukan y ənətti. ⁵⁵ Šidoden šin d-əddəwnen əd Ƴaysa harwa daɣ Galilaya, əlkâmnat i Yusəf. Ɖnaynat əzəkka d əmmək was daɣ-as tətawagga tɛɣəssa ən Ƴaysa. ⁵⁶ Ɖqqalnat aɣaywan, təzzar ad simutugnat aɗutan əzodnen d alwarditan win za təwənxəlne fəl tɛɣəssa-net. As d-ewad əzəl wa n əssəbət əssənfanat, imos awen alwajib n əššəriɣa wa n Ɖttawret.

24*Agamad ən Ƴaysa əzəkka*

¹ As əzəl wa n alxad, ənzaynat tədoden šin den s əzəkka ən Ƴaysa, ewâynat aɗutan win sammatagnat. ² Osanat-in təhunt ta təharat əzəkka, tətawasaxararad, təlla den y əzəkka. ³ Ɖggaznat əzzəka mišan wər daɣ-as ənaynat taɣəssa ən Ƴaysa. ⁴ Ɖqqanan ɣafawan-nasnat y awen. Wala a ihogan əbdadan-du əššin meddan dɛgma-nasnat əlsânen isəlsa bilazlaznen. ⁵ Ɖrmaxnat, oyyanat idmaran s amadal, təzzar ənnan-asnat meddan win əššin en: «Mas təsaggadmat y i iddâran daɣ nəmməttan?» ⁶ Ab'as illa da, inkar-du daɣ tɛmattant. Aktimat-du awa inna harwa iha akal ən Galilaya, ⁷ as inna: "Ag Aggadəm ilzâm-tu ad itəwəggu daɣ fassan ən nasbakkadan, itəwətəytəy fəl tɛgəttawt, iba-tu, təzzar inkər-du daɣ tɛmattant əzəl wa n karad."»

⁸ Amaran əktanat-du awa inna Ƴaysa. ⁹ Ɖfalnat əzəkka, əqqalnat əssoɣalnat awen kul i nəmmuzal ən Ƴaysa win maraw d iyyan əd nalkiman kul win hadatnen. ¹⁰ Šidoden šin əmosnat Maryama Madəl əd Taxya əd Maryama ta n anna ən Yaɣub əd tədoden šiyyad dər-əsna əddawnen. Ɖntanatay a əssoɣalnen aratan win i nəmmuzal. ¹¹ Mišan wər sər-san əlen aratan en almaɣna; adi a fəl dasnat-wər-əzzəgzanan.

¹² Dər iga awen da ya, igga-du Butros, ozal s əzəkka. As t-in-osa, iššəgga daɣ-as, wər daɣ-as inay ar šifit, təzzar iqqal, iqqân awen əɣaf-net.

Tarrayt n Emayos

¹³ Ɖzəl wen da iman-net ad əkkan nalkiman ən Ƴaysa əššin taɣrəmt iyyat tɛgât Emayos as təlla teklay n əššin alwaqan gar-es əd Yerusalam. ¹⁴ Mišawalan daɣ batu n aratan win əganen den kul. ¹⁵ Mišawalan den da as tan-d-ewad Ƴaysa ənta iman-net, iddew dər-san. ¹⁶ Hannayan-tu mišan wər t-əzdayan.

¹⁷ Inn-asan: «Ma daɣ təmašawalam da?» Ɖbdadan, təwâr təkənzert udmawan-nasan. ¹⁸ Inn-as wa daɣ-san igan esəm Kləyubas: «Adis kay ɣas daɣ aytedan win əhanen Yerusalam a wər əhen salan n awa daɣ-as igan daɣ adan win?» ¹⁹ Inn-asan: «Ma daɣ-as igan?» Ɖnnan-as: «Arat wa igrawan Ƴaysa wa n Nazaret, imosan ənnebi itaggan imazalan d awalalan ən təla tarna dat Məššina d aytedan kul. ²⁰ Sattarmasan-tu limaman win zawwarnen əd muzaran-nana, tətawaxkam-as tɛmattant, sattaytayan-tu fəl tɛgəttawt. ²¹ Nakkanay dat awen, nəgâ attama n as ənta a z'isəddərfe tamattay n Israyil. Mišan azalada, əzəl n aratan en wa n karad d igi. ²² Dər iga awen da ya, əqqânnat tədoden-nana šiyyad iɣafawan-nana, ənzaynen s əzəkka, ²³ mišan

wər daχ-as ənaynat taχəssa-net. Ǝqqalnat-du, ənnanat nifalalan-asnat angalosan, ənnan-asnat iddâr. ²⁴ Təzzar əkkan wiyyad daχ-na əzəkka, osan-in, ənayan arat kul wa ənnanat tədoden en, mišan ənta wər t-ənyan.»

²⁵ Amaran inn-asan Ƴaysa: «Xa kawanay za aljahilan! Izzəwwat fall-awan əzəgzan s arat kul wa ənnan ənnəbitan daχ Ǝlkəttaban. ²⁶ Wərgəχ Ǝlməsix ilzâm âs ad inəy alχazab təzzar, amaran igrəw tanaya-net?» ²⁷ Təzzar a tan-isasagru Ƴaysa awa sər-əs ənnan Ǝlkəttaban kul. Ibaz-du χur Ǝlkəttaban win ənnəbi Musa har win ənnəbitan kul win hadatnen.

²⁸ As din-əhozan taχrəmt ta əkkan, issəkna Ƴaysa as okây. ²⁹ Mišan əwəχan-tu, ənnan-as: «Ƴam χur-na fəlas əzəl igla, ehad ibuk y igi», təzzar izzəbbat χur-san. ³⁰ As əggazan šin tattay, idkal Ƴaysa tagəlla, iggoday i Məššina, irz-et ikf-asantat. ³¹ Ǝmmoranat šittawen-nasan alwaq wen da, əzdayan-tu, mišan iggaz-asan ətənkul tamazayt ten da. ³² Təzzar namannan gar-essan: «Zəχnin awen da fəl əknan man-nana təfalawist alwaq wa danaχ-iššewal daχ tarrayt, isasagr-ana Ǝlkəttaban n ənnəbitan.»

³³ Ǝbdadan tamazayt ten da, əqqalan Yerusalam. Osan-in inəmmuzal win maraw d iyyan əd nalkiman win hadatnen əddewan daχ adag iyyanda, ³⁴ gannin: «Tidət daχ a imos as Ǝməli Ƴaysa inkâr-du daχ təmattant, amaran inifalal i Simχon.» ³⁵ Ǝssoyalan-asan meddan win əššin əntanay da awa ənayan daχ tarrayt, d əmmək was t-əzdayan alwaq wad irza tagəlla.

Ǝnəfilal ən Ƴaysa i nalkiman-net

³⁶ Harwada əššewalan daχ awen as d-ibdad Ƴaysa iman-net gar-essan, inn-asan: «Alxer fall-awan.» ³⁷ Ǝgan tərəmməq zəwwərat, təggaz-tan tasa fəlas əχilan əggəsuf a hannayan den.

³⁸ Təzzar inn-asan Ƴaysa: «Ma fel təššiwašam? Ma fel dex təgâm aššak? ³⁹ Ǝnəyat ifassan-in əd daran-in, nak iman-in awa. Ǝdəsat-i ad tənəyam, fəlas əggəsuf wər ila taχəssa wala iχasan win as di-təhannayam da ələq-qan.»

⁴⁰ As dasan-inna awen, isakn-en ifassan-net əd daran-net, ⁴¹ mišan əgla wər daχ-as əkkesan aššak fəl awa əgan daχ təfalawist, ikna dex sər-san awen əsəmməkləl. Adi a fəl a dasan-inna: «Awak təlâm a itamatsan da?» ⁴² Ǝkfan-tu tablalt ən kifi təχğât. ⁴³ Ibaz-tat, itš-et dat-san.

Ǝššəχəl wa daχ iga Ƴaysa inalkiman-net

⁴⁴ Dəffər awen inn-asan Ƴaysa: «Ǝntanay da aratan win dawan-ənnə harwa kawan-əheχ: Aratan kul win fall-i əktabnen daχ Ǝttawret n ənnəbi Musa d Ǝlkəttaban win hadatnen d Azzabur əššil ad andin.» ⁴⁵ Amaran ora iχafawan-nasan alwaq wen da y ad agrin Ǝlkəttaban.

⁴⁶ Inn-asan: «Wərgəχ iktâb as, Ǝlməsix ad inəy alχazab, iba-tu, inkər-du daχ təmattant əzəl wa n karad, ⁴⁷ təzzar təwəggin salan ən tətubt s esəm-net i təmattiwen kul fəl ad əgrəwnat təsurreft ən bakkadan, antu awen daχ Yerusalam. ⁴⁸ Kawanay təmôsam šigəyyawen n aratan win. ⁴⁹ Amaran nak a fall-awan du-zəzzəbbəχ Infas wa Zəddigan s Abba-nin a igan arkawal-net. Daχ adi ad wər təgmədam aχrəm wa da har d-azzabbat Infas wa Zəddigan, akf-iwan tarna ta du-təfalat Məššina.»

Təwaylay ən Ƴaysa ijənnawan

⁵⁰ Dəffər awen, iddew dər-san, əgmadan aχrəm, har din-əhozan taχrəmt ta n Betanəy, təzzar idkal ifassan-net, ittar-asan a tan-ikfan albaraka. ⁵¹ Itattar-asan harwa da as dər-san imməzzay, immədkal əs jənnawan.

⁵² Ǝntanay amaran, as das-əssəjadan, əqqalan Yerusalam əknân təfalawist. ⁵³ Faw əhân Ehan wa Zəwwəran n Ǝlχibada, əmmâlan Məššina.

Elinjil wa n Yaxya Isanti

Awal wa imosan ənnur əd təməddurt

¹ Əstizarat as d-ixlak Məşşina əddənet da Awal ill-ay. Awal illa yur Məşşina, amaran Awal wa imos Məşşina. ² Awal əstizarat illa yur Məşşina. ³⁻⁴ Ixlak-du sər-əs Məşşina arat kul; wər t-illa arat dağ əddənet wa sər-əs du-wər-nəxlek fəlas Awal wa ənta a ihakkin təməddurt ta təmosat ənnur y aytedan. ⁵ Imilawlaw dağ šiyyay mişan wər t-əqbelnat. ⁶ Osa-du aləs iyyan igân esəm Yaxya, a d-izimazal Məşşina; ⁷ imos təgəyya fəl ad ammagrad s ənnur wa, əzzəgzənan aytedan kul s aratan win igannu. ⁸ Ənta iman-net wər imos ənnur, ətəwəsəgla ças a d-iga imos təgəyya fəl ad ammagrad s ənnur wa. ⁹ Awal wa ənta a imosan ənnur wa n tidət, wa d-ikkan əddənet isimələwlew aytedan kul. ¹⁰ Ənta a ihan əddənet, ixlak-kat-du sər-əs Məşşina, mişan wər tu-təqbel əddənet. ¹¹ Osa-du akal-net eges wər t-əqbelan aytedan-net. ¹² Amaran aytedan kul win t-əqbalnen, əzzəgzənan sər-əs, win di ikf-en almaçam ən tişit ən bararan ən Məşşina. ¹³ Bararan en əlâsan təhəwt. Mişan təhəwt en wər tola əd ta tətawazdayat. Wər təga əs ləkkum i deran n aggadəm, wala tanat-net. Kala kalar Məşşina iman-net as tan-iga bararan-net. ¹⁴ Wa imosan Awal, iqqal awedan ixsar yur-na, ikna təla n əlxurma, imos məşşis ən tidət. Nəsinagra tanaya-net, tanaya ta igarraw Barar a n iyyanda yur Abba-net. ¹⁵ Iggəyyat-as Yaxya, išşewal s afalla ad igannu: «Wa dağ as əhe batu-net, assaça wa dawan-ganna: "A d-asu dəffər-i mişan oğar-i, fəlas dat-i da ill-ay.»» ¹⁶ Awalla ketnana nəgraw albaraka wər nəla əddukad s əlxurma-net ikmâlan. ¹⁷ Fəlas Məşşina ikf-anax əşşəriça dağ əfus ən Musa, əlxurma əd tidət amaran osa-du dər-san çaysa Əlməsix. ¹⁸ Wər t-illa awedan inâyan Məşşina, mişan Barar a n iyyanda imosan Məşşina, illa yur Abba, ənta a danaq-q-issosanan.

Əşşəxəl wa iga çaysa dat aytedan kul

Təgəyya ən Yaxya wa isalmaçan dağ aman

¹⁹ Ənta da təgəyya ta iga Yaxya y arat dağ limaman əd Kəl-Ləbi win d-əfalnen Yerusalam assaça wa tan-du-zammazalan muzaran ən Kəl-Əlyəhud y ad t-əssəstənan d awa imos. ²⁰ Wər ugay s a dasan-ajjawwab. Kala kalar idkal əməsli-net s afalla inn-asan: «Nak wər əmosax Əlməsix.» ²¹ Ənnan-as: «Ma təmosa za? İlyas a təmosa?» «Kala kala» inn-asan, «wər t-əmosa.» «Ənnəbi wa ittəmalan a təmosa?» «Kala kala» inn-asan, «wər t-əmosa.» ²² Təzzar ənnan-as: «Dağ adi ma təmosa? İhor a din-nasu aytedan win dana-d-əssəgplanen newây-asan aljawwab n awa təmosa. Dağ adi əməl-anaq-qu.» ²³ Inn-asan arat wa inna ənnəbi İsayas irəw, as inna: «Nak, a imosan wa isaxaren dağ əsuf igannu: "Səssiçədat abaraqqa y Əməli.»»

²⁴ Aytedan win d-əmmoçalnen əs Yaxya da, əhân-tan kəl taggayt ta n Fərisaytan. ²⁵ Əlasan-tu əsəstan ənnan-as: «Ma fəl təsalmaçax aytedan dağ aman, kay tənne wər təmosax Əlməsix, wər təmosax dəx ənnəbi wa ittəmalan?» ²⁶ Inn-asan: «Nak, aman a dağ salmaça, mişan illa gar-ewwan awedan wər təzdayam, ²⁷ s ənta a du-z-asin dəffər-i, amaran awa di-iga dağ şigrat, wər eweda wala arra ən suçan ən çateman-net.» ²⁸ Aratan win kul amaçal ən Betanəy a dağ taggan fəl tagadamayt ta hadat n agarew wa n Yordan s ənta a dağ isalmaç Yaxya aytedan.

²⁹ As iga əzəl wa hadan ogga Yaxya Ƴaysa izay-t-idu, təzzar inna: «Ǝnta den ajaƳol ən Məşşina wa itakkasan ibakkadan daƳ əddənet. ³⁰ Ǝnta as əhe batu-net as dawan-ganna: "Aləs iyyan a d-asu dəffər-i, mišan ogar-i fəlas dat-i da ill-ay." ³¹ Nak iman-in wər t-əzdaya mišan ose-du ad salmaƳaƳ aytedan daƳ aman, fəl a d-inəfiləl i Kəl-Ǝlyəhud.» ³² Ilas Yaxya təgəyya inna: «Ǝswâda daƳ Infas wa Zəddigan as d-igmad jənnawan, iha šašşelan ən tədabert, iwar-tu. ³³ Dat awen wər t-əzdaya, mišan Məşşina, s ənta di-d-izammazalan y ad əsalmaƳaƳ aytedan daƳ aman, inn-i: "Aləs was tənayaƳ Infas wa Zəddigan as fall-as d-izzəbbat, aləs wədi ənta a z'isalmaƳan aytedan daƳ Infas wa Zəddigan." ³⁴ Ǝmərədda arət wa ənayaq-qu əs šittawen-in; amaran əggəyye silakanay as aləs wa ənta Barar ən Məşşina.»

Inəttulab win azzarnen

³⁵ As iga əzəl wa hadan, iha Yaxya edag wa harwa da, ənta əd nəttulab-net əşşin, ³⁶ ogga Ƴaysa as dagma-nasan d-illam, inna: «Ǝnta den, AjaƳol ən Məşşina.» ³⁷ Ǝslan nəttulab win əşşin a i batu ta iga da, təzzar əlkaman i Ƴaysa. ³⁸ Iswad-in Ƴaysa dəffər-əs ogg-en əlkâman-as, inn-asan: «Mas təsaggadam?» Ǝnnan-as «Mənid təxsara Ǝşşex?» ³⁹ Inn-asan «Agliwat-du a tu-tənəyam». Itaggu awen takəst zagret. Ǝglan əddewan dər-əs, ənayan dad illa, təzzar əssəndan Ƴur-əs əzəl. ⁴⁰ Meddan win əşşin əlkammen i Ƴaysa dəffər tasalay ta əgan y awal ən Yaxya, esəm n iyyan daƳ-san Andrawəs, amadray ən SimƳon Butros. ⁴¹ Immənay Andrawəs d əmaqqar-net SimƳon əstizarat, inn-as: «Nakkanay nəmminay d Ǝlməsix.» (AlmaƳna Kristos.) ⁴² Amaran ilway-tu əs Ƴaysa. Iswad Ƴaysa daƳ SimƳon Ƴas inn-as: «Kay SimƳon ag Yaxya, ad tagaƳ esəm Qayfas.» (Esəm wa ola əd wa n Butros, almaƳna-net təhunt.) ⁴³ As affaw ira Ƴaysa iki n amađal ən Galilaya. Immənay əd Filibus inn-as: «Ǝlkəm-i.» ⁴⁴ (Filibus d Andrawəs əd Butros aƳrəm-nasan iyyanda, esəm-net Betsayda.) ⁴⁵ Immənay Filibus əd Natanəyel inn-as: «Nakkanay nəmminay əd was imməgrad ənnəbi Musa daƳ Ǝttawret, əmmigradan sər-əs dəƳ Ǝlkəttaban n ənnəbitan, a t-imosan Ƴaysa wa n ag Yusəf wa n əƳrəm ən Nazaret.» ⁴⁶ Təzzar inn-as Natanəyel: «Immikkan aƳrəm ən Nazaret a t-id-əgməd arət ihossayan?» Inn-as Filibus: «Ayaw tənəya.» ⁴⁷ Ogga Ƴaysa Natanəyel izay-t-idu, inna: «Ǝnta den awedan n Israyil wa n tidət, wa wər iha a imosan təlmənufəqa.» ⁴⁸ Inn-as Natanəyel: «Məni awas di-təzdaya?» Ijjəwwab-as Ƴaysa inn-as: «Harwa kay du-wər-iƳra Filibus, assaƳa wad təlle daw ašək wa n fig, da əhannayaq-qay.» ⁴⁹ Inn-as Natanəyel: «Ǝşşex, kay a imosan Barar ən Məşşina, təmosaƳ əmənokal n Israyil.» ⁵⁰ Inn-as Ƴaysa: «Təzzəgzana fəl as dak-ənneƳ əhannayaq-qay daw ašək ən fig. Ad tənəyaƳ aratan wiyyad zawwarnen ogarnen wədi.» ⁵¹ Inn-as Ƴaysa dəƳ: «ƎggəyyeƳ əsilakanay-awan as dəffər awa ad tənəyam ijənnawan ənnolaman tagazzayan sər-san angalosan, tazabben-du fall-i nak Ag Aggadəm.»

2

Takrəst ta təgat daƳ əƳrəm ən Kâna

¹ Ǝzəl wa n karad təmal-tu təkrəst daƳ əƳrəm ən Kâna daƳ amađal ən Galilaya, təh-et anna ən Ƴaysa, ² təzzar itawaƳra-du Ƴaysa ənta da, iddew-du əd nəttulab-net əs təkrəst en. ³ As ab'as d-iqqim wala daƳ esmad n alƳanab, tənna anna ən Ƴaysa y as: «Esmad n alƳanab iƳrad.» ⁴ Inn-as Ƴaysa: «Anna, tədi a kam-wər-tədgəz. Alwaq-in wər d-ewed.» ⁵ Tənna anna-net i mašşaxalan: «Agat awas dawan-inna kul.» ⁶ Ǝskâran den sədis təkən taggazan aman as taggin Kəl-Ǝlyəhud əzəzdəg imosan alƳadat-nasan. Ǝkkulluk n iyyan itaggaz-tu əddukad ən temeday ən litər. ⁷ Inna Ƴaysa i mašşaxalan en: «Ǝdnəyat itəkan di aman.» Ǝntanay dəƳ ədnayan-tan har fayyan. ⁸ Inn-asan amaran: «Ǝlkəwat daƳ-san əmərədda y əmaway ən saksas.»

Ëgan awen da. ⁹ As iram əmaway ən saksas aman win əmməttaynen da, əqqalan esmad n alxanab, as wər issen iguz wa d-iga, mišan imaşşaxalan win tan-d-əlkawnen da əssânan, iyra amazlay, ¹⁰ inn-as: «Iməssəksas kul esmad n alxanab wa izodan a garrawan, amaran dəffər as filawasan ad garrawan wa isammakkanan. Eges kay təxbara wa izodan har əmərədda!» ¹¹ Ənta əddi təlməxjujat təmosat alxalamat ta tazzarat immozal Ƴaysa. Ig-et dağ əxrəm ən Kâna ta n Galilaya. Isannafalal sər-əs tanaya-net, təzzar əzzəgzanan sər-əs nəttulab-net. ¹² Dəffər awen izagaday Ƴaysa, ikka təxrəmt ən Kafarnahum, ənta d anna-net, əd mədrayan-net, əd nəttulab-net. Wər dağ-as əgen ar arat n adan.

Assa ən Ƴaysa Ehan wa Zəwwəran n Əlyibada

¹³ As d-ihoz əmud wa n Akkay imosan amud maqqaran ən Kəl-Əlyəhud, iggəzzay Ƴaysa ikka Yerusalam. ¹⁴ Ogaz-in Ƴaysa dağ ağalla wa ixlayan Ehan wa Zəwwəran n Əlyibada, imassatagan ən zəgran, d ayfəd, əd tədəbren, əd təximiten ən kəl sanji. ¹⁵ Iga ələkkud əs xunan istaq-qan dağ afarag en ketnasan, əntanay d ayfəd, əd zəgran, infaz dağ amađal izərfan ən kəl sanji, isabbanbay tebəren-nasan. ¹⁶ Imassatagan ən tədəbren əntanay inn-asan: «Əkkəsət awa dağ adag a, ad wər tagim ehan n Abba-nin əssuk.» ¹⁷ Əktan-du nəttulab akatab n ənnəbi Dawəd wa innan: «Tara-nin ehan-nak tərxa dağ-i şilat ən təmsay.» ¹⁸ Əssəstanan-tu muzaran ən Kəl-Əlyəhud ənnan-as: «Ma təmos təlməxjujat tas təfragay igi-net təmosat alxalamat, təsitaddat as tələx tarrayt n igi n adi?» ¹⁹ Ijjəwwab-asan Ƴaysa inn-asan: «Jəbbərəjjətət Ehan wa Zəwwəran n Əlyibada di, ad t-əssəbdəda dağ karad adan.» ²⁰ Ənnan-as: «Ehan wa Zəwwəran n Əlyibada di əkkozat təmərwən n awatay əd sədis a fəl itawakras. Kay mas tu-za-təssəbdəda dağ karad adan?» ²¹ Ehan wa Zəwwəran n Əlyibada wa immal Ƴaysa da, təxəssa-net a sər-əs issoka. ²² As d-inkar dağ təməttant əktan-du nəttulab-net tənna ta iga adi. Əzzəgzanan s Awal ən Məşşina, d awal wa iga Ƴaysa da. ²³ Aytədan aggotnen əzzigzanan əs Ƴaysa xur anay ən təlməxjujaten şin immozal əmosnen alxalamatən, dağ adan win iga dağ Yerusalam xur əmud wa n Akkay. ²⁴ Mišan ya Ƴaysa wər tan-ifles fəlas izdây-tan ketnasan, ənta ²⁵ wər iddərar s i das-igan isalan n awedan id wər das-işber awa ihan əwəl-net.

3

Ƴaysa əd Nikodemos

¹ Ill-ay aləs iyyan igan esəm Nikodemos, ihân taggayt ən Fərisaytan, imos iyyan dağ muzaran ən Kəl-Əlyəhud. ² Osa-du Ƴaysa ahad iyyan inn-as: «Əşşex-in, nakkanay nəssân as Məşşina kay d-izammazalan sər-na, a dana-təsassaxra, id wər t-illa i z'agin təlməxjujaten şin təge əmosnen alxalamatən, ar əs tədhəlt ən Məşşina.» ³ Ƴaysa dəx inn-as: «Əggəyyey əsilakanax-ak as: Wər t-illa awedan ifrâgan anay ən Tağmar ta n Məşşina ar s ad iləş təhəwt.» ⁴ İssəstan-tu Nikodemos inn-as: «Mas z'iləs awedan waşşaran təhəwt? Şi təgat da wər ifreg ad iləş tewaxlay ən tədist n anna-net.» ⁵ Inn-as Ƴaysa: «Əggəyyey əsilakanax-ak as: awedan wər ifreg iguz ən Tağmar ta n Məşşina ar s ad ihəw s aman d Infas wa Zəddigan. ⁶ Ələsəl n aggadəm iyyan aggadəm, amaran awedan wa d-igmadan Infas wa Zəddigan, Infas wa Zəddigan a dağ-as innodan. ⁷ Dağ adi a dak-wər-iqqən eyaf as dak-ənney: İwâr-kawan ad tələsam təhəwt. ⁸ Ađu iggâr sas ira, təsalla y əməsli-net, mišan wər təssena da d-ifal wala dad ikka. Samal di da a iha awedan wa ihəwan s Infas wa Zəddigan.» ⁹ İssəstan-tu Nikodemos inn-as: «Məni tat təməwit tas z'agin aratan win di?» ¹⁰ İjjəwwab-as Ƴaysa inn-as: «Təmosax əmusan zəwwəran dağ İsrayil eges wər təssenay aratan win! ¹¹ Əggəyyey əsilakanax-ak as: Nətamagrad s awa nəssan, nətagayyat dəx fəl awa nənay, eges tugayam s ad təqbəlam təgəyya-nana. ¹² Dad wər təzzəgzanam

s awa dawan-ganna s əddənet mas za təzzəgzənam awa dawan-ganna s alaxirat? ¹³ Wər t-illa is kala ad inay ijənnawan, ar nak Ag Aggadəm a tan-d-igmadan. ¹⁴ Emmək was issərgag ənnəbi Musa taššolt fəl əgət dəx taneray, əmmək wen dəx as kundaba tawasahake nak Ag Aggadəm, ¹⁵ fəl ad iqqəl as i sər-i izzəgzanan, ad igrəw təməddurt ta təxlalat. ¹⁶ Fəlas, Məššina awa iga y əddənet dəx tara ikfa Barar-net a n iyyanda fəl ad iqqəl as i sər-əs izzəgzanan wər z'ihlək, kalar ad igrəw təməddurt ta təxlalat. ¹⁷ Məššina wər d-issoka Barar-net əddənet fəl a tat-ihlək kalar issok-as-tat-du fəl a sər-əs tafsu. ¹⁸ I sər-əs izzəgzanan wər ihlek, mišan wa sər-əs wər nəzzəgzan ihlāk fəlas wər izzəgzan s esəm ən Barar a n iyyanda ən Məššina. ¹⁹ Əddəlil da wa d-ewayan ahluk: Ənnur a d-osan əddənet, mišan əssofan-tu aytedan šiyay id arak mazalan a taggin. ²⁰ Amaran i itaggan təkma wədi oglaf ənnur, wər t-id-z-akku fəlas iksud ad nəfiləlan arak mazalan-net ezal a mallan. ²¹ Mišan wa itaggan arat wa imosan tidət, wədi itakka-du ənnur, fəl ad itəwəney as əmazal-net issind-ay dəx ləkkum i Məššina.»

Yaysa əd Yaxya wa isalmağan dəx aman

²² Dəffər awen ikka Yaysa əd nəttulab-net amaḍal ən Yahudəyya. Iqqim dəx-as har iga arat n azzaman ənta dər-san, isalmağ Yaysa aytedan dəx aman. ²³ Yaxya ənta da isalmağ aytedan dəx aman dəx təsəssəngəyt ta n Aynon, dagma ən Salim, fəlas əllan-tu aman den aggotnen. Tasin-t-idu aytedan isalmağ-qan. ²⁴ Arat wa as itaggu Yaxya harwa da wər iggez kasaw. ²⁵ Tənkər təmazaq gər nəttulab ən Yaxya d iyyan dəx Kəl-Əlyəhud, dəx batu ən təməwiten šin as itaggu zəzdağ. ²⁶ Əkkan Yaxya ənnan-as: «Əššex-nana, təkittəwa aləs wa dər təddəwa fəl afay ən Yordan wen sen, s ənta as dana-təmməgrada? Tahannaya! Əmərədda isalmağ aytedan dəx aman amaran ketnasan takkin-tu!» ²⁷ Inn-asan Yaxya: «Awedan wər z'igrəw ar awa t-ikfa Məššina. ²⁸ Kawanay iman-nawan təggəyyem-i as ənnəx: "Wər əmosağ Əlməsix, ətəwəzəmizal ɣas a d-əge dat-əs." ²⁹ Əmazlay da ilan təmazlayt, amaran əmidi-net wa n ənaflis-net, ənta a innəttafan əd zəzlay, issigad den da iqqâl-as. As isla y əməsli n əmazlay igmây-du təmazlayt, ad aknu tədəwit. Tədəwit tədi za ənta a əgeɣ, amaran əmərədda tənda. ³⁰ Ittəyet ətəwəsəɣmar-net ifnəz wa-nin. ³¹ Wa d-igmadan afalla, ənta a idkalan dənnəg awedan kul, wa ihan əddənet in əddənet amaran aratan n əddənet as itamagrad. Wa d-igmadan ijənnawan, idkâl dənnəg awedan kul, ³² iggəyyat s awa inay d awas isla mišan wər t-illa i iqbâlan təgəyya-net. ³³ Wa iqbâlan təgəyya-net, isilakan awa inna Məššina, ³⁴ fəlas wa d-izammazal Məššina, awal ən Məššina a immal, id Məššina a das-igan y Infas wa Zəddigan tehakkay wər nəla əddukad. ³⁵ Abba ira Barar-net amaran aratan kul ig-en dəx əfus-net. ³⁶ Wa izzəgzanan əs Barar ən Məššina wədi igrəw təməddurt ta təxlalat, amaran wa ugayan s a sər-əs izzəgzən wədi eway-du əs man-net alham ən Məššina.»

4

Yaysa əd təntut ən Kəl-Samarəya

¹⁻³ Əslan Farisaytan as itawannu Yaysa igarraw inəttulab ogarnen win Yaxya isalmağ-qan dəx aman. (Arat wa imosan tidət as Yaysa iman-net wər isəlmiɣ awedan waliyyan dəx aman, inəttulab-net a salmağnen aytedan dəx aman.) As isla Yaysa y awa itaqqalan, igmad amaḍal wa n Yahudəyya, iqqal Galilaya. ⁴ Dad t-ilzam imur n amaḍal wa n Samarəya, ⁵ iššokal har ewad aɣrəm iyyan ən Samarəya igân esəm Šixar, dagma ən tawagost ta ikfa Yaqub barar-net Yusəf. ⁶ Edag wen ənta a iha əɣarus ən Yaqub. As t-id-ewad Yaysa, iddâz əşikəl, təzzar iqqim fəl əmi n əɣarus, itaggu awen ammasnazal. ⁷⁻⁸ As əkkan nəttulab-net aɣrəm y ad d-azzanzin imensewan,

təwar-du təntut ən Kəl-Samarəya a du-təzrâgat anu en. Inn-as Ƴaysa: «Šašw-i-du.» ⁹ Tənn-as: «Kay təmosax iyyan daƷ Kəl-Əlyəhud təgammaya daƷ-i aman, nak təmosat iyyat daƷ Kəl-Samarəya?» ¹⁰ Inn-as Ƴaysa: «Ənnar təssânax arat wa ihakku Məššina, təssânax deƷ awa əmosa nak wa kam-itansayan aman ən tassay, tansiyax-i-tan kam, akfaƷ-am-tan deƷ əmosan win sidurnen.» ¹¹ Tənn-as təntut: «Əššex-in, anu i zagren amaran kay wər tələx aga, daƷ adi mənı du-za-təgrəwax aman win sidurnen di? ¹² Šıglat a təgeƷ əmaraw-nana YaƷub a danaƷ-ikfan anu a, išwa aman-net, əšwan-tan maddanəs d aharay-net?» ¹³ Inn-as Ƴaysa: «I išwan aman di, ad t-iləs fad iguz, ¹⁴ mišan i išwan aman win tu-z-akfa wədi immizzay əd fad, fəlas a daƷ-as əqqəlan adri ingayan s aman win hakkinen təməddurt ta təxlalat.» ¹⁵ Tənn-as təntut: «Šašw-i-du daƷ aman win di, fəl a di-igməd fad, ammazaya d azarog n anu a.» ¹⁶ «Aglu», inn-as Ƴaysa. «AƷra-du aləs-nam təqqəlaƷ-i-du da da.» ¹⁷ Tənn-as: «Wər ələx aləs.» Inn-as Ƴaysa: «Tidət-nam as tənne wər tələx aləs, ¹⁸ fəlas səmmos as kala tan-təle, amaran wa Ʒur tələx əmərədda wərgəx aləs-nam. Tidət a di-təge.» ¹⁹ Təzzar tənn-as: «Əhannayax as kay ənnəbi a təmosa. ²⁰ İmarwan-nana adƷax a da a fəl əƷbadan Məššina, mišan kawanay Kəl-Əlyəhud tənnam Yerusalām a iha adag wa daƷ itawaxbad Məššina.» ²¹ «Tantut», inn-as Ƴaysa, «Zəgzən-i, alwaƷ izay-du a daƷ wər za təƷabbadam Abba gər za fəl ədƷax wa, wala deƷ Yerusalām. ²² Kawanay Kəl-Samarəya wər təzdayam wa təƷbadam, nakkanay Kəl-Əlyəhud nəzdây wa nəƷbad, fəlas efsan iguz wa n Kəl-Əlyəhud a d-əgan. ²³ Mišan alwaƷ izay-du – amaran osa-du – was inaxbidan win tidət ad əƷbədan Abba s İnfas wa Zəddigan əd tidət, fəlas Abba inaxbidan win t-əƷbadnen əs təməwit tədi, əntanay a ira. ²⁴ Məššina İnfas wa Zəddigan a imos, amaran inaxbidan-net ilzâm-tan ad t-əƷbədan s İnfas wa Zəddigan əd tidət.» ²⁵ Tənn-as təntut: «Əssânax as Əlməsix, itawann-as Kristos, a d-asu. As d-osa a danaƷ-isassagru aratan kul.» ²⁶ Inn-as Ƴaysa: «Nak a t-imosan, nak wa dam-iššewalan da.» ²⁷ Assaxat ten da a d-əqqalan nəttulab, iqqan-asan eƷaf əməšiwəl wa iga Ƴaysa əd təntut. Mišan wər tan-iha i ihalan ad t-issəstən, ann-as: «Ma daƷ-as tare?» Madəx: «Mas dər-əs təməšawala?» ²⁸ Təzzar toyya-du təntut ətəkin-net təqqal aƷrəm tənna y aytedan: ²⁹ «Ayewat ad tənəyam awedan a di-imâlan arat kul was kala ad t-əge, ifrâg as ənta a imosan Əlməsix!» ³⁰ Təzzar əgmadan-du aytedan aƷrəm əkkan Ƴaysa. ³¹ As itaggu awen inəttulab gammayan daƷ Ƴaysa ad atšu, gannan-as: «Əššex, atšu arat iyyan.» ³² Inn-asan: «İmensewan win z'atša wər tan-təzdayam.» ³³ Ad tənəmənınnı nəttulab gar-essan: «Əngəm Ʒas wərgəx awedan iyyan a das-d-ewayan imensewan?» ³⁴ Inn-asan Ƴaysa: «İmensewan-in wər tan-imos ar ad ammazala tara ən wa di-d-izammazalan, əƷrədəƷ əššəxəl wa daƷ-i iga. ³⁵ Awak kawanay wər təgənnim: "Əqqimnat-in əkkozat təlil y ad tagu Ʒarat?" Nak za ənnəx-awan akniwat əzəggəzdi ən təwəgas ad tənəyam as šıƷaxanen ənƷanat, wər ərenat ar əmiləy. ³⁶ Awedan wa italayan, wədi igraw ərruzmatan-net. ŠıƷaxanen šin təməddurt ta təxlalat a išadaw, fəl ad ajjayat wa inabbalan əd wa italayan tədəwit. ³⁷ Fəlas tidət ən təmajəq ta tənıat: "Aləs iyyan inabbal, iyyan italay." ³⁸ Əssəglaq-qawan fəl ad taləyam tawagost a daƷ wər təšxəlam, aytedan wiyyad a daƷ-as əšxəlınen, mišan təgrawam tənfa daƷ əššəxəl wa əgan den.» ³⁹ Əzzəgzanan aytedan aggotnen ən Kəl-Samarəya əs Ƴaysa fəlas tantut a dasan-tənnat: «İmâl-i aratan win as kala tan-əge.» ⁴⁰ Awen da a fəlas osan-t-idu Ʒas əgməyan daƷ-as a Ʒur-san aqqam. İqqim Ʒur-san Ƴaysa har iga əššin adan. ⁴¹ Əslan aytedan y awal-net, əzzəgzanan sər-əs wiyyad ogarnen winad igət. ⁴² Təzzar ənnan i təntut: «Nakkanay səket nəkna əzəgzan fəlas əstizarat kam Ʒas a danaƷ-ıgan isalan, əmərədda iman-nana as das-nəsla, amaran nəssân as tidət as ənta a imosan Ənəssefsi n əddənet.»

Təməzzəyt ən barar n amaššaxal n əmənokal ən Kafarnahum

⁴³ As əndan əşšin adan win den, ikka Ҳaysa amaḍal ən Galilaya, ⁴⁴ fəlas ənta iman-net as inna, ənnəbi wər itəwəsəxm̄ir daḡ aḡrəm wa daḡ idwal. ⁴⁵ As din-osa Galilaya əqbalan-tu Kəl-Galilaya id ənāyan imazalan kul win iga daḡ Yerusalām ḡur əmud wa n Akkay fəlas əntanay da osān-in amud en. ⁴⁶ Ilas-du Ҳaysa assa ən təḡrəmt ən Kāna ta n Galilaya, ta daḡ isammattay aman ig-en esmad n alḡanab. Ill-ay aləs imosan amaššaḡal n əmənokal daḡ təḡrəmt ən Kafarnahum. Aləs a ila barar-net irinan. ⁴⁷ As isla as Ҳaysa igmād-du amaḍal ən Yahudəyya iha Galilaya, os-ay-du onsay-tu ad idawan, a das-izzuzəy barar-net a ḡur təlla təmattant. ⁴⁸ Inn-as Ҳaysa: «As wərgəḡ ad tənāyam alḡalamaten əmmittaynen əd təlməḡjujaten, wər za təzzəḡzənəm fadda.» ⁴⁹ Inn-as amaššaḡal n əmənokal: «Əməli, ərəs-anay əs Kafarnahum tarmad harwa ad wər aba barar-in.» ⁵⁰ Inn-as Ҳaysa: «Aḡlu, barar-nak izzay.» Aləs deḡ izzəḡzan s awal ən Ҳaysa, igla. ⁵¹ Iha tarrayt iqqāl as immənay əd maššaḡalan-net das-d-əlkammen. Ənnan-as: «Barar-nak izzay.» ⁵² Issəstan-tan inn-asan: «Ma imos alwaḡ wa daḡ igraw iman-net?» Ənnan-as: «Əndazəl iggi ən tazzar a fall-as təwat tanaday.» ⁵³ Ikta-du aləs as alwaḡ wen da iman-net a daḡ-as inna Ҳaysa: «Barar-nak izzay.» Izzəḡzan sər-əs ənta d aḡaywan-net kul. ⁵⁴ Ənta da da təlməḡjujat təmosat alḡalamat ta n sanatat immozal Ҳaysa daḡ Galilaya dəffər agamad-net Yahudəyya.

5

Təməzzəyt n anabdon

¹ Dəffər adi ewad-du əmud iyyan ən Kəl-Əlyəhud, təzzar ikka Ҳaysa Yerusalām. ² Aḡrəm wa n Yerusalām təh-ay təḡazart təhozat edag was itawannu təsəhərt ta n Ayfəd. Təḡazart ta esəm-net Betsada, daḡ təḡibrit, amaran təlla ḡər səmmosat taliwen. ³ Taliwen šin əsrādan daw-əsnat miranan əḡānen daḡ məddəḡḡal, əd məḡḡudal, əd nəbdan. Əssigadan y ad əḡḡəzan aman šin əmətəkwəy, ⁴ fəlas immal-tu alwaḡ a daḡ d-itazabbat angalos iyyan n Əməli ijənnəjərwəy aman ən təḡazart ten. Əmiran kul wa azzaran iguz-net dəffər ənəjərwəy wa təḡa da, wədi ad izzəy daḡ təwərna ta tu-təḡrawat, a təqqal.

⁵ Edag en ih-ay aləs igān karadat təmərwen n awatay d əttam irin. ⁶ Ogg-ay Ҳaysa isrād, amaran issan as iga təwərna tərəwat, issəstan-tu inn-as: «Awak tərə təməzzəyt?» ⁷ Inn-as əmiran wa: «Əššəx, nak wər ələḡ awedan a di-igan daḡ təḡazart ta daḡ amazay wa daḡ tinəjərwəyan aman-net, amaran id əḡmāya d iguz-net, a di-izar sər-əs awedan iyyan.» ⁸ Inn-as Ҳaysa: «Əbdəd, tədkəla təssut-nak təjəwənke» ⁹ Izzay aləs wen daḡ tamazayt ten da, idkal təssut-net ijawankat.

Ənta arat wa itaḡḡu daḡ əzəl ən təsanfawt ən Kəl-Əlyəhud. ¹⁰ Ənnan muzaran ən Kəl-Əlyəhud y aləs wa izzayan da: «Kay ak masnat a wər təḡəḡ as azalada əzəl ən təsanfawt a daḡ-ak wər xalal aḡḡay ən təsalat-nak?» ¹¹ Eges ya inn-asan aləs wen: «Aləs wa di-izzozayan, ənta a di-innan: "Ədkəl təsalat-nak təjəwənke".» ¹² Ənnan-as: «Ma imos za aləs wa dak-innan: "Ədkəl təsalat-nak təjəwənke"?» ¹³ Ənta aləs wa izzayan da, wər t-əhen salan n awa imos awedan wa t-izzozayan den, fəlas aytedan əknanen igət a əhanen edag wa daḡ-q izzozay Ҳaysa den, iras-tan Ҳaysa, ijawankat.

¹⁴ Dəffər awen ogaz-t-in Ҳaysa daḡ Ahan wa Zəwwəran n Əlyibada inn-as: «Səsəm. Kay da izzayan da əmərədda. Əḡrəd d igi ən bakkadan, a kay wər igrəw arat ogaran wanad tallabəst.» ¹⁵ Ijawankat aləs wen təzzar imal i muzaran ən Kəl-Əlyəhud as Ҳaysa a t-izzozayan. ¹⁶ Arat wa eway-du sər-san as əknan gezzar ən Ҳaysa fəlas əzəl ən təsanfawt a daḡ iga awen. ¹⁷ Mišan inn-asan Ҳaysa: «Abba-nin faw da išḡāl, daḡ adi nak da əšḡāla.» ¹⁸ Batu ta, teway-du əs muzaran ən Kəl-Əlyəhud as əššotan daḡ agamay ən tanaxay ən Ҳaysa, fəlas wərgəḡ əlqanun n əzəl wa n təsanfawt ḡas a

imməzray, kalar iššota-du fall-as as inna imos Məššina abba-net. Dağ adi išašşagda iman-net əd Məššina.

Tanaya ən Ƴaysa

¹⁹ Inn-asan Ƴaysa: «Əggəyyeş əsilakanax-awan as Barar wər ifreg igi n arat waliyyan gar-es əd man-net. Wər itəggu ar arat was ihannay Abba-net itagg-ay. Amaran arat kul wa itaggu Abba, Barar da itagg-ay s asaway wen da. ²⁰ Fəlas Abba ira Barar, amaran isakn-ay arat kul wa itaggu; ad t-assaknu aratan ogarnen win da təla n almaşna y a tan-agu, fəl ad taşjim. ²¹ Emmək wa daş-as d-isankar Abba inəmməttan itaggu daş-san iman, əmmək wədi da as ihakku Barar ənta da təməddurt i was tat-ira. ²² Wa dəffər adi as Abba wər ixəkkəm y awedan waliyyan, kalar əşşərişə kul ig-ay daş əfus ən Barar ²³ fəl ad əzzəzwəran aytedan kul Barar s əmmək was əzzəzwəran Abba. Awedan kul wa wər nəzzəzwar Barar, wədi wər izzəzwar Abba wa t-id-izammazalan.»

²⁴ «Əggəyyeş əsilakanax-awan as awedan kul wa issəsaman i batuten-in, izzəgzan əs wa di-d-izammazalan, wədi igrāw təməddurt ta təşlalət. Wər z'awwaddab, kalar təmattant a d-igməd əs təməddurt.»

²⁵ «Əggəyyeş əsilakanax-awan as izay-du alwaş – s ənta da da nəha da əmərədda – as aytedan win sər-i wər nəzzəgzan ad aslin y əməli ən Barar ən Məššina, amaran win das-əslanen əkkəwanan-as ad əgrəwan təməddurt ta təşlalət. ²⁶ Fəlas əmmək wa daş as ihakku Abba təməddurt, əmmək wədi daş as ikfa Barar fərregat n a tat-ihakku ənta da. ²⁷ Ikf-i deş turagat n əşşərişə y aytedan, fəlas nak Ag Aggadəm a mosa. ²⁸ Ad wər əqqənən şafawan-nawan y arat wa: ilkâm a d-awəd alwaş a daş z'aslin nəmməttan kul daş zəkwan-nasan, y əməli-nin nak Ag Aggadəm ²⁹ əgmədan-du izəkwan-nasan əddi da. Win əganen aratan olaxnen, a d-əgmədan izəkwan y a d-ənkəran daş təmattant əgrəwan təməddurt, win əganen təkma amaran a d-əgmədan izəkwan y ad awwaddaban. ³⁰ Wər t-illa arat as əfragaş igi-net gər-i əd man-in. Əşşərişə wa tagga, əlkama daş-as y awa di-igannu Məššina, amaran əşşərişə-nin oşād, fəlas wər əlkema y arat wa əre nak iman-in, kalar arat wa ira wa di-d-izammazalan as əlkama.»

Şigəyyawen ən Ƴaysa

³¹ «As imos as nak şas-in as əggəyyeş i man-in, wədi təgəyya-nin wər təmos tidət. ³² Illat-tu wa di-imosan iyyat təgəyya, amaran əssānaş as arat wa igannu daş talşə-nin, tidət a imos. ³³ Təssəglam inammazalan əs Yaxya, iggəyyat-asan fəl arat wa imosan tidət. ³⁴ Nak wər əddərəraş əs təgəyya n awedan. Arat wa, wər tu-gənnax ar fəl ad təgrəwam təsureft. ³⁵ Yaxya zun fətəla təşxāt təbilazlaz a imos, amaran təqbalam ad tagim arat n assaxat ən tədəwit daş ənnur-net. ³⁶ Nak amaran əle təgəyya togarat ta n Yaxya assahat: Əşşəşələn win tagga, a tan-imosan win as di-issəwar Abba igi-nasan, əntanay a əmosnen təgəyya-nin, sitaddan as Abba di-d-izammazalan. ³⁷ Abba iman-net s ənta a di-d-izammazalan, ənta da iggiyyat-i. Wər kala ad təslam y əməli-net wala deş tənāyam azzat-net. ³⁸ Amaran wər iha awal-net iwallan-nawan, arat wədi isitadd-ay iba n əzəgzan-nawan əs wa d-izammazal. ³⁹ Tətəggam y Awal ən Məššina təşaray təgat s ənnəzər fəlas təşilam a sər-əs təgrəwam təməddurt ta təşlalət. Awal wa təşarrim da, ənta iman-net as fall-i iggəyyat, ⁴⁰ eges wər tərəm a di-du-takkim y ad təgrəwam təməddurt.»

⁴¹ «Nak wər gəmməyaş ətəwəsəşmar şur aytedan. ⁴² Əzdāyaş-qawan: əssānaş as iman-nawan wər tan-təha tara i Məššina. ⁴³ Nak Abba-nin a di-d-issəglan mişan wər tərəm əlqəbulat-in. Amaran as kawan d-osa awedan iyyan a d-iglān gar-es əd man-net, a tu-təqbəlam! ⁴⁴ Tərām ad tətənəməsəşmiram gar-ewwan, eges wər tərəm saşmar wa d-ifalan Məššina di n iyyan. Daş adi manəmmək as za təzzəgzənam?»

⁴⁵ Ad wər təxilam a kawan-əssəwəra lahan xur Abba-nin. Ənnəbi Musa ənta kawan z'issəwəran lahan, ənta wa daɣ təgam attama-nawan. ⁴⁶ Ənnar təzzigzanam əs Musa, təzzəgzənam sər-i nak da, fəlas immigrad sər-i daɣ Əlkəttaban-net. ⁴⁷ Mišan dad imos as wər təzzəgzənam s Əlkəttaban-net, manəmmək as za təzzəgzənam awa ganna?»

6

Əsətši wa iga Ƴaysa i səmmos gim n aləs

¹ Dəffər adi ikka Ƴaysa təgadamayt ta hadat n agaraw wa n Galilaya, itâwann-as deɣ agaraw wa n Tiberəyad. ² Təlkâm-as tamattay tagget, fəlas əhannayan aytedan aɣalamaten šin as itamazal əmosnen əmmək was izuzəy imiranan. ³ Iggəzzay Ƴaysa adɣaɣ, təzzar iqqim den da ənta əd nəttulab-net. ⁴ As itaggu awen amud wa n Akkay ihoz-du.

⁵ Iswad Ƴaysa inay tamattay tagget təzây-t-idu, inna i Filibus: «Məni du-za-nazzanzu tagəlla ətšan aytedan en kul?» ⁶ Əsəstan wa as t-iga Ƴaysa da issân arat was otas igi-net. A ira ɣas ad issən awa das-z-annu Filibus. ⁷ Inna Filibus i Ƴaysa: «Kud du-nəzzənza tagəlla ən sanatat təmad ən tafelt, almaɣna alxaq ən sanatat təmad n əzəl n əššəɣəl, da wər dasan-təkna arat.» ⁸ Inn-as ənattalib-net igân Andrawəs wa n amadray ən Simyon Butros: ⁹ «İlla barar da ilân səmmosat təgəlwen n əššəɣir d əššin kifitan, mišan ya ma za aknin y aytedan ogdânen d awa?»

¹⁰ Inna Ƴaysa: «Saxɣamiwat tamattay kul.» Təzzar əqqiman aytedan kul daɣ yel aggen illân den. Səmmos gim n aləs a əhanen tamattay en. ¹¹ İdkal-du Ƴaysa šigəlwen šin den. As iga igodan i Məššina, izun-tanat i tamattay. Iga awen da i kifitan. İgraw awedan kul awa das-igdan. ¹² As əyyəwanan aytedan inna Ƴaysa i nəttulab-net: «Šidəwat-du ikarammutan win du-tawaglaznen, fəl a daɣ-as wər iɣšəd wala.» ¹³ Əɣradan-du əkəmmi ən karammutan win d-əglazan aytedan daɣ təgəlwen n əššəɣir šinad ən səmmosat a. Maraw əzmaman d əššin a d-ədnayan daɣ gəlzan en.

¹⁴ As ənayan aytedan win aɣalamat tas immozal Ƴaysa da, ad gannin: «İgmâd aşsak as aləs wa ənta a imosan ənnəbi wa du-z-asin əddənet!» ¹⁵ İssan Ƴaysa as aytedan win abbaz a tu-z-agin šəhhəşəlan-tu tišit n əmənokəl, ilas-tan efel, ikka edag iyyan daɣ ədɣaɣ en da, ɣas-net.

Əjəwəнки wa iga Ƴaysa fəl aman

¹⁶ As təga takəst zagadəyan nəttulab-net s agaraw, ¹⁷ əggəzan aɣlal əssəwəlan agaraw y ad əxrəsan əs tayrəmt ta n Kafarnahum. İtaggu awen ehad, Ƴaysa amaran wər tan-in-ewed harwa da. ¹⁸ İgar-du aɣu issohen ad tanastaban aman n agaraw. ¹⁹ As əgan nəttulab ən Ƴaysa edag ən səmmos kilawtan madəɣ sədis n əşikəl, oggan Ƴaysa daɣ ihəz ijiwankat-du fəl aman izay-du aɣlal wa han, təzzar təggəz-tan tasa. ²⁰ Mišan inn-asan Ƴaysa: «Təgmədet-kawan tasa, nak awa!» ²¹ Gammayan d a t-id-əzzugəzan aɣlal den da, as dər-san ewad əɣlal edag wa əkkan.

Ƴaysa a imosan amensay wa ihakkin təməddurt

²² As əzəl wa hadan təgr-in tamattay ta təwarat efay n agaraw wen sen as aɣlal iyyanda ɣas a illan den əndəzəl, amaran əssanan as Ƴaysa wər inamaggaz aɣlal wa əd nəttulab-net. Əssânan ənta da as inəttulab-net ɣas-nasan as əgłan. ²³ Ənzayan-du wiyyad a d-əfalnen aɣrəm ən Tiberəyad. Osan-du dagma n adag wa daɣ tətša tamattay tagəlla dəffər godan win iga Ƴaysa y Əməli. ²⁴ As tənay tamattay as Ƴaysa wər illa den ənta wala inəttulab-net, təggəz iɣlalan win den əgməyan Ƴaysa əs Kafarnahum.

²⁵ Osan-t-in fəl afay n agaraw wa hadan, təzzar ənnan-as: «Ya Əşşex, Emmay dutose da?» ²⁶ Ig-asan Ҳaysa aljawab wa, inna: «Əggəyye silakanax-awan as wər di-təsəggədam ar fəl as tətšam tagəlla har daḡ-as təyyəwanam, wərgex aššaddat n əgərri n almaḡna n alḡalamaten šin əmmozala a fəl di-təlkamam. ²⁷ Ayyat əššəḡəl daḡ agamay ən mensewan win ḡaššadnen, gammayat imensewan win wər nəḡəššəd, hakkin təməddurt ta təḡlalat. Imensewan win nak Ag Aggadəm a dawan-tan-z-akfin fəlas nak a issəwar Məššina di n Abba ejwal wa n taḡmar-net.»

²⁸ Əssəstanan-tu ənnan-as: «Məni za arət was danax-iwar a tu-nagu y ad naknu əššəḡəlan win ira Məššina?» ²⁹ Ijjəwwab-asan Ҳaysa inn-asan: «Əššəḡəl wa daḡwan ira Məššina, wər t-imos ar ad təzzəgzənam əs wa d-issəḡla.» ³⁰ Əlasan-tu əsəstan ənnan-as: «Ma təmos za alḡalamat ta dana-za-tammazala fəl a sər-ək nəzzəgzən? Ma za taga? ³¹ Imarawan-nanax ətšan daḡ taneray amensay wa n Manna. Ənta da awa ənnan Əlkəttaban daḡ batu tədi: *"İššəts-en amensay wa d-ifalan ijənnawan."*»

³² Inn-asan Ҳaysa: «Əggəyyex silakanax-awan as wərgə ənnəbi Musa a kawan-ikfan amensay wa d-ifalan ijənnawan. Abba-nin ənta kawan-ikfan amensay wa d-ifalan ijənnawan, imos amensay wa n tidət. ³³ Fəlas amensay wa d-ifalan Məššina ənta a d-igmadan ijənnawan, amaran ənta a ihakkin təməddurt y əddənet.»

³⁴ Ənnan-as: «Əməli, amensay wədi hakk-anaq-qu faw.»

³⁵ Inn-asan Ҳaysa: «Nak a imosan amensay wa ihakkin təməddurt ta təḡlalat. Wa di-d-ikkan wər das-ilkem ad t-iggaz ḡələk, amaran wa sər-i izzəgzanan wər daḡ-as ilkem ad t-iggaz fad. ³⁶ Mišan ənnəx-awan: tənayam-i eges wər təzzəgzanam.»

³⁷ Awedan kul wa di-ikfa Abba a di-d-asu, amaran wər za mələlləya fəl i di-d-ikkan, ³⁸ fəlas əzəbbi a d-əge daḡ ijənnawan fəl ad ammazala s arət wa ira wa di-d-issəḡlan, wərgex arət wa əre nak iman-in. ³⁹ Ənta wa di-d-izammazalan wər ira ad ixrək awedan waliyyan daḡ win di-ikfa, kalar a ira a tan-d-əssənkəra daḡ təmattant əzəl a ilkaman. ⁴⁰ Awalla, ənta da awa ira Abba-nin: Aytədan kul win di-ənəynen nak Barar-net, əzzəgzanan sər-i, əntanay a z'əgrəwnen təməddurt ta təḡlalat, əssənkəraq-qan-du daḡ təmattant, əzəl wa ilkaman.»

⁴¹ Təzzar ad tigətəntinan Kəl-Əlyəhud əhân batu-net fəl as inna: «Nak a imosan amensay wa d-igmadan jənnawan.» ⁴² Gannin: «Awak awen wərgə Ҳaysa wa n ag Yusəf, nəkna təməzdəyt n abba-net d anna-net, manəmmək as du-z-inkər əmərəddə ad igannu ijənnawan a d-igmad?» ⁴³ Ijjəwwab-asan Ҳaysa inn-asan: «Ayyiwat əgətəntən gar-ewwan. ⁴⁴ Wər t-illa i di-du-z-akkin ar s a t-id-ewây sər-i Abba a di-d-issəḡlan, nak amaran əssənkəraq-q-idu daḡ təmattant əzəl wa ilkaman. ⁴⁵ Əlkəttaban n ənnəbitan ih-en as: *"Ketnasan a tan-isassayru Məššina."*»

Awedan kul wa islan y Abba, iqbal əsəssəxri-net wədi a di-d-akku. ⁴⁶ Wər t-illa is kala ad inay Məššina di n Abba ar wa t-id-ifalan. Ənta ḡas a t-inayan.

⁴⁷ Əggəyyex əsilakanax-awan as i izzəgzanan ad igrəw təməddurt ta təḡlalat. ⁴⁸ Nak a imosan amensay wa ihakkin təməddurt. ⁴⁹ Imarawan-nawan ətšan Manna daḡ taneray mišan wər dasan-igdel awen təmattant. ⁵⁰ As iga awen amensay was ganna nak, ijənnawan a daḡ d-igmad. I t-itšan wər tu-z-iba. ⁵¹ Nak a imosan amensay wa d-igmadan jənnawan ihakku təməddurt. Awedan kul wa itšan amensay wa ad iddər har faw. Amaran taḡəssa-nin a təmosat imensewan win z'akfa fəl ad təgrəw əddənet təməddurt.»

⁵² Tənkər tamazaḡ təsohet ḡər Kəl-Əlyəhud ad gannan: «Manəmmək as dana-z-akfu awedan wa taḡəssa-net natš-et?» ⁵³ Təzzar inn-asan Ҳaysa: «Awalla, əggəyyex əsilakanax-awan əs as wər tətšəm taḡəssa-nin nak Ag Aggadəm, tašwim deḡ azni-nin, wər dawan-tu-təlla təməddurt ta təḡlalat. ⁵⁴ Awedan wa itšan taḡəssa-nin išwa ənta da azni-nin, wədi igrāw təməddurt ta təḡlalat, əssənkəraq-q-idu deḡ daḡ

təmattant əzəl a ilkaman. ⁵⁵ Fəlas taḡəssa-nin amensay wa n tidət a təmos, azni-nin dəx aman ən tassay win tidət a imos. ⁵⁶ Awedan wa itsan taḡəssa-nin, išwa dəx azni-nin, wədi irtay dər-i, nak dəx əheḡ əwəl-net. ⁵⁷ Abba wa di-d-izammazalan ənta ḡur təlla təməddurt, amaran ənta a di-tat-ikfan, dəx adi wa itsan taḡəssa-nin ad t-əssudəra nak da. ⁵⁸ Ənta əddi da amensay wa d-igmadan ijənnawan. Wər ola əd wa ətsan marawan-nawan fəlas wər dasan-igdel adi təməttant. Awedan wa t-itsan, wədi ad igrəw təməddurt ta təḡlalat.» ⁵⁹ Arat da da wa inna ḡaysa dəx ahan n əlxibada ən Kəl-Əlyəhud dəx əḡrəm wa n Kafarnahum.

Efel wa əgan aytedan wiyyad dəffər ḡaysa, əlkaman-as wiyyad

⁶⁰ As əslan nəttulab-net aggotnen y arat wa inna da, ənnan: «Batu ta ši labasat, izzəwat əzəḡzan-net. Ma ifragan əlqəbulat-net?» ⁶¹ Issan ḡaysa dəx man-net as gitantanən nəttulab-net gar-essan dəx talḡa ten, inn-asan: «Əngəm əzəḡzan-nawan a tədas batu di? ⁶² Ma za tagim za as di-toggam nak Ag Aggadəm tagazzaya s adag wa əheḡ əstizarat? ⁶³ Infas wa Zəddigan a ihakkin təməddurt. Awedan əs təḡəssa-net, wər imos wala. Awalan win dawan-əgeḡ, Infas a mosan, hakkin dəx təməddurt. ⁶⁴ Mišan əhân-kawan aytedan wər nəzzəḡzan.» ḡaysa harwa ḡur tizarat da issân win wər nəzzəḡzan, issân dəx wa tu-z-agin dəx fassan. ⁶⁵ Ilas inn-asan: «Adi da a fəl dawan-ənnə: "Wər t-illa i ifragan a di-d-akku ar s ad t-ikfa Abba fərregat n adi."»

⁶⁶ Den da dəffər-əs ifal a əggen dəx nəttulab-net, əḡradan əd tidawt-net. ⁶⁷ Təzzar inna ḡaysa i nəttulab win maraw d əşšin: «Meqqal kawanay da təräm teklay?» ⁶⁸ Inn-as Simḡon Butros: «Əməli, ma imos wa za nakku? Kay a itaggan awalan win əhakkanən təməddurt ta təḡlalat. ⁶⁹ Nakkanay nəzzigzan sər-ək, nəssân as kay Əmizdag a d-ifâlan Məşşina.» ⁷⁰ Inn-asan ḡaysa: «Ak wərgəḡ əsənnəfrən a kawan-əge ketnawan, fəl marawewwan d əşšin, kuddeḡ âs iyyan dəḡ-wan Iblis.» ⁷¹ Batu ta Yahuza wa n ag Simḡon Isxarəyuti a fəl tat-iga ḡaysa. Fəlas Yahuza a tu-z-agin dəx fassan kuddeḡ âs iyyan dəx nəttulab win maraw d əşšin a imos.

7

Əlməsix iha tarrayt əs Yerusalām

¹ Dəffər adi issəwal ḡaysa d akal ən Galilaya, fəlas wər ira əsəwəl ən wa n Yahudəyya, id imuzaran ən Kəl-Əlyəhud a gammaynen əd tanəḡay-net. ² As itaggu awen əmud ən Kəl-Əlyəhud was itawannu wa n Təkarbanen ihoz-du. ³ Ənnan-as mədrayan-net: «Əfəl da takka akal wa n Yahudəyya fəl ad ənəyan nəttulab-nak əşşəḡələn win tətəgga. ⁴ Awedan as ira fall-as tagu masnat wər işəqqəl dəx əssir. Dad zama as tətəggaḡ aratan ogdanen d awa, wədi agu təməwit ta fəl tan-z-inəy awedan kul.» ⁵ As das-gannin mədrayan-net awen da wər sər-əs əzzəḡzanan. ⁶ Inn-asan ḡaysa: «Assaḡat ta-nin harwa da wər du-tewed. Kawanay amaran wər təzlayam assaḡaten. ⁷ Wər t-illa əddəlil a fəl kawan-za-təḡzər əddənət. Nak amaran əddənət təḡzâr-i fəlas təḡəyya a əmosa y arak mazalan win dəḡ-as tagginen. ⁸ Akkiwat amud wen kawanay. Nak wər t-əkke fəlas assaḡat-in harwa da wər du-tewed.» ⁹ As dasan-iḡrad tənna n aratan win, iqqim-du dəḡ Galilaya.

¹⁰ Dər iga awen da ya as əkkan mədrayan-net amud, ikk-ay ḡaysa ənta da, eges iki wa zun as iga dəḡ əssir, fəlas wər issəkna iman-net y aytedan. ¹¹ Itaggu əmud den da gammayan-tu muzaran ən Kəl-Əlyəhud gannan: «Ma iga aləs a?» ¹² As itaggu awen tənkar təməzaḡ ḡər aytedan dəḡ talḡa ən ḡaysa. Wiyyad za gannan: «Aləs di olâḡ.» Wiyyad amaran gannan: «Kalar əsəxrək fadda a itaggu tamattay.» ¹³ Mišan wər t-illa awedan ihalan amagrad dat aytedan dəḡ talḡa-net, fəl təksəda ən muzaran ən Kəl-Əlyəhud.

Assa ən Ƴaysa Ehan wa Zəwwəran n Əlyibada

¹⁴ As isaggaraygaray əmud ikka Ƴaysa Ehan wa Zəwwəran n Əlyibada a dağ-as isasayru. ¹⁵ Əsəssəyri wa iqqan iyafawan ən Kəl-Əlyəhud wəllen har əqqiman gannin: «Wa ak awedan ma t-issosanan aratan win, ənta wər iyra?» ¹⁶ Inn-asan Ƴaysa: «Əsəssəyri-nin wərge nak a d-ifal, kalar wa di-d-izammazalan a d-ifal. ¹⁷ Awedan kul wa iran ad ammazal tara ən Məşşina, wədi ad issən kud əsəssəyri-nin ənta Məşşina a d-ifal wala dəy arat a imos a d-ənzama gər-i əd man-in. ¹⁸ Awedan wa işşewalan s aratan a d-inzâm gar-es əd man-net, wədi iman-net as igammay tanaya. Mişan awedan wa işxalan dağ əsənnəfiləl ən tanaya ən wa t-id-izammazalan, wədi tidət a immal, wər dağ-as t-illa a imosan lahan. ¹⁹ Wərgex ikf-iwan ənnəbi Musa Əlqanun? Wər kawan-iha za i das-ilkâman. Mafel as təram a di-tanxim?» ²⁰ Ənnan-as aytedan: «Kay aggəsuf a kay-ihan. Ma iran tenaxay-nak?»

²¹ Inn-asan Ƴaysa: «Nak təlməyjujat iyyadda Ƴas a əge dağ əzəl ən təsanfawt, mişan əqqanan-as Ƴafawan-nawan. ²² Kawanay wərgex təşəqqalam dağ əzəl ən təsanfawt fəlas bararan-nawan a dağ-as təsamankadam? Amaran wər fall-awan imos awen lahan, fəlas ənnəbi Musa a dawan-t-innan – as iga awen imarawan-nana a t-id-əssəntanen, wərge Musa. ²³ Ənəyat za, dad imos as itawasamankad barar dağ əzəl ən təsanfawt fəl ləkkum y əşşərixa wa n ənnəbi Musa, mafel as kawan-iha alham-in fəlas əgey y awedan əzuzəy ikmâlan dağ əzəl ən təsanfawt? ²⁴ Ad wər təxakkamam awedan s azzahir-net. Kalar xakkamat əs tidət.»

²⁵ As t-oggan arat dağ aytedan win Yerusalam ad gannin: «Awak aləs wen, wərgex ənta as əran muzaran-nana tenaxay-net? ²⁶ Amaran ənta den əmərədda işşewalan den dat awedan kul, wər t-illa i das-igannin wala! Awak immikkan imuzaran-nanax a sallakannen as ənta a imosan Əlməsix? ²⁷ As iga awen da za aləs wa nəssân akal wa d-igmad, Əlməsix amaran assaxa wa du-z-asu ənəfiləl Ƴas a du-z-agu, wər t-illa awedan a issânan da d-igmad.» ²⁸ Harwa da isasayru Ƴaysa dağ Ahan wa Zəwwəran n Əlyibada as idkal əməsli-net wəllen inna: «Təzdâyam-i təssânam sas d-əhe! As iga awen da ya wər d-ose gər-i əd man-in, kalar wa imosan tidət a di-d-izammazalan; amaran wər tu-təzdayam. ²⁹ Nak əzdayaq-qu, fəlas ənta sər-wan d-əfala, amaran ənta di-d-izammazalan.»

³⁰ Den da ad əgmayan muzaran ən tamattay d abbaz-net mişan wər tan-iha i t-idasan, fəlas alwaq-net a du-wər-newed harwa da. ³¹ Aytedan aggotnen a əzzəgzannen əs Ƴaysa dağ tamattay en, gannin: «Tordâm as kud d-osa Əlməsix ifrâg əsəkni n alxalamaten ogarnen şin issəkna aləs wa?»

³² Arat wa simətəktikan aytedan dağ tamattay ta, əslan-tu Farisaytan. Ənkaran limaman win zawwarnen, əd Farisaytan əssəglan-du imagazan n Ahan wa Zəwwəran n Əlyibada y ad abəzan Ƴaysa. ³³ Inn-asan Ƴaysa: «Nak ad agax arat ən tamert əddewa dər-wan, dəffər adi amaran ad z'akka wa di-d-izammazalan. ³⁴ A di-təgməyam mişan wər di-za-təgrəwam fəlas edag wa z'akka wər təfregam iki-net.» ³⁵ Ad tinəməsəstinan Kəl-Əlyəhud, gannin: «Ma imos za adag wa z'akku daq-qu wər za nəgrəw? Meqqal Kəl-Əlyəhud win wazawaznen dağ kallan win tama a z'akku iggəz-tan? Məx ak aytedan win wər nəmos Kəl-Əlyəhud a z'isasayru? ³⁶ Ma imos almayna ən batu ta iga da, as inna: "A di-təgməyam mişan wər di-za-təgrəwam, fəlas wər təfregam iki n adag wa z'akka"»

Aman win sidurnen

³⁷ As d-ewad əzəl wa ilkaman n əmud wa n Təkarbanen, s ənta a imosan əzəl wa zəwwəran dağ əmud en, ibdad Ƴaysa dat tamattay idkal əməsli-net inna: «Awedan kul wa iffudan akkiwet-i-du ad aşəw. ³⁸ Awedan kul wa sər-i izzəgzanan "ad əngəyan gərwan n aman win sidurnen dağ əwəl-net", s əmmək was iktab awen dağ Əlkəttaban.» ³⁹ Batu ta iga Ƴaysa den, Infas wa Zəddigan a sər-əs issoka, a

z'əgrəwan aytedan win sər-əs əzzəgzannen. Ğnta azzaman en Infas wa Zəddigan wər itawakfa harwa da fəlas Ƴaysa a wər nəggez tanaya-net.

Ƴməzzəy gər aytedan

⁴⁰ As isla ades ən tamattay en i batuten šin iga Ƴaysa da ənnan: «İllikan as aləs wa ənta a imosan Ğnnəbi wa ittəmalan!» ⁴¹ Ğnnan wiyyad: «Ėlməsix awa!» Ğnnan-asan wiyyad: «Manəmmək as du-z-igməd Ėlməsix Galilaya?» ⁴² Awak Ėlkəttaban wərgəy a ənnan: "Ėzzurrəyya ən Dawəd, əd təyrəmt ən Betalxam s ənta as kala daɣ-as iysar Dawəd, a du-z-igməd Ėlməsix."» ⁴³ Ğmmək en daɣ as təmməzray tamattay daɣ talɣa ən Ƴaysa. ⁴⁴ Wiyyad daɣ-san ərân abbaz-net, mišan wər tan-iha is t-idas əfus-net.

⁴⁵ Ėqlan magazan n Ahan wa Zəwwəran n Ėlɣibada əqqalan ilimaman win zawwarnen, əd Farisaytan. Osan-in ɣas ənnan-asan: «Mafəl wər t-idu-tewayam?»

⁴⁶ Ğnnan-asan magazan: «Wər kala itawanay awedan igan awal wa iga aləs en.» ⁴⁷ Ğnnan-asan Farisaytan: «Daɣ adi kawanay da toyyam iman-nawan tətawasaxrakam?» ⁴⁸ Ėssənət ill-ay i sər-əs izzigzanan daɣ-na? ⁴⁹ Wər sər-əs izzəgzan ar tamattay n aljahilan wər nəssen wala daɣ awa ihan əššəriɣa n Ėttawret, as ketnasan təwâr-tan tulɣant.»

⁵⁰ Inn-asan Nikodemos imosan iyyan daɣ Farisaytan s ənta din-osan Ƴaysa dat awen: ⁵¹ «Ėššəriɣa-nana wər t-iha ad itəwəxkəm awedan iket wər iššewal, itəwəssən awa daɣ iššokal.» ⁵² Ğnnan-as: «Galilaya kay təlat kay da? Aknu tɣaray n Ėlkəttaban ad tənəya kay iman-nak as wər t-illa ənnəbi a du-z-igmədan Galilaya.»

⁵³ Təzzar ikka awedan kul ehan-net.

8

Tantut ta təgat əzzəna

¹ Ikka Ƴaysa adɣaɣ as itawannu wa n Eškan ən Zaytun. ² As affaw aɣôra iqqal Ehan wa Zəwwəran n Ėlɣibada, təzzar tək-k-ay-du tamattay ketnet. Iqqim a tan-isisaɣru.

³ Iššewal den da as d-osan musanan n Ėttawret əd Farisaytan ewâyan tantut a d-əɣdaran tətəggu əzzəna. Ėssəbdadan-tat dat awedan kul, ⁴ ənnan i Ƴaysa: «Ya Ėššex-nana, tantut a əzzəna a təga, amaran tətowanay tətəgg-ay. ⁵ Daɣ Ėttawret za a inna Musa: "Tantut zun ta, ilzâm a tat-əggaran aytedan əs təhun har tat-iba." Amaran kay ma tənne?»

⁶ Arat wa təmərkest a imos a das-əgân fəl ad t-əssəwəran lahan. Edag ân a dasan-ajjawwab Ƴaysa, inaz ad ikattab s adad-net fəl amaɖal. ⁷ Ėqqiman ədgâzan-tu s əsəstan, as ihog ibdad-du inn-asan: «İnkəret-du daɣ-wan was kala wər iga abakkad izaret əs taggor-net.» ⁸ İlas enez ad ikattab s adad-net fəl amaɖal. ⁹ Ėslan i batu ta ɣas, mazazaran əqlan, azzaran-asan win waššarnen. Iqqim-du Ƴaysa ɣas-net ənta əd təntut ta nad, təbdâd dat-əs.

¹⁰ İbdad-du inn-as: «Tantut, ma əgan aytedan win kam-əbaznen? Wər tan-iha i kam-ibâzan s əššəriɣa?» ¹¹ Tənn-as: «Waliyyan daɣ-san, Ėməli-nin». Inn-as Ƴaysa: «Nak da za wər kam-z-abəza s əššəriɣa. Aglu təjəwənke, mišan ad wər tələsaɣ igi ən bakkadan.»

Ƴaysa ənta a imosan ənnur n əddənət

¹² İlas Ƴaysa awal i tamattay inna: «Nak a imosan ənnur n əddənət. Daɣ adi wa di-ilkaman ad igrəw ənnur wa isiduran, amaran iɣrâd d ad ijiwankat daɣ šiyyay.»

¹³ Ğnnan-as Farisaytan: «Təgəyya ən man-nak a təmosa, arat wa təgannaɣ əddi irkam wəllen.» ¹⁴ Inn-asan Ƴaysa: «Kud imos as təgəyya ən man-in a mosa da təgəyya-nin tidət a təmos fəlas əssâna sas d-əhe, əd sas ədaga. Kawanay amaran wər təssenam sas d-əhe, wala sas ədaga. ¹⁵ Kawanay azzahir ɣas as təšarrayam aytedan, nak amaran wər šərrəɣa waliyyan. ¹⁶ As iga awen da as fall-i d-osa adi, ad

šarraḡa, amaran əššəriḡa-nin issohat, fəlas iddew dər-i Abba wa di-d-izammazalan. ¹⁷ Əššəriḡa-nawan iktâb daḡ-as âs tægəyya n əššin meddan a təmosat tidət. ¹⁸ Nak za tægəyya iyyadda a mosax i man-in, tægəyya-nin ta n sanatat amaran Abba s ənta di-d-izammazalan a tat-imosan.» ¹⁹ Təzzar ənnan-as: «Mənid illa za Abba-nak?» Inn-asan Ƴaysa: «Wərmad di-təzdāyam za wər təzdāyam Abba-nin. Ənnar di-təzdāyam təzdāyam Abba-nin.»

²⁰ Batuten šin itagg-enat Ƴaysa assaxa wa daḡ isasaxru daḡ Ahan wa Zəwwəran n Əlyibada dagma n adag wa iha əssənduq wa daḡ tiddawnat təkutawen. Mišan wər t-illa i igmāyan d abbaz-net fəlas alwaq-net a du-wər-newed harwa da.

Wər təfregam iki ən dad əkke

²¹ Ilas Ƴaysa inn-asan: «Nak teklay a z'aga. A di-təgməyam amaran a kawan-iba daḡ tišit ən nasbakkadan. Wər təfregam a din-tawədam edag wa əkke.» ²² Ad tinəmənnin arat daḡ Kəl-Əlyəhud gar-essan: «Meqqal iman-net a z'anḡu, fəlas a inna wər nəfreg a din-nawəd edag wa ikka.» ²³ Inn-asan Ƴaysa: «Kawanay aytedan n ares a təmosam, nak in afalla. Kawanay kəl əddənet a da a təmosam, nak wər di-təla əddənet a. ²⁴ A di da a fəl dawan-ənnə a kawan-iba daḡ tišit ən nasbakkadan. As wər təzzəgzanam as nak a imosan "Wa Illan da", wədi a kawan-iba əd tišit ən bakkadan.» ²⁵ Ənnan-as: «Ak ma təmosax?» Inn-asan Ƴaysa: «Awa dawan-əmala ḡur tizarat har əmərədda ənta a mosa. ²⁶ Əllân-tu aratan aggotnen as əfrāḡax a tan-anna daḡ talḡa-nawan, əllân-tu deḡ aratan aggotnen as əfrāḡax a kawan-awwaddaba fall-asan. Mišan wa di-d-izammazalan məššis ən tidət a imos, amaran arat wa di-d-inna, ḡas a əmmala y əddənet.»

²⁷ Wər əḡren as batu n Abba a daḡ dasan-imməgrad. ²⁸ Inn-asan Ƴaysa: «As təgam iman-in nak Ag Aggadəm s əsəhhuki wa di-za-tagim fəl təgəttawt, ad təssənam as nak da a imosan "Wa Illan da", təssənam deḡ as wər t-illa a tagga ḡər-i əd man-in, arat wa di-isasaxra Abba ḡas a ganna. ²⁹ Wa di-d-izammazalan iddew dər-i. Wər di-oyya ḡas-in fəlas faw da arat wa das-igrazan ḡas a tagga.» ³⁰ Əslan aytedan aggotnen y awa inna Ƴaysa den əzzəgzanan sər-əs.

Win əmosnen əzzurrəyya n Ibrahim əs tidət

³¹ Inna Ƴaysa i Kəl-Əlyəhud win sər-əs əzzəgzannen: «As təbbərdagam y awa kawan-sasaxra, ad təqqəlam inəttulab-in win tidət, ³² təssənam tidət, tidət amaran ənta kawan-za-təsaddarfit.»

³³ Ənnan-as: «Nakkanay ya əzzurrəyya n ənnəbi Ibrahim a nəmos, wər kala daḡ əddənet ad nəqqal eklan ən waliyyan, mafel təganna: "Ad taddarfem"?» ³⁴ Inn-asan Ƴaysa: «Əḡḡəyyeḡ əsilakanax-awan as awedan kul wa itaggin ibakkadan, wədi akli ən bakkadan a imos. ³⁵ Akli amaran wər das-t-illa adag ən faw daḡ aḡaywan, mišan Barar wa eraw aḡaywan wədi edag-net ill-ay har faw. ³⁶ Daḡ adi as kawan-isaddarfət Barar, wədi ad taddarfem əs tidət. ³⁷ Əssānax as əzzurrəyya n Ibrahim a təmosam, mišan təgammayam d ad tagim iman-in fəlas awal-in a wər nədes iwəllan-nawan. ³⁸ Nak arat wa ənaya ḡur Abba-nin a əmmala, amaran kawanay tətəggim awas təslam ḡur abba-nawan Iblis.»

³⁹ Ənnan-as: «Abba-nana ya ənnəbi Ibrahim a t-imosan.» Inn-asan Ƴaysa: «Ənnar tidət âs təmosam bararan n Ibrahim ad tətəggim imazalan win iga Ibrahim. ⁴⁰ Kawanay amaran əmərədda təgammayam əd tanaxay-nin, nak imosan awedan a dawan-imməlan tidət s əmmək was di-tat-d-inna Məššina. Arat wədi wər t-iga Ibrahim. ⁴¹ Imazalan win iga abba-nawan a tətəggam.» Ənnan-as: «Nakkanay wər nəmos iniba; wər nəla ar abba iyyanda a t-imosan Məššina.»

⁴² Inn-asan Үaysa: «Эннар Мәшһина а имосан Абба-наван тарим-и, фәлас Мәшһина а д-әгмәдә, әнта а д-әфала, wәрge гәр-и әд ман-ин аs д-осе, калар әнта ди-д-изаммазан. ⁴³ Mafel wәр тәгrem awal-ин? Wәр даван-игдел әгәрри-net ар аs wәр тәfregam әсәсәm y аs. ⁴⁴ Wәр тәlem даҫ abbatan ар Iblis, amaran тәрәм ад тассандим деранан n абба-наван. Harwa ҫur әнәтти ад иqqal әмәggi ән ман, amaran wәр ibded даҫ tidәт, фәлас wәр тәha tidәт әwәl-net. Igi ән bahu а имосан әттәбиҫат-net фәлас anasbahu а imos, imos deҫ abba ән bahu. ⁴⁵ Nak amaran tidәт аs тамаgrada, adi да фәл ди-wәр-tәzzәgzanam. ⁴⁶ Mәni даҫ-wan wa ifragan ад агgayyat аs kala ад әgeҫ abakkad? Kud tidәт а әmmala mafel wәр ди-tәzzәgzanam? ⁴⁷ Awedan imosan arat даҫ тамattay ән Мәшһина, әсәсәm а itaggu y awa inna Мәшһина. Kawanay amaran wәр das-tәsәsimam, фәлас wәр тәmosam тамattay ән Мәшһина.»

Үaysa d Ibrahim

⁴⁸ Tәzzar әnnan Kәl-Әlyәhud i Үaysa: «Wәrgеҫ kala ад nәnna kay iyyan даҫ Kәl-Samarәya а тәmosaҫ amaran ih-ik агgәsuf?» ⁴⁹ Inn-asan Үaysa: «Wәр ди-иha агgәsuf, Abba-nin ҫas а әssәҫmara, kawanay amaran wәр ди-tәssәҫmaram. ⁵⁰ Wәр gәmmәyaҫ tanaya i man-ин. Ill-ay wa ди-игаммаyan tanaya, amaran әнта а ixakkaman. ⁵¹ Eggeyyeҫ әsilakanay-awan аs awedan wa ittافan awal-ин, wәр ilkem ад inay тәmattant.»

⁵² Ennan-as arat даҫ Kәl-Әlyәhud: «Әmәrәdda ад nәkkas аššak аs ih-ik агgәsuf! Ibrahim да aba-tu әнта harkid әnnәbitan kul, kay amaran тәganna: "Awedan kul wa ittافan awal-ин, wәр ilkem ад inay тәmattant." ⁵³ Abba-nanay Ibrahim dā aba-tu: tordeҫ аs togaraq-qu almaҫam? Ennәbitan dā aba-tan. Kay ma тәxsabaҫ iman-nak?»

⁵⁴ Inn-asan Үaysa: «As imos аs iman-ин а фәл sanamala, wәdi tanaya-nin wәр тәнfa wala. Abba-nin s әнта аs тәgannim imos Әmәli-nawan, әнта а ди-ihakkan tanaya, ⁵⁵ amaran wәр tu-tәzdayam, mišan nak әzdāyaҫ-qu. As әнne wәр t-әzdaya, wәdi ад әqqәlaҫ anasbahu ән šilat-nawan. Kalar әzdāyaҫ-qu, amaran әттәfaҫ awal-net. ⁵⁶ Abba-nawan Ibrahim imāl-tu әд тәdәwit фәл аs das-igmad аššak аs ад inәy assa-nin, amaran inay-tu, ikn-ay awen әсәffәliwәs.» ⁵⁷ Ennan-as Kәl-Әlyәhud: «Kay wәр teweda wala sәmmosat тәmәrwәn n awatay eges тәнne тәнәyaҫ Ibrahim?» ⁵⁸ Inn-asan: «Eggeyye silakanay-awan аs dat тәhәwt n әnnәbi Ibrahim да nak әmosa "Wa Illan da".» ⁵⁹ Tәzzar ад takammen šihun y а das-agin zabaw, mišan ya igmad-tan даҫ тамattay, irdaҫ afarag n Ahan wa Zәwwәran n Әlyibada.

9

Әzuzәy wa iga Үaysa y awedan а di-hәwan әд taddarҫalt

¹ Ijiwankat Үaysa аs inay alәs s аs di-hәw да iddirҫal. ² Әssәstanan-tu nәttulab-net әnnan-as: «Әššex, mafәl di-hәw alәs а әд taddarҫalt? Awak әddәlil n abakkad-net, meҫ ak abakkad ән marwan-net?» ³ Inn-asan Үaysa: «Wәrmad iddirҫal фәл әddәlil n abakkad-net, wala deҫ abakkad ән marwan-net. Wәр di-hәw әд taddarҫalt ар y а sәr-әs тәwәnәyan игитан ән Мәшһина. ⁴ Iwār-anay ад naknu әššәҫәlan ән wa ди-д-изаммазан иket ди ад ига azal, фәлас ehad izay-du, amaran wәр t-illa i даҫ-as ifragan әššәҫәl. ⁵ Iket әheҫ әddәnet әmosaҫ әnnur n әddәnet.»

⁶ As ига batu ta, issotaf даҫ amaҫal, ига arat ән талаq әs mәtman-net, issәlal-tat i šittawәn n әmәdderҫәl en, ⁷ inn-as: «Aglu takka тәҫazart ta n Siloxam тәšširәda даҫ-as udәm-nak.» (Siloxam almaҫna-net anammazal.) Iglә әmәdderҫәl iššorad udәm-net, аs ди-qqal да ihannay.

⁸ Ad gannin mahharagan-net, d aytedan win т-әnaynen dat awen imos әmәdderҫәl itansayan: «Ak awen wәrgеҫ alәs was faw иqqim itansay?» ⁹ Wiyyad gannin: «Әнта даҫ awen.» Wiyyad әнта да gannin: «Kala, tulat ҫas а dәр-әs ига.» Әнта amaran

igannu: «Nak dağ awa.» ¹⁰ A tu-sastanan gannan-as: «Məni tēməwit tas tēgraway asawad-nak?» ¹¹ Igann-asan: «Aləs as gannin Ƴaysa, a igan arat ən talaq, tēzzar issəlal-tat i šittawen-in, inn-i ad aqlay əšširəday udəm-in dağ tēğazart ta n Siloxam. Eqlay əššoradaq-qu Ƴas, əgraway asawad-in.» ¹² Ənnan-as: «Ma iga za aləs wədi?» Inn-asan: «Wər əssena».

¹³ Əlwayan aytedan win aləs was kala ad imos əmədderyəl da əs Farisaytan. ¹⁴ Ənta əzəl ən təsanfawt ən Kəl-Əlyəhud a dağ iga Ƴaysa talaq, issəsbad əmədderyəl wen. ¹⁵ A tu-sastanan Farisaytan əntanay da əd tēməwit tas igraw asawad-net. Inn-asan: «Arat ən talaq a issəlal šittawen-in, əššoradaq udəm-in, əswada.» ¹⁶ Ad gannin arat dağ Farisaytan: «Aləs wa igan arat wa, wər d-ifel Məššina fəlas wər isassahat əzəl ən təsanfawt-nana.» Ənnan wiyyad: «Alyalamaten šin, manəmmək as tanat-z-əgu awedan imosan anasbakkad?» Tēzzar iga əməzrəy gar-essan. ¹⁷ Əlasan əsəstan n aləs was kala ad idderyəl ənnan-as: «Kay a innan izzozay-kay aləs dağ taddaryalt, əməl-anay was tordey as imos-tu.» Inn-asan: «Ənnəbi a imos.»

¹⁸ Əqlan Farisaytan wər əzzəgzanan as aləs wa kala ad idderyəl har du-sassayran imarwan-net. ¹⁹ Ənnan-asan: «Ak ənta da da barar-nawan was tənnam as d-ihəw da iddiryal? Məni tēməwit tas igraw asawad-net əmərədda?» ²⁰ Ənnan-asan marwan n aləs: «Nəssân as barar-nanay a imos, nəssân ənta da əs as d-ihəw da iddiryal, ²¹ mišan wərmad nəssân tēməwit tas igraw asawad-net, za wala dəy awedan wa t-issəsbadan. Səstənat-tu iman-net, fəlas aləs waššaran a imos ifragan ad ammagrad dağ talxa ta tu-təqqalat.» ²² Batu ta wər tat-əgen marwan-net ar fəl təksəda ən muzaran ən Kəl-Əlyəhud fəlas tənna a gan awedan kul wa iggəyyen as Ƴaysa a imosan Əlməsix, wədi ad t-əkkəsan dağ əljəməyat n ahan n əlyibada ən Kəl-Əlyəhud. ²³ Awen da fəl ənnan marwan-net: «Tušaray-net təšišawad-tu a dawan-ammagrad dağ talxa ta tu-təqqalat, səstənat-tu.»

²⁴ Əlasan-du Farisaytan tēxaray n aləs was kala ad idderyəl ənnan-as: «Iksad Məššina tēməla tidət. Nakkanay nəssân as aləs di anasbakkad.» ²⁵ Inn-asan aləs wa: «Nak wər əssena kud anasbakkad a imos wala. Arat iyyanda Ƴas a dağ əssana, as kala ad ədderyala, əmərədda əhannaya.» ²⁶ Dəffər awen ənnan-as: «Ma imos arat wa dak-iga? Məni tēməwit tas kay-issəsbad?» ²⁷ Inn-asan: «Arat wədi ya əməlay-awan-tu mišan wər di-təzzəgzanam. Mafəl təram a dawan-t-ələsəy emel? Meqqal ak kawanay da a təram ad təqqəlam inalkiman-net ketnawan?» ²⁸ Əgan-as ərrəbdan ənnan-as: «Kay a imosan ənalkim-net, nakkanay inalkiman n ənnəbi Musa a nəmos. ²⁹ Musa nəssân as išşewal-as Məššina, amaran aləs wədi wər nəssen sas d-iha fadda.»

³⁰ Inn-asan: «Aləs wa wər təssenam wala sas d-iha mišan izzozay-i dağ taddaryalt! Arat ya wa ənta a isammaklalan wəllen! ³¹ Təssānam as Məššina wər iqəbbəl šiwatriwen ən nasbakkadan. Awedan wa das-ibbərdagan itamazal tara-net, ənta as iqqabbal šiwatriwen-net. ³² Wər kala ad itawasla awedan ipsiswadan iyyan a d-ihəwan əd taddaryalt. ³³ Ənnar du-wər-ifel aləs di Məššina, wər z'ifrəg igi ən wala.» ³⁴ Haraššen-tu ənnan-as: «Ko! Adis kay was as du-təhəwa da təmosa təbəluləq n abakkad, kay a iran a dana-takfay alfaydaten?» Tēzzar əstəyan-tu.

Aytedan win ədderyalnen dağ batu ta təqqalat əddin

³⁵ As isla Ƴaysa əmazal wa igan da, iswad y aləs wen har t-igraw inn-as: «Awak tēzzigzanay sər-i Ag Aggadəm?» ³⁶ Inna aləs i Ƴaysa: «Əməl-i awa imos, Əməli-nin, fəlas arex a sər-əs əzzəgzəna.» ³⁷ Inn-as Ƴaysa: «Tənayaq-qu, amaran ənta da da dak-imməgradan da.» ³⁸ Inn-as aləs: «Dağ adi əzzigzanay Əməli-nin.» Tēzzar issəjad-as.

³⁹ Amaran inna Ƴaysa: «Nak assa a d-əgey əddənet y ad ammazalay əšşərixa, əswədan win wər nəhənnəy, addaryalan win hannaynen.» ⁴⁰ Əslan arat dağ

Farisaytan win dər iddew y awa inna da ənnan-as: «Dağ adi nakkanay da iməddərğal a nəmos?»⁴¹ Inn-asan Ƴaysa: «Ənnar təmosam iməddərğal wədi wər kawan-iwer abakkad, mişan dad imos as təgannim: "Nakkanay nəhannay", wədi iwâr-kawan abakkad.»

10

Ƴaysa ənta a imosan amadan wa olayan

¹ «Əggəyyey əsilakanax-awan as: Awedan wa wər nəggez afarag n ayfəd s əmi was itawaggaz, itaraggat-t-idu, wədi abaydag a imos n ənarkab. ² Amaran wa d-iggazan s əmi n afarag, wədi ənta a imosan amadan n ayfəd. ³ Ənaylif n afarag a das-z-aləman imi, aslinat ayfəd y əməsli-net, ad iğarru şin-net s esmawan-nasnat isardağ-qanat afarag. ⁴ As d-iğrad ikus ən şin-net, a dasnat-izar, əlkəmnat-as, fəlas əzdâynat əməsli-net. ⁵ As iga awen awedan wa dasnat-imosan ənaftax, wər das-z-əlkəmnat, ewef fadda a tu-z-aginət fəlas wər əzdaynat əməsli-net.» ⁶ Əlmital wa da, a dasan-iga Ƴaysa, mişan wər əgren almayna n awa dağ-san imməgrad da.

⁷ İlas Ƴaysa inn-asan: «Əggəyyey əsilakanax-awan as nak a imosan imi was raddaynat ayfəd. ⁸ Win dat-i d-osanen kul ibaydagan ən narkaban a mosan, amaran wər dasan-əssəsəmnat ayfəd. ⁹ Nak a imosan imi n afarag. Wa sər-i d-iggazan ad afsu. İfrâğ ad itaggaz iraddax, iğrəw əntada imensewan-net. ¹⁰ Abaydag wər d-itisu ar fəl şikra, d igi ən man d əhluk. Nak amaran ose-du fəl ad əğrəwan aytedan təməddurt, əğrəwan-tat da za əs təməwit wər nəla əddukad.

¹¹ Nak a imosan amadan wa olayan. Amadan wa olayan iman-net a ihakku fəl ayfəd-net. ¹² Mişan awedan wəs ayfəd wərgex şin-net, ətəwəxfar ɣas a itawagga y a tanat-idən, wədi as ogga əridal izay-tanat-du, ad addaggag ayy-enat-in, abəz dağ-asnat əridal awa ira, izəwwəziwəz-tanat. ¹³ Arat wa itagg-ay aləs wa fəlas ətəwəxfar ɣas a iga y əşşəxəl wa, wər izlay a əganat ayfəd. ¹⁴ Nak a imosan amadan wa olayan. Əzdâyağ ayfəd-in, ayfəd-in deɣ əzdaynat-i, ¹⁵ əs təməwit ta dağ as di-izday Abba-nin, nak deɣ əzdâyağ-qu. Əkfex iman-in fəl ayfəd-in. ¹⁶ Ələx ayfəd şiyad wər nəha afarag wa. Əntanatay da kundaba azzarağ-asnat, aslinat y əməsli-nin. Ayfəd-in kul ad ərtəynat əqqəlmat əsəgən iyyanda, ilân amadan iyyanda. ¹⁷ Abba ir-i fəlas iman-in a əkfe fəl a tan-ələsağ agaraw. ¹⁸ Wər t-illa i dağ-i z'abəzan iman, kalar iman-in a əkfex əs tərədawt-in. Ələx fərregat ən tahakkay-nasan, ələx da fərregat n əsuɣəl-nasan. Ənta da dağ arat was di-omar Abba-nin s igi-net.»

¹⁹ Əlasan Kəl-Əlyəhud əməzrəy dağ talɣa n aratan win igannu Ƴaysa da. ²⁰ A dağ-san aggen gannin: «Aləs wa aggəsuf a t-ihan! Awa əməskel! Mafel təssisamam-as?» ²¹ Wiyyad gannin: «Awedan iha aggəsuf wər itəggu awal wa. Tordam as ill-ay aggəsuf ifrâğan əsəswəd ən məddərğal?»

Ƴaysa ənta a imosan Əlməsix, imos Barar ən Məşşina

²² Azzaman en tagrəst. Ewad-du əmud imosan isaktan n ətəwəzəzdağ wa iga Ahan wa Zəwwəran n Əlyibada dağ Yerusalam. ²³ Itijəwənkit Ƴaysa dağ Ahan wa Zəwwəran n Əlyibada issiwal əd tarrayt təfâlat as itawannu «ta n Suliman.» ²⁴ Ƴilayğalayan-tu Kəl-Əlyəhud win əllanen den gannin-as: «Kay ak har əmmay wər dana-tore dağ aɣaf? Kud kay Əlməsix a təmosa, təzəluləğa-du da da tannağ-anağ-qu.»

²⁵ Inn-asan Ƴaysa: «Əmâlay-awan, mişan wər di-təzzəgzanam. İmazalan win əge s esəm n Abba-nin, əggəyyen-i, ²⁶ mişan wər di-təzzəgzanam fəlas wər tətəbaqqem dağ ayfəd-in. ²⁷ Ayfəd-in əsallinat y əməsli-nin, əzdâyağ-qanat, amaran əlkəmnat-i.

²⁸ Ëkfeq-qanat tēmēddurt ta tēxlalat, wēr daḡ-asnat tēlkem tēmattant, amaran wēr t-illa i daḡ-i tanat-z-irkēban. ²⁹ Abba-nin a di-tanat-ikfan, wēr t-illa i wēr oger. Amaran wēr t-illa i tanat-z-irkēban daḡ əfus-net. ³⁰ Nak d Abba arat iyyanda a nēmos.»

³¹ Ëlasan-du sēr-əs adakal ən tēhun y ad t-anḡin. ³² Ilaṡ Yaṡsa inn-asan: «Ëssiknaq-qawan imazalan aggotnen olaḡnen a d-əfalnen Abba. Mēni daḡ-san wa fəl taram a di-tanḡim?» ³³ Ënnan-as: «Nakkanay wēr nēra tenaḡay-nak fəl as tēgeḡ əmazal olaḡan, kalar əmadraw wa tēgeḡ əddi a fəl kay-za-nanḡu. Kay wēr tēmosaḡ ar aggadēm amaran tareḡ ad tagaḡ iman-nak Məššina.»

³⁴ Inn-asan Yaṡsa: «Awak wērgēḡ iktâb daḡ Ëttawret as inna Məššina: "*Kawanay tēmosam imalan*"?»

³⁵ Wēr nēfreg a din-nəgēr arat wa ihan Ëlkəttaban. Esəm wa n malan, iḡra sēr-əs Məššina aytedan win ikka awal-net. ³⁶ Nak Məššina a di-isannafranan izammazal-idu s əddənet. Manəmmək daḡ adi as za tannim taggaḡ əmadraw fəlas ənne: "Ëmosa Barar ən Məššina"? ³⁷ As imos as wēr tēggaḡ imazalan win as di-d-issəgla Abba-nin y a tan-aga, a di-wēr-təzzəgzənam. ³⁸ Mišan dad imos as taggaq-qan, wədi kud sēr-i wēr təzzəgzənam da, zəgzənat kuddeḡ əs mazalan win tagga, fəl ad tēssənam, tassantim deḡ daḡ əgərri n as Abba irtây dər-i, nak deḡ ərtâya d Abba.» ³⁹ Ëlasan agamay d abbaz-net, mišan igmad-tan.

⁴⁰ Ilaṡ Yaṡsa iki ən tēgadamayt ta hadat ən Yordan, daḡ adag wa daḡ issənta Yaxya əsəlməḡ n aytedan daḡ aman, iqqim den da. ⁴¹ Osan-t-in aytedan aggotnen, gannin: «Yaxya wēr iga aḡalamat waliyyat, mišan aratan kul win danax-inna s aləs wa, tidət a mosan.» ⁴² Den daḡ ad əzzəgzənanan aytedan aggotnen əs Yaṡsa.

11

Iba ən Lazarəs

¹ Ill-ay aləs irinan igan esəm Lazarəs, ihan tēḡrəmt ən Betanəy s ənta a daḡ tēḡsar Maryama əd Marta əmosnen šimədrayen. ² Maryama ta da a tənḡalat alwardi fəl Ëməli Yaṡsa, tēmas idaran-net əs jəkkad-net. Amaran amadray-net Lazarəs a irinan den. ³ Ëssokanat tēmədrayen-net Yaṡsa əmazal as: «Ëməli, əməri-nak irîn.»

⁴ As isla Yaṡsa i salan win den, inna: «Təsəlkamt ən təwərna ten, wēr za tēqqəl tēmattant ən Lazarəs, arat a tēmos a z'assaknin tanaya ən Məššina, isənnəfiləl-du əntada tanaya ta ila Barar ən Məššina.» ⁵ Yaṡsa ira Marta wəllen, ənta əd tēmadrayt-net, əd Lazarəs. ⁶ Isla təwərna-net, mišan iga dəffər awen əššin adan wēr igmed edag wa iha. ⁷ Dəffər adi inna i nəttulab-net: «Ëndawat ad nəqqəl Yahudəyya.» ⁸ Ënnan-as nəttulab-net: «Ëššex-nana, imuzaran-nana wērgē edes-nasan səket dâ da dâ gammayan əd tanaxay-nak, kay amaran tareḡ tewaxlay n akal wen?» ⁹ Inn-asan Yaṡsa: «Ëzəl wērgēḡ maraw alwaqan d əššin a imos? As ijawankat awedan ezal, wēr z'inəgərtəttəf, fəlas ihannay dat-əs. ¹⁰ Mišan as ijawankat awedan ehad, ad inəgərtəttəf, fəlas wēr t-iha ənnur.»

¹¹ As iga batu ta inna tolas: «Ëmidi-nana Lazarəs insâ, ad aglay a t-id-əssənkəra.» ¹² Ënnan-as nəttulab-net: «Ëməli, dad zamas insâ, wədi əngəm ad izzəy.» ¹³ Ënta Yaṡsa tēmattant ən Lazarəs as dasan-imməgrad den, mišan əntanay a ḡilan etəs wa n aḡadat as igannu. ¹⁴ Adi a fəl d-izalalay Yaṡsa inn-asan: «Lazarəs aba-tu. ¹⁵ Amaran isidawat-i as wēr əlle den alwaq wədi, fəlas arat wa ənta sēr-wan du-z-awəyan a sēr-i təzzəgzənam. Ëmərədda əndawatanaq-qu.» ¹⁶ Inkar Tuma was gannin Eknay, inna i nəttulab win hadatnen: «Ëndawat nakkanay da a danax-iba nəddew dər-əs.»

Yaṡsa ənta a imosan tanakra daḡ tēmattant, imos tēməddurt

¹⁷ As din-osa Ƴaysa ittəmal-as as Lazarəs iga əkkoz adan daƷ əzəkka. ¹⁸ Betanəy təhoz Yerusalam. Edag ən karad kilawtan Ʒas a illan gar-essanat. ¹⁹ Osan-in Kəl-Əlyəhud aggotnen Marta əd Maryama fəl a dasnat-in-šəwwəškənan daƷ adag n amadray-nasnat.

²⁰ As təsla Marta as Ƴaysa ihoz-du taƷrəmt, təssəlkad-as. Maryama ənta təqqim-in daƷ aƷaywan. ²¹ Tənnə Marta i Ƴaysa: «Əməli, ənnar təlle da, wər z'iba amadray-nin. ²² Mišan əmərədda da əssanaƷ as arat kul wa təgmaya daƷ Məššina a dak-kagu.» ²³ Inn-as Ƴaysa: «Amadray-nam a d-inkər daƷ təmattant.» ²⁴ Tənn-as Marta: «ƏssanaƷ as amadray-nin a d-inkər Ʒur tanakra n aytedan əzəl wa ilkaman.» ²⁵ Inn-as Ƴaysa: «Nak a imosan wa d-isankaran daƷ təmattant, əmosa təməddurt. Awedan wa sər-i izzəgzanan, wədi kud t-aba da a d-iddər. ²⁶ Amaran awedan kul wa iddaran izzigzan sər-i, wədi wər ilkem ad t-aba. TəzzigzanaƷ adi?» ²⁷ Tənn-as: «Awalla, Əməli, əzzigzanaƷ as kay a imosan Əlməsix, təmosa deƷ Barar ən Məššina, as ittimal as a d-asu əddənet.»

Tanakra ən Lazarəs daƷ təmattant

²⁸ As təga Marta batu ta, təkka təmadrayt-net Maryama, təwat-tat s ahal tənn-as: «Əššəx illa-da, isastan dər-əm.» ²⁹ As təgraw Maryama isalan win, təggad-du, təssəlkad i Ƴaysa. ³⁰ As itaggu awen harwa da wər d-iggez taƷrəmt, wər igmed edag wa daƷ-q in-tosa Marta. ³¹ Əllān Kəl-Əlyəhud Ʒur Maryama a das-du-šiwəškənnen. As tat-ənayan as du-təggad tarmad təqqab, əlkaman-as əƷilan əzəkka a təkka y a fall-as təhallu.

³² As din-tosa Maryama edag wa iha Ƴaysa toƷg-ay Ʒas təfataqqat Ʒur daran-net, tənn-as: «Əməli, ənnar təlle da, wər z'iba amadray-nin.» ³³ As tat-inay Ƴaysa təhallu, inay Kəl-Əlyəhud win dər-əs d-əddəwnen əntanay da əhallin, ikna tərəmməq, əƷšadan man-net. ³⁴ Inn-asan: «Məni tu-təgam?» Ənnan-as «Əməli, ayaw tənəya.» ³⁵ Ad ihallu Ƴaysa. ³⁶ Ənnan aytedan: «Ənawat awa dər toƷda tara ta iga y aləs wa.» ³⁷ Təzzar ənnan wiyyad daƷ-san: «Aləs wa issəsəwadan əmədderƷəl, wərgəƷ ifrāg a ad igdəl i Lazarəs təmattant?»

³⁸ İlas Ƴaysa tərəmməq, təzzar ikka əzəkka imosan akazam, tədbāƷ təhunt zəwwərat. ³⁹ Inna Ƴaysa: «Əkkəsət təhunt!»

Tənn-as Marta ta n tamadrayt n aləs wa aba da: «Əməli, aləs di əmərədda ila ađu, fəlas əzəl-net wa n əkkoz d anabal awa.» ⁴⁰ Inn-as Ƴaysa: «WərgəƷ ənnəƷ-am as təzzəgzana ad tənəyaƷ tanaya ən Məššina?» ⁴¹ Tətawakkas-du təhunt. İswad Ƴaysa daƷ jənnawan inna: «Abba, əgğodayaƷ-ak as di-təqbala təwatray-nin. ⁴² Nak iman-in əssanaƷ as faw da təqqabbala šiwatriwen-in. Əddəlil ən tamattay ta di-təƷalayƷalayət da a fəl dak-əššəwala fəl ad təzzəgzən as kay a di-d-izammazalan.» ⁴³ As iga təwatray ta, idkal əməsli-net inna: «Lazarəs, əgməd-du!» ⁴⁴ İgmad-du ənəmməttən wa nad, əttālan fassan-net əd daran-net əs təsəwad, təlsa deƷ təbdoq udəm-net. Inn-asan Ƴaysa: «Əkkəsət-as itul tayyim-tu ad ijəwənkət.»

Šimərkas šin tanayaƷ ən Ƴaysa

⁴⁵ Kəl-Əlyəhud aggotnen a d-osānen Maryama, ənayan arat wa, əzzəgzanan əs Ƴaysa. ⁴⁶ Wiyyad daƷ-san amaran əkkan Farisaytan əmalan-asan awa iga Ƴaysa da. ⁴⁷ Təzzar sassagan limaman win zəwwarnen, əd Farisaytan əmənəy ən muzaran ənnan: «Ma za nagu? Aləs wa itaggu aƷalamaten aggotnen.» ⁴⁸ As tu-noyya itaggu aratan win, a sər-əs əzzəgzənan aytedan kul, təzzar asin-du sojitan ən Kəl-Ərrum a dana-sitaƷmarnen, addagdəgan Ehan wa Zəwwəran n Əlyibada, əƷrədan deƷ tenayaƷ ən tamattay-nana. ⁴⁹ İnkər-du iyyan daƷ-san igān esəm Kayif, imosan Əlimam wa Zəwwəran daƷ awatay wen, inn-asan: «Kawanay wər təgrem wala. ⁵⁰ Wər din-təgrem as ofa ad ammat awedan iyyanda daƷ adag ən tamattay n İsrayil ketnet?»

⁵¹ Batu ta iga da wər tat-iga gar-es əd man-net, kalar tišit-net Əlimam wa Zəwwəran daɣ awatay wen, a fəl igraw əlwəlayat n as Ƴaysa kundaba immut daɣ adag ən tamattay ketnet. ⁵² Amaran wərge tamattay n Israyil ɣas as tu-z-iba daɣ adag-net, kalar bararan ən Məššina kul win wazawaznen gər kallan a du-z-iššidəw əqqəlan təɣəssa iyyadda.

⁵³ Əzəl wen da daɣ əgan muzaran ən Kəl-Əlyəhud tanat ta n tanaxay-net. ⁵⁴ Awen da fəlas ab'as itallam Ƴaysa dad ira daɣ Kəl-Əlyəhud. Igməd akal wen, ikka əɣrəm igân esəm Efrayim inimahazan əd taneray, iqqim daɣ-as ənta əd nəttulab-net.

⁵⁵ Azzaman en amud ən Kəl-Əlyəhud wa n Akkay ihoz-du. A du-gammadan aytedan idaggan aggotnen takkin-du Yerusalem, fəl ad əzzəzdəgan dat əmud. ⁵⁶ Saggadan i Ƴaysa tinəmännin gar-essan daɣ Ahan wa Zəwwəran n Əlɣibada: «Kawanay ak ma tənnam, tordâm as a d-asu amud a meɣ?» ⁵⁷ Ənta ilimaman win zawwarnen əd Farisaytan omâran aytedan s âs i issanan edag wa iha Ƴaysa isaffagget-tu fəl ad attarmas.

12

Ətəwənyal n alwardi fəl Ƴaysa daɣ Betanəy

¹ Sədis adan dat Əmud wa n Akkay ikka Ƴaysa Betanəy, s ənta daɣ ixsar Lazarəs wa d-issodar daɣ təmattant. ² As din-osa Ƴaysa tawaggan-as mægura olaynen. A du-tətaway Marta imensewan, Lazarəs amaran iha aytedan win naɣamanen əd Ƴaysa ədrâwan dər-əs. ³ Təzzar tədkal-du Maryama aganna ən litər n alwardi iknan šizada d əzzəwi as itawannu nar, a tu-tənaqqal fəl daran ən Ƴaysa, təmmas-tan əs jəkkad-net, idnay ahan aɣu n alwardi. ⁴ Inkar Yahuza Isxarəyuti wa n iyyan daɣ nəttulab ən Ƴaysa was ənta tu-z-agin daɣ fassan inna: ⁵ «Mafel wər din-nəzzənza alwardi wa azrəf a z'awədan karadat təmad n əzəl n əššəɣəl nakf-ay i tələqqawen?» ⁶ Arat wa wər t-inna fəl təhanint i tələqqawen, kalar abaydag a imos, amaran ənta a ittafan əssənduq wa itaggaz əzrəf ən nəttulab, idakkal daɣ awa t-ihan. ⁷ Eges ya inna Ƴaysa: «Ayy-et! Alwardi wa kala da togâz-tu y əzəl wad za təwəga daɣ əzəkka. ⁸ Šiləqqawen faw da əllânat ɣur-wan, nak amaran wərgeɣ faw əlle ɣur-wan.»

Assa ən Ƴaysa aɣrəm ən Yerusalem

⁹ Təsla tamattay tagget ən Kəl-Əlyəhud as illa Ƴaysa den təzzar əkkan ehan wen, mišan wərge Ƴaysa ɣas din-əkkan, kalar awnaf a tan-ihan ən Lazarəs wa d-issənkər daɣ təmattant. ¹⁰ Təzzar əkkasan-du limaman win zawwarnen tanat n ad anɣin Lazarəs ənta da, ¹¹ fəlas əddəlil-net a fəl dəffər-san əfalan Kəl-Əlyəhud aggotnen əzzəgzanan əs Ƴaysa.

¹² As affaw əslan aytedan aggotnen a d-əkkanen amud, as Ƴaysa iggaz-du aɣrəm wa n Yerusalem. ¹³ Ədkalan-du ilədlad ən tagayt əglan əssəlkadan-as gannin s afalla: «Ozana! Təmmal i Məššina!

Iga Məššina albaraka daɣ
wa d-osan s esəm n Əməli!
Kay əmənokal n Israyil!»

¹⁴ Igraw Ƴaysa əhulel, iwan-tu, s əmmək wa əmalan Əlkəttaban as ənnan: ¹⁵ «Ad wər təššəwəša ya wələt Səyon, əmənokal-nam əddi a din-izayan əddi, iwân əhulel.»

¹⁶ Arat wa wər t-əgren nəttulab-net daɣ tizarat, mišan as igraw Ƴaysa adkul-net, əktan-du as aratan win əmâlan-tan Əlkəttaban, amaran kul əndan fall-as.

¹⁷ Tamattay ta təmməgnet assaxa wa daɣ d-iɣra Ƴaysa Lazarəs daɣ əzəkka issənkər-t-idu daɣ təmattant, təgəyyat-as. ¹⁸ Awen da fəl das-du-təssəlkad tamattay, fəlas əslân aɣalamat ta iga. ¹⁹ Təzzar ad tinəmännin Farisaytan gar-essan: «Toggâm-tu? Indar-awan a dər t-in-təkkam, har as aytedan kul əlkaman-as.»

Emel wa iga ʔaysa tɔmattant-net

²⁰ Ɛllan-tu arat ɛn Kɛl-Ɛlyunan ɛhanen aytedan win d-ɛkkanen Yerusalama y a daɣ-as ɛɣbɛdan Mɛššina daɣ adan en da n ɛmud en. ²¹ Ɛkkan iyyan daɣ nɛttulab ɛn ʔaysa igan Filibus wa n tɛɣrɛmt ɛn Betsayda ta n akal ɛn Galilaya, ɛnnan-as: «Nɛgmay daɣ-ak a dana-tassakna ʔaysa.» ²² Iгла Filibus imal y Andrawɛs, iddew dɛr-ɛs Andrawɛs ɛmalan i ʔaysa. ²³ Inn-asan ʔaysa: «Alwaɣ ewad-du ɛmɛrɛdda wa daɣ z'ɛgrɛwa nak Ag Aggadɛm adkul-in. ²⁴ Ɛggɛyyɛɣ ɛsilakanay-awan as tablalt n alkama as wɛr tɛrtɛk daɣ amaɖal tɛmmut, ad taglu tɛmos iyyadda, mišan as tɛmmut a du-tɛdwɛl, tagu ara aggen. ²⁵ Awedan wa iran iman-net daɣ ɛddɛnet ta ad affatu daɣ alaxirat. Amaran wa irdan ad isaffatu iman-net daɣ ɛddɛnet ta, wɛdi wɛr tu-z-ɛgmɛdan, kalar ad igrɛw tɛmɛddurt ta tɛɣlalat. ²⁶ Awedan kul wa iran a di-išɣɛl, ilkɛmet-i, as iga adi edag wa ɛhɛɣ ɛnta a z'iggɛz, akf-ay dɛɣ Abba-nin almaɣam.

²⁷ Ɛmɛrɛdda ɛɣšɛdan man-in. Ma z'anna? Awak ad anna: "Abba saf-s-i daɣ assayɛt ta? Mišan wɛr d-ewedaɣ alwaɣ wa, ɛr y a fall-i agu. ²⁸ Abba, sɛnnɛfilɛl tɛla-nak tanaya." Tɛzzar igmad-du ɛmɛsli ijɛnnawan inna: «Tɛla-nin tanaya ɛsinafalalaɣ-qat, amaran a tat-ɛlɛsaɣ ɛsɛnnɛfilɛl.»

²⁹ Tamattay ta tɛllat den, tɛsla y ɛmɛsli wa, a tɛɣil eggag. Ad ɛgannin wiyyad: «Angalos das-iššewalan den.» ³⁰ Inn-asan ʔaysa: «Ɛmɛsli wa wɛrgɛɣ ɛddɛlil-in a fɛl d-iga, kalar ɛddɛlil-nawan kawanay. ³¹ Ɛmɛrɛdda ad za tɛtɛwɛxkɛm ɛddɛnet ta, itɛwɛstɛɣ ɛmɛnokan-net Iblis. ³² Amaran nak as tawasahake fɛl amaɖal ɛwara tɛgɛttawt, a d-aɣraɣ aytedan kul ɛs man-in.» ³³ Batu ta isidagan sɛr-ɛs tɛmɛwit tas tu-z-iba.

³⁴ Tɛnn-as tamattay: «Nɛnɛy daɣ Awal ɛn Mɛššina as Ɛlmɛsix ad agu tɛmɛddurt tɛɣlalat. Manɛmmɛk amaran as dana-za-tannay Ag Aggadɛm ad itɛwɛsɛhukɛt fɛl amaɖal? Ma imos Ag Aggadɛm was tɛgannaɣ ɛddi?» ³⁵ Tɛzzar inn-asan ʔaysa: «Ɛnnur harwa da illa ɣur-wan, har agin arat n azzaman. Jɛwɛnkɛtat iket di ad t-illa fɛl a kawan-wɛr-ɛɣdɛrnat šiyyay, fɛlas wa ijawanken daɣ šiyyay, adi wɛr issen sas idag. ³⁶ Zɛgzɛnat s ɛnnur harwa togazam, fɛl ad tɛqqɛlam kɛl ɛnnur.»

As iɣrad ʔaysa igi ɛn batu ta igguk-kan, ikka edag wɛr ɛssenana.

Tɛzɛrɛst n ɛššɛɣɛl wa iga ʔaysa dat awedan kul

³⁷ Alɣalamaten aggotnen šin iga ʔaysa dat-san, wɛr sɛr-san d ɛwaynat as sɛr-ɛs ɛzzɛgzɛnan, ³⁸ fɛl ad tandu batu ta iga ɛnnɛbi Isayas as inna: «*Ɛmɛli, ma imos wa izzɛgzɛnan s arat wa nɛmal? Ma imos was tɛnafalal tarna n Ɛmɛli?*»

³⁹ Ɛddɛlil wa fɛl wɛr ɛfregan ad ɛzzɛgzɛnan da imal-tu ɛnnɛbi Isayas as inna: ⁴⁰ «*Mɛššina a tan-isaddaryalan, issɛɣar iwallan-nasan, fɛl ad ib'as hannaynat šittawen-nasan, ib'as garrin wallan-nasan, fɛl ad wɛr utaban, izzuzɛy-tan.*»

⁴¹ Aratan win inn-en Isayas fɛlas inɛy tanaya ɛn ʔaysa, immigrad dɛɣ daɣ batu ɛn ʔaysa. ⁴² As iga awen imuzaran iman-nasan da a daɣ-san aggen ɛzzigzɛnan ɛs ʔaysa, mišan wɛr ɛhelan emel n awen fɛl tɛksɛda ɛn Farisaytan, fɛlas wɛr aren ad tɛwɛkkɛsan daɣ ɛljɛmaɣat n ahan n ɛɣibada ɛn Kɛl-Ɛlyɛhud. ⁴³ Amaran ɛssofan saɣmar wa n aytedan tanaya ta ihakku Mɛššina.

⁴⁴ Idkal ʔaysa ɛmɛsli-net inna: «Awedan wa sɛr-i izzɛgzɛnan, wɛrgɛ nak ɣas as izzɛgzɛn, kalar wa di-d-izammazalan da izzigzan sɛr-ɛs. ⁴⁵ Amaran wa daɣ-i iswadan, adi wa di-d-izammazalan a daɣ iswad. ⁴⁶ Nak zun ɛnnur a mosa, ɛkke-du ɛddɛnet y ɛs i sɛr-i izzɛgzɛnan wɛr z'aqqam daɣ šiyyay. ⁴⁷ As isla awedan i batuten-in iqqim wɛr tanat-ittef, wɛrgɛ nak a tu-z-awwaddaban, fɛlas nak ɛfsan n aytedan a d-ɛkke s ɛddɛnet, wɛrgɛɣ attadib-nasan. ⁴⁸ Daɣ adi awedan kul wa di-olkan, iqqim wɛr iga tenbay daɣ batuten-in, wɛdi ill-ay wa tu-z-awwaddaban. Awal iman-net wa da ɛge da, a das-z-išrɛɣan ɛzɛl wa ilkaman. ⁴⁹ Fɛlas aratan win dawan-ɛmala da,

wərgex nak a tan-d-inzaman gər-i əd man-in, kalar Abba wa di-d-izammazalan iman-net as di-omar s arat was di-iwar ad t-anna, əd was di-iwar a fall-as ammagrada. ⁵⁰ Əssânax as arat was omar ənta a itawayan əs təməddurt ta təxlalat. Dağ adi arat was əmməgrada, əmmək wa dağ as di-t-imal Abba ənta as sər-əs əmməgrada.»

Iba ən Yaysa əd tanakra-net dağ təmattant

13

Əsirəd wa iga Yaysa idaran ən nəttulab-net

¹ Ahad wa oggan amud wa n Akkay, issân Yaysa as alwaq-net osa-du wa dağ z'igməd əddənet iqqəl Abba. Yaysa faw da isaknu inəttulab-net tara, amaran əmərədda isannahal-tan əsəkni ən tara ta dasan-iga.

² Itamansaw Yaysa əd nəttulab-net ehad, as itaggu awen da Iblis igâ dağ əwəl ən Yahuza wa n ag Simxon Isxarəyuti təkaddilt-net. ³ Issân Yaysa as Məşşina di n Abba igâ arat kul dağ əfus-net, issân değ as igmâd-du Məşşina amaran ad t-iqqəl. ⁴ İbdad fəl mensewan, ikkas takadkat-net ta n afalla, idkal afər igbas-tu, ⁵ təzzar iga aman dağ əğlal, ad işarad idaran ən nəttulab-net, immas-tan s əfər wa igbas da.

⁶ As d-ewad Yaysa Simxon Butros inn-as: «Əməli, kay, a z'ışsirədan idaran-nin?» ⁷ Inn-as Yaysa: «Awa tagga da wər təfrega əgərri-net əmərədda mişan a tu-tagra dəffər awa.» ⁸ Inn-as Butros: «Kay, ad təşşirəda idaran-in? Wala ənəmihaz!» Inn-as Yaysa: «As dak-kan-wər-əşşorada nak dər-ək nəmmizzay.» ⁹ Inn-as Simxon Butros: «Dağ adi Əməli, wərgə idaran-nin ғas, şirəd harkid fassan-in d aғaf-in.» ¹⁰ Inn-as Yaysa: «Awedan işşoradan, wər iddarar ar əşirəd ən daran fəl ad izdag ketnet, amaran kawanay, təzəddigam, mişan wərgə ketnawan.» ¹¹ Yaysa issân wa tu-z-akkaddalan; adi a fəl inna: «Wər təzəddigam ketnawan.»

¹² As iğrad Yaysa əşirəd ən daran-nasan, izlag takadkat-net, iqqal edag-net, inn-asan: «Awak təgrâm awa dawan-əge da? ¹³ Təgannim-i "Aməsəsseyri" d "Əməli", təgannim a olağan, fəlas əmosaq-qan. ¹⁴ Dağ adi dad zamas nak imosan Əməli d Əməsəsseyri, əşşorada idaran-nawan, iwâr-kawan, kawanay da, dağ ilkam a, ad tətimaşiridam idaran. ¹⁵ Əsəknaq-qawan arat wa fəl a tu-tətaggim kawanay da s əmmək was dawan-t-əge. ¹⁶ Əggəyyey silakanax-awan as, akli wər oger məşşis, anammazal değ wər oger wa t-id-izammazalan. ¹⁷ Dad zamas təssânam aratan win, wədi təbbilalam kудis tətamazalam-tan.

¹⁸ Wər dawan-ganna ketnawan; win sannafrana kul əzdâyaq-qan amaran kundaba inda awa imal Awal ən Məşşina as inna: "Wa dər ədrawa, iqqal amaksan-in." ¹⁹ Arat wa, as igâ ad təzzəgzənam as nak a imosan "Wa İllan da." Adi da a fəl dawan-t-ənnex əmərədda harwa wər iga. ²⁰ Əggəyyey silakanax-awan as wa iqbalan iyyan dağ nəmmuzal-in, nak iman-in a iqbal. Harwa wa di-iqbalan, wa di-d-izammazalan a iqbal.»

Emel ən Yaysa təkaddilt ta tu-z-əgu Yahuza

²¹ As inna Yaysa awen, əğşadan man-net, təzzar inna: «Əggəyyey əsilakanax-awan as iyyan dağ-wan a di-z-aggin dağ fassan.» ²² Ad tinəməsvidan nəttulab-net, əqqânan ғafawan-nasan i was igannu. ²³ İyyan dağ nəttulab-net, wa isannahal Yaysa tara, işəamar dağ ihəz n ədmaran ən Yaysa. ²⁴ Isaddagan-as Simxon Butros ad issəstən Yaysa əd was igannu. ²⁵ Təzzar inaz-in ənattalib wen fəl ədmaran ən Yaysa, inn-as: «Əməli, ma z'iqqəl?» ²⁶ İjjəwwab-as Yaysa inn-as: «Wa əkfe akarammu ən təgəlla wa z'əssəlməğa dağ ədrəz a.» Təzzar issəlməğ akarammu ən təgəlla ikfay i Yahuza ag Simxon Isxarəyuti. ²⁷ As igraw Yahuza akarammu wen, iggaz-tu Aşşaytan. Təzzar inn-as Yaysa: «Tagəyet tarmad awa kay-iwaran.» ²⁸ Awa fəl inna

Yaysa awen i Yahuza, wər iha inəttulab-net win hadatnen siḡamarnen den tattin i t-igrân. ²⁹ Wiyad ordân as, iduf wa iga Yahuza azrəf ən nəttulab a fəl das-inna Yaysa: «Zanza-du arat was za naddarar y əmud; madeḡ akfu šiləqqawen arat iyyan.» ³⁰ İbaz Yahuza akarammu ən tagəlla, igmad tarmad, as itaggu awen da ehad igâ.

Alwajib wa aynayan

³¹ As igmad Yahuza, inna Yaysa: «Əmərədda tanaya-nin nak Ag Aggadəm tənîfalal, tənîfalal daḡ-i deḡ tanaya ən Məşşina. ³² Dad zamas tanaya ən Məşşina tənîfalal daḡ-i, Məşşina da ad isənnəfiləl daḡ man-net tanaya-nin nak Ag Aggadəm daḡ alwaq ihozan wəllen. ³³ İmaran-in, alwaq wər nəggət a ḡur-wan z'aga. A di-təgməyam mišan edag wa əkkeḡ wər təfregam a t-in-tawədam. Kala ad əneḡ adi i Kəl-Əlyəhud, amaran kawanay da əmərədda əneḡ-awan-tu. ³⁴ A kawan-akfaḡ alwajib aynayan, a t-imosan as namariwat. Namariwat kawanay da s əmmək was kawan-are. ³⁵ As tənāmaram, ad issusən adi aytedan kul as kawanay inəttulab-in.»

Yaysa əd Butros

³⁶ Inn-as Simḡon Butros: «Əməli, mənid təkke.» Inn-as Yaysa: «Edag wa əkke, wər təfrega a di-sər-əs-təlkəma əmərədda, eges a din-təlkəma dəffər awa.» ³⁷ Inn-as Simḡon Butros: «Əməli, mafel as wər əfrega a dak sər-əs əlkəma əmərədda. Əgaray iri y a fall-ak akfa iman-nin.» ³⁸ Inn-as Yaysa: «Adis a fall-i takfaḡ iman-nak? Əggəyyeḡ silakanay-ak as wər z'ayru əkəji ayora wər di-təggəda har karadat təklaten.»

14

Yaysa ənta a imosan tarrayt

¹ Inn-asan Yaysa: «Ad wər təşşəwəşam, zəgzənat əs Məşşina, təzzəgzənam sər-i nak da. ² Ehan n Abba-nin ahân-tu daggan aggotnen ən təməxsurt. Awak ənnar wər iga adi manəmmək as dawan-z-anna ad agla səmmutəgəḡ-awan edag təzdayam? ³ As tu-sammataga, ad d-əqqala, idaway-in dər-wan fəl ad təggəzam edag wa əhe. ⁴ Edag wa əkke təssânam tarrayt-net.» ⁵ Inn-as Tuma: «Əməli wər nəssen dad təkke, manəmmək as za nəssən tarrayt-net?» ⁶ Inn-as Yaysa: «Nak a imosan tarrayt id əmosa tidət əmosa əntada wa ihakkan təməddurt. Awedan waliyyan wər in-z-awəd Abba, ar əs tarrayt-in. ⁷ Ənnar təssânam awa mosa, təssənəm awa imos Abba-nin da. Əmərədda təssânam awa imos, amaran tənəyam-tu.» ⁸ Inn-as Filibus: «Əməli, susən-anay awa imos Abba, igd-ana adi.» ⁹ Inn-as Yaysa: «Filibus, əruway as dər-wan əddewa, eges harwa da wər təssenay awa mosa? Wər təssenay as wa di-inayan inây Abba! Daḡ adi manəmmək as təganna: "Susən-anay awa imos Abba?" ¹⁰ Wər təzzəgzənanay as, nak d Abba arat iyyanda a nəmos? Aratan win dawan-əmala da wərgəḡ nak a tan-d-inzaman gər-i əd man-in, kalar Abba dər əmosay arat iyyanda a isandan igitan-net. ¹¹ Zəgzənat-i, nak d Abba arat iyyanda a nəmos; kud əzəgzənan a wər təgəm s awa ənne, zəgzənat fəl əddəlil ən mazalan win as di-tənəyam taggaq-qan. ¹² Əggəyyeḡ əsilakanay-awan as wa sər-i izzəgzənan, ad agu imazalan win tagga. Fadda ad agu win tan-ogarnen, fəlas nak abba a z'akka. ¹³ Amaran a iqqal arat wa təgməyam s esəm-in ad t-aga, fəl ad tətəwənəy tanaya n Abba daḡ Barar. ¹⁴ As daḡ-i təgməyam arat a iqqal s esəm-in, ad t-aga.

¹⁵ Kud tara a di-təgam, tətəfam alwajiban-in. ¹⁶ Amaran ad əgməya daḡ Abba a kawan-akfu əmadhal iyyan a ḡur-wan z'iməlan har faw. ¹⁷ Ənta a imosan İnfas wa isinəfililan tidət, as wər təfreg əddənət əlqəbulat-net, fəlas wər tu-təhənnəy wala da təzday-tu; eges kawanay təzdāyam-tu fəlas ihoz-kawan amaran ad iggəz iwəllan-nawan har faw. ¹⁸ Wər kawan-z-ayya daḡ əddənət təmosam šilat ən gugelan, a kawan-d-əqqəla. ¹⁹ Dəffər alwaq wər nəggət, əddənət wər di-za-tələs anay; eges

kawanay a di-tələsam anay fəlas əddâra, kawanay da ad təddəram. ²⁰ Alwaq wədi ad təssənam as nak d Abba-nin arat iyyanda a nəmos, təssənam dəx as təhâm əwəl-in, nak da aheç win-nawan. ²¹ Wa ittafan alwajiban-in, ənta a di-iran. Wa di-iran ad t-iru Abba-nin, ireq-qu nak da, sənnəfilələx-as iman-in.» ²² Inn-as Yahuza wa wər nəmos ag Isxarəyuti: «Əməli, manəmmək as dana-za-təsənnəfilələx iman-nak nakkanay ças, wər tan-təssosana y əddənət?» ²³ Inn-as Ƴaysa: «Awedan wa di-iran, ad ittəf awa ənne, ir-ay Abba-nin, nas-ay-du nəməl çur-əs. ²⁴ Wa di-wər-nəra, wədi wər əttef batuten-in; amaran batu tas təsallim da, wərge nak a tat-igan kala ar šin Abba s ənta a di-d-izammazalan.

²⁵ Əgeç-awan-tat harwa kawan-əhe. ²⁶ Amaran əmadhal imosan Infas wa Zəddigan wa dawan-du-z-assaglu Abba s əsəm-in, a kawan-isassayru aratan kul, assakt-iwan-du arat kul wa dawan-ənne nak iman-in. ²⁷ Oyyeç-awan-du alxer, əkfeç-qawan alxer wa-nin; nak wər dawan-t-əkfeç əs tēməwit tas tu-təhakku əddənət; ad wər təşşəwəşam wala təggəz-kawan tasa. ²⁸ Təslâm-i as dawan-ənne: "Teklay a əgeç", ənneç harwa: "A kawan-d-əqqəla." Ənnar ixşâl as di-tərâm, təsəffəliwəset-kawan tənna ta əgeç: "İqqalay Abba", fəlas Abba oğar-i. ²⁹ Amaran aratan win, əmâlay-awan-tan əmərədda harwa wər əgen, fəl a sər-i təzzəgzənam alwaq wad z'agin. ³⁰ Wər dər-wan z'ələsa igi ən batu tagget, fəlas əmənokal n əddənət izay-du. Wər di-in-ikka d arat, ³¹ mişan kundaba əgeç awas di-omar Abba, təssən əddənət dəx as areç Abba.» As içrad batu ta inn-asan: «Ənkərat əgmədatana edag a.»

15

Ƴaysa ənta a imosan esab n alçanab wa n tidət

¹ Inna Ƴaysa i nəttulab-net: «Nak a imosan esab n alçanab wa olaçan, Abba-nin imos məşşis. ² Alədlid-in kul wa wər nətirəw ad t-ixtəs, wa itarawan ad t-ifnəz fəl ad d-inzər agu ara aggen. ³ Zun d adi da, kawanay da eway-du sər-wan awal-in tazdak; ⁴ ağıwat dər-i tartəyt şilat ən ta dər-wan əge, azəl wər z'arəw ças-net as d-iqqətas daç aşək; kawanay da əlmital di da a təham as dər-i wər tørtayam.

⁵ Nak a imosan esab n alçanab, kawanay ilədlad-net. Wa dər-i igan tartəyt ta dər-əs əge, a t-idu-təgməd tənfa tagget fəlas as daç-i in-təqqətasam wər təfregam wala. ⁶ Wa dər-i wər nərtay, a din-itəwəgər şilat n ələdlid iqqitasan, aqqar, itəwəkəmməd-du, itəwəgər daç təmsay, ibələgləç. ⁷ As dər-i tørtayam, təttafam batuten-in, əgməyat daç Məşşina di n Abba arat kul wa təram, a tu-təgrawam. ⁸ Ənta da awas tətəwanay tanaya n Abba-nin: a du-tarəwam tənfa tagget, assaknu adi as təmosam inəttulab-in. ⁹ Tara ta di-iga Abba, ənta a dawan-əge; əttəfat-tat. ¹⁰ As imos as təttafam alwajiban-in, wədi təhâm tara-nin zund əmmək as nak da əttafa win Abba, əhe tara-net.

¹¹ Ənneç-awan adi fəl ad tagim təfalawist zun ta əgeç, tagim dəx təfalawist təkmalat. ¹² Ənta da alwajib wa-nin: "Namariwat s əmmək was kawan-are." ¹³ Wər tu-təlla tara toğarat ad akfu awedan iman-net fəl midawan-net. ¹⁴ As imos as tətəggim awas kawan-omara, wədi kawanay imidawan-in. ¹⁵ Wər dawan-gannaç eklan, fəlas akli wər itəssən arat wa itag məşşis. Kala kalar a dawan-gannaç imidawan-in, fəlas awas əsleç çur Abba-nin kul əssosanaç-awan-tu. ¹⁶ Wər di-təsannafranam, kawanay amaran, nak a kawan-isannafran; əssiwaraq-qawan ad taglim, tammazalam awa təha tənfa tagget çur Məşşina. Tənfa di da ta za tahagit. A təgmayam dəx daç Abba s əsəm-in a dawan-t-agu. ¹⁷ Omâraq-qawan s ad tənəmərım.

¹⁸ Kud gezzar a kawan-təga əddənət, əssənət as təgzâr-i dat-wan. ¹⁹ Kud kawanay əddənət kawan-tələt, wədi əddənət tərâ wa təla; mişan wər kawan-təla, fəlas nak kawan daç-as d-isannafran, adi a fəl kawan-təgzar. ²⁰ Aktiwat-du awa dawan-ənneç, as: "Akli wər oğer məşşis." Kud əsəkni a di-əgan alçazab, a dawan-t-assaknin

kawanay da; kud tərəddawt a əgan s awal-in, wədi kawanay da, ad ardin əs wawan. ²¹ Adi kul, əddəlil-in a fəl dawan-tu-z-agin; fəlas wər əssenən wa di-d-izammazalan.

²² Ənnar du-wər-ose, əşşewalax-asan, wər z'attarmasan əs bakkadan-nasan, eges əmərədda wər t-illa əsarı waliyyan a dasan-z-igdəlan a sər-san attarmasan. ²³ Wa di-igzaran, igzâr Abba-nin ənta da. ²⁴ Ənnar wər əge gar-essan imazalan əs wər t-illa awedan as kala tan-iga, wər z'attarmasan əs bakkadan-nasan. Ənayan-tan eges əglañ əgzâran-ana nak d Abba-nin. ²⁵ Mişan adi igâ fəl ad tandu batu ta tətawaktabat dağ Əttawret, tənnât: "İgzaran-i bannan."

²⁶ As d-osa əmadhal wa dawan-du-z-assagla çur Abba, imosan Infas wa isinəfililan tidət a sər-wan du-z-igmədan Abba, a fall-i aggayyat. ²⁷ Kawanay da, a fall-i taggayyem, fəlas təddewam dər-i harwa çur tizarat.»

16

¹ «Əmâlax-awan adi fəl a kawan-wər-igməd əzəgzan-nawan. ² Ad tətəwəkkəsam dağ əljəməxət ən nan n əlxibada ən Kəl-Əlyəhud, fadda ilkâm alwaq dağ-as wa dağ-wan ikkasan iman, illa çur-əs as tara ən Məşşina a immozal den. ³ Adi a dawan-z-agin aytedan fəlas wərməd a di-əzdayan wala əssânan Abba. ⁴ Əmâlax-awan aratan di əmərədda, fəl a tan-du-taktim as d-ewad alwaq wa dağ z'agin aytedan tara-nasan. Aratan win wər dawan-tan-əmela dağ tizarat n əşşəxəl-in çur-wan, fəlas alwaq wədi harwa da əddewa dər-wan.»

Əşşəxəl n Infas wa Zəddigan

⁵ «Əmərədda ad əqqəla wa di-d-izammazalan, mişan wər kawan-iha i di-issistanan əd dad əkke. ⁶ Eges əknân man-nawan aχşud fəl as dawan-ənneç adi. ⁷ Dər iga adi da ya, a dawan-əmela tidət: of-awan ad agla, fəlas as wər əgle wər kawan-du-z-asu Əmadhal, as əgle amaran a dawan-t-id-assagla. ⁸ As d-osa ad issusən aytedan n əddənət as əxrâkan dağ batu n awa imosan abakkad, d awa imosan taqqat ən Məşşina d awa imosan əşşəriça-net. ⁹ Issusən-tan as əxrâkan dağ batu n awa imos abakkad fəlas tugəyt a əgan a sər-i əzzəgzənən. ¹⁰ Issusən-tan as əxrâkan dağ batu n awa imosan taqqat fəlas tewaylay a əgeç Abba amaran wər z'ələsax ətəwənay. ¹¹ Issusən-tan as əxrâkan dağ batu n awa imosan əşşəriça ən Məşşina fəlas əmənokal n əddənət, a t-imosan İblis, ibâz-tu əşşəriça.

¹² Harwada əle batuten aggotnen as are a dawan-tanat-aga eges wər dasnat-təzmeram əmərədda. ¹³ As d-osa Infas wa Zəddigan isinifililan tidət, a kawan-issəlkəm i tidət kul ta du-təfalat Məşşina fəlas batuten-net wərgəç ənta a du-z-əgmədnat, awa as z'aslu ças a dağ dawan-z-işşiwəl ketnet, iməl-awan aratan win d-əzaynen, ¹⁴ issəxmər-i fəlas awa z'igrəw dağ awa əle a dawan-z-iməl. ¹⁵ Awa ila Abba ketnet i-nin nak da; adi a fəl dawan-ənne, awa igrəw Infas wa Zəddigan dağ awa əle a dawan-z-iməl.»

Təkenzert ən nəttulab təqqal tədəwit

¹⁶ «A dawan-əgmədəç anay dəffər alwaq wər nəggət, mişan a di-tələsam anay dağ adan wər nəggət dəffər adi.» ¹⁷ Təzzar namannan wiyyad dağ nəttulab-net: «Ma imos almayna n awa danax-inna da: "A dawan-əgmədəç anay dəffər alwaq wər nəggət, mişan a di-tələsam anay dağ adan wər nəggət dəffər adi?" Ma imos deç almayna n "Abba a əkke"? ¹⁸ Ma imos almayna ən "dağ alwaq wər nəggət" wa imal da? Arat wa dağ işşewal da wər tu-nəgra.»

¹⁹ İssan Çaysa as ərân ad t-əsəstanan. Inn-asan: «Tətinamasəstinam fəlas ənne: "A dawan-əgmədəç anay dəffər alwaq wər nəggət, mişan a di-tələsam anay dağ adan wər nəggət dəffər adi." ²⁰ Əggəyyeç silakanax-awan as ad talim, təsəkkələlam mişan aytedan n əddənət əntanay əddəwen. Ad əχşədan man-nawan eges aχşud

di a tu-təzrəy tədəwit. ²¹ Tantut as tətəggaz amaḍal, ad əxşədan man-net fəl aggad wa du-təga alwaq-net; mişan as d-ihu barar-net, ad tammazzay d əsəmmədrən daɣ arkanay wa tənay, isəddəwat-tat as du-təga awedan daɣ əddənət. ²² Kawanay da zun d adi da, əmərədda əxşādan man-nawan, mişan a kawan-ələsaɣ anay, əzəl wədi ad tagim tədəwit as tu-wər-illa i daɣ-wan tat-z-ikkəsan. ²³ Wər di-za-təssəstanam d arat waliyyan əzəl wədi. Əggəyyeɣ silakanay-awan as, a təgməyam daɣ Abba s esəm-in a dawən-t-əgu. ²⁴ Harwada wər t-illa a təgmāyam s esəm-in. Əgməyat ad təgrəwam fəl ad tagim tədəwit təkmalat.»

Yaysa irza əddənət

²⁵ «Əmālay-awan adi s əlmital, mişan ilkâm alwaq daɣ awan-wər-z-ələsaɣ emel n arat waliyyan iqqālan Abba s əlmital, kalar a dawən-t-əməla s awa imos. ²⁶ Alwaq wədi ad təgməyam daɣ Abba s esəm-in. Wər dawən-ənnə a dawən-t-ansəya, ²⁷ fəlas Abba iman-net ir-iwan fəl as di-təram, təzzigzanam deɣ as ɣur-əs d-əgmāda. ²⁸ Abba a ɣur d-əgmada, ose-du əddənət amaran əmərədda a tat-əgməda əqqəlaq-qu.»

²⁹ Təzzar ənnan-as nəttulab-net: «Ənəy, əmərədda təmmalax-anax aratan s awa mosan, wərge s əlmital. ³⁰ Nəssān as təssāna daɣ arat kul, wər t-illa arat a iqqal a dak-iybaran; adi da a fəl nəzzəgzan as Abba a ɣur du-təgmada.» ³¹ Inn-asan Yaysa: «Adis əmərədda təzzəgzanam? ³² Ənəyat, alwaq ihoz, fadda iga, wa daɣ za tətəwəzəwəziwizam, akkiyyan ikka aɣaywan-net, tayyim-i-d ɣas-in; mişan ya wər əmosa ɣas-in fəlas illa ɣur-i Abba. ³³ Əmālay-awan arat wa fəl ad təgrəwam alxer daɣ tərtəyt ta dər-i təgam. Ad tənəyam arkanay daɣ əddənət, ad wər tiksadam wala, fəlas əddənət ərzəq-qat.»

17

Təwatray ən Yaysa i nəttulab-net

¹ As inna Yaysa awən, idkal asawad-net iggəzzay ijənnawan, ittar inna: «Abba, alwaq ewad-du, saknu tanaya ən Barar-nak fəl ad assaknu ənta da ta nak, ² id təzzozaraq-qu y aytedan kul fəl ad akfu təməddurt ta təɣlalət i win tu-təkfe. ³ Amaran təməddurt ta təɣlalət awa tat-imosan, ad inəfiləl y aytedan awa təmosa, kay a imosan Məşşina wa n tidət; inəfiləl-asan əntada as Yaysa Əlməsix a du-təzammazala. ⁴ Əssikna tanaya-nak fəl amaḍal s əsəndi wa əge əşşəxəl was di-təssəwarax igi-net. ⁵ Amaran əmərədda kay Abba, akf-i ɣur man-nak tanaya ta ɣur-ək əley harwa dat əxluk n əddənət. ⁶ Sinafālalaɣ awa təmosa y aytedan win du-təsannafrana təskataq-qan-du daɣ əddənət, təgeq-qan daɣ əfus-in əttafan awal-nak. ⁷ Əmərədda əssānan as arat kul wa di-təkfe, kay a ɣur d-igmad. ⁸ Fəlas əmālay-asan awa di-tənnə, əqbalan-tu, amaran silakanan as kay a ɣur d-əgmada, əzzigzanam deɣ as di-du-təzimazala. ⁹ Wər kay-tinsəya y aytedan win əddənət, kalar aytedan win di-təkfe as kay-tansayaɣ fəlas əntanay a tələx. ¹⁰ Awa əle kul i-nak, kay da awa təle kul i-nu; amaran əntanay en da a daɣ tənəfalal tanaya-nin. ¹¹ Nak, ab'as aheɣ əddənət, kay a din-əkke, əntanay amaran əhân-tat. Ya Abba di zəddigan, agəz-tan s esəm-nak wa di-təkfeɣ, fəl ad əqqəlan arat iyyanda şilat ən wa dər-ək əmosa. ¹² Harwa tan-əhe, ogāzaq-qan s esəm-nak, a di-təkfe, wər daɣ-san ixrek waliyyan ar wa ixrakan fəl ad andu awa ənnan Əlkəttaban. ¹³ Əmərədda kay a din-əkke, gannax awa harwa əheɣ əddənət fəl ad agin təfalawist təndât ta da əgeɣ. ¹⁴ Əmālay-asan awal-nak təgzar-tan əddənət fəlas wər tan-təla zun d as nak iman-in da wər di-təla. ¹⁵ Wər daɣ-ak əgmaya a tan-təkkəsa daɣ əddənət, mişan əgmāya daɣ-ak a tan-tagəza daɣ Iblis. ¹⁶ Wər tan-təla əddənət, zun d as nak iman-in da wər di-təla. ¹⁷ Zəzdəg iwəllan-nasan s awal-nak imosan tidət. ¹⁸ Əzəmmizəl wa di-du-təge s əddənət, ənta a tan-sər-əs-əge nak da. ¹⁹ Amaran əkfəq-qay iman-in fəl əddəlil-nasan fəl ad akfin

win-nasan əntanay da əs tidət. ²⁰ Wərgex inəttulab-in xas as kay-tansaya, kalar tansayaq-qay y aytedan win sər-i z'əzzəgzənnen s əssəbab n as əslan y awal-nasan. ²¹ Egmâya dağ-ak a tan-igan ketnasan arat iyyanda s əmmək was dər-ək t-əmosa; nəqqəl-tu dər-san nakkanay da fəl ad təzzəgzən əddənət as kay a di-d-izammazalan. ²² Ekfêq-qan tanaya ta di-təkfe, fəl ad əqqələn arat iyyanda s əmmək was tu-nəmos nak dər-ək. ²³ Nak ərtâya dər-san, kay tərtâya dər-i. Əqqələnət arat iyyanda əs təməwit təndât fəl ad təssən əddənət as kay a di-d-izammazalan təgex-asan dəx tara ta di-təge. ²⁴ Abba, arex as win di-təkfe ad əggəzan əntanay da edag wa əhe fəl ad əhannayan tanaya ta di-təkfe fəlas di-tare harwa dat əxluk n əddənət. ²⁵ Abba, kay a oğadan, əddənət wər kay-təssen eges nak əssânaq-qay amaran inəttulab-in, əssânan as kay a di-d-izammazalan. ²⁶ Əssôsanaq-qan awa təmosa amaran wər z'ammazzaya d igi n adi, fəl a tan-təggəz tara ta di-təgex, ərtəya dər-san.»

18

Ətərməs ən Yaysa

¹ As iga Yaysa batu ta, ikka tama ta hadat n əgirer wa n Kedron. Iggaz afarag n eşkan illân-den ənta əd nəttulab-net. ² Edag wen issân-tu Yahuza Isxarəyuti wa z'akkaddalan Yaysa, fəlas faw da itakk-ay Yaysa ənta əd nəttulab-net. ³ Azzar-du Yahuza y agan ən sojitan ən Kəl-Ərrum, əd magazan n Ahan wa Zəwwəran n Əlxibada a d-əssîqlan muzaran ən limaman, əd Farisaytan, ewâyan fətəlaten, əd belan, əd təzoli-nasan. ⁴ As din-ewadan ihoz-tan-in Yaysa issânan dağ arat kul wa tu-z-igrəwan, issəstan-tan inn-asan: «Ma imos was təsaggadam?» ⁵ Ənnan-as: «Yaysa wa n Nazaret as nəsaggad.» Inn-asan: «Nak da da.» İbdâd gar-essan Yahuza wa t-ikkəddalan. ⁶ Amazay wa da dağ dasan-inna Yaysa: «Nak da da» ənta a dağ ərməyan əqqalan dəffər-san har udan. ⁷ İlas Yaysa inn-asan: «Ma imos was təsaggadam?» Ənnan-as: «Yaysa wa n Nazaret as nəsaggad.» ⁸ Inn-asan: «Wərgex ənnəx-awan nak da da. Dağ adi kud nak as təsaggadam, tayyim aytedan win da ad jəwənkən.» ⁹ Əmmək wen da as inda awal wa iga dat awen as inna: «Wər dağ-i z'ixrək waliyyan dağ win di-təkfe.» ¹⁰ İhâd-du Simxon Butros ilbây-du takoba-net iwat sər-əs akli n Əlimam wa Zəwwəran, ifras-du təməzzuk-net ta n əxil. Akli wa esəm-net Malxus. ¹¹ Təzzar inna Yaysa i Butros: «Suxəl takoba-nak tətərut! Awak ad aqqama wər əgeğ alxazab wa di-ixkam Abba?»

Ətəwəsəbdad ən Yaysa dat limaman

¹² Təzzar obazan Yaysa, əkradan-tu, əmosan egan ən sojitan ən Kəl-Ərrum d əmuzar-nasan, əd magazan n Ahan wa Zəwwəran n Əlxibada a d-əssiglan muzaran ən Kəl-Əlyəhud. ¹³ Ewayan-tu azzaran dər-əs s aqaywan ən Xânan wa n ədaggal ən Kayif wa imosan Əlimam wa Zəwwəran dağ awatay wen. ¹⁴ Amaran Kayif ənta a igan i muzaran ən Kəl-Əlyəhud tanat ta n as ofa ad ammat awedan iyyanda dağ adag ən tamattay. ¹⁵ İlkam Simxon Butros i Yaysa ənta d ənattalib iyyan. Ənattalib wa izdây Əlimam wa Zəwwəran iman-net, təzzar iggaz afarag wa iqlayan aqaywan n Əlimam wa Zəwwəran dağ amazay wa da dağ-q iggaz Yaysa. ¹⁶ Butros ənta iqqim-du dat ahan, xur əmi n aqalla. İrdağ-du ənattalib wen, igraw xur təntut ta togazat təsəhərt ad tayyu Butros iggəz aqaywan. ¹⁷ Təzzar tənna təməşşayalt ta togazat imi n ahan i Butros: «Wərge kay da iyyan dağ nəttulab n aləs wa a təmosa?» Inn-as: «Wər t-əmosa.» ¹⁸ Asamed igâ. Yilayxalayan eklan əd magazan n Ahan wa Zəwwəran n Əlxibada təmsay ən təkakaten əsukusan sər-əs. İk-en-in Butros ənta da ad isukus. ¹⁹ As itaggu awen isastan Əlimam wa Zəwwəran Yaysa dağ talxa ən nəttulab-net, d əsəssəxri wa itaggu. ²⁰ Inn-as Yaysa: «Awal wa əge y əddənət, wər imos arat ixbâran. Faw da inan ən taxaray ən Kəl-Əlyəhud d Ahan wa Zəwwəran n Əlxibada

a daḡ sasaxra dad əddewan Kəl-Əlyəhud kul, daḡ adi wər t-illa awal əge daḡ əssir. ²¹ Mafel as di-təsastana? Səstən aytedan win di-əslanen d aratan win daḡ dasan-əmməgrada; əntanay əssânan daḡ arat wa ənne.» ²² As inna Ƴaysa arat wa, iqqas-as iyyan daḡ magazan n Ahan wa Zəwwəran n Əlyibada ibdâdan den, inn-as: «Ma kay-issəhalan igi n aljawab wa y Əlimam wa Zəwwəran?» ²³ Ijjəwwab-as Ƴaysa inn-as: «Kud arak batu a əge, əməl-i edag wa daq qat-əge. Kud amaran əgeḡ batu tolayat, ma imos əddəlil wa fəl di-təggata?» ²⁴ Issərdaq-qu Xânan da ikrad, issok-ay Kayif wa n Əlimam wa Zəwwəran.

²⁵ As itaggu awen, Simyon Butros illa den isukus əs təmsay en da. Itawann-as: «Wərgə kay da arat daḡ nəttulab n aləs wa a təmosa?» Ilas Butros şigget ən Ƴaysa, inna: «Kala kala wər t-əmosa.» ²⁶ Inkar-du iyyan daḡ eklan n Əlimam wa Zəwwəran, imosan əşəqqax n aləs was d-ifras Butros təməzzuk-net, inna i Butros: «Wərgəḡ ənâyaq-qay təddewa dər-əs daḡ afarag?» ²⁷ Ilas Butros şigget ən Ƴaysa. Amazay wen da daḡ iḡra əkəji aḡora.

Ətəwəsəbdad ən Ƴaysa dat Bilatəs

²⁸ Immeway Ƴaysa ḡur Kayif s aḡaywan n ənaxkim. Itaggu awen ḡur əfərirəy n anay. Aytedan win dər-əs d-əddewnen wər dər-əs əggezən aḡaywan wa n ənaxkim, fəl ad əttəfan tazdak-nasan har atşin amensay wa n Akkay. ²⁹ Awen da fəl sər-san d-igmad Bilatəs wa n əmuzar n akal ehan-net, ikk-en-du inn-asan: «Ma imos lahan wa fəl təbazam aləs wa?» ³⁰ Ənnan-as: «Ənnar wər imos əməggi ən təkma, wər dak-k-idu-za-nawəy.» ³¹ Inn-asan Bilatəs: «Awəyat-tu təxkəmam-as s əşşəriḡa wa-nawan.» Ənnan-as Kəl-Əlyəhud: «Nakkanay wər nəla turagat ən tanaxay n awedan.» ³² Arat wa igâ fəl ad andu awal wa iga Ƴaysa assaxa wad imal ənnux ən təmattant ta z'agu. ³³ Təzzar iqqal Bilatəs ehan-net iḡr-in Ƴaysa issəstan-tu inn-as: «Awak kay daḡ a imosan əmənokəl ən Kəl-Əlyəhud?» ³⁴ Inn-as Ƴaysa: «Arat wa kay iman-nak as tu-tənne, meḡ ak aytedan wiyyad a dak-k-ənnanen sər-i?» ³⁵ Inn-as Bilatəs: «Un nak iyyan daḡ Kəl-Əlyəhud a mosa? Tamattay-nak, əd limaman win zawwarnen a kay-d-ewaynen sər-i, ma imos arat wa təḡşada?» ³⁶ Ijjəwwab-as Ƴaysa inn-as: «Təḡmar-in wər tat-təla əddənet ta da. Ənnar təḡmar-in təll-et əddənet a, ənkərnat-du təḡurad-in əknəsna fəl ad wər əggəzax ifassan ən Kəl-Əlyəhud. Kala kala, igmâd aşşak as təḡmar-in wər tat-təla əddənet ta da.» ³⁷ Inn-as Bilatəs: «Ak tidət as kay a imosan əmənokəl ən Kəl-Əlyəhud?» Ijjəwwab-as Ƴaysa inn-as: «Kay da tənneḡ adi. Awalla əmənokəl a mosa. Arat da wa fəl d-əhəwa amaran ənta fəl d-əggəzax əddənet a t-imosan as assa a d-əge y ad əggayyex i tidət. Awedan wa ilkaman i tidət, kul issisam y awal-in.» ³⁸ Inn-as Bilatəs: «Tidət za ma təmos?»

Təzzar iqqal-du Bilatəs Kəl-Əlyəhud inn-asan: «Fəl aganna za wa di-iqqalan nak, wər əhənnəya lahan waliyyan iga aləs wa. ³⁹ Mişan ya, daḡ arat wa imosan alḡadat âs id d-iḡlay əmud wa n Akkay a dawən-d-əkkəsax iyyan daḡ məskəsa-nawan. Meqqal tarâm a dawən-sassayya əmənokəl ən Kəl-Əlyəhud?» ⁴⁰ Əlasan adakal ən maslan-nasan wəllen ketnasan ənnan-as: «Kala, kala, wərgəḡ ənta! Bəḡabbas as nəra danaq-q-idu-təkkəsa.» Bəḡabbas wa əjajəb n ənəffelləg a imos.

19

¹ Təzzar omar Bilatəs s ad təwəgginat təwit n ələkkud i Ƴaysa; itawagg-as awen da. ² Əzdän sojitan təkəbbut təgât əs şənnanan əssəwaran-tat eḡaf-net, əzzəzlagan-tu deḡ əbərnuz zaggaxan. ³ Tihazan-t-in gannan-as: «Oyy-ik! Əmənokəl ən Kəl-Əlyəhud!» Taqqasan-as sa əd sa. ⁴ Ilas-du Bilatəs aradaḡ, inna i Kəl-Əlyəhud: «Ənəyat! A dawən-t-id-əssərdəḡa, ad təssənam as wər fall-as ənəya lahan waliyyan fəl iwwəddab.» ⁵ Təzzar irdax-du Ƴaysa təwâr-tu təkəbbut ən

šənnanan, izlâg əbərnuz zaggaxan, inn-asan Bilatəs: «Aləs-nawan əddi.» ⁶ As toggan muzaran ən limaman əd magazan n Ahan wa Zəwwəran n Əlyibada, ədkalan imaslan-nasan gannin: «Taytay-tu fəl təgəttawt! Taytay-tu fəl təgəttawt!» Inn-asan Bilatəs: «Abəzat-tu kawanay iman-nawan tattaytayam-tu, nak wər hənnəyax əddəlil waliyyan a t-issiwaran təmattant.» ⁷ Ənnan-as muzaran ən Kəl-Əlyəhud: «Nakkanay nəla əşşərixa, amaran əşşərixa wa, ih-ay as aləs wa ihor əd təmattant, fəlas a inna ənta Barar ən Məşşina a imos.»

⁸ Batu ta təga tasa wəllən dağ Bilatəs, ⁹ iqqal ehan-net, iggaz edag wa n əşşərixa, inna i Ƴaysa: «Mənis du-təhe?» Mišan wər das-iga Ƴaysa aljawab waliyyan. ¹⁰ Amazay wen da das-inna Bilatəs: «Nak as tugaya s a di-təşşiwəla? Wər təssenəx as ələ fərregat n a kay-sassayya, ələx əntada fərregat n a kay-attaytaya fəl təgəttawt?» ¹¹ Inn-as Ƴaysa: «Wər fall-i təle tarna waliyyat ar ta sər-ək du-təfalat Məşşina. Adi da fəlas awedan wa di-igan gər fassan-nak, ogar-kay igi n abakkad.» ¹² Amazay wen da dağ iggaz Bilatəs šin agamay n asaway was z'ayyu Ƴaysa. Mišan ənkaran-du Kəl-Əlyəhud ad gannin s afalla: «Aləs di as tu-təsassayya, wədi wər təmosəx əmidi ən Qaysara, əmənokal ən Kəl-Ərrum, fəlas awedan wa innan imos əmənokal, wədi azangaw ən Qaysara a imos!»

¹³ As isla Bilatəs i batu ta, issərdağ-du Ƴaysa, təzzar iqqim dağ təxawit ta n adag n əşşərixa. Edag wa esəm-net «Ayarxar ilsân təsəlit» itawann-as dağ təlxibrit «Gabbata». ¹⁴ Itaggu awen ammasnazal n əzəl wa oggan amud wa n Akkay, simutugan aytedan y əmud. Inna Bilatəs i Kəl-Əlyəhud: «Əmənokal-nawan əddi!» ¹⁵ Iqqal-asan awen as sahhaken imaslan-nasan wəllən gannin: «Ammatet! Ammatet! Taytay-tu fəl təgəttawt!» Inn-asan Bilatəs: «Dağ adi ad attaytayəx əmənokal-nawan fəl təgəttawt?» Ənnan-as muzaran ən limaman: «Əmənokal-nana wər t-imos ar Qaysara.» ¹⁶ Təzzar ikf-en Bilatəs Ƴaysa y ad itəwətəytəy fəl təgəttawt.

Ətəwətəytəy ən Ƴaysa fəl təgəttawt

Əzzərgazan sojitan Ƴaysa. ¹⁷ Igməd ayrəm ewây ənta iman-net təgəttawt ta fəl z'itəwətəytəy. Əkkan dər-əs edag as itawannu «Təkəyya», itawann-as dəx dağ təlxibrit «Golgota». ¹⁸ Den da ad əttəytəyan sojitan Ƴaysa fəl təgəttawt. Tawataytəyan əşşin meddan wiyyad əntanay da fəl təgəttawen dəgma-net, a dağ illa Ƴaysa gar-essan. ¹⁹ Omar Bilatəs s ad ammadkal əsəllum itəwəktəb fall-as: «Awa Ƴaysa WA N NAZARET, Əmənokal ən Kəl-Əlyəhud», itəwətəytəy dağ afalla ən təgəttawt. Itawagga awen da. ²⁰ Əxran Kəl-Əlyəhud aggotnen əsəllum wa. Ənta edag wa dağ itawataytay Ƴaysa fəl təgəttawt ihoz ayrəm, amaran əsəllum wa iktâb dağ awal wa n təlxibrit, əd wa n təlätint əd wa n təlyunant. ²¹ Ənnan limaman win zawwarnen ən Kəl-Əlyəhud i Bilatəs: «Ad wər tayyax əsəllum wa təssəltəxa təgəttawt iktâb fall-as âs: "Aləs wa əmənokal ən Kəl-əlyəhud", kalar əktəb fall-as âs: "Aləs da wa innan ənta a imosan əmənokal ən Kəl-Əlyəhud."» ²² Inn-asan Bilatəs: «Arat wa əktaba, wər-tu-za-səmməttəya.»

²³ As əttəytəyan sojitan Ƴaysa fəl təgəttawt, ədkalan isəlsa-net, əgan-asan əkkozət təzunen, əkkulluk n iyyan dağ-san igrâw iyyat. Ədkalan əntada təkadkat-net ta zəwwərat, təgât dağ təbdoq wər iha a imosan azamay, tosâx-du xur afalla har eres. ²⁴ Ənnan gar-essan: «Ad wər nəzəzzərrət təkadkat ta, ofa ad nagu şişaxeren fəl ad nəssən wa tat-z-ilen.» Arat wa ənnân-tu fəl ad tandu batu təhât Əlkəttaban ta tənnat: «*Əzunan tabdoq-in, təzzar əgan şişaxeren fəl təkadkat-in.*»

Arat wen ənta iman-net a əgan sojitan win den. ²⁵ Təgəttawt ta fəl ittəytəy Ƴaysa, əbdâdnat dagma-net tədoden əmosnen anna-net, əd Maryama ta n tamadrəyt n anna-net, təmosat taxur Klobas, əd Maryama Madəl. ²⁶ Ogga Ƴaysa anna-net, inay ənattalib-net wa n əməri-net ibdâd dagma-net, inn-as: «Anna, barar-nam əddi.»

²⁷ Təzzar inna y ənattalib-net wen: «Anna-nak əddi.» Amazay wen da dağ dər-əs iddew ənattalib wen s aḡaywan-net issan dağ-as.

²⁸ Dəffər awen inna Ƴaysa: «Ih-i fad», fəlas issân as arat kul ikmal, amaran arat wa wər t-inna ar fəl ad andu awa ənnan Ǝlkəttaban. ²⁹ Edag en inna dağ-as əḡəzu iha bənegər, təmmədkal-du təduft tətawattal d əmi n agabal n əzzənəf n ənniḡnəy iyyan idwâlan as itawannu xisof, tətawasalmaḡ-du dağ bənegər wa, tətawazzal-in s əmi-net. ³⁰ As izannalmaz Ƴaysa bənegər, inna: «Arat kul ikmal.» Təzzar issəras eḡaf-net, əgmadan-tu man.

Ǝtəwəgga ən Ƴaysa dağ əzəkka

³¹ Ǝzəl wen simutugan aytedan y əmud wa n Akkay. Wər əren Kəl-Ǝlyəhud ad aqqaminat alzanazaten n aytedan əwârnat šigəttawen dağ əzəl wa n təsanfawt-nasan. Ǝnta əzəl wen, wər ogda əd win hadatnen təzzəwwert. Ǝkkan muzaran ən Kəl-Ǝlyəhud Bilatəs ənnan-as: «Amər s ad tawarzin daran-nasan, fəl a tan-iba tarmad, təssukəsa-du alzanazaten-nasan!» ³² Ǝkkan-du sojitan meddan win tawataytaynen dagma ən Ƴaysa. Ǝrzan idaran ən wa azzaran, okayan əs wa n əššin əgan-as awen da. ³³ As d-ewadan Ƴaysa ənayan âs as d-osan da aba-tu. Ǝqqiman da wər ərzen idaran-net, ³⁴ Mišan idag iyyan dağ sojitan win tasaga ən Ƴaysa s alləḡ-net, iffay-du dağ-as əzni d aman. ³⁵ Awedan wa igan isalan win, inay-tan əs šittawen-net, amaran təgəyya-net tidət a təmos. Issân as tidət ta təzdarat as iššewal da, fəl ad təzzəgzənam kawanay da. ³⁶ Ǝnta aratan win kul wər əgen ar fəl ad tandu batu təhât Ǝlkəttaban ta tənnat: «*Eḡas-net waliyyan wər z'arraz.*»

³⁷ Ǝlkəttaban ih-en əntada as: «*Ad əssədəgan isawadan-nasan sa sər wa saxxarabben.*»

³⁸ Dəffər adi osa-du Yusəf wa n əḡrəm n Arimatay, imosan iyyan dağ nalkiman ən Ƴaysa, eges dağ əssir, fəlas iksud Kəl-Ǝlyəhud. Ikka Bilatəs igmay dağ-as ad awəy təḡəssa ən Ƴaysa. Ikf-ay Bilatəs turagat n awen, təzzar igla eway-tat. ³⁹ Osa-du Nikodemos ənta da, s ənta as kala din-osa Ƴaysa ahad iyyan. Eway-du təfaršit dağ ənḡâlan alwarditan təmosat amaḡal ən karadat təmərwen ən kilaw. ⁴⁰ Idkal-du Yusəf əd Nikodemos təḡəssa ən Ƴaysa əgan-tat dağ šifit təgât dağ təsəwad, əssəlalan-tat aḡutan əzodnen win. Arat wa imos aḡadət ən Kəl-Ǝlyəhud dağ anabal ən nəmməttan.

⁴¹ Edag wa dağ itawataytay Ƴaysa fəl təgəttawt ih-ay afarag. Amaran afarag wen ih-ay əzəkka imosan akazam as wər kala a dağ-as itawagga ənəmməttən. ⁴² Ǝzəl wen ənta dağ simutugan Kəl-Ǝlyəhud y əzəl-nasan wa n təsanfawt, awen da fəl iga Yusəf əd Nikodemos Ƴaysa dağ əzəkka wa, fəlas ənta a ihozan.

20

Tanakra ən Ƴaysa dağ təməttant

¹ As affaw əzəl wa n alxad, harwa da wər ifarayray anay, as təkka Maryama Madəl əzəkka. As din-tosa tənay as təhunt ta təharat əzəkka tətəwakkas-du. ² Tozal təkka Simḡon Butros d anattalib wa isannahal Ƴaysa tara tənn-asan: «Ǝməli itawakkas dağ əzəkka amaran wər nəssen edag wa dağ itawagga.»

³ Irdaḡ-du Butros d anattalib wa hadan əkkan əzəkka. ⁴ Ozalan, azzar-in ənəttalib wa hadan fəlas orna Butros dağ azzal. ⁵ Iššəgga inay šisəwad šin šifit ənsânat den, mišan wər iggez. ⁶ As d-ewad Simḡon Butros wa das-d-ilkaman, iggaz əzəkka, inay əntada šisəwad šin ənsânat den. ⁷ Inay asalsaw wa iwaran eḡaf ən Ƴaysa wər irtay əd šifit, ittâl inna s aganna. ⁸ Təzzar iggaz-du anattalib wa hadan, s ənta a d-azzaran, inay arat wa izzəgzan-tu. ⁹ Ǝnta harwa da wər əgren batu ta tənnat dağ Ǝlkəttaban, Ǝlməsix kundaba inkar-du dağ təməttant. ¹⁰ Təzzar əqqalan nəttulab win den aḡaywan.

Enəfilal ən Ƴaysa i Maryama Madəl

¹¹ Təqqim-du Maryama təhallu dagma n əzəkka. Təşşəgg-in daƣ-as, ¹² tənay əşšin angalosan əssimlalten, əqqiman daƣ adag was kala a tu-təha təxəssa ən Ƴaysa. Iyyan illa ƣur anamod n aƣaf-net, wa hadan illa ƣur daran-net. ¹³ Ennan-as: «Ma kam-isâlan, tantut?» Tənn-asan: «Wər di-isəlu ar as immeway Əməli-nin, amaran wər əssena dad itawagga.» ¹⁴ As tənna arat wa, təswad dəffər-əs, togga Ƴaysa ibdâd. Mişan wər təssen as ənta awen. ¹⁵ Inn-as Ƴaysa: «Ma kam-isâlan tantut? Ma imos was təsaggada?» Tənn-as Maryama: «Ya aləs, kud kay a t-ewayan, təmələƣ-i dad illa, a t-id-awəya.» Arat wa, as das-tu-tənna a təyl əmagyak n afarag wa iha əzəkka a das-işşewalan den. ¹⁶ Inn-as Ƴaysa: «Maryama!» Təzzar təmalallay-t-in tənn-as daƣ awal wa n təlxiBrit: «Rabbuni!» (Almaƣna n awen Əşşex-in.) ¹⁷ Inn-as Ƴaysa: «A di-wər-təgdəla teklay, fəlas harwa da wər əggəzzaya s Abba, kalar aglu əməl i mədrayan-in as nak ad əggəzzaya s Abba-nin, s ənta a imosan Abba-nawan kawanay da, əggəzzaya s Əməli-nin s ənta a imosan Əməli-nawan kawanay da.» ¹⁸ Təgla Maryama Madəl təmal i nəttulab as tənây Əməli, təmal-asan deƣ awa das-inna.

Awa d-izdaran daƣ Əlkəttab wa

Enəfilal ən Ƴaysa i nəttulab-net

¹⁹ Tadwit n alxad wen da iman-net, əddewan nəttulab, əxfalan-du ehan fəl man-nasan, fəlas əksudan imuzaran ən Kəl-Əlyəhud. Osa-du Ƴaysa ibdad gar-essan inn-asan: «Alxer fall-awan!» ²⁰ As dasan-inna awen issəkn-en ifassan-net, əd tasaga-net. Falawasan nəttulab fəl anay wa əgan Əməli. ²¹ İlas inn-asan: «İg-awan Məşşina alxer! Əzimazalaq-qawan s əmmək was di-d-izammazal Abba.» ²² As dasan-iga batu ta, issəwad-du fall-asan s əmi-net, inn-asan: «Təgrəwamet İnfəs wa Zəddigan!» ²³ Win as təssorafam ibakkadan-nasan za, a dasan-təwəsürəfan, amaran win as tan-wər-təssorafam, wər z'əgrəwan təsureft-nasan.»

Enəfilal ən Ƴaysa i Tuma

²⁴ Tuma was təsəmmadəq-net Eknay imosan iyyan daƣ nəttulab win maraw d əşšin, wər illa den as ənayan Ƴaysa. ²⁵ As das-ənnan nəttulab win: «Nənây Əməli!» Inn-asan: «Wər z'əzzəgzənəƣ iket wər ənaya şimijar ən nəsmar daƣ fassan-net, ədəsəƣ idaggan-nasan s adad-in, ədəsa deƣ tasaga-net s əfus-in.»

²⁶ As əgan əttam adan dəffər awen, əddewan-du nəttulab ən Ƴaysa daƣ ahan iyyan amaran taklat ten ih-en Tuma. İggaz-du fall-asan Ƴaysa da əharnat təsəhar n ahan, ibdad gar-essan, inn-asan: «İg-awan Məşşina alxer!» ²⁷ Dəffər adi inna i Tuma: «Agu adad-nak da, təswəda daƣ fassan-in, tədəsa deƣ tasaga-nin s əfus-nak, təzzəgzəna taqqama da wər təqqələƣ awedan wər nəssen Məşşina!» ²⁸ Inn-as Tuma: «Ya Məşşina di n Əməli-nin!» ²⁹ Inn-as Ƴaysa: «Kay wər təzzəgzəna har di-tənaya. Əbbilalan aytedan win di-wər-nənay mişan əzzigzanan!»

Əlməxsud n Əlkəttab wa

³⁰ İmmozal Ƴaysa alƣalamaten şiyad əgğotnen dat nəttulab-net, mişan ya wər sər-əsnat imməgrad əlkəttab wa. ³¹ Eges arat wa t-ihan, itiwaktab fəl ad təzzəgzənam as Ƴaysa ənta a imosan Əlməsix, imos deƣ Barar ən Məşşina, amaran, as sər-əs təzzəgzənam ad təgrəwam təməddurt s esəm-net.

21

Enəfilal ən Ƴaysa i nəttulab-net ƣur tama n agaraw

¹ Dəffər awen ilas Ƴaysa ənəfilal i nəttulab fəl təgadaməyt n agaraw wa n Tiberəyad. Əmmək da was dasan-inafalal: ² Simƣon Butros, əd Tuma was təsəmmadəq-net Eknay, əd Natanəyel wa n Kâna daƣ amađal ən Galilaya, əd bararan

ən Zabaday, d əššin nəttulab wiyyad, ketnasan əddewan. ³ Inn-asan Simyon Butros: «Nak ad akkağ edag n abbaz ən kifitan.» Ğnnan-as: «Nakkanay da nəddew dər-ək.» Ğglan, əggazan aɣlal n aman. Ahad wen wər obezan wala.

⁴ As affaw iwar-in Ƴaysa təgadamayt n agaraw, mišan wər əssenən nəttulab-net as ənta awen. ⁵ Inn-asan: «Imaran-in, awak abbaz a wər təgem wala dağ kifitan?» Ğnnan-as: «Kala.» ⁶ Inn-asan: «Ğgərat əməzzezdər-nawan wa n abbaz ən kifitan fəl aganna n əɣlal wa n əɣil, a tan-təgrəwam.» Ğgaran əməzzezdər-nasan dağ agaraw, təzzar indar-asan a t-id-ədkəlan, fəl awa əgan kifitan win t-əhanen dağ igət. ⁷ Inkar ənəttalib wa isannahal Ƴaysa tara inna i Butros: «Awen Ğməli!»

Da dağ ad isla Simyon Butros as Ğməli awen, ənta ad iqqan asalsaw-net wa n afalla, fəlas izzâf, təzzar itaraggat dağ agaraw. ⁸ Amaɗal ən sanatat təmad n əɣil a əllanen gar-essan əd təgadamayt n agaraw. Ğqqiman-du nəttulab win hadatnen dağ əɣlal ərkâban-du dəffər-san əməzzezdər-nasan, idnây kifitan. ⁹ Ğzzəbben-du ɣas oggan temsay ən təmakaten fəl nanɣin kifitan, tənşa deɣ təgəlla den. ¹⁰ Inn-asan Ƴaysa: «Awəyat-du arat dağ kifitan win du-tobazam əmərədda.» ¹¹ Iğmad-du Simyon Butros aman illil-asan s arakab n əməzzezdər wa əhan kifitan. Temeday əd səmmosat təmərwən ən kifi əd karad əs kul win zawwarnen a t-əhanen mišan wər izzərrat. ¹² Inn-asan Ƴaysa: «Ayewat tatsim.» Wər iha inəttulab i ihalan ad issəstən Ƴaysa ann-as: «Ma təmosa?» Fəlas əssânan as Ğməli awen. ¹³ Ihoz-tan-in Ƴaysa, obaz-du tagəlla ikf-asan-tat, ikf-en əntada kifitan. ¹⁴ Taklat ta ənta a təmosat ənəfilal wa n karad a d-iga Ƴaysa i nəttulab-net dəffər tanakra-net dağ təməttant.

Ƴaysa əd Butros

¹⁵ As ətšan inna Ƴaysa i Simyon Butros: «Simyon ag Yaxya, awak tidət as tara ta di-təge togar ta di-əgan nəttulab win hadatnen?» Inn-as Simyon: «Ayew Ğməli, təssâna dağ tara ta dak-əge.» Inn-as Ƴaysa: «Agəz za ijamaran-in.» ¹⁶ Iğ-as y əsəstan wa igi wa n əššin inn-as: «Simyon ag Yaxya, awak təreɣ-i?» Inn-as Butros: «Ayew Ğməli, təssâna dağ tara ta dak-əge.» Inn-as Ƴaysa: «Ğqqəl za amadan n ayfəd-in.» ¹⁷ Iğ-as y əsəstan wa igi wa n karad inn-as: «Simyon ag Yaxya, awak təreɣ-i?» Ğɣšadan man ən Simyon Butros fəlas karad igitan das-iga Ƴaysa y əsəstan wa. Inn-as: «Ğməli, kay a issanan dağ arat kul, təssânaɣ as əreq-qay.» Inn-as Ƴaysa: «Ğssən za dağ ayfəd-in. ¹⁸ Ğggəyyey əsilakanax-ak as harwa taynaya, iman-nak as təlassa tabdoq-nak, tətakkax edag was tare, mišan as təqqalax aɣmar, ad təzzələɣ ifassan-nak, assals-ik awedan iyyan tabdoq-nak, awəy-kay s adag as wər tareɣ iki-net.» ¹⁹ Batu ta issoka sər-əs Ƴaysa ənnuɣ ən təməttant ta z'agu Butros s ənta as z'assaknu adkul wa iga i Məššina. As iga Ƴaysa batu ta inn-as: «Ğlkəm-i» ²⁰ Iswad-in Butros dəffər-əs ogga anattalib wa isannahal Ƴaysa tara ilkâm-asan-du. Anattalib wa ənta a isaxɣamaran dağ ihəz n ədmaran ən Ƴaysa ahad wad tattin imensewan n əmud wa n Akkay, ənta deɣ as kala ad issəstanan Ƴaysa inn-as: «Ğməli, ma imos wa kay z'akkaddalan.» ²¹ As t-ogga Butros issəstan Ƴaysa inn-as: «Ğnta za Ğməli, ma dağ-as ilkaman?» ²² Inn-as Ƴaysa: «Kud tara a əgeɣ ad iddər har d-əqqəla, tədi wər kay-təqqel. Kay əlkəm-i ɣas!» ²³ Wazawazan salan dağ məzzəgzan əs Ƴaysa as anattalib wa wər tu-z-iba. Ğnta Ƴaysa wərgəɣ a inna wər tu-z-iba, tənna ɣas a iga: «Kud tara a əgeɣ ad iddər har d-əqqəla tədi wər kay-təqqel.»

Zagzal dağ batu ta təmosat əlməxsud n əlkəttab wa

²⁴ Anattalib wa ənta iman-net as iggəyyat fəl igitan win, iktab-tan. Nəssân as təgəyya-net tidət a təmos. ²⁵ Ƴaysa iga aratan wiyyad aggotnen. As igmay awedan d a sər-san ammagrad s iyyan-iyyan, ordeɣ as əddənet ketnet da wər za tawəy əlkəttaban win z'iktəb.

Igitan ən Nəmmuzal

Əkkozat tēmərwen n əzəl win dat əmədkəl ən Ƴaysa

Ƴəsənti

¹ Ya Tayofil, əlkəttab-in wa azzaran əktâbağ dağ-as aratan kul win as issənta Ƴaysa igi-nasan d əsəssəxri-nasan, ² har əzəl wa d immədkal əs jənnawan dəffər as iga ammaran-net əs tarna n Infas wa Zəddigan i nəmmuzal-net win isannafran. ³ Əntanay en da a issəkna iman-net dəffər alyazab-net. Isattad-asan əs tēməwiten aggotnen tanakra-net dağ tamattant. Əkkozat tēmərwen n əzəl a iga itinəfilil-asan, itağg-asan isalan ən Tağmar ta n Məşşina.

Arkawal n assa n Infas wa Zəddigan

⁴ Əzəl iyyan idrâw dər-san imensewan as tan-omar, inn-asan: «Ad wər təgmədam ağrəm ən Yerusalam. Əqqəlat y arkawal n Abba wa dawan-əmala, ⁵ fəlas Ƴaxya aman a dağ issəlməğ aytedan mişan kawanay, ħur adan wər nəggət, Infas wa Zəddigan a dağ za tətəwəsəlməğam.» ⁶ Əddəwan ħur-əs nəmmuzal-net as t-əssəstanan, ənnan-as: «Əməli, awak əmərədda ad za təssuğəla tēmənukəla y Israyil?» ⁷ Inn-asan: «Wər kawan-təwer masnat n alwaq wala tamert win otas Abba əs tanaya-net. ⁸ Mişan ya a fall-awan d-azzabbat Infas wa Zəddigan, təgrəwam tarna, təqqəlam şigəyyawen-in dağ əğrəm wa n Yerusalam, d akal kul wa n Yahudəyya əd wa n Samarəya, taglim har da d-iraz amağal.»

Əmədkəl ən Ƴaysa

⁹ As inna awen, immədkal əs jənnawan. Əswâdan dağ-as har dasan-tu-təlsa tağarak. ¹⁰ Harwâda əggizzayan ijənnawan assağa wad itagazzay Ƴaysa as nafalalan əşşin meddan ən samlalan dəğma-nasan. ¹¹ Ənnan-asan: «Ya meddan ən Galilaya, mas təbdadam, təswâdam dağ jənnawan? Ƴaysa wa immədkalan gar-ewwan da əs jənnawan, ilkâm a d-iqqəl s əmmək wa da as tu-tənayam ikk-en.»

Ənətti n Əlkənisat - Şiggəyyawen dağ Yerusalam

Awedan wa z'iggəzan edag ən Yahuza

¹² Təzzar əfalan nəmmuzal adğağ was itawannu wa n Eşkan ən Zaytun, əqqalan ağrəm ən Yerusalam a das-ihân edag ən teklay tas tətawala turagat-net dağ əzəl wa n təsanfawt ən Kəl-Elyəhud, almağna edag ən kilaw iyyanda ən teklay. ¹³ As din-osan, əggazan ehan wa n afalla dağ suru wa dağ saganan. Əmosan Butros, Ƴaxya, Ƴaqub, Andrawəs, Filibus, Tuma, Bartulamawəs, Matta, Ƴaqub wa n ag Alfay, Simğon was itawannu wa Isaggatakken əd Yahuza wa n ag Ƴaqub. ¹⁴ Ketnasan tiddawan-du y igi ən təwatriwen s əwəl iyyanda, əntanay əd mədrayan ən Ƴaysa əd tədoden təha Maryama ta n anna-net.

¹⁵ Adan en da a dağ ibdad Butros gər nəlkiman ən Ƴaysa, əmosnen temeday n awedan əd sanatat tēmərwen, inn-asan: ¹⁶ «İmədrayan-in, əşşil ad andu awa inna Infas wa Zəddigan dağ Əlkəttaban irəw s əmi n ənnəbi Dawəd dağ salan ən Yahuza wa d-issəlalan aytedan win əbaznen Ƴaysa. ¹⁷ Fəlas kala dağ-nağ iddu n nakkanay inəmmuzal, amaran igrâw adagar-net dağ əşşəğəl wa dər-nağ isanattaf Ƴaysa Əlməsix. ¹⁸ Aləs za wa, izzənza tawagost dağ azrəf wa igray dağ abakkad-net, dəffər awen uda dağ-as əs tədistan-net, ibbəqqat, iffəzzat awa ihan tadistan-net kul. ¹⁹ Aytedan kul win əxsarnen dağ Yerusalam əslân awen, har as tawagost ten əgan-as esəm dağ awal-nasan "Akaldama", alamağna tawagost ta n əzni. ²⁰ Amaran iktâb

dağ əlkəttab wa n Əzzəbur as: "Iqqəlet ahan-net əməjir, a tu-wər-iləs awedan iguz." Iktâb dağ-as deş as: "Iggəzet awedan iyyan edag-net dağ əşşəxəl."

²¹ Dağ adi ilzâm-ana ad nəsənnəfrən iyyan dağ meddan win dər nətidaw faw dağ şikilan n Əməli Ҳaysa, ²² a d-ibazan ғur əzəl wa t-issəlmağ Yaxya dağ aman har əzəl wa ғur-nağ immədkał əs jənnawan. Aləs wa za nəsənnəfrən da, ad iqqəl təgəyya ən tanakra ən Ҳaysa dağ tamattant.»

²³ Əssəbdadan əşšin meddan əmosnen Yusəf was itawannu Barsabbas, gannin-as deş Yustus, əd Matəyyas. ²⁴ Təzzar əttaran, ənnan: «Ya Əməli, kay a issanan awa ihan iwallan n aytedan kul, sakn-ana wa təsannafrana ғər meddan win əşšin a, ²⁵ fəl ad iggəz əşşəxəl n anammazul wa igmad Yahuza ikka edag wa imosan wa-net.»

²⁶ Əgan šişaxeren, əbaznat Matəyyas, iddun dağ nəmmuzal win maraw d iyyan.

2

Assa n Infas wa Zəddigan

¹ As d-iğlay əzəl n əmud ən Kəl-Əlyəhud was itawannu Fantəkawt, əddəwan nalkiman ən Ҳaysa ketnasan dağ adag iyyanda. ² Wala a ihogan igmad-du əjit iyyan ijənnawan olân d in ađu issohen, itkar ehan ketnet wa dağ əqqiman. ³ Nafalalan-asan d ilsawan olanen d in abalagleg ən təmsay, əmməzzayan ilsawan en; əkkulluk n iyyan iwar iyyan dağ-san, ⁴ Idnay-tan Infas wa Zəddigan ketnasan, təzzar əssəntan awal dağ awalan wər nəmos win-nasan, s əmmək was tan-ikfa Infas wa Zəddigan fərregat n awen. ⁵ As itaggu awen, aғrəm ən Yerusalam əxsâran dağ-as Kəl-Əlyəhud zizawatnen dağ əddin a d-əgmâdnen ikallan n əddənet kul. ⁶ As əslan y awal wen, təddew-du tamattay tagget, təzzar isammaklal sər-san awen fəlas akkiyyan dağ-san isallu i nalkiman əşşewalan dağ awal n akal wa d-igmad. ⁷ Iga sər-san awen əsəmməkləl labasan, gannin: «Xa! Aytedan a əşşewalnen da, awak wərgəğ ketnasan Kəl-Galilaya? ⁸ Mas za, akkiyyan dağ-na isall-asan əşşewalan awal ən marwan-net? ⁹ Ənta nakkanay əhân-anax aytedan a d-əgmadnen amađal ən Bartəya, d akal wa n Medəya, əd wa n Ałam, d aytedan əxsârnen dağ akal wa n Mezobotaməya, əd wa n Yahudəyya, əd wa n Kabadokəya, əd wa n Fontəs əd wa n Asəya, ¹⁰ əd wa n Frijəya, əd wa n Banfiləya əd wa n Masar. Wiyyad əgmâdan-du akal ən Libəya dağ ғələyğəlayan n əғrəm wa n Qərwan, wiyyad aytedan n Ərrum, ¹¹ wiyyad aytedan ən Kəret əd win Arabəya. Ғər za win dağ-na əmosnen Kəl-Əlyəhud wala deş aytedan a d-əhdânen s əddin wa n Kəl-Əlyəhud, ketnana nəsall-asan əmmâlan dağ awalan-nana igitan ən tarna ən Məşşina.» ¹² Ketnasan isimaklal sər-san awen, wər əssenən a ənnan, tinəmənnin: «Ma imos almağna n awa?» ¹³ Mişan ya wiyyad dağ-san əgan dağ nəlkiman tamakkakkayt, gannin: «Awen esmad n alğanab a tan-isammaswadan.»

Təlxutbat ən Butros əzəl wa n Fantəkawt

¹⁴ Təzzar ibdad Butros ənta əd nəmmuzal win maraw d iyyan, idkal əməslinet işşewal i tamattay, inna: «Meddan ən Yahudəyya əd kawanay ketnawan win əxsarnen dağ Yerusalam, aғriwat awa igan da, təssəsəməm wəllen y awa dawan-z-anna da. ¹⁵ Meddan win wər əmməswadan, arat wa təğilam əddi, fəlas taza alwaqan win aғora awa harwa da. ¹⁶ Kala kalar arat wa imal ənnəbi Yowəl a d-osan, as inna: ¹⁷ "Inna Məşşina: 'Ənta da awa du-z-asin dağ adan n əddənet win əlkammen: a du-zəzzəbbəğ Infas-in fəl i t-illa awedan, əssuxəlan maddanəwan d aşşekkawan awa dasan-z-əməla; sənnəfiləlağ aratan əttinkalnen i mawadan-nawan, səssuga iğmaran-nawan targəten. ¹⁸ Awalla, a du-zəzzəbbəğ dağ adan win den Infas-in fəl nağbidan-in əd tənaxbiden-in təzzar əssuxəlan awa dasan-z-əməla.

¹⁹ Ad agaḡ təlməxjujaten daḡ jənnawan, agaḡ aratan əmosnen aḡalamaten fəl amaḡal: Inḡəl əzni, tarḡu təmsay, akku əhu ijənnawan. ²⁰ Təfuk ad tamattay, təqqəl šiyyay; tizwaḡ təllit šilat n əzni; izar-du adi kul y assa n əzəl zəwwəran ilān əlxurma wa issəbdad Əməli. ²¹ Amaran i igmayan daḡ Əməli əḡyillas ad t-igrəw."

²² Ya meddan n Israyil, səsəmat i salan win: Үaysa wa n Nazaret, aləs a imos as kawan-issīkna Məššina əs təlməxjujaten d aratan əmmittaynen, əd wiyyad əmosnen aḡalamaten win as t-ikfa igi-nasan gar-ewwan as ənta a isannafran. Kawanay iman-nawan təssānam daḡ adi. ²³ Aləs di, Məššina di as tu-wər-illa a das-idrāḡan a t-igan daḡ fassan-nawan, imos awen arat ixtās irəw, təgam iman-net s ətəwəsətəytəy wa tu-təsassagam i nəzzulam fəl təgəttawt. ²⁴ Mišan isənkə-t-idu Məššina, ikkas-t-idu daḡ tarna ən tamattant fəlas wər t-illa əmmək as t-in-təttəf tamattant. ²⁵ Batu-net a daḡ inna ənnəbi Dawəd irəw: "Hannaya Əməli dat-i faw, iha aḡil-in fəl ad wər əḡšədan man-in. ²⁶ Adi fəl falawasan man-in, təkna tədəwit iguz n awal-in, wala taḡəssa-nin wər nəmos tamaylolt da ad tagu attama, ²⁷ id wər za tayyaḡ iman-in daḡ alaxirat, wala deḡ tayyaḡ Əmizdag-nak tarḡu təḡəssa-net. ²⁸ Kay a di-issəknan tarrayt ta təha təməddurt. A di-təsəffəliwəsa wəllen əs tassaḡ ta dər-ək əgeḡ."

²⁹ Imədrayan-in, əleḡ tarrayt n a dawan-agaḡ isalan daḡ əkkāsaḡ aššak n əmaraw-nana Dawəd n as, aba-tu, itawanbal-in. Əzəkka-net, har azalada illa gar-ena. ³⁰ Ənnəbi a imos, issān deḡ fəl arkawal wa fəl das-ihad Məššina n as, ilkām ad agu daḡ taḡmar-net iyyan daḡ hayawan-net. ³¹ Daḡ adi Dawəd ināy dat alwaḡ tanakra n Əlməsix daḡ təmattant, amaran isalan ən tanakra-net a daḡ inna: "Wər din-itawayya daḡ alaxirat, wala deḡ tərḡa təḡəssa-net." ³² Үaysa za wa, issənkə-t-idu Məššina gər nəmməttan, nakkanay nəggəyat adi. ³³ Idkal-tu Məššina di n Abba-net ig-ay daḡ əḡil-net, ikf-ay Infas wa Zəddigan was iga arkawal-net, ənta amaran izazzabbat-t-idu fall-ana. Adi a imos arat wa təhannayam da, təsallim-as. ³⁴ Wərgəḡ ənnəbi Dawəd a ikkan ijənnawan, kalar ənta iman-net a innan: "Inna Əməli Məššina y Əməli-nin: 'Үam daḡ əḡil-in, ³⁵ iket di ad taggaḡ izəngə-nak daw daran-nak.'" ³⁶ Daḡ adi akninet Kəl-Israyil kul masnat daḡ as, Үaysa wa təttəytayam fəl təgəttawt, ənta a iga Məššina Əməli d Əlməsix.»

³⁷ Idas awal wa iga Butros den iwallan n aytədan wəllen, ənnan-as ənta əd nəmmuzal win hadatnen: «Imədrayan-nana mas danaḡ-ilzam igi-net?» ³⁸ Inn-asan Butros: «Utabat. Akkiyyan daḡ-wan itəwəsəlməḡet daḡ aman s esəm ən Үaysa Əlməsix fəl ad təgrəwam təsureft ən bakkadan-nawan, təgrəwam təhəkkut ən Məššina təmosat Infas wa Zəddigan, ³⁹ ənta arkawal wa iga Məššina, kawanay as t-iga, kawanay əd hayawan-nawan d aytədan kul win əxsarnen daḡ igəḡ, almaḡna aytədan kul win du-z-aḡru Əməli-nana Məššina əs man-net.» ⁴⁰ Har irəw Butros itagga-san təlxutbat idḡāz wəllen igann-asan: «Aḡəzat iman-nawan daḡ aytədan əxrāknen ən nəllubas win azzaman a.»

Tassaḡ ta əgan məzzəḡzan win azzarnen

⁴¹ Aytədan win əzzəḡzannen s awa inna, tawasalmaḡan daḡ aman, təzzar təttəy tiddawat ən məzzəḡzan əzəl wen s adag ən karad gim n awedan. ⁴² Wər əḡmedan ar əs taḡaray daw nəmmuzal, əmosan arat iyyanda ketnasan, darrawan imensewan-nasan, tuzanan amensay wa n saktan, taggin šiwatriwen. ⁴³ Təkna tasa ən Məššina iguz n awedan kul, inəmmuzal deḡ taggin s əlqudrat ən Məššina təlməxjujaten aggotnen d aratan əmosnen aḡalamaten.

⁴⁴ Ərtāyan məzzəḡzan ketnasan, ədrāwan deḡ arat kul wa əlan. ⁴⁵ Zanzin-in daḡ ərrəzəḡ-nasan, tuzanan attaman-net, ewal awen s awa dər toḡdā addararat n akkiyyan daḡ-san. ⁴⁶ Əzəl kul tamanayan daḡ Ahan wa Zəwwəran n Əḡyibada, nimannakan s awen. Tuzanan amensay wa n saktan daḡ nan-nasan, darrawan

deḡ imensewan-nasan daḡ təfalawist əd tazdak n əwəl. ⁴⁷ Əmmâlan Məššina, əssiḡmaran-tan aytedan kul. Akk əzəl iššota Əməli əljəmaḡat-nasan s aytedan win iḡlas.

3

Təməzzəyt n anabdon iyyan

¹ Əzəl iyyan iggəzzay Butros əd Yaxya s Ahan wa Zəwwəran n Əlḡibada y ad agin šiwatriwen šin tazzar. ² Alwaḡ wen da a daḡ d-imməway aləs iyyan a d-ihəwan əd bəddən s əmi n Ahan wa Zəwwəran n Əlḡibada was itawannu: «Imi wa Ihossayan» itawasansa fəl ad igməy takutay daḡ aytedan win tu-tagaznen. Akk əzəl itawasansu den. ³ As inay Butros əd Yaxya əbukən y iguz n Ahan wa Zəwwəran n Əlḡibada, a tan-itansay. ⁴ Idak-ku Butros əd Yaxya s asawad, inn-as Butros: «Əswəd daḡ-na.» ⁵ Ikna daḡ-san asawad, iga attama n ad t-akfin arat iyyan. ⁶ Təzzar inn-as Butros: «Urəḡ wala azrəf, wər tan-ələḡ, mišan a kay-akfa awa ələḡ: Əs tarna n esəm ən Ḡaysa Əlməsix wa n əḡrəm ən Nazaret, əbdəd jəwənkət!» ⁷ Təzzar ibaz Butros əfus-net wa n əḡil, issəbdad-tu. Əddaran-du daran-net əd təlazzen-net alwaḡ wen da. ⁸ Innad-du zəllat ibdad, ijawankat. Iddew dər-san, əggazan Ehan wa Zəwwəran n Əlḡibada, ijiwankat itaggad fəl tədəwit immâl Məššina. ⁹ Hannayan-tu aytedan kul ijiwankat immâl Məššina. ¹⁰ As din-əgran as, ənta a itaḡamin ḡur əmi n Ahan wa Zəwwəran n Əlḡibada was itawannu: «Imi wa Ihossayan», itânsay, əhagan, isammaklal sər-san awa t-igrawan.

Emel ən Butros i tamattay almayna n əzuzəy wa iga y anabdon

¹¹ Iḡla aləs wa itawazozayan da iltâḡ daḡ Butros əd Yaxya. Jiwankeḡ daḡ tarrayt təfâlat as itawannu «ta n Suliman» as sər-san du-tozal tamattay ketnet. Iḡâ awen s aytedan əsəmməkləl labâsan. ¹² As inay Butros awen, inna y aytedan: «Məddan n İsrayil, mafel ikna sər-wan awa əsəmməkləl? Təḡâram daḡ-na šittawen, təḡâm daḡ-na asawad n as nakkanay a izzozayan aləs wa əs fərregat-nana nakkanay iman-nana, madeḡ nəzzozay-tu fəl aššaddat ən təksəda-nana Məššina? ¹³ Əməli n İbrahim d İsəhaḡ əd Yaḡub, Əməli ən marawan-nana, ənta a ikfan akli-net Ḡaysa əlxurma. Kawanay iman-nawan a t-igan daḡ fassan, tənkuram-tu dat Bilatəs s ənta ikus-net a otas. ¹⁴ Awalla tənkuram Alḡadil di n Əmizdag, təgməyam a dawan-d-itəwəkkəs aləs n əməḡḡi ən man. ¹⁵ Təgam iman ən wa ihakkin təməddurt. Ənta a d-issənkar Məššina daḡ tamattant, nakkanay nəḡḡəyat adi. ¹⁶ Əzəḡzan-nana əs tarna n esəm ən Ḡaysa a ikfan aləs a təhannayam da, təzdâyam-tu šiḡurad-net. Illikan as əzəḡzan əs Ḡaysa a ikfan aləs di šiḡurad-net kul dat-wan ketnawan. ¹⁷ Amaran imədrayan-in, əssânaḡ as əljəhəl a daḡ təgam adi kawanay əd muzaran-nawan. ¹⁸ Mišan əssənat as irəw as imal Məššina daḡ mawan n ənnəbitan kul as Əlməsix ilzâm-tu ad inəy alyazab, amaran issənda adi əs təməwit tēdi da. ¹⁹ Daḡ adi utabat tiksadam Məššina fəl ad iməs ibakkadan-nawan, ²⁰ izəzzəbbət-du fall-awan šimeren ən təsasmit, issuxəl-du Əlməsix a dawan-isinafran dat alwaḡ, almayna Ḡaysa. ²¹ Ilzâm-tu ad aqqam daḡ jənnawan har d-asu alwaḡ wa daḡ z'issuxəl Məššina arat kul əmmək-net wa azzaran, imâl awen irəw əs mawan n ənnəbitan-net di zaddoḡnen.

²² Awalla a inna ənnəbi Musa: "Məššina, Əməli-nawan a dawan-d-isənnəfiləl iyyan ənnəbi ən šilat-in daḡ mədrayan-nawan amaran ad təsəsəmam y awa dawan-z-annu kul. ²³ Awedan kul wa wər nəbbərdag y ənnəbi wədi, ad itəwəkkəs daḡ tamattay ən Məššina, ihlək." ²⁴ Ənnəbitan kul win hadatnen, a d-ibazan ḡur ənnəbi Saməwel əd win t-əzraynen ketnasan, əmâlan arat wa igan daḡ adan win. ²⁵ Kawanay a imosan iməkkusa n ənnəbitan win den, təkkosem deḡ arkawal ən tassaḡ wa idkal Məššina i marawan-nawan as inna y İbrahim: "Tawšeten n əddənet kul ad əḡrəwnat albaraka

s əssəbab n əzzurrəyya-nak." ²⁶ Kawanay as d-isannafalal Məššina Akli-net Үaysa daҗ tizarat, issok-awan-t-id, fəl a kawan-akfu albaraka-net ikkəs akkiyyan daҗ-wan daҗ tarrayt ta n əššur.»

4

Tebadday ən Butros əd Yaxya dat Asaggawar wa Zəwwəran

¹ Harwada iššewal Butros əd Yaxya i tamattay as fall-asan əhan limaman əddewan d əmuzar n aytedan win tagaznen Ehan wa Zəwwəran n Əlyibada əd Sadusaytan; ² ih-en alham n əsəssəxri wa taggin tamattay, əmmâlan âs dad zamas Үaysa inkar-du daҗ təməttant, wədi inəmməttan da a daҗ-as d ənkaran. ³ Sattarmasan-tan əgan-tan daҗ kasaw har ifaw fəlas ehad a igan. ⁴ Mišan ya əzzəgzanan aytedan aggotnen daҗ win əslanen i təlxtutbat ten, təzzar əqqalan məzzəgzan edag ən səmmos gim n aləs.

⁵ As affaw əmmənayan muzaran ən Kəl-Əlyəhud, d əmḡaran-nasan əd musanan n Əttawret daҗ Yerusalām. ⁶ Ih-en Xānan wa n Əlimam wa Zəwwəran əd Kayif, əd Yaxya d Alaskandər d aytedan n aḡaywan n Əlimam wa Zəwwəran ketnasan. ⁷ Əssəbdadan Butros əd Yaxya gar-essan, əsəstanan-tan ənnan-asan: «Ma ilan tarna madəx esəm was təgam adi?» ⁸ Təzzar inn-asan Butros idkâran Infas wa Zəddigan: «Ya imuzaran ən tamattay-nana d əmḡaran n Israyil, ⁹ azalada nəbdâd dat asaggawar wa fəlas nəga əmazal olâḡan imosan tilalt y awedan ibdânan, amaran ilzâm-ana ad nəməl əmmək was itawazozay. ¹⁰ Əssənət za ketnawan, kawanay d aytedan n Israyil kul as, aləs wa ibdadān dat-wan da wər ila malad waliyyan, tarna n esəm ən Үaysa Əlməsix wa n Nazaret a t-izzozayan, wa tətəytayam fəl təgəttawt, issənkar-t-idu Məššina daҗ təməttant. ¹¹ Үaysa, ənta a imosan "təhunt ta din-təgaram kawanay win makrasan, amaran ənta a təqqalat təhunt ta təkbalat ehan." ¹² Ənta ḡas a iḡallasan, amaran wər ikfa Məššina gər jənnawan d amaḡal esəm n awedan iyyan was za nəḡləs ar wa-net.»

¹³ As ənayan taholat ən Butros əd Yaxya awal isammaklāl sər-san awen fəlas əgran as aljahilan a əmosan, əssānan dəx as aytedan a əmosan as kala tiddawan əd Үaysa, ¹⁴ mišan wər t-illa as əfrāgan a dasan-t-annin fəlas hannayan aləs wa itawazozayan ibdâd den ḡur-san. ¹⁵ Təzzar əkkasan-tan daҗ ahan wa daҗ immənay asaggawar, amaran ad tinəməggin šinaden. ¹⁶ Gannin: «Ma za nagu y aytedan a? İllikan as ənâyan Kəl-Yerusalām kul təlməxjujat zəwwərat ta əgan, amaran wər nəfreg əsəbbəhəw-net. ¹⁷ Mišan ya fəl ad wər wəziwəzan salan n awen daҗ tamattay kul, daҗ adi aḡiwatana y-asan šisəksədawen fəl a du-wər-ələsan adakal n esəm ən Үaysa dat awedan waliyyan.»

¹⁸ Təzzar sassaxran-tan-du, ərḡaman-asan fəl a du-wər-ələsan adakal n esəm ən Үaysa wala dəx əsəssəxri n arat a t-iqqâlan. ¹⁹ Mišan inn-asan Butros əd Yaxya: «Kawanay iman-nawan ma tənnam: Məni daҗ aratan win wa oḡadan dat Məššina: awak əbərdəg y-awan meḡ əbərdəg i Məššina? ²⁰ Nakkanay za, wər nəfreg ad nayyu emel n aratan win nənay əd win as nəsla.» ²¹ İlas-asan asaggawar igi n təsəksədawen, amaran oyyan-tan, id wər əgrewan əsarū fəl tan-əwwəddaban. Əḡân awen fəl əddəlil n aytedan, fəlas aytedan en ketnasan taggin i Məššina təmmalen fəl awa igan den. ²² Ənta aləs wa igan təməzzəyt təmosat təlməxjujat ten, elan-net ogaran əkkozat təmərwən n awatay.

Šiwatriwen ən məzzəgzan əs Үaysa a dasan-olaman fəl man

²³ Itawayya Butros əd Yaxya ḡas, əkkan imidawan-nasan, əsoḡalan-asan awa dasan-ənnan muzaran ən limaman d əmḡaran ən Kəl-Əlyəhud. ²⁴ As əslan i salan win, jajjayen daҗ təwatray ta, s əwəl iyyanda, ənnan s afalla: «Ya Əməli, kay a d-ixlakan ijənnawan d amaḡal, əd gərwan d awa tan-ihan kul, ²⁵ kay a innan əs

tarna n Infas wa Zəddigan s əmi n amaraw-nana akli-nak Dawəd: "Mafel ʁiṣaṣatnat addawlaten n əddənet, tagginat təmattiwen šinaden wər nənfa wala? ²⁶ Əbdadan mənokalan n əddənet, əddəwan dəx muzaran dəx adag iyyanda, fəl ad ammaddin Əməli d Əlməsix-net." ²⁷ Id illikan as, aʁrəm wa da, a dəx immənay Herod əd Fons Bilatəs əntanay əd təmattiwen šin nəzzulam əd šin Israyil, əmməddan ʁaysa, imosan Akli-nak zəddigan, wa təgeʁ Əlməsix. ²⁸ Imos awen igi n arat ketnet was təxtasa fəl igi-net dat alwaq əs tarna-nak əd tara-nak. ²⁹ Amaran əməərədda Əməli, əswəd dəx təsəksədawen šin dana-taggin, təzzar təssəhəlay-ana wəllen nakkanay an eklan-nak emel n awal-nak, ³⁰ tilalay-ana əs tarna n əfus-nak fəl ad nəzzuzəy aytedan, nagu təlməyjujaten d aratan əmosnen alʁalamaten s esəm ən ʁaysa, Akli-nak Zəddigan.» ³¹ As əʁradan təwatray-nasan inagaynagay adag wa dəx əddəwan, idnay-tan Infas wa Zəddigan ketnasan, təzzar ad əmməlan awal ən Məššina ši wala tasa.

Tartəyt ta əgan məzzəgzan

³² Əljəməʁat ta n məzzəgzan ketnet tənimmannak təmos arat iyyanda. Wər tan-ihə i igannin awa ila, i-net ʁas-net, kalar ədrəwan arat kul wa əlan. ³³ Tagayyen nəmmuzal əs tarna zəwwərat fəl tanakra n Əməli ʁaysa dəx təmattant, ikf-en dəx Məššina ketnasan arraxmat-net s igət. ³⁴ Əljəməʁat en wər tat-ihə i iddiraran əs wala, fəlas win dəx-san əlanen inan madeʁ ši wəgas zanzan-tan-in, tawayan-du attaman-nasan, ³⁵ hakkin-tu i nəmmuzal, amaran itəwizən gər məzzəgzan ewəlan dəgran-nasan s awa dər ogdanat təməʁutar-nasan. ³⁶ Awen da a igə aləs iyyan igən Yusəf imosan iyyan dəx Kəl-Lebi n akal ən Qibrus. Ənta as əgan nəmmuzal təsəmmədəq Barnabas, almaʁna «Ənalam fəl man» ³⁷ Izzənz-in tawagost təhat təla-net, eway-du attaman-net ikf-ay i nəmmuzal.

5

Bahu wa igə Ananəyəs əd Safira

¹ Ill-ay aləs iyyan igən esəm Ananəyəs a din-izzinzan, ənta əd təntut-net Safira, tawagost-net, ² təzzar inamarda əd təntut-net fəl a din-ittəf arat dəx əzrəf wa din-tənza, eway-du awa hadan, ikf-ay i nəmmuzal. ³ Inn-as Butros: «Ananəyəs, mafel as toyyəʁ Aššaytan igə y əwəl-nak iguz ogdān d awa, ewad dəx-ak ad taga y Infas wa Zəddigan bahu s iduf wa din-təgeʁ arat dəx əzrəf wa din-tənza tawagost-nak? ⁴ Harwa tat-in-wər-təzzənza, wərgəʁ təla-nak a təha? As tat-in-təzzənza dəx, wərgəʁ azrəf wa tat-in-təzzənza kay a ittafan tanat-net? Dəx adi, mafel təsəmarkasa dəx əwəl-nak igi n əmazal ogdān d awa? Wərgəʁ aytedan as təgeʁ bahu, kalar Məššina əs tu-təgeʁ.» ⁵ As isla Ananəyəs i batu ten, ifataqqat, əgmadan-tu man. Təggaz tasa zəwwərat aytedan kul win əslanen awen. ⁶ Təzzar osan-t-idu meddan ən mawadan, əgan-tu dəx šifit, əgla dər-əs ənbalan-t-in.

⁷ Edag ən karadat assayaten dəffər awen, tosa-du təntut n Ananəyəs, wər tessen fəl awa igan. ⁸ Issəstan-tat Butros, inn-as: «Safira, əməl-i, awak tawagost-nawan azrəf wa tat-in-təzzənza, ənta da da ketnet?» Tənn-as: «Awalla, ənta əddi da.» ⁹ Təzzar inn-as Butros: «Manəmmək əs tənəmannakam fəl igi ən taremt y Infas wa Zəddigan? Səsəm, meddan win din-ənbalnen aləs-nam əllān dat əmi n ahan; a kam-awəyan kam da.» ¹⁰ Təfataqqat tamazayt ten da ʁur daran ən Butros, əgmadan-tat man. Əggazan-du meddan winad ən mawadan a, osan-tat-du wər tədder, ewayan-tat ənbalan-tat-in dəgma n aləs-net. ¹¹ Eway-du awen as təggaz tasa labasət Əlkənəsət ketnet d aytedan kul win əslanen awen.

Inəmmuzal dat Asəggawar wa Zəwwəran

¹² Taggin nəmmuzal təlməxjujaten aggotnen əmosnen alyalamaten d aratan aggotnen simaklalten daɣ aytedan. Tamanayan faw məzzəgzan əs Ƴaysa ketnasan, daw tafala n Ahan wa Zəwwəran n Əlyibada tas itawannu «ta n Suliman». ¹³ Əssiɣmaran-tan aytedan mišan wər-t-illa i ihalan a tan-in-ihaz. ¹⁴ Dər iga awen da ya, tittəyan s aytedan əknanen igət əgânen daɣ meddan əd tədoden win zagzannen s Əməli. ¹⁵ Har as, tamawayan-du miranan tawasansin daɣ tessaten madeɣ šisalaten fəl afay ən tarrayen ən Yerusalam, fəl a din-tawəd kuddeɣ telay ən Butros wiyyad daɣ-san as d-illam den. ¹⁶ Tazalan-du deɣ aytedan əknanen igət ən ɣərman win əhoznen Yerusalam, əs Yerusalam ewâyan imiranan-nasan d aytedan-nasan win əssəranan kələsuf. Ketnasan deɣ tiwəzuzəyan.

¹⁷ Əggaznat təsmiten labasnen Əlimam wa Zəwwəran ənta d aytedan kul win təximit-net, ən taggayt ta n Sadusaytan, ¹⁸ təzzar ənkaran sattarmasan inəmmuzal əgan-tan daɣ kasaw dat awedan kul. ¹⁹ Mišan osa-du angalos n Əməli ehad, olam šisəhar ən kasaw, ikkas-tan-du, inn-asan: ²⁰ «Akkiwat Ehan wa Zəwwəran n Əlyibada, təməlam y aytedan isalan kul win təməddurt ta taynayət.» ²¹ Əgan nəmmuzal awa dasan-itawannan, ənzayan s Ahan wa Zəwwəran n Əlyibada, a daɣ-as sasayrin aytedan.

As d-osa Əlimam wa Zəwwəran ənta d aytedan win təximit-net, sassayran-du Asaggawar wa Zəwwəran almaɣna iɣmaran kul win əmosnen šiggətawen ən Kəl-İsrayil, amaran əssəgmayan inəmmuzal əs kasaw. ²² Osan-in mašşaxalan win tan-əgmaynen ehan ən kasaw, mišan wər tan-in-ogezan daɣ kasaw, təzzar əqqalan əgan isalan, ²³ ənnan: «Nos-in kasaw ketnet itimantammat, əbdâdan sojitan win t-ogaznen dat mawan-net, mišan as nolam təsəhərt ən kasaw, wər daɣ-as in-nosa awedan waliyyan.» ²⁴ As isla kabtan ən sojitan win tagaznen Ehan wa Zəwwəran n Əlyibada, əd muzaran ən limaman i salan win den, əqqanan ɣafawan-nasan, ad samadranan daɣ awa z'iqqəl awen. ²⁵ Əhân ten da as tan-d-osa awedan, inn-asan: «Səsəmat! Meddan win təgam daɣ kasaw, əbdâdan daɣ Ahan wa Zəwwəran n Əlyibada, sasayrin daɣ-as tamattay.» ²⁶ Təzzar igla kabtan alwaq wen da iddêw əd sojitan-net əbazan-du inəmmuzal, mišan wər tan-ədesan fəlas əksudan a sər-san du-təggəd tamattay əntanay en da, tanɣ-en əs zabaw ən təgur.

²⁷ As tan-d-ewayan, zazzakken-tan dat Asaggawar wa Zəwwəran, təzzar issəstan-tan Əlimam wa Zəwwəran, ²⁸ inn-asan: «Wəgeɣ nəryâm-awan wəllen fəl a imosan əsəssəɣri n awedan waliyyan daɣ batu n esəm di? Mišan ənəyat awa təgam! Təzawwazawazam daɣ Yerusalam ketnet əsəssəɣri-nawan, tərâm a dana-təssəwaram tamattant n aləs di.» ²⁹ Inn-asan Butros əd nəmmuzal win hadatnen: «Məšşina as danaɣ-ilzam a das-nabbardag, wəgeɣ aytedan! ³⁰ Məšşina, Əməli ən marawan-nana a d-issənkaran Ƴaysa was təgam iman-net s ətəytəy wa tu-təgam fəl təgəttawt. ³¹ Ənta a da, a idkal Məšşina ig-ay daɣ əɣil-net, ig-ay Əmuzar d Əmayɣlas y ad igrəw i Kəl-İsrayil tarrayt ən tətubt, əgrəwan təsureft ən bakkadan-nasan. ³² Nəmos šigəyyawen n awen, nakkanay d Infas wa Zəddigan ihakku Məšşina y aytedan win əlkammen i tara-net.»

³³ As əslan muzaran n Asaggawar wen i batu ten, iggaz-tan alham labasan, əran a daɣ-san əkkasan iman. ³⁴ Mišan ibdad iyyan daɣ-san ən taggayt ta n Farisaytan igân esəm Gamaləyel imosan əmusan zəwwəran n Əttəwret, əssiɣmaran aytedan kul, omar s ad təwəkkəsən nəmmuzal daɣ ahan wa daɣ iga əməənəy har din-agin arat n amazay, ³⁵ amaran inn-asan: «Kəl-İsrayil, ənkədat y a was təräm a tu-tagim i meddan en. ³⁶ Wər irəw adi as d-inkar aləs igân Tedas inna ənta imos arat, təzzar əlkaman-as meddan ewâdnen əkkəzət təmad n aləs. Ənta za iman-net itawanyə kərəz, meddan win das-əlkammen wazawazan, ibənnan awen ketnet. ³⁷ Dəffər-əs, daɣ azzaman win tuddant, inkar-du iyyan aləs igân esəm Yahuza wa n Galilaya, isaffallag aytedan

aggotnen, əlkaman-as. Ənta da za, itawança kərəz, təzzar wazawazan aytedan kul win das-əlkammen. ³⁸ Dağ adi dağ talça ta, ənnəsixa wa dawan-z-aga: Əgmədat batu ən meddan en, tayyim-tan ad aglin; fəlas kud arat wa ənnəyən madeğ wa taggin wər imos ar arat ərân aytedan a, wədi ad ibərəjjət. ³⁹ Mišan kud arat a imos as Məşşina a t-iran, wədi wər təfregam əzərəz-nasan. Ənkədat, a din-wər-tagrim iman-nawan təmosam əllid ən Məşşina.» Təzzar əttafan ənnəsixa-net. ⁴⁰ Sassaxran-du inəmmuzal, sassagan-asan šiwwit labasnen s ələkkud. Dəffər awen ərgəman-asan fəl a du-wər-ələsan adakal n esəm ən Ƴaysa, amaran oyyan-tan.

⁴¹ Əfalan nəmmuzal ehan wa dağ itamanay Asaggawar wa Zəwwəran, əknân tədəwit id Məşşina a tan-issəharan d ad tawasaknin məlka fəl əddəlil ən Ƴaysa. ⁴² Akk əzəl, gər za dağ Ahan wa Zəwwəran n Əlğibada wala değ dağ nan n aytedan, wər kala əmməzzayan d əsəssəğri d igi ən salan n Əlinjil a tan-imosan əs Ƴaysa ənta a imosan Əlməsix.

6

Əssa meddan win tawasanafrannen y ad ilalan i nəmmuzal

¹ Azzaman en, inalkiman ən Ƴaysa tittəyan wəllen. Eway-du awen as gatantanan Kəl-Əlyəhud win əşşewalnen təlyunant fəl Kəl-Əlyəhud win əşşewalnen təlyibrit fəlas wər tətawagga masnat tolâğat dağ tədoden-nasan şin as aba meddan-nasnat xur təzunt ta tawaggin mensewan akk əzəl. ² Adi a fəl sassagan nəmmuzal win maraw d əşşin əməney təha əljəməğat ən nalkiman ən Ƴaysa kul, ənnan-asan: «Wər ihor ad nayyu emel n awal ən Məşşina fəl ad nannataf əd təzunt ən mensewan. ³ Dağ adi imədrayan-nana, sənnəfrənət dağ-wan əssa meddan as təga masnat fəl əllux-nasan, idkâr-tan Infas wa Zəddigan, əmosan imusanan, a tan-nəsənnəttəf d əşşəğəl wədi. ⁴ Nakkanay amaran nəgməd s igi ən təwatriwen d əşşəğəl wa n amel n awal ən Məşşina ças.» ⁵ Tanat ten, toggam-tat aljaməğat ketnet. Təzzar sannafranan Əstefanos imosan aləs izzigzanan wəllen, idkâr-tu değ Infas wa Zəddigan, əd Filibus əd Frukurus əd Nikanor əd Timun əd Barmenas əd Nikolayos wa n əğrəm n Antəyoxəya as kala-net əddin wa n Kəl-Əlyəhud a iha. ⁶ Təzzar əssəbdadan-tan dat nəmmuzal, əssəwaran-tan nəmmuzal ifassan, əttəran-asan. ⁷ Ad itəyttəy ətəwəsəğmar wa itawaggan y awal ən Məşşina. Təzzar əttəyan nalkiman ən Ƴaysa wəllen dağ Yerusalam, fadda əhdan-du limaman ən Kəl-Əlyəhud aggotnen əs Ƴaysa, əzzəgzanan as Əlməsix a imos, əlkaman y awas omar.

Ətərməs n Əstefanos

⁸ Əstefanos aləs a imos iknân agaraw n arraxmat əd tarna ən Məşşina. Itamazal dat aytedan aratan simaklalnen əd təlməğjujaten əmosnen alğalamaten zawwarnen. ⁹ Təzzar ənkarand-du aytedan wiyyad n ahan n əlğibada ən Kəl-Əlyəhud was itawannu «wa n Dərfan» əs wiyyad dağ-san Kəl-Əlyəhud ən Qərwan, wiyyad in əğrəm n Alaskandrəya, wiyyad in akal wa n Kilikəya əd wa n Asəya, ad tamazağan d Əstefanos. ¹⁰ Mišan wər t-illa a dər din-əkkân masnat ta t-ikfa Infas wa Zəddigan. ¹¹ Təzzar ərzaman i meddan wiyyad dağ əssir fəl ad əssəwaran Əstefanos bahu, ann-in: «Nəsl-əs itaggu batuten əmosnen ikus ən tarna i Məşşina, əmosnat değ iba n safrar n ənnəbi Musa.» ¹² Əgan s awen alham dağ tamattay əd muzaran ən Kəl-Əlyəhud əd musanan n Əttəwret. Wər isla Əstefanos wala as t-id-osan aytedan, əbazan-tu. Ewayan-tu s Asaggawar wa Zəwwəran ən Kəl-Əlyəhud. ¹³ Təzzar əssəbdadan şigəyyawen ən bahu, ənnanat: «Aləs wa, wər itəməzzəy d abayak n ahan wa zəddigan [wa] d Əttəwret. ¹⁴ Igməd aşşak as nəsl-əs as inna, ilkâm ad iğəbbərəjjət Ƴaysa di ən Nazaret di ehan wa, isəmməttəy alğadaten şin dana-d-oyya

Ənnəbi Musa.» ¹⁵ Əgaran aytedan ketnasan win asaggawar şittawen daɣ Əstefanos, iqqal sər-san udəm-net zun in angalos.

7

Təlɣutbat n Əstefanos dat Asaggawar wa Zəwwəran

¹ Təzzar issəstan Əlimam wa Zəwwəran Əstefanos, inn-as: «Awak aratan win tidət?» ² Inna Əstefanos: «Kawanay imədrayan-in d abbatan-in, səsəmat-i! Məşşina di n əməli ən tanaya, ənta as kala a d-inafalal y amaraw-nana Ibrahim harwa iha akal wa n Mezobotaməya, dat təməxsurt-net daɣ akal wa n Xaran. ³ Inn-as: "İgməd akal-nak əd marwan-nak, takkaɣ akal wa kay-z-assakna." ⁴ Təzzar igmad Ibrahim akal wa n Kasdaytan, ixsar daɣ wa n Xaran. Dəffər iba n abba-net a t-id-isaggalat Məşşina s akal wa da daɣ təxsaram da azalada. ⁵ Akal wa, wər daɣ-as ikfa Məşşina Ibrahim edag as z'iggəzan təkəsit-net, wala ɣas edag daɣ issənsa adar-net, mişan idkal-as Məşşina arkawal n a das-t-akfu ənta d əzzurrəyya-net, kuddeɣ as alwaq wen, wər ila Ibrahim ara waliyyan.

⁶ Ənta da awa inna Məşşina: "Thayawan-nak ad əxsəran daɣ akal a daɣ əmosan iyərab, əqqəlan daɣ-as eklan, ad tawazayazzaban har agin əkkozat təmad n awatay. ⁷ Mişan addawlat ta tan-təgat eklan, nak iman-in a tat-z-abəzan s əşşəriɣa, dəffər adi, əkkəsaq-qan-du daɣ-as, əybədan-i daɣ adag wa da." ⁸ Təzzar inamagga Məşşina d Ibrahim arkawal ən tassaq s ənta as imos əmənəkəd ejwal-net. Adi a fəlas, as ihəw barar-net Isəhaq isammankad-tu əzəl wa n əttam dəffər təhəwt-net. Iga Isəhaq awen da i barar-net Yaqub, Yaqub deɣ iga awen da i bararan-net əmosnen maraw d əşşin, win əmosnen aljadan-nana. ⁹ Ənkaran meddan win əmosnen aljadan-nana əmmənzaɣan amadray-nasan Yusəf, təzzar əzzənzən-t-in, immeway s akal ən Masar; mişan issan daɣ-as Məşşina. ¹⁰ İkkas-t-idu Məşşina daɣ təməɣutar kul şin iggaz. İkf-ay masnat, d udəm ɣur Firɣawna wa n əmənokal ən Masar, har as ig-ay Firɣawna daw-əs, izzozar-tu y akal ən Masar d aɣaywan-net ketnet.

¹¹ Dəffər awen, iga laz daɣ akal ən Masar ketnet, ənta əd wa n Kanan. Ad taɣazzaban aytedan wəllen, aba i meddan win əmosnen aljadan-nana a ətşan.

¹² As isla Yaqub as Masar tah-et təbzəst, izammazal sər-əs meddan win dana-sahhayawnen, imos awen iki-nasan y-as wa azzaran. ¹³ ɣur iki-nasan Masar wa n əşşin, ad izzəzday Yusəf iman-net i mədrayan-net, əggazan deɣ salan Firɣawna n aɣaywan wa d-igmad Yusəf.

¹⁴ İssəgmay Yusəf abba-net Yaqub əd marwan-net kul, əmosan əssayat təmərwən n awedan əd səmmos. ¹⁵ Təzzar iras Yaqub akal ən Masar, s ənta a daɣ t-aba, aba daɣ-as deɣ imarawan-nana. ¹⁶ Əmmewaynat təɣəswen-nasan s əɣrəm ən Şəkem, tawanbalnat daɣ əzəkka wa izzənza Ibrahim azrəf wa ibalalaɣan ɣur maddanəs ən Xamor daɣ Şəkem, y ad iqqəl tanbəlt-net.

¹⁷ As d-ihoz alwaq wa daɣ z'assandu Məşşina arkawal wa fəl ihad y Ibrahim, tamattay-nana tətəy, təmôs taxlək tagget daɣ Masar, ¹⁸ har "iggaz iyyan əmənokal wər nəssen fəl Yusəf taymar [ən Masar]." ¹⁹ İkkərras kəl-tamet-nana, iga i marawan[-nana] əzəɣəzzəb labâsan har âs işahhaşşal-tan a din-tayyin bararan-nasan win əs səkət əhəwan daɣ əsuf fəl ad wər əddəran. ²⁰ Azzaman en da a daɣ ihəw Musa, imos barar ihossayan, igrâwan arraxmat ən Məşşina. Əttafan-tu marwan-net daɣ ahan-nasan har iga karadat təlil.

²¹ Oyyan-t-in marwan-net ɣas fəl afay n Ənnil, tənay-tu tabarart ən Firɣawna, tədkal-tu təg-ay barar-net, təg-as əsədwəl wa za tagu i barar ən tədüst-net. ²² İtawasayaɣru Musa masnat kul ta n Kəl-Masar, iqqal aləs ilân tənna daɣ awa igannu d awa itaggu.

²³ As iga əkkozat tēmərwen n awatay əd tēhəwt, iggaz-t-id a din-asu imədrayan-net Kəl-Israyil inəy awa dər t-əllan. ²⁴ Inay iyyan daχ-san tawagginat-as taršəxšad, oχ-as šinaxən, iga iman n aw Masar wa das-itaggin ark aratan.

²⁵ Iχil ad agrin mədrayan-net Kəl-Israyil as Məššina a t-id-izammazalan sər-san fəl a tan-assafsu, mišan wər əgren awen. ²⁶ Əzəl wa ilkaman i wen, osa-du əššin daχ-san əknâsan. Igmay d a tan-aknu, nəməggin alxer, inn-asan: "Meddan, kawanay əmosnen imədrayan, mafel as tətınəmənχim?"

²⁷ Mišan ibdaq-q-in aləs wa itaggin taršəxšad y əmidi-net, inn-as: "*Ma kay-igan əmuzar-nana wala əmašray-nana?*" ²⁸ *Əngəm a tareχ a di-taga tenaxay ta təgeχ y aw Masar wa n əndazəl?"*

²⁹ Isla Musa i batu ten χas, təggaz-tu tasa, igmad Masar ilχas daχ akal wa n Midəyan, iqqal daχ-as əχərrib, izlaf daχ-as igraw əššin bararan. ³⁰ As əganat əkkozat tēmərwen n awatay dəffər awen, "*inafalal-as-du angalos daχ təfsəq təbilaglagat daχ taneray χur ədχax*" wa n Sinay.

³¹ Isammaklal əs Musa arat wa das-d-inafalal den. Itihaz-in za tafsəq fəl ad annaflay daχ awen, as isla y əməsli n Əməli Məššina as das-inna: ³² "*Nak a imosan Məššina ən marawan-nak, Əməli n Ibrahim, d Isəhaq əd Yaqub.*" Təndaw taysəst Musa ab'as ihal ad iləs asawad daχ təfsəq en. ³³ *Inn-as dex Əməli: "Əkkəs iχateman-nak, fəlas edag wa daχ təbdadaχ əddi amađal zəddigan a imos.*" ³⁴ *Əχχəyyanay alχazab wa tətəggu tamattay-nin daχ Masar, əsləχ dex i hərərrəkitan-nasan. Əzzəbbe-du fəl a tan-assafsa. Əmərədda ihaz-du, a kay-zəmmizəla əs Masar."* ³⁵ Musa wen da, a ənkuran əs tənna ta das-əgan: "*Ma kay-igan əmuzar-nana wala əmašray-nana?*" Ənta en da za, a d-izammazal Məššina y ad izar i Kəl-Israyil, isəddərfət-tan, əs tarna n angalos wa das-d-inafalalan daχ təfsəq. ³⁶ Ənta en da, a tan-d-ikkasan daχ Masar s aratan simaklalnen win itaggu əd təlməχjujaten əmosnen alχalamaten ən tarna ən Məššina. Iga aratan wiyyad simaklalnen əd təlməχjujaten əmosnen alχalamaten χur aradaχ wa əgan daχ Agaraw was itawannu wa Zaggaxan, igla itaggu awen da daχ taneray har iga əkkozat tēmərwen n awatay. ³⁷ Musa en da, a innan i Kəl-Israyil: "*Ilkâm a sər-wan d-izəmmizəl Məššina ənnəbi iyyan ən šilat-in, a kawan-du-z-igmədan.*" ³⁸ As təddew tamattay n Israyil daχ taneray ən Sinay, ənta en da a ibdadən gər marawan-nana win den d angalos wa das-iššewalan fəl ədχax wa n Sinay, təzzar ikf-ay Məššina awalan hakkinen tēməddurt y a dana-tan-iməl. ³⁹ Mišan ugayan marawan-nana s ad əlkəman y awa inna Musa, ugayan sər-əs, saddaranan ad əqqəlan Masar. ⁴⁰ Ənnan i Harun: "*Ag-ana imalan a z'əmələn dat-na, fəlas Musa wa dana-d-ikkasan daχ akal ən Masar da, wər nəssen awa daχ-as in-igan.*" ⁴¹ Adan en da a daχ əgan əssənəm igân tēməwit a n abarkaw, əkatan fall-as. Isidawat-tan wəllen arat wa əgan əs fassan-nasan.

⁴² Təzzar inamaggag dər-san Məššina, oyy-en əd man-nasan, əχbadan təfuk əd təllit d etran, imos awen arat ənnân Əlkəttaban, as ənnan: "*Ya Kəl-Israyil, awak nak as tətəggim šizəgzam əd təkutawen daχ əkkozat tēmərwen n awatay šin təgam daχ teneray?*" ⁴³ *Wərgəχ ahaket n əssənəm wa igan Molox a tewayam, əd šaššəlan n ətri wa igan Rəmfan wa n əssənəm-nawan, əmosnen əssənəman win təgam*" fəl a tan-təχbədam! "*Adi fəl kawan-z-əstəya har takəyam*" Babəylon. ⁴⁴ Amaran imarawan-nana win d-ikkas Məššina daχ Masar əggazan teneray, əlân əhaket wa n əmənəy əd Məššina, was omar Məššina Musa s ad t-agu s əmmək wa t-issəkna. ⁴⁵ Ahaket en, iggaz-du əs marawan-nana win dəffər win den, azzaman win daχ dasan-azzar Joswe, ewayan-tu s akal wa əbazan, s ənta a daχ istax Məššina tawšeten dat-san. Iggaz ahaket wen akal en da har azzaman n ənnəbi Dawəd. ⁴⁶ Ənnəbi Dawəd igrâw arraxmat χur Məššina. Ənta a igmayan daχ Məššina turagat n ad ikrəs ehan y Əməli ən Yaqub.

⁴⁷ Mišan ənnəbi Suliman a igrawan turagat ten, ikras ehan y Əməli Məşşina. ⁴⁸ Dər iga awen da ya, Məşşina di n Amadkol wər ixser daɣ a əkrasan fassan n aytedan. Adi a inna ənnəbi Isayas as inna: ⁴⁹ Inna Əməli Məşşina: "İjənnawan a əmosnen təxawit-in ta n taɣmar, amaɗal wər imos ar arat illan daw daran-in. Day adi ma imos əzzənəf n ahan wa di-za-təkrəsam? Madəɣ edag wa daɣ z'assanfa? ⁵⁰ Wərgəɣ əfus-in a d-ixlakan adi kul?"» ⁵¹ Harwa inn-asan Əstefanos: «Ya meddan win əqqəssatnen, təxfâlam iwallas-nawan, tədbâɣam šiməzzugen-nawan wər təzlayam d aytedan wər nəksud Məşşina, faw tugâyam s Infas wa Zəddigan. Adi da a əgan marawan-nawan. ⁵² Məni daɣ ənnəbitan wa wər zaɣɣazzaban marawan-nawan? Əgan iman ən nəmmuzal ən Məşşina win əmalnen dat alwaq assa ən Wa Oɣadan, as kawanay əmərədda a t-ikkəddalan təgam iman-net. ⁵³ Kawanay win d-issoka Məşşina angalosən ewâynen əlqanun-net, mišan tugayam s a das-təlkəmam.»

Tamattant n Əstefanos

⁵⁴ As əslan i batu ten, iggaz-tan alham labasan, ad samadadan fəl alham n Əstefanos.

⁵⁵ Mišan ənta idkâran Infas wa Zəddigan, idkal asawad-net sa sər jənnawan, inay tanaya ən Məşşina, inay deɣ Ƴaysa ibdâd daɣ əxil ən Məşşina. ⁵⁶ Təzzar inn-asan: «Ənəyat, ijənnawan ənnolaman! Hannayaɣ Ag Aggadəm ibdâd daɣ əxil ən Məşşina.»

⁵⁷ Əslan y awen ɣas, ad zayyakan ədbâɣan šiməzzugen-nasan, əggadan-in ketnasan s Əstefanos, əbazan-tu. ⁵⁸ Əkkasan-tu daɣ əɣrəm, ad t-əggaran əs təhun. Amaran meddan win fall-as əgəyyatnen, aləs n ammas igân esəm Talut a ɣur əssənsən ibərnaz-nasan. ⁵⁹ Əggâran Əstefanos əs təhun as ittar inna: «Ya Əməli Ƴaysa, əqbəl iman-in!»

⁶⁰ Dəffər awen, igaraffat, idkal əməsli-net s afalla, inna: «Ya Əməli, a tan-wər-təssəwaray abakkad wa!» As inna awen, əgmadan-tu man.

8

¹ Amaran Talut ənta, iha win ərdənən s ətəwəɣa n Əstefanos.

Təttəyt n Əlkənisat - Šiggəyyawen daɣ Yahudəyya əd Samarəya

Ətəwədgaz d əwəziwəz ən məzzəgzan əs Ƴaysa

Əzəl wen da ad tənta təssust labasat fəl Əlkənisat ta təhat Yerusalam; təzzar wazawazan əlməsixitan ketnasan daɣ kallas win Yahudəyya əd Samarəya. Wər d-iqqim daɣ Yerusalam ar inəmmuzal. ² Osan-du meddan ən miksadan ən Məşşina, ənbalan-in Əstefanos. Əyyəwanan fall-as tala.

³ Talut ənta, issənta daɣ əhluk n Əlkənisat. Irzag inan, ilabbay-du daɣ-san meddan əd tədoden, iggar-tan daɣ kasaw.

Emel ən Filibus isalan win Əlinjil daɣ Samarəya

⁴ Amaran iməzzəgzan əs Ƴaysa win təwazawaznen den, ərzagan akal ketnet əmmâlan y aytedan isalan win əhanen Əlinjil.

⁵ Awen da a d-ewayan Filibus s əɣrəm iyyan n akal ən Samarəya a daɣ-as immâl y aytedan isalan n Əlməsix. ⁶ As təsla aljamayət tagget tənimmannakat y awal ən Filibus, tənay deɣ təlməxujaten šin itaggu əmosnen alɣalamaten ən tarna ta igraw, təssoɣal-in ənnəyat-net aratan win igannu. ⁷ Fəlas aytedan aggotnen a əgmadan kələsuf. As tan-du-gammadan, takkasan imaslan labasnen. Tawazozayan deɣ nəbdan əd məggudal aggotnen. ⁸ Eway-du awen tədəwit agget daɣ əɣrəm en.

⁹ Amaran əɣrəm en, ih-ay aləs iyyan n amassaxar igân esəm Simɣon itaggin išaxawan simaklallen s aytedan ən Samarəya. Igannu ənta awedan zəwwəran a

imos. ¹⁰ Aytedan kul sasaman-as s əlluḡ, gər za win wər nəla almaqam, wala win t-əlanen, gannin: «Aləs wa, tarna n Əməli tas itawannu ta togarat a imos.» ¹¹ Aytedan win sasaman-as s əlluḡ, fəlas irəw itagg-asan išaxawan sər-san simaklalten.

¹² Mišan as əzzəgzanan i Filibus a dasan-immâlan isalan ən taḡmar ta n Məşşina əd tarna n esəm ən Ƴaysa Əlməsix, tawasalmaḡan daḡ aman, meddan harkid tədoden. ¹³ İzzəgzan Simḡon ənta da, itawasalmaḡ daḡ aman; iltay daḡ Filibus. Əqqânnat alḡalamaten ən tarna əd təlməxjujaten zawwarnen šin itaggu Filibus eḡaf-net.

¹⁴ As əslan nəmmuzal daḡ Yerusalam as Kəl-Samarəya əqbalan awal ən Məşşina, zammazalan sər-san Butros əd Yaxya. ¹⁵ As tan-in-osan, əttaran-asan a fall-asan d-izazzabben Infas wa Zəddigan, ¹⁶ fəlas harwa da wər tan-iha i fəl d-izzibbat, ətəwəsəlməḡ ḡas a tawaggan daḡ aman s esəm n Əməli Ƴaysa. ¹⁷ Təzzar a tan-isawar Butros əd Yaxya ifassan-nasan, garrawan Infas wa Zəddigan. ¹⁸ As inay Simḡon as, Infas wa Zəddigan əsəwər ən fassan ən nəmmuzal as itawagraw, igmay daḡ-san a tan-akfu azrəf, inn-asan: ¹⁹ «Akfiwat-i nak da tarna tədi, tas i əssəwara ifassan-in ad igrəw Infas wa Zəddigan.» ²⁰ Inn-as Butros: «Təhləkəḡet kay d əzrəf-nak, zama təḡila təfrəḡay a tazzanza təhəkkut ən Məşşina. ²¹ Batu ta, wərmad tat-təheḡ za wala təleḡ daḡ-as tanat fəlas əwəl-nak wər oḡed dat Məşşina. ²² Daḡ adi utab daḡ əşşur-nak, tansəya Məşşina a dak-issurəf ark ənnəyat ta təhat əwəl-nak, kud immikkan adi. ²³ Fəlas hannayay as, əwəl-nak wər idker ar tara n əddənət labasat d iba n aqqad.»

²⁴ Təzzar inn-asan Simḡon: «Ansəyat-i Əməli kawanay iman-nawan fəl a di-wər-abəz s awa tənnam.» ²⁵ Butros əd Yaxya win nəmmuzal, as əmalan y aytedan awa əḡḡəyyen fəl Ƴaysa Əlməsix, əməlan-asan deḡ awal n Əməli, əqqalan Yerusalam. Əmalan isalan n Əlinjil daḡ taḡarmaten aggotnen ən Samarəya šin əhanen tarrayt-nasan.

Filibus d aləs iyyan n Etəyofəya

²⁶ Dəffər awen išşewal angalos n Əməli i Filibus, inn-as: «Ənkər tawəya əd tarrayt təkkât agala ta təḡmadat Yerusalam təras təkka Gaza.» Tarrayt ten, təssuf. ²⁷ Inkar Filibus, igla. Ijiwankat daḡ tarrayt as immənay d aləs n ənazum n akal n Etəyofəya imosan awedan zəwwəran daḡ taḡmar ən Kandas ta n təmənokalt n Etəyofəya s ənta a innəttafan d ərrəzəḡ kul wa n təmənokalt en. Osâ-du Yerusalam fəl a daḡ-as iḡbəd Məşşina. ²⁸ İqqâl akal-net, iqqîm daḡ amalankay-net, iḡarru əlkəttab n ənnəbi İsayas.

²⁹ Inna Infas wa Zəddigan i Filibus: «İhaz-in amalankay en, təmmudəḡay i məşşis» ³⁰ Ozal-in sər-əs Filibus. Isl-as iḡarru əlkəttab n ənnəbi İsayas, inn-as: «Awak təḡreḡ almaḡna n awa təḡarra əddi?» ³¹ Inn-as aləs wen: «Manəmmək as tu-z-agra, wər t-illa awedan a di-t-iffəssaran?» Təzzar igmay daḡ Filibus a d-iwən, aqqam dəḡma-net. ³² Edag wa iḡarru daḡ əlkəttab en, ənta da awa inna: «İttilway zun tilay s adag n agazam, təfastit a itaggu əjaḡol y aytedan lazzinen təduft-net a iga, wər d-igmed əlxərəf imi-net. ³³ İtiwasaras, wər das-əgen əşşəriḡa wa dər ihor. Ma ifragan igi ən salan kul ən həyawan-net, id tətiwazaraz təḡrəst-net daḡ əddənət?»

³⁴ Təzzar issəstan aləs wa n Etəyofəya Filibus, inn-as: «Kay ak əməl-i, was iha ənnəbi šin-net da. Ənta iman-net meḡ awedan iyyan?» ³⁵ İbaz Filibus ḡur batu ten da, imal-as isalan n Əlinjil ən Ƴaysa.

³⁶ Əḡlân za, as d-osan edag əhân aman, təzzar inna aləs wa n Etəyofəya: «Aman da, ma di-z-igdəlan ad təwəsəlməḡ?» ³⁷ [Inn-as Filibus: «wər t-illa, kud təzzigzana s əwəl iyyanda.» Inn-as aləs wen: «Əzzigzanay as Ƴaysa Əlməsix Barar ən Məşşina a imos.»] ³⁸ Omar alwaḡ wen da s ad itəwəsəbdəd amalankay, əzzəbben ənta əd Filibus, əḡgazan aman, issəlməq-qu Filibus.

³⁹ Da da ɣas a d-əgmadan aman, ənta ad idkal Infas n Əməli Filibus, ab'as t-ihannay aləs wen, mišan igla daɣ tarrayt-net, ikna tədəwit. ⁴⁰ Filibus ənta, as din-igra iman-net iha aɣrəm n Azot. As t-igmad illil akal en itaggu daɣ ɣərman kul win əhanen tarrayt isalan n Əlinjil har osa aɣrəm ən Qaysarəya.

9

Talut ihdad-du

¹ As itaggu awen, Talut harwada isamahad fəl igi ən man ən nəttulab n Əməli ɣaysa. Ikka Əlimam wa Zəwwəran, ² igmay daɣ-as a das-əgu šira əs nan n əlɣibada ən Kəl-Əlyəhud win əɣrəm ən Damas əmosnen šira a t-əkfanen turagat s as, as igraw aytedan, gər za meddan wala šidoden, win əhanen tarrayt ta n ɣaysa, a tan-ikrəd ilwəy-tan-du əs Yerusalam. ³ Ikkâ za aɣrəm ən Damas, as t-in-ihoz, wər isla a igan as fall-as ibalazzat ənnur a d-igmâdan ijənnawan. ⁴ Ifataqqat, isla y əməsli wa das-innan: «Talut, Talut mafel as di-təzaɣazzaba?» ⁵ Inn-as Talut: «Ma təmosaɣ, Əməli?» Isla i wa das-innan: «Nak ɣaysa wa təzaɣazzaba. ⁶ Əbdəd əggəz aɣrəm a dak-attamal awas kay-iwar igi-net.»

⁷ Meddan win əddewnen əd Talut əbdâdan, təgdal-asan tərəmməq awal, sallan y əməsli mišan wər hənnəyan awedan waliyyan.

⁸ Ibdad-du Talut, ora šittawen-net, mišan indar-as anay ən wala. Kundaba as əbazan midawan-net əfus-net, əlwayan-tu har dər-əs əggazan Damas. ⁹ Har iga karad adan wər ihənnəy arat, wər itša za wər işwa.

¹⁰ Amaran Damas ih-êt ənalkim ən ɣaysa igân esəm Ananəyâs. Iɣr-ay Əməli daɣ tərğət inn-as: «Ananəyâs!» Ikkəwan-as inn-as: «Nak da, Əməli!» ¹¹ Inn-as Əməli: «Ənkər, təssəwəla əd tarrayt tas itawannu "ta toɣadat", takkaɣ ehan ən Yahuza, təssəstənəɣ d aləs n əɣrəm ən Tarsa igân esəm Talut, id itansay-i daɣ alwaq wa da. ¹² Amaran inay [daɣ tərğət] aləs igân esəm Ananəyâs as t-id-osa, issəwar-tu ifassan-net fəl a t-id-iqqal asawad-net.»

¹³ Təzzar inn-as Ananəyâs: «Ya Əməli, aytedan aggotnen əgân-i isalan n aləs di, əd talbast tagget ta issəkna imizdagan-nak win əhanen Yerusalam. ¹⁴ Da da ila turagat n abbaz n aytedan kul win tattarnen s esəm-nak, amaran imuzaran ən limaman a t-əkfanen turagat ten.» ¹⁵ Mišan inn-as Əməli: «Aglu, aləs di nak a t-isannafran fəl a di-iməl y aytedan wər nəmos Kəl-Əlyəhud əd mənokalan-nasan, iməl-i deɣ i Kəl-İsrayil. ¹⁶ Nak iman-in as das-z-agaɣ əzəɣɣəzzəb kul wa t-iwaran fəl əddəlil-in.»

¹⁷ Təzzar igla Ananəyâs har din-osa ehan, iggaz-tu, inay Talut, issəwar-tu ifassan-net, inn-as: «Amadrəy-nin Talut, Əməli ɣaysa wa dak-inafalalan daɣ tarrayt ta du-təgeɣ, ənta a di-d-izammazalan fəl a kay-d-iqqəl asawad-nak, idnəy-kay İnfas wa Zəddigan.» ¹⁸ Tamazayt ten da a daɣ d-ərtakan aratan olanen əd təfərənkawen daɣ šittawen ən Talut, təzzar iqqal-t-id asawad-net. Ibdad, itawasalmaɣ daɣ aman. ¹⁹ Dəffər awen itša, əqqalnat-t-idu təɣurad-net.

Tewaxlay ta iga Talut təgəyya ən ɣaysa Əlməsix

Talut iha Damas

Iga arat n adan ɣur nalkiman ən ɣaysa win əhanen Damas. ²⁰ Tarmâd as ikka Talut inan n əlɣibada win Kəl-Əlyəhud a daɣ-san immâl as ɣaysa Barar ən Məşşina a imos. ²¹ Isammaklâl awen s aytedan ad gannin: «Ak wərgəɣ ənta, as kala ibbənbay daɣ aytedan win tattarnen s esəm ən ɣaysa daɣ Yerusalam ihallak-kan? Wərgəɣ wər t-id-eway s əɣrəm wa, ar a tan-abəz, ilwəy-tan əs muzaran ən limaman?» ²² Mišan Talut ənta itisuhit əzəzgzan-net. Wər əssenən Kəl-Əlyəhud win Damas a das-ənnan daɣ əsəkni wa tan-itaggu as ɣaysa ənta a imosan Əlməsix.

²³ As irəw Talut daɣ Damas, namaggan Kəl-Əlyəhud eɣaf fəl ad agin iman-net, ²⁴ mišan ittəmal-as awen. Ewadan daɣ tara ən tənaxay-net as das-ənkadan ehad ezal ɣur mawan n əɣrəm. ²⁵ As ahad iyyan, ənkaran nəttulab-net əgan-tu daɣ əzmam zəwwəran, ərdafan daɣ-as ayan, zazzabben-tu fəl aganna wa hadan n aɣalla wa iɣlayan aɣrəm.

Talut iha Yerusalam

²⁶ As osa Talut Yerusalam, igmay d ad irtəy əd nalkiman ən ɣaysa, mišan əwafan-tu ketnasan fəlas harwa da wər əzzəgzanan as iyyan daɣ-san a imos.

²⁷ Ibaz-t-idu Barnabas əs man-net, iddew dər-əs əs nəmmuzal, təzzar ig-asan isalan kul n əmmək was inay Talut Əməli ɣaysa daɣ tarrayt ən Damas d awal wa das-iga, imal-asan deɣ igi wa iga isalan n Əməli ɣaysa daɣ Damas wər t-illa i as tu-təha tasa-net. ²⁸ Alwaq wədi a dər-san irtay, itidaw dər-san daɣ Yerusalam. Itaggu isalan n Əməli ɣaysa ši wala tasa ən waliyyan. ²⁹ Itiməšiwil Talut əd Kəl-Əlyəhud win əššewalnen təlyunant, itamazax deɣ dər-san; ad gammayan d igi ən man-net. ³⁰ As əslan mədrayan-net daɣ əzəgzan awen, əddewan dər-əs wiyyad daɣ-san s əɣrəm ən Qaysarəya, amaran əssokan-tu wa n Tarsa.

Tagadezt ta n Butros iməzzəgzan win Yahudəyya

³¹ Azzaman en, əgrāwan daɣ-san nalkiman ən ɣaysa d Əlkənisaten alxer daɣ akal kul wa n Yahudəyya əd wa n Galilaya əd wa n Samarəya. Itasahat əzəgzan n Əlkənisaten, tagginat imazalan əssiymarnen Əməli, tittəynat deɣ əs tilalt n Infas wa Zəddigan.

Təmməzzəyət n Enəyas

³² Illil za Butros akal ketnet har iras təɣrəmt ta n Ludda fəl ad inəy imizdagan win daɣ-as əxsarnen. ³³ Inay daɣ-as aləs igān esəm Enəyas, igān əttam elan əd bəddən, wər kala igmad təssut-net. ³⁴ Inn-as Butros: «Enəyas, əbdəd tada təssut-nak, ɣaysa Əlməsix izzozay-kay.» Ibdad Enəyas tamazayt ten da.

³⁵ Ənayan-tu aytedan kul win təɣrəmt ən Ludda əd win azawaɣ wa n Šaron, təzzar əhdan-du s Əməli.

Ətəwəsənkər ən Tabita daɣ tamattant

³⁶ As itaggu awen aɣrəm ən Yaffa təxsâr daɣ-as tənalkimt ən ɣaysa təgât esəm Tabita, almaɣna n esəm wa daɣ təlyunant Dorkas, almaɣna «Tenert». Wər təgmed ar s igi ən mazalan olaynen əd təkutawen i maddararan. ³⁷ Adan en da a daɣ tərın, aba-tat. Tətawašarad, tətawasansa daɣ ahan wa n afalla ən suru. ³⁸ Dad imos as Ludda wər təggug Yaffa, as əslan nalkiman ən ɣaysa win əhanen Yaffa as Butros iha Ludda, zammazalan sər-əs əššin meddan fəl ad t-ansəyan a tan-d-akku tarmâd. ³⁹ Inkar Butros iddew dər-san. As din-osa, ewayan-tu əs suru wa təha təɣəssa ən təntut, əkkanat-idu tədoden šin as wər ədderan meddan-nasnat hallinat, sakninat-tu šikadkaden əd səlsa wiyyad a dasnat-təga Dorkas harwa təddâr.

⁴⁰ Issərdax Butros awedan kul, igaraffat ad itattar. As issənda təwatray-net, imalallay-du təɣəssa ən təntut ta aba, inna: «Tabita, ənker-du», təzzar tora šittawen-net, tənay Butros, təqqim-du. ⁴¹ Izzal-as-in əfus-net, illil-as əs tebadday, amaran iɣra-du imizdagan əd tədoden šin as wər ədderan meddan-nasnat, issəkn-asan-tat təddâr. ⁴² Itawasla awen daɣ əɣrəm ən Yaffa ketnet, təzzar əzzəgzanan aytedan aggotnen s Əməli. ⁴³ Iha Butros Yaffa har irəw, illa ɣur aləs iyyan igān esəm Simɣon as imos əššəxəl-net əšifəl ən gəškan.

**Əlkənisat əd təgəyya dat aytedan wər nəmos
Kəl-Əlyəhud**

10

Butros əd Korniləyas

¹ Ayrəm ən Qaysarəya ih-ay aləs iyyan ən Kəl-Ərrum igân esəm Korniləyas, imos iyyan daɣ kabtanatan win azzarnen y agan ən sojitan was itawannu «Italəya». ² Imos aləs iksudan Məşşina, ixbâd-tu ənta d aytedan n ahan-net ketnasan, itaggu šikutawen aggotnen i Kəl-Əlyəhud, faw deɣ itattar əs Məşşina. ³ As əzəl iyyan ɣur amaɖal ən karad alwaqan win tazzar, inafalal-as-du angalos ən Məşşina, inay-tu as d-iggaz ehan-net, inn-as: «Korniləyas!» ⁴ Irmaɣ Korniləyas, igar šittawen daɣ angalos, inn-as: «Ya Məşşi, ma tareɣ?» Inn-as angalos: «Šiwatriwen-nak əd təkutawen-nak əggəzzaynat əs Məşşina, iqbâl-tanat. ⁵ Daɣ adi əmərədda, zəmmizəl meddan s əyrəm ən Yaffa a dak-d-idawan d aləs iyyan igân esəm Simɣon as itawannu Butros, ⁶ inniftaxan i Simɣon wa išafalan igəşkan s ehan-net ihâ tagadamayt n agaraw.» ⁷ Ifal-tu angalos wa das-işşewalan ɣas, iɣra-du imaşşaxalan-net əşşin d iyyan daɣ sojitan win išaşɣal imosan awedan iksudan Məşşina, ⁸ issoɣal-asan awa igan kul, amaran izammazal-tan əs Yaffa.

⁹ Əhōzan-in ayrəm əzəl wa hadan, as iwar Butros afalla ən tayazamt attayan n ammas n azal fəl ad agu šiwatriwen. ¹⁰ Itattar den da as t-iggaz gələk, isaddaran a itša. Tawaggin-as-du mensewan as tu-tobaz tarna n Infas wa Zəddigan. ¹¹ Ogga ijənnawan as əmmoran, itawasaras-du daɣ-san arat olân d əfər zəwwəran itiwattafan s əkkozat təsəlkad-net, har dat-əs imal. ¹² Əhân-tu əzzənəfan ən mudaran kul win jawankatnen fəl amaɖal əd dəmərdəmaran əd gəɖad. ¹³ Təzzar isla y əməsli iyyan as das-inna: «Butros, ənkər, təgzəma, tatša!» ¹⁴ Mişan inn-as Butros: «Kala kala Əməli, id wər kala ad ətşəɣ a xaraman wala a immidasan.» ¹⁵ İlas tesalay y əməsli en as inna: «Awa issəxlal Məşşina, wərgəɣ kay a tu-z-agin i xaraman!» ¹⁶ Har iga əməsli en y awen karadat tənnawen, amaran immədkal əfər en əs jənnawan.

¹⁷ Harwada iqqân awen eɣaf ən Butros, isamadran daɣ awa z'iqqəl almaɣna-net n awa das-d-inafalalan den, as d-əbdadan meddan win d-izammazal Korniləyas daɣ əmi n ahan ən Simɣon, dəffər as əssistanan əd dad illa. ¹⁸ Əɣran-du məssawəs n ahan, əssəstanan-tan kud den da ad izzəbbat Simɣon was itawannu Butros. ¹⁹ Harwada isamadran Butros daɣ awa z'iqqəl almaɣna n arat wa das-d-inafalalan as [das]-inna Infas wa Zəddigan: «Ənəy! Meddan den karad a dər-ək sastannen. ²⁰ Ad wər təzləyax aytedan, əbdəd, tazzabbəɣ, tidawa dər-san; id nak a tan-d-izammazalan.» ²¹ Təzzar izzəbbat-du sər-san Butros inn-asan: «Nak da as təsəggadam. Ma imos əddəlil wa kawan-d-ewayan da?» ²² Ənnan-as: «Korniləyas wa n kabtan ən Kəl-Ərrum a dana-d-izammazalan, imosan aləs oɣâdan, n əmiksad ən Məşşina, əssiɣmaran-tu Kəl-Əlyəhud ketnasan. Ənta as inafalal angalos zəddigan ən Məşşina omar-tu s a kay-issəgməy, tasaɣ-in ehan-net fəl ad aslu y awa za tanna.» ²³ Amaran izzogaz-tan-du Butros, isammagarat-tan. As affaw, iddew dər-san. Eddewan dər-əs arat daɣ nalkiman ən ɣaysa win n əyrəm ən Yaffa.

²⁴ As əzəl wa hadan ewadan ayrəm wa n Qaysarəya. As din-osan da, iqqâl-asan Korniləyas ənta əd marwan-net d aytedan win dər ikna təmmidwa s ənta a tan-d-iɣran. ²⁵ As zama din-iggâz Butros ehan, issəlkad-as-du Korniləyas, igaraffat ɣur daran-net, issəjad-as. ²⁶ Mişan issəbdad-tu Butros, inn-as: «Əbdəd! Nak əggadəm ɣas a əmosa.» ²⁷ Əggazan ehan mişawalan, os-in daɣ-as Butros aljamaxat tagget. ²⁸ Təzzar inn-asan: «Təssânam kawanay iman-nawan as issixram əlqanun ən Kəl-Əlyəhud y iyyan daɣ-san tassaɣ madeɣ iguz n ahan n awedan wər nəmos iyyan daɣ Kəl-Əlyəhud. Mişan nak issosan-i Məşşina daɣ as ad wər agaɣ y awedan waliyyan

iduf n as i xaraman wala immidas. ²⁹ Adi da fəlas, as di-təssəgməyam, əkkeq-qawan-du əddi da wər əgex asarəw waliyyan. Amaran əmərədda əməlat-i əddəlil wa fəl di-təssəgməyam.»

³⁰ Inn-as Korniləyas: «Əzəl iyyan tattara dəx ahan-in, ila adi əmərədda karad adan, wər əsley a igan as dat-i ibdad aləs ilsân isəlsa bilazlaznen. ³¹ Təzzar inn-i: "Korniləyas! Təwatray-nak təqbâl, şikutawen-nak dəx iqbâl-tanat Məşşina. ³² Dəx adi, zəmmizəl əs Yaffa, təssəgməya Simxon was itawannu Butros. Inniftax y aləs igân Simxon wa işafalan igəşkan ihân tagadamayt n agaraw." ³³ Təzzar əssəgməyaq-qay tamazayt tēdi da, olāx dəx as du-tosex. Amaran əmərədda ketnana nəlla da dat Məşşina, fəl ad nəssəsəm y arat kul was kay-omar Əməli s a danaq-qu-tanna.»

Talxutbat ən Butros dəx ahan ən Korniləyas

³⁴ İşşewal Butros inna: «Əmərədda əgex as, tidət dəx a imos as Məşşina wər izlay aytedan. ³⁵ Kalar awedan kul wa t-iksudan, itaggu awa oşadan, awedan wədi, ad t-iqbəl Məşşina, a təqqal tawşet-net. ³⁶ Issoka-du Kəl-İsrayil awal-net imosan isalan n Əlinjil, əmmâlnen isalan n alxer wa ihakku Ƴaysa Əlməsix, ənta wa n Əməli n awedan kul. ³⁷ Təssânam dəx awa igan dəx akal kul ən Yahudəyya, intâ-du adi dəx wa n Galilaya dəffər təlxtutbat ta iga Yaxya y aytedan dəx batu n alamaş dəx aman; ³⁸ d əmmək was issəkna Məşşina aytedan as Ƴaysa wa n Nazaret a issannafran əs tahakkay ta t-iga Infas wa Zəddigan əd tarna. Təssânam dəx dəx tilalt ta iga akal itamazal əlluş, izuzəy aytedan kul win dəx innoda İblis, id tarna ən Məşşina a igraw.

³⁹ Nakkanay inəmmuzal nəggəyat awa iga ketnet dəx əxrəm wa n Yerusalam d akal sa hadan wa n Kəl-Əlyəhud. Ənta wa itawataytayan fəl təgəttawt, aba-tu; ⁴⁰ issənkart-ıdu Məşşina əzəl wa n karad dəffər iba-net, ikf-ay turagat n ad itəwənəy iddâr. ⁴¹ Wərgex aytedan kul a t-ənaynen, kalar wər t-inay ar şigəyyawen şin isannafran Məşşina harwa dat alwaq, a tanat-imosan nakkanay win dər-əs ədrawnen tettay əd tassay dəffər tanakra ta d-iga dəx tamattant. ⁴² Təzzar omar-ana Ƴaysa s ad nəməl Əlinjil y aytedan, naggayyat-asan as, ənta da, a isannafran Məşşina ig-ay əmaşray n id t-illa awedan, gər za win əddarnen wala win aba. ⁴³ Ənta en da as əggəyyen ənnəbitan kul as, i sər-əs izzəgzanan ad igrəw təsüref tən bakkadan-net s esəm-net.»

Agaraw wa əgan aytedan wər nəmos Kəl-Əlyəhud Infas wa Zəddigan

⁴⁴ Harwada işşewal Butros as d-izzəbbat Infas wa Zəddigan fəl aljamaşat ketnet ta təssəsamat i təlxtutbat-net. ⁴⁵ İkna awen əsəmməkləl əs nalkiman ən Ƴaysa win Kəl-Əlyəhud win d-əddewnen əd Butros, âs, wala aytedan win wər nəmos Kəl-Əlyəhud da garrawan s igət təkəkut ta n Infas wa Zəddigan. ⁴⁶ Fəlas sallan-asan əşşewalan awalan wər nətawazday, əmmâlan adkul ən Məşşina. Təzzar inna Butros: ⁴⁷ «Awak ma z'igdəlan y aytedan əgânen y Infas wa Zəddigan agaraw wa das-nəga ad təwəsəlməşan dəx aman?» ⁴⁸ Amaran omar s ad təwəsəlməşan dəx aman s esəm ən Ƴaysa Əlməsix. Dəffər awen əgməyan dəx Butros a şur-san agu adan.

11

İsalan win iga Butros dat nalkiman ən Ƴaysa win Yerusalam

¹ İslan nəmmuzal əd mədrayan dəx əzəgzan win əhanen akal wa n Yahudəyya as, əllân-tu aytedan wər nəmos Kəl-Əlyəhud əzzigzannen əntanay da s awal ən Məşşina.

² Alwaq wad iggəzzay Butros əs Yerusalam, əşşewalan fall-as inalkiman ən Ƴaysa win Kəl-Əlyəhud win əttafnen alşadat-nasan ta n əmənkəd. ³ Ənnan-as: «Mənəmmək as tətəggaza ehan n aytedan wər nəmmənkəd, wala tədarraw dər-san imensewan.»

⁴ Təzzar işsoşal-asan Butros awa igan kul, wa n ənətti, inn-asan: ⁵ «Tattara dəx əxrəm ən Yaffa as di-tobaz tarna n Infas wa Zəddigan, inafalal-i arat iyyan. Arat wa,

itawasaras-du daɣ jənnawan, olâ d əfər zəwwəran itiwattafan s əkkozat təsəlkad-net, har dat-i d-imal. ⁶ Əswada daɣ-as, zaggazdaq-qu, ənayax daɣ-as eharay, əd təwaqqast əd dəmərdəmaran əd gədad. ⁷ Təzzar əsleɣ y əməsli wa di-innan: "Butros, ənkər, təgzəma, tatša!" ⁸ Mišan ənnəɣ-as: "Kala kala Əməli, id imi-nin wər kala t-iggaz arat xaraman wala iyyan immidasan." ⁹ Əlasa tesalay y əməsli en as inna daɣ jənnawan: "Awa issəxlal Məššina, wərgəɣ kay a tu-z-agin i xaraman!" ¹⁰ Har iga əməsli en y awen karadat tənnawen, amaran itawarkab-in awen ketnet əs jənnawan.

¹¹ Tamazayt ten da a d-əbdadan karad meddan s ahan wa daɣ əssəgana, sər-i d-əmmozaalnen daɣ əxrəm ən Qaysarəya. ¹² Təzzar inn-i Infas wa Zəddigan a dər-san idawa əddi da. Ad wər əzləyax aytedan. Əddewa deɣ əd mədrayan-nana sədis win, har nəggaz ehan n aləs wa di-d-issəgməyan. ¹³ Isoɣal-ana əmmək was das-inafalal angalos daɣ ahan-net, ibdad dat-əs inn-as: "Zəmmizəl awedan s əxrəm ən Yaffa y a dak-d-idaw əd Simɣon was itawannu Butros. ¹⁴ A dak-agu amagrad a sər-ək du-z-awəyan efsan kay d aɣaywan-nak ketnet." ¹⁵ Harwada wər əhoga əššewala as fall-asan d-iga Infas wa Zəddigan əzəbbi wa fall-ana d-iga nakkanay daɣ tizarat. ¹⁶ Təzzar əkteɣ-du tənna ta iga Əməli: "Yaxya, aman a daɣ issəlməɣ aytedan, mišan kawanay, Infas wa Zəddigan a daɣ za tətəwəsəlməɣam." ¹⁷ Daɣ adi, dad zamas ig-asan Məššina təhəkkut zun ta danaɣ-iga as nəzzəgzan s Əməli Ƴaysa Əlməsix, ma əmosa nak as gaddala i Məššina igi n awa ira?" ¹⁸ As təsla aljaməɣat i salan win, təffəsta, təzzar ad təmmal Məššina təgannu: «Daɣ adi aytedan win wər nəmos Kəl-Əlyəhud, da issəfrak-kan Məššina ad utaban, əgrəwan təməddurt ta təɣlalət.»

Ətəməl n Əlinjil i Kəl-Əlyəhud daɣ Antəyoxəya ta n Surəya

¹⁹ Inalkiman ən Ƴaysa win izawwazawaz alyazab wa d-izrayan ətəwənxə n Əstefanos, əqlan wiyyad har osan akal wa n Fenisəya, wiyyad osan akal imosan gərwətlan as itawannu Qibrus, wiyyad osan aɣrəm wa n Antəyoxəya. Əmmâlan awal ən Məššina, eges i Kəl-Əlyəhud ɣas. ²⁰ Dər iga awen da ya, wiyyad daɣ-san n akal wa n Qibrus əd wa n Qərwan, as din-osan aɣrəm wa n Antəyoxəya əššewalan y aytedan win wər nəmos Kəl-Əlyəhud win əššewalnen təlyunant, əmmâlan-asan isalan n Əlinjil n Əməli Ƴaysa. ²¹ Tədhal-tan tarna ən Məššina daɣ awa taggin, təzzar əzzəgzanan aytedan aggotnen əs Ƴaysa Əlməsix, ətuban, əlkaman y Əməli imosan əmənokal-nasan.

²² Isalan n awen ewadan-in Əlkənisat ta təhat Yerusalam, təzzar təzammazal Barnabas s əxrəm n Antəyoxəya. ²³ As din-osa inay arraxmat ən Məššina ta du-təzzəbbet den, iddəwat. Təzzar ig-asan ketnasan ənnəsixa imosan ad əlkəman y Əməli. ²⁴ Ənta iman-net Barnabas, aləs olâxan a imos, itkâran Infas wa Zəddigan, issohat deɣ əzəgzan-net. Əzzəgzanan aytedan wiyyad aggotnen s Əməli Ƴaysa. ²⁵ Amaran ikka Barnabas aɣrəm ən Tarsa, isaggad i Talut. ²⁶ As t-igraw, iddew-du dər-əs s Antəyoxəya. Əgan daɣ-as awatay iyrâdan osâxan əd nalkiman ən Ƴaysa win əhanen Əlkənisat ten, sasəɣrin aytedan aggotnen. Aɣrəm wen da n Antəyoxəya en a daɣ əssəntan aytedan teɣaray nalkiman ən Ƴaysa s esəm wa n «əlməsixitan».

²⁷ Adan en da a daɣ əgmadan ənnəbitan wiyyad Yerusalam, ərasan s əxrəm wa n Antəyoxəya. ²⁸ Ibdad iyyan daɣ-san igân esəm Agabus, imal dat alwaq əs tarna n Infas wa Zəddigan as, ilkâm ad agu laz labasan daɣ əddənət ketnet. Laz en da deɣ osa-du s əmmək was t-imal daɣ azzaman n əmənokal Klawdəyus Qaysara. ²⁹ Təzzar namardan nalkiman ən Ƴaysa win Antəyoxəya fəl tanat təmosat ad irəg akkiyyan daɣ-san awa ifrag səssiwəyan tadhəlt ta i mədrayan-nasan daɣ əzəgzan win əhanen akal ən Yahudəyya. ³⁰ Əgan awen da, əgan širgitan-nasan daɣ əfus ən Barnabas əd Talut y a tanat-awəyan i muzaran n Əlkənisat ta təhat Yahudəyya.

12

Tamattant ən Yaqub d iguz ən Butros kasaw

¹ Azzaman en da a day issənta əmənokəl Herod əzəxxəzzəb n arət day aytedan n Əlkənisat. ² Isassanxa əs takoba Yaqub wa n amadray ən Yaxya. ³ As inay as oggaman Kəl-Əlyəhud awen, isattarmas Butros. Itaggu awen adan n əmud wa day tattin aytedan şigəlwen šin wər iha xamira. ⁴ Isassag-ay day kasaw, issəwəq-qu i maraw sojitan əd sədis a tu-tinəməzrəynen s əkkoz əkkoz. Otās a das-işrəx dat awedan kul dəffər əmud wa n Akkay. ⁵ A iha Butros kasaw den, Əlkənisat ənta tədgâz wəllen tətansay-as Məşşina.

⁶ As ahad wad z'ifaw işrəx-as Herod, insâ Butros gər əşšin sojitan a t-əttâfnen s əşšin sassaran, əbdâdan deyx magazan wiyyad dat əmi ən kasaw. ⁷ Wala a ihogan inafalal-du angalos iyyan n Əməli, imalawlaw adag wa day insa Butros day ammas ən kasaw. Təzzar idas angalos tasaga ən Butros, issənkər-tu inn-as: «Əbdəd tarmâd!» Ərtakan sassaran win as əkradan fassan-net day tamazayt ten. ⁸ Harwa inn-as: «Əzləg isəlsa-nak, təsələx ixtəman-nak.» Iga Butros awen da. «Əmərədda əzləg əbərnuz-nak, təlkəməx-i-du.» ⁹ Igməd-du Butros ilkâm y angalos, wər issen as awa itaggu angalos den tidət a imos, iyil targət awen. ¹⁰ Okayan fəl magazan win azzarnen əd win əllanen dənneğ-san, amaran osan-du təsəhərt ən tətoli tətəwâdat sa sər əxrəm. Tənnolam dat-san šin man-net, ərdəyan. Əssəwəlan əd tarrayt iyyat, wala a ihogan ifal-tu angalos.

¹¹ Təzzar iggaz Butros annawalat n aɣaf-net, inna: «Əmərədda əkkasəx aşşak day-as, Əməli Məşşina a d-izammazalan angalos-net, ikkas-i-du day fassan n əmənokəl Herod əd talbast kul tas əran Kəl-Əlyəhud a di-təgrəw.» ¹² Amaran igra taɣara-net, ikka ehan ən Maryama ta n anna ən Yaxya was itawannu Markus. Əmminayan xur-əs aytedan aggotnen tansayan Məşşina. ¹³ Ikawkaw imi n aɣalla, təgla-du tamaşşaxalt təgât esəm Yoda y ad təssən awa imos awedan. ¹⁴ As tətday əməli ən Butros, awa təga day tədəwit, edag n a das-taləm, tozal tətqal ammas n ahan, təmal as Butros illa dat əmi n aɣalla. ¹⁵ Ənnan-as: «Kam, əmməskəl a təgey!» Mişan tətəzzayyar-asan day-as ənta day awen. Amaran ənnan-as: «Day adi angalos-net adi.» ¹⁶ A əgənnin awen, Butros ənta itakawkaw-asan imi n aɣalla. As olaman, ənəyan-tu, iga sər-san awen əsəmməkləl labasan. ¹⁷ Isaddagan-asan s əfus-net ad affastin, təzzar imal-asan təməwit kul tas t-id-ikkas Əməli Məşşina day kasaw. Inn-asan deyx: «Əmələt adi i Yaqub əd mədrayan-nana win hadatnen.» Amaran ifal-tan, ikka edag iyyan. ¹⁸ As affaw, təga tənajarwayat labasat day sojitan; akk iyyan isastan əmidi-net d awa iga Butros. ¹⁹ As t-id-aba y aytedan win as t-issəsəwad Herod, issəstan sojitan win t-ogaznen, amaran omar s ad tawanxin kərəz. Dəffər awen igmad Herod akal wa n Yahudəyya, izagaday ikka əxrəm ən Qaysarəya y a day-as agu tamert.

Iba ən Herod

²⁰ Awen as itaggu, Herod ih-ay alham labasan n aytedan n əxrəm wa n Tir əd wa n Sidon. Idhal-tan Blastus wa n əməşşəwwər ən Herod, namannakan zammazalan əs Herod almawakkilan-nasan, fəl a dər-əs aknin, fəlas akal-net a du-gammadan sudar-nasan. ²¹ As d-osa əzəl wa itawasanafranan, izlag Herod isəlsa-net win taɣmar təzzar iqqim fəl təxawit-net ta n taɣmar, amaran işşəwal i tamattay. ²² Ad saɣaren aytedan, gənnin: «Əməli wa in əməli iyyan, wərgəx in awedan!» ²³ Wala a ihogan iwət-tu angalos n Əməli fəlas igi a iga iman-net day adag ən Məşşina, wər iga y Əməli adkul wa dər ihor; təzzar ətşanat-tu təwəkkawen, aba-tu.

²⁴ Awal ən Məşşina ənta, igla itiwəzəwiz, tigtan aytedan win sər əzzəgzənnen.

²⁵ Amaran Barnabas əd Talut as əxradan əşşəxəl wa tan-d-ewayan s əxrəm ən Yerusalam, əqqalan s as d-əhan, əddəwan əd Yaxya was itawannu Markus.

Šigəyyawen day Asəya əd day akal ən Kəl-Əlyunan

13

Ətəwəsənnəfrən ən Barnabas əd Talut y ad əššikəlan

¹ Əlkənisat ta təhat aɣrəm n Antəyoxəya əhân-tat ənnəbitan əd məsəssəɣra əmosnen Barnabas əd Simɣon was itawannu "Akawel" əd Luqəyus wa n akal ən Qərwan əd Manahin wa inamadwalan d əmənokal Herod day ahan iyyanda amaran əd Talut. ² Əzəl iyyan ad əmminayan əɣbâdan Əməli əzuman dəɣ, inn-asan Infas wa Zəddigan: «Səwərat-i Barnabas əd Talut aganna fəl ad agin əššəɣəl was tan-d-əɣrəɣ.» ³ Əzuman əgan šiwatriwen təzzar, amaran əssəwəran Barnabas əd Talut ifassan-nasan əgan-asan šiwatriwen, dəffər adi əssəɣlan-tan.

⁴ Issoka Infas wa Zəddigan Barnabas əd Talut aɣrəm ən Salukəya. Əggazan day-as aɣlal n aman əkkan akal imosan gərwətlan as itawannu Qibrus. ⁵ As osan aɣrəm ən Salamin, ad əmmâlan awal ən Məššina day nan n əlyibada win Kəl-Əlyəhud. Iddew dər-san Yaxya was itawannu Markus. Illil-asan idhâl-tan.

Əmənəy d Eləymas wa n amaššəɣaw day Qibrus

⁶ Ərzagan Qibrus, sannaqqaban-tu har osan aɣrəm ən Bafus. Den da ad əmmənayan d aləs iyyan ən Kəl-Əlyəhud igân esəm Bar-Ÿaysa n amaššəɣaw, igannin ənta ənnəbi. ⁷ Amaran osâɣ əd Sarjəyus Buləs wa n ənaxkim n akal, imosan awedan ilân əgərri. Issəɣmay əmuzar wa Barnabas əd Talut fəlas ikna əsənnəhəl ən tara n ad aslu y awal ən Məššina. ⁸ Mišan inkar Eləymas wa n amaššəɣaw – awen da a imosan almaɣna n esəm-net day təlyunant – iqqal əllid-nasan, ad igamma y d ad igdəl y ənaxkim wen əzəɣzan. ⁹ Təzzar ijajjanɣal day-as Talut, as itawannu dəɣ Buləs, igrâwan s igət Infas wa Zəddigan, ¹⁰ inn-as: «Agg Aššaytan, azangaw n arat kul wa oɣadan. Wər t-illa əzzənəf ən təkərras a kay-wər-nəha, əməkkerrəs n ənallabus a təmosəɣ. Əmma y ad za tamməzzəyəɣ d agamay n əsəfrəɣ ən tarrayt toɣâdat n Əməli Məššina?»

¹¹ Əmərədda ənəy, a fall-ak assansu Əməli əfus-net, taddarɣala. Ad tagəɣ azzaman wər təlesəɣ anay n ənnur ən təfuk.» Taməzəyət ten da a fall-as əganat šiyyay, idalammat fall-as amaɣdal, təzzar ad iddâz, igamma y i t-ilwayan. ¹² As inay ənaxkim wen awa igan den, izzəɣzan. Isiməklal sər-əs əsəssəɣri was isla day batu n Əməli.

Təlxutbat ta iga Buləs day aɣrəm wa n Antəyoxəya wa n Bissidəya

¹³ Iggaz Buləs aɣlal n aman ənta əd midawan-net day Bafus, əkkan aɣrəm ən Bərgə ihân akal ən Banfiləya. Den da a dər-san imməzzəy Yaxya was itawannu Markus, iqqal Yerusalam. ¹⁴ Əntanəy amaran əɣmadan Bərgə, əkkan aɣrəm n Antəyoxəya wa n akal ən Bissidəya. As iga əzəl wa n təsanfawt, əggazan ehan n əlyibada ən Kəl-Əlyəhud, əqqiman. ¹⁵ As tawəɣran daggan day Əttəwret d Əlkəttaban win Ənnəbitan sa hadan, ənnan-asan-in muzaran n ahan n əlyibada wen: «Imədrayan-nana, kud təll-ay batu as za təsəssuhet əzəɣzan n aytedan, tagim-tat.» ¹⁶ İbdad Buləs, isaddagan-asan s əfus-net ad affastin, amaran inna: «Meddan win Kəl-İsrayil əd kawanay win miksadan ən Məššina, səsəmat-i!»

¹⁷ Məššina di n Əməli ən taməttay ta da n İsrayil a isannafranan imarawan-nana, təzzar issəɣat-tan day elan win day əmosan inaftəɣan day akal ən Masar, dəffər adi ikkas-tan-du day-as əs tarna n əfus-net. ¹⁸ İga edag n əkkozət təmərwən n awatay, šin əgan day taneray, izizaydar dər-san. ¹⁹ İkf-en as ərzan əssəyət tawšeten day akal ən Kanan, ikf-en akal-nasan, iggaz təkasit-nasan. ²⁰ Awen ketnet, edag n əkkozət təmad n awatay əd səmmosat təmərwən a day iga. Dəffər awen a dasan-izuzir əlqalitan taqqalan-asan imənokalan har azzaman n ənnəbi Saməwel.

²¹ Azzaman en da a daɣ əgmayan əmənokal, təzzar ikf-en Məşşina Talut ag Kiş wa n tawşet ta n Benyamin. Iga əkkozat təmərwen n awatay ixkâm fall-asan. ²² Dəffər adi ikkas-tu Məşşina da taymar, iga Dawəd daɣ adag-net s ənta a fəl inna Məşşina: "Əgrawa Dawəd ag Yasay, imosan aləs ilkâman i tara-nin, wa z'ammazalan əs tara-nin ketnet."

²³ İhayawan-net a daɣ d-ikkas Məşşina Ƴaysa s ənta a imosan Əmayglas was iga arkawal-net i Kəl-İsrayil. ²⁴ Dat assa-net ad iga Yaxya i tamattay n İsrayil ketnet isalan əmosnen ad utaban, təwəsəlməxan daɣ aman, assaknu adi tətubt-nasan. ²⁵ As ibuk Yaxya y əsəndi n əşşəxəl-net, ad igannu: "Ma təxilam, ma əmosax? Wər əmosax za awedan was təxilam. Kala, kala! İlkâm-i-du, nak wər əweda wala arra ən suxan ən yateman-net."

²⁶ İmədrayan-in kawanay win hayawan n İbrahim əd kawanay win wər nəmos Kəl-Əlyəhud təksudam Məşşina, isalan n əlxillas wa, nakkanay as tan-d-issoka Məşşina. ²⁷ Amaran aytedan ən Yerusalam əd muzaran-nasan wər əgren awa imos Ƴaysa, wər əgren deɣ wala daɣ awa ənnan ənnəbitan daɣ Əlkəttaban win tawayrinen akk əzəl wa n təsanfawt daɣ nan n əlxibada, əssəndan awa ənnan ənnəbitan win di s abbaz wa t-əgan s əşşərixa. ²⁸ Wər əgrewan arat waliyyan a t-issiwaran tamattant, mişan harkid awen, əgmayan daɣ Bilatəs a daɣ-as təwəkkəsan man. ²⁹ As əssəndan arat kul awa fall-as ənnan Əlkəttaban, əkkasan-t-idu fəl təgəttawt, əgan-tu daɣ əzəkka. ³⁰ Mişan issənkar-t-idu Məşşina daɣ tamattant. ³¹ Iga adan aggotnen itinəfilil y aytedan win dər-əs d-əddawnen daɣ akal ən Galilaya əgəzzayyan s əxrəm ən Yerusalam. Əntanay a əmosnen əmərədda şigəyyawen-net xur tamattay n İsrayil.

³² Amaran nakkanay da, nətagg-awan isalan n Əlinjil, əmosnen isalan win as itawagga arkawal-nasan i marawan-nana. ³³ Arkawal wen issənd-anaq-qu Məşşina nakkanay win hayawan-nasan s əsənkər wa d-iga Ƴaysa s əmmək was iktab daɣ təsarnat ta n sanatat n Azzabur, as inna daɣ salan ən Ƴaysa: "*Kay Barar-in, əqqalax azalada Abba-nak.*" ³⁴ Əsənkər wa t-id-iga Məşşina daɣ tamattant, da wər tərqa təxəssa-net daɣ əzəkka imâl-tu Məşşina daɣ Əlkəttaban əs təməwit ta, as inna: "*A kawan-akfa arraxmaten zaddoghen, ətiddanen şin as əgeɣ arkawal-nasnat i Dawəd.*" ³⁵ İktâb deɣ as: "*Wər za tayya Əmizdag-nak arku daɣ əzəkka.*" ³⁶ Dawəd amaran, dəffər as immozal daɣ azzaman-net s aratan win ixtas Məşşina, aba-tu, itawanbal dəgma ən marawan-net, tərqa təxəssa-net; ³⁷ mişan Ƴaysa, ənta a d-issənkar Məşşina daɣ tamattant, wər tərqa təxəssa-net. ³⁸⁻³⁹ Daɣ adi imədrayan-in əssənat as təsureft ən bakkadan, təttimal-awan əs tarrayt-net; amaran i sər-əs izzəgzanan ad igrəw tədarfit daɣ aratan kul win as wər ifreg tədarfit daɣ-san əs tarrayt ta n ləkkum y əşşərixa wa d-izzəbben fəl ənnəbi Musa.

⁴⁰ Adi a fəl za tənkedam y a kawan-igrəw awa əmalan ənnəbitan, as ənnan: ⁴¹ "*Ənəyat kawanay win nujan; səmməkləlat, təhləkam; fəlas ad ammazala arat daɣ azzaman-nawan, as kud dawan-iga awedan isalan-net kul da, wər das-za-təzzəgzənam.*"»

⁴² İgammad Buləs əd Barnabas as daɣ-san əgmayan aytedan ad d-ələsan tewaɣlay əzəl ən təsanfawt wa d-izayan fəl a dasan-əşşitin daɣ igi ən salan win den. ⁴³ As təwazawaz əljəməxat, əddəwan Kəl-Əlyəhud aggotnen d aytedan wiyyad ad d-əhdânen s əddin wa n Kəl-Əlyəhud əd Buləs əd Barnabas. Maşawalan dər-san, gammayan daɣ-san ad zəzzəwen daɣ arraxmat ən Məşşina ta əgrawan.

⁴⁴ As d-ixlay əzəl wa n təsanfawt, təddew-du taşşam n əxrəm ketnet y ad issəsəm y awal n Əməli. ⁴⁵ As ənayan Kəl-Əlyəhud igət ən tamattay, əggəznat-tan təsmiten labasnen, ad sabahawan Buləs, rabbadan-tu. ⁴⁶ Təzzar inn-asan Buləs əd Barnabas wər təha tasa ən wala: «Kawanay a iddəran s a dawan-attamal awal ən Məşşina əs tizarat, mişan dad zamas tugayam sər-əs, wər təssəharam iman-nawan əd təməddurt

ta təxlalat, wədi ad nəmələlləy s aytedan win wər nəmos Kəl-Əlyəhud. ⁴⁷ Fəlas awen da as danax-omar Əməli Məššina s əmmək was inna daɣ Əlkəttaban as ənnan: "Əgeq-qay ənnur i tawšeten šin wər nəmos Kəl-Əlyəhud fəl ad tawəyax isalan n əlyillas har d a du-təraz əddənet."»

⁴⁸ As əslan aytedan win wər nəmos Kəl-Əlyəhud y awen, əddəwen, əzzəzwəran awal n Əməli Məššina, əzzəgzanan aytedan kul win as itawatas ad əgrəwan təməddurt ta təxlalat. ⁴⁹ Ad itiwəziwiz awal n Əməli daɣ akal ketnet.

⁵⁰ Mišan ənkaran Kəl-Əlyəhud əgan ark-man daɣ tədoden šiyyad tiwasaxmarnen əhānen əddin ən Kəl-Əlyəhud əd muzaran n əxrəm, ewayan-du əs Buləs əd Barnabas ətəwədgaz labasan, təzzar əstaxan-tan, əkkasan-tan daɣ akal-nasan. ⁵¹ Əbbəkbakan aboqqa ən daran-nasan daɣ batu n əxrəm wen, təzzar əkkan axrəm wa n Ikonəyum.

⁵² Inalkiman ən Ƴaysa win d-oyyan dəffər-san daɣ Antəyoxəya amaran, əknān təfalawist, idnay-tan deɣ Infas wa Zəddigan.

14

Buləs əd Barnabas daɣ Ikonəyum

¹ Iga Buləs əd Barnabas daɣ əxrəm n Ikonəyum arat wa da taggin fawda, a t-imosan iguz n ahan n əlyibada ən Kəl-Əlyəhud; təzzar əgan daɣ-as awal a d-ewayan as əzzəgzanan aytedan aggotnen daɣ Kəl-Əlyəhud əd Kəl-Əlyunan əs Ƴaysa. ² Mišan ənkaran Kəl-Əlyəhud win ugaynen s əzəgzan əs Ƴaysa, əgan daɣ aytedan win hadatnen wər nəmos Kəl-Əlyəhud ark-man əs məzzəgzan əs Ƴaysa. ³ Harkid awen iga Buləs əd Barnabas tamert tagget daɣ Ikonəyum. Taggin awal a daq-qan wər təha tasa, tagayyen fəl Əməli. Ikf-en Əməli fərregat n igi ən təlməxjujaten əmosnen alyalamaten d aratan simaklalten sataddinen tidət a mosan salan win əqqalnen arraxmat-net.

⁴ Mišan təzun tamattay n əxrəm. Wiyyad əwaran aganna wa n Kəl-Əlyəhud, wiyyad aganna wa n nəmmuzal. ⁵ Ənkaran aytedan win wər nəmos Kəl-Əlyəhud əd Kəl-Əlyəhud əd muzaran-nasan sammarkasan ad agin taršəxšad labasnen i Buləs əd Barnabas, anxin-tan kərəz əs təgur ən təhun. ⁶ As isla Buləs əd Barnabas awen, əgmadan axrəm wen, əkkan Lustra əd Derbe əmosnen ixərman n akal wa n Lukawnəya əd kallan win tan-əxlaynen, ⁷ a daɣ-san əmmalan isalan n Əlinjil.

Buləs əd Barnabas daɣ Lustra

⁸ Axrəm ən Lustra ih-ay aləs n anabdon s as d-ihəw da, əmmutan daran-net, wər kala təwer takkolt-net amaɖal. ⁹ As əzəl iyyan ad issisam i Buləs iššewal, idak-ku Buləs s asawad, inay daɣ-as as, ila əzəgzan a t-izzozayan; ¹⁰ təzzar inn-as s afalla: «Ənkər, təxəda tebadday-nak!» Iggad aləs, iggaz šin teklay. ¹¹ As tənay tamattay təgget awa iga Buləs den, ad gannin aytedan s afalla daɣ awal wa n təlukawnəysat: «Imalan əhānen šaššelan an aytedan, a fall-ana d-əzzəbbatnen.» ¹² Əgan i Barnabas esəm n iyyan daɣ əssənəman-nasan as gannin «Zus», Buləs əgan-as esəm n iyyan as gannin «Hərmes» fəlas ənta a imosan əməššewəl. ¹³ Inkar əlimam n əssənəm wa igan «Zus» əs ehan n əlyibada-net iha imi n əxrəm, isassalway-du əs mawan n əxrəm izəgran əd tətəltəla ən təjigay, ira ənta əd tamattay tagget a tan-agin šizəgzam i Buləs əd Barnabas.

¹⁴ Mišan as əslan nəmmuzal win əganen Barnabas əd Buləs awen, zazzarren šikadkaden-nasan fəl man-nasan, ozalan əs tamattay təgget ədkālan imaslan-nasan s afalla gannin: ¹⁵ «Xa meddan! Ma tətəggim da? Nakkanay wər nəmos ar aytedan ən šilaten-nawan. Isalan n Əlinjil a dawan-du-neway fəl ad tammazzayam d əlyibada n əssənəman, tutabam əs Məššina di n Amaylol a d-ixlakan ijənnawan d amaɖal əd gərwan d awa tan-ihan kul. ¹⁶ Daɣ elan win ərəwnen, oyya šimattiwen kul, əlkamnat i tara ən man-nasnat. ¹⁷ Mišan dər iga awen da ya, iga i man-net təgəyya id

issækna əlluḡ-net imosan: əsufəy wa dawan-d-itaggu akonak daḡ jənnawan, ihakk-iwan šimeren olaxnen əd sudar, isifəliwis-kawan.»¹⁸ Gərrid as sahhadarren aytedan əs batu ta əgan den, əgdalan-asan a dasan-agin šinagzamen.¹⁹ Osan-du Kəl-Əlyəhud wiyyad a d-əfalnen aḡrəm n Antəyoxəya əd wa n Ikonəyum, əššewalan y aytedan har tan-əssəwaran aganna wa-nasan. Ad əggaran Buləs əs təhun, dəffər adi zarorawan-tu har dər-əs əgmadan aḡrəm, əḡilan aba-tu.²⁰ Mišan as sər-əs d-əddewan nalkiman ən Ƴaysa, ḡalayḡalayan-tu, ibdad-du iqqal aḡrəm. As affaw, iddew əd Barnabas əkkan aḡrəm ən Derbe.

Tewaylay ən Buləs əd Barnabas Antəyoxəya

²¹ As əmalan isalan n Əlinjil daḡ əḡrəm wen, əlkaman aytedan aggotnen i Ƴaysa; iqqal Buləs əd Barnabas aḡrəm ən Lustra əd wa n Ikonəyum əd wa n Antəyoxəya,²² ad gammayan daḡ nalkiman ən Ƴaysa win ḡərman win ad zəzzəwen daḡ tarrayt-nasan. Šəwalan-asan, talaman-asan fəl man s ad zəzzəwen daḡ əzəgzan-nasan, gannin-asan: «İllikan as, iguz ən Taḡmar ta n Məššina, iddew əd təssust tagget.»²³ Əkkulluk n Əlkənisat sinafran-as imuzaran, əššədawan awen əd təwatriwen d əzum, amaran agin-tan daḡ təḡlift ən Məššina di as əzzəgzanan.²⁴ Dəffər awen ərzagan akal wa n Bissidəya, okayan əs wa n Banfiləya.²⁵ Əmalan isalan n Əlinjil daḡ əḡrəm wa n Bərge, amaran ərasan əs wa n Attaləya.²⁶ Əggazan aḡlal n aman daḡ Attaləya, ənnəmadan Antəyoxəya, aḡrəm was ənta as kala daḡ-as tawaggan daḡ təḡlift ən Məššina y əššəḡəl wa əssəndan den.²⁷ As din-osan, sassaxran-du aytedan kul n Əlkənisat, təzzar əssoḡalan-asan isalan n arat kul was tan-ikfa Məššina turagat n igi-net, d əmmək was olam Məššina tarrayt n əzəgzan i təmattiwen šin wər nəmos Kəl-Əlyəhud.²⁸ Dəffər awen əmalan ḡur nalkiman win den har əgan tamert tagget.

15

Əmənəy ən məzzəgzan əs Ƴaysa daḡ Yerusalam

¹ Osan-du meddan wiyyad a d-əgmədnen akal ən Yahudəyya aḡrəm n Antəyoxəya ad sasaxrin inalkiman ən Ƴaysa, gannin-asan: «As wər təlkemam y aḡxadat n əmənəkəd ta d-oyya ənnəbi Musa, wər za təgrəwam əlḡillas.»² Wər irda Buləs əd Barnabas əs batu ten, eway-du awen tamazaḡ labasat gar-essan əd Buləs əd Barnabas. Təzzar tətawagga tanat n ad aggazzay Buləs əd Barnabas əd nalkiman ən Ƴaysa wiyyad əs Yerusalam fəl ad ənəyan inəmmuzal əd muzaran n Əlkənisat daḡ batu ten.³ Təkf-en Əlkənisat ta n Antəyoxəya arat kul was əddəraran, amaran əgla. Ərzagan akal wa n Fenisəya əd wa n Samarəya suḡulan isalan kul ən tətubt ta d-əganat təmattiwen šin wər nəmos Kəl-Əlyəhud əs Məššina. Isiflawas awen wəllen inalkiman kul win kalla en.⁴ As osan Yerusalam təg-asan Əlkənisat ketnet marxaba əd nəmmuzal əd muzaran. Təzzar əgan daḡ-san isalan n arat kul was tan-ikfa Məššina igi-net.⁵ Mišan əggadan-du meddan wiyyad ən nalkiman ən Ƴaysa əhanen taggayt ta n Farisaytan ənnan: «Əmənəkəd əd ləkkum y əlqanun wa n ənnəbi Musa fərəd a imos fəl aytedan win wər nəmos Kəl-Əlyəhud.»

⁶ Təzzar əmmənəyan nəmmuzal əd muzaran n Əlkənisat fəl ad əssənan awa z'əgin daḡ batu ten.⁷ As ərəwan əmmizəḡan, ibdad Butros inn-asan: «İmədrayan-in, təssənam as irəw as di-isannafran daḡ-wan Məššina fəl ad aslin aytedan win wər nəmos Kəl-Əlyəhud isalan n Əlinjil daḡ imi-nin, əzzəgzənan əs Məššina.⁸ Məššina issənan awa ihan əwəl n awedan kul, issikna tərəddawt ta sər-san iga əs təhakkay ta tan-iga Infas wa Zəddigan əs təməwit tas dana-t-ikfa nakkanay win Kəl-Əlyəhud.⁹ Wər danay-izannamazlay dər-san fəlas Məššina a izazdagan iwallan s əzəgzan sər-əs.¹⁰ Daḡ adi əmərədda ma fəl tətəggim tənəgməyt i Məššina s igi wa tətəggim fəl rawan ən nalkiman əzuk əs wərməd əfrəḡan marawan-nana adakal-net wala dey

nəfrâk-ku nakkanay? ¹¹ Wərgex arraxmat n Əməli Ƴaysa as nəzzəgzan, təssəfs-ana? Əntanay da za, əntanay win wər nəmos Kəl-Əlyəhud, tēməwit ta da as əfsan!»

¹² Təzzar təffəsta tamattay ketnet, əssəsaman aytedan i Barnabas əd Buləs suxulan isalan kul ən təlməxujaten əmosnen alxalamaten d aratan simaklalten win as tan-ikfa Məššina igi-nasan dəx tēmattiwen šin wər nəmos Kəl-Əlyəhud.

¹³ As iffəsta Barnabas əd Buləs, iššewal Yaqub, inna: «Imədrayan-in, səsəmat-i. ¹⁴ Simxon Butros issôxal-ana tēməwit tas issənta Məššina harwa dəx tizarat əsəkni ən tara ta iga i tēmattiwen šin wər nəmos Kəl-Əlyəhud s əsənnəfrən wa dəx-asnat iga aytedan as z'əqqələn tamattay-net. ¹⁵ Amaran inimannak awen d awa ənnan ənnəbitan dəx Əlkəttaban as ənnan: ¹⁶ "Ad d-əqqəla dəffər awa, ələsəx i Dawəd akaras n ahan-net ibirajjen, əkrəsəx iməggulaz-net, əssəbdədaq-qu, ¹⁷ fəl ad əgməyan aytedan win d-əqqimnen Əməli. Awalla šimattiwen kul šin wər nəmos Kəl-Əlyəhud, ad əqqəlnat tamattay-nin, əxbadnat-i. Adi a inna Əməli wa igan aratan di kul", ¹⁸ fəl təga masnat harwa irəw.

¹⁹ Awen da fəlas nak Yaqub, ərdəx s ad nayyu əsəmməxiter n aytedan win wər nəmos Kəl-Əlyəhud win du-tutabnen əs Məššina. ²⁰ Mišan əktəbatana y-asan širawt, nann-asan ad ammazzayan d əsəmmədəs ən man-nasan s arət ad d-immāran əssənəm, ammazzayan d igi n əzzəna əd tattay ən şan n əmudar tənxa tarzam əd təssay n əzni. ²¹ Fəlas irəw ad t-əmalan əlfəqqitan sasəxrinen Əttawret dəx əkkulluk n əxrəm, itawəxru dəx ək əzəl ən təsənfawt dəx nan ən Kəl-Əlyəhud win əlxibada.»

Širawt ta tətawasokat i nalkiman ən Ƴaysa win wər nəmos Kəl-Əlyəhud

²² Təzzar ərdən nəmmuzal əd muzaran d Əlkənisat ketnet s ad sənnəfrənan wiyyad dəx-san, zəmmizələn-tan s əxrəm n Antəyoxəya, idawan əd Buləs əd Barnabas. Sannafranən Yahuza was itawannu Barsabbas əd Silas, əmosnen imuzaran dəx məzzəgzan əs Ƴaysa. ²³ Əssəwaran-tan ad awəyan širawt s ənta da awa dəx-as əktaban: «Awa nakkanay inəmmuzal əd muzaran ən nalkiman ən Ƴaysa win mədrayan-nawan. Nəhul-in imədrayan-nana win wər nəmos Kəl-Əlyəhud, win əhanen əxrəm n Antəyoxəya əd win əhanen akal ən Surəya əd wa n Kilikəya. ²⁴ Nəslâ assa wa kawan-in-əgan meddan danəx-in-əfalnen ši wala turagət-nana, əxşadan iman-nawan, əşşəwəşan-kawan s awa gannin. ²⁵ Adi a fəl nənamannak ketnana, nəga tanat ad nəsənnəfrən meddan, nəzəmmizəl-tan-in sər-wan, idawan-in əd maran-nana Barnabas əd Buləs, ²⁶ əmosnen meddan əgānen iman-nasan dəx alxarar fəl əddəlil n esəm n Əməli-nana Ƴaysa Əlməsix. ²⁷ Adi da fəl din-nəzəmmazal Yahuza əd Silas fəl a dawan-ələsan əsuxəl ən salan win imi s imi. ²⁸ Fəlas issîbdad Infas wa Zəddigan əd nəkkanay iman-nana tanat n as wər kawan-za-nəssəwər əzuk waliyyan ar wa n aratan win əwwəjjabnen, ²⁹ əmosnen: ad tammazzayam əd tattay n amensay itiwakfan y əssənəman əd tassay n əzni əd tattay ən şan n əmudar tənxa tarzam d igi n əzzəna. As tətəfam iman-nawan fəl igi n aratan win di, ad tagim a olāxan. Nəhul-kawan-in wəllen.»

³⁰ Dəffər awen tawasallaman, əzagadayyan, əqqalan Antəyoxəya, ewāyan širawt. As din-ewadan əşşədawan-du inalkiman ən Ƴaysa, əkfan-tan širawt ten. ³¹ Tətəwəyra, təzzar saddawen-tan salan talammen fəl man win əgrawen den. ³² Amaran iššewal Yahuza əd Silas əmosnen əntanay iman-nasan ənnəbitan ad taggin ənnəsixa aggen i mədrayan talaman-asan fəl man, sisuhen əzəgzan-nasan. ³³ As iga Yahuza əd Silas tamert den, əsəllaman-tan mədrayan win Antəyoxəya fəl ad əqqələn Əlkənisat ta tan-du-təzəmmazalat. [³⁴ Mišan issof Silas ad aqqam den da, iqqal əs Yahuza xas a iqqalan Yerusalam.] ³⁵ Ixsar Buləs əd Barnabas dəx Antəyoxəya, xattaban əntanay əd wiyyad imədrayan aggotnen y aytedan Əlinjil n Əməli, sasəxin-asan-tu dəx.

Ɛmæzzəy ən Buləs əd Barnabas

³⁶ As əgan tamert dəffər awen, inna Buləs i Barnabas: «Ɛqqələna imədrayan-nana daɣ əzəgzan win əhanen iɣərman kul win daɣ nəmal awal n Ɛməli, ad nəssən awa daɣ-san in-igan.» ³⁷ Ira Barnabas ad idawan əd Yaxya was itawannu Markus. ³⁸ Mišan inna Buləs wər ihor ad idawan d aləs as dat awen a daɣ-san ixtas iman-net daɣ Banfiləya, wər ɣur-san iqqim har səkkəsəwan əššəxəl-nasan. ³⁹ Təkkus talɣa gar-essan har d-eway awen as əmməzzayan. Iddew Barnabas əd Markus əggazan aɣlal n aman əkkan Qibrus. ⁴⁰ Buləs ənta isannafran Silas, iddew dər-əs. As t-əgan mədrayan daɣ təɣlift ən Məššina, igla. ⁴¹ Illil Buləs akal wa n Surəya əd wa n Kilikəya isisuhit əzəgzan n Ɛlkənisanen.

16

Tidawt ən Timotay əd Buləs əd Silas

¹ Osa Buləs aɣrəm ən Derbe, as t-ifal ikka wa n Lustra. Amaran Lustra ih-et ənalkim ən Ƴaysa igân Timotay s anna-net iyyat daɣ Kəl-Ɛlyəhud təzzigzanat əs Ƴaysa, mišan abba-net iyyan daɣ Kəl-Ɛlyunan. ² Ɛmmâlan-tu mədrayan daɣ əzəgzan win Lustra d Ikonəyum əllux. ³ Ira Buləs tidawt-net, inkar isammankad-tu fəl əddəlil ən Kəl-Ɛlyəhud win əhanen akal wen, fəlas əssânan ketnasan as abba-net iyyan daɣ Kəl-Ɛlyunan a imos. ⁴ Aɣrəm a d-osa Buləs əd Silas a daɣ-as əməlan i nalkiman win t-əhanen šinaden šin əgan nəmmuzal əd muzaran n Ɛlkənisanat ta n Yerusalam, əgməyan daɣ-san a dasnat-əlkəman. ⁵ Ad itasahat əzəgzan n Ɛlkənisanen, təyttəynat akk əzəl.

Ɛtəwəyra ən Buləs əs Masedonəya

⁶ Irzag Buləs əd Silas akal wa n Frijəya əd wa n Galatəya əglaŋ okâyan, fəlas Infas wa Zəddigan a dasan-igdalən emel n awal ən Məššina daɣ akal wa Asəya. ⁷ As osan əgogas n akal wa n Məsəya, əgməyan d iguz n akal wa n Bitinəya, mišan igdal-asantu Infas wa Zəddigan. ⁸ Təzzar ərzagan Məsəya, əzagadayyan s aɣrəm wa n Trowas. ⁹ As iga ahad orga Buləs: Inay aləs iyyan n akal ən Masedonəya ibdâd dənnəg-əs, itansay-tu, igann-as: «Akka-du Masedonəya, tədhələɣ-ana.» ¹⁰ Iga Buləs targət ten ɣas, nəsammatag y iki ən Masedonəya fəlas nəkkâs aššak as Məššina a danax-iɣran fəl a daɣ-as nəməl isalan n Ɛlinjil.

Ɛzəgzan ən Lidəya s Ɛməli daɣ Filib

¹¹ Nəggaz aɣlal n aman daɣ Trowas, nənnəmad akal imosan gər-wətlən as itawannu Samotras. As affaw nəkka aɣrəm ən Neyabolis. ¹² Ɛnta nəgməd-tu əs wa n Filib imosan aɣrəm fəl təxkâm Ɛrrum; imos deɣ aɣrəm wa azzaran daɣ akal ən Masedonəya. Nəga daɣ-as adan. ¹³ As d-ewad əzəl wa n əssəbət, əzəl wa n təsənfawt ən Kəl-Ɛlyəhud, nəgməd-in aɣrəm əs təgadamayt ən təsəssəngəyt iyyat as norda as, ih-et adag a daɣ taggin Kəl-Ɛlyəhud ši-watriwen. Nogaz-in šidoden əmminaynen den, təzzar nəqqim, nəššewal-asnat, nəg-asnat deɣ təlxutbat.

¹⁴ Təssəsam-ana iyyat daɣ-asnat ən təmiksət ən Məššina təgât esəm Lidəya n aɣrəm ən Təyatir tətaggit jola ən təbəddəɣ zaggaynen hossaynen. Ora Ɛməli əwəl-net, təga əsəsəm olâɣan y awa igannu Buləs, təzzar təzzəgzan əs Ƴaysa. ¹⁵ As tətawasalmaɣ daɣ aman ənta d aytədan n aɣaywan-net, tonsay-ana, tənn-ana: «Zama təhannayam as əzzigzana s Ɛməli, wədi akkiwat-du ehan-in tazabbem daɣ-as.» Təgraw-du daɣ-na as nərda.

¹⁶ Ɛzəl iyyan nəkkâ edag ən təwatriwen wen as nəmmənay əd təməwat iyyat ən təklit iha əggəsuf a das-immalan awa d-izayan, garrawan sər-əs məssawəs tənfa tagget daɣ awen. ¹⁷ Təlkam-ana nakkanay əd Buləs təsiɣarat təgannu: «Meddan win, eklan ən Məššina di n Amadkol a əmosan. Isalan ən tarrayt ta n əlɣillas as

d-osan y a dawan-tan-agin.» ¹⁸ Təga adan aggotnen tətəggu awen. Iгла Buləs har t-işaxaşşat awen, imalallay-tat-in inna y aggəsuf wa tat-ihan: «Omarəq-qay əs tarna ta təhat esəm ən Ҷaysa Əlməsix, əgməd-tat!» Təzzar igmad-tat aggəsuf dəx tamazayt ten da.

¹⁹ As ənayan məssawəs as ab-as sər-san tat-du-təgammad tənfa, əbazan Buləs əd Silas, əlwayan-tan s asammanay n əxrəm, əssəbdadan-tan dat naxkiman. ²⁰ Ənnan i naxkiman: «Məddan win jannajarwayan əxrəm-nana. Kəl-Əlyəhud a əmosan, ²¹ sasaxrinen aytedan alxadaten as nakkanay Kəl-Ərrum wər nəla turagat ən tərəddawt sər-əsnat wala ləkkum y-asnat.» ²² Tənkər tamattay ənta da təzzan əs Buləs əd Silas. Ənnan naxkiman a fall-asan təwəzəzərren səlsa, omaran s a dasan-təwəgginat təwit. ²³ As tan-əyyəwanan šiwwit, əgəran-tan dəx kasaw, omaran əmuzar ən kasaw s a dasan-əgu aggaz olâxan. ²⁴ Əmuzar ən kasaw dəx as das-itawanna awen, inkar ig-en dəx adangaya ən kasaw, inday idaran-nasan dəx şiləlt.

²⁵ As isaggaraygaray ahad, ad itattar Buləs əd Silas sihaken imaslan-nasan taggin dəx təmmalən i Məşşina, əssisaman-asan məskəsa win hadatnen. ²⁶ Wala a ihogan iga amađal ənəgəynəgəy s awa iga dəx assahat har inəgəynəgəy ahan ən kasaw ketnet, ənnolamnat təsəhar ən kasaw kul tamazayt ten da, zalabben sassaran dəx məskəsa kul. ²⁷ Inkar-du əmuzar n ahan ən kasaw dəx etəs. As inay şisəhar ən kasaw ənnolamnat, ilbay-du takoba-net y sər-əs anxu iman-net fəlas a ixl iməskəsa əddəggəgan. ²⁸ Mişan isəxarat-as Buləs inn-as: «Ad wər tanxax iman-nak, ketnana nəlla da.» ²⁹ Inna əmuzar ən kasaw ad d-ammawaynat fətəlaten, iggaz ammas ən kasaw tarmad igla har ewad adangaya-net təndaw-tu taysəst har issəjad i Buləs əd Silas. ³⁰ Təzzar ikkas-tan-du inn-asan: «Məddan, mas di-iwar igi-net əgrəway əlxillas?» ³¹ Ənnan-as: «Zəgzən s Əməli Ҷaysa ad təxləsa kay d aqaywan-nak.» ³² Amaran əmalan-as awal n Əməli ənta d aytedan kul n aqaywan-net. ³³ Eway-tan alwaq wen da adawannay n ahad, işşorad ibusan-nasan. Den da ad itawasalməx dəx aman, ənta d aytedan n aqaywan-net ketnasan. ³⁴ Təzzar iddew əmuzar ən kasaw əd Buləs əd Silas s ahan-net, isamməgarat-tan. Isidawat-tu wəllen ənta d aqaywan-net ketnet əzəgzan wa əgan əs Məşşina.

³⁵ As affaw, zammazalan naxkiman sojitan s əmuzar ən kasaw y a das-annin ad ikkəs Buləs əd Silas. ³⁶ Imal əmuzar ən kasaw əmazal wen i Buləs, inn-as: «Inaxkiman n əxrəm ənnan-du ad tətəwəkkəsam. Dəx adi əgmədət, taglim dəx alxer.» ³⁷ Mişan inna Buləs i sojitan: «A danax-əgin šiwwit dat awedan kul da wala əşşərixa, ənta nakkanay nəmos Kəl-Ərrum; əgəran-ana dəx kasaw, amaran əmərədda iren a danax-əkkəsən wər t-illa i issanan! Kala kala! Asinet-du iman-nasan, əkkəsən-ana.» ³⁸ Əqqalan sojitan əssoyalan batu ten i naxkiman. As əslan as Buləs əd Silas Kəl-Ərrum a əmosan, ərməxan. ³⁹ Osan-tan-du a tan-talayden, təzzar əkkəsən-tan dəx kasaw, a dəx-san gammayan ad əgmədən əxrəm-nasan. ⁴⁰ Ifal Buləs əd Silas kasaw, əkkan ehan ən Lidəya. As əmmənayan əd mədrayan dəx əzəgzan, əşşewalan-asan, olaman-asan fəl man, amaran əqlan.

17

Tugəyt ən Kəl-Əlyəhud win Tesalonik s ad əqbəlan əsəssəxri ən Buləs əd Silas

¹ Iga Buləs əd Silas tarrayt ta tərzagat Anfibolis d Abollonəya har din-osan əxrəm ən Tesalonik a dəx ələn Kəl-Əlyəhud ehan n əlxibada. ² Os-en-in Buləs, awa da itaggu fawda. Iga den karadat əssəbətən itiməşiwil əd Kəl-Əlyəhud dəx salan n awa ənnan Əlkəttaban. ³ Isassagr-asan-tan, issosan-tan əs, Əlməsix ilzâm-tu ad aqxazzab iba-tu, təzzar inkər-du dəx təmattant. Igann-asan dəx: «Ҷaysa wa dawan-əmmala da, ənta Əlməsix.» ⁴ Əzzəgzanan wiyyad dəx-san s awa igannu, təzzar əwaran aganna ən

Buləs əd Silas, əntanay əd Kəl-Əlyunan əknanen igət ən miksadan ən Məşşina əd tədoden aggotnen əlânen esəm dağ əxrəm.

⁵ Mişan əggaznat təsmiten labasnen taşşam ən Kəl-Əlyəhud, əşşedawan-du ark aytedan win əssuk, əqqalan tiddawat təzzar jannajarwayan əxrəm. Əstaban y ahan ən Yason gammayan Buləs əd Silas fəl a tan-əssəbdədan dat aljamayət təşrəx-asan.

⁶ Wər xur-əs tan-əgrewan, təzzar əlwayan Yason ənta d arət dağ mədrayan dağ əzəgzan har tan-əssəbdədan dat naxkiman n əxrəm, ad gannin s afalla: «Aytedan win, əddənet ketnet as sər-əs d-ewayan iba n alxer, əmərədda əntanay da. ⁷ Amaran Yason a tan-igan dağ ayaywan-net. Ketnasan tamazrayan əlqanun n əmənokal-nana Qaysara fəlas tənna a taggin ill-ay iyyan əmənokal igân esəm Ƴaysa.» ⁸ Isalan win den as dasan-təsla tamattay əd naxkiman n əxrəm əgan aşşawaşa labasan. ⁹ Əgan azrəf dağ Yason d aytedan win xur-əs əllanen, har t-ərzaman as tawayyan.

Buləs əd Silas dağ Berawya

¹⁰ Tarmad as əssokan mədrayan dağ əzəgzan Buləs əd Silas əxrəm ən Berawya ahad wənda. As t-in-osan, əggazan ehan ən Kəl-Əlyəhud wa n əlxibada. ¹¹ Əssəknantan Kəl-Əlyəhud win Berawya əlləllu ogaran wa tawasaknan dağ Tesalonik. Əntanay əknân əlqəbulat n awal ən Məşşina. Əzəl kul xarran Əlkəttaban, taşəggaran kud awa igannu Buləs tidət a imos wala. ¹² Eway-du awen as əzzəgzanan wiyyad dağ-san aggotnen, əntanay əd tədoden ən Kəl-Əlyunan tiwasaxmarnen əd meddan aggotnen ən Kəl-Əlyunan.

¹³ Mişan as əslan Kəl-Əlyəhud win Tesalonik as əxrəm wa n Berawya ənta da immâl dağ-as Buləs awal ən Məşşina, əkkan-tu ənta da, əgan arak man dağ aytedan, jannajarwayan əxrəm. ¹⁴ Den da ad ənkarən nalkiman ən Ƴaysa əssəgəlan Buləs, əssokan-tu tama n agaraw. Silas əd Timotay əntanay əqqiman-du dağ Berawya. ¹⁵ Aytedan win məşşidaw ən Buləs, əddəwan dər-əs har tu-şəşşawadan əxrəm n Atena, amaran əqqalan ewâyan əmazal ən Buləs i Silas əd Timotay n as, a das-d-əlkəman tarmâd.

Buləs dağ Atena

¹⁶ A iqqal Buləs i midawan-net dağ əxrəm n Atena, tamatşin man-net fəl alham n igət wa əgan əssənəman dağ əxrəm wen. ¹⁷ Təzzar ad itakku ehan ən Kəl-Əlyəhud wa n əlxibada itiməşiwil dər-san əntanay d aytedan wiyyad ən miksadan ən Məşşina, itakku dəx akk əzəl asammanay n əxrəm, itiməşiwil əd win dər itamanay. ¹⁸ Itiməşiwil dəx Buləs əd meddan wiyyad ən musanan ən taggayt ta n Efikurəyan d Əstoyisəyan. Tamazaxan dər-əs wiyyad dağ-san gannin: «Wa akk tawalaqqat, ma igannu?» Wiyyad gannin: «Es tanna imalan wiyyad wər nəzday as immâl isalan-nasan.» Wər tan-isassanna awen ar, a fəl dasan-immâl Buləs isalan n Əlinjil, itagg-asan isalan ən Ƴaysa əd tanakra-net dağ təmattant. ¹⁹ Təzzar əkkan dər-əs s asəggawar n əxrəm n Atena as itawannu Aryofagəs, ənnan-as: «Ag-ana isalan ən masnat tərâyat ta dər du-tosex da, ²⁰ fəlas təssislay-ana aratan wər nəzday, as nərə ad nəssən almağna-nasan.» ²¹ Əntanay Kəl-Atena kul əd naftaxan win tan-əhanen, wər əgmedan ar s awal d əsəsəm i salan win d-əzraynen.

²² İbdad Buləs dağ ammas n Aryofagəs inna: «Hannaya wəllen as, kawanay Kəl-Atena təddinam wəllen, ²³ fəlas əssiylaya dağ əxrəm-nawan, zigazday idaggan win dağ təxabbadam imalan-nawan, əssiha fadda fəl adag a dağ tawakfinat təkutawen fəl iktâb: "Edag n əlxibada n əməli wər nətawassan". Əməli wa təxbadam da wər tu-təssenam, ənta as dawan-əmmâla isalan-net da. ²⁴ Məşşina wa d-ixlakan əddənet d arət kul wa tat-ihan, ənta a imosan Əməli ən jənnawan d amaçal, wər ixser dağ nan n əlxibada əkrâsan fassan n əggadəm, ²⁵ wala iddirar s a ikna əggadəm fəlas wər iddərər əs wala. Ənta a isuduran, ihakku infas, ihakku arət kul. ²⁶ İxlak-du tawşeten

n əddənet kul daɣ awedan iyyanda, y ad əxsərnat fəl əruru n amadal ketnet. Ixtas-asnat azzaman, iga deɣ šizəraz i kallan win daɣ əxsaran. ²⁷ Igâ Məššina awen fəl ad t-əgməyan aytedan kuddeɣ s adez, mijas a t-əgrəwan; kuddeɣ as wər danax-ihā i iggug, ²⁸ fəlas ənta a ittafan təməddurt-nana d əmətəkwəy n akk iyyan daɣ-na d awa nəmos. Adi da a ənnan arat daɣ məssiway-nawan wiyyad əs tənna ta əgan: "Awalla, nakkanay da nəmos bararan-net." ²⁹ Daɣ adi dad zamas nəmos bararan ən Məššina, wər imməkkan ad narđu as ihā šaššelan n əssənam igân daɣ urəɣ, wala azrəf, wala təhunt, a d-inzâm awedan gar-es əd man-net. ³⁰ Əljəhəl wa əgan aytedan daɣ aratan win di, wər fall-asan t-ixseb Məššina daɣ elan win təljuhəla, mišan əmərədda omar aytedan kul, edag əhan, əs tətubt, ³¹ fəlas ilkâm əzəl igâ təmastant, wa daɣ z'agu y əddənet ketnet əššəriɣa oɣâdan. Isinafran aləs wa z'agu daɣ əššəɣəl wədi. Issikna adi y awedan kul s əsənkər wa t-id-iga daɣ təmattant.»

³² As əslan i Buləs iššewal daɣ batu ən tanakra daɣ tamattant, əgan daɣ-as wiyyad tamakkakkayt, wiyyad amaran ənnan-as: «Nəra a dak-nələs əsəsəm daɣ batu tədi əzəl iyyan.» ³³ Den da a tan-ifal Buləs, igla. ³⁴ Dər iga awen da osaxan dər-əs wiyyad daɣ-san təzzar əzzəgzanan. Aytedan win, ih-en Dəyonusəyəs ihân asaggawar wa n Aryofagəs əd təntut təgât Damaris əd wiyyad aytedan.

18

Buləs day Korent

¹ Dəffər awen igmad Buləs əxrəm n Atena, ikka wa n Korent. ² Den da ad immənay d aləs ən Kəl-Əlyəhud igân esəm Akilas n akal ən Fontəs, a d-osân səket ifâl-du akal wa n Italəya ənta əd hannes Friska; fəlas əmənokal Klawdəyus Qaysara a omaran s ad təwəstəxan Kəl-Əlyəhud kul daɣ əxrəm n Ərrum. Osax dər-san Buləs. ³ Amaran dad imos as ola dər-san əššəɣəl – ketnasan əššəɣəl-nasan igi ən həktan – imal xur-san Buləs, išɣal. ⁴ Akk əzəl ən təsanfawt, itaggu Buləs isalan daɣ ahan ən Kəl-Əlyəhud wa n əlɣibada, igamma y d ad əzzəgzanan Kəl-Əlyəhud əd Kəl-Əlyunan.

⁵ As d-osa Silas əd Timotay Buləs əfâlan-du Masedonəya, igmad Buləs ənta s amel n awal ən Məššina ɣas, itagayyat i Kəl-Əlyəhud as Ƴaysa a imosan Əlməsix. ⁶ Mišan ugayan sər-əs Kəl-Əlyəhud, a tu-rabbadan. İbbəkbak Buləs isəlsa-net, almaɣna ab'as dər-san idraw wala. Inn-asan: «Təlmanam iman-nawan; iwəret alxaq-nawan iɣafawan-nawan, nak ab'as di-iwar alxaq n iba n əlɣillas-nawan. A obazan xur əmərədda aytedan win wər nəmos Kəl-Əlyəhud a z'akkax.»

⁷ Təzzar ifal-tan, iggaz ehan n aləs igân esəm Titəyus Yustus imosan əmiksad ən Məššina as illa ahan-net dəgma n ahan wa n əlɣibada ən Kəl-Əlyəhud. ⁸ Krisbəs wa n əmuzar n ahan ən Kəl-Əlyəhud wa n əlɣibada ənta izzigzan s Əməli, ənta harkid aytedan n aɣaywan-net kul. Əslan Kəl-Korent aggotnen i salan win itaggu Buləs, əzzəgzanan əntanay da, təzzar tawasalmaɣan daɣ aman.

⁹ As ahad iyyan iga Buləs targət a daɣ das-inna Əməli: «A kay wər təggəz tasa, kalar šawal ad wər taffasta, ¹⁰ əlleq-qu dər-ək, wər t-illa i z'ifrəgan a dak-ixsəd arat, fəlas ələɣ aytedan aggotnen daɣ əxrəm wa.» ¹¹ İxsar Buləs daɣ əxrəm ən Korent har iga awatay d aganna, isasaxru aytedan awal ən Məššina.

¹² Azzaman win daɣ imos Galləyyun ənaxkim n akal wa n Akayya, ənkaran Kəl-Əlyəhud əgan eɣaf fəl Buləs, əbazan-tu, ewayan-tu s adag n əššəriɣa, ¹³ ənnan: «Aləs wa, igamma y d ad əxbədan aytedan Məššina əs təməwit təmmizrayat əššəriɣa.» ¹⁴ As zama issinta Buləs daɣ awal, inna Galləyyun i Kəl-Əlyəhud: «Kawanay Kəl-Əlyəhud, ənnar assa a di-du-təgam daɣ batu n arat immizrayan əššəriɣa madeɣ ark amazal labasan, iməl-tu əddəlil wa fəl dawan-z-əssəsəmaɣ; ¹⁵ mišan zama awa

tamazaq tægât fəl təfir d əsmawan d əššərixa-nawan, əšrəxat-tan kawanay iman-nawan, nak wər arex ad əqqəla əmašrax n aratan zun win di.»

¹⁶ Amaran isassardağ-ğan ehan wa n əššərixa. ¹⁷ Təzzar ənkaran ketnasan, əbazan Sustinəs wa n əmuzar n ahan ən Kəl-Əlyəhud wa n əlxibada, ad t-əggatan da da dat ahan wa n əššərixa; mišan wər izlay Galləyyun dağ awen.

Iqqal Buləs aɣrəm n Antəyoxəya

¹⁸ Iqla Buləs ixsâr dağ əɣrəm ən Korent har irəw. Dəffər adi inamagga əd nalkiman ən Ƴaysa šiwatriwen, iggaz aɣlal n aman ikka Surəya, iddew əd Friska d Akilas. Harwada wər iggez aɣlal n aman dağ Qankrəya inimahazan əd Korent akku Surəya ad ilza eyaf-net y ad assaknu s awen aɣdawal wa iga. ¹⁹ As osan aɣrəm n Efez, imməzzay dər-san Buləs. Iqla ənta iggaz ehan ən Kəl-Əlyəhud wa n əlxibada imašawal dər-san. ²⁰ Əgməyan dağ-as a ɣur-san ihag, uɣay-asan. ²¹ Mišan as tan-ifal inn-asan: «[Wər imməkkan a di-wər-iga əmud wa d-izayan dağ Yerusalām.] A kawan-d-əqqəla kud Məššina irða.» Igməd Efez iha aɣlal n aman. ²² As izzəbbat dağ əɣrəm wa n Qaysarəya, iggəzzay, ikka Yerusalām issəslam Əlkənisat, dəffər adi izagaday, ikka aɣrəm n Antəyoxəya. ²³ As dağ-as iga tamert, igmad-tu, illil akal wa n Galatəya əd wa n Frijəya, isisuhit əzəgzan ən nalkiman ən Ƴaysa kul.

Assa n Abbolos Efez d əššəxəl ən Buləs dağ Akayya

²⁴ As itaggu awen, aɣrəm n Efez os-ay-du aləs ən Kəl-Əlyəhud igân esəm Abbolos n əɣrəm n Alaskandrəya, imosan aləs issânan awal wəllen, igân masnat tagget y Əlkəttaban. ²⁵ Itiwasasaɣra tarrayt ta n Əməli, amaran ikf-ay Infas wa Zəddigan gəllejat dağ igi ən təlɣutbat, isasaɣru deɣ s əlluɣ dağ batu ən Ƴaysa; dər iga awen da ya, isalan n əsəlməx wa itaggu Yaxya aytedan dağ aman ɣas a t-əhanen. ²⁶ Ad itaggu awal dağ-qu wər təha tasa dağ ahan ən Kəl-Əlyəhud wa n əlxibada. As das-təsla Friska d Akilas, əddewan dər-əs, sassaxran-tu s əlluɣ, əššotan-as masnat ta iga tarrayt ta n Məššina.

²⁷ Dəffər awen isammarkas Abbolos iki n akal wa n Akayya, təzzar ədhalan-tu mədrayan-net dağ əzəgzan s awen. Əktaban širawt i nalkiman ən Ƴaysa win t-əhanen fəl a das-əgin təməwit tolâxat as tan-in-osa. As din-osa, təggaz-tu tənfa zəwwərat a du-təfállat arraxmat ən Məššina y aytedan win əzzəgzannen, ²⁸ fəlas isabbahaw s assahat dat tamattay iduf wa əgan Kəl-Əlyəhud. Issəkn-en dağ Əlkəttaban as, Ƴaysa a imosan Əlməsix.

19

Buləs dağ Efez

¹ Azzaman win dağ iha Abbolos Korent, ad irzag Buləs akal n ədyaxan har iras fəl aɣrəm n Efez. Inay dağ-as inalkiman ən Ƴaysa wiyyad, ² inn-asan: «Awak kawanay, as təzzəgzanam təgrâwam Infas wa Zəddigan?» Ənnan-as: «Wər nəsla fadda as t-illa Infas wa Zəddigan.» ³ Inn-asan Buləs: «Dağ adi ma imos əzzənəf n əsəlməx wa tətawaggam dağ aman?» Ənnan-as: «Əsəlməx wa n Yaxya.» ⁴ Amaran inn-asan Buləs: «Yaxya, aytedan win ətubnen dağ bakkadan a isalməx dağ aman, assaknu adi tətubt-nasan, immâl-asan ad əzzəgzənən əs wa du-z-əsin dəffər-əs, almaɣna Ƴaysa.» ⁵ As əslan y awen, tawasalməxan dağ aman dağ esəm n Əməli Ƴaysa. ⁶ Təzzar issəwar Buləs akk iyyan dağ-san ifassan-net, əgrawan deɣ Infas wa Zəddigan, əššəwalan dağ awalan wər nətawazday, əgrawan emel ən salan a d-izizabbat Məššina. ⁷ Meddan en, marawessan d əššin.

⁸ Amaran ad itakku Buləs ehan wa n əlxibada ən Kəl-Əlyəhud, itaggu dağ-as təlɣutbat wər t-illa is tu-təha tasa-net har iga karadat təlil. Igammay d ad isəttəddu i Kəl-Əlyəhud isalan win itaggu dağ batu ən Taɣmar ta n Məššina. ⁹ Mišan

saggarmaman wiyyad daḡ-san iwallan-nasan, ugayan s ad əzzəgzənan s awa igannu, fadda ad gannin dat tiddawat aratan wər noleḡ əs tarrayt ta n Əməli. Imməzzay dər-san Buləs, iddew əd nalkiman ən Ƴaysa; a tan-isasaḡru akk əzəl daḡ ahan ən taḡaray n aləs iyyan igâ esəm Turanus, ¹⁰ har iga əššin elan; har as aytedan win akal n Asəya, gər za win Kəl-Əlyəhud wala win Kəl-Əlyunan, ketnasan əslan y awal n Əməli.

¹¹ Isisugu Məššina Buləs təlməxjujaten wər nətawazday, ¹² har as, tamawayan əlkəşifatan əd təsəwad ən təbdoq ədasnen Buləs fəl a sər-san təwədəsan miranan. Tazzayan aytedan en daḡ təwərnawen-nasan; win daḡ-san əhan kələsuf deḡ gammadan-tan.

¹³ Ənkaran Kəl-Əlyəhud wiyyad əllâmnən gər kallan, takkasan kələsuf daḡ aytedan, ad gammayan əntanay da d-ikus ən kələsuf daḡ aytedan s esəm ən Ƴaysa, gannin daḡ təməgraw-nasan: «Əhâdaḡ-awan əs Ƴaysa, was itaggu Buləs isalan-net ar, ad təgmədəm awedan a!» ¹⁴ Əssa meddan ən mədrayan əmosnen maddanəs n əmuzar iyyan n əlimam igân esəm Sewa a tagginen awen. ¹⁵ As ənnan awen y əggəsuf, a dasan-annu: «Əzdâyaḡ Ƴaysa, Buləs deḡ əššânaḡ awa imos, kawanay amaran, ma təmosam?» ¹⁶ Təzzar ifətəqqət daḡ-san awedan wa əhan kələsuf da, əggəznat-tu təḡurad a tu-sisarnanen meddan en ketnasan, iḡləb-tan əs təwit, har as, as gammadan ehan wen, ozâlan, əzzâfan, əbbôsən.

¹⁷ Əslan aytedan n Efez kul awen, gər za win Kəl-Əlyəhud wala win Kəl-Əlyunan. Təggaz-tan tasa ketnasan, təzzar əzzəzwaran wəllen esəm n Əməli Ƴaysa. ¹⁸ A dutasin aytedan əgətnən əzzigzannen əs Məššina, suḡulan ark mazalan win as kala tan-taggin. ¹⁹ Ewayan-du massaxaran əgətnən əlkəttaban-nasan, əssəqqadan-tan dat awedan kul. Itawaxsab awa d-ənzən, iqqal səmmosat təmərwən n əgim ən tamma n əzrəf. ²⁰ Əmmək en da as təzawwazawaz tarna n Əməli awal ən Məššina, təssəkna assahat ta təhat awal ən Məššina.

²¹ Dəffər awen, isammarkas Buləs daḡ man-net iki ən Yerusalam, immər akal wa n Masedonəya əd wa n Akayya. Igannu daḡ man-net: «Dəffər as oseḡ Yerusalam, kundaba əkkeḡ aḡrəm wa n Ərrum ənta da.» ²² Təzzar izammazal Timotay d Erastus win madhalan-net s akal ən Masedonəya, mišan ənta iman-net igla iha akal wa n Asəya har daḡ-as ihog.

Šiməxutar šin d-eway əlyibada n əssənəman daḡ Efez

²³ Azzaman en inijarway daḡ-san aḡrəm n Efez wəllen fəl əddəlil ən tarrayt ta n Əməli. ²⁴ Ill-ay anad iyyan igân esəm Demetrəyəs, itaggin daḡ əzrəf fototan n ahan n əssənəm iyyan imosan tantut təgât esəm Artemis. Igarraw daḡ awen tənfa təknât igət i nadan win midawan-net. ²⁵ İššedaw-tan-du ketnasan, əntanay əd nadan wiyyad win əddarnən daḡ awen, inn-asan: «Ya meddan, təssânam as təgərgist-nana, təqqân daḡ əššəḡəl wa da. ²⁶ Mišan təhannayam kawanay iman-nawan, təslâm deḡ awa itaggu aləs wədi as itawannu əddi Buləs. A igannu: "İmalan win əgan fassan n aytedan, wər əmosan fadda imalan." Izazzagzan awen y aytedan əgətnən, wərge da da daḡ Efez ḡas ad issəxrak aytedan, kalar harkid taššam n aytedan win akal n Asəya kul. ²⁷ Arat wa, wərgəḡ əššəḡəl-nana ḡas as du-z-awəy iguz ən tazak n ad itəwəlku, kalar ehan n əlyibada wa n Artemis di maqqarat, ta təmosat təməlit-nana ənta da ad irtək almaqam-net, tammazzay fadda d ətəwəsəḡmar, ənta əḡbâdan aytedan kul win akal n Asəya, d əddənət ketnet.»

²⁸ As əslan aytedan win das-əssəsamnen y awen, iggaz-tan alham labasan, əssokan imaslan-nasan ijənnawan gannin: «Artemis ta n Kəl-Efez di maqqarat!» ²⁹ Təga tənajarwayat daḡ aḡrəm ketnet. Tənkar tamattay təggag s ahan zəwwəran wa n əməney, təlwây Gayəs d Aristarxus win akal ən Masedonəya əmosnen imidawan ən

Buləs dər iddew daɣ əşikəl. ³⁰ Təzzar ira Buləs ad akku tamattay ten, mišan əgdalan-as-tu nalkiman ən Ƴaysa. ³¹ Wala arat daɣ muzaran n akal n Asəya ən midawan-net da, zammazalan sər-əs aytedan y a daɣ-as əgməyan ad wər ikka ehan en. ³² As itaggu awen, tamattay ta təddewat daɣ ahan en, ketnet tənjarway. Siɣaren aytedan daɣ jənnawan gannin aratan wər nola, fəlas taššam-nasan wər əssenən fadda əddəlil wa fəl əddewan den. ³³ Əbdaxan-in Kəl-Əlyəhud aləs igân esəm Alaskandər əs tiddawat, ittəmal-as awa igan den. Təzzar ad isidugin s əfus-net i tamattay təfastit, y a dasan-iššiwəl s esəm ən Kəl-Əlyəhud. ³⁴ Mišan as əgran as awedan ən Kəl-Əlyəhud a imos əssokan imaslan-nasan ijənnawan jajjəyən gannin: «Artemis ta n Kəl-Efez di maqqarat!» Har din-əkkan edag ən sanatat assaxaten gannin awen.

³⁵ Aləs wa imosan ənaktab n əxrəm en, ənta a isahhadarren tamattay en, inn-as: «Ya meddan n Efez, awak ill-ay awedan wər nəssen as, əxrəm wa n Efez ənta a imosan əmagaz n ahan wa daɣ tətəwaxbad Artemis di maqqarat əd šaššelan-net igân daɣ təhunt as jənnawan a daɣ du-tərtak? ³⁶ Zama wər t-illa awedan as ijhâl awen, wədi ihôr ad təhədərrem, ad wər tagim arat waliyyan daɣ tararada, ³⁷ fəlas meddan win du-təlwayam da, wərmâd əmôsan ibaydagan ən nan win əlxibada, wala deɣ ənnan a labasan əs təməlit-nana. ³⁸ Amaran kud Demetrəyəs əd nadan win midawan-net ill-ay a dasan-iɣšâd awedan, wədi əllân-tu jilan win daɣ itaggu əššəriɣa, əllân-tu deɣ naxkiman win tu-tagginen. Akkinet-tan. ³⁹ Kud deɣ wiyyad aratan a dər təssəstanam, ad tətəwəknu taɣawšay tədi daɣ asaggawar wa iskatan s awen. ⁴⁰ Nakkanay da əmərədda əhanen tazak n ad itiwənnu əfəlləg a nəga fəl əddəlil n awa igan azalada; fəlas wər t-illa əsarə nəga as nənna ənta a fəl təga tənajarwayat ta.» Iɣrad ənaktab n əxrəm awal wen ɣas, inna i tamattay ad təwəziwəz.

20

Əššəɣəl ən Buləs daɣ Masedonəya d akal ən Kəl-Əlyunan

¹ As ədraran aytedan, isassaɣra-du Buləs inalkiman ən Ƴaysa ig-asan ənnəsixa issəsmađ iwallan-nasan, amaran inamagga dər-san šiwatiriwen, igla ikka akal ən Masedonəya. ² Irzag akal en itaggu ənnəsixatan aggotnen i nalkiman ən Ƴaysa, italam-asan fəl man, dəffər awen ikka akal wa n Kəl-Əlyunan. ³ Iga daɣ-as karadat təlil. Isimutug y iguz n əɣlal n aman s akal ən Surəya as t-əggazan salan n as əgân Kəl-Əlyəhud eɣaf fəl a t-anɣin, təzzar iga tanat n ad iqqəl dəffər-əs, agu tarrayt ta n Masedonəya.

⁴ Iddew əd Sofatrəs ag Fərəs wa n əxrəm ən Berawya, d Aristarxus əd Səkəndus win n əxrəm ən Tesalonik, əd Gayəs wa n əxrəm ən Derbe, əd Tişik əd Trofiməs win n akal n Asəya amaran əd Timotay. ⁵ Əgla meddan win, azzaran-anax, əqqalan-anax daɣ əxrəm ən Trowas. ⁶ Amaran nakkanay as fall-anax okay əmud wa daɣ tattin aytedan šigəlwen šin wər iha xamira, nəggaz aylal n aman daɣ Filib nəkka Trowas. As nəga səmmos adan fəl agaraw nos-en-in, nəga den əssa adan.

Assa ən Buləs i Trowas

⁷ As əzəl wa n alxad imosan əzəl wa azzaran daɣ jilan, nəmmənay daɣ adag iyyanda y ad nədrəw imensewan win saktan. İššewal Buləs i nalkiman ən Ƴaysa win əllanen den har isiggaraygaray ahad fəlas əşikəl a fəl insa. ⁸ Əhanat fətəlaten aggotnen ehan imosan suru wa daɣ nəmmənay. ⁹ A iššewal Buləs den, iqqim aləs iyyan n əmawad igân esəm Yutəxos fəl fənətər. İlla den har t-iggaz etəs ad itanaddam. İgla har daɣ-as igla etəs wəllen, ifataqqat, ikka amađal. Fənətər ən suru wa n karad a fəl d-ifataqqat den. As d-immədkal, wər idder. ¹⁰ İzzəbbat-du sər-əs Buləs ənta da, ifataqqat fall-as, izalammat-tu, inna: «Ad wər təššəwəšam, iddâr.» ¹¹ Təzzar iqqal Buləs ehan wa d-izzəbbat, izun imensewan win saktan, as ətšan, ilas Buləs iššewal-asan har

du-təgmad təfuk, əddi amaran ad igla. ¹² Əmawad ənta, əddewan dər-əs aytedan s aɣaywan iddâr, wər ila əxəli. Ketnasan olam-asan awen wəllen fəl man.

Şiwatriwen şin əlkammen inamagga Buləs əd muzaran n Əlkənisat n Efez

¹³ Nakkanay nəgla nəggaz aɣlal n aman nəkka aɣrəm n Assos, nazzar i Buləs. Den da a fall-ana du-z-iggəz aɣlal, imos as awen da as otas igi-net. Ənta iman-net a ira a din-ijəwənkət. ¹⁴ As dana-d-osa daɣ Assos, nənamaggaz dər-əs aɣlal n aman, nəkka aɣrəm ən Mitilenəs. ¹⁵ Nəgmad Mitilenəs nəhâ aɣlal n aman, as əzəl wa hadan nəmmoday y akal imosan gər wətlan as itawannu Xəyyaw, əzəl wa dəffər wədi newad wa n Samos, əzəl wa dəffər wədi nosa aɣrəm ən Miletəs. ¹⁶ Igâ Buləs tanat n as, wər z'immər Efez fəl ad wər aɣlalat daɣ akal n Asəya, fəlas irrorad Yerusalam fəl a daɣ-as t-agu əmud wa n Fantəkawt, kud adi ifrâg igi.

¹⁷ Əzəbbi wa nəga daɣ Miletəs a ɣur izammazal Buləs awedan, issəgmay imuzaran n Əlkənisat n Efez. ¹⁸ As t-id-osan inn-asan: «Kawanay iman-nawan əhân-kawan salan ən tassaɣ ta dər-wan əgeɣ, wa d-əggazaɣ akal n Asəya əzəl w'azzaran, har awas kawan-əfala; ¹⁹ d əmmək was tagga əşşəxəl n Əməli əssirasay iman-in daɣ arat kul, iddew-i awen əd məttawan əd təməxutar şin sər-i du-tawaynat ark tənagmayen şin di-taggin Kəl-Əlyəhud. ²⁰ Təssânam deɣ as, wər kala a dawan-əxbara arat waliyyan a dawan-təha tənfa, aqqama wər dawan-t-əmela, sassaxr-awan-tu, gər za dat aytedan wala deɣ daɣ nan-nawan. ²¹ Wər kala əmməzzaya d agamay daɣ Kəl-Əlyəhud əd win tan-wər-nəmos ad utaban əs Məşşina, əzzəgzənan s Əməli-nana Ƴaysa.

²² Amaran əmərədda nak da izzəlzam Infas wa Zəddigan iki n Yerusalam, wər əssenay awa di-iqqalan daɣ-as. ²³ Arat iyyanda ɣas a daɣ əssanay as, ig-i Infas wa Zəddigan ta daw aɣaf as, aɣrəm oseɣ da ilkâm daɣ-i kasaw d aɣazab. ²⁴ Wər ɣur-i təmos təməddurt-in fadda wala, arat wa ɣur-i t-imosan a d-əssəxsəla arat wa dəffər ozala, əxrəda əşşəxəl wa daɣ-i iga Əməli Ƴaysa, imosan emel n Əlinjil a əhan salan n arraxmat ən Məşşina. ²⁵ Amaran əmərədda əssâna daɣ-as, kawanay win gər əllama da, əmmâla Taymar ta n Məşşina, wər di-za-tələsam anay. ²⁶ Adi a fəl kawan-əgeɣ azalada şigəyyawen n as, ab'as di-iwar alxaq n əzni ən waliyyan daɣ-wan. ²⁷ Fəlas wər kala a dawan-əxbaraɣ arat waliyyan, əmâlaɣ-awan tarrayt kul ta d-iktab Məşşina.

²⁸ Daɣ adi ənkədat əd man-nawan, təssənam deɣ daɣ tamattay ketnet tas kawan-iga Infas wa Zəddigan imagazan-net, tagim y Əlkənisat ən Məşşina təmədint tolâxat, ənta di da a d-izzənza Əlməsix s əzni wa-net iman-net. ²⁹ Əssânaɣ as, nak as əgleɣ a kawan-d-əggəzan aytedan wər nəzlay əd təzoriyawen labasnen, wər za nayyu Əlkənisat-nawan wər tat-ədesan. ³⁰ Kawanay iman-nawan da, əhân-kawan aytedan as za safraxnen tidət fəl ad əssəxrəkan inalkiman ən Ƴaysa. ³¹ Daɣ adi agat ənnəyat, a du-təkattim as karad elan a əgeɣ sasaxraq-qawan s iyyan iyyan ehad ezal, əssirtayay awen əd məttawan.

³² Amaran əmərədda əssiɣlafaq-qawan i Məşşina əd salan win əmmalnen arraxmat-net. Məşşina ifrâg əsəssuhi n əzəgzan-nawan d əsəttəddi n agaraw wa za tagim daɣ təkəsət ta issənsa y aytedan kul win zaddognen. ³³ Wər di-ides as əgəx attama-nin daɣ əzrəf wala urəx wala isəlsa n awedan waliyyan. ³⁴ Kawanay iman-nawan təssânam as, ifassan win-da-nin as əşxala, əkneɣ s əşşəxəl-nasan tuməxlaten-in əd şin midawan-in win dər əddewa. ³⁵ Faw saknaq-qawan as, əmmək en da as kawan-iwar kawanay da, ad təşxəlam fəl ad tilalam i maddararan, a du-təkattim batu ta iga Əməli Ƴaysa ənta iman-net, as inna: "Əbbələl wa itaggu awedan wa ikfan, ogar wa itaggu awedan wa igrawan."»

³⁶ As inna Buləs awen, igaraffat ənta dər-san ad itattar. ³⁷ Ketnasan hallin, tizələmmen Buləs, tamallen-as. ³⁸ Arat wa iğšadan iman-nasan wəllen, tənna ta dasan-iga, wər tu-z-ələsan anay. Amaran əntagan-tu har osa aɣlal n aman.

Şigəyyawen daɣ Ɛrrum

21

Iki ən Buləs əd midiwan-net Yerusalam

¹ As dər-san nəmməzzay gərrid, nəggaz aɣlal n aman, izzal dər-na s akal imosan gərwətlan as itawannu Kos. As əzəl wa dəffər wen, nəgmad-tu s akal imosan gərwətlan as itawannu Rodəs. Nəgmad Rodəs nəkka əyrəm ən Fatara. ² Nogaz-in daɣ-as aɣlal n aman itakkin akal wa n Fenisəya, təzzar nəggaz-tu, nəgla. ³ As nogga akal imosan gərwətlan as itawannu Qıbrus, nəɣlay-tu fəl aganna wa n agala, nədag sa sər akal wa n Surəya har nəzzəbbat daɣ əyrəm ən Tir s ənta a daɣ za təwəzəzəbben lalan win eway əɣlal. ⁴ Nəgmay inalkiman ən Ƴaysa har tan-nəgraw, nəzzəbbat ɣur-san har nəga əssa adan. Nəlla ɣur-san as tan-issosan Infas wa Zəddigan daɣ ad annin i Buləs, ad wər akku Yerusalam. ⁵ Dər iga awen da ya, as əndan adan win den, nəmatakway nəgla. Əntagan-ana ketnasan, harkid tədoden-nasan əd bararan-nasan har nəgmad əyrəm, amaran nəgaraffat daɣ tama n agaraw, nəttar. ⁶ As dər-san nənamagga şiwatriwen, nəggaz aɣlal n aman; əntanay əqqalan iɣawnatan-nasan. ⁷ Nəgla daɣ əşşikəl-nana, nəgmad Tir nəkka Bətölemayəs. As daɣ-as nəzzəbbat, nəkka imədrayan-nana win t-əhanen y a tan-nəssəsləm, nəga ɣur-san əzəl. ⁸ As əzəl wa dəffər wen nəkka əyrəm ən Qaysarəya. As t-in-nosa nəzzəbbat daɣ ahan ən Filibus wa n əməggi ən salan n Əlinjil imosan iyyan daɣ meddan win əssa, win as kala tawasanafranən fəl ad tilalan y Əlkənisat ta n Yerusalam.

⁹ İla əkkozat təbararen wər nəzday meddan. Şibararen şin əmosnat tənəbiten. ¹⁰ As nəga adan aggotnen den, osa-du ənnəbi iyyan igân esəm Agabus, a d-ifalan akal ən Yahudəyya. ¹¹ Os-ana-du, idkal əsatəb ən Buləs, ikrad sər-əs idaran win-net iman-net əd fassan-net, amaran inna: «Ənta da awa inna Infas wa Zəddigan: "Aləs wa ilan əsatəb wa, əmmək wa da as tu-z-əkrədan Kəl-Əlyəhud daɣ Yerusalam, agin-tu daɣ fassan n aytedan wər nəmos Kəl-Əlyəhud."» ¹² As nəsla y awen, ad nətansay Buləs, nakkanay əd nalkiman ən Ƴaysa win əyrəm en fəl ad wər aggəzzay akku Yerusalam. ¹³ Mişan inn-ana Buləs: «Ma fəl təhallim, təsimələşşem əwəl-in? Nak, wərgəɣ kerrad ɣas as sammataga, kalar tamattant da simatagaɣ-as daɣ əyrəm ən Yerusalam fəl əddəlil n esəm n Əməli Ƴaysa.» ¹⁴ As nənay as wər t-idu-za-nəssuyəl daɣ awas ira igi-net, noyy-ay, nənna: «Aget Əməli tara-net!» ¹⁵ Dəffər adan win den ad nasammatag i teklay, nəgla nəggəzzay əs Yerusalam. ¹⁶ Əddewan dər-na arat daɣ nalkiman ən Ƴaysa win əyrəm ən Qaysarəya. Ewayan-ana s ahan n aləs igân esəm Mənasən n akal imosan gərwətlan as itawannu Qıbrus, irəwan imos analkim ən Ƴaysa, nəzzəbbat ɣur-əs.

Əmənyən ən Buləs əd muzaran n Əlkənisat ən Yerusalam

¹⁷ As din-nəggaz Yerusalam, əgan-ana mədrayan-nana daɣ əzəgzan win əllanən den marxaba, əddəwen. ¹⁸ As affaw iddew dər-na Buləs s ahan ən Yaquub ɣur əddəwan əmyaran n Əlkənisat ketnasan. ¹⁹ İssəslam-tan Buləs, təzzar iɣrad-asan əsuyəl n aratan kul win iga Məşşina əs tarrayt n əşşəɣəl wa itaggu Buləs daɣ aytedan win wər nəmos Kəl-Əlyəhud. ²⁰ As əslan y aratan win inna, ad əmmâlan Məşşina. Dər iga awen da ya ənnan i Buləs: «Amədray-nana, ənəy igiman əs giman n aytedan win əzzəgzannen əs Ƴaysa daɣ Kəl-Əlyəhud, ketnasan zizawen wəllen daɣ iduf n əşşəriɣa wa n Əttəwret. ²¹ Ewâdan-tan-du za salan wizawaznen daɣ batu-nak, əmosnen as: əsəssəɣri wa tətəgga, itaway-du əs Kəl-Əlyəhud kul win

əhanen šimattiwen šin wər nəmos Kəl-Əlyəhud əməzzəy d əššərixa wa n Əttəwret, təgannaḡ-asan ad ammazzayan d əsəmmənkəd ən bararan-nasan əd ləkkum y alyadaten ən Kəl-Əlyəhud. ²² Daḡ adi ma za nagu? Fəlas igmâd aššak as ad aslin as toşəy-du. ²³ Eddəlil wədi a fəl za taga a wa dak-za-nannu da: Əhân-anay əkkoz meddan ədkâlnen aḡḡawal. ²⁴ Idaw dər-san s adag wa daḡ zazdagan aytedan, təzzəzdəga iman-nak kay dər-san, tərzəmaḡ fall-asan arat wa tan-ihan, fəl a dasan-təwəlzın ḡafawan-nasan. Eddi ad z'əssənan aytedan kul as, awa sər-ək itawannin wər t-ihā a igân, kalar kay da təl-kâmaḡ y əššərixa wa n Əttəwret. ²⁵ Amaran aytedan win wər nəmos Kəl-Əlyəhud win əlkamnen i ḡaysa, nəktâb-asan širawt əhânat tənaden šin nəḡa əmosnen as, ad wər atšın isan əmosnen takutay y əssənam, wala ašwin azni, wala atšın isan n əmudar tənḡa tarzam, wala agin əzzəna.»

²⁶ Təzzar iddew Buləs əd meddan win əkkoz en. As əzəl wa dəffər wen izzəzdaḡ iman-net ənta dər-san, amaran iggaz Ehan wa Zəwwəran n Əlyibada, imal i limaman əzəl wa daḡ za tandu tazdak-nasan, əzəl wa daḡ za tətəwəkfū təkutay fəl akk iyyan daḡ-san.

Ətərməs ən Buləs daḡ Ahan wa Zəwwəran n Əlyibada

²⁷ As zama daḡ-san əkmâlan əssa adan, tandu tazdak-nasan, ənayan Kəl-Əlyəhud wiyyad n akal n Asəya Buləs daḡ Ahan wa Zəwwəran n Əlyibada; təzzar jannajarwayan tamattay, əgan daḡ-as arak man əs Buləs, əbazan-tu. ²⁸ Gannin s afalla: «Ya Kəl-İsrayil, agəzat! Ənta da aləs wa itaggin daḡ təl-xutbaten šin itaggu y aytedan kul daḡ adag kul ark awalan fəl tamattay-nana, d əššərixa wa n Əttəwret d Ahan wa Zəwwəran n Əlyibada wa. Iḡla har as, igā-du Kəl-Əlyunan daḡ Ahan wa Zəwwəran n Əlyibada, isammadas edag zəddigan wa.» ²⁹ Gannin awen fəlas dat awen ənâyan Trofiməs wa n Efez daḡ əḡrəm iddew əd Buləs; təzzar ordan as izzogaz-tu Buləs Ehan wa Zəwwəran n Əlyibada.

³⁰ Inajarway əḡrəm ketnet, ozalan-du aytedan daḡ təsədaḡ kul. Əbazan Buləs, əlwayan-tu əḡmadan dər-əs Ehan wa Zəwwəran n Əlyibada, təzzar tawaharan mawan-net dəffər-san tamazayt ten da. ³¹ Gammayan ad agin iman ən Buləs as din-ewadan salan kumanda ən sojitan n Ərrum n as, əḡrəm ən Yerusalām ketnet inijarway. ³² İyra-du sojitan əd kabtanatan-nasan daḡ tamazayt ten da, ozalan sər-san. As togga tamattay kumanda əd sojitan, tərāz daḡ təwit ən Buləs. ³³ Təzzar ikka-du kumanda Buləs, ibaz-tu, omar s ad itəwəkrəd s əššın sassaran, amaran issəstan d awa imos, d awa iḡšad. ³⁴ Təsəḡarat tamattay ketnet, gannin aratan əmmizraynen. Indar i kumanda ad issən awa imosan tidət daḡ takat ten, təzzar omar s ad ammayay Buləs əs barəki wa n sojitan. ³⁵ As ewad Buləs šisəffəttan n ahan wa n barəki, awa sər-əs təḡa tamattay daḡ əwəjjən, kundaba as t-ədkalan sojitan s afalla. ³⁶ Təl-kâm-as tamattay ketnet, təsiḡarat təḡannu: «Ammatet, ammatet!»

Aljawab wa igā Buləs dat əljəmaḡat

³⁷ As zama dər-əs əḡḡāzan sojitan barəki, inna Buləs i kumanda: «Awak ələy tarrayt n a dak-annaḡ arat?» Inn-as kumanda: «Ko! Kay təssana təlyunant? ³⁸ Daḡ adi wər təmosay aw Masar was kala isaffallag aytedan, təzzar iggaz teneray ənta d əkkoz gim n awedan ən maggan ən man?» ³⁹ Inn-as Buləs: «Nak, Ag-Əlyəhud a əmosay, ihəwan daḡ əḡrəm ən Tarsa daḡ akal ən Kilikəya imosan əḡrəm fəl təḡa masnat. Onsayaq-ḡay a di-takfa turagat n ad əššiwəla i tamattay ta.» ⁴⁰ İkf-as-tat kumanda, ibdad Buləs fəl təsəffəttan, isaddagan s əfus-net i tamattay ad təssəsəm. Təffəsta tamattay ketnet, təzzar iššewal-asan Buləs daḡ təlḡibrit, awal wa-da-nasan, inn-asan:

22

¹ «Imədrayan-in d abbatan-in, səsəmat əməmədda a kawan-sassagra tādłəmt ta tawagga.» ² As das-əslan iššewal-asan daɣ təlɣibrit, əššotan daɣ əsəsəm y-as; təzzar inn-asan: ³ «Nak Ag-Əlyəhud a əmosa, ihəwan daɣ əɣrəm ən Tarsa ihân akal ən Kilikəya, mišan aɣrəm wa daɣ a daɣ ədwala, əɣrəɣ daw Gamaləyel. Isassayr-i s əlluɣ ləkkum y əlqanun n aljad-nana. Əgeɣ gəlleyat daɣ ləkkum i Məššina šilat ən ta təgam azalada. ⁴ Əzaɣazzabaɣ aytedan win əhanen tarrayt ta da ən Ƴaysa, har əgmadan man wiyyad, karrada meddan əd tədoden, əggaraq-qan daɣ kasaw. ⁵ Əlimam wa Zəwwəran d Asaggawar wa n əɣmaran əggəyyen fəl adi. Əntanay fadda a di-əkfanen šira əkkanen imədrayan-nana, Kəl-Əlyəhud win Damas, fəl ad əgrəwa as din-oseɣ tarrayt n abbaz ən nalkiman ən Ƴaysa kul win t-əhanen, awəyaq-qan-du əs Yerusalem əkrâdan fəl ad awwaddaban.

⁶ Əššokala za daɣ awen da, as din-əhozəɣ aɣrəm ən Damas attayan n ammas n azal, wala a ihogan, ibalazzat ənnur labasan a d-igmâdan ijənnawan daɣ ɣələyɣələyan-in. ⁷ Udeɣ, əsleɣ y əməsli iyyan as di-inna: "Talut, Talut ma fel as di-təzaɣazzaba?" ⁸ Ənneɣ: "Əməli, ma təmosaɣ?" Inn-i: "Nak awa, Ƴaysa wa n Nazaret, wa təzaɣazzaba." ⁹ Ənâyan aytedan win dər əddewəɣ ənnur wen, mišan wər əslen y əməsli wa di-iššewalan.

¹⁰ Təzzar ənneɣ: "Əməli, mas di-iwar igi-net?" Inn-i Əməli: "Əbdəd, takkaɣ aɣrəm ən Damas, a dak-daɣ-as-attamal arat kul was kay iwar igi-net." ¹¹ Əddəɣala fəl təllabəst n ənnur en, təzzar əbazan aytedan win dər əddewa əfus-in, əlwayan-i əs Damas.

¹² Amaran Damas ih-et aləs iyyan igân esəm Ananəyâs iksudan Məššina wəllen, ilkâm y əlqanun-nana, as Kəl-Əlyəhud kul win Damas əssiɣmaran-tu. ¹³ Os-i-du, ibdad dəgma-nin, inn-i: "Amadrəy-nin Talut, iqqələt-kay-du asawad-nak." Iqqal-i-du asawad-in tamazayt ten da, ənayaq-qu. ¹⁴ Inn-i deɣ: "Məššina wa əɣbadan marawan-nana a kay-isannafranan harwa dat alwaq, y a kay-issusən tara-net, tənəyaɣ Alɣadil-net, tasla deɣ y əməsli wa-net iman-net, ¹⁵ id ad təqqəla təgəyya-net dat aytedan kul, təmələɣ-asan awa tənəyaɣ d awas təsleɣ. ¹⁶ Əməmədda mas təqqala? Əbdəd, tətəwəsəlməɣa daɣ aman, tansəyaɣ Əməli a kay-izzəzdəg daɣ bakkadan-nak."

¹⁷ Dəffər awen əqqala Yerusalem. Tattara əzəl iyyan daɣ Ahan wa Zəwwəran n Əlyibada as di-tobaz tarna n Infas wa Zəddigan. ¹⁸ Ənəyaɣ Əməli, inn-i: "Ətrəb, təgməda Yerusalem tarmâd, fəlas wər z'əqbəlan aytedan-net təgəyya ta fall-i tətəgga." ¹⁹ Təzzar ənneɣ-as: "Ya Əməli, wərgəɣ əntanay iman-nasan əssânan daɣ əmmək was kala ad tilala inan n əlyibada s iyyan iyyan, saɣfaləɣ aytedan win sər-ək əzzəgzannen, əggataq-qan? ²⁰ As itawanɣal deɣ əzni n Əstefanos imosan təgəyya-nak, nak iman-in əlleɣ den, ərdəɣ s ətəwənɣa-net, nak a ogazan ibərnaz n aytedan win əganen iman-net." ²¹ Amaran inn-i: "Aglu, nak a kay-z-izəmmizəlan s igəg, əssukaq-qay aytedan win wər nəmos Kəl-Əlyəhud."»

Buləs əd kumanda ən sojitan win Ərrum

²² Əssisaman-as aytedan har d-idkal batu n aytedan win wər nəmos Kəl-Əlyəhud, təzzar saɣaren daɣ jənnawan gannin: «Itəwəkkəset awedan wa fəl amaɣal! Awedan šilat ən wa, wər immək ad iləs təməddurt.» ²³ Takkasan imaslan saksodnen, əggaran-in ibərnaz-nasan, əggaran aboqqa daɣ alhawa. ²⁴ Omar kumanda s ad itəwəzugəz Buləs ammas ən barəki, təwəgginat-as təwit s ələkkud fəl a dasan-iməl əddəlil wa fall-as təsaɣarat tamattay. ²⁵ Mišan as t-əkradan y a das-agin šiwwit, inna i kabtan wa illan den: «Awak təlâm tarrayt ən təwit n iyyan daɣ Kəl-Ərrum wər ibez əššəriɣa harwada?» ²⁶ As isla kabtan en y awen, igla imal i kumanda, inn-as: «Ma tətəgga da? Aləs a, in Ərrum!» ²⁷ Ikka-du kumanda Buləs, inn-as: «Tidət as kay in Ərrum?» Inn-as Buləs: «Awalla!» ²⁸ Təzzar inna kumanda: «Nak, azrəf

aggen a əzzənza tišit n iyyan daɣ Kəl-Ərrum.» Inn-as Buləs: «Nak ələsəl-in a təmos.»
²⁹ Tarmâd as fall-as əzzəkazan sojitan win as zama a t-əggazan šin tanaxay y a tu-šəššiwəlan. Kumanda iman-net as issan as iyyan daɣ Kəl-Ərrum a isassakrad den əs sassaran, təggaz-tu tasa.

Tebadday ən Buləs dat Asaggawar wa Zəwwəran

³⁰ As əzəl wa dəffər wen, omar kumanda imuzaran ən limaman d Asaggawar wa Zəwwəran ən Kəl-Əlyəhud ketnet s ad ammanay, fəlas ira ad ikkəs aššak daɣ əddəlil wa fəl sattarmasan Kəl-Əlyəhud Buləs. Təzzar issokas-du Buləs, issəbdad-tu dat-san.

23

¹ Idag Buləs Asaggawar s asawad-net, inna: «Imədrayan-in, wər di-təha tərək waliyyat n as ill-ay arat a iqqal wər ira Məššina as kala ad t-əmmozala har awas əbdada da.» ² Mišan omar Ananəyās wa n Əlimam wa Zəwwəran iyyan daɣ aytedan win əllanen dəgma ən Buləs s a das-infəz. ³ Təzzar inn-as Buləs: «Məššina a dak-z-infəzan, əlmunafiq! Wər təqqimaɣ əddi ar y a di-təšrəxa s awa inna əššərixa, kay təmməzrayaq-qu ad təsawatay imi-nin.» ⁴ Ənnan-as aytedan win əllanen dəgma-net: «Kay, Əlimam wa Zəwwəran ən Məššina a tərabbada?» ⁵ Inn-asan Buləs: «Wər əssenay imədrayan-in as ənta a imosan Əlimam wa Zəwwəran; tidət daɣ as iktâb as: "Ad wər tannay a labasan s əmənokal ən tamattay-nak."»

⁶ Issân Buləs as tēzunt n Asaggawar en iyyat Sadusaytan a daɣ tēga, ta hadat Farisaytan; adi a fəl idkal əməsli-net wəllen dat Asaggawar, inna: «Imədrayan-in, nak Farisay a əmosa, erâwan wiyyad Farisaytan, wər d-əmməwaya s adag n əššərixa wa, ar fəlas əgeɣ attama daɣ as inəməttan ilkâm a d-ənkəran daɣ tamattant.» ⁷ Inna awen ɣas tənkar tamazaq gər Farisaytan əd Sadusaytan, tēzun tiddawat, ⁸ fəlas Sadusaytan əttâfan as wər tu-təlla tanakra daɣ tamattant, wala əllân-tu angalosan, wala kələsuf. Farisaytan amaran əntanay əzzigzanan as awen kul ill-ay. ⁹ Təkkus tamazaq wəllen. Inkar arat daɣ musanan win Farisaytan əbbəllanan fəl awen, əwaran aganna ən Buləs, ad gannin: «Aləs wa, wər fall-as nəhənnəy lahan waliyyan! Mijas tidət daɣ as iššəwal-as aggəsuf madeɣ angalos.» ¹⁰ Awa tēga tamazaq-nasan daɣ tuksay, tēggaz tasa kumanda n ad agin Buləs tankət-tankət. Adi a fəl omar sojitan s ad azzabben fəl a daɣ-san d-əxtəsan Buləs, awəyan-tu əs barəki-nasan. ¹¹ As iga ahad, inafalal Əməli i Buləs, inn-as: «Buləs, a kay-wər-təggəz tasa! Əmmək wa daɣ as fall-i tēggəyyey daɣ əɣrəm ən Yerusalam, əmmək di da as kay-iwar a fall-i taggəyyey daɣ wa n Ərrum ənta da.»

Əgan Kəl-Əlyəhud eɣaf fəl ad anɣin Buləs

¹² As affaw, namaggan Kəl-Əlyəhud eɣaf, əhadan as wər z'atšin, wala ašwin iket wər əgen iman ən Buləs. ¹³ Aytedan win əhadnen den, ogaran əkkozat təmərwen. ¹⁴ Əkkan imuzaran ən limaman d əmɣaran ən tamattay, ənnan-asan: «Nəhâd as, wər z'iggəz arat imawan-nana iket wər nəga iman ən Buləs. ¹⁵ Daɣ adi əmərədda kawanay d Asaggawar wa Zəwwəran əgməyat daɣ kumanda a dat-wan issəbdəd Buləs, tassaknim as, a təram ad taššaggaram taɣara-net s əlluɣ. Amaran nakkanay, nasimatag y igi ən man-net harwa du-wər-ewed da.» ¹⁶ Mišan isla tagazay ən Buləs i taftaw ten, ikka barəki ən sojitan, iggaz-tu, imal i Buləs. ¹⁷ Təzzar iɣra-du Buləs iyyan daɣ kabtanatan, inn-as: «Əlwəy abi di əs kumanda, ila isalan a das-z-agu.» ¹⁸ Iddew dər-əs kabtan, eway-tu əs kumanda, inn-as: «Amaskasaw wa igan Buləs a di-d-iɣran, igmay daɣ-i a sər-ək d-əlwəya abi a, ilân isalan a dak-z-iməl.» ¹⁹ İbaz kumanda əfus n əbi, igmad dər-əs aytedan, issəstan-tu, inn-as: «Mas tareɣ a di-tu-təməla?» ²⁰ Inn-as əbi: «Kəl-Əlyəhud əgân eɣaf fəl a daɣ-ak əgməyan tufat ad tēssəbdədə Buləs dat Asaggawar-nasan wa Zəwwəran, almat ərân ad aššaggaran taɣara-net s əlluɣ. ²¹ A

dasan-wər-tarda fəlas wiyyad daḡ-san ogarnen əkkozat tēmərwen n aləs a das-za-bəkəmmətnen y ad agin iman-net. Əhâdan as wər z'atšin za wər z'ašwin iket wər əgen adi. Simatagan əmərədda, wər əqqəlan ar y a t-id-tayya sər-san.»

²² Iryam kumanda y əbi wen fəl amel y awedan waliyyan isalan win das-iga den, amaran issəgl-ay.

Əməwəy ən Buləs s əmuzar ən Qaysarəya

²³ Dəffər awen iyra-du kumanda əššin kabtanatan, inn-asan: «Səmmutəgat sanatat tēmad ən soji d əssayat tēmərwen ən soji daḡ win əggannen əggəsan əd sanatat tēmad daḡ win əttafnen allaxan; y ad akkin Qaysarəya dəffər təsudəsen.

²⁴ Təsəmmutəgam deḡ šisənay šin z'iwən Buləs, təšəššiwədam-t-in Felikəs wa n ənaxkim daḡ alxer.» ²⁵ Amaran iktab-as-in kumanda širawt inn-as-in:

²⁶ «Awa nak Klawdəyus Lusəyas din-ihulan ənaxkim Felikəs əknəy saymar. ²⁷ Aləs di, a əbazan Kəl-Əlyəhud, as zama əgân iman-net as tan-in-oseḡ əddewəḡ əd sojitan. As di-əggazan salan n as awedan n Ərrum a imos, əgeq-qu daḡ adag a daq-q-in wər ikka arat. ²⁸ Dəffər awen ewayaq-qu s Asaggawar-nasan wa Zəwwəran fəl ad əssənəḡ lahan wa t-əssəwaran. ²⁹ Ənayəḡ as, arat iqqâlan əššəriḡa wa-nasan ḡas a fəl tu-ḡattasan, wərgəḡ arat a t-issiwəran tamattant wala iguz ən kasaw. ³⁰ Mišan as əsleḡ as əgân Kəl-Əlyəhud eḡaf fəl ad agin iman-net, əssokəḡ-ak-in əddi da, əntanay amaran ənnəḡ-asan a sər-ək in-awəyan kay šixəttas šin t-əgan.»

³¹ Əgan sojitan awas tawamaran. Əqlan ahad wen da, əddewan əd Buləs har osan aḡrəm n Antifatris. ³² As əzəl wa dəffər wen əqqalan-du sojitan win jawankatnen barəki-nasan, əqlan win əwannen əggəsan əd Buləs. ³³ As din-osan aḡrəm ən Qaysarəya, əgan širawt tanad daḡ əfus n ənaxkim, əssəbdadan dat-əs deḡ Buləs. ³⁴ Iyr-et, amaran issəstan Buləs d akal wa t-ilan. As issan as akal ən Kilikəya a t-ilan, ³⁵ inn-as: «As d-osan aytedan win kay-əḡtasnen, a kay-du-sassaḡra.» Təzzar omar s ad itəwəttəf Buləs daḡ ahan ən təmənukəla was kala t-issəkras əmənokal Herod.

24

Ətəwəsəbdad ən Buləs dat ənaxkim Felikəs

¹ Səmmos adan dəffər awen, osa-du Ananəyâs wa n Əlimam wa Zəwwəran, iddew-du d arat daḡ əmyəran ən Kəl-Əlyəhud d aləs a d-əwwikkalan Kəl-Əlyəhud igân esəm Tertuləs. Əḡtasan Buləs ḡur ənaxkim n akal Felikəs. ² Təzzar itawayra-du Buləs, amaran issənta Tertuləs daḡ amel n aratan win as ənnan Kəl-Əlyəhud iḡšâd-tan, inna: «Ya əmizwar Felikəs, əddəlil-nak d əddəlil n aratan win təgeḡ a fəl igraw akal wa alxer aggen, amaran təgeḡ ənnizam olaḡan i tamattay-nana fəl aššaddat ən təla-nak əgərri. ³ Nətigudəy-ak wəllen daḡ adag kul aratan olaḡnen kul win təgeḡ, ya əmizwar Felikəs! ⁴ Wər areḡ a kay-səlluləḡ, batu-nana ši gəzzulat, mišan əgmâya daḡ-ak fəl əddəlil n əlluḡ-nak a dər kay-nəzdây a dana-təssəsəma. ⁵ Nənây as aləs a, əlməssibat a imos, igammayan d əsəffəlləḡ ən Kəl-Əlyəhud edag əhan daḡ əddənət, imos deḡ əmuzar ən taggayt n arat n aytedan as itawannu Nazaritan. ⁶ Wala Ehan wa Zəwwəran n Əlḡibada da, igmây d əsəmmədəs-net; nəbaz-tu. [Nərâ a das-nagu əššəriḡa wa-nana, ⁷ mišan os-ana-du kumanda Lusəyas, ibaz-tu daḡ-na s assahat, ⁸ omar deḡ a dat-ək əbdədan aytedan win əḡtasnen Buləs.] Kay iman-nak as tu-təssəstana, ad tənəya tidət ən təḡəttas kul šin das-nəga.» ⁹ Təzzar ərdan Kəl-Əlyəhud əd batu ən Tertuləs, ənnan tidət a təmos.

¹⁰ Isaddagan ənaxkim i Buləs ad iššiwil. Inna Buləs: «Isidawat-i a dat-ək aga batu tas əgməyəḡ aggaz ən man-in, fəlas əssânəḡ əmənokal-in as, irəw təmosəḡ aməşraḡ ən tamattay n akal wa. ¹¹ Kay iman-nak təfrəḡəḡ ad təssənəḡ kud tidət wala bahu as, a ilân maraw adan d əššin ad əggəzzayəḡ əs Yerusalam y a daḡ-as

əxbəda Məššina. ¹² Wərmâd a di-ənâyan daɣ Ahan wa Zəwwəran n Əlyibada, wala daɣ nan win əlyibada, wala deɣ daɣ əɣrəm, mišawala d awedan waliyyan za wala jinajarwayaɣ tamattay. ¹³ Aytedan win, wər əfregan əsəbdəd ən təxəttas šin di-əgan da. ¹⁴ Mišan ya ərdeɣ s arat iyyanda, amaran ad t-anna dat-ək, a t-imosan as: Məššina di n Əməli ən marawan-nana as əlkama əs təməwit tas tu-tənna tarrayt ta n Əlməsix Ƴaysa, tas gannin əntanay taggayt. Əzzigzanaɣ s arat kul wa iktaban daɣ Əttəwret d Əlkəttaban n Ənnəbitan. ¹⁵ Əgêɣ attama wa daɣ Məššina, amaran əntanay da əgântu, a t-imos as təll-ay tanakra daɣ tamattant, gər za y aytedan win oɣadnen wala win wər noɣed. ¹⁶ Adi a fəlas faw da gammaya nak da wəllen a di-wər-təggəz tərək n a labasan dat Məššina wala deɣ dat aytedan.

¹⁷ A ilan elan ad əgmadəɣ Yerusalam, as əmərədda əqqala-du y a d-awəyaɣ i tamattay-nin širgiten, aga deɣ šikutawen šin izzəlzam Məššina. ¹⁸⁻¹⁹ Awa da a əheɣ as di-d-osan Kəl-Əlyəhud win Asəya daɣ Ahan wa Zəwwəran n Əlyibada, əssindaɣ arat wa di-issəwar əššəriɣa daɣ salan n əzəzdəg-in; wərmad ɣur-i təlla tamattay za wala əssinkara ajeqqəɣ n aytedan. Əntanay as ihor a dat-ək əbdədan, əxtəsan-i ɣur-ək, kud ənta əlân əddəlil waliyyan, ²⁰ madeɣ əməlan aytedan win əllanen da lahan was inna Asaggawar wa Zəwwəran əgêq-qu alwaq wa dat-əs əbdada, ²¹ a wər nəmos as ənneɣ gar-essan s afalla: "Wər di-issəbdad dat-wan azalada y a di-təšrəɣam ar fəl as əzzəgzanaɣ as ilkâm a d-ənkəran nəmməttan."»

²² Felikəs əhân salan wəllen ən tarrayt ta n Əlməsix Ƴaysa, as isla i batu ten, izzərəz əššəriɣa har iyyan əzəl, inna: «As d-osa Lusəyas wa n kumanda ad əxtəsa əššəriɣa-nawan.» ²³ Təzzar omar Felikəs kabtan s ad agəz Buləs, mišan ad wər itəwədgəz, wala itəwəgdəl y aytedan-net a daɣ-as əssənan.

²⁴ Arat n adan dəffər awen, osa-du Felikəs iddew əd təntut-net Drusilla, təmosat wələt əlyəhud; təzzar isassaɣra-du Buləs, issəsam i salan win itaggu daɣ batu n əzəgzan s Əlməsix Ƴaysa. ²⁵ Mišan as d-ewad Buləs isalan win əqqalnen taqqat d ənudi daɣ man d əššəriɣa ən Məššina wa d-izayan, təggaz tasa Felikəs, inn-as: «Əmərədda aglu, as əgrawa təmazayyat n a dər-ək məšiwala, a kay-d-ələsaɣ əsəssəɣri.» ²⁶ A itaggu Felikəs awen, igâ attama daɣ ad t-akfu Buləs azrəf, adi fəl t-id-isasaɣru itaggu dər-əs takkayt. ²⁷ Awen da a igan har əgan əššin elan. Igməd Felikəs tizart, iggaz Borkəyəs Festus edag-net. Oyya-du Buləs daɣ kasaw fəl ad agu tənəfust i Kəl-Əlyəhud.

25

Təbadday ən Buləs dat Festus - Buləs issof a das-išrəɣ Qaysara wa n əmənokəl wa zəwwəran

¹ As igə Festus karad adan d iguz ən tizart ən Yahudəyya, igmad aɣrəm ən Qaysarəya, iggəzzay əs Yerusalam. ² As din-osa, əmmənəyan dər-əs muzaran ən limaman əd muzaran ən Kəl-Əlyəhud, əxtəsan ɣur-əs Buləs. A tu-tansayan, ³ a dasan-əgu tənəfust n ad d-issuku Buləs Yerusalam y a daɣ-as išrəɣ. A gannin awen, əntanay əgân eɣaf fəl a das-bəkəmnen daɣ tarrayt, agin iman-net. ⁴ Mišan inn-asan Festus: «Buləs kasaw wa n Qaysarəya a daɣ itawattaf, amaran ənta iman-net ad iqqəl tarmâd. ⁵ Daɣ adi idawanet dər-i muzaran-nawan əs Qaysarəya, əxətəsanet-tu den da kud ill-ay a iɣšâd.»

⁶ Iga Festus daɣ Yerusalam adan əllanen gər əttam əd maraw, amaran iqqal Qaysarəya. As əzəl wa dəffər wen, iqqim daɣ adag wa daɣ iššarraɣ, təzzar omar s a dat-əs itəwəsəbdəd Buləs. ⁷ As d-osa Buləs ɣalayɣalayan-tu Kəl-Əlyəhud win d-əgmadnen Yerusalam, a tu-ɣattasan sawaran-tu igi n aratan aggotnen labasnen as wər əfregan əsəttəddi-nasan. ⁸ Iššewal Buləs y ad agəz iman-net, inna: «Nak wər əgeɣ ark amazal waliyyan immâran əššəriɣa ən Kəl-Əlyəhud, za wala Ehan wa

Zəwwəran n Əlxibada wala deḡ əgeq-qu i Qaysara əmənokal wa zəwwəran.» ⁹ Festus irân igi ən tənəfust i Kəl-Əlyəhud, inna i Buləs: «Awak tərdeḡ s ad taggazzayəḡ əs Yerusalām dak-daḡ-as-əşrəḡa aratan win di?» ¹⁰ Inn-as Buləs: «Kala, kala! Edag n əşşəriḡa wa, in Ərrum; daḡ adi da da ad za təwəşrəḡa. Wər əḡşedəḡ arat waliyyan i Kəl-Əlyəhud, kay iman-nak təssānaḡ wəllen daḡ adi. ¹¹ Kud əşşəriḡa a əmməzraya, madəḡ əgeḡ arat a di-issiwaran tamattant, ərddeḡ əs tamattant. Mişan kud aratan win as itawanna əḡşâdaq-qan bahu a əmosan, wədi wər t-illa awedan ilân tarrayt n a di-agu daḡ fassan-nasan. Amaran, dad zamas adi a igan, wədi əmənokal Qaysara as areḡ a di-İsrəḡ.» ¹² İmaşşawwar Festus əd məşşewwar-net, amaran inna i Buləs: «Əmənokal Qaysara as tereḡ a dak-İsrəḡ, a tu-takka za.»

Tebadday ən Buləs dat Agriffa əd Bernikəs

¹³ Arat n adan dəffər awen, osa-du əmənokal Agriffa aḡrəm ən Qaysarəya, iddew əd tamadrəyt-net təḡât Bernikəs fəl ad əssəsləman Festus agin-as alafəyet d assa. ¹⁴ Adan aggotnen win əḡan den, idkal-du daḡ-san Festus y əmənokal Agriffa isalan ən Buləs, inn-as: «İlla aləs da, a d-oyya ənaxkim Felikəs daḡ kasaw. ¹⁵ Alwaq wa d-əkkeḡ Yerusalām, əḡtasan-tu ḡur-i muzaran ən limaman d əmḡaran ən Kəl-Əlyəhud, əḡmayan daḡ-i a t-əzzəbəza s əşşəriḡa. ¹⁶ Mişan ənney-asan, əşşəriḡa wa n Kəl-Ərrum wər itibəz awedan ar s ad İsrāḡ. Kundaba innəbdad awedan d aytedan win t-əḡtasnen, aḡəz iman-net daḡ arat wa itawasawar.

¹⁷ Adi a fəl dər-i d-əddewan əs Qaysarəya. Ose-du ḡas, as əzəl wa dəffər wen əqqima daḡ adag wa n əşşəriḡa omara s a d-ammaway aləs wen. ¹⁸ Əbdadan meddan win t-əḡtasnen, mişan wər t-əssəwaran arak əmazal labasan waliyyan daḡ win əḡila. ¹⁹ Awa zaḡnin təmazaq ḡas təḡât daḡ batu n əddin-nasan əd salan n aləs iyyan igân esəm ḡaysa abâ, mişan igla Buləs immâl as iddâr. ²⁰ Nak iman-in wər əssenəḡ əmmək was z'əşrəḡa əzzənəf n aratan win den, adi a fəl əssəstanəḡ Buləs kud irḡa s ad akku Yerusalām İsrəḡ daḡ-as. ²¹ Mişan issof a das-İsrəḡ Qaysara s ənta əmənokal wa dənnəḡ mənokalan. Adi a fəl omara s ad itəwigəz har t-itəwəsuku.» ²² Amaran inna Agriffa i Festus: «Nak da areḡ ad asla y aləs wədi.» Inn-as Festus: «Tufat a das-taslaḡ.»

²³ Əzəl wa dəffər wen iga-du əmənokal Agriffa assa wa n mənokalan ənta əd tamadrəyt-net Bernikəs. Əḡgazan ehan wa n əşşəriḡa əddewan əd kumandatan ən sojitan əd mizwaran n aḡrəm. Omar Festus s a d-ammaway Buləs, təzzar immeway-du.

²⁴ Amaran inna Festus: «Əmənokal Agriffa, əd kawanay ketnawan win əmmənəynen da, ənta da aləs was əddəlil-net a fəl di-d-osan Kəl-Əlyəhud kul, daḡ Yerusalām harkid deḡ da da, gannin s afalla wər imməkkan ad iləs təməddurt. ²⁵ Amaran nak za, wər ənayaḡ as iga əmazal waliyyan a t-issiwaran tamattant, mişan dad zamas ənta iman-net a igmayan a das-İsrəḡ əmənokal wa dənnəḡ mənokalan, wədi əge tanat təmosat a das-t-əssuka. ²⁶ Dər iga awen da ya, wər əssenəḡ fəl arat waliyyan igmâd aşşak daḡ talḡa-net a din-z-əktəba y əmənokal wa dənnəḡ mənokalan. Adi a fəl t-əssəbdada dat-wan, wəllen kay əmənokal Agriffa, fəl a tu-nəssəstən, əssənəḡ awa z'əktəba daḡ talḡa-net; ²⁷ fəlas wər sər-i ila almaḡna ad əssuka Qaysara amaskasaw as din-wər-əməlaḡ əddəlil wa fəl itawattaf.»

26

Aljawab wa iga Buləs dat Agriffa

¹ Inna Agriffa i Buləs: «Təḡrawa turagat n awal, tagəzaḡ iman-nak.» Təzzar izzal Buləs əfus-net y a das-təssəsəm tamattay, inna: ² «Ya əmənokal Agriffa, əbbələl zəwwəran a di-təmos tahakkay ta di-təgeḡ azalada turagat n aggaz ən man-in daḡ

aratan kul win as ənnan Kəl-Əlyəhud əxšadaq-qan, ³ wəllen as əhân-kay salan wəllen n alxadaten-nasan kul d aratan kul win fəl tamazağan. Dağ adi, onsayaq-qay ad taga tazaydart, təssəsəməx-i.

⁴ Kəl-Əlyəhud kul əzdâyan-i harwa çur təmmədrəyt-in. Əssânan dağ awa əgeç kul dağ tamattay-nin harkid deç dağ Yerusalam. ⁵ Irəw as di-əzdayan, amaran as imos as ərdân, əfrâgan a dak-aggayen as, taggayt ta n Farisaytan a əheç, s ənta a togarat əzəzzəwi dağ əddin-nana. ⁶ Əmərədda nak da ibdadan da şarrağa fəlas əgeç attama dağ arkawal wa iga Məşşina i marawan-nana. ⁷ Attama en da a əganat tawşeten-nana an marawat əd sanatat, eway-du sər-əsnat awen əlxibada ən Məşşina əs gəllejat ehad ezal, əqqâlmat y ad andu. Ya əmənokal-in, Agriffa, attama en da za, a fəl di-əxtasan Kəl-Əlyəhud. ⁸ Ma fel as dawan-orna kawanay Kəl-Əlyəhud əzəgzan âs Məşşina ilkâm ad d-issənkər inəmməttan?

⁹ Nak iman-in, kala a çur-i illa as, iwâr-i igi n arat kul wa əfraga fəl a din-ança esəm ən Ƴaysa wa n Nazaret. ¹⁰ Arat wen iman-net a əgeç dağ əçrəm ən Yerusalam. Əkfan-i dağ-as muzaran ən limaman turagat, təzzar əbazax inalkiman ən Ƴaysa aggotnen əgeç-qan dağ kasaw. Əwâraç aganna ən win tan-əbaznen s əşşəriça wa n tamattant ta n kərəz. ¹¹ Əyyəwanax ilum gər nan ən Kəl-Əlyəhud win əlxibada tawaddabaç-qan, şahaşşalaç-qan əbudər ən Ƴaysa. Awa dasan-əge dağ gezzar, lakkamaç-asan əs çərman ən kallan win tamawen.

¹² Əzəl iyyan əşşokala dağ awen da əkkeç Damas, əgrâwa turagat çur muzaran ən limaman n igi n awen imos as əntanay a di-əganen dağ əşşəçəl wen. ¹³ Ya əmənokal-in, ewâyax əd tarrayt ammas n azal wala a ihogan ənayax ənnur a d-igmâdan ijənnawan ogaran wa n təfuk əmələwləw as ibalazzat dağ çələyçələyan-nana, nak d aytedan win dər əddewa. ¹⁴ Nuda ketnana, təzzar əsleç i wa di-innan dağ təlxibrit: "Talut! Talut! Mas di-təzaçazzaba? Tugəyt-nak əs ləkkum i taranin, wər tənfa wala; wər təzlay əd ta n ays iddag məşşis əs çayman." ¹⁵ Ənneç-as: "Əməli, ma təmosaç?" Təzzar inn-i Əməli: "Nak awa, Ƴaysa wa təzaçazzaba. ¹⁶ Mişan ənkər, təbdədaç, fəlas ənifalalaç-ak fəl a kay-aggaç amaşşaxal-in əd təgəyya-nin a za taggayet y aytedan anay wa [di-]təgeç, taggayeç-asan deç awa kay-z-assakna dəffər awa. ¹⁷ A kay-aggaza dağ Kəl-Əlyəhud, əd təmattiwen şin tan-wər-nəmos, əzəmmizəlaç-qay sər-san, ¹⁸ fəl ad tara şittawen-nasan, təkkəsaç-qan-du dağ şiyay s ənnur, əgmədan-du tarna ta n Iblis əlkəman i Məşşina, fəl ad əgrəwan təsureft ən bakkadan-nasan, əgrəwan deç tadagart dağ mizdagan əs tarrayt n əzəgzan sər-i."

¹⁹ Ya əmənokal Agriffa, əddəlil wədi a fəl wər əmməzrayax awa di-d-inafalalan, igmâd-du ijənnawan. Igi ən Məşşina a imos. ²⁰ Kalar azzarayç əs Kəl-Əlyəhud win Damas əd win Yerusalam, d aytedan win Yahudəyya ketnet, d aytedan win wər nəmos Kəl-Əlyəhud, taggaç-asan təlxutbat gannaç-asan, iwâr-tan ad utaban, əhdin-du əs Məşşina, agin imazalan əssiknanen tətub-nasan. ²¹ Əddəlil n awen da a fəl di-əbazan Kəl-Əlyəhud dağ Ahan wa Zəwwəran n Əlxibada, əgmayan əd tanaxay-nin. ²² Tadhəlt ta di-iga Məşşina a di-du-təşaşşawadat əzəl wa n azalada, tebadday ta əge da taggaç isalan-net y aytedan gər win wər nəla almaçam, wala win t-əlanen, wər d-əşşotax wala dağ salan ən was əmalan ənnəbitan sa hadan d ənnəbi Musa âs a d-asu; ²³ a t-imosan as, Əlməsix ilkâm ad inəy alçazab, iba-tu, izar-du deç i nəmməttan tanakra, iməl ənnur wa ihakku Məşşina, imosan isalan n əlxillas, i Kəl-Əlyəhud d aytedan win tan-wər-nəmos.»

²⁴ Harwada işşewal Buləs, işarraç fəl man-net, as idkal Festus əməsli-net, inna: «Kay Buləs əmməskəl a təgeç, igət ən taçaray ta təgeç isamməskal-kay.» ²⁵ Inn-as Buləs: «Əmizwar Festus, nak wər əmməskala. Kalar awa ganna da, tidət a imos, təkfât əs tayttay. ²⁶ Amaran əmənokal Agriffa əhân-tu salan win di. Adi a fəl wər əksudaç igi-nasan dat-əs, fəlas əkkəsaç aşşak as, wər tan-iha waliyyan a das-ijhâlan,

id wər tawaggan daɣ əssir. ²⁷ Əmənokal-in Agriffa awak təzzigzanax s awa ənnan ənnəbitan? Əssānax as təzzigzanax sər-əs.» ²⁸ Təzzar inna Agriffa i Buləs: «Tordanak a di-taga əlməsixi fəl arat n amazay!» ²⁹ Inn-as Buləs: «Gər za fəl arat n amazay wala, əgmāya daɣ Məššina a kay dər-i išaššalan, kay harkid aytedan kul win di-əssəsammen da azalada, as wər əhen sassaran win.» ³⁰ Təzzar inkar əmənokal Agriffa əd Festus wa n ənaxkim əd Bernikəs d aytedan kul win dər naɣaman, ³¹ əgmadan tinəmənnin gar-essan: «Aləs wen wər iga arat waliyyan as ihor a fall-as ammat wala deɣ iggəz fall-as kasaw.» ³² Amaran inna Agriffa i Festus: «Aləs wen ənnar wər igmay a das-išrəɣ Qaysara əmənokal wa zəwwəran, itəwəyyu.»

27

Əmiwəy ən Buləs s əyrəm n Ərrum

¹ As itawanna ad nəggəz aɣlal n aman nakku akal n Italəya, itawagga Buləs ənta əd wiyyad iməskəsa daɣ əfus ən kabtan iyyan igân esəm Yuləyus ihân egan ən sojitan as itawannu «Wa n Qaysara». ² Təzzar nəggəz aɣlal n aman n əyrəm n Adramutenəs ikkân ikallan n Asəya win əwarnen efay n agaraw. Ih-âna Aristarxus imosan awedan n əyrəm ən Tesalonik n akal wa n Masedonəya.

³ As əzəl wa dəffər wen, nəzzəbbat daɣ əyrəm ən Sidon. Yuləyus imosan awedan isâknin Buləs əlluɣ, ikf-ay turagat n ad akku imidawan-net win əhanen aɣrəm wen fəl a daɣ-as əssənan. ⁴ As dər-naɣ igmad əɣlal n aman Sidon, nəllil əsəlīm n agaraw daɣ nəha ifi n akal imosan gərwətlan as itawannu Qıbrus fəlas aɣu dər nəmməqqas. ⁵ Dəffər awen, nəššokal fəl agaraw was iwar akal ən Kilikəya əd wa n Banfiləya tama-net, newad-in aɣrəm ən Mira ihân akal wa n Lukəya, nəzzəbbat daɣ-as. ⁶ Igraw daɣ-as kabtan wa dər nəddew iyyan aɣlal n əyrəm n Alaskandrəya, itakkin akal n Italəya, ig-ana daɣ-as.

⁷ Nəga adan aggotnen nəsilalam fəl aman sollan, gərriid as din-nəhoz aɣrəm ən Kənidos. Təgdal-ana assahat n aɣu ad naglu daɣ anamod wen, təzzar nənnamad akal imosan gərwətlan as itawannu Kəret. As nokay fəl Salmone, nəmmoday i Kəret, nəggəz ifi-net. ⁸ Gərriid as nəllil əsəlīm n agaraw har newad edag igân esəm «Izəzzəbba win Hossaynen n əɣlalan» inimahazan d əyrəm ən Lasaya.

Tazafa d alamaz n aman aɣlal

⁹ İsilalat-ana əşikəl wen wəllen, əşikəl daɣ aɣlal n aman deɣ əmərədda iggaz-tu aɣrarar, fəlas wala əzum ən Kəl-İlyəhud wa n ɣarat okay. Adi a fəl iga Buləs y aytedan win ənnodanen daɣ aɣlal n aman ənnəsixa, inn-asan: ¹⁰ «Meddan, hannayax as əşikəl-nana ad t-iggəz iba ən taɣara d əɣšud zəwwəran. Wərgəɣ aɣlal n aman ɣas əd lalan-net a z'əhləknen, kalar nakkanay da, ad nəggəz tazak ten.» ¹¹ Mišan issof kabtan iduf ən batu ta dasan-iga aləs wa ewayan aɣlal n aman əd wa t-ilan, iduf n ənnəsixa wa dasan-iga Buləs. ¹² Dad imos as azəzzabbaw n əɣlalan n aman wen wər daɣ-as oley ikus ən təgrəst, tənkar taššam n aytedan win maššaxalan n əɣlal əgan tanat ad aglin, əgməyan d aggad n iyyan aɣrəm imosan azəzzabbaw n əɣlalan n aman igân esəm Fənikəs ihân akal imosan gərwətlan as itawannu Kəret, əkkəsən tagrəst daɣ ɣayanɣayan-net s iyyan iswâd sa sər agala daɣ ataram, wa hadan sa sər tamasna daɣ ataram.

¹³ Əllan den da as d-igar arat n aɣu wa n agala, təzzar əkkasan y əɣlal anaday, əgлан, sammadəyan y akal imosan gərwətlan ən Kəret daɣ əhozan təšəšwit-net, əɣilan ad əfrəgan əmərədda igi n awa əran. ¹⁴ Mišan wər əhogan əd teklay as fall-asan du-təgar tazafa təssohet as itawannu ta n tamasna daɣ dənnəg, təgât esəm Yurakilon, a dasan-du-təgât iguz wa n akal ən Kəret. ¹⁵ Təzzar ibat aɣu aɣlal n aman, indar-ana iduf-net, igla dər-naɣ ibât-tu aɣu.

¹⁶ As nəggaz ifi n arat n akal imosan gərwətlan, igân esəm Kawda, nəga y arat ən təxlalt n aman ilwây aɣlal wa nəha, tēməwit ta nəra gərrid. ¹⁷ Eɣkalan-tat-du maššaxalan n əɣlal, əgan-tat daɣ ammas n əɣlal, təzzar əssəɣlayan-du aɣlal n aman ketnet iɣunan zawwarnen otaban-as sər-san fəl a tu-wər-zəmməzzəyan aman. Əssərasan afər wa isakaf aɣu isəluləm fəl aman fəl ad agu sollan, fəlas əksudan ad istəb əɣlal y amaɣal daɣ adag igân esəm Surtis a daɣ gəzzul agaraw, igla əɣlal ibât-tu dər-naɣ aɣu. ¹⁸ Awa təga tazafa en daɣ assahat, as əzəl wa hadan a din-əggaran maššaxalan n əɣlal ilalan daɣ agaraw fəl ad ifsas əɣlal. ¹⁹ As əzəl wa n karad, əgaran-in daɣ aman əs fassan win-da-nasan isəssəkna n əɣlal. ²⁰ Təfuk wala etran nəgâ adan aggotnen wər tan-nənay. Awa təga tazafa en daɣ assahat, nəkkas fadda attama ən man-nana.

²¹ Adan en nəg-en wər t-illa i itsan arat, təzzar ibdad Buləs daɣ ammas n aytedan, inna: «Meddan, ənnar tətâtəfam ənnəsixa wa dawan-əgeɣ, taqqamim da wər dutəgmedam akal wa n Kəret; əddi wər kawan-z-igrəw iba n taɣara wa d əhluk wa. ²² Amaran əmərədda əgmâya daɣ-wan ad wər təkkesam attama, fəlas wər kawan-ihə i z'əgmədan man-net, mišan ya aɣlal n aman ənta a danax-igməd. ²³ Əndod a di-inafalal angalos ən Məššina wa di-ilan, əheɣ əššəɣəl-net, ²⁴ inn-i: "Buləs, a kay-wər-təggəz tasa, Qaysara wa n əmənokal wa zəwwəran, kundaba təbdəda dat-əs isrəɣ-ak. Amaran ənəy, Məššina ig-ak arraxmat təmosat aggaz n aytedan kul win dər tənamaha aɣlal n aman da." ²⁵ Daɣ adi meddan ad wər təkkesam attama, fəlas əzzigzanax əs Məššina. Awa di-inna den, ad agu s əmmək en da. ²⁶ Amaran kundaba istab dər-naɣ əɣlal n aman i təšəšwit n akal iyyan imosan gərwətlan.»

²⁷ As iga adawannay n ahad n əzəl-nana wa n maraw d əkkoz təgâr fall-ana tazafa, ibât dər-naɣ aɣu aɣlal fəl agaraw igân esəm Adrəyatik, ənnəfrayan maššaxalan n əɣlal n aman d as amaɣal wər iggug. ²⁸ Təzzar əgaran daɣ aman aɣan y sər-əs əqətan təzzəgrət n agaraw. Təqqal təzzəgrət n aman daɣ adag wen əssayət təmərwen n əɣil d əkkoz. As əgan amazay, əlasan takkət, osan-in edag wen təmos təzzəgrət-net səmmosat təmərwen n əɣil əd sədis. ²⁹ Təggaz-tan tasa n ad infəl əɣlal n aman i təhun, təzzar əgaran daɣ aman daɣ ələqqam n əɣlal əkkozat təzoliyawen šin as tu-naddayan, amaran ad tattaran a tan-issəknan ezal. ³⁰ Ad gammayan maššaxalan n əɣlal n aman ad addaggagan. Təzzar əssərasan taɣlalt n aman ta əndərrat daɣ agaraw, əgan əsarə âs a əran ad əndəyan eɣaf n əɣlal əs šiyyad šizoliyawen. ³¹ Mišan inna Buləs i kabtan əd sojitan: «Meddan en, as əgmadan aɣlal wa, wədi wər dawan-t-illa agamad əd man-nawan.» ³² Təzzar olayan sojitan iɣunan win əqqannen taɣlalt, əgla dər-əs aman.

³³ As ibuk azal y igi, igmay Buləs daɣ awedan kul ad atšu, inn-asan: «Azalada, əzəl-nawan wa n maraw d əkkoz d aššawaša labasan, wər t-illa arat as tərâm tettay-net, wala iyyan iggâzan imawan-nawan. ³⁴ Daɣ adi əgmâya daɣ-wan ad tatšim fəl ad tərəgam, fəlas wər kawan-ihə i daɣ in-z-iba wala anzaɣ iyyanda n aɣaf-net.» ³⁵ As inna Buləs awen, idkal-du tagəlla iga igodan i Məššina dat-san ketnasan, amaran ikarammat daɣ-as, ad itattu. ³⁶ Təgmad-tan tasa ketnasan, ətšan əntanay da. ³⁷ Awa nəmos daɣ əɣlal en ketnana, sanatət təmad n awedan d əssayət təmərwen əd sədis. ³⁸ As əyyəwanan a din-naqqalan alkama daɣ agaraw fəl ad əssəfsəsan aɣlal n aman.

³⁹ As iga azal, ənayan maššaxalan n əɣlal as akal wa din-əhozən den wər t-əzdayan. Oggan əzazəl daɣ təšəšwit, ənnan ad əgməyan d a sər-əs awəyan aɣlal har das-t-əssəstəban kud ad əfrəgan awen. ⁴⁰ Əkkasan šizoliyawen šin əndaynen aɣlal, oyyan-tanat-in s aman, oran deɣ iɣunan ən katakawtan win sanamadnen aɣlal. Dəffər adi əkkasan aɣda y əfər wa ihan dat əɣlal fəl ad t-issəkəf aɣu, amaran sannamawalan-tu əd təgadamayt ihə əzazəl. ⁴¹ Mišan ənfalan i tageft n əzazəl təhât agaraw, ittıtay daɣ-as aɣaf n əɣlal, iməzzay d əmətəkwəy; təzzar ad tərəzzu assahat [n tənəzzamaren]

ələqqam-net. ⁴² Ənayan sojitan awen ƣas, namannakan fəl ad əkkəsan iman day məskəsa fəl ad wər išşəf waliyyan daƣ-san, addaggag. ⁴³ Mišan igdal-asan kabtan-nasan igi n awen, fəlas a ira ad agəz Buləs. Təzzar omar kabtan aytedan win əsannen ewet n aman, ad tərəggen daƣ agaraw izaran-in əs təgadamayt. ⁴⁴ Amaran aytedan win hadatnen, əntanay omar-tan s ad əwəran katakawtan əd gannatan n əƣlal win du-nassarnen. Əmmək en da as ewadan ketnasan tagadamayt n agaraw əragan-du.

28

Buləs iha akal imosan gərwətlan as itawannu Malta

¹ As du-nərag daƣ awen, nəgmad-du aman, itawann-ana akal wen imosan gərwətlan, esəm-net Malta. ² Əssəknan-anay aytedan n akal wen əlluƣ wər nəla tulat. Əgan-ana ketnana marhaba, əssəryan-ana temsay, fəlas akonak a iffayan, iga deƣ asamed. ³ Išşedaw-du Buləs eƣaf n eškan, ig-en daƣ təmsay, təkkaş-du daƣ-san tuksay taşşolt, tədad əfus-net, təkərayray daƣ-as. ⁴ As ənayan kəl akal wen taşşolt təkərayray daƣ əfus ən Buləs, ad tinəmənnin: «Igmâd aşşak as aləs wen əməggi ən man a imos. Irag-du daƣ agaraw, mišan harwa da ilkâm-as əşşəriƣa, wər ira ad iddər.» ⁵ Irsak-in Buləs taşşolt, tərtaş daƣ təmsay, wər t-illa a t-igrâwan. ⁶ Əqqalan aytedan y ad ihədədəy Buləs, madəƣ ifətəqqət iba-tu tamazayt ten da; mišan as ərəwan wər hənneyan a t-igrâwan, əqqalan-du daƣ awa ənnan, ad gannin amaran: «Əməli iyyan awa!»

⁷ Edag en əhoznat-tu təwəgas ən Bubləyəs, aləs wa n əmuzar n akal wen. Izazzabbat-ana daƣ ahan-net, nəga karad adan nənniftay-as. Ig-ana marhaba əd məgura əknanen əlluƣ. ⁸ As itaggu awen, təzizalallat tanaday abba ən Bubləyəs, tərtaş-as əd tədist. Os-ay-in Buləs issəwar-tu ifassan-net, onsay-as Məşşina. Izzozaytu. ⁹ Dəffər awen a du-tasin miranan n akal wen win hadatnen, ətiwəzuzəyan. ¹⁰ Əssəknan-anay aytedan n akal wen saƣmar aggen, as nəggaz şin teklay daƣ əƣlal n aman iyyan. Əkfan-anay arət was nəddərər y əşikəl.

Assa ən Buləs aƣrəm n Ərrum

¹¹ As nəga karadat təlil daƣ Malta, nəggaz aƣlal n aman a d-igmâdan aƣrəm n Alaskandrəya, as əwâran əssənəman as itawannu "win əknəwan" eƣaf-net, s ənta da akal wen da imosan gərwətlan a daƣ ikkas tagrəst, nəgla. ¹² As nosa aƣrəm ən Surakusa, nəga daƣ-as karad adan. ¹³ Nəgmad Surakusa nəgla har nosa aƣrəm ən Regəyon. As əzəl wa dəffər wen, igar-du aƣu wa n agala, nəgla. As əzəl wa hadan newad aƣrəm ən Batəyoləs. ¹⁴ Den da ad nəssəha fəl arət daƣ nalkiman ən Ƣaysa, əgmayan daƣ-na a ƣur-san nagu əssa adan. Dəffər awen nənnəmad aƣrəm n Ərrum. ¹⁵ As danaƣ-əslan mədrayan-nana daƣ əzəgzan win əƣrəm n Ərrum, əssəlkadan-ana-du əs təƣrəmt ta n Əssuk n Affəyus, wiyyad əssəlkadan-ana-du əs təƣrəmt as itawannu Ta n Karad Zəzzəbba. As tan-inay Buləs iga igodan i Məşşina, ikna awen iman-net. ¹⁶ As din-nəggaz aƣrəm n Ərrum, irda əlxəkum i Buləs s ad iƣsər daƣ ahan wər inamaha ar əd soji wa t-ogazan.

Təlxutbat ən Buləs day batu ən Ƣaysa Əlməsix day Ərrum

¹⁷ Karad adan dəffər awen, isassayra-du Buləs imuzaran ən Kəl-Əlyəhud win əƣrəm n Ərrum. As d-əddəwan inn-asan: «İmədrayan-in, nak wər nəƣşəd arət waliyyan i tamattay-nana wala deƣ əmmizraya aƣxadaten şin du-nogaz ƣur marawan-nana, mišan əttərmasay daƣ Yerusalam, tawagga daƣ fassan ən Kəl-Ərrum. ¹⁸ As di-əşraƣan, əran di-ayyin fəlas wər əgeƣ arət waliyyan a di-issiwaran tamattant. ¹⁹ Mišan ənkarən Kəl-Əlyəhud ugayan s ad tawayya, iqqal-i əşşil agamay n a di-işrəƣ Qaysara əmənokəl wa zəwwəran, dər iga awen da ya wər əgeƣ ənnəyat n ad aga i tamattay-nana təxtəst waliyyat. ²⁰ Adi a fəl kawan-əssəgməya, a kawan-ənəya,

məšiwəla dər-wan. Isassaran win, wər sər-i tan-d-eway ar as əgeḡ attama-nin daḡ was əqqalan Kəl-Israyil.» ²¹ Ənnan-as: «Nakkanay za, wər nəgrew širawt waliyyat a du-təfâlat akal ən Yahudəyya daḡ talḡa-nak wala deḡ os-âna-du iyyan daḡ mədrayan-nana daḡ əddin, ag-ana isalan-nak madeḡ annu sər-ək ark arat. ²² Amaran nəra a dana-təməla kay iman-nak awa təsamadranax, fəlas arat iyyanda as danaḡ-əhan salan-net as, taggayt ta n tarrayt n Əlməsix Ƴaysa, wər t-illa adag a tat-wər-nəššek.» ²³ Təzzar namaggan dər-əs təmastant əzəl iyyan. As d-iḡlay əzəl wen, osan-t-idu s igət daḡ ahan wa iha. Iššewal-asan əs gəlleyat daḡ salan ən Taymar ta n Məššina wa n aḡora har iga ahad, isasagr-asan-tat. Isakn-en əs təməwit təsisagrət daḡ Əttawret ən Musa d Əlkəttaban n Ənnəbitan win hadatnen as, awa igannu əs Ƴaysa tidət daḡ a imos. ²⁴ Wiyyad əssokasan daḡ-san aratan win inna Buləs aššak, əzzəgzanan; win hadatnen ugayan s əzəgzan. ²⁵ Təzzar əmməzaxan gar-essan. As əggazan šin teklay, inna Buləs: «Tidət da a inna Infas wa Zəddigan i marawan-nana daḡ əmi n ənnəbi Isayas, as inna: ²⁶ "Aḡlu, akku tamattay en, tannax-as: 'Ad tayyawan əsəsəm, mišan wər ilkem ad təgra wala, tayyawan asawad, mišan wər ilkem ad tənay wala'; ²⁷ fəlas tamattay di, əsəḡər a təga əwəl-net, gərriid as sallinat təməzzugen-net, təqqân šittawen-net; fəl ad wər tənay za wala taslu, taqqam da wər təgra s əwəl-net, əngəm tutab, əzzuzəyaq-qat!"»

²⁸ Dəffər awen, inn-asan Buləs: «Əssənət za as, šimattiwen šin wər nəmos Kəl-Əlyəhud əntanatay da issok-enat-du Məššina isalan n efsan-net. Əntanatay a dasanz-əssəsəmnen.» ²⁹ [As inna Buləs awen, əfalan-tu Kəl-Əlyəhud, əmmizaxan wəllen gar-essan.]

³⁰ Iga Buləs əššin elan əḡrâdnen daḡ ahan ixfâr ənta iman-net, itaggu marhaba y aytedan kul win əranen anay-net. ³¹ Itagg-asan isalan ən Taymar ta n Məššina, isasaxr-en deḡ arat kul wa iqqalan Əməli Ƴaysa Əlməsix ši wala tasa, wər t-illa deḡ awedan a das-igdâlan awen.

Şirawt ta iktab Buləs i Kəl-İrrum İsənti

Assalam

¹ Awa nak Buləs akli n Elməsix Ƴaysa, itıwayran əs tişit n anammazul itiwaskat deƳ y igi ən salan n Elinjil ən Məşşina. ² Elinjil wen irəw Məşşina as iga arkawal-net y ənnəbitan daƳ Ełkəttaban win zaddognen. ³ Isalan n Elinjil win den əmmigradan daƳ batu ən Barar ən Məşşina a d-ihəwan daƳ əzzurrəyya n ənnəbi Dawəd daƳ batu ta təqqalat tişit-net aggadəm. ⁴ DaƳ batu amaran ta təqqalat Infas wa Zəddigan ən Məşşina itawaxsab Barar ən Məşşina əs tarna s əssəbab ən tanakra-net daƳ təmattant. Ənta a imosan Ƴaysa Elməsix Əməli-nana. ⁵ Tarrayt-net as nəgraw arraxmat ən tişit ən nəmmuzal fəl a du-nawəy şimattiwen kul şin wər nəmos Kəl-Elyəhud s əbərdəg wa d-itaway əzəgzan, fəl saƳmar n esəm-net. ⁶ Şimattiwen şin kawanay da təhəm-tanat, kawanay a iƳra Ƴaysa Elməsix. ⁷ KatabaƳ-awan-in ketnawan kawanay a əhanen aƳrəm n İrrum təmosam win ikna Məşşina tara tətıwayram s ad tızdagam. Əgmaya daƳ Məşşina di n Abba-nana d Əməli Ƴaysa Elməsix a dawan-ıgan arraxmat d alxer.

Igodan əd səsəgritan

⁸ DaƳ tizarat əgğodayaƳ i Məşşina əs tarrayt ən Ƴaysa Elməsix daƳ batu-nawan ketnawan id əzəgzan-nawan itıwasla daƳ əddənet ketnet. ⁹ İgğiyat-i Məşşina a əƳbada s əwəl iyyanda s amel wa taggaƳ isalan n Elinjil ən Barar-net əs faw tahəm şiwatriwen-in. ¹⁰ Faw da gammaya daƳ təwatıwen-in ad əgrəwəƳ təməwit n a kawan-in-asa, as irda Məşşina. ¹¹ Tidət as əkneƳ tara n a kawan-ənəya fəl a dər-wan ədrəwəƳ arat ən təhəkkuten şıyyad a d-əfalnen Infas wa Zəddigan fəl ad təgrəwam əzəzzəwi daƳ əzəgzan-nawan. ¹² Almayna as dər-wan namaggazaƳ edag, əzəgzan wa nəla nak dər-wan a danaƳ-isəssuhət ketnana daƳ tarrayt ta nəha, inəməsəsuhat deƳ əzəgzan wa-nawan əd wa-nin. ¹³ Ya imədrayan-in, areƳ ad təssənam as əyyəwanəƳ tara n a kawan-in-asa fəl ad əgrəwa Ƴur-wan tənfa n əşşəƳəl-in wa n anammazul zun ta əgrəwa Ƴur təmattiwen şin hadatnen wər nəmos Kəl-Elyəhud. Mişan indar-i awen har harwa. ¹⁴ Tişit-in anammazul təsiwar-i əşşəƳəl daƳ aytədan kul gər Kəl-Elyunan as əmoranat şittawen-nasan wala win tan-wər-nəmos, gər win musanan wala win aljahilan. ¹⁵ Awen daƳ a fəlas sidaranəƳ wəllen a dawan-agaƳ isalan n Elinjil kawanay da a əhanen aƳrəm n İrrum.

Awa daƳ təşşewal şirawt ta

¹⁶ Fəlas wər di-imos Elinjil təkarakit id tarna ən Məşşina a imos, itaway-du efsan s aytədan kul win əzzəgzannen a obazan Ƴur Kəl-Elyəhud ikka aytədan win tan-wər-nəmos. ¹⁷ İllikan as taqqat ta n Məşşina tənıfalal daƳ Elinjil s əzəgzan, amaran s əzəgzan Ƴas, id ənnan Ełkəttaban: «Awedan wa oƳadan daƳ tarrayt ta n əzəgzan a igarrawan təməddurt taynayət.»

Elinjil ənta immalan taqqat ən Məşşina

Aytədan kul ibaz-tan əşşəriya ən Məşşina

Inəmməzray kul obâz-tan əşşəriya ən Məşşina

¹⁸ Alham ən Məşşina iffal-du ijənnawan itakka-du aytədan kul win wər nəksud Məşşina d aytədan kul win wər noƳed, əwâƳan tidət əgdâlan-as ənəfilal s iba n

taqqat-nasan. ¹⁹ Fəlas arat wa ifragan ətəwəssan daɣ batu ən Məşşina ibbiyyan-
asan id Məşşina iman-net a dasan-t-isannafalalan. ²⁰ Awalla, harwa ɣur əxluk ən
Məşşina əddənet da assayfaten-net šin wər nətəwənəy, əmosnen tarna-net təɣlalat
əd tišit-net Əməli, tawahannaynat, əmmunnat daɣ igitan-net. Daɣ adi wər əlen əsaru
waliyyan a tan-ikkasan, ²¹ id əssānan Məşşina mišan wər das-əgen saɣmar wa dər
ihor za wər das-əgen igodan. Kalar oyyan iman-nasan əssəxrakan-tan medranan
wər nənfa wala, əjawanken deɣ daɣ šiyyay id iwallan-nasan a əɣfalnen. ²² Əgân iduf
n as əmosan imalan ən tayttay, əntanay amaran imeskelan a əmosan. ²³ Ənkaran
əs tanaya ən Məşşina di n Amaɣlol əgan daɣ adag-net šaššelanan n aggadəm wər
nəɣlel əd gəɣdad əd hərwan əd wəxsan əd dəmərdəmaran. ²⁴ Awen daɣ a fəl tan-oyya
Məşşina əlkaman y arak deranan-nasan. Əmmək en daɣ as samadasan iman-nasan
əs təməwit təsifallasat aggadəm.

²⁵ Əntanay a sammattaynen tidət ən Məşşina əgan bahu daɣ adag-net, əɣbâdan
əməttəwəxlək oyyan Wa d-ixallakan. Attamalet esəm-net har faw! Amin! ²⁶ Awen
daɣ a fəl tan-oyya Məşşina əggâzan tara ən man-nasan eway-du sər-san awen
šifəllas, har âs šidoden-nasan ab-as tinəmənsinat əd meddan, kalar šidoden a dər
tinəmənsinat, imos awen arat immizrayan əttəbiɣat n aggadəm. ²⁷ Meddan deɣ əgan
awen da. Ab-as tinəmənsin əd tədoden-nasan, ad tinəməggin əzzəna gar-essan,
əknân tara n awen. Aytedan win əxraknen en, a tan-abəz əšşəriɣa ən Məşşina s
attadib wa dər əhoran mazalan wər nətəwəggu win taggin den.

²⁸ Dad zamas ugayan s ad əssənan Məşşina, oyy-en Məşşina əlkaman y arak
tayttay-nasan ad taggin imazalan wər nəmməkkan. ²⁹ Taggin əzzənəfan kul ən
mazalan wər noɣed, d aššar, d attama daɣ a wər əlen, d əzzəngu əd manzaɣ, d
igi ən man, əd kənnasan, əd təkərras, əd tišit ən maksanan. Sawaran aytedan
bahu, ³⁰ akkiyyan igannu ark aratan əs wa hadan. Əmosan izənga ən Məşşina, wər
əlen aladab, tanarbadan, ih-en zazwar ən man, gammayan tarrayen kul šin igi ən
təkma. Wər əbbərdagan i marwan-nasan. ³¹ Wər əlen tayttay, wər əɣdelan, wər
əlen tafəryt za wər tan-təha tahanint. ³² Əknân masnat n əšşəriɣa imosan tamattant
təɣlalat wa issənsa Məşşina i win tagganen imazalan win den. Mišan dər iga awen
da, əssərtayan as tamazalan ark aratan win den, d as əqbâlan aytedan win tan-
tamazalnen.

2

Aytedan win əganen iduf n as olaɣan obaz-tan əšşəriɣa ən Məşşina

¹ Daɣ adi kay wa ixakkaman y aytedan, əssən as wər dak-tu-təlla təsureft a təqqala
da, fəlas as təxakkama y aytedan, wədi iman-nak a tətəbaza s əšşəriɣa, id kay iman-
nak da tətəggaɣ arak mazalan win taggin aytedan win den. ² Amaran nəssân as
əšşəriɣa ən Məşşina was obaz aytedan win tagginen imazalan win den oɣâd. ³ Ənzər-
in daɣ as kay wa ixakkaman aytedan a dər-ək olanen alxal, wər t-illa əmmək as du-za-
tərəga daɣ əšşəriɣa wa n Məşşina. ⁴ Meɣ ak əsəttəlkək a təgeɣ əlluɣ ən Məşşina, d
əlləllu-net, əd təzaydart-net, təqqima wər din-təgreɣ as ira a kay-isəmməttəy s əlluɣ-
net tutaba? ⁵ Əqqəssu-nak əd tugəyt-nak əs tətubt a d-ewaynen as itiwəsəmutig-
ak aɣazab zəwwəran əzəl wad z'izəmmizəl Məşşina alham-net inəfiləl əšşəriɣa-net
oɣâdan.

⁶ Əzəl wen, awedan kul ad t-akfu Məşşina awa dər ahoran mazalan-net. ⁷ Win
əganen təzaydart za daɣ əmazal n awa olaɣan, gammayan s awen ətəwəsəɣmər
ɣur Məşşina, d ədkul, gammayan təməddurt ta wər nəɣərrəd, win di ad tan-akfu
Məşşina təməddurt ta təɣlalat. ⁸ Amaran win wər nəgəmməy ar tənfa ən man-
nasan, əmosan əllid ən tidət, tamazalan deɣ aratan wər noɣed, win di a tan-assaknu
Məşşina aššar n alham-net. ⁹ Awalla, təssust əd təməɣutar əllānat-tu y aytedan

win tamazalnen talbast a obazan ğur Kəl-Əlyəhud ikka win wər nəmos Kəl-Əlyəhud. ¹⁰ Amaran awedan kul wa itamazalan awa olağan, wədi ill-as-tu ətkul d ətəwəsəxmər d alxer a obazan ğur Kəl-Əlyəhud ikka win wər nəmos Kəl-Əlyəhud, ¹¹ fəlas Məşşina wər itəggu təmərıt.

¹² Adi a fəlas aytedan kul win tagginen ibakkadan imos as ijhal-asan əşşərixa wa n Əttawret, win di wər z'attarmasan s əşşərixa wen. Amaran win əssannen əşşərixa wa n Əttawret taggin ibakkadan, win di ketnasan a dasan-itəwəxkəm s əşşərixa wədi da. ¹³ Wərgex win sasammen y əşşərixa a oğadnen dat Məşşina, kalar win sər-əs tamazalnen əntanay a z'əgrəwnen ətəwəqbal əd taqqat ğur Məşşina. ¹⁴ Aytedan win wər nəmos Kəl-Əlyəhud amaran wər əssenən fəl əşşərixa wa n Əttawret mişan imazalan win əttəbiğat-nasan nimannakan d əşşərixa wa, win di əntanay a əmosnen əşşərixa i man-nasan. ¹⁵ Saknin s awen as imazalan win as omar əşşərixa əktâban dağ wallan-nasan. Ənnəyaten-nasan deş tagayyatnat awen. Amaran iduf wa namaggan gar-essan assayət iyyat tinəməsəwiran sər-əs lahan assayət iyyat deş gammayan sər-əs ənəməsuraş. ¹⁶ Ənta da da awa z'agin əzəl wad z'isrəş Məşşina əs tarrayt ən Ƴaysa Əlməsix imazalan n aggadəm win əğbarnen, s əmmək was t-inna Əlinjil wa əmmala.

Kəl-Əlyəhud obâz-tan əşşərixa ən Məşşina

¹⁷ Kay wa igannin təmosağ Ag Əlyəhud təffilla fəl əşşərixa wa n Əttawret, tətəggaş ibaragan as kay təmosağ əmaray əs Məşşina, ¹⁸ təssânaş awa ira Məşşina, təssânaş arat wa imosan əlməxsud id tətıwasasağra əşşərixa wen. ¹⁹ Kay wa ikkasan aşşak as təmosağ əmalway ən win əddərğalnen, təmosağ ənnur i win əhanen şıyyay, ²⁰ təmosağ əməsəsəşğri n aytedan win nəbbənnan, d əməsəsəşğri ən bararan, təğəş awen fəlas tənâya dağ Əttawret masnat əd tidət əkmâlnen. ²¹ Xasil kay wa isasağrin aytedan amaran wər təsəsəğraş iman-nak! Kay wa itamaran aytedan s ad wər akəran, mafel tətakara? ²² Kay wa itamaran aytedan s ad wər agin əzzəna, mafel tətəggaş-qu? Kay wa ikəyađan əssənəman, mafel təgalla tətakarax awa ihan idaggan n əğyibada-nasan? ²³ Kay wa isabaragan fəl əşşərixa n Əttawret amaran tətamazrayaq-qu imos awen iba n saşrar n esəm ən Məşşina. ²⁴ «Fəlas esəm ən Məşşina sammadrayan-tu aytedan win wər nəmos Kəl-Əlyəhud amaran imazalan-nawan a d-ewaynen awen», s əmmək was t-əmalan Əlkəttaban.

²⁵ Illikan as əmənəkəd təh-ay tənfa as imos as təbbirdaga y əşşərixa wa n Əttawret, mişan as tətamazrayax əşşərixa wen, wədi əmənəkəd-nak wər izlay d iba-net. ²⁶ As imos as awedan wa wər nəmmənəkəd ilkâm y alwajiban n əşşərixa ibbirdag-asan, awak wərgex a das-itəwəxsəb as imminkad? ²⁷ Awedan wa wər nəmmənəkəd amaran ibbirdag y əşşərixa wa n Əttawret, ənta dak-z-isrəşan kay wa itafan Əttawret təmminkada tətamazrayaq-qu. ²⁸ Arat wa imosan tidət as tişit n Ag Əlyəhud wər təmos arat iwaran azzahir ğas, wala əmənəkəd ğas. ²⁹ Kalar awa ihan əwəl ənta a itaggin awedan Ag Əlyəhud amaran əmənəkəd wa itaggin awedan Ag Əlyəhud əwəl a dağ itaggu imos arat a d-ifalan Infas ən Məşşina, wərgex arat iktaban ğas dağ Əttawret. Ənta di da Ag Əlyəhud wa igarrawan təmmalen şin d-əfalnen Məşşina, wərgex şin d-əfalnen aggadəm.

3

¹ Dağ adi mənı tat alfaydat ən tişit n Ag Əlyəhud, madex mənı tənfa n əmənəkəd? ² Tənfa-net şı agget dağ anamod kul, amaran ta zəwwərat âs Kəl-Əlyəhud əntanay as d-iga Məşşina awal-net dağ fassan-nasan. ³ Tidət as wiyyad dağ-san əmmizrayan Məşşina. Awak immikkan iba n təlyudəla-nasan ad təsəmməttəy arat dağ təlyudəla ən Məşşina? ⁴ Kala kala! Itəwəqbəlet as Məşşina ənta a imosan tidət, aggadəm

anasbahu. Tişit ən Məşşina tidət ənta a fəl ənnan İlkəttaban: «*Təgrawa taqqat day awal-nak, təgrawa tidət day əşşəriya-nak.*»

⁵ Mişan ma za nannu as imos as iba n aqqad-nana isannafalal-du aqqad ən Məşşina? Awak Məşşina imos fall-as iba n aqqad ad izəmmizəl alham-net? Illikan as awal wa tagga da taggaq-qu əs tayttay ta n aggadəm. ⁶ Kala, kala! Məşşina inimaggag d ad imos as wər oxed. Kundaba adi, manəmmək as z'ışrəx y əddənet? ⁷ Amaran as imos as bahu-nin isannahal əsənəfiləl ən tidət ən Məşşina, eway-du awen əs təbbəyyan tanaya-net, wədi mafel tətawaxkam-i tişit n anasbakkad? ⁸ Ma ikma fadda nənna: «Mazalatana talbast fəl a tat-du-təgmad tənfa?» Arat s ənta a sər-na gannin arat n aytedan gammaynen a danax-əxşədan esəm. Aytedan win di əhoran d ad attarmasan s əşşəriya ən Məşşina.

Aytedan kul obâz-tan əşşəriya ən Məşşina

⁹ Ma za? Awak nakkanay an Kəl-İlyəhud təll-ay alfaydat nəgrâw dənnəg aytedan harwa da? Kala kala, fəlas nəjwâr nəsattadda as ketnana gər za Kəl-İlyəhud wala aytedan win tan-wər-nəmos, as nəha təla n abakkad, ¹⁰ s əmmək was ənnan İlkəttaban:

«Wər t-illa i oşadan, wala ɣas iyyanda,

¹¹ wər t-illa i igarrin,

wər t-illa i igammayan masnat ən Məşşina

¹² Kul əxrâkan əmmək a mosan,

ketnasan əknân aşşar,

wər tan-iha i itaggan awa olaşan,

[wala] ɣas iyyanda.

¹³ Şigarsaten-nasan əmosnat zun təsəska ənnolammen,

ilsawan-nasan takarrasan sər-san aytedan,

idəlay-nasan wər əyberan ar assam ən taşşolt.

¹⁴ Imawan-nasan ədnâyan batuten samommen əd tulşant,

¹⁵ idaran-nasan təh-en tadasayt ən tanaxla n əzni,

¹⁶ ahluk d əlməssibat əwâran tarrayt-nasan,

¹⁷ wər əzdayan tarrayt ta n alxer.

¹⁸ Təksəda ən Məşşina wər təha wallan-nasan.»

¹⁹ Ənta nəssân as arat kul wa inna əşşəriya wa n Əttawret, inn-ay y aytedan win əllanen daw əlxəkum wa n Əttawret fəl ad affastin mawan kul itəwəqbəl as əddənet kul obâz-tat əşşəriya wa n Məşşina. ²⁰ Fəlas wər t-illa awedan as za tətəwəqbəl taqqat-net dat Məşşina əs tarrayt ən mazal n awa ihan əşşəriya, fəlas əşşəriya ənta a danax-isusunan awa imos abakkad.

Aytedan əgrâwan taqqat əs tarrayt n əzəgzan

Əsəssəgri ən taqqat ta ihakku əzəgzan

²¹ Mişan əmərədda, Məşşina isinafalal əmmək was z'iqbəl taqqat-nanax da wala tarrayt ta n Əşşəriya ittiddan daş İlkəttaban. ²² Məşşina iqabbal taqqat əs tarrayt n əzəgzan əs Ƴaysa Əlməsix. Amaran aytedan win əzzəgzannen kul iqabbal taqqat-nasan, fəlas aytedan wər əzlayan: ²³ Ketnasan əgân ibakkadan aba fall-asan tanaya ən Məşşina. ²⁴ Amaran əgrâwan taqqat təmosat təhəkkut n arraxmat ən Məşşina əs tarrayt ən tədarfit ta du-teway tassaş d Əlməsix Ƴaysa. ²⁵ Ənta a d-issəgla Məşşina ixkâm-as ad iqqəl takutay ta təmmasat ibakkadan n aytedan əs tarrayt n əzəgzan s əzni-net. Əmmək en daş as issəkna Məşşina taqqat-net. Fəlas Məşşina oyya ibakkadan da wər tan-iwwəddab daş azzaman win ərəwnen, ²⁶ ən təzaydart-net, amaran azzaman win əmərədda, ira ad assaknu taqqat-net əs təməwit a daş z'itəwəqbəl as oşad, fəl ad iqbəl taqqat n awedan kul wa izzəgzanan əs Ƴaysa.

²⁷ Dağ adi, awak ill-ay əddəlil a fəl nəga ibaragan? Kala wər t-illa, fəlas wərgex əbərdəg y əşşərixa a işxalan əmərədda, kalar əzəgzan. ²⁸ Fəlas nakkanay nəga iduf n as awedan igarraw taqqat əs tarrayt n əzəgzan, wərgex ləkkum y əşşərixa. ²⁹ Məx ak nəga iduf n as Məşşina Kəl-Əlyəhud xas as imos Əməli-nasan? Awak Məşşina wər imos Əməli n aytedan win wər nəmos Kəl-Əlyəhud? Awalla Əməli n aytedan kul a imos, harkid win wər nəmos Kəl-Əlyəhud. ³⁰ Dad zamas Məşşina iyyanda xas, wədi ad iqbəl taqqat ən Kəl-Əlyəhud s əssəbab n əzəgzan, iqbəl dəx taqqat ən win wər nəmos Kəl-Əlyəhud əs tarrayt n əzəgzan wa. ³¹ Dağ adi wərgex emes a din-nətaggu əşşərixa nətaggu əzəgzan dağ adag-net. Kalar əsəttəddi a nətaggu əşşərixa.

4

Ibrahim imos almasal n agaraw ən taqqat s əzəgzan

¹ Ma za nannu dağ adi s Ibrahim imosan əmâraw-nanax dağ batu ta təqqalat tişit n aggadəm? Ma igraw? ² Ənnar imos as Ibrahim tarrayt ən mazalan-net as igraw taqqat xur Məşşina, wədi ila əddəlil n igi ən baragan. Mişan wərgex awen a igan xur Məşşina. ³ Fəlas ənnan Əlkəttaban: *Izzəgzan Abram əs Məşşina, awen dağ a fəl t-ikfa Məşşina taqqat.* ⁴ Awedan wa itaggan imazalan olaynen, wədi alak-net wər das-imos tənəfust, kalar alxaq-net a imos. ⁵ Awedan amaran wa wər nəga imazalan olaynen, mişan izzigzan əs Məşşina s ənta ihakkin taqqat i nasbakkadan, wədi ad igrəw taqqat s əssəbab n əzəgzan-net. ⁶ Əmmək en dağ as inna ənnəbi Dawəd dağ batu n əbbələl n awedan wa ikfa Məşşina taqqat da wala imazalan-net, inna:

⁷ «Əbbilalan win as tawasarafan arak mazalan-nasan, Tawamasan bakkadan-nasan!

⁸ İbbilal aləs wa fəl wər ixəssəb Məşşina ibakkadan-net!»

⁹ Awak əbbələl wa in Kəl-Əlyəhud xas, məx ak in aytedan kul harkid win wər nəmos Kəl-Əlyəhud? Fəlas nəgannu: *Əzəgzan n Ibrahim igraw sər-əs taqqat dat Məşşina.* ¹⁰ Awak ma dər ola Ibrahim as igraw ətəwəqbal wen xur Məşşina? Awak imminkad məx wər immənkad harwa? Kalar harwa da dat əmənkəd-net ad igraw ətəwəqbal wen. ¹¹ Dəffər awen ad igraw Ibrahim xur Məşşina asannal wa n əmənkəd imosan əsəttəddi ən taqqat ta igraw s əzəgzan harwa dat əmənkəd-net. Arat wen igâ fəl ad iqqəl Ibrahim əmâraw n aytedan kul win əzzəgzannen əs Məşşina da wər əmmənkadan, fəl ad əgrəwan əntanay da taqqat xur Məşşina. ¹² Ibrahim imos harwa da abba n aytedan win əmmənkadnen, mişan wərgex əmənkəd-nasan xas a fəl əffəllan, kalar tilalt a əgan tarrayt n əzəgzan ta iga əmaraw-nanax Ibrahim harwa da wər immənkad.

¹³ Məşşina iga arkawal y Ibrahim əd hayawan-net as ad əgrəwan əddənət. Arkawal wen wər itawagga y Ibrahim fəl ləkkum-net y əşşərixa, kalar ig-as-tu Məşşina əs tarrayt ən taqqat tat-t-ikfat əzəgzan-net. ¹⁴ As imos as tarrayt ən ləkkum y əşşərixa as z'əgrəwan aytedan arkawal wen, wədi əzəgzan wər ila tarna waliyyat, arkawal wen dəx ad ib'as t-illa. ¹⁵ Fəlas əşşərixa itaway-du təmazrəyt id wər nəfreg a t-idu-nəsandu, təmazrəyt amaran tətaway-du alham. Amaran edag wa wər iha əşşərixa, wədi wər tu-za-təggəz təmazrəyt.

¹⁶ Ənta den dağ əddəlil wa fəlas arkawal wen ad itəwəgrəw əs tarrayt n əzəgzan, fəl ad iqqəl təhəkkut təmosat arraxmat. Əmmək en dağ as arkawal wen ittidda y əzzurrəyya n Ibrahim ketnet, almağna wərgex win əlkamnen y əşşərixa xas, kalar harkid win obaznen tarrayt n əzəgzan ta n Ibrahim imosan abba-nana ketnana.

¹⁷ Awen da a ihan Əlkəttaban id ənnan: «*Əgeq-qay əmaraw ən təmattiwen əknânen igət.*» Imos abba-nana ketnana dat Məşşina s ənta as izzəgzan, Məşşina s ənta a ihakkin təməddurt i win aba, ixallak-du awa tu-wər-nəlla. ¹⁸ Ibrahim iggaz alxalat a dağ-as tu-wər-illa attama waliyyan, mişan izzəgzan iga attama-net dağ Məşşina.

Əmmək en daɣ as iqqal *abba ən təmattiwen əknânen igət*, s əmmək was das-itawanna: «*Awen daɣ a dər z'agdin hayawan-nak*». ¹⁹ Wər ides wala əzəgzan n İbrahim kuddeɣ as issân as taɣəssa-net [zun as] təmmût fəlas izay-in temeday n awatay, Sarata deɣ təwaşşar təggigra. ²⁰ İbrahim wər iga aşşak daɣ arkawal ən Məşşina zun awedan wər nəzzəgzan, kalar isassahat-tu əzəgzan-net issəɣmar tanaya ən Məşşina. ²¹ Isannahal ikus n aşşak as Məşşina ila tarna n ad assandu arat was iga arkawal-net. ²² Awen daɣ a fəl «*das-itawaxsab awen əs tişit n awedan oɣâdan*».

²³ Mişan wərgəɣ əddəlil-net ənta ɣas a fəl itawaktab as: «Itawaxsab-as awen», ²⁴ kalar nakkanay da itiwaktab fəl əddəlil-nana, amaran Məşşina nakkanay da ad ixşəb taqqat-nana. Nakkanay əzəgzan a sər-əs nəga, ənta a d-issənkaran Əməli-nana ɣaysa daɣ təmattant ²⁵ s ənta a itawakfan fəl əddəlil ən bakkadan-nana, itawasankardu fəl ad nəgrəw taqqat dat Məşşina.

5

Agaraw ən taqqat əs tarrayt n əzəgzan d əlɣillas

¹ Daɣ adi as nəgraw taqqat dat Məşşina s əzəgzan-nana, wədi nəgrəw alxer gar-enay əd Məşşina əs tarrayt n Əməli-nana ɣaysa Əlməsix. ² Tarrayt n Əlməsix as nəgraw arraxmat [s əssəbab n əzəgzan-nana]. Arraxmat en ənta fella-nana. Nəddəwat amaran attama wa nəga daɣ tanaya ən Məşşina, ənta a imosan abarag-nana. ³ Dənnəg awen fadda, nəsabarag kudde nəha təssust, fəlas nəssân as təssust ənta a du-təawayat zəmmerat. ⁴ Zəmmerat ten amaran ənta a dana-təhakkit tişit n aytedan əlânen almaɣna, amaran as nəqqal aytedan əlânen almaɣna wər za nammazzay d igi n attama daɣ Məşşina.

⁵ Məşşina amaran wər isərmig i daɣ-as igân attama, id tara-net a tədnayət iwallan-nana əs tarrayt n İnfəs wa Zəddigan wa danaɣ-itawakfan. ⁶ Fəlas harwa danaɣ-wər-təqqəl əlfaydat waliyyat ad immut Əlməsix fəl əddəlil n aytedan wər nəzəgzan əs Məşşina daɣ əlwaq wa iskat Məşşina y awen. ⁷ İzzəwat i z'iqbələn ad t-iba kuddeɣ fəl əddəlil n awedan oɣadan. Mijas ifrâg awedan ad iqbəl təmattant fəl awedan olaɣan. ⁸ Mişan əmmək da was danaɣ-issəkna Məşşina tara ta danaɣ-iga: Harwada nəmos inasbakkadan ad aba Əlməsix fəl əddəlil-nana.

⁹ Dad zamas əmərədda nəgraw taqqat əs tarrayt n əzni n Əlməsix, manəmmək as danaɣ wər z'assafsu daɣ əlham ən Məşşina? ¹⁰ Fəlas, dad zamas harwa nəmos izənga ən Məşşina da nəga dər-əs alxer əs tarrayt ən təmattant ən Barar-net, manəmmək as wər za nəgrəw əfsan s əssəbab ən təməddurt ən Barar-net əmərədda a dər-əs nəga alxer. ¹¹ Amaran iyyan arat as Məşşina a fəl nəsaftalla əs tarrayt n Əməli-nana ɣaysa Əlməsix s ənta a danaɣ-igan əmərədda alxer əd Məşşina. Ənta den daɣ abarag-nana.

Abakkad n Adəm d arraxmat ən ɣaysa Əlməsix

¹² Ma təssoka za batu ten? Adi za as tarrayt n awedan iyyanda as d-iggaz abakkad əddənət, abakkad amaran ənta a d-əwayan təmattant. Əmmək en daɣ as təmattant təll-ay y aytedan kul fəlas ketnasan əgân ibakkadan. ¹³ Ənta abakkad ill-ay harwa da wər d-izazzabbat Məşşina əşşəriɣa-net fəl ənnəbi Musa, amaran abakkad wər ixşəb, as tu-wər-illa əşşəriɣa. ¹⁴ Dər iga awen da ya təmattant təll-ay təxkâm daɣ əddənət a d-obazan ɣur Adəm har Musa. Təll-ay harkid y aytedan win wər nəga abakkad olân əd wa n Adəm s ənta a ihan əlmital ən wa du-z-asin.

¹⁵ Mişan təmazrəyt n Adəm wər tola əd təhəkkut ta danaɣ-iga Məşşina s arraxmat-net. Tidət as aytedan əgğotnen aba-tan fəl əddəlil ən təmazrəyt n awedan iyyanda a t-imosan Adəm. Ma dər ogda igət n arraxmat ən Məşşina, təmosat təhəkkut-net ta du-tosat əs tarrayt n awedan iyyanda a t-imosan ɣaysa Əlməsix? Arraxmat ten

əd təhəkkut ten wər əlenat əddukad, amaran ewâdnat-in aytedan əknânen igət. ¹⁶ Awa du-tətaway təhəkkut ən Məşşina wər ola d awa d-eway abakkad n awedan iyyanda. Dəffər abakkad wa iga Adəm, Məşşina iwwiddab s əşşərixa-net aytedan kul. Təhəkkut amaran ta d-iga Məşşina taqqat as tətaway aytedan, amaran tosâ-du dəffər as əgân aytedan təmazrəyt təgget. ¹⁷ İllikan as təmazrəyt n awedan iyyanda a du-tewayat as təkam təmattant əddənət əs tarrayt n awedan iyyanda wen. Mişan əs tarrayt ən Ƴaysa Əlməsix Ƴas-net, əgrâwan aytedan a ogaran awen wəllen. Aytedan win əgrawnen arraxmat wər nəla əddukad əd təhəkkut-net təhakkit taqqat, win di ad əddəran əxkəman dəx əs tarrayt n awedan iyyanda a t-imosan Ƴaysa Əlməsix.

¹⁸ Dağ adi, kud təmazrəyt n awedan iyyanda teway-du attadib s aytedan kul, wədi aytedan kul ad əgrəwan taqqat təhakkit təməddurt əs tarrayt n əmazal oğadan n awedan iyyanda. Əmazal wen tamattant ən Ƴaysa Əlməsix a t-imosan. ¹⁹ Zund əmmək as təmazrəyt n awedan iyyanda teway-du as əqqalan aytedan aggotnen inasbakkadan, əmmək en dağ as əbərdəg n awedan iyyanda a du-z-awəyan s aytedan aggotnen ad əgrəwan taqqat dat Məşşina.

²⁰ Əşşərixa amaran osâ-du fəl ad tətəy təmazrəyt wəllen. Mişan ibakkadan as əggətan dağ adag a dənəg-san du-təssəfəl arraxmat ən Məşşina. ²¹ Dağ adi dad zamas abakkad ixkâm fəl əddənət iddew əd təmattant, wədi arraxmat ən Məşşina da ad təkam tidaw əd taqqat fəl a danax-takfu təməddurt ta təxlalat əs tarrayt n Əməli-nana Ƴaysa Əlməsix.

Tarna n Əlinjil: Awa du-tətaway taqqat ta ihakku əzəgzan

6

Nəddirfa dağ əkkəlu n abakkad

Ab-ana dağ batu ta təqqalat abakkad nəddar əs tətəyt d Əlməsix

¹ Ma za nannu dağ adi? Awak ad naglu dağ igi ən bakkadan fəl ad tətəy arraxmat ən Məşşina? ² Kala kala! Nakkanay win əganen təmattant ta dana-təzammazzayat əd bakkadan, manəmmək as za naglu dağ igi-nasan? ³ Nakkanay ketnanax əmmək a nəmos as nətawasalmağ dağ aman s esəm ən Ƴaysa Əlməsix, awak tatawt a din-təgam as nərtây dər-əs dağ təmattant-net? ⁴ Dağ adi tamattant a nəga, nətawanbal-in, nərtây d Əlməsix s alamağ wa nəga dağ aman s esəm-net. Awen dağ as zund əmmək as d-inkar Əlməsix dağ təmattant əs tarrayt ən tanaya n Abba-nana, əmmək en dağ as nakkanay da ad nagu təməddurt taynayt. ⁵ Dad zamas nərtây dər-əs dağ təmattant tolat əd ta-net, wədi a dər-əs nərtəy əs tanakra dağ təmattant tolat əd ta-net.

⁶ Nəssân dağ adi âs aggadəm was kala a tu-nəmos, wədi itawataytay fəl təgəttawt iddew d Əlməsix. Əmmək en dağ as təmust-nana ta tərəwat ən tişit ən nasbakkadan təhlak, ab-as tu-təlla, nakkanay dəx nəmməzzay d əkkəlu, a t-imosan tişit ən nasbakkadan. ⁷ Fəlas awedan wa aba, wədi iddirfa dağ abakkad. ⁸ Nakkanay amaran, dad zamas ab-ana nəddew d Əlməsix wədi nəzzigzan as a dər-əs nidaw dağ təməddurt da, ⁹ id nəssân as Əlməsix wər tu-z-iba dəffər tanakra ta d-iga dağ təmattant. Ab-as fall-as təla təmattant tarna waliyyat. ¹⁰ Fəlas aba-tu, amaran əddəlil n abakkad a fəl t-aba dağ taklat iyyadda. Əmərədda təməddurt ta iga, Məşşina as tat-iga. ¹¹ Dağ adi kawanay da agiwat i man-nawan iduf n as aba-kawan dağ batu ta n abakkad, tagim dəx iduf n as təddâram i Məşşina dağ tassağ d Əlməsix Ƴaysa.

¹² Dağ adi ad wər iləs abakkad axakam fəl təğəswen-nawan əmosnen arat itamattin, wala təkəmam y arak deranan-net. ¹³ Ad wər tətəyyim şisəllad-nawan y abakkad, əqqəlmat zun təzoli as tətawamazal təkma; kalar akfiwat iman-nawan i

Məşşina, təqqələm zun aytedan aba a d-ənkarnen daɣ tēmattant, takfim şisəllad-nawan i Məşşina ad əqqəlmat təzoli tətamazalat awa oɣadan. ¹⁴ Fəlas ab-as təham təla n abakkad id ab-as təham taɣmar ta n əşşəriɣa wa n Əttawret, kalar təggazam taɣmar ta n arraxmat ən Məşşina.

Nəddirfa daɣ bakkadan fəl ad nəɣbəd Məşşina

¹⁵ Ma za nagu za? Awak ad nagu ibakkadan fəlas nokay-du azzaman win əşşəriɣa nəggaz win arraxmat? Kala kala! ¹⁶ Awak wər təssenay əs as təgeɣ iman-nak akli n awedan təbbərdagay-as, wədi kay təqqalay akli n awedan wen? Daɣ adi wa ɣas təqqalay akli n abakkad itawayan əs tēmattant, wa təqqalay akli ən tarrayt ta n əbərdəg i Məşşina tətawayat əs taqqat? ¹⁷ Mişan təmmalen i Məşşina! Dəffər as kala təmosam eklan n abakkad, əmərədda təbbərdagam daɣ wallan-nawan y əşşərədan n əsəssəɣri wa tətawaggam. ¹⁸ Təddərfam daɣ bakkadan, təqqalam əmərədda eklan n awa oɣadan. ¹⁹ Əlmital wa taggaq-qu s anamod wa n aggadəm fəl əddəlil ən rəkkəm-nawan a dər du-təxlâkam. Zund əmmək as kala ad təsammalkawam şisəllad-nawan təmosam eklan n awa immədəsan d awa xaraman fəl ad tawədam taxxaramt ketnet, əmmək di daɣ as əmərədda akfiwat şisəllad-nawan y ad təqqələm eklan n awa oɣadan fəl ad tawədam tazdak. ²⁰ Fəlas assayə wad təmosam eklan n abakkad, əddi təddirfam daɣ anamod wa n taqqat. ²¹ Ma dər ola awa du-təsaxsalam daɣ azzaman win di? Əngəm aratan as əmərədda sikarakadan-kawan, fəlas təsəlkamt-nasan tēmattant? ²² Mişan əmərədda dad zamas təddərfam daɣ bakkadan təqqalam eklan ən Məşşina wədi tazdak a du-za-təssəxsəlam, amaran təsəlkamt-nawan tēməddurt ta təɣlalat. ²³ Fəlas ərruzmatan n abakkad tēmattant, mişan təhəkkut ta danay-issənsa Məşşina təmos arraxmat-net, tēməddurt a tat-imosan ta təɣlalat daɣ tassaq d Əməli-nana Əlməsix Ƴaysa.

7

Nəddirfa daɣ əşşəriɣa wa danay-obazan

Nəddirfa daɣ awa danay-issəwar əşşəriɣa

¹ Awak masnat a wər təgem ya imədrayan-in as əşşəriɣa wər ilzem ar aytedan win əddarnen? Əssənay as əhân-kawan salan n əşşəriɣa. ² Əmmək en daɣ as tantut təzlâfat iket iddar aləs-net osaq-qat dər-əs əşşəriɣa. Mişan as aba aləs-net ad taddafart daɣ əşşəriɣa was kala a tan-osaɣ. ³ Daɣ adi as imos as harwa ad iddar aləs-net a tat-izlaf aləs iyyan, wədi əzzəna a təga, mişan as aba aləs-net wədi təddərfa daɣ əşşəriɣa. Əddi kud tat-izlaf aləs iyyan da wər z'itəwənnu təga əzzəna. ⁴ Əmmək en da a təmosam kawanay da ya imədrayan-in: kawanay da aba-kawan daɣ batu ta n əşşəriɣa wa n Əttawret əs tarrayt ta n taɣəssa n Əlməsix. Əmərədda təhâm təla iyyat taynayt a tat-imosan ta n Wa d-inkaran daɣ nəmməttan fəl a du-nəsaxsal tənfa daɣ tarrayt ta n Məşşina. ⁵ Harwa ad nəlkâm i deranan ən wallan-nana, əhân-anay arak deranan win d-itaway əşşəriɣa, əttâfan tanat ən təsəllad-nana fəl a du-nəsaxsal aratan win tawaynen əs tēmattant. ⁶ Mişan əmərədda, nəddirfa daɣ əlxəkum wa n Əşşəriɣa, ab-ana daɣ batu n aratan win danay-əganen daɣ təla. Daɣ adi nəfrâg ad nəɣbəd Məşşina əs tēməddurt taynayt əs tarrayt n Infas wa Zəddigan, wərgəɣ s anamod wa irəwan n əşşəriɣa wa n Əttawret imosan arat igmâdan.

Assa n əşşəriɣa d ənəfilal n abakkad

⁷ Ma za nannu daɣ adi? Awak əşşəriɣa imitalla d abakkad? Kala kala! Mişan ya əşşəriɣa ənta a di-izzəzdayan abakkad, id ənnar wər inna əşşəriɣa: «*Ad wər tagay attama-nak daɣ ares n awedan.*» Wər z'əssənay awa imos almayna n igi n attama daɣ ares n awedan. ⁸ Əmmək en daɣ as issolam abakkad daw alwajiban,

təzzar iga-du day əwəl-in arak deranan as tu-wər-illa a day wər əgen. Fəlas as tu-wər-illa əşşərixa, wədi abakkad da zun as immut. ⁹ Dat awa harwa a tu-wər-illa əşşərixa nak əddâra. Mişan assaxa wa d-osan alwajiban ənta ad iqqal abakkad arat iddâran, ¹⁰ nak amaran ab-i. Alwajiban win as a ihoran âs tēməddurt as ətawayan, nak tēmattant as di-ewayan ¹¹ fəlas abakkad a issolaman daw alwajib n əşşərixa, issəxrak-i inx-i sər-əs. ¹² Day adi əşşərixa i zəddigan, alwajib deyx zəddîg oğâd olâx.

Təməddurt ta n ləkkum y əşşərixa

¹³ Awak nak arat olağan a di-iqqalan tēmattant? Kala kala! Abakkad a imosan əssəbab n awen kul. Day adi abakkad isannafalal-du awa imos əs tidət. İşşəşxal awa olağan fəl a sər-i d-awəy tēmattant. Emmək en day âs tarrayt n alwajib as tənafalal tallabəst wər nəla əddukad ta təhat abakkad. ¹⁴ Nəssân as əşşərixa Infas ən Məşşina a d-ifal. Mişan nak awedan a əmosa wər nəlکم ar i deranan-net. Ənzex-in əmosa zun akli n abakkad. ¹⁵ Fəlas awa tagga wər t-əgre. Arat wa arex wər tu-təgga, amaran arat wa əkyada ənta a tagga. ¹⁶ Amaran as imos as taggaç awa wər əre, wədi əqbâlax as əşşərixa olâx. ¹⁷ Əmərədda wərgex nak a itaggin awen, kalar abakkad wa day-i ixsaran a t-itaggin. ¹⁸ Fəlas əssânaç as arat wa olağan wər day-i ixsar, almaçna wər iha taçəssa-nin. Əfrâga tara n awa olağan, mişan wər əfregax əmazal-net. ¹⁹ Wər təmizilax awa olağan s ənta a arex, kalar awa wər nolex a tamazala s ənta a wər arex. ²⁰ As imos as tamazalax awa wər arex, wədi wərgex nak a t-itamazalan, kalar abakkad wa di-izdayan. ²¹ Emmək en day as d-əgreç as: Id arex igi n awa olağan, a dat-i d-iməl awa wər nolex. ²² Əfrâya day əwəl-in y as arex əşşərixa ən Məşşina, ²³ mişan əfrâya day təsəllad-in y əşşərixa iyyan ibbillanan d əşşərixa wa əqbalan man-in. Emmək en day as əqqalax akli n əşşərixa wa n abakkad ihân şisəllad-in. ²⁴ İket aχşud ən man igray-i! Ma di-za-assafsin day taçəssa tas təsəlkamt-net tēmattant? ²⁵ Təmmalen i Məşşina əs tarrayt n Əməli-nana Çaysa Əlməsix! Day adi əs tayttay-nin za əmosax akli n əşşərixa ən Məşşina, əs taçəssa-nin amaran əmosax akli n əşşərixa wa n abakkad.

8

Infas ən Məşşina ihakk-ana tēməddurt taynayət

Təməddurt ta danax-ihakku Infas ən Məşşina

¹ Adi a fəlas əmərədda ab'as t-illa attadib i win ərtaynen d Əlməsix Çaysa. ² Fəlas tarna ta n Infas wa ihakkin tēməddurt ihân Çaysa Əlməsix təsiddarfət-kay day tarna ta n abakkad əd tēmattant. ³ Əşşərixa wa n Əttawret wər ifreg igi n awen, fəlas igdal-as-tu rəkkəm ən taçəssa n aggadəm. Adi a fəl d-issəgla Məşşina Barar-net iman-net iha taçəssa zun ta n nasbakkadan a nəmos, iqqal takutay ta təmmasat ibakkadan id Məşşina a t-itəwwəddaban day adag-nana. Emmək en day as z'izzərəz tarna ta fall-anax ila abakkad. ⁴ Arat wen ig-ay fəl ad nəfrəç əmazal n Əşşərixa wa n Əttawret əs tēməwit toçadat nakkanay win əlkamnen i tara ta n Infas wa Zəddigan, wərgex ta n aggadəm.

⁵ Aytədan win əlkamnen i tara ta n aggadəm, win di imedranan əd deranan win aggadəm a taggin, amaran win əlkamnen i tara ta n Infas wa Zəddigan, win di imedranan əd deranan win Infas wa Zəddigan a taggin. ⁶ Ləkkum i medranan əd deranan win aggadəm tēmattant as itaway, amaran ləkkum i medranan əd deranan win Infas wa Zəddigan, tēməddurt taynayət as itaway d agaraw n alxer çur Məşşina. ⁷ Fəlas imedranan əd deranan win aggadəm əzzingen Məşşina id aggadəm wər ibbərdaç y əşşərixa wa n Məşşina, amaran wər t-ifreg. ⁸ Aytədan win əlkamnen i deranan ən taçəssa-nasan wər əfregan çərrezat i Məşşina. ⁹ Kawanay, as imos

as izdâx-kawan Infas ən Məşşina wədi ab-as təlcamam i medranan əd deranan n aggadəm, kalar win Infas wa Zəddigan as təlcamam. Awedan wa wər iha Infas wa n Əlməsix, wədi wərgex i n Əlməsix. ¹⁰ Mişan as imos as tərtâyam d Əlməsix, wədi kud imos as tağəssa-nawan təsəlcamt-net təmattant fəl əddəlil n abakkad, da Infas wa Zəddigan ikf-iwan təməddurt taynayət fəlas aytedan oğadnen a təmosam dat Məşşina. ¹¹ Şixəswen-nawan təsəlcamt-nasnat təmattant; dər iga awen da ya as imos as ih-iwan Infas ən Wa d-issənkaran Ƴaysa Əlməsix dağ təmattant, wədi Wa d-issənkaran Ƴaysa Əlməsix dağ təmattant ad agu təməddurt taynayət dağ təğəswen-nawan s Infas-net Zəddigan a kawan-ihân.

¹² Dağ adi, imədrayan-in, əllan-tu aratan a danağ-əhhişşalnen, mişan wərgex dağ anamod wa n deranan n aggadəm əranen ad nəlkəm y awa əran man-nana. ¹³ Fəlas as təgam təməddurt təlcamam y awa əran man-nawan, wədi a kawan-iba təggəzam Jahannama. Mişan as toyyam imazalan win əran man n aggadəm, təlcamam i win ira Infas wa Zəddigan a kawan-ihân, wədi ad təddəram har faw.

Məşşina ig-anax bararan-net əs tahakkay ta danağ-iga Infas-net di Zəddigan

¹⁴ Fəlas aytedan kul win dağ innoda Infas ən Məşşina, win di bararan ən Məşşina a mosan. ¹⁵ Infas wa təgrawam əddi, wər kawan-iga eklan, wər tu-təgrəwam fəl a taglim tah-iwan tasa, kalar təgrâwam-tu fəl a təqqəlam bararan ən Məşşina. Infas en dağ a sər-na d-ewayan as nədkâl imaslan-nana nəğannu i Məşşina: «Abba! Abba!» ¹⁶ Infas wa Zəddigan əd nakkanay iman-nana a tagayyatnen as nəmos bararan ən Məşşina. ¹⁷ Amaran, dad zamas bararan ən Məşşina a nəmos, wədi iməkkusa n arraxmaten-net a nəmos, amaran nədrâw təkəsit ten d Əlməsix dad zamas nəddew dər-əs dağ alyazab fəl ad nəgrəw tədəgart-nana dağ tanaya-net.

Infas əd tanaya win d-əzaynen

¹⁸ Iga Ƴur-i âs alyazab wa nətaggu əmərədda wər ewed wala dağ tanaya ta danadu-z-isənnəfiləl Məşşina.

¹⁹ Awa d-ixlakan kul ikna əddəguz dağ anay n alwaq wad z'isənnəfiləl Məşşina bararan-net. ²⁰ Fəlas awa d-ixlakan kul iggâz təla ən tağmar ta n təbənnan. Wərgex əntanay a əranen awen, kalar Məşşina a tan-igan dağ fassan ən tağmar ten. Ill-ay attama n ²¹ as taxlək ten ənta iman-net da ketnet ad taddarfət dağ əhluk wa təga imosan əkkəlu, fəl ad əgrəwan əntanay da əlləllu igân dağ tanaya ta z'əgrəwan bararan ən Məşşina. ²² Amaran nəssân wəllen as har harwa da taxlək ketnet təddew dağ təhənəffa əd təlawayt zun təntut tətəggəzat amzur. ²³ Mişan wərgex əntanay Ƴas a tihənəffitnen, nakkanay a əgrawnen Infas wa Zəddigan imosan tədəgart ta tazzarat dağ təkək ən Məşşina, da nətihənəffit dağ man-nana nəkna əddəguz dağ a danağ-agu Məşşina bararan-net akf-anax tədərfət təkmalat. ²⁴ Fəlas nəgrâw efsan, s attama wa nəga. As nəhannay awas nəga attama-net, wədi ab'as imos attama. Ma imos wa z'agin attama n arət ihannay? ²⁵ Mişan as nəga attama-nana dağ awa wər nəhənnəy, wədi a das-nəqqəl əs zəmmerat.

²⁶ As nəga awen a d-asu Infas wa Zəddigan idhəl-ana dağ rəkkəm-nana fəlas nakkanay wər nəssen arət was ihor a tu-nansəy dağ təwatriwen-nana. Mişan Infas wa Zəddigan iman-net itaggu şihənəffa as wər ifreg awedan emel-nasnat. ²⁷ Amaran wa itamayyan iwəllan, issân awa təmos ənnəyat n Infas wa Zəddigan id ənta agna wa n Məşşina as itattar s esəm ən məzzəgzan.

²⁸ Amaran nəssân âs aratan kul əmosan tənfa n aytedan win əranen Məşşina tiwaxran-du değ əs tarrayt-net. ²⁹ Fəlas win isannafran harwa dağ tizarat win di otâs-asan ad əqqələn əlmital ən Barar-net, fəl ad iqqəl Barar-net en aƳafadday dağ bararan aggotnen. ³⁰ Amaran win as otas Məşşina təxaray-nasan kala da, win di iğr-ên, amaran ig-en aytedan oğadnen, ikf-en değ tanaya.

Ikus n aššak day tara ta danax-iga Məššina

³¹ Day adi ma za nannu day batu ta? As imos as Məššina iwâr aganna-nana, ma ifragan ad iqqəl əllid-nana? ³² Məššina as Barar-net an iyyanda da wər t-oyya, kalar ikf-ay fəl əddəlil-nana ketnana, manəmmək as dana-wər-z-akfu arat kul s arraxmat-net, nədrâw awen əd Barar-net? ³³ Ma z'abəzan s əššərixa aytedan win isannafran Məššina? Awak aytedan win, wərgex Məššina a tan-ikfan taqqat. ³⁴ Ma imos za wa tan-z-abəzan s əššərixa? Elməsix [Yaysa] iman-net as t-aba, amaran wərgex awen yas, kalar itawasankar-du day təmattant. Iha əmərədda ayil ən Məššina imos almawakkil-nanax a danax-itaggin šiwatriwen.

³⁵ Ma ifragan a danax-izəmməzzəy əd tara n Elməsix? Awak təssust? Məx təməyatirt, məx ətəwədgaz, məx gələk, məx zəlləm, məx igguz n alxarar ən tamattant, məx takoba? ³⁶ Ennan İlkəttaban: «*Tâwakkasan day-na man əzəl kul fəl əddəlil-nak. Nətiwaxsab zun ayfəd tawagzamnen.*» ³⁷ Mišan day awen ketnet nəgarraw tarna ta togarat əs tarrayt ən wa danax-iran. ³⁸ Fəlas əkkasax aššak as gər za təmattant, wala təməddurt, wala angalosan win əmməzraynen Məššina, wala təxmaren n əššur šin əhanen ətənkul, wala azzaman win nəha əmərədda, wala azzaman win d-əzaynen, wala šiğurad, ³⁹ wala awa ihan afalla, wala wa ihan eres, wala arat waliyyan a d-ixlâkan, xasil wər t-illa a ifragan a danax-izəmməzzəy əd tara ta danax-isannafalal Məššina əs tarrayt n Əməli-nana Elməsix Yaysa.

Elinjil d İsrayil: Edag wa ittaf İsrayil day attarix n əlyillas

9

Tarna ən Məššina tosâ-du əs tarrayt n İsrayil

Iduf wa iga Buləs i Kəl-İsrayil day əwəl-net

¹ Tidət a əmmala s esəm n Elməsix, wər tægga bahu, iman-in əggəyyen-i fəl awen əs tarrayt n Infas wa Zəddigan. ² Əğşâdan man-in wəllen, əššiwaša dəx wəllen. ³ Awalla wər di-ikma ilxan-i Məššina ammazzaya d Elməsix fəl əlyillas ən kəl tamet-in d aytedan win di-erawnen, ⁴ a tan-imosan Kəl-İsrayil. Əntanay a əlanen almaqam ən tišit ən bararan ən Məššina win d-iskat i man-net. Əntanay dəx a mosnen aytedan win day du-tənafalal təmust ən Məššina əs tanaya, nafalalan-du dəx day-san arkawalan ən tassağ, əd təhəkkut ta n Əššərixa, d əlyibada, d arkawalan. ⁵ Əntanay dəx a mosnen əzzurrəyya ən marawan-nana win ərəwnen, Elməsix dəx imos iyyan day-san əs tišit-net aggadəm. Elməsix s ənta a illan dənnəg əkkulluk n arat, imos Məššina. Attamalet esəm-net har faw! Amin!

Awa imos akal wa n İsrayil

⁶ Arat wen wər imos almağna-net as awal ən Məššina ab-as ila almaqam. Kala kala! Ənta ya wərgex aytedan kul win d-əgmadnen İsrayil a mosnen İsrayil. ⁷ Win d-əgmadnen İbrahim dəx wərgex kul əmosan bararan-net, kalar a inna Məššina y İbrahim day İlkəttaban: «*Aytedan win d-əgmadnen İsəhaq a z'iqqələn əzzurrəyya-nak.*» ⁸ Almağna n awen as wərgex bararan win əhəwnen əs təməwit ta n aggadəm a mosnen bararan ən Məššina. Kalar bararan win əhəwnen əs təməwit ta tənəmannakat d arkawal ən Məššina, əntanay a ixsab Məššina day əzzurrəyya n İbrahim. ⁹ Ənta da awa inna arkawal: «*A kay-d-əqqəla adan a da âznin, əddi da tamahharak-nak Sarata təla barar.*»

¹⁰ Amaran wərgex awen yas. Awen day a təga Raqqiyetu, ənta da əššin bararan ən yayyan n eknewan a təla, amaran ketnasan aljad-nanax İsəhaq a dər tan-təla. ¹¹⁻¹² Məššina ila tarrayt-net tas isannafran aytedan. Əsənnəfrən-net aytedan ilkâm i təxaray ta tan-iga əs tarrayt-net, wərgex imazalan-nasan. Fəl ad isattaddu tarrayt ta

d-iga den, təmosat arat isinafran, inna i Raqqiyetu harwa da wər əhəwan bararan-net, wər əknən wala za wər t-əxşedan: «*Wa waşşaran ad iqqəl akli ən wa əndarran.*»
¹³ Inimannak awen d awa ihan Əlkəttaban as ənnan: «*Arex Yaqub, əkyâdağ Esaw.*»

Məşşina ənta məşşis ən tarna oğâdan

¹⁴ Dağ adi ma za nannu y awen? Awak Məşşina wər oğed? Kala kala! ¹⁵ Fəlas a inna i Musa: «*Ad hənəttey i was arex a das-hanattey, ilalay i was arex a das-ilala.*»
¹⁶ Emmək en dağ as arat wen wərmad iqqân dağ wa ira awedan, wala aratan win as ozal dağ agamay-nasan. Kalar wər iqqen ar dağ Məşşina di n əməhhenən, ¹⁷ s ənta a innan i Firxawna dağ Əlkəttaban: «*Ənəy! Əkfeq-qay almaqam fəl ad assakna tarna-nin əs tarrayt-nak, tagu masnat fəl esəm-in dağ əddənət ketnet.*» ¹⁸ Dağ adi Məşşina itihənəttit i was ira, isagarmam əwəl ən was ira.

¹⁹ Amaran əssânax as a di-tanna: «Mafel [dağ adi] Məşşina harwada itabaz aytedan əs mazalan-nasan, dad zamas wər t-illa i ifrâgan əməzrəy ən tara-net?»
²⁰ Fadda, kay aggadəm, ma təmosax as təşarrağa əd Məşşina? Awak talaq təfrâg ad tannu i wa sər-əs işaqqalan: «Mafel tətəggağ-i əmmək wa?» ²¹ Awak akanaw wərgex ənta a ilân talaq itaggu sər-əs ikassan âs wiyyad za tiwasansan y əzəl a sər-san iskâtan, win hadatnen amaran tiwasataymalan əzəl kul? ²²⁻²³ Emmək en dağ a əgan aratan win isammatag Məşşina. Iga dər-na təzaydart tagget nakkanay a əhornen d əhluk fəlas ira ad isənnəfiləl alham-net əd tarna-net. Ira deş ad isənnəfiləl y aytedan wiyyad tanaya-net wər nəla əddukad. Aytedan win den əntanay as ihanattat, əntanay deş a isammatag kala da, y a dər-əs ertəyan dağ tanaya-net.

Məşşina iyra Kəl-Əlyəhud d aytedan win tan-wər-nəmos

²⁴ Aytedan win den nakkanay a tan-imosan. İyr-ana-du Məşşina dağ Kəl-Əlyəhud, iyr-ana-du deş dağ win wər nəmos Kəl-Əlyəhud. ²⁵ Awen dağ a ihan əlkəttab wa n ənnəbi Osay as inna: «*Win wər nəmos tamattay-nin, a tan-d-ayrax agağ-qan "tamattay-nin". Win wər nəmos win əknex tara, a tan-aga "win əknex tara".*» ²⁶ Amaran idagğan win dağ dasan-itawannu: «*Wər təmosam tamattay ən Məşşina!" Idagğan win di da a dağ dasan-z-itawannu "bararan ən Məşşina di iddaran".*»

²⁷ Ənnəbi İsayas deş iktâb dağ batu n İsrayil as: «*As əgan maddanəs n İsrayil igət wa n təblalen n amağal, arat dağ-san ças a z'afsin.*» ²⁸ Fəlas Amaylol ad assandu awal-net fəl əddənət əs təməwit təkmâlat tətərabat.»

²⁹ Zun batu ta iga ənnəbi İsayas dat awen as inna: «*Kundaba as Əməli di ilan tarna a dağ-na d-iglazan amasa, wədi ad nəqqəl zun Sədom, nalu əd Gamora.*»

Awa iwaran aggadəm d awa iqqalan İsrayil dağ azzaman win əmərədda

Agaraw ən taqqat s əzəgzan wərgex əs mazalan

³⁰ Ma za nannu dağ adi? Aytedan win wər nəmos Kəl-Əlyəhud wər əglayan dağ agamay ən taqqat mişan əgrawan-tat əs tarrayt n əzəgzan-nasan. ³¹ Kəl-İsrayil amaran a gammaynen a d-əssəkməlan ləkkum y əşşəriğa fəl ad əgrəwan taqqat, indar-asan. ³² Ma d-ewayan za awen? Adi za iba n agamay-nasan taqqat ten əs tarrayt ta n əzəgzan, əgməyan-tat əs mazalan-nasan. Tənkaf-asan təhünt ta təsagadlit.
³³ Təhünt ten təmmittal Əlməsix, amaran ənnan Əlkəttaban dağ batu-net: «*Ənəyat, əssinsa dağ Səyon təhünt təmosat təsənkəft, təmos deş təsəlit tətagadlit aytedan. Mişan awedan wa sər-əs izzəgzanan wər z'ikərukəd.*»

10

¹ İmədrayan-in, əknex deran n ad əgrəwan Kəl-İsrayil efsan, amaran awen dağ a tansaya Məşşina faw dağ təwatriwen-in. ² Fəlas əggəyyey əs əgləyan dağ batu ta n Məşşina mişan wər əssertəyan awen əd masnat. ³ Wər əgren təməwit tas

ihakku Məşşina aytedan taqqat, a tat-gammayan əs mazalan-nasan. Emmək di day âs wər əbbərdagan i Məşşina, ugayan əs ləkkum i tarrayt tas ihakku Məşşina taqqat. ⁴ Elməsix ənta a imosan təsəxtəmt n əşşəriya y ad iqqəl as aytedan kul win sər-əs əzzəgzannen ad əgrəwan taqqat dat Məşşina.

Efsan s əzəgzan, wərgex əs ləkkum y əşşəriya

⁵ Arat da wa iktab ənnəbi Musa day batu ən taqqat ta tətawagrawat əs ləkkum y Əşşəriya wa n Ettawret: «Awedan kul wa d-issəndan əşşəriya, wədi ad igrəw təməddurt s əssəbab n əşşəriya.» ⁶ Mişan ənta da əmmək was tətawagraw taqqat əs tarrayt ta n əzəgzan: «Ad wər təganna day man-nak: "Ma z'aggazzayan əs jənnawan?"» Awak Elməsix wərgex izzibbat-du? ⁷ Madex tanna: «Ma z'azzabben iggəz imawetan n amaḍal?» Awak Elməsix wərgex inkar-du day təmattant? ⁸ Awak ma inna Awal ən Məşşina day batu ta? A inna: «Awal ihoz-kay, iha imi-nak, iha əwəl-nak,» amaran awal wa batu n əzəgzan a day işşewal, ənta dex as nətaggu təlxtutbat. ⁹ As təşşewala təqbalax as Yaysa imos Əməli, təzzəgzana day əwəl-nak as issinkar-t-idu Məşşina day təmattant, wədi kay təgrəway efsan. ¹⁰ Fəlas awedan wa izzəgzanan day əwəl-net, wədi ad t-akfu Məşşina taqqat. Amaran wa işşewalan imal əzəgzan-net, wədi ad t-akfu Məşşina efsan. ¹¹ Ənnan Əlkəttaban: Awedan kul wa «fall-as iffəllan iga day-as attama-net, wər ilkem ad ikirakad.» ¹² Wər izlay wa imosan Ag Əlyəhud wala wa tu-wər-nəmos. Ketnasan Əməli-nasan iyyanda, ihakkin s əlləllu-net taggast y aytedan kul win day-as tat-əgməyən. ¹³ «Fəlas awedan kul wa igməyan taggast day Əməli, wədi ad igrəw efsan.»

Kəl-İsrayil wər əzzəgzanan s Əlinjil

¹⁴ Məni za əmmək was z'əgməyan taggast day was wər əzzəgzanan? Məni əmmək was sər-əs z'əzzəgzanan wər əslən y awal-net? Məni əmmək was das-z-aslin da wər t-illa i dasan-t-imalan? ¹⁵ Məni əmmək was tu-z-əməlan aytedan a dasan-t-əmalnən as imos as wər t-illa i tan-issiglan? Ənnan Əlkəttaban: «Iket şihussay əganat-tanat takkolen n aytedan win əmməlnən isalan n alxer a imos Əlinjil!»

¹⁶ Mişan wərgex Kəl-Əlyəhud kul əbbirdagan y Əlinjil. Inna Ənnəbi Isayas: «Əməli, məni wa izzəgzanan s awa nənna?» ¹⁷ Day adi, isalan win as nəsla, əntanay a dutawaynən əzəgzan, amaran awal n Elməsix a əmosan. ¹⁸ Mişan əsəstan da wa tagga: Awak Kəl-Əlyəhud wər əslən y awal wen? Wəllən za as əslən-as. Ənnan Əlkəttaban: «Əməli-nasan təsl-as əddənət ketnet, awal-nasan əruru n amaḍal ketnet ewəd-tu.»

¹⁹ Əlasax əsəstan harwa da ənne: Awak tamattay n İsrayil masnat a wər təga day awen? Ənnəbi Musa a dasan-t-imalan əs tizarat. Inn-asan: «Inna Məşşina, a kawan-agax inəmmənzax ən win âs tamattay da wər tat-əmosan, aknax day-wan igi n alham ən tamattay wər nəla tayttay.» ²⁰ Ənnəbi Isayas fadda a dasan-innan əs təholat: «Əgrəwan-i win di-wər-nəgəmməy, sannafalalax iman-in i win di-wər-nənsay wala.»

²¹ Mişan day batu ta n Kəl-İsrayil inna: «Əzəl kul əzzələy əfus-in yarra tamattay təmosat inəmməzray ən nəffəllag.»

11

Tarrayt ta d-iga Məşşina d awa d-izayan İsrayil

Məşşina isinafran i man-net aytedan win d-əggolaznən

¹ Ənne day adi: Awak Məşşina agamad a iga batu ən tamattay-net? Kala kala! Fəlas nak iman-in iyyan day Kəl-İsrayil a mosa, əmosax ahaya n İbrahim, əgmâda-du tawşet ta n Benyamin. ² Məşşina wər igmed batu ən tamattay-net as irəw as tat-isannafran. Əngəm təkittəwam awa ənnan Əlkəttaban day batu n ənnəbi İlyas assaxa wad eway tala-net əs Məşşina day batu ən Kəl-İsrayil? ³ Inna i Məşşina:

«*Əməli, ənçan ənnəbitan-nak, jabbarajjen idaggan-nak win təkutawen, wər d-iqqim ar nak, amaran gammayan d a dağ-i əkkəsan iman.*» ⁴Təssânam za awa das-ijjəwwab Məşşina? Inn-as: «*Əsinafranay i man-in əssa gim n aləs wər nəssəjad dat əssənəm wa igan Baxal.*»

⁵Zund əmmək en dağ as dağ azzaman win nəha əmərədda əggolazan-du aytedan isinafran Məşşina s arraxmat-net. ⁶Dağ adi, dad zamas arraxmat-net as tan-isannafran, wədi wərgəx fəl əddəlil ən mazalan-nasan, madəx amaran iqqəl as arraxmat ab-as təmos arraxmat.

⁷Ma igan dağ adi? Kəl-İsrayil wər əgrewan awa gammayan. Wər dağ-san t-igrew ar win isannafran Məşşina. Win hadatnen amaran tawaggan aytedan as garmoman wallan-nasan, ⁸inimannak awen d awa ənnan Əlkəttaban as ənnan: «*Ikkas-tan Məşşina dağ əlxəyyar ən man-nasan, ikf-en şittawen wər nəhənnəy wala, əd təməzzugen wər nəşəllu har azalada.*» ⁹Ənnəbi Dawəd dəx inna: «*Əqqəlānet-asan mensewan-nasan taftaw, əqqəlān sangay a tan-z-ibəzan. Əqqəlānet-asan agadal, əgrəwanet attadib wa dər əhoran.*» ¹⁰Alsinet şiyyay şittawen-nasan, igmədet-tan asawad-nasan. *Kərənbəwanet roran-nasan har faw!*»

Edag wa əhan Kəl-Əlyəhud d aytedan win tan-wər-nəmos dağ tarrayt ta d-iga Məşşina

¹¹Ənne dağ adi: Awak Kəl-İsrayil nigartattafan y ad uden har faw? Igməd aşşak as wərgəx awen. Mişan təmazrəyt-nasan a du-tewayat as əgrəwan aytedan win wər nəmos Kəl-Əlyəhud efsan fəl ad əggəznat təsmiten Kəl-İsrayil. ¹²Wala təmazrəyt-nasan təqqal tənəfləyt y əddənət, ətəwərna-nasan dəx iqqal tənəfləyt i win wər nəmos Kəl-Əlyəhud, əngəm in za as d-əxradan əsənəd əbdadan-du?

¹³Əmərədda kəwanay win wər nəmos Kəl-Əlyəhud as əşşəwala: Nak anammazul a mosa s aytedan win wər nəmos Kəl-Əlyəhud amaran əssiymarəx əşşəxəl wen, ¹⁴har əs as imməkkan awen a d-awəya şismiten s aytedan win tawşet-in afsin dağ-san wiyyad. ¹⁵Fəlas as iqqal as ətəwəkkas-nasan əs tama eway-du amaknaw dağ əddənət, əngəm in za ətəwəsuxəl-nasan? Wər t-illa a dər z'alu ar tanakra dağ təməttant.

¹⁶Amaran as imos as tadagart ta tazzarat dağ təgəlla təskât i Məşşina, wədi awa dağ-as in-iqqiman ketnet da in Məşşina. As imos as dəx ikewan tiwaskatan i Məşşina, wədi ilədlad da tiwaskatan-as. ¹⁷Əlmital en dağ a əhan Kəl-İsrayil: İlədlad wiyyad a din-tawakarammatnen dağ aşək. Kay amaran wa wər nəmos iyyan dağ Kəl-İsrayil, təmosa zun ələdlid ən zaytun n əsuf, təzzar tətawagga dağ adag-nasan. Dağ adi kay da tədrâwa dər-san isudar olâxnen win du-nakkasan kewan n azzaytun wa itawanbalan den. ¹⁸Dər iga awen da ya, ad wər talkax ilədlad win din-tawakarammatnen. Amaran as kay du-təggaz ənnəyat ən zazwar ən man-nak, takta-du as wərgəx kay a ilan ikewan, kalar ikewan a kay-ewaynen əkbâlan-kay. ¹⁹Ad tanna dağ adi: İlədlad tawakarammen-in fəl ad əggəzəx edag-nasan. ²⁰Tidət as ətəwəkərəmme a din-əgan lədlad win den fəl iba n əzəgzan. Kay amaran təddara s əzəgzan-nak. Ad wər tagəx imedranan əmosnen zazwar ən man, kalar əqqəl əmiksad ən Məşşina. ²¹Fəlas dad zamas Məşşina wər oyya ilədlad win dər d-ixlak aşək, wədi kay da wər kay-z-ayyu.

²²Dağ adi əssən fəl əlluğ ən Məşşina, əd tallabast n alham-net. Tallabast n alham-net isakn-et i win nəmməzray, əlluğ-net amaran isakn-ak-ku, iket təzizawe dağ tarrayt n əlluğ wen. As wər təgəx adi, wədi kay da a din-tətəwəkərəmme. ²³Kəl-Əlyəhud da as oyyan tarrayt ta n iba n əzəgzan a du-təwəsuxəlān aşək, fəlas Məşşina ilə tarna n a tan-d-iləs əsuxəl n aşək wen. ²⁴Dad zamas kay tətawakaramme-du dağ aşək ən zaytun n əsuf, tətawaggağ ələdlid ən zaytun wa n ənebəl olâxan, manəmmək as du-wər-za-təwəsuxəlān əntanay da təwəggin dağ azzaytun wa dağ d-əxlakan?

Əlyillas wa d-izayan Kəl-İsrayil

²⁵ Imədrayan-in, wər arex a dawān-ijhâl əssir wa, fəl ad wər təxilam təlâm masnat iyyat zəwwərat. Edes ən Kəl-İsrayil wər z'ammazzayan ad əffillagan iket wər d-əxselan aytedan kul win wər nəmos Kəl-Əlyəhud əs Taḡmar ən Məššina. ²⁶ Emmək en daḡ as z'igrəw İsrayil ketnet efsan id ənnan Əlkəttaban: «*Wa iyallasan a d-igməd Səyon, ikkəs inəmməzray daḡ əzzurrəyya ən Yaqub.* ²⁷ *Ənta da da arkawal wa dər-san z'aga, assaxa wa fall-asan z'əkkəsaḡ ibakkadan-nasan.*»

²⁸ Daḡ batu ta təqqalat tugəyt-nasan s Əlinjil, wədi Kəl-Əlyəhud əntanay a mosnen izənga ən Məššina fəl ad təgrəwam tənfa n awen. Mišan daḡ batu ta təqqalat anafran wa n Məššina, wədi əntanay a mosnen aytedan win ikna Məššina tara fəl əddəlil ən marawan-nasan. ²⁹ Fəlas Məššina wər d-itəqqəl daḡ təhəkkuten-net, za wər isəmməttəy anafran-net. ³⁰ Kawanay iman-nawan dat awa təmmizrayam Məššina mišan əmərədda ihanattat-awan s əssəbab ən təmazrəyt-nasan. ³¹ Zund əmmək en daḡ as, dad zamas təmazrəyt-nasan ta n əmərədda teway-du as təgrawam əhənətta, arət wədi iga fəl a dasan-ihənəttət Məššina əntanay da [əməredda]. ³² Fəlas Məššina ittâf aytedan kul daḡ təmazrəyt fəl a tan-assaknu ketnasan təhanint-net.

Təmmalen i Məššina fəl masnat-net

³³ Ya Məššina! Təgərgist-nak, əd tayttay-nak əd masnat-nak wər əlenat əddukad. Əlxəkuman-nak wər t-illa i ifragan əşəggər-nasan, tarrayen-nak wər t-illa i ifragan əgərri-nasnat. ³⁴ «*Məni wa issanan awa daḡ isamadran Əməli? Məni was kala ad iqqal əməššəwwər-net?* ³⁵ *Məni was kala ad iga i Məššina tənəfust, əngəm iqqal as irwās-tu tənəfust?»* ³⁶ Arat kul ənta a d-ifal, ənta a d-ewayan as t-imal arat kul, ənta deḡ a ilan arat kul. İgrəwet Məššina adkul daḡ azzaman kul har faw! Amin.

Ezəmmizəl n Əlinjil: Awa dər tətalu təməddurt n əlməsixi

12

Ammar s iga ən təməddurt ta n əlməsixi

Təməddurt təmmittayət fəl ta tərəwat

¹ Daḡ adi əgmāya daḡ-wan, ya imədrayan-in, fəl tişit ta iga Məššina əməhhenən, ad takfim şixəswen-nawan əqqəlnat takutay təddarat, zəddigat, təgrâzat i Məššina. Emmək en daḡ as za tagim i Məššina əlxibada wa n tidət. ² Ad wər tayyim iman-nawan səmməttəyan-kawan azzaman win nəha da əməredda, kalar ayyiwat iman-nawan a kawan-təşəşšinəy tayttay-nawan ta taynayət, fəl ad tagrim, tardim deḡ s arat wa imosan tara ən Məššina, a t-imosan: Awa olaḡan, d awa igrazan i Məššina, d awa ikmalan.

Agiwat təməddurt âs akkiyyan daḡ-wan imos amaşşaxal ən win hadatnen, təşḡalam əs təhəkkuten ən Məššina

³ Arat da wa ganna y akkiyyan daḡ-wan s əssəbab n arraxmat ta di-iga Məššina: Ad wər təqqəlam aytedan əzzizwarnen iman-nasan, kalar agiwat i man-nawan iduf igân s ənnəyat tolaḡât, ewâl awen s əzəgzan wa ikfa Məššina y akkiyyan daḡ-wan. ⁴ Akkiyyan daḡ-na taḡəssa iyyadda a ila, mišan təga daḡ təsəllad aggotnen, amaran şisəllad şin den akkiyyat d əşşəḡəl-net. ⁵ Emmək en daḡ as nakkanay nəggət, mišan taḡəssa iyyadda a nəmos daḡ tərətəyt d Əlməsix, amaran akkiyyan daḡ-na imôs taslət daḡ əljəməḡat-nana. ⁶ Mišan nəgrâw şihəkkuten wər nola ewalnen s arraxmat ta tətawakfat akkiyyan daḡ-na. As imos as igray iyyan daḡ-na təhəkkut n emel y aytedan isalan a fall-as d-izazabbat Məššina, işşəşəḡəlet-tat ewâl awen s awa dər ogda əzəgzan-net. ⁷ Was təhəkkut-net tadhəlt n aytedan, idhəlet-tan. Wa igrawan

təhəkkut n əsəssəxri, issassaxriwet. ⁸ Wa igrawan tişit n awedan italaman y aytedan fəl man, amazalet s awen. Wa igrawan tişit n awedan təha tahakkay, akfet s əwəl iyyanda. Wa igrawan tizart agiwet tizart n əlməxsud. Wa itassanan dağ aytedan win mağatarnen, issənet dağ-san əs man filawasnen.

Agiwat təməddurt taha tara d əsəmmədrəy ən man əd tugəyt s a imosan təkma

⁹ Tara a tat-wər-təggəz təlmənufəqa. Əkəydat arat kul wa imosan təkma. Zəzzəwətat wəllen dağ əmazal n awa olağan.

¹⁰ Dağ batu ta təqqalat tara ta gər mədrayan, akkiyyan dağ-wan akniwet tara ən win hadatnen.

Dağ batu ta təqqalat sağmar, zuzərat tənfa ta n mədrayan-nawan i ta-nawan.

¹¹ Dağ batu ta təqqalat əşşəxəl, əqqəlat imaşşaxalan, wərgəx iməssəndad, təməhəndəret dağ-wan tamse ta tətakkasat sandad, a tat-imosan ta n Infas ən Məşşina, təxbədam Əməli.

¹² Dağ batu ta təqqalat igi n attama, fəliwəsət. Dağ batu ta təqqalat təssust, əqqəlat iməzəzzəydar. Dağ batu ta təqqalat şiwatriwen, ad wər tamməzəydam d igi-nasnat.

¹³ Dahhalat imizdagan dağ addararaten-nasan, təqqələm aytedan iha aməgaru fawda.

¹⁴ Tattarat a igan albaraka y aytedan win [kawan]-ədgaznen. Ad wər tələxənam awedan waliyyan, kalar tattarat y aytedan. ¹⁵ As təggəzam aytedan filawasnen, təfəliwəsəm kawanay da, as təggəzam win hallinen, talim kawanay da. ¹⁶ Nəməggiwat iduf iyyanda gar-ewwan. Ad wər təgəmməydam almaqam i man-nawan, kalar gəmməyat awa wər nəla anay. Ad wər tagim iduf n as təməsəm imalan ən tayttay.

¹⁷ Ad wər təzzalam təkma əs təkma y awedan waliyyan. Gəmməyat awa olağan xur aytedan kul, a sər-əs tətəmazalam. ¹⁸ As immikkan awen, iket iqqan dağ-wan adi, iməlet-tu alxer gar-ewwan d awedan kul. ¹⁹ Ad wər təzəzalam i man-nawan, imaran-in, kalar ayyiwat alham wa n Məşşina ad işxəl, fəlas ənnan Əlkəttaban: «*Nak a itabazan s əşşərixa, nak a z'ixkəman y awedan kul awa dər ihor, inna Əməli.*»

²⁰ Kawanay amaran arat da wa kawan-iwaran: «*As tənayağ azangaw-nak ih-ay gələk, taşşatşaq-qu; as t-ihə fad dəx taşşəşwaq-qu; fəlas as das-təgəx adi, zun as təssinsa fəl ayağ-net şiməkaten əryānen.*» ²¹ A dak-wər-ilkəm ad toyyəx əşşur issəfəl-du dənəgək, kalar əxləb əşşur s əmazal n awa olağan.

13

Əqqəlat kəl akal olāxnen

¹ Awedan kul ilzām-tu əbərdəg i muzaran n akal fəlas təymar kul Məşşina a du-təfal. Təymaren kul şin t-əllanən, Məşşina a tanat-issəbdadan. ² Awen dağ a fəlas awedan kul wa iffəllagan fəl əlxəkum n akal-net, awedan wədi ənnizam ən Məşşina a fəl iffəllag. Win əffəllagnen dəx a d-awəyan attadib əs man-nasan. ³ Imuzaran wər tan-iksud awedan wa itaggin awa olağan, kalar wər tan-iksud ar wa itaggin təkma. As tarex a kay-təgməd tasa ən muzaran ad tətəmazalağ awa olağan, əddi a xur-san təgrəwəy əlqəbulat. ⁴ Fəlas imuzaran n akal əşşəxəl ən Məşşina a əhan imosan tənfa-nak. Mişan as tətəgəy awa wər noləx, wədi iksad imuzaran fəlas wərgəx bənnan ələn fərregat n attadib əs təməttant. Məşşina a işşəşxalan imuzaran fəl

ad tawaddaban aytedan win tamazalnen təkma, ewayan-du əs man-nasan alham n Əməli.

⁵ Awen dağ a fəlas təga addararat s ad abbardagan aytedan i muzaran. Wərgex təksəda n attadib xas a fəl danax-ilzam awen, kalar ənnəyat-nanax a dana-tu-təzzəlzamat. ⁶ Əddəlil n awen dağ a fəl tərəzzamam amana fəlas win tu-garrawnen den Məşşina a tan-işşəşyalan fəl ad sənnəhəlan amaknaw n əşşəxəl wen. ⁷ Ərzəmat y awedan kul awa dağ-wan ila. Ərzəmat amana i wa dağ-wan t-ilan, tərzəməmə takəs i wa dağ-wan tat-iran, tiksadam was kawan-təwar təksəda-net, təssəxməram was kawan-iwar sağmar-net.

Tara n əşşəqqax-nak, ənta a təmosat əsəkməl ən ləkkum y əşşərixa

⁸ A tu-wər-iməl waliyyan dağ-wan itiwarwasan arat a iqqal. A tu-wər-iməl gar-ewwan ar ənəməra, id awedan wa iran aytedan, wədi issinda-du əşşərixa ən Məşşina. ⁹ Fəlas alwajiban zun win ənnanən: «*Ad wər tagax əzzəna, wala tagax iman, wala takəra, wala tagax attama-nak dağ ares n awedan*», d alwajiban kul win hadatnen, əxsələn-du dağ alwajib iyyanda, wa innan: «*Agu y əşşəqqax-nak tara ta təgey i man-nak.*» ¹⁰ Awedan irān əşşəqqax-net wər ilkem a das-iga təkma waliyyat. Dağ adi tara, təssinda-du əşşərixa.

Agiwat təməddurt a dağ təhām ənnur fəlas tewaxlay n Əməli təhōz

¹¹ Dağ adi, alwaq ewad-du əmərədda wa daq-qawan iwar ad tənkeram dağ etəs, fəlas efsan ogar ihəz wa dana-d-əgan əmərədda i wa dana-d-əgan assaxa wa du-nəzzəgzan. ¹² Ehad iglâ, ezal ihoz-du. Mazzayatana dağ adi əd mazalan win şiiyyay. Əttəfatana təzoli ta n ənnur. ¹³ Şikəlatana dağ əzzəbun, zun as nəjiwankat ezal a mallan. Ad wər nəsasakay dağ tattay wala tessay n esmad. Ad wər nətaggu əzzəna əd mazalan zizallatnen aggadəm, nənəməggəg əd təmazaxən əd manzağ. ¹⁴ Kalar təqqəlet təbdəq-nawan alxal wa n Əməli Yaysa Əlməsix. Ad wər tayyim tarrayt waliyyat y arak deranan win aggadəm annadin dağ-wan.

14

Tara d ənəmənnak gər aytedan win ədrawnen əzəgzan

Ad wər təxakkamağ y aytedan win dər tədrawax əzəgzan

¹ Qabbalat aytedan win as irkam əzəgzan-nasan. A dər-san wər tətamazaxam dağ batu n idufan-nasan. ² Awedan iyyan iga iduf n əs təxalal-as tattay n arat kul. Iyyan as irkam əzəgzan-net wər das-xalal ār tettay n annabatan win fərgan. ³ Wa itattin amensay, ad wər alku wa tu-wər-nətəttu. Wa wər nətəttu amensay dəx ad wər issəwər lahan i wa t-itattin fəlas ənta da iqbâl-tu Məşşina. ⁴ Ma təmosax as təxakkama y əkli ən wiyyad? Gər ibdād wala uda, da məşşis a təqqal batu ten. Mişan wər z'udu, kalar ad ibdəd, fəlas Əməli ila fərregat n akabal-net.

⁵ Awedan iyyan iga iduf n as əzəl iyyan ogar ijilan win hadatnen, iyyan iga iduf n as ijilan kul olān ogdān. Awedan kul iwâr-tu ikus n aşşak dağ iduf wa iga. ⁶ Awedan wa izlayan ijilan, Əməli a fəl iga awen. Wa itattin amensay was ira dəx Əməli a fəl iga awen, fəlas iggoday i Məşşina amensay wa itattu. Wa issəban fəl man-net imensewan wiyyad dəx Əməli a fəl iga awen id ənta da iggoday i Məşşina. ⁷ Əssənət as wər danax-ihə i iddaran fəl əddəlil ən man-net wala dəx i itiba fəl əddəlil ən man-net, ⁸ fəlas as nəddâr, wədi Əməli a fəl nəddar, as danax-aba dəx Əməli a fəl danax-aba. Gər za nəddar wala dəx ab-ana, Əməli a danax-ilan. ⁹ Fəlas Əlməsix aba-tu, iqqal-du təməddurt fəl ad iqqəl Əməli ən win aba əd win əddarnen.

¹⁰ Amaran kay, mafel təxakkama y amadəray-nak madəx tolkeq-qu? Awak wərgex ketnana kundaba nəbdad dat adag n əşşərixa ən Məşşina? ¹¹ Fəlas ənnan

Elkəttaban: «*Inna Məşşina: "Nak əddâra, i d-ixlâkan kul kundaba issəjad dat-i, iləs dəx kul kundaba iga təmmalen i Məşşina."*»

¹² Emmək en dəx as akkiyyan dəx-na kundaba ibdad fəl mazalan-net [dat Məşşina].

Ədgəz dəx awa infan aytedan win dər tədrawax əzəgzan

¹³ Dəx adi mazzayatana d ad nəxakkam imidawan-nana. Kalar akkiyyan dəx-wan idgəzet dəx ad inkəd y arat a z'isənnəgərtəffətan əmidi-net madəx aggadl-ay dəx alxata. ¹⁴ Əssânaç, amaran əkkasax aşşak dəx esəm n Əməli Ƴaysa as wər t-illa arat xaraman. Mişan as iga awedan iduf n as xaram fall-as arat iyyan, wədi a fall-as ixram. ¹⁵ As imos as təxşâda iman n amadray-nak dəx batu n amensay, wədi kay wər təşşokala dəx tara. Ad wər-təhləka imədrayan-nak dəx əzəgzan dəx batu ən mensewan fəlas Əlməsix iman-net as t-aba fəl əddəlil-nasan. ¹⁶ Dəx adi ad wər itəwənnu ark arat s aratan win as təgam iduf n âs olâxan. ¹⁷ Fəlas Taymar ta n Məşşina wər təmos tettay wala tessay. Kalar taqqat a təmos d alxer əd təfalawist əs tarrayt n Infas wa Zəddigan. ¹⁸ Wa ixbadan Əlməsix s əmmək wədi, ad igrəz i Məşşina igrəw dəx ətəwəsəxmar çur aytedan.

¹⁹ Dəx adi gammayatana wəllen aratan win du-tawaynen alxer əd win dana-z-ilalnen s ad issuhət əzəgzan-nana ketnana. ²⁰ Ad wər təcəbbərəjjeç əşşəxəl ən Məşşina fəl batu ən mensewan. Tidət as amensay kul təxalal tattay-net, mişan təxaram tattay n amensay a du-za-tawəyat ad inəgərtəttəf awedan iyyan dəx əzəgzan-net. ²¹ Olâx ad ayyu awedan tettay ən şan, ayyu tessay n esmad n alxanab, ammazzay d arat kul wa z'arzin əzəgzan n amadray-net. ²² Iduf wa dəx təkkaşax aşşak dəx əwəl-nak, wədi ag-ay gar-ek əd Məşşina. Ibbilal wa ikkasan aşşak as wər t-obez əşşərixa s arat was iga iduf n âs ənta a oçadan! ²³ Mişan awedan wa igan aşşak dəx awa itattu, wədi ibâz-tu əşşərixa id awa itaggu wər inamannak d əzəgzan-net. Amaran arat kul wa wər nənammannak d əzəgzan-nak wədi abakkad.

15

Ədgəz dəx tədhəlt n aytedan win dər tədrawax əzəgzan

¹ Nakkanay as issohat əzəgzan-nanaç təwâr-ana zəmmerat i win as wər issohat əzəgzan-nasan, nayyu agamay n arat wa əran man-nana. ² Akkiyyan dəx-na iwar-tu ad igammaç d ad igrəz y aytedan win dər idraw əzəgzan dəx anamod n awa olaçan imos awen agamay n awa tan-z-işşitin. ³ Fəlas Əlməsix da wər igmay awa das-igrəzan, kalar ənnan Elkəttaban: «*Ərrəbdan win dak-tawagginen əqqalan fall-i.*» ⁴ Amaran aratan win ənnan Elkəttaban dât əzəl, kul tiwaktaban fəl ad nəgrəw attama wa itawayan əs tarrayt ən zəmmerat əd təsasmit ən wallan-nana şin danax-əhakkin Elkəttaban. ⁵ Əgmâya dəx Məşşina s ənta a du-təfal zəmmerat d allam fəl man a kawan-akfu təməddurt a dəx tənimardam gar-ewwan dəx təkâmam y almasal n Əlməsix Ƴaysa. ⁶ Emmək en dəx as za tagim təmmalen ən tanaya ən Məşşina di n Abba n Əməli-nana Ƴaysa Əlməsix, təgâm awen s ənəmənnak ən wallan d əməsli iyyanda.

Tinəməqbilat gar-ewwan zund əmmək âs Əlməsix osâ-du fəl əddəlil ən Kəl-Əlyəhud d aytedan win tan-wər-nəmos

⁷ Tinəməqbilat gar-ewwan zund əmmək as kawan-iqbal Əlməsix, tagim awen fəl saçmar ən tanaya ən Məşşina. ⁸ Illikan as Əlməsix iqqal amaşşaxal ən Kəl-Əlyəhud fəl ad isattaddu arkawalan win iga Məşşina y aljadan-nasan, assaknu s awen as Məşşina tidət a imos. ⁹ Osâ-du əntada fəl ad igrəw Məşşina təmmalen ən tanaya-net çur aytedan win wər nəmos Kəl-Əlyəhud fəl əddəlil ən təhanint-net, zun awa

ihan Elkəttaban, as ənnan: «Awen daɣ a fəl kay-z-əməla daɣ aytedan wər nəmos Kəl-İlyəhud, aɣaɣ ſigaytalen ən saɣmar-nak.» ¹⁰ Ənnan deɣ Elkəttaban: «Tawſeten ſin wər nəmos Kəl-İlyəhud, aɣimat təfalawist ta təga tamattay ən Məſſina.» ¹¹ Ənnân deɣ: «Aɣimat təmmalen y Əməli ketnakmat tawſeten ſin wər nəmos Kəl-İlyəhud, ſimattiwen kul əməlnatet-tu!» ¹² Ənnəbi İsayas da innâ: «Ahaya ən Yasay a d-asu, ibdəd ixkəm fəl tawſeten ſin wər nəmos Kəl-İlyəhud, amaran ketnasnat a daɣ-as aɣinat attama-nasnat.» ¹³ Əgmâya daɣ Məſſina s ənta a ɣur d-iffal attama ketnet a kawan-akfu təfalawist d alxer əkmâlneən əs tarrayt n əzəɣzan-nawan fəl ad təsənnəhəlam aɣaraw n attama əs tarna n İnfas wa Zəddigan.

Təsəxtəmt

Əſſəxəl wa iwaran Buləs əd ſikilan win as otas igi-nasan

Əſſəxəl wa iwaran Buləs daɣ batu n aytedan win wər nəmos Kəl-İlyəhud

¹⁴ Daɣ batu ta kawan-təqqalat kawanay, nak iman-in əkkasaɣ aſſak imədrayan-in, as təkñâm əlluɣ təkñâm aɣaraw ən masnat, təfrâgam ad tətınəməsəsəxrim ɣarəwwan. ¹⁵ Dər iga awen da ya, kud ira annaɣ əktabaɣ-awan-in əs taholat, fəl a kawan-d-asakta, əs tarrayt n arraxmat ta di-iga Məſſina, arat əs kala da təssanam daɣ-as. ¹⁶ Arraxmat ten təmos as di-iga amaſſaɣal n Əlməsix ɤaysa daɣ aytedan win wər nəmos Kəl-İlyəhud. Taggaɣ əſſəxəl zəddigan s amel wa taggaɣ Əlinjil ən Məſſina. Awen əgêq-qu fəl ad əqqəlan aytedan win wər nəmos Kəl İlyəhud takutay təgrâzat i Məſſina, təmosat arat a dər inihagga əs tarrayt n İnfas wa Zəddigan. ¹⁷ Daɣ adi əley s ad səbbərəga daɣ tassaɣ n Əlməsix ɤaysa daɣ batu n əſſəxəl wa əgeɣ i Məſſina. ¹⁸ Wər əhelax awal daɣ aratan ar win issənda Əlməsix əs tarrayt-in əmosnen as d-ewayax aytedan win wər nəmos Kəl-İlyəhud s əbərdəg i Məſſina. Arat wen iga s awal əd mazalan, ¹⁹ igâ deɣ əs tarna ən təlməxujuten əmosnen aɣalamaten, d aratan simaklalnən, əgânen əs tarrayt ən tarna n İnfas ən Məſſina. Əmmək en daɣ as a d-obazan ɣur Yerusalam harkid Əlurəya, akal wədi kul sinahalaɣ daɣ-as emel ən salan n Əlinjil n Əlməsix. ²⁰ Amaran əſſəxəl-in wa daɣ ədgaza wəllen imos emel n Əlinjil y aytedan win âs wər kala ad əslan y esəm n Əlməsix. Arat wen əgeq-qu fəl ad wər iqqəl əſſəxəl-in arat intân fəl əſſəxəl n iyyan awedan. ²¹ Əſſəxəl wen əgeq-qu s əmmək wa əmalan Elkəttaban as ənnan: «Win as wər ittəmal ad t-ənəyan, amaran win wər nəsla isalan-net a tan-aslin aɣrin-tan.»

İſikilan win otas Buləs

²² Arat wa daɣ a di-igaddalan fawda a kawan-in-asa. ²³ Miſan əmərədda əɣradaɣ əſſəxəl-in daɣ kallan win den. A ilan elan ad əkney tara n a kawan-in-azzayyara, ²⁴ amaran areɣ igi n adi assaxa wa din-z-asax Esbanəya. Fəlas əgeɣ attama n a kawan-ənəyaɣ as din-əmmaraɣ əddi, amaran əffilla fall-awan y a di-tilalam s iki n akal wen dəffər as ɣur-wan əgeɣ azzaman.

²⁵ Əmərədda ad akka Yerusalam y ad əſxələy i tamattay ən Məſſina ta təllat den. ²⁶ Fəlas Elkənīsaten ſin Masedonəya d Akayya əknânat tara n igi ən ſirgiten fəl ad ədhəlmat ſiləqqawen əhanen imizdagan win Yerusalam. ²⁷ Elkənīsaten ſin əknânat tara n awen, amaran iwâr-tanat igi-net, fəlas dad zamas əlməsixitan win əmosnen Kəl-İlyəhud ədhâlan win wər nəmos Kəl İlyəhud fəl aɣanna wa n əzəɣzan-nasan, wədi əlməsixitan win wər nəmos Kəl İlyəhud iwâr-tan əntanay da ad ədhəlan s ərrəzəxan-nasan win əmosnen Kəl İlyəhud. ²⁸ Daɣ adi as əɣradaɣ əſſəxəl wa, ſaſſawada ſirgiten ſin i məssawəsnat, ad akkaɣ Esbanəya əmməraq-qawan-in. ²⁹ Amaran əssânaɣ as albaraka ikmâlan n Əlməsix a imos asa wa kawan-in-z-aga.

Agamay ən Buləs ſiwatriwen ən məzzəɣzan s Əlməsix

³⁰ Ya imədrayan-in, əgmaya dağ-wan wəllen əs tarrayt n Əməli-nana Үaysa Elməsix əd tara ta ihakku Infas wa Zəddigan a di-tilalam dağ təbəllant ta əgey s a di-tətansayam Məşşina dağ təwatriwen-nawan. ³¹ Tattarat-in a di-ixlasan dağ aytedan win ugaynen s əbərdəg i Məşşina əhanen Yahudəyya, tətəram-i dey a fəl əqbalan mizdagan win Yerusalam şirgiten şin dasan-z-awəya. ³² As iga adi a kawan-in-asa əkney təfalawist, kud ira Məşşina adi, aga çur-wan azzaman ən təsanfawt. ³³ Əgmâya dağ Məşşina a ihakkin alxer a kawan-agəz ketnawan. Amin!

16

Assalaman d ənnəsixatan əd təwatriwen

¹ Əssiflasaq-qawan təmadrayt-nana Fəbay təmosat təmadhalt n Əlkənisat ta n Qankrəya ² fəl a tat-təqbəlam s esəm n Əməli, igâ awen s əmmək wa dər əhoran mizdagan. İlat-as dağ arat kul wa dağ təddərər tilalt-nawan fəlas ənta da təllil y aytedan aggotnen as nak iman-in aheq-qan.

³ Təhulam-in Friska d Akilas əmosnen imidawan-in dağ əşşəxəl y Elməsix Үaysa. ⁴ Əntanay a əganen iman-nasan dağ alçarar ən tamattant fəl a di-agəzan dağ win əranen tenayay-nin. Wərgəç nak ças a dasan-iggodayan awen. Kalar Əlkənisaten kul şin aytedan win wər nəmos Kəl-Əlyəhud, da əggodaynat-asan. ⁵ Təhulam-in dey Əlkənisat ta təhat açaywan-nasan.

Təhulam-in əməri-nin Efaynet s ənta a azzaran əzəgzan s Elməsix dağ akal n Asəya. ⁶ Təhulam-in Maryama təyyəwanat əşşəxəl aggen imosan tilalt y-awan. ⁷ Təhulam-in Andronikus əd Yunəya, əmosnen kəl tamet-in a dər nimaggaza kasaw, əmosan dey aytedan a fəl təga masnat dağ nəmmuzal amaran azzaran-i əzəgzan s Elməsix. ⁸ Təhulam-in dey Anfləyatus əkney tara fəl tərətəyt a nəga dağ əzəgzan s Elməsix. ⁹ Təhulam-in Urbanus imosan əmidi-nana dağ əşşəxəl y Elməsix, təhulam-in dey əməri-nin Əstayus. ¹⁰ Təhulam-in Abalus imosan awedan isitaddan əzəgzan-net s Elməsix. Təhulam-in dey kəl açaywan n Aristabul. ¹¹ Təhulam-in Herodəyon s ənta da iyyan dağ kəl tamet-in. Təhulam-in kəl açaywan ən Narsisos win əzzəgzannen s Elməsix.

¹² Təhulam-in Trifina əd Trifoza əgânen əşşəxəl aggen dağ tarrayt n Əməli. Təhulam-in təmərit-nana Fərsida təgât əntada əşşəxəl aggen dağ tarrayt n Əməli. ¹³ Təhulam-in Rufus imosan anafron ən Məşşina d anna-net as nak da təmos-i zun anna.

¹⁴ Təhulam-in Asinkrit əd Flegon əd Үermes, əd Fatrobas əd Үermas əd mədrayan-nana win çur-san əllanen. ¹⁵ Təhulam-in Filologos əd Yuləya, əd Neray əd tamadrayt-net, əntanay harkid Olinbas əd məzzəgzan kul win çur-san əllanen. ¹⁶ Tinəməggat assalam zəddigan. Əhulnat-kawan-in Əlkənisaten n Elməsix ketnasnat.

Ənnəsixa wa ilkaman

¹⁷ Ya imədrayan-in, əgmâya dağ-wan ad tənəkədam y aytedan win du-tawaynen iməzzəyan gar-ewwan əd təsənkaf sikarakadnen əmosnen əllid n əsəssəçri wa tətawaggam. Nəməggəgat d aytedan win di ¹⁸ fəlas wər əxbedan Əməli-nanay Elməsix, kalar wər gəmməyan ar a əgan dağ tədusen-nasan. Awan-nasan hossaynen əd şizada n iləs-nasan as takarrasan aytedan win wər nəla arak man. ¹⁹ Əbərdəg-nawan i Məşşina awedan kul issân dağ-as, adi a fəl as isifalawas-i awen dağ batu-nawan. Mişan areç ad tilem tayttay dağ batu ta təqqalat əmazal n awa olaçan, tizdagam dey dağ i tu-təlla talbast. ²⁰ Məşşina s ənta a d-iffal alxer kul, tarmad as z'addagdag Aşşaytan daw daran-nawan. Tidawet dər-wan arraxmat n Əməli-nana Үaysa.

²¹ İhul-kawan-in əmidi-nin dağ əşşəxəl a t-imosan Timotay ənta harkid Luçəyus əd Yason əd Sosifater əmosnen kəl tamet-in. ²² Nak iman-in Tertəyus a itawasaktaban

širawt ta, da əhulaq-qawan s esəm n Əməli. ²³ Ihul-kawan-in Gayəs s ənta a çur əssəgana nak d Əlkənisat ketnet. Ihul-kawan-in Erastus imosan aləs wa innəttafan d ərrəzəğan n əğrəm wa, ihul-kawan-in deç amadəray-nana Kartus. ²⁴ [Tidawet dərwən arraxmat n Əməli-nana Çaysa Əlməsix ketnawan! Amin!]

²⁵ Təmmalen i Məşşina s ənta a ilan tarna n ad isəssuhət əzəgzan-nawan day anamod inimannakan d Əlinjil-net wa əmala imos təlxutbat ta əge day batu ən Çaysa Əlməsix. Inimannak deç awen d əssir ən Məşşina wa danax-inafalalan. Əssir wen, ixbâr day azzaman win okaynen. ²⁶ Mişan əmərədda sannafalalan-tu Əlkəttaban win d-əzzəbbatnen fəl ənnəbitan. Məşşina di n Amaylol a omaran s ad inəfiləl awen i tawşeten n əddənət ketnasnat fəl a sər-əs əzzəgzənət abbardagnat-as. ²⁷ Məşşina ənta məşşis ən masnat kul! Tanaya kul šin-net. Attamalet har faw, əs tarrayt ən Çaysa Əlməsix! Amin!

Širawt ta tazzarat iktab Buləs i Kəl-Korent İsənti

Təhult

¹ Awa nak Buləs, iyrâ Məşşina dağ tara-net əs tişit n ənammazul ən Elməsix Үaysa. Nak d amadray-nana Sustinəs ² nəhul-in Elkənisat ən Məşşina ta təhat ayrəm ən Korent. Iyr-et y ad təqqəl tamattay-net zəddigat, təhât təla-net s əssəbab ən tassağ-nasan d Elməsix Үaysa; ənta d aytedan kul win hadatnen edag əhan, əxbâdan Əməli-nana Үaysa Elməsix, imosan Əməli-nasan, imos deḡ wa-nana. ³ Məşşina di n Abba-nana, d Əməli-nana Үaysa Elməsix təkfeq-qawan arraxmat d alxer.

Igodan

⁴ Faw tigudəyax i Məşşina di n Əməli-nin dağ talxa-nawan, tehakkay ta kawan-iga arraxmat-net s əssəbab ən tassağ-nawan d Elməsix Үaysa. ⁵ Fəlas tassağ-nawan dər-əs a sər-wan d-ewayan as kawan-isabbalal dağ arat kul, wəllen dağ awa təgannim kul d awa təssanam kul. ⁶ Isalan ən Үaysa win nəga əttiddan xur-wan wəllen. ⁷ Adi as wər tu-təlla təhəkkut ən Məşşina wər təgrewam, kawanay win waraxwaraxnen i tawaḡlay n Əməli-nana Үaysa Elməsix; ⁸ s ənta a z'isəssuhen əzəgzan-nawan har təzərəst, awəd-du fall-awan əzəl wa du-z-asu wər kawan-iwer lahan waliyyan. ⁹ Məşşina di kawan-d-iḡran y ad tərtəyam əd Barar-net Əməli-nana Үaysa Elməsix, wər d-itəqqəl dağ tənna-net.

İtəwətəytay n Elməsix d ənəmənnak n əlməsixitan

Iba n ənəmənnak dağ Elkənisat

¹⁰ Imədrayan-in, əgmâya dağ-wan fəl udəm n Əməli-nana Үaysa Elməsix ad tənəmənnəkam ketnawan dağ awa təgannim, taqqamim wər təqqelam təzunen. Kalar nəmənnəkət dağ awa təsamadranam d awa tənnəyem. ¹¹ Fəlas imədrayan-in, əgân dağ-i aytedan n aḡaywan ən Kələway isalan n as, təlla gar-ewwan tamazaq. ¹² Ənnəḡ adi fəlas wiyyad dağ-wan gannin: «Nakkanay Buləs as nəlcam», wiyyad gannin «Nakkanay Abbolos as nəlcam», wiyyad gannin «Nakkanay Butros as nəlcam», wiyyad gannin: «Nakkanay Elməsix as nəlcam». ¹³ Awak Elməsix təzunt a iga? A təḡilam nak Buləs, a itawaxan fəl təgəttawt fəl əddəlil ən bakkadan-nawan? Məḡ ak esəm wa-nin Buləs as tətawasalməḡam dağ aman?

¹⁴ Eḡḡodayax i Məşşina âs wər dağ-wan əssəlməḡax awedan waliyyan dağ aman, ar Krisbəs əd Gayəs. ¹⁵ Dağ adi wər t-illa awedan ifrâğan ad annu itiwasalməḡ dağ aman s esəm-in fəl ad iqqəl ənalkim-in. ¹⁶ Awalla, əkte-du as əssilməḡa dağ aman aytedan n ahan n İstefanos əntanay da. A wər nəmos aytedan win, wər kəttəway id əssilməḡa dağ aman awedan iyyan.

İtəwətəytay n Elməsix issikna tarna əd masnat šin Məşşina

¹⁷ Fəlas wər di-d-izammazal Elməsix fəl ad əssəlməḡax aytedan dağ aman, kalar izimazal-i-du fəl a dasan-əmələḡ isalan n Əlinjil, aḡax-asan deḡ emel wər nəga əs masnat n awal, fəl ad wər tabbannan tamattant n Elməsix fəl təgəttawt, təqqəl arat wər nəla almaḡna. ¹⁸ Tidət as, isalan ən tamattant ən Үaysa fəl təgəttawt, xur aytedan win əhanen tarrayt n əhluk, isalan wər nəla almaḡna a əmosan; mişan nakkanay win əhanen tarrayt n əlḡillas, nəssân as tarna ən Məşşina a əmosan. ¹⁹ Isalan n awen da a dağ ənnan Elkəttaban: «Ad səbbənnana masnat ən musanan, səbbənnana deḡ tayttay ən malan ən tayttay.» ²⁰ Dağ adi ma din-igan dağ musanan? Ma din-igan za dağ musanan n Əttawret? Imusanan n awal n azzaman win den,

əntanay ma daχ-san in-igan? Wərgex Məššina issəkna as, masnat ta əlan aytedan n əddənet ta, əmməskəl a təmos?

²¹ Fəlas Məššina a igan əs masnat-net as aytedan wər əfregan a t-əssənan əs masnat ta-nasan iman-nasan, adi a fəl igrāz i Məššina ad iχləs aytedan win sər-əs əzzəgzannen əs tarrayt ən salan n Əlinjil əmosnen əmməskəl s aytedan win sər-əs wər nəzzəgzan. ²² Kəl-Əlyəhud za əntanay gammayan a dasan-ətəwəgginat təlməxjujaten əmosnen aχalamaten, Kəl-Əlyunan amaran gammayan masnat. ²³ Adi a fəlas nakkanay emel wa nətaggu tamattant n Əlməsix fəl təgəttawt, təsənkəft a imos i Kəl-Əlyəhud a dasan-təgdâlat əzəgzan, aytedan amaran win wər nəmos Kəl-Əlyəhud əntanay imos χur-san əmməskəl. ²⁴ Mišan χur aytedan win iχra Məššina, gər za Kəl-Əlyəhud wala deχ Kəl-Əlyunan, Əlməsix tarna əd masnat ən Məššina a imos. ²⁵ Fəlas igi ən Məššina wədi imosan s aytedan əddi əmmiskəl, wər tu-tewed masnat n aggadəm. Igi-net deχ wədi imosan s aytedan iba ən təla ən tanaya, wər tu-təlla tarna n aggadəm wər oger.

²⁶ Ya imədrayan-in, aktiwat-du awa təmosam as kawan-d-iχra Məššina. Wər daχ-wan əggətan aytedan as itiwagga iduf n as əmosan imusanan, wala wiyyad əlanen fərregat, wala wiyyad əmosnen kəl əket. ²⁷ Kalar Məššina isannafran aratan win wər nəla almayna χur aytedan n əddənet ta fəl ad izzəbəz imusanan təkarakit. Isannafran deχ win wər nəla farregat daχ əddənet ta fəl ad izzəbəz təkarakit aytedan win əlanen farregat. ²⁸ Awa itawalkan daχ əddənet ta, d awa itawakyadan, əd wa wər nətəwagga wala a isannafran Məššina y a sər-san assabu tamayyamayt ən win əmosnen arat χur aytedan. ²⁹ Arat wen kul, ig-ay Məššina fəl ad dat-əs wər idkəl awedan waliyyan iman-net. ³⁰ Kawanay amaran Məššina a kawan-osayən əd Yaysa Əlməsix, s ənta a danay-iqqalan masnat a du-təfâlat Məššina – almayna ikf-ana sər-əs taqqat, əd tazdak, əd tədarfit. ³¹ Adi a fəl ənnan Əlkəttaban: «Awedan wa iran adkul ən man-net, idkəlet-tan fəl aššaddat n awa iga Məššina.»

2

¹ Nak iman-nin, imədrayan-in, as kawan-in-oseχ y a dawən-əməla tidət ta du-təfalat Məššina təmosat əssir, wər kawan-əssəkna masnat n awal wala igət ən masnat. ² Fəlas əgeχ tanat n as, iket əheq-qawan, wər dawən-z-agay isalan wər nəmos win Yaysa Əlməsix, d ətəwənyə wa itawagga fəl təgəttawt.

Masnat ta n Məššina isannafalal-tat Infas wa Zəddigan

³ Nak azzaman win χur-wan əge, əgeq-qan d iba n assahat əd tasa di-təssindawat taysəst labasat. ⁴ Amaran isəssəχritan-in əd təlxutbaten-in wər əgen əs masnat n awal wala təla ən tayttay, kalar isəssəχritan a əmosan as issikna Infas wa Zəddigan əs tarna-net as tidət a əmosan, ⁵ fəl ad iqqəl əzəgzan-nawan arat a sər-wan du-teway tarna ən Məššina wərgex masnat n aggadəm. ⁶ Dər iga awen da ya, tidət as, təll-ay masnat nəsasayru aytedan win saggatakkannen daχ əzəgzan; mišan masnat ten, wər tat-təla əddənet ta, za wər tat-əlen muzaran-net as ilkâm ad iba tamayyamayt-nasan.

⁷ Kalar masnat ta du-təfalat Məššina a nəsasayru, təmosat əssir irəwan iχbâr y aytedan. Masnat ta, harwa dat əxluk n əddənet ad otas Məššina a dana-sər-əs-akfu adkul. ⁸ Wər t-illa daχ muzaran n əddənet ta da, i igrâwan əgərri ən ta da masnat; fəlas ənnar tat-əgrân, wər z'attaytayan Əməli ən tanaya. ⁹ Dər iga awen da ya ənnan Əlkəttaban: «Awa issənsa Məššina i win t-əranen, wər kala tu-tənyə šat, wər kala tu-təsla təməzzuk, wər kala deχ ad t-isammadrən awedan.» ¹⁰ Nakkanay amaran isannafalal-anaq-qu Məššina əs tarrayt n Infas wa Zəddigan; fəlas Infas wa Zəddigan wər t-illa a daχ wər issen, wala χas aratan win as otas Məššina igi-nasan da issân daχ-san. ¹¹ Id wər t-illa awedan issânan awa ihan iman n iyyan awedan,

ar iman n awedan wədi da ɣas. Əmmək di daɣ as, wər t-illa awedan issânan awa otas Məşşina. Infas-net di Zəddigan ɣas a t-issanan. ¹² Amaran nakkanay, wərgex infas şilat ən wa n əddənet a nəgraw, kalar infas wa d-ifalan Məşşina a nəgraw, fəl ad nagru arraxmaten şin fall-ana d-izazzabbat Məşşina. ¹³ Adi a fəlas, aratan win nəsassayru, wər tan-nəsəsəyru əs masnat ta n aggadəm, kalar masnat ta danaɣ-ihakku Infas wa Zəddigan as tan-nəsasayru. Nəsasayru tidət ta du-təfalat Məşşina y aytedan win iha Infas di Zəddigan ən Məşşina. ¹⁴ Mişan awedan wa wər nəlkem ar i masnat ta n aggadəm, wədi wər ifreg ad iqbəl arat wa d-ifalan Infas di Zəddigan ən Məşşina, id ɣur-əs əmməskəl a imos awen, wər ifreg ad t-agru fəlas Infas di Zəddigan ən Məşşina a ihakkan əgərri-nnet. ¹⁵ Awedan wa iha Infas wa Zəddigan, wər t-illa arat a d-ifalan Məşşina as wər ifreg əgərri-nnet, amaran ənta iman-net, wər t-illa awedan wər iha Infas wa Zəddigan ifrâgan a sər-əs annu arat. ¹⁶ Adi a fəl ənnan Əlkəttaban: «*Ma issanan daɣ awa otas Əməli Məşşina, wala ifrâg a das-agu ənnəsixa?*» Nakkanay za a igrawan Infas di Zəddigan ən Məşşina nəssân daɣ awa otas Əlməsix.

3

Buləs d Abbolos, imaşşayalan ən Məşşina

¹ Nak amaran, imədrayan-in, harwa ɣur-wan əlle, wər dawan-təggax awal wa tagga y aytedan win iha Infas wa Zəddigan. Kalar əgeɣ-awan awal zun wa itaggu awedan y aytedan win wər nəlkem ar i tara ən man-nasan, zun əşşewala y aytedan as səket əlkaman y Əlməsix. ² Zun as ax a kawan-əşşəşwa, wər kawan-əssətşa imensewan win əqquurnen, fəlas harwa da wər dasan-təfregam. Wala əmərədda da, wər dasan-təfregam, ³ id harwa da wər t-illa a kawan-izlâyan d aytedan win wər nəlkem ar i tara ən man-nasan. Şismiten şin tətəggim fəl midawan-nawan əd təmazaq ta təmmalat gar-ewwan wərgex sitaddanat as harwa da kəl əddənet a tətəlalam, təlkâmam i tarrayt-nasan? ⁴ As inna iyyan daɣ-wan: «Nak Buləs as əlkama», inna iyyan: «Nak Abbolos as əlkama», wədi wərgex alxal n aytedan n əddənet ta da a təgam?

⁵ Abbolos a da, ənta wala Buləs, awak ma əmosan? Wər nəmos ar imaşşayalan ən Məşşina, win sər-wan d-ewaynen əzəgzan sər-əs, nak harkid ənta, wər nəga ar əşşəxəl wa danaɣ-ikfa Əməli. ⁶ Nak awa əmmozaala, iha şaşşelan n amasa as nak a t-inbalan, təzzar işşəşw-ay Abbolos, mişan Məşşina ənta a t-id-issədwalan. ⁷ Daɣ adi, wərgex awedan wa inbalan amasa wala wa t-işşəşwin a imosan arat; kalar Məşşina a t-id-issədwalan a t-imosan. ⁸ Awedan wa inbalan amasa əd wa t-işşəşwin arat iyyanda a əmosan, akkiyyan daɣ-san ad t-akfu Məşşina alxaq n əşşəxəl-net. ⁹ Nak d Abbolos nədrâw əşşəxəl wa danaɣ-ikfa Məşşina, amaran kwanay a mosnen şilat ən tawagost-net, təmosam deɣ əkərrus-net.

¹⁰ Nak, əgeɣ s arraxmat ta di-ikfa Məşşina, əşşəxəl zun wa itaggu əmakras ən nan issânan əşşəxəl-net, əssəxta təsəkbəlt ta təmosat şixurad ən taɣazamt, dəffər adi osa-du awedan iyyan a fall-as ikarras; mişan akk awedan inkədet d əmmək was işatu əkərrus ən taɣazamt tədi. ¹¹ Wər t-illa awedan ifrâgan əsəxti n iyyat təsəkbəlt wər nəmos ta təxtat kala da, ad tat-imosan Ƴaysa Əlməsix. ¹² Wiyyad aytedan əkarrasan fəl təsəkbəlt ən taɣazamt ta, s urəɣ, wiyyad s azrəf, wiyyad əs təhun əknânen şihussay, wiyyad s eşkan, wiyyad s ələmmuz, wiyyad s agabal. ¹³ Akk awedan ilkâm ad itəwənəy əşşəxəl-net, id ad itəwəsəknu əzəl wa ilkaman, itəwəjərrəb əs təmsay, fəlas təmsay ta ənta a za təsənnəfiləlat əzzənəf n əşşəxəl wa iga akk awedan. ¹⁴ Kud təməkrust ta fall-as iga awedan wər tat-tətşa təmsay, awedan wədi ad igrəw alxaq-net. ¹⁵ Mişan as imos as tətş-et təmsay, awedan wədi ad affatu. Dər iga awen da ya, ənta iman-net ad iɣləs, mişan ad alu əlyillas-net d in awedan ad d-ittirkaban

dağ təmsay. ¹⁶ Awak masnat a wər tægema as, kawanay iman-nawan a imosan ehan ən Məşşina, iha deş Infas wa Zəddigan iwallan-nawan? ¹⁷ Amaran awedan kul wa ihallakan ehan ən Məşşina, a t-ihlək Məşşina; fəlas ehan ən Məşşina i zəddigan, amaran kawanay a t-imosan.

¹⁸ Ad wər issudəf awedan waliyyan iman-net alxata. Wa dağ-wan iylan ila masnat ta fəl təgla əddənət, wədi aget iman-net əmeskel, ad t-akfu Məşşina masnat ta n tidət. ¹⁹ Fəlas masnat ta n əddənət ta, əmməskəl a təmos şur Məşşina, id a ənnan Əlkəttaban: «*Imusanan n əddənət ta, şimərkas şin-nasan as tan-ibaz Məşşina.*» ²⁰ Ənnân deş: «*İssân Əməli âs, imedranan ən musanan n əddənət ta, wər əzlayan əd bannan.*» ²¹ Dağ adi, ad wər təkalam iman-nawan fəlas təkamam y awedan, fəlas arat kul i-nawan, ²² gər za nak Buləs wala Abbolos, wala Butros, wala əddənət, wala təməddurt əd tamattant, gər za aratan win əmərədda wala win əlkamnen, awa ketnet i-nawan. ²³ Kawanay iman-nawan, Əlməsix a kawan-ilan; Əlməsix amaran, Məşşina a t-ilan.

4

¹ Dağ adi, nak d Abbolos a dana-wər-itəwəggu iduf wər nəmos ar wa n məşşaxalan n Əlməsix, d almawakkilan-net as imos əşşəxəl-nasan emel y aytedan igitan ən Məşşina win dasan-əhanen ətənkul. ² Amaran ma itawaran dağ awedan imosan almawakkil, ar ad imos awedan n alxadil. ³ Nak əs man-in, wər əzlaya dağ iduf wa dağ-i təgam wala wa dağ-i əgan aytedan wiyyad. Nak əs man-in, wər əgeş iduf waliyyan dağ man-in. ⁴ Wər di-təha tərək n ark əmazal waliyyan, mişan wərgex adi a di-z-ikkəsən. Əməli, ənta a di-z-işrəşan. ⁵ Dağ adi ad wər təssəwəram awedan waliyyan lahan dat tawaxlay n Əməli s ənta a z'assaknin ezal a mallan arat kul wa itawaggan dağ əssir, isəffəggu awa ihan iwallan n aytedan. Alwaq wədi, awedan kul ad igrəw şur Məşşina təmmal ta dər ihor.

⁶ Amaran imədrayan-in, ədkâlaş-awan-du isalan-in nak d Abbolos fəl ad iqqəl awen almasal a kawan-z-isassagrin batu ta tənnat: «Ad wər takəyam awa ənnan Əlkəttaban». Əgeş adi ənta da fəl a kawan-wər-iggəz awedan waliyyan isifaxaran s awedan iyyan alku wa hadan. ⁷ Kay wa itaggan ibaragan, ma kay-izlayan d iyyan awedan? Ma tələş, as wərgex Məşşina a dak-k-ikfan? Dad zamas awa tələş kul ətəwəkfa a kay-itawagga bannan, ma əmosan baragan win tətəgga?

⁸ Kawanay əmərədda təlâm arat kul wa taram, har as təgərgəsam! Təqqalam fadda imənokalan ənta nakkanay wər tan nəmos! Nəsidaran a tan-təqqəlam əs tidət, fəl a dər-wan nədrəw taşmar nakkanay da. ⁹ Mişan əs tannaş sər-i nakkanay inəmmuzal, ig-ana Məşşina dağ ələqqam n aytedan, nola d aytedan issiwar əşşərişax tamattant, nətawagga ares n awnaf y əddənət ketnet, gər za aytedan wala angalosan. ¹⁰ Nakkanay za nəqqal s aytedan imeskelan fəl əddəlil n əşşəxəl wa nətagg y Əlməsix, kawanay amaran təqqalam imalan ən tayttay fəl əddəlil ən tassaş-nawan dər-əs. Nakkanay nərkam, kawanay amaran təssohem. Nətiwakyad, mişan kawanay tətawasaxmaram.

¹¹ Nakkanay wala şas əmərədda da ih-âna laz, nəffûd, nəzlâm, nətatawat, wər nəla id nəxsar; ¹² izayazzab-ana əşşəxəl ən fassan-nana. Nətattar a igan arraxmat y aytedan win dana-tagginen ark awalan, nəzmâr i win dana-sakninən arkanay. ¹³ Aytedan win şaşşadnen ismawan-nana, nəgammay dağ-san əs man mallolnen ad ammazzayan d adi. Har harwa da əgân-anax aytedan şilat ən ferədan n əddənət əd səfraş-net.

¹⁴ Wər dawan-in-əktebaş aratan win fəl a kawan-əzzəbəza təkarakit, kalar əktabaş-awan-tan-in fəl a dawan-aga ənnəşixa, wa z'aga i bararan-in əkne tara. ¹⁵ Amaran kud təlâm maraw gim n əlfəşşiqi a kawan-sasaxren tarrayt n Əlməsix,

da wər təlem ar abba iyyanda, fəlas əzəl wa dawan-əgey isalan ən Үaysa Ёlməsix, təkamam-as, ənta ad əqqala şilat n abba-nawan. ¹⁶ Adi a fəl ədgaza gammaya dağwan a di-tattalalam.

Ёzzəna day Ёlkənisat

Ёdərrəg y əzzəna

Ark aratan wər nəmməkkən win ətawagginen day Ёlkənisat

¹⁷ Ёddəlil n adi da a fəl sər-wan in-zammazala Timotay ən ruray əknəy tara, issiflasan wəllen day ləkkum-net y Ёməli. Ёssokay-awan-t-in fəl a kawan-d-assaktu əzzənəf ən ləkkum wa əgey y Ёlməsix, s ənta a sassayra day əlkənisaten kul day adag kul.

¹⁸ Wiyyad dağwan taggin ibaragan, fəlas əxilan wər kawan-in-zələsay assa. ¹⁹ Mişan əs turagat n Ёməli, a kawan-in-asa day alwaq wər nəggug. Alwaq wədi, aytedan win tagginen ibaragan əddi, ad ənəyay awa əfragan, wərgəy awa gannin yas. ²⁰ Fəlas Tağmar ta n Məşşina, imazalan win taggin aytedan əs tarna-net a day tətawanay wərgəy awa əgannin əs mawan-nasan. ²¹ Awak məni day aratan win wa təssofam? A kawan-in-asa ewāyay ələkkud, mey a kawan-in-asay əd tara əd man lammodnen?

5

¹ Aytedan kul gannin ih-iwan awedan itaggin əzzəna, igân təllabəst ta day əs wala aytedan win wər nəssen Məşşina da wər tu-təggin; imosan as ih-iwan aləş itinəmənsin əd təntut n abba-net!

² Eges harwa da tətəggim ibaragan, edag n a kawan-assakmu adi iman, təzəmməzzəyam iman-nawan d awedan wa itamazalan adi. ³ Kud nak wər yur-wan əlley s azzat-in, da iman-in əllân yur-wan. Amaran awedan wa igan əmazal labasan wədi, obāzaq-qu s əşşərixa şilat n as əlley yur-wan. ⁴ As təmmənayam gar-ewwan fəl əddəlil n Ёməli-nana Үaysa, əggəzaq-qawan-in əs man-in wərgəy s azzat-in, a fall-awan d-izəzzəbbət Ёməli-nana Үaysa tarna-net; ⁵ tayyim awedan wədi y Aşşaytan ad təhlək təxəssa-net, fəl ad igrəw efsan əzəl wa n tabadday.

Ёşşərixa gər əlməsixitan

⁶ Wər təlem əddəlil waliyyan fadda s igi ən baragan. Awak wər təssenam as, «arat ən xamira a isakafan təbəluləq n agel irwayan ketnet?» ⁷ Ёkkəsət day man-nawan xamira wa waşşaran a t-imosan abakkad, tizdagam fəl ad təqqəlam şilat ən təbəluləq n agel irwayan wər iha xamira, s ənta a təmosam kala da, fəlas Ёlməsix, imos təfaskay-nana ta n amud wa n Akkay, immut day adag-nana. ⁸ Day adi nəssəxməret amud wa n Akkay, wərgəy əs xamira wa waşşaran, a t-imosan iwallan iha əşşur əd talbast; kalar nəssəxməret-tu əs təgəlla ta wər iha xamira, a tat-imosan iwallan zaddognen, təha tidət.

⁹ Day şirawt-in ta dat ta, əktâbağ-awan-in as, ad tu-wər-təməl tassağ waliyyat gar-ewwan d aytedan win tagginen əzzəna. ¹⁰ Mişan ya wər əssoka s adi iba ən tassağ d aytedan win wər nəşşokal day əddənət ta ar day igi n əzzəna, madəy win as əffofen wallan-nasan, madəy win narkaban əd win əğbadnen əssənəman, fəlas aytedan win di, wər za taqqamim wər dər-san toseyam, ar s ad təgmâdam əddənət ketnet da. ¹¹ Kala kalar a dawan-ganna, ad wər tasəyam d awedan wədi igannin imos amadray-nawan day əddin, ənta wər işşokal ar day igi n əzzəna, iffofat əwəl-net, iğbâd əssənəman, ilâ ark iləs, imos əməşwi n esmad, imos anarkab. Awedan şilat ən wa, wala yas tettay da a dər-əs tat-wər-tədrəwam.

¹²⁻¹³ Fəlas wərgəy nak a iwar ad əbəza s əşşərixa aytedan win wər nəzzəgzən s Ёlməsix, Məşşina a tan-z-ibəzan s əşşərixa, mişan aytedan win Ёlkənisat-nawan,

kawanay a iwar a tan-tabəzəm s əššərixa, fəlas ənnan Əlkəttaban: «*Əkkəsət xur man-nawan inəllubas.*»

6

¹ As illam arət gər iyyan daɣ-wan d əmədi-net, ma kawan-issəhalan ad tətakkim aytedan wər nəzzəgzan əs Məššina y a dawan-əššrəxan, təɣləyam tamattay zəddigat ən Məššina? ² Awak masnat a wər təgem as, tamattay tədi ənta a za təšrəxət y əddənet? Daɣ adi, dad imos as kawanay di da a z'əšrəxnen y əddənet, manəmmək as wər təfregam əššərixa ən taɣawšiwən madrornen? ³ Awak masnat a wər təgem as, wala angalosan, nakkanay a dasan-z-išrəxan, əngəm-in za šixawšiwən n əddənet ta! ⁴ Daɣ adi, as t-imal əɣsəd gar-ewwan daɣ taɣawšay iyyat, manəmmək as tətayyim aytedan wər nəmos wala xur Əlkənisat šarrayan-awan? ⁵ Imos fall-awan təkarakit ad imos as, wər kawan-ihə awedan waliyyan ilən masnat a tu-təssifragat ad izəmməzzəy əššərixa i mədrayan-net daɣ əddin. ⁶ Awak ma kawan-igrəwan as təšarrayam gar-ewwan har təqqimam əššərrayan-awan aytedan wər nəzzəgzan s Əlməsix.

⁷ Wala ənəməšray wa tətəggim gar-ewwan da əgadal zəwwəran a dawan-imos. Mafel wər təzəzzaydaram d ibə ən tidət wa dawan-itəwəggan, mədey təzəzzəydəram d əmixi wa tətəwəggim? ⁸ Edag n ad tagim adi, kala kalar kawanay iman-nawan a itamazalan s ibə ən tidət, tətəxam aytedan win hadatnen, əs fadda imədrayan-nawan a əmosan daɣ əddin.

Inasbakkadan əd Taymar ta n Məššina

⁹ Awak masnat a wər təgem as inəllubas wər z'əgrəwan adagar daɣ Taymar ta n Məššina? Əqqəlat-du daɣ əxruk wa təgam, təssənəm as iməggan n əzzəna, d aytedan win əɣbadnen əssənəman, əd win tagginen i tədoden-nasan šidoden, əd meddan win tagginen iman-nasan šidoden əd win tagginen imidawan-nasan šidoden, ¹⁰ əd baydagan, əd win as əffofen wallan-nasan, əd mašwan n esmad, əd mawayan ən tənəwan, əd narkaban, aytedan win kul wər əlen adagar daɣ Taymar ta n Məššina. ¹¹ Wiyyad daɣ-wan kala ad əhan samal n aytedan win di, mišan əmərədda tətəwəšaradam daɣ awen, tətəwəzəzadagam, təqqalam aytedan təsisəyad tarrayt n Əməli Ƴaysa Əlməsix d Infəs wa Zəddigan n Əməli-nana Məššina!

Batu ta təqqalat iki ən təkərwaten

¹² Təgənnim: «Arat kul xalal-ana», tidət mišan wərgəx arat kul təh-ay tənfa. Tidət as «arat kul xalal-ana», mišan nak wər z'əyyax arat waliyyan ittəf daɣ-i tanat. ¹³ Təgənnim dəx «Isudar, tadist a fəl d-əxlakan, amaran tadist, isudar a fəl du-təxlak.» Dər iga awen da za, tadist harkid mensewan ilkəm ad asabu Məššina taməyyamayt-nasan. Tayəssa n awedan ənta wər du-təxlək fəl ad tagu əzzəna. Kalar təxlək-du fəl ad tagu tara n Əməli, s ənta a tat-ilan. ¹⁴ Amaran Məššina a d-issənkarən Əməli Ƴaysa daɣ tamattant a dana-daɣ-as-d-issənəkər nakkanay da, əs tarna-net.

¹⁵ Wər təssenəm as, šixəswen-nawan, šisəllad n Əlməsix a mosnat? Daɣ adi manəmmək as z'əsərtəya šisəllad n Əlməsix əd təxəssa ən təkərwat? Kala Kala! Wər ilkəm ad iga adi! ¹⁶ Məx masnat a wər təgem as awedan wa issərtəyan iman-net əd təkərwat, wədi iqqal dər-əs tayəssa iyyadda? Awak wərgəx ənnan Əlkəttaban: «*Aləs əd təntut-net ad əqqəlan tayəssa iyyadda*»? ¹⁷ Awedan amaran wa irtəyan d Əməli, wədi Infəs wa Zəddigan n Əməli a t-ihan. ¹⁸ Dərragət y iga n əzzəna. Ibakkadan kul win tamazalan aytedan wər ədrewan arat əd təxəswen-nasan; mišan awedan wa igan əzzəna, wədi iga abakkad imməran tayəssa-net təmosat təslət n Əlməsix. ¹⁹ Awak masnat a wər təgem as šixəswen-nawan ehan n Infəs wa Zəddigan a əmosnat, a kawan-ihən, ikf-əwan-tu Məššina? Wərgə kawanay a ilan iman-nawan.

²⁰ Fəlas izinz-iwan-du Məşşina s əlqimat zəwwərat. Dağ adi, səxmərat Məşşina əs təxəswen-nawan.

7

Batu ta təqqalat azalaf

Batu təqqâlat aytedan win əzläfnen

¹ Amaran dağ batu ta təqqalat isəstanan win di-du-təgam dağ şirawt ta di-du-təktabam, tənnam: «Ofa y aləs ad aqqam wər inamansa əd tantut kuddeğ ta izlaf.»

² Dər iga awen da za, fəl ədərrəğ y igi n əzzəna, əkkulluk n aləs ofa ad ila tantut, əkkulluk ən təntut değ təla aləs. ³ Aget aləs i tağurəs arat was iwwəjjab a das-t-agu, təntut değ taget y aləs-net awen da. ⁴ Tantut wərgəğ ənta a təttafat tanat dağ təxəssa-net, aləs-net a ittafan tanat-net. Aləs ənta da, wərgəğ ənta a ittafan tanat dağ təxəssa-net; tantut-net a tat-ittafan. ⁵ Dağ adi ad wər tənəməgdəlam iman-nawan ar s ad tənimardam s adi dağ temert təkātam i təwatriwen. As təğrad, təqqələm təməwit ta təwwəjjabat fəl aləs əd təntut-net, fəl təkədə n ad ib'as tənnodam dağ man-nawan, igrəw sər-wan Aşşaytan tarrayt s a kawan-ajjarab. ⁶ Arat wa ənnəğ əddi, turagat n igi-net a kawan-əkfeğ, wərgəğ ammar a kawan-sər-əs-əgeğ. ⁷ Nak əsidarana a dər-i olân aytedan kul, əfrəgan ad aqqamin wər əzlefan; mişan ya akkiyyan dağ-na əd təhəkkut ta das-iga Məşşina. Wiyyad dağ-na wər əfregan ad wər əzlefan, wiyyad əgrāwan təhəkkut təmosat fərregat y amayras.

⁸ Amaran meddan win as aba şidoden-nasan, əd tədoden şin as aba meddan-nasnat, ofa ad agin awa əgeğ, aqqamin da wər əzlefan. ⁹ Mişan as imos as wər əfregan adi, wədi əzləfanet; fəlas ofa y awedan ad izləf, aqqam da wər isabbalaglag deran əwəl-net.

¹⁰ Aytedan amaran win əzlafnen, omâraq-qan s as: tantut ad wər tammazzay d aləs-net. Əməli a innan adi, wərgə nak. ¹¹ Mişan as imos as təmməzzay dər-əs, wədi taqqamet wər təzlef, madeğ taknu d aləs-net təqqəl-tu; aləs ənta da ad wər izəmməzzəy tağurəs.

¹² Aytedan amaran win hadatnen, ənnəğ-asan: Amadray dağ əddin was wər təzzəgzan tantut-net əs Yaysa, eges tərda s a tat-ittâf, wədi a tat-wər-izəmməzzəy. Batu tēdi, nak a tat-igan, wərgə Əməli. ¹³ Tantut değ ta n tamadrayt dağ əddin, tas wər izzəgzan aləs-net əs Yaysa, eges igla irâ a çur-əs təlla, tēdi a tu-wər-təfəl. ¹⁴ Fəlas aləs wədi wər nəzzəgzan əddi, zəddîğ id tantut-net a təmosat iyyat dağ mədrayan dağ zəgzan əs Yaysa. Tantut değ tēdi wər nəzzəgzan əs Yaysa əddi, təzəddîğ id aləs-net a imosan iyyan dağ mədrayan dağ zəgzan əs Yaysa. Adi a izzəzdagan bararan-nasan, mişan ənnar wər iga adi, bararan-nasan ehan ən taxxaramt a daq-qan əlân. ¹⁵ Dər iga awen dağ, wa dağ-san wər nəzzəgzan, gər za aləs wala tantut, as ira əməzzəy ən wa hadan, ammazzayət dər-əs. Amadray dağ əzəgzan wədi, madeğ tamadrayt tēdi, wər t-idu-z-iqqəl əşşəriğa n adi, fəlas Məşşina, təməddurt iha alxer as ira a tat-təgâm. ¹⁶ Ma issanan, mijas kam ta n təməzzəgzənt əs Yaysa a du-z-awəyan s aləs-nam ad igrəw efsan? Kay da, aləs wa n əməzzəgzən əs Yaysa, ma issanan mijas kay a du-z-awəyan əs təntut-nak ad təgrəw efsan? ¹⁷ Amaran aytedan win wər nəmos win-di akkiyyan aglet dağ alxalat ta daq-qu iga Əməli Yaysa təmos təhəkkut-net, s ənta a iha as t-iğra Məşşina. Ammar wədi a taggağ əlkənisen kul.

Awedan kul aqqamiwet dağ alxalat ta iha

¹⁸ Kud awedan imminkad as t-id-iğra Məşşina, wədi a das-wər-iqqəl adi asakor. Kud değ awedan wər immənkad as t-id-iğra Məşşina, ad wər igməy d ad itəwəsəmmənkəd. ¹⁹ Əmənəkəd wala iba-net wərgəğ ənta a imosan arat, amazal s

ammaran ən Məşşina a t-imosan. ²⁰ Akk awedan aglet daɣ alxalat ta iha as t-id-iɣra Məşşina.

²¹ Kud as kay-d-iɣra Məşşina akli a təmosaɣ, a kay-wər-işşəwəş adi; mişan as təgrawa tarrayt əs tədarfit, a sər-əs wər tugəya, kalar darfat. ²² Fəlas awedan wa imosan akli as t-id-iɣra Məşşina y a tu-təməl tassaɣ gar-es d Əməli, wədi ad iqqəl adaraf n Əməli. Əmmək di daɣ əs awedan wa wər nəmos akli, ənta da as t-id-iɣra Məşşina, ad iqqal akli n Əlməsix. ²³ Əməli a irzəman fall-awan, isəddərfat-kawan; daɣ adi ad wər tayyim aytedan agin-kawan eklan. ²⁴ Imədrayan-in, akkiyyan daɣ-wan aglet iga attama-net daɣ Məşşina, aqqam ənta da daɣ alxalat ta iha as t-id-iɣra Məşşina.

Batu təqqalat aytedan win wər nəzlef

²⁵ Amaran daɣ batu ta təqqalat aytedan win wər ides azalaf, wər di-ikfa Məşşina ammar waliyyan y-asan; mişan a dawan-agay ənnəsixa, ənnəsixa di da ig-âwan-tu aləs igrâwan daɣ əhənəttə n Əməli tişit n awedan issiflasan.

²⁶ Azzaman n alɣazab a fall-anay əganen, daɣ adi illa ɣur-i as, ofa y akk awedan kul ad aglu daɣ alxalat ta iha. ²⁷ Kud kay təsimarkasa əd tantut, ad wər təgməya d a dər-əs tammazzaya. Kud wər təzlefa, a dər-əs wər təgməya. ²⁸ Dər iga awen da ya, as təzlafa, wərge abakkad a təgeɣ; tantut deɣ ta wər ides azalaf, as təzlaf, wərgeɣ abakkad a təga; mişan ya aytedan win əzlafnen daɣ azzaman win, ad ənəyan təssust labasat s ənta as areɣ a tan-agəza daɣ-as.

²⁹ Awa fəl dawan-gannay adi, imədrayan-in, as, təsəlkaht n alwaq a nəha da. Daɣ adi a ibazan ɣur əmərədda, wala aytedan win əzlafnen, aginet as şilat n as wər əzlefan, ³⁰ win hallinen şilat n as wər həllin, win falawasnen şilat n as wər falawasan, win du-zanzinen deɣ əttəfanet as arat wa d-əzənzən wər t-əlen, ³¹ amaran aytedan win sattaɣmalnen aratan n əddənət ta, a daɣ-san wər zəzzəwen, fəlas arat kul wa itaggan daɣ əddənət ta nəha da, ta n əɣrud a iha.

³² Nak amaran a əreɣ ad tagim təməddurt daɣ kawan-wər-işşəwəş wala. Aləs wa wər nəzlef, ifrâg əddəguz daɣ igi n aratan win fall-as ira Əməli, fəlas igammaɣ d əmmək was z'igrəz y Əməli. ³³ Mişan aləs wa izlafan, şıɣawşiwen n əddənət a daɣ idaggaz igammaɣ əmmək was tu-za-tiru taɣurəs; ³⁴ təzzar tuzan ənəyat-net gər tara n igi n awa tara təntut-net d awa ira Məşşina. Amaran tantut ta wər nəzlef əd ta wər ides azalaf, əfrâgnat əddəguz daɣ igi n aratan win fall-asnat ira Əməli, fəlas əranat ad əşkətnat təməddurt-nasnat ketnet y əlɣibada n Əməli; mişan tantut ta təzlafat, şıɣawşiwen şin əddənət a daɣ tədaggaz, təgammay əmmək was tat-z-iru aləs-net. ³⁵ Arat wa ənneɣ da, tənfa-nawan a daɣ-wan t-ənneɣ, wərgeɣ əzuk iyyan a kawan-sawara. Kalar tara a əgeɣ ad tagim awa inahaggan, təlkəmam y Əməli s əwəl iyyanda.

³⁶ As iga aləs arkawal n azalaf i təmidit-net har d-ewad alwaq wa daɣ ihor a tat-izlaf, amaran iksud əsəkkərukəd-net, wədi izləfet-tat, kud adi a ira, wər imos awen abakkad. ³⁷ Mişan aləs wa d-inkaran gar-es əd man-net isammarkas as wər z'izləf tantut ta dər imarakan azalaf, amaran imos awedan ifrâgan daɣ man-net, wədi igâ arat ihossayan. ³⁸ Daɣ adi awedan wa issəndan arkawal n azalaf i təmidit-net, iga arat ihossayan; mişan of-ay wa igan tanat n a tat-wər-izlef.

³⁹ Tantut təzlâfat ilzâm-tat amel ɣur aləs-net iket iddâr. Mişan as t-aba, ad tilu tarrayt n azalaf n iyyan aləs wa tara, eges kundaba wa izzəgzanan s Əməli ɣaysa. ⁴⁰ Mişan nak daɣ iduf wa-nin, ogar əbbələl wa za tagu as təqqim wər təzlef. Infas wa Zəddigan ən Məşşina a di-isassagan iduf wədi, amaran Infas en daɣ as əgeɣ iduf n əs əgrâwaq-qu.

Əlɣibada n əssənaman

8

*Edərrəg y əlxibada n əssənəman**Tara ən mədrayan-nana win əlməsixitan əd təkatawt-nasan*

¹ Dağ batu ən şan ən təzəgzam şin təwagğanen y əssənəman ta dər-i təssəstanam, tənnam: «Masnat, ketnana nəla dağ-as arat». Tidət a imos adi, mişan za masnat, adkul ən man a du-tətaway s awedan, as iga awen, tara ənta, əsəssuhi a tətəggu əzəgzan n awedan. ² Awedan wa xur illa as ila masnat, wədi harwada wər issen awas imməkkan ad t-issən. ³ Mişan awedan wa iran Məşşina, izday-tu Məşşina.

⁴ Amaran dağ batu ən tattay ən şan ən təzəgzam şin təwagğanen y əssənəman, nəssân âs wər t-illa əssənəm imosan əməli, Məşşina iyyanda xas a t-illan imos Əməli. ⁵ Wala ad əttâfan aytedan as əllan-tu əssənəman aggotnen dağ jənnawan d amađal tiwağbadnen, amaran tidət as əllan-tu, ⁶ da xur-na, Məşşina iyyanda xas a t-illan. Ənta a imosan Abba-nana, ixlak-du awa t-illan kul, s ənta a danax-ilan nəsandu taranet; wər t-illa deş ar Əməli iyyanda, Yaysa Əlməsix, s əssəbab-net as t-illa arat kul, amaran ənta a danax-ittafan təməddurt.

⁷ Mişan wərgex aytedan kul tewâd masnat-nasan adi. Aytedan win di əs kala əzzəgzanan s əssənəman, harwa da as ətşan isan ən təzəgzəmt y əssənəm, ad əşşəkan iman-nasan, iməl xur-san as isimadas-tan awen. ⁸ Dər iga awen da ya, wərgex tettay n amensay a dana-z-izənnəmihezən əd Məşşina: gər za nətşâ isan win di, wala wər tan-nətşâ, wərmad dana-za-təfnəz tettay-nasan s arat, wala deş təşşit-ana sər-əs. ⁹ Eges ya ənkədat əd man-nawan, tarrayt ta təgrawam əddi, a dawan-təssixlalat tettay n amensay kul, ad wər təqqəl təsənkəft y awedan was wər issohat əzəgzan-net.

¹⁰ Fəlas kay wa ilan masnat tədi, as kay-inay amadray-nak dağ əddin was wər issohat əzəgzan-net təqqima dağ adag n əlxibada n əssənəman tətatta, ak wərgex a sər-əs d-awəy adi ad ammazray iduf wa iga, təzzar ad itattu isan win təzəgzam y əssənəman ənta da? ¹¹ Dağ adi təssəxrakax əs masnat-nak ta tagget amadray-nak was wər issohat əzəgzan-net s ənta da əddəlil-net a fəl aba Əlməsix. ¹² As təbbəkkadam imədrayan-nawan as wər issohat əzəgzan-nasan əs təməwit tədi, wədi Əlməsix a təbbəkkadam. ¹³ Adi da fəlas, kud amensay wa tatta a z'iqqəlan y amadray-nin təsənkəft, wədi, nak, wər di-ilkem ad əlasax tettay ən şan, fəl a das-wər-əqqəla təsənkəft.

9

Təbəllant ən Buləs fəl əşşəxəl-net y Əlməsix

¹ Awak nak, wərgex əlləlli a əmosa? Wərgex ənəmmazul ən Yaysa Əlməsix a əmosa? Wərgex ənâyax Əməli-nana Yaysa? Wərgex kawanay iman-nawan tənfa ta du-təgmədat əşşəxəl-in y Əməli a təmosam. ² Kud xur aytedan wiyyad wər əmosax anammazul, da xur-wan illikan as əmosaq-qu; adi da fəlas əzəgzan-nawan s Əməli a imosan ejwal ən tişit-in anammazul n Əməli.

³ Ənta da awa z'anna y a sər-əs əkkəsax iman-in dağ aytedan win di fall-i ganninen ark aratan: ⁴ Awak nakkanay inəmmuzal alxaq a wər nəla n ad nəgrəw a nətşâ d a nəşwa dağ əşşəxəl-nana? ⁵ Awak nakkanay tarrayt a wər nəla n ad nidaw əd tənəttut n iyyan dağ-na təmosat tamadrayt-nana dağ əddin dağ əşikəl, awa taggin nəmmuzal win hadatnen, taggin-tu deş mədrayan n Əməli Yaysa əd Butros? ⁶ Məş, nak əd Barnabas xas a wər nəla alxaq n ad nəddər dağ tişit-nana inəmmuzal? Kundaba ad nəddâr dağ əşşəxəl ən fassan-nana? ⁷ Məni dad kala ad itawanay soji irəzzaman i man-net əşşəxəl wa itaggu? Wala əmagyak wər nətəttu tənfa ən tawagost-net? Madex amadan wər nəsəssu ax n aharay a dər inittaf? ⁸ Awak arat a d-inzâm awedan

gar-es əd man-net a dawan-ganna da, meɣ ak Ǝttawret da awa da a inna? ⁹ Fəlas a inna Ǝttawret: «Ad wər tədbəɣa y azgar təzidizdiyiza daɣ alkama itabakkat-ak-tu.» Awak zələyat daɣ zəgran a fəl inna Məššina awen? ¹⁰ Wərgəɣ əddəlil-nana nakkanay a fəl inna awen? Awalla illikan as əddəlil-nana a fəl iktawaktab awen fəl ad agu awedan wa igayyakan tawagost əd wa itabbakken tənfa ta tat-du-təɣmadat attama n ad əgrəwan adagar-nasan daɣ tənfa ten. ¹¹ Dad zamas nakkanay a d-issədwalan daɣ wallan-nawan tənfa ta du-təfalat Infas wa Zəddigan, awak arat zəwwəran a imos a kawan-d-igməd sər-na a təla əddənət? ^{12a} Kud əllân-tu aytedan as kawan-iwar alxaq-nasan, awak wərgəɣ ogar-tu wa-nana?

^{12b} Mišan harkid adi, wər daɣ-wan nəɣmay alxaq n əššəɣəl-nana; kalar nəzmar y arat kul, fəl ad wər nagu arat a z'iqqəlan təsənkəft y awedan waliyyan igdəl-as awen tesalay y Ǝlinjil n Ǝlməsix. ¹³ Awak masnat a wər təgəmə as aytedan win šaqqalnen daɣ Ahan wa Zəwwəran n Ǝlyibada, ehan en da a tan-ihakkin isudar-nasan; win əšɣalnen deɣ ɣur majmar wa daɣ taqqadnat təkutawen, əlân adagar-nasan daɣ təkutawen en? ¹⁴ Awen da a inna Ǝməli, omar s âs, aytedan win tagginen isalan n Ǝlinjil, əddəranət daɣ-as.

¹⁵ Mišan nak wər daɣ-wan əɣmaya alxaq-in waliyyan; wala kattabaɣ-awan-in aratan win əmərədda fəl a daɣ-wan tan-əɣməya. Fadda əssofaɣ a di-iba y a daɣ-i ikkəs awedan fərregat n igi n abarag wədi. ¹⁶ Wər ələɣ tarrayt waliyyat s igi n abarag n as taggaɣ isalan n Ǝlinjil; fəlas əššil a di-imos igi-nasan. Iket alɣazab adi iqqəl as tan-wər-əgeɣ. ¹⁷ Ǝnnâr tara ən man-in a daɣ tagga isalan n Ǝlinjil, wədi ələɣ alxaq; mišan dad imos as, igi wa dasan-t-agga ilzâm-i, imos əššəɣəl a di-issiwar Məššina, ¹⁸ wədi ma imosan alxaq-in? Adi za igi ən salan n Ǝlinjil y aytedan bannan, wər daɣ-san əɣmaya alxaq waliyyan wa fall-asan ələɣ daɣ igi-nasan.

¹⁹ Nak əheɣ tara ən man-nin, wər di-ila awedan waliyyan, mišan əgeɣ iman-in akli y awedan kul fəl ad d-awəy awen əs taššam n aytedan əzəgzan s Ǝlməsix. ²⁰ As əggazaɣ Kəl-Ǝlyəhud ad əqqələɣ šilat n iyyan daɣ-san fəl ad əzzəgzənan s Ǝlməsix; as əggazaɣ win əlkammen y Ǝttawret, ad əqqələɣ šilat n iyyan daɣ-san, kuddeɣ nak wər das-əlkema, fəl ad əzzəgzənan s Ǝlməsix. ²¹ As əggazaɣ aytedan win wər nəlkem y Ǝttawret, ad əqqələɣ iyyan daɣ-san fəl ad əzzəgzənan s Ǝlməsix; awen wər imos almaɣna-net as wər əlkema y əššəriɣa ən Məššina, kalar əlkâmaɣ-as fəlas əššəriɣa wa n Ǝlməsix as əlkama. ²² As əggazaɣ aytedan win as wər issohat əzəgzan-nasan, ad əqqələɣ šilat n iyyan daɣ-san fəl ad əzzəgzənan s Ǝlməsix; təməwit tədi as əqqala arat kul y aytedan kul fəl a daɣ-san səɣxəlləsa wiyyad.

²³ Taggaɣ adi kul fəl əddəlil n Ǝlinjil, fəl ad ədrəwa albaraka-net d aytedan win sər-əs əzzəgzənən. ²⁴ Masnat a wər təgəmə âs, tammazaga aytedan aggotnen a tat-taggaɣnen, mišan awedan iyyanda a tat-d-itarnin? Daɣ adi azəlat, tagim azzal wa kawan-du-z-isassarnin. ²⁵ Amaran aytedan kul win əganen ənnəyat ən tammazaga, əšinən labasan a ətaggin i man-nasan. Taggin awen fəl ad əgrəwan alak iɣaššadan, as iga awen nakkanay nətagg-ay fəl ad nəgrəw alak wa wər nəxəššəd. ²⁶ Adi a fəl ozala nak, əzzillaɣa s adag wa n təzərəst; aheɣ šaššəlan n awedan ihakkin imankasan wər nəsəsikəy. ²⁷ Zaɣazzab taɣəssa-nin wəllen, əgeq-qat taklit-in, fəl ad wər əɣməda tammazaga, aqqama wər əgrewaɣ alak, nak wa immâlan Ǝlinjil y aytedan.

10

Taryəmt fəl əlyibada n əssənəman

¹ Amaran imədrayan-in, wər areɣ a dawan-ijhâl âs, imarawan-nana as d-əɣmadan akal ən Masar ketnasan tollây dənnəg-san tagarak, ketnasan deɣ as ərdəɣan daɣ agaraw; ² iha awen šaššəlan n âs, ətiwasalmaɣan ketnasan daɣ tagarak ten d agaraw

wen fəl aššaddat ən tassaḡ ta əgan d ənnəbi Musa. ³ Ketnasan deḡ ətšân amensay wa fall-asan d-izazzabbat Məššina daḡ jənnawan; ⁴ əšwân deḡ ketnasan daḡ aman win dasan-d-ikkas Məššina. Aman win, əngâyan-du daḡ təhünt a dər-san təddewat ta tan-ikfa Məššina, amaran təhünt ta, Əlməsix a tat-imosan. ⁵ Mišan harkid awen, tašsam-nasan wər təgrez i Məššina. Adi a fəl wazawaznat təḡəswen-nasan daḡ taneray.

⁶ Amaran aratan win, əgân əmosan-anax almasal fəl ad nənkəd, naqqam wər nəsaddaran igi ən talbast ta əgan. ⁷ Ad wər təqqələm aytedan əḡbâdnen əssənəman, awa əgan wiyyad daḡ-san; id iktâb as: «Təqqim tamattay, tətša, təšwa təzzar təbdad, təggaz tara ən man-net.» ⁸ Ad wər nətaggu deḡ əzzəna, šilan awa əgan wiyyad daḡ-san, təzzar ihlak daḡ-san Məššina sanatat təmərwen n əgim əd karad daḡ əzəl iyyanda; ⁹ wala nagu tənagmayt y Əlməsix awa das-əgan wiyyad daḡ-san, təzzar a tan-əddadnat taššolen, itiba-tan. ¹⁰ Wala deḡ təgətəntənam awa əgan wiyyad daḡ-san, təzzar ihlak-kan angalos wa n ənabaz ən man. ¹¹ Amaran awen kul igrawtan fəl ad iqqəl almasal y aytedan, amaran itawaktab fəl a das-nənkəd nakkanay win fəl du-tosa təzərəst n əddənət. ¹² Daḡ adi awedan wa ḡur illa as ənta ikna tebadday, inkədet ad wər ifətəqqət. ¹³ Ətəwəjərrab təgam kul əgân-tu dat-wan aytedan; amaran Məššina wər d itəqqəl daḡ allaman wa kawan-iga, wər z'ardu itəwəgg-awan ətəwəjərrab as wər təfregam. Amaran as tətawajarrabam, a kawan-akfu fərrəgat ən zəmmerat y-as, ar-awan tarrayt n ədərrəg y-as.

¹⁴ Daḡ adi, imaran-in, darragat y əḡibada n əssənəman. ¹⁵ Awal wa itaggu awedan y aytedan əlânen tayttay a dawan-tagga, ənzərat daḡ-as kawanay iman-nawan ad tənəyam tidət-net. ¹⁶ Takabart n albaraka ta nətigudəy i Məššina, as daḡ-as nəšwa, awak wərgəḡ tadrəwt a nəga əddi azni n Əlməsix wa inḡalan as t-aba? Tagəlla za ta nətuzan gar-ena! As tat-nətša, awak wərgəḡ tadrəwt a nəga əddi taḡəssa n Əlməsix? ¹⁷ Id tagəlla iyyadda a imos Əlməsix, nakkanay deḡ harkid igət-nana taḡəssa iyyadda a nəmos fəlas ketnana nədrâw tagəlla iyyadda ta. ¹⁸ Ənəyat šikutawen šin taggin Kəl-İsrayil! Ak wərgəḡ aytedan win tanat-tagginen tattin-tanat əddəwan daḡ əḡibada wa taggin i Məššina daḡ adag wa daḡ taqqadnat təkutawen-nasan? ¹⁹ Awak mas gammayax əd tənna-net da? Adis tənna a tagga əssənəm madəḡ imensewan tiwakfanen y əssənəm əmosan arət? ²⁰ Kala kala! A ganna, šikutawen šin di taggin aytedan win n aljahilan almaḡna aytedan wər nəmos Kəl-Əlyəhud, kələsuf as tanat-əkkâtan wərgə Məššina. Amaran, wər areḡ ad tadrəwam arət waliyyan d aljaynan. ²¹ Wər təfregam ad təsassim daḡ takabart ta kawan-du-təsaktit tanaxla ta iga ḡaysa azni-net fall-awan, təsassim deḡ daḡ takabart ta daḡ sassin aytedan win əḡbadnen kələsuf. Wər təfregam ad tadarrawam tagəlla ta kawan-du-təsaktit tehakkay ta iga ḡaysa taḡəssa-net fall-awan, tadarrawam deḡ tagəlla ta tattin naxbidan ən kələsuf. ²² Məḡ tara a nəga ad nəssənkər šismiten daḡ Əməli? Awak norn-ay?

²³ Təgannim: «arat kul i xalalan», mišan wərgəḡ arət kul təh-ay tənfa. Təgannim deḡ: «arat kul i xalalan», mišan wərgə arət kul išatu awedan. ²⁴ A tu-wər-iməl waliyyan daḡ-wan igammayan tənfa ta n man-net ənta ḡas, kalar igməyet awa z'anfin imahharagan-net. ²⁵ Isan kul win nazzinen daḡ əssuk, təlâm tarrayt n a tan-tazzanzim, tatšim-tan, da wər təssəstanam d iguz wa d-əgan, ²⁶ id ənnan Əlkəttaban: *Amaḡal d awa t-ihan ketnet in Əməli.* ²⁷ As daḡ-wan igmay awedan wər nəzzəḡzan s Əlməsix a t-in-tasim, təzzar tərḡam as, amensay kul wa issənsa dat-wan, atšat-tu da wər təssəstanam d iguz wa d-iga. ²⁸ Mišan as dawan-inna awedan: «Amensay di itiwakat y əssənəm», wədi a tu-wər-tatšim fəl əddəlil n awedan wa dawan-innan adi, d əddəlil n iduf wa iga. ²⁹ Wər gənna y iduf wa təgam daḡ amensay di kawanay iman-nawan, kalar iduf wa daḡ-as iga awedan wa hadan as ganna. Amaran mafel as

di-igaddal iduf n awedan iyyan, igi n arat as ələx tarrayt n igi-net? ³⁰ Kud amensay wa tatta har təggodayax i Məşşina as təggazax şin tattay, mafel as di-ilayyan awedan fəl as t-ətşex?

³¹ Day adi, gər za tettay a tətəggim wala təsassim, a iqqal arat wa tətəggim, agiwat-tu fəl ədkul ən Məşşina. ³² Ad wər təqqələm təsənkəft y awedan waliyyan, gər za Kəl-Əlyəhud wala aytedan win tan-wər-nəmos wala dəx aytedan n Əlkənisat ən Məşşina. ³³ Agat awa tagga; nak a igammayan d ad əgrəzax y awedan kul day arat kul; wər gəmməya tənfa i man-nin, kalar tənfa y aytedan aggotnen a gammaya fəl ad əgrəwan əlyillas gur Məşşina.

11

¹ Əqqələt aytedan a di-əttilalnen s əmmək was əttələla nak da Əlməsix.

Əlyibada ən Məşşina day Əlkənisat

Awa iwaran meddan əd tədoden day Əlkənisat

² Əmməlaq-qawan imədrayan-in fəl təkatawt ta di-du-tətəggim day arat kul d iduf wa təgam əlyadaten s əmmək was dawan-tanat-əssəbdada. ³ Mişan arex ad təssənam as, aləs kul, Əlməsix a imosan əxəf-net; tantut, aləs a imosan əxəf-net; Əlməsix, Məşşina a imosan əxəf-net. ⁴ Amaran id iggaz aləs şin əlyibada ən Məşşina day Əlkənisat itattar madəx igraw emel y aytedan isalan a fall-as d-izizabbat Məşşina, issilsa əxəf-net, wədi izabaz wa das-imosan əxəf təkarakit. ⁵ Eges tantut kul ta tətəttarat madəx təgrāw emel y aytedan isalan a fall-as d-izizabbat Məşşina, wər təssəwar əxəf-net, day Əlkənisat, tədi təzabaz wa das-imosan əxəf təkarakit, şilat n as təsitabalbal. ⁶ Tantut ta wər nəşəwir əxəf-net, tədi təfnəzet anzadan-net! Mişan dad imos i təntut təkarakit afanaz n anzadan madəx əsəttəbəlbel, wədi təssəwəret əxəf-net! ⁷ Aləs ənta wər t-ilzem ad assalsu əxəf-net id Məşşina a t-id-ixlakan əs şaşşəlan-net, ikf-ay tanaya şilat ən ta-net; mişan tantut ənta, saxmar n aləs a təmos. ⁸ Fəlas wərgə aləs a d-ixlak Məşşina day təntut, kalar tantut a d-ixlak Məşşina day aləs. ⁹ Wərgəx dəx aləs a d-itawaxlakan fəl əddəlil ən təntut, kalar tantut a du-tətawaxlakat fəl əddəlil n aləs. ¹⁰ Adi a fəl ilzam tantut ad iwār asannal ən taşmar əxəf-net, fəl udəm n angalosan. ¹¹ Mişan ya dat Əməli, aləs harkid təntut, akkiyyan iqqān day wa hadan; ¹² fəlas kud imos as tantut, aləs a du-təgmad, da aləs, tantut a d-igmad, amaran arat kul Məşşina a d-ifal. ¹³ Kawanay iman-nawan ma tənnam: Awak ihôr ad tətəttar təntut əs Məşşina day aljaməyat n əlməsixitan wər təssəwar? ¹⁴ Awak wərgəx əttəbişat-nawan iman-net, təssosan-kawan as igi ən jəkkad imos təkarakit fəl aləs? ¹⁵ Mişan tantut ənta, ijəkkad almaqam a tat-hakkin? Id Məşşina a das-tan-ikfan y assatar n əxəf-net. ¹⁶ Kud ill-ay awedan amaran irān ad ammazax adi, issenet as: Gər za nakkanay wala Əlkənisaten ən Məşşina, wər nəla iyyat əlyadat wər nəmos tədi.

Imensewan win saktan n Əməli

Şisəssukay şin tawəgganən əlwaq wa n mensewan win saktan n Əməli

¹⁷ Amaran ammaran win dawan-tagga da, wər əmosan eməlan-nawan, id imənəyan-nawan win əlyibada wərgəx əşitəy a kawan-taggin, kalar ələqqam a kawan-suxulan. ¹⁸ Fəlas arat wa azzaran, wa sər-wan əsləx əs, id təmmənay aljaməyat n Əlkənisat-nawan y əlyibada, ad təqqələm şizunawen; amaran wər aba a əzzigzanax day batu di. ¹⁹ Mişan ya əşşil ad təqqələm şizunawen fəl a day-wan təwənəyan win əhornen d ətəwəsəxmər, wərgəx? ²⁰ Day adi əmənəy wa tətəggim, wər tu-tətəggim y ad tədrəwam imensewan win saktan n Əməli Yaysa. ²¹ Fəlas as təggazam şin tattay, akkiyyan day-wan ad ihəz day amensay wa d-əway atş-ay,

ayyu əmidi-net; iqqəl âs, wiyyad dağ-wan za ih-en gələk, amaran win hadatnen isimaswad-tan esmad. ²² Awak inan a wər təlem a dağ tətšam, tašwim? Məx məlka a təgam Əlkənisat ən Məššina, təzabazam təkarakit win dağ-as wər nəla arat? Ma dawan-z-anna za? A təram a dawan-aga təmmalen olaynen fəl as təgam adi? Wala ənəmihaz!

Imensewan win saktan n Əməli

²³ Fəlas nak iman-in alğadat ta di-d-oyya Əməli iman-net a dawan-d-oyyex, a tatimosan as: Ahad wa dağ z'itəwəggu Əməli Ƴaysa dağ fassan, idkal tagəlla, ²⁴ iga igodan i Məššina, təzzar irz-et, inna: «Təxəssa-nin adi, [tətiwarzat] fəl əddəlilnawan. Taggat awa da əs təməwit ta da, imos adi isaktan-in.» ²⁵ Zund əmmək en da âs, as ətšan, idkal təkabart, inn-asan: «Təkabart ta, arkawal wa aynayan ən tassağ a təmos gər Məššina əd tamattay-net. Arkawal wa, azni-nin a t-isattaddan. I dağ-as təšwam, tagim adi isaktan-in.» ²⁶ Fəlas id tətšam tagəlla ta, təšwam dəx dağ təkabart ta, wədi isalan ən tamattant n Əməli Ƴaysa a tətəgim, har əzəl wa du-z-iqqəl.

Təttay ən mensewan win saktan n Əməli əs təməwit toğadat

²⁷ Awen dağ a fəlas, i itšan tagəlla ta təmosat isaktan ən təxəssa n Əməli Ƴaysa, madəx iga dağ təkabart ta təmosat isaktan n əzni-net tessay təgat s iba n safrar, wədi ibbikkad təxəssa n Əməli Ƴaysa d əzni-net, amaran ad t-ibəz əššərixa s adi. ²⁸ Dağ adi akk awedan aššəggaret iman-net təzzar, alwaq wədi amaran atšu tagəlla ta, ašəw dağ təkabart ta; ²⁹ fəlas awedan wa itšan tagəlla ta, madəx işwa dağ təkabart ta, wər igra arat wa idraw adi əd təxəssa n Əlməsix Ƴaysa, wədi awedan izzibaz iman-net əššərixa ən Məššina. ³⁰ Adi a fəl kawan-əhan aytedan aggotnen ən nərkam əd wiyyad aggotnen ən miranan, aba dağ-wan fadda wiyyad. ³¹ Ənnar nazzâr əs šəggara ən man-nana, wər dana-z-ibəz əššərixa. ³² Dər iga awen da ya, Məššina itâbaz-ana s əššərixa fəl a danağ-ağəd, naqqam wər danağ-issərtay d əddənet dağ əššərixa wa ilkaman. ³³ Dağ adi imədrayan-in, id təddewam y ad tədrəwam imensewan, ad tətəqqalam i mədrayan-nawan! ^{34a} Kud iyyan dağ-wan ih-ay gələk, atšet dağ ahan-net təzzar, fəl ad wər iqqəl əməney-nawan arat a sər-wan du-z-awəyan a kawan-abəz əššərixa.

^{34b} Amaran dağ batu ta təqqalat šiyawšiwən šin hadatnen, as din-oseğ a tanat-akna.

12

Šihəkkuten šin itaggu Infas wa Zəddigan

¹ Amaran imədrayan-in, dağ batu ən təmətəkwəyen šin ihakku Infas wa Zəddigan, wər areğ a dağ-asnat təjhâlam. ² Təssânam as dat iguz-nawan tarrayt ta n Məššina, aytedan a təmosam əxrâknən, əlkâmnen y əssənəman wər nəšiwil. ³ Awen da fəl areğ ad təssənam as, wər t-illa awedan a dağ innoda Infas ən Məššina a du-z-inkəran ad igannu: «Məššina təlxâna Ƴaysa!» wala dəx ill-ay awedan ifrâgan ad annu: «Ƴaysa imos Əməli!» ar s a dağ-as innoda Infas wa Zəddigan. ⁴ Amaran šihəkkuten əzzənəfan a əmosnat, mišan Infas iyyanda ɣas, a t-imosan Infas wa Zəddigan ən Məššina s ənta a tanat-ihakkin ketnasnat. ⁵ Tarrayen n əššəğəl əzzənəfan a əmosnat, mišan Əməli di n iyyan as nəşğal. ⁶ İgitan əzzənəfan a əmosan, mišan Məššina di n iyyan a ihakkin aytedan kul masnat n igitan kul win taggin.

⁷ Akk ənalkim igrâw ɣur Infas wa Zəddigan təhəkkut a tu-təssifragat əššəğəl imosan tənfa-nana ketnana. ⁸ Awedan za iyyan ihakk-ay Infas wa Zəddigan igi ən batuten ən təla n əğərri, iyyan amaran ihakk-ay Infas igi ən batuten ən masnat. ⁹ İyyan ihakk-ay Infas wa Zəddigan əzəgzan, iyyan ihakk-ay fərregat n əzuzəy ən miranan, ¹⁰ iyyan ihakk-ay fərregat n igi ən təlməxujaten, iyyan igrâw emel y

aytedan isalan win fall-as d-izazabbat Məşşina, iyyan ihakk-ay fərregat ən zələy gər təhəkkut ta n Infas wa Zəddigan əd ta tat-wər-nəmos. Iyyan ihakk-ay fərregat n iššiwəl n awalan wər nətawazday, iyyan ihakk-ay əfəssər n awalan win di; ¹¹ mişan Infas wa Zəddigan wa da a itaggin aratan di ketnasan, akk awedan ihakk-ay təhəkkut ta das-ira.

Taxəssa əd təsəllad-net aggotnen

¹² Ənəyat tişit ta təga təxəssa n awedan arat iyyanda igân dağ təsəllad əknanen igət, eges harkid igət-nasnat, təxəssa iyyadda a əmosnat. Awen da za a əgan aytedan win əlkamnen y Əlməsix, s əntanay a əmosnen təxəssa-net. ¹³ Fəlas gər za nəmos Kəl-Əlyəhud wala aytedan win wər tan-nəmos, gər za nəmos eklan wala illalan, Infas wa Zəddigan wədi da, a dağ nətawasalmağ ketnana, nəqqal təxəssa iyyadda. Ketnana değ Infas wa Zəddigan wədi da, a idnayan iwallan-nana. ¹⁴ Amaran təxəssa wər təga dağ təslət iyyadda, kalar šisəllad aggotnen a dağ təga. ¹⁵ As d-iggad adar inna: «Nak wər di-təla təxəssa id wər əmosağ əfus.» Awak ikkâs-tu awen dağ tişit n iyyat dağ təsəllad ən təxəssa? ¹⁶ As tənna təməzzuk: «Nak wər di-təla təxəssa, id wər əmosağ šat.» Awak ikkâs-tat awen dağ tişit n iyyat dağ təsəllad ən təxəssa? ¹⁷ As təqqal təxəssa ketnet šat, mas z'aslu awedan? As təqqal təxəssa ketnet təməzzuk, mas z'iwət awedan ađu? ¹⁸ Kalar Məşşina a igan šisəllad dağ təxəssa, akkiyyat ig-et dağ adag was ira. ¹⁹ As imos as təxəssa ketnet təslət iyyadda a təmos, wədi ma z'iqqəlan təxəssa? ²⁰ Kalar šisəllad əknanen igət a t-əllanen, mişan təxəssa ənta iyyadda. ²¹ Awen dağ a fəl wər təfreg šat ad tannu y əfus: «nak wər sər-ək əddərar», wala değ annu ağaf i daran: «nak wər sər-wan əddərar.» ²² Fadda šisəllad ən təxəswen-nana šin n as nəga iduf n as ərkamnat, əntanatay a dana-təha tənfa wəllen. ²³ Amaran šin di as ħur-nağ iga as wər farornat, əntanatay a nəssəymar wəllen. Dağ adi, šisəllad-nana šin əmosnen izuf, əntanatay a nəkannu assatar. ²⁴ Šin wər nəmos izuf amaran, əntanatay wər əddərarnat s assatar. Məşşina iman-net a d-ixlakan təxəssa tosâğ, ig-as təməwit a fəl tawasaymarnat təsəllad-net, wəllen šin əddərarnen s adi, ²⁵ fəl ad wər təzun təxəssa gar-es, kalar əkkulluk ən təslət ad təssən dağ təmidit-net. ²⁶ Awen dağ a fəlas, as təlaggay iyyat dağ təsəllad ən təxəssa, šisəllad kul šin hadatnen əntanay da, ad laggaynat. As tətawazazwar değ iyyat dağ təsəllad, šisəllad kul šin hadatnen ad fəliwəsnat. ²⁷ Kawanay təxəssa n Əlməsix a təmosam, amaran akkiyyan dağ-wan təslət ən təxəssa-net a imos. ²⁸ Adi a fəlas Əlkənisat, dağ tizarat iga dağ-as Məşşina inəmmuzal, dəffər-san ənnəbitan; dəffər ənnəbitan, əlfəqqitan; dəffər adi aytedan win əlanen fərregat n igi ən təlməxjujaten, əlkaman-asan win ikfa fərregat n əzuzəy ən təwərnawen, əd win tilalnen y aytedan, əd win ikfa fərregat ən tizart y aytedan, əd win ikfa fərregat n əšiwəl n awalan wər nətawazday. ²⁹ Awak ketnasan as əmosan inəmmuzal? Awak ketnasan as əmosan ənnəbitan? Awak ketnasan as əmosan əlfəqqitan? Awak ketnasan as əgrawan fərregat n igi ən təlməxjujaten? ³⁰ Madəğ əgrâwan fərregat n əzuzəy ən təwərnawen, meğ fərregat n awalan wər nətawazday, meğ fərregat n əfəssər-nasan? Wala ənamihaz!

Tara: Tarrayt ta n tidət

³¹ Dağ adi səddirənat s əlluy agaraw ən təhəkkuten šin ofanen! Amaran a kawan-assakna əmərədda tarrayt ta tofat tarrayen kul.

13

¹ Kud əşşewalay awalan n aytedan harkid win angalosan da, as di-wər-təha tara, wər izlay awal-in d əməsli n anayna madəğ əməsli n əylal ən təzoli itatawatan. ² Kud əgrâwa təhəkkut n amel ən salan a d-izazabbat Məşşina, wala əgrâwa əssiran kul

əd masnat kul, wala ələx əzəgzan ikmâlan a di-issifragan əsəggəli n ədxağan, da, as di-wər-təha tara, wər əmosax wala. ³ Kud əzuna təla-nin kul i tələqqawen, əskatay iman-in y əlxibada ən Məşşina har xur-i iməl as oğaray aytedan, da, as di-wər-təha tara wər di-z-anfu adi əs wala.

⁴ Awedan wa taha tara, təh-ay təzaydart, olâx; wər izway y awedan waliyyan, wər itaggu ibaragan, wər idkel iman-net dännög aytedan. ⁵ Awedan taha tara wər itəggu əmazal n iba ən təkarakit, wər igəmməy awa tu-z-anfin ənta xas, wər rəxis alham-net, wər itəttəf dəx man ark amazal a das-iga awedan; ⁶ wər t-isədəwit arat wər noyed, kalar tidət a tu-təsadawet. ⁷ Faw izizaydar, faw izzigzan, faw igâ attama, izmâr y arat kul. ⁸ Tara, wər das-ilkem ad təxrâd, təhəkkut n amel ən salan a d-izizabbat Məşşina ilkâm a tu-wər-təlla, ta n əşiwəl n awalan wər nətawazday ad tərəz, ta n masnat ənta da ilkâm a tu-wər-təlla; ⁹ fəlas masnat-nana wər tənda, emel-nana isalan win d-izizabbat Məşşina dəx wər inda.

¹⁰ Mişan as du-tosa alkamalat, awa wər nəkmel ad iba tamayyamat-net. ¹¹ Harwa əmosa barar, awal ən barar a taggaç, taggaç imedranan win barar, ələx tayttay ta n barar; mişan as əqqalaç aləs, oyyeç-in aratan win barar dəffər-i. ¹² Əmərədda nəhannay as, masnat-nana, wala ad təggət, wər təmos wala dəgma n ta təkamat; izlay-tanat awa izlayan anay n awedan dəx şışset d anay-net udəm s udəm. Əmərədda masnat-in wər təkmeç, mişan ilkâm ad təkmeç, tagu alkamalat ta təga təməzdəyt ta di-iga Məşşina.

¹³ Amaran əmərədda karad aratan win, a t-əllanen, a tan-imosan: əzəgzan d attama əd tara; mişan wa tan-oğaran tara.

14

Şihəkkuten şin Infas wa Zəddigan d akaras n İlkanisat

¹ Əgməyat za ad təqqəlam aytedan taha tara; təsəddirənam wəllen agaraw ən mazalan win ihakku Infas wa Zəddigan, wəllen emel ən salan win d-izizabbat Məşşina. ² Fəlas awedan wa ifragan əşşiwəl n awalan wər nətawazday, Məşşina as işşewal wərgəç aytedan; id wər t-illa awedan igrân əssiran win as t-ikfa Infas wa Zəddigan emel-nasan. ³ Mişan awedan wa igrawan emel ən salan a fall-as d-izizabbat Məşşina wədi aytedan as işawal, isisuhit əzəgzan-nasan, isasmad iwallan-nasan, italam-asan fəl man. ⁴ Awedan wa işşewalan awalan wər nətawazday, əzəgzan wa-net xas a isisuhit s adi, mişan awedan wa igrawan emel ən salan a d-izizabbat Məşşina wədi İlkanisat ketnet as isisuhit əzəgzan-net. ⁵ Nak areç ad təşşiwəlam ketnawan awalan wər nətawazday, mişan awa dawan-əssofaç, ad təgrəwam təhəkkut n amel ən salan win d-izizabbat Məşşina. Awedan wa igrawan emel ən salan a d-izizabbat Məşşina, oğar wa igrawan fərregat n əşiwəl n awalan wər nətawazday, ar s ad imos as ifrâç ad itafassar awa igannu fəl a sər-əs isəssuhət əzəgzan n İlkanisat.

⁶ Amaran əmərədda, imədrayan-in, nənna masalan oseq-qawan-in əşşewalaç awalan wər nətawazday, awak mas kawan-z-anfu adi? Mişan as kawan-in-oseç əmalay-awan arat isinafalal Məşşina, madeç əşşita masnat ta təlam, madeç ağaç-awan batu a fall-i d-izizabbat Məşşina madeç əsassaçraq-qawan təssunt a du-təgmâdat Əlinjil, wərgəç a kawan-anfu adi? ⁷ Wala aratan win as tawaggin səwat, nənna masalan təsənsəç madeç təhərdant da, as wər əgen ewet olâxan, manəmmək as z'izləy awedan ağgay wa əgan? ⁸ Esək dəx wa itawansağan y ad səmmutəgan aytedan y əməgər, as das-wər-itawagga anasaç wa itawassanan, ma z'isəmmutəgan y əməgər? ⁹ Kawanay da za, awen da: as təşşewalam wər tələffədam s əlxərəfan as itiwassan almaçna-nasan, man əmmək as z'issən awedan waliyyan awa təgannim? Zun təşşewalam dəx açu! ¹⁰ İgmâd aşşak âs, əzzənəfan n awalan ağgotnen a əhanen

əddənet; mišan wər tan-ihā is wərgex ila almaɣna. ¹¹ Amaran as wər əssenax iyyan daɣ-san, ad əqqələx s awedan wa t-işşewalan awedan ən tama, iqqəl-tu sər-i nak da. ¹² Daɣ adi kawanay da, dad zamas təsidarānam wəllen agaraw ən təmətəkwayen šin ihakku Infas wa Zəddigan, adi za, əşxələt daɣ agamay ən šin za səssuhətnen əzəgzan n Əlkənisat.

¹³ Awen da a fəlas awedan wa işşewalan awalan wər nətawazday, igməyet daɣ Məşşina ad t-akfu fərregat n əfəssər-nasan. ¹⁴ Fəlas as imos as tattara daɣ awalan wər nətawazday, iman-in ɣas a tattarnen, tayttay-in ənta, wər təşxel daɣ təwatriwen šin tagga. ¹⁵ Daɣ adi ma z'aga? Adi za, ad əttəraɣ daɣ man-in, əttəra deɣ əs tayttay-in daɣ awal isisagran; agaɣ tagaytalt əs man-in, agaɣ-qat deɣ əs tayttay-in daɣ awal isisagran. ¹⁶ As wər iga adi, as iqqal əs tətəggaɣ igodan i Məşşina əs man-nak ɣas, daɣ awalan wər nətawazday, awak awedan wa tu-wər-nəssen, wa dak-issəsəman daɣ Əlkənisat, manəmmək as z'annu i təwatray-nak: «Amin!», ənta wər issen awa təganna? ¹⁷ Illikan as igodan-nak i Məşşina hossayan, mišan wər isassahat adi əzəgzan n aytedan win dak-əssəsəmnen id wər əssenən awa təganna. ¹⁸ Nak tigudəyax i Məşşina as kawan-ogara ketnawan awal daɣ awalan wər nətawazday! ¹⁹ Mišan as aheɣ Əlkənisat, əsofaɣ igi ən wala ɣas səmmos əlxərəfan a za tawagrinen y ad əzzəbəzaɣ aytedan əlfaydat, igi ən maraw gim n əlxərəf daɣ awalan wər nətawazday.

²⁰ Imədrayan-in, uşarat, tammazzayam əd tişit ən bararan! Tidət as, daɣ awa iqqalan igi ən təllabəst, əqqələt šilat ən bararan; mišan daɣ awa iqqalan əgərri n aratan win, əqqələt aytedan əkmələn. ²¹ Ənnan Əlkəttaban: «İnna Əməli: "Tamattay ta, a das-əşşiwələx daɣ awal wər təssen, igməd-du sər-san awal wen imawan ən naftaxan, mišan harkid awen wər di-z-abbardagan."» ²² Adi a fəlas, əşiwəl n awalan wər nətawazday, asannal n əşşərixa ən Məşşina a imos y aytedan win wər nəzzəgzan, wərgə win əzzəgzannen; as iga awen, awedan wa ikfa Məşşina emel ən salan a d-izizabbat Məşşina, wədi isalan win itaggu, asannal n arraxmat a mosan y aytedan win əzzəgzannen, wərgə win wər nəzzəgzan. ²³ Nənnə masalan Əlkənisat ketnet a təddewat daɣ adag iyyanda, təzzar əşşewalan ketnasan awalan wər nətawazday, har tan-d-osan aytedan wər nəgra awa imos awen, madeɣ aytedan wər nəzzəgzan, wərgex ad annin əmməskəl a əgan? ²⁴ Mišan as imos as ketnasan əmməlan awal imosan emel ən salan a d-izizabbat Məşşina har tan-d-osa awedan wər nəzzəgzan, madeɣ iyyan wər əhen isalan n awen, ad t-əssusənan awalan kul win as isallu əddi as igā ibakkadan, issən deɣ as ad t-ibəz əşşərixa ən Məşşina; ²⁵ ənta da affaggin aratan kul win əhanen əwəl n awedan wen, təzzar issəjəd i Məşşina, ixbəd-tu, annu: «Tidət as illa Məşşina gar-ewwan!»

Ənnizam daɣ əlwaq wa n əlxibada

²⁶ Daɣ adi, imədrayan-in, mas imməkkan a tu-tagim? Adi za as təmmənəyam daɣ adag iyyanda, wiyyad daɣ-wan aginet šigaytalen, wiyyad sassaxrinet aytedan, wiyyad əməlanet awa dasan-isannafalal Məşşina, wiyyad əşşiwəlanet awalan wər nətawazday, wiyyad affassaranet-tan. İqqələnet aratan win di kul, arat a z'isəssuhen əzəgzan-nawan. ²⁷ Kud wiyyad daɣ-wan a şawalnen awalan wər nətawazday, ad wər akəyan əşşin aytedan madeɣ karad. Əşşiwəlanet s iyyan iyyan, amaran iməl-tu awedan iffəssaran awa gannin. ²⁸ Kud wər t-illa awedan a t-iffəssaran, affastinet, ad wər əşşiwəlan daɣ Əlkənisat, əşşiwəlanet daɣ man-nasan gar-essan əd Məşşina. ²⁹ Amaran win əmosnen ənnəbitan, əşşiwəlanet daɣ-san əşşin madeɣ karad, təzzar aşşaggaran aytedan win hadatnen n Əlkənisat awal wa d-izzəbben da. ³⁰ Mišan as d-isanafalal Məşşina awal y iyyan awedan iqqiman den, awedan wa işşewalan, affastet i wədi. ³¹ Daɣ adi ketnawan təfrəgam ad təmməlam

s iyyan iyyan isalan win d-izazabbat Məşşina y aytedan, y ad təsassaxrim inalkiman kul, taknim-asan iman ketnasan. ³² Təhəkkut n amel ən salan a d-izazabbat Məşşina, immikkan as innôda dağ-as awedan wa tat-igrawan. ³³ Fəlas Məşşina wər ira tanajarwayat, kalar ənnizam olâxan a ira, d alxer, şilat n awa igan dağ Əlkənisaten ketnasnat, əmosnen tamattay zəddigat ən Məşşina. ³⁴ Ad wər şawalnat tədoden dağ mənəyan win Əlkənisat, fəlas wər əlenat turagat n awen. Kalar abbardagnatet, id adi da as inna Əttawret ad t-aginət. ³⁵ Kud ill-ay arət as ərənət a dağ-as əssənnat, əssəstannatet meddan-nasnat dağ aɣaywan; fəlas təkarakit a imos fəl təntut ad təşşiwəl dağ əmənəy n Əlkənisat. ³⁶ Awak təxilt a təgam awal ən Məşşina kawanay a d-igmad? Məx təxilt a təgam kawanay ɣas a t-iqbalan? ³⁷ Awedan wa dağ-wan igan iduf n as ənta ənnəbi a imos, madəx innoda dağ-as Infas wa Zəddigan, agret s əlluɣ âs aratan win dawan-kattaba da, alwajib n Əməli a əmosan. ³⁸ Amaran awedan wa wər nəssəfrar adi, wədi ənta da wər tu-z-issəfrər Məşşina. ³⁹ Dağ adi imədrayan-in, səddirənət wəllen agaraw ən təhəkkut n amel ən salan win d-izazabbat Məşşina; mişan ad wər təgdəlam əşiwəl n awalan win wər nətawazday. ⁴⁰ Adi kul agiwat-tu dağ əzzəbun d ənnizam.

Tanakra ən ɣaysa dağ tamattant

15

Isalan ən tanakra ən ɣaysa day tamattant

¹ Imədrayan-in, əmərədda a kawan-d-assaktaɣ Əlinjil was dawan-əgeɣ isalan-net, təzzəgzanam sər-əs, təlkamam-as s əlluɣ; ² Əlinjil di da a kawan-igan dağ tarrayt n əlxillas, kud tətəfəm-tu s əlluɣ s əmmək was dawan-t-əmala. As das-wər-təgem adi, əzəgzan ən bannan a təgam. ³ Fəlas isalan win əgrawa nak iman-in a dawan-əgeɣ, amaran isalan win di, eɣaf-nasan as, Əlməsix, aba-tu fəl əddəlil ən bakkadan-nana, imos as adi da ənnan Əlkəttaban. ⁴ Ənnan deɣ Əlkəttaban, tətawagga təɣəssa-net dağ təzəkka, as əzəl-net wa n karad d iba, itawasankar-du dağ tamattant. ⁵ Inafalal-du i Butros, amaran inafalal i nəttulab-net win maraw d əşşin. ⁶ Dəffər adi inafalal i tiddawat ən nalkiman togarat səmmosat təmad n awedan, arət dağ-san aba-tu mişan taşşam-nasan harwada təddâr. ⁷ Dəffər adi amaran inafalal i Yaquub, dəffər adi inafalal i nəmmuzal kul. ⁸ Dəffər-san ketnasan a di-inafalal nak da Buləs, nak ihân əlmital ən barar a d-ihəwan dəffər as okay alwaq ən təhəwt-net. ⁹ Fəlas nak inəmmuzal kul ogaran-i, wər əweda fadda a di-itəwənnu anammazul, id kala ad əssəknaɣ aytedan win Əlkənisat ən Məşşina arkanay. ¹⁰ A iqqal awa əmosa, dâ, əmosaq-qu s arraxmat ən Məşşina, amaran arraxmat ta di-ikfa, wər təbbənnan; fəlas oğaraɣ inəmmuzal kul əşşəxəl, mişan ya wərgəɣ nak a igan adi, kalar arraxmat ən Məşşina a dağ-i təşyalat. ¹¹ Adi a fəlas, gər za nak, wala deɣ inəmmuzal win hadatnen, isalan win di a nətəggu, amaran əntanay a təzzəgzanam.

Tanakra ən nəmməttan

¹² Amaran dad gannin salan win nətəggu, Əlməsix inkar-du dağ tamattant, manəmmək as gannin wiyyad dağ-wan, inəmməttan wər dağ-san təlkem tanakra dağ tamattant? ¹³ Kud tidət a imos as inəmməttan wər dağ-san təlkem tanakra, wədi Əlməsix da, wər d-itawasankar dağ tamattant! ¹⁴ Amaran kud Əlməsix wər d-itawasankar dağ tamattant, adi za təlxutbaten-nana wər əlenat tənfa waliyyat, əzəgzan-nawan sər-əsnat deɣ wər ila tənfa waliyyat! ¹⁵ Amaran arət wədi as iga, nakkanay nəqqal şigəyyawen ən bahu id nətəgəyyat âs Məşşina issinkar-du Əlməsix dağ tamattant; ənta adi wər z'agu as wər təlkem tanakra dağ tamattant, ¹⁶ fəlas ənnar imos as inəmməttan wər du-za-təwəsənkəran dağ tamattant, adi za Əlməsix da, wər d-itawasankar dağ tamattant. ¹⁷ Amaran kud Əlməsix wər d-itawasankar dağ

tamattant, adi za əzəgzan-nawan wər infə wala, amaran əwâran-kawan bakkadan-nawan; ¹⁸ aytedan dəx win aba əzzigzanan s Elməsix, əntanay da wər dasan-t-illa attama waliyyan âr wa n əhluk. ¹⁹ Kud nakkanay attama-nana dəx Elməsix wər okay əddənet ta da ƣas, adi za wər t-illa awedan dəx əddənet wər noƣer təla ən təhanint.

²⁰ Kalar tidət dəx a imos as Elməsix itiwəsanƣar-du dəx tamattant. Ənta a d-azzaran tanakra, imos awen arət isitaddan as aytedan win aba əzzigzanan sər-əs əntanay da a d-ənkəran dəx tamattant. ²¹ Id tamattant awedan iyyanda a tat-d-ewayan s əddənet, a t-imosan Adəm; əmmək di da za as tanakra dəx-as da, tosa-du əs tarrayt n awedan iyyanda, a t-imosan Elməsix. ²² Id aytedan kul a tan-iba fəlas Adəm a d-əƣmadan, əmmək di da za as aytedan kul win osaynen d Elməsix, ad əƣrəwan təməddurt ta təxlalat. ²³ Tanakra dəx tamattant amaran, təƣâ s ənnizam: Elməsix a sər-əs d-azzaran, dəffər adi win sər-əs əzzəgzannen a du-za-təwəsənkərnen ƣur tawaxlay-net. ²⁴ Amaran tasa-du təzərəst n əddənet, ijəbbərəjjət Elməsix təmənukəla kul d əlxəkuman kul əd təƣmaren šin əttənkəlnen, dəffər adi idkəl təƣmar akf-et i Məššina di n Abba. ²⁵ Fəlas ilzâm Elməsix ad ittəf təƣmar har agu Məššina izənga-net kul daw daran-net. ²⁶ Azangaw-net was z'izrəy s ahluk-net, tamattant. ²⁷ Fəlas ənnan Elkəttaban: «*Iƣa Məššina aratan kul daw daran-net*», amaran immun as «aratan kul» win as itawanna ad əməlan daw daran-net da, wər tan-iha Məššina, s ənta iman-net a ikfan Elməsix təƣmar ta ittəf. ²⁸ Amaran as iƣa Məššina aratan kul daw daran n Elməsix, alwaq wədi, ad z'agu Barar ənta da, almayna Elməsix, iman-net daw əlxəkum ən Məššina wa iƣan aratan kul daw daran-net fəl ad təkml tizart ən Məššina y arət kul dəx adag kul.

²⁹ Amaran ənzərat dəx aytedan win tawasalmayən dəx aman fəl əddəlil ən saymar n aytedan-nasan win aba: Awak ma imos awas əƣan attama n agaraw-net dəx igi n awen? Kud ənta tidət dəx a imos as, wər tu-təlla tanakra dəx tamattant, wədi ma fel tawasalmayən dəx aman fəl əddəlil ən saymar n aytedan-nasan win aba? ³⁰ Nakkanay iman-nana za, ma fel akk assayət nəha tazak ən tamattant? ³¹ Akk əzəl təhoz-i-du tamattant! [Imədrayan-nin], arət wədi, ig-as aššak agamad wa iƣa y əsəbbərəƣ wa fall-awan tagga fəl əddəlil n awa dəx-wan iƣa Əməli-nana Ƣaysa Elməsix. ³² Kud təbəllant ta əƣəx dəx əƣrəm n Efez, wər nəzlay d aməƣər əd wəxsan, wər təƣa ar fəl ares n əddənet, awak ma di-za-taknu? Kud inəmməttan wər du-za-təwəsənkəran dəx tamattant, adi za, aƣatanay awa ənnan aytedan wiyyad as ənnan: «*Natš-et, našwet, fəlas wər dəx-naƣ ilkem ar tamattant*» ³³ Ad wər tətəwəsəxrəkam! Fəlas ənnan kəl awal: «*Tidawt d ark aytedan təƣaššad alxal olâƣan.*» ³⁴ Təƣqələt-kawan-du tayttay-nawan ta tolayət, tammazzayam d igi ən bakkadan. Fəlas wiyyad dəx-wan wər əssenən Məššina. Ənnêx adi fəl a kawan-izzəbəz təkarakit.

Tayəssa ta du-tənkərat dəx tamattant

³⁵ Mišan wər igdel awen ad annin wiyyad dəx-wan: «Awak inəmməttan, mənəi təməwit tas du-za-təwəsənkəran? Ma təmos təƣəssa ta dər du-za-təwəsənkəran?» ³⁶ Aljahilan! As tənbalam tablalt n amasa, wəƣəx kundaba təmmut as du-təƣammad, təddâr? ³⁷ Amasa dəx ƣas a tənbalam den, iha mijas in alkama madəx tabzəst iyyat, wəƣəx tasaytot təƣrâdat a tənbalə. ³⁸ Təzzar ikf-ay Məššina tayəssa ta das-ira, əkkulluk n amasa ikf-ay tayəssa ən man-net. ³⁹ Šixəllak wər olenat tayəssa ketnasnat; aytedan zənnit təƣəssa ta-nasan, eharay zənnit ta-net, igəđad zənnit ta-nasan, kifitan dəx zənnit ta-nasan. ⁴⁰ Amaran ijənnawan da, əhân-tan aratan əlânen šixəswen, zund əmmək as, amađal əwaran-tu aratan əlânen šixəswen; mišan šihussay n aratan win əhanen ijənnawan wər tola əd təhussay ən win əwarnen amađal. ⁴¹ Zənnit ənnur wa n təfuk, zənnit wa n təllit, etran dəx zənnit wa-nasan. Etran iman-nasan, ənnur-nasan əzzənəfan a imos, ənnur n iyyan oƣar ənnur wa

hadan. ⁴² Zund əmmək di da a təga tanakra ən nəmməttan. Tağəssa təğaşşadat a za tənbelat, tətəwəsənkər-du ta wər nətəməttəy. ⁴³ Tağəssa ta dər inbal awedan, təbrâr; ta dər du-z-inkər təkna šihussay. Tağəssa ta dər inbal awedan, tərkam; ta dər du-z-itəwəsənkər təla tarna. ⁴⁴ Inbal-in əd təğəssa ta n əddənət, itəwəsənkər-du əd təğəssa ta iha Infas wa Zəddigan. Da tu-təlla təğəssa ta n əddənət, wədi ta n Infas wa Zəddigan da təll-ay. ⁴⁵ Adi a fəl ənnan Əlkəttaban: «*Adəm a d-azzaran y aytedan s əxluk, imal-tu iddâr,*» mišan Adəm wa n əşšin s ənta wa ilkaman, a t-imosan Əlməsix, infas a imos, ihakkin təməddurt. ⁴⁶ Wərgex wa imosan infas a d-azzaran, kalar wa imosan taxlək n əddənət təddârat a d-azzaran, dəffər-əs a d-osa wa imosan infas. ⁴⁷ Awedan wa d-azzaran, əgodrar a dağ iga, igmad-du amađal; awedan wa n əşšin, ənta ijənnawan a d-igmad. ⁴⁸ Awedan wa igan dağ əgodrar, awa imos, ənta a əmosan aytedan win əganen dağ əgodrar; wa d-igmadan ijənnawan, ənta da, awa imos, ənta a əmosan aytedan win jənnawan. ⁴⁹ Amaran tulat ta nəga d awedan wa igan dağ əgodrar, ənta a za nagu əd wa d-igmadan ijənnawan.

⁵⁰ Imədrayan-in, a dawan-gannağ, awa igan dağ şan d əzni, wər z'ilu adagar dağ Tağmar ta n Məşşina, wala değ ilu awa iğaşşadan adagar dağ awa wər nəğəşşəd. ⁵¹ Səsəmat, a dawan-əməlağ əssir: Wər dana-z-iba ketnana, mišan dər iga awen da, ketnana as za nətəwəsəmməttəy, ⁵² fəl arat n amazay, fəl ellaf ən şat, çur anasay wa ilkaman n asak. Fəlas ad itəwənsəğ asak, təzzar təwəsənkəran-du nəmməttan əd təğəswen wər za nələs ayşud, nakkanay değ nətəwəsəmməttəy. ⁵³ Fəlas tağəssa ta təğaşşadat, əşşil ad təggəz ta wər nəğəşşəd edag-net; ta tətamattit değ əşşil ad təggəz ta wər nətəməttit edag-net. ⁵⁴ As təggəz təğəssa ta wər nəğəşşəd edag ən ta təğaşşadat, təggəz değ təğəssa ta wər nətəməttit edag ən ta tətamattet, əddi amaran ad z'andu awa ənnan Əlkəttaban as ənnan: «*Tamattant tətəlmaz, tətawarna, ab'as tu-təlla.*» ⁵⁵ «*Ya tamattant, ma təga tarna-nam? Ma iga endal-nam, was təddâgay aytedan tənəqqaq-qan?*» ⁵⁶ Abakkad a imosan endal ən tamattant, abakkad amaran əşşəriya wa n Əttawret a imosan assahat-net. ⁵⁷ Mišan agoda i Məşşina a danağ-isasarnin abakkad əs tarrayt n Əməli-nana Ƴaysa Əlməsix.

⁵⁸ Dağ adi, imədrayan-in əknex tara, zəzzəwətat dağ əzəgzan-nawan, tazzakkem dağ-as s assahat, ad tətəggim faw s igət əşşəğəl olağan wa tətəggim y Əməli, id təssânam as, əşşəğəl isohen wa tətəggim y Əməli wər ibbənnan.

Awa d-izdaran dağ şirawt ta

16

Şirgiten d əşşərədan wiyad n Əlkənisat

Şirgiten y Əlkənisat ta n Yerusalam

¹ Dağ batu ta təqqalat şirgiten şin tawagginen i mizdagan win Yerusalam, agat kawanay da, arat was omaray Əlkənisaten şin akal wa n Galatəya. ² Ekkulluk n əzəl wa azzaran dağ əssuk, akkiyyan dağ-wan idkâl dağ awa sər-əs d-iggazan arat was ifrag, ixbər-tu har kawan-in-asa, fəl ad wər iqqəl əşidəw-nawan şirgiten y assa-nin. ³ As kawan-in-oseğ, ad akfa aytedan-nawan win təsannafranam şira a fəl iktâb as aytedan-in a mosan, təzzar əssukaq-qan Yerusalam ewâyan şirgiten-nawan. ⁴ Kud değ itawanay âs ihôr ad agla nak iman-in, wədi a dər-i idawan.

Işikilan win d-əzaynen

⁵ Kundaba əmməray akal wa n Masedonəya as kawan-in-z-assa, fəlas ad ərzəga akal wa n Masedonəya. ⁶ Iha mijas a çur-wan agay adan, mijas değ tagrəst ketnet as çur-wan tat-z-əkkəsəğ, fəl a di-tagim allawtan kawanay iman-nawan s akal was kawan-z-əgməda. ⁷ Tidət as wər areğ a kawan-in-asa əmərədda, agay-awan-in

assa daḡ əzzikke; fəlas əgeḡ attama n ad ahaga ḡur-wan kud ikf-i Əməli turagat. ⁸ Əmərədda, ad aqqamaḡ daḡ əḡrəm wa n Efez har di daḡ-as d-awəd amud wa n Fantəkawt. ⁹ Fəlas tənnolam-i daḡ-as tarrayt zəwwərat n əššəḡəl, kuddeḡ as əggətan zənga win wər nəra awen.

¹⁰ Amaran as kawan-in-osa Timotay tabəzam-t-in əs man-nawan, a tu-wər-iməl arat as tu-təha tasa-net, fəlas əššəḡəl y Əməli a iha ənta da, šilat-in. ¹¹ Daḡ adi a tu-wər-alku awedan waliyyan; agiwat-as allawtan fəl a sər-i d-agu əšikəl olāḡan fəlas əqqâlāḡ-as ənta əd mədrayan-nana win dər iddew. ¹² Daḡ batu ta təqqalat amadrayan-nana Abbolos: əgmâya daḡ-as wəllen a kawan-in-asu iddew əd mədrayan-nana win di; igmâd aššak âs wər ila ənnəyat n adi əmərədda. Mišan as igrav s adi, a kawan-in-asu.

Ənnəsixatan d assalaman

Ənnəsixatan win əlkamnen

¹³ Agat ənnəyat, təzəzzəwem daḡ əzəḡzan-nawan əs ḡaysa Əlməsix, təqqələm aytedan wər təha tasa, təssuhem. ¹⁴ Arat kul wa tətəggim, agiwat-tu əs man taha tara.

¹⁵ Əhân-kawan salan n aytedan n ahan wa n Əstefanos; təssânam as əntanay a əzzarnen s əzəḡzan əs ḡaysa Əlməsix daḡ akal wa n Akayya, əkkâsan deḡ iman-nasan s əššəḡəl i mizdagan. Onsayaq-qawan za imədrayan-in, ¹⁶ a dasan-tabbardagam, əntanay d id t-illa awedan ihân əššəḡəl wa əhan, əs gəlleyat. ¹⁷ Isidawat-i assa wa di-d-iga Əstefanos əd Fortunatos d Axaykos. Assa-nasan idbaḡ-in təxərəbbet ta sər-i d-eway iba n əšinəy-nawan. ¹⁸ Fəlas issəsmad iman-in, issəsmad deḡ win-nawan. Daḡ adi, taḡet masnat fəl meddan zun win di, təwəsəḡməran.

Assalaman win əlkamnen

¹⁹ Əhulan-kawan-in nalkiman win Əlkənisaten šin akal wa n Asəya. Ihul-kawan-in deḡ Akilas əd Friska əd nalkiman win Əlkənisat ta tətamanayət daḡ ahan-nasan. Əhulan-kawan-in wəllen wəllen fəl əddəlil ən tassaḡ ta nəga d Əməli ḡaysa. ²⁰ Əhulan-kawan-in mədrayan-nawan daḡ əddin win əllanen da da ketnasan. Tinəməḡḡat assalam zəddigan.

²¹ Təhult awa a din-təḡmadat əfus wa-nin nak Buləs. ²² Məššina təḡânaḡ awedan wa wər nəra Əməli ḡaysa! Marana ta, almaḡna: Ya Əməli-nana asa-du! ²³ Əgmâya daḡ Məššina a kawan-ikfan arraxmat n Əməli ḡaysa. ²⁴ Əreq-qawan ketnawan fəl əddəlil ən tassaḡ ta nəga d Əlməsix ḡaysa.

Širawt ta n sanatat iktab Buləs i Kəl-Korent İsənti

Təhult

¹ Awa nak Buləs, imosan əs tərəddawt ən Məşşina anammazul n Elməsix Yaysa, nak d amadray-nana Timotay ənnânen əhulan-in İlkənisat ən Məşşina ta təhat ayrəm ən Korent əd mizdagan kul win əxsarnen dağ akal n Akayya ketnet. ² Əgmâya dağ Məşşina di n Abba-nana d Əməli Yaysa Elməsix a kawan-ikfan arraxmat d alxer.

Igodan d ənnəsixatan

³ Təmmal i Məşşina di n Abba n Əməli-nana Yaysa Elməsix, imosan Abba wa n əməhhenən, imos dey Məşşina di isasmadan iwallan kul, ⁴ s ənta a isasmadan iwallan-nana a təqqal təssust ta fall-ana təgat, fəl a danağ-issəfrəg əs tarrayt n əssəsməd wa itag iwallan-nana, ad nəssəsməd nakkanay da, iwallan n aytedan win fəl təga təssust a təqqal. ⁵ Id igət wa iga alyazab wa nənnay fəl əddəlil ən tassağ-nana d Elməsix, ənta a təga təsasmit ən wallan ta danağ-ihakku Elməsix. ⁶ Kud ətəwəsas wa nəga, təsasmit d efsan-nawan a imos, kud dey təsasmit ən wallan a danağ-ikfa Məşşina, wədi kawanay as tat-ikfa. Təsasmit tēdi təkfiwan ad təzməram y alyazab wa nətaggu nakkanay da. ⁷ Wər kala ad nəga ašşak dağ attama wa dağwan nəga, fəlas nəssân as, da dər-na tədrawam alyazab, təsasmit ta itaggu Məşşina iwallan-nana da a dər-na tat-tədrawam.

⁸ Amaran imədrayan-in, wər nara a kawan-wər-əhen salan ən təssust ta fall-ana təgat dağ akal n Asəya. Təgrâw-ana dağ-as təssust togarat awas nəfrag a dər-əs nəzəzzəydər, fadda har nəkkas attama ən man-nana. ⁹ Tidət as imâl xur-nağ as, wər dana-t-illa ar tamattant. Arat wa, igrâw-ana fəl ad nəssən as wərge iman-nana, kalar Məşşina s ənta a d-isankaran inəmməttan, ças, as ihor a dağ-as nagu attama-nana. ¹⁰ Ənta a dana-d-ikkasan dağ tazak labasat ən tamattant ta nəggaz den, ənta a dana-du-z-ikkəsan dağ adag şilat ən wen. Nəgâ dey attama n as, i tu-nəggaz, a dana-d-ikkəs. ¹¹ Amaran kawanay tēdhâlam-ana əs mansay wa dana-tətaggim Məşşina; adi a fəlas, arraxmat ta za nəgrəw əs təwatriwen n aytedan aggotnen, a du-tawəy s aytedan aggotnen wiyyad ad əggudəyan i Məşşina arat wa danağ-iga.

Buləs isasagru işikilan-net

Buləs isammattay ənnizam ən şikilan-net

¹² Amaran ənta da abarag-nana: wər nəssen fəl ark arat dağ əddənet ta da as dana-z-əbəzan man-nana, wəllen dağ tassağ ta dər-wan nəga. Wər nəga əmazal əs wərgex əwəl iyyanda zəddigan wa ihakku Məşşina as tu-nəga. Arraxmat ən Məşşina a danağ-təssəfragat awen, wərgex a d-ihân əs masnat n aggadəm. ¹³⁻¹⁴ Fəlas şira şin dawan-in-nəkattab, wər dağ-asnat nəssoka arat waliyyan wər nəmos wədi da təxarrim əddi, təgrâm-tu. Kud dana-wər-təgem əgərri olâğan əmərədda, da əgəx attama-nin dağ ad tawədam a dana-tagim əgərri ikmâlan, tagim fəl əddəlil-nana abarag wa danağ-isassaga wa-nawan, əzəl wa du-z-asu Əməli[-nana] Yaysa.

¹⁵ İkus wa əgeç ašşak dağ adi, a fəl otasağ a sər-wan in-izara, fəl ad təgrəwam dağ assa-nin tənfa təmosat ənətfus; ¹⁶ akəyaq-qawan s akal wa n Masedonəya. As d-əgmada Masedonəya a kawan-d-əqqəla, tagim-i allawtan y əşikəl wa z'aga s akal wa n Yahudəyya. ¹⁷ Awak gəlleyat a wər əgeç dağ attas wa əgeç a kawan-in-asa? Məç ak aratan win as areç igi-nasan, wər əmosan ar deranan n aggadəm, igannin «ayew» as iga amazay ad annu «kala»? ¹⁸ İggəyyat Məşşina as, awa dawan-nəna,

wər imos «ayew» irtâyan əd «kala» ¹⁹ Fəlas Ƴaysa Əlməsix di n Barar ən Məşşina was dawan-nəga isalan-net, nak əd Silfanus əd Timotay, wər isərtəy «ayew» əd «kala». Kalar «ayew» Ƴas a inna Məşşina əs tarrayt-net. ²⁰ AlmaƳna n awen as arkawalan ən Məşşina ketnasan «ayew» a əmosan daƳ Əlməsix, adi da deƳ a fəl nəmmâl adkul ən Məşşina əs tənna ta nətaggu «Amin» əs tarrayt ən Ƴaysa Əlməsix. ²¹ Amaran, tartəyt ta nəga d Əlməsix, nakkanay dər-wan, Məşşina iman-net a tat-isassahen, isannafran-ana, ²² issəwar-anax deƳ ejwal-net alwaq wa d-iga Infas wa Zəddigan daƳ wallan-nana, imos awen təsukəst n aşşak daƳ arozan win as ilkam a danaq-qan-akfu.

²³ Məşşina a daƳ-i z'ibəzan iman, əgeq-qu təgəyya as, wər din-əqqela aƳrəm ən Korent ar fəl as wər areƳ a dawan-əşşita aƳşud ən man; ²⁴ amaran areƳ ad təssənam as wər nəgəmməy d a kawan-nəşəhhəşşəl arət waliyyan daƳ batu ta n əzəgzan-nawan, kalar ənəməşəƳal Ƴas a dər-wan nəga daƳ arət wa kawan-z-isəffəliwəsan, fəlas əzəgzan-nawan issohat.

2

¹ Adi a fəl əgeƳ tanat təmosat as ənneƳ: wər z'ələsaƳ aƳşud ən man-nawan s iyyan assa. ² Fəlas, nak as əƳşada iman-nawan, awak ma di-z-isəddəwen, ar kawanay win as əƳşadaƳ iman? ³ Adi a d-ewayan as a dawan-in-əktaba şirawt fəlas wər areƳ a kawan-in-asa təƳşədam iman-in, kawanay win as ihor a di-təsəffəliwəsam; fəlas əkkāsaƳ aşşak as, arət wa di-isaffalawasan, kawanay da isifalawas-kawan ketnawan. ⁴ As dawan-in-əktaƳaƳ şirawt tədi, təga fall-i təssust labasat, isās-i əwəl-in, əffāyan daƳ-i məttawan. Amaran wər dawan-tat-in-əktaƳaƳ fəl ad əƳşəda i man-nawan, kalar fəl ad təssənam daƳ təzzəwwərt ən tara ta dawan-əgeƳ.

Təsureft i nadlaman

⁵ Amaran kud iyyan daƳ-wan a d-ewayan aƳşud ən man daƳ anamod iyyan, wərgəƳ nak as iƳşad iman, kalar ketnawan as dawan-tan-iƳşad, made z'anna fəl təksəda ən təsəssikəyt iƳşad-tan y arət daƳ-wan. ⁶ Awedan wədi, igd-ās əsənnərgəƳm wa das-təga taşşam-nawan. ⁷ Əmərədda ofa a das-təssurəfam, təssəsmadam əwəl-net, fəl a tu-wər-iƳləb əƳşud ən man, ihlək. ⁸ DaƳ adi, onsāyaq-qawan a tu-tassaknim tara ta das-təgam. ⁹ Id iyyan əddəlil wa fəl dawan-in-əktaba şirawt tədi, tara a əgeƳ a kawan-ajjarraba əssənax kud təlkāmam y arət kul wa dawan-ənneƳ, wala. ¹⁰ Amaran awedan kul was təssorəfam, nak da, əssorəfaƳ-as; arət deƳ wa əssorəfa den, kud ənta ill-ay fadda a əssorəfaƳ y awedan, a das-əssurəfaƳ arət kul was kala a di-t-iga fəl əddəlil-nawan, dat Əlməsix, ¹¹ fəl ad wər igrəw Aşşaytan tarrayt waliyyat n a danaƳ-akkarras, id wər danaƳ-ədreƳnat təmərkas-net.

Buləs daƳ aƳrəm ən Trowas

¹² Alwaq wa din-oseƳ aƳrəm n Trowas y a daƳ-as əxtəƳaƳ isalan n Əlinjil n Əlməsix, or-i daƳ-as Əməli tarrayt n adi, ¹³ mişan harkid awen, wər tənəsa ənnəyat-in, fəlas wər daƳ-as əgrewaƳ amadrəy-nin Titəs. Adi a fəl namagga əd nalkiman win əhanen Trowas şiwatriwen, əgmadaq-qan s akal ən Masedonəya.

Buləs isasagru əşşəƳəl-net wa n arkawal ən tassaƳ wa aynayan

Buləs isasagru əşşəƳəl-net

Tarna ta igrəw Əlməsix

¹⁴ Nətaggu igodan i Məşşina a danaƳ-itaggin faw y əddənət əsəkni a itaggu əmənokəl ikefəlan a d-oxâ. Arət wen ig-anaq-qu fəl əddəlil ən tassaƳ-nana d Əlməsix isâknin agaraw-net tarna fəl Iblis. Ənta deƳ a iziwəziwizan əs tarrayt-nana daƳ adag kul ađu izodan wa təmos masnat n Əlməsix. ¹⁵ Id ađu izodan a nəmos əs Məşşina,

a sər-əs in-igmâdan Ëlməsix. Adu wa, iwizawaz daɣ aytedan win əhanen tarrayt ta n əlɣillas əd win əhanen tarrayt ta n əhluk. ¹⁶ Aytedan za win əhanen tarrayt ta n əhluk, nəmos-asan adu ən tamattant, a d-itawayan sər-san tamattant. Aytedan amaran win hadatnen, nəmos-asan adu ən təməddurt, tan-issodaran. Awak ma ifragan igi n əššəɣəl ogdân d awa? ¹⁷ Nakkanay, wər nola d aytedan aggotnen, əganen jola daɣ awal ən Məššina. Kalar daɣ tassaɣ ta nəga d Ëlməsix nəmmâl dat Məššina awal-net s əwəl iyyanda, amaran nəssân as Məššina a dana-izammazalan.

3

Buləs, amaššaxal a imos n arkawal ən tassaɣ wa aynayan

¹ Awak eməlan wiyyad a nətaggu iman-nana? Məɣ ak addararat a nəga əs šira a danaɣ-z-akfinen ɣur-wan udəm, madeɣ nəddirar s a dana-tanat-tagim, awa taggin aytedan wiyyad? ² Kala kalar kawanay iman-nawan as təmosam širawt-nana, təktâbat daɣ wallan-nana, issân awedan kul, iɣr-et deɣ awedan kul. ³ Təssîknam deɣ tišit-nawan širawt n Ëlməsix, təktâbat s əššəɣəl-nana, wər nəkteb əs taddawat, kalar Infas ən Məššina di iddaran əs təktab; wər nəkteb fəl əsellum ən təhunt, kalar iwallan a daɣ təktab. ⁴ Aššaddat n attama wa nəga daɣ Məššina əs tarrayt n Ëlməsix a fəl nənneɣ adi. ⁵ Wərgəɣ aššaddat n as ill-ay arat waliyyan as nəfrâg igi-net gar-ena əd man-nana, kalar Məššina a danaɣ-ihakkin fərregat n igi-net. ⁶ Ənta deɣ a danaɣ-issəfragan ad nəqqəl imaššaxalan n arkawal ən tassaɣ ta taynayət, wər nəmos əlqanun iktâban fəl səlluman, kalar tassaɣ a imos iktâb Infas wa Zəddigan daɣ wallan n aytedan; fəlas əlqanun wa irəwan iktâban fəl səlluman, tamattant a d-itaway s aytedan, amaran tassaɣ ta iktab Infas wa Zəddigan daɣ əwəl, təməddurt a sər-san du-tətaway.

Buləs imâl dad imməzray arkawal ən tassaɣ wa irəwan d arkawal ən tassaɣ wa aynayan

⁷ Ənnizam n əlqanun amaran wa d-itawayan tamattant s aytedan, isəlluman ən təhun a fəl iktab. Izizzabbat-t-idu Məššina fəl Musa daɣ ənnur, s awa iga daɣ assahat, indar i Kəl-İsrayil ad əswədan daɣ udəm-net. Ənnur en da za arat ilakkayan a imos. ⁸ Əngəm-in za ənnizam wa d-ifalan Infas wa Zəddigan, iktaban daɣ wallan n aytedan, iššaɣal daɣ-san! Manəmmək as wər z'agər wen tanaya? ⁹ Fəlas kud ənnizam n əlqanun wa d-itawayan s aytedan attadib, ila tanaya, wədi, ma dər za tagdu šigrat ən tanaya ta tu-z-əgu ənnizam ən tarrayt ta taynayət wa d-itawayan s aytedan taqqat? ¹⁰ İqqal as, arat wanad iknan təla ən tanaya, ab'as ila tanaya əməərədda fəl awa das-təga tarrayt ta taynayət daɣ šigrat ən tənaya. ¹¹ Fəlas kud arat ilakkayan osa-du əs tanaya, adi za ma dər za tagdu šigrat ta tu-z-əgu wa t-illan faw tanaya!

¹² Dad nəga attama ogdân d awen, wədi nəhal ad nammazal awa nəra ši wala tasa. ¹³ Nakkanay wər nəga awa iga ənnəbi Musa, issəlsan udəm-net afər fəl a daɣ-as wər əswədan Kəl-İsrayil iket di ad t-igammad ənnur wa imalawlawan daɣ udəm-net. ¹⁴ Mišan tawasaxaran wallan-nasan y awen, id har azalada, as ɣarrin Ëlkəttaban win arkawal ən tassaɣ wa irəwan, šilat n as harwada ill-ay, igdal-asan əgərri n Ëlkəttaban, id afər wen, tassaɣ d Ëlməsix ɣas a ifragan ikus-net. ¹⁵ Awalla, har azalada, ɣarrin əlkəttaban n ənnəbi Musa, mišan wər tan-əgren, fəlas afər wen a ilsan iwallan-nasan. ¹⁶ Tətubt ɣas s Əməli a itakkasan afər wen. ¹⁷ Amaran Əməli, Infas a imos. Awedan deɣ wa iggaz Infas n Əməli, wədi illəllat. ¹⁸ Nakkanay ketnana win as itawakkas əfər wen fəl udmawan-nana, nəswâd daɣ tanaya n Əməli šilan n as iswad awedan daɣ šišet. İsamattay-ana Əməli, s ənta Infas a imos, s əššəɣəl wa itaggu daɣ wallan-nana, iššaɣal-ana əd man-net, tətittəy daɣ-na tanaya-net.

4

Tidət a day nəsusin aytedan

¹ Adi fəlas, dad zamas as ihanattat-ana Məşşina ig-ana day əşşəxəl ən tarrayt ta taynayət, wədi wər za nəqqəl dəffər-na; ² nakkanay nəmmizzay d ark mazalan sikərukidnen win tamazalan aytedan day əssir, wər nəgəmməy əd təkərras n awedan waliyyan, wala nəsafrax awal ən Məşşina. Kalar emel wa nətaggu tidət əs təməwit təzdarat, nəgəmmay sər-əs əsəfləs ən man-nana y əkkulluk n awedan dat Məşşina. ³ Aytedan win əhanen tarrayt n əhluk xas as ilsa arat isalan n Əlinjil win nətaggu, wər tan-əzzəgzanan. ⁴ Wər əzzəgzanan fəlas Iblis wa n əməli n əddənət ta, a tan-isaddarxalan; igdal-asan anay n ənnur wa d-igammadan Əlinjil, ənnur wa isaknin tanaya n Əlməsix imosan şaşşelan ən Məşşina.

⁵ Nakkanay isalan win nəmmâl, wər day-san nəmmil iman-nana, kalar emel a nətaggu as Yaysa Əlməsix a imosan Əməli, nəmmâl dəx as eklan-nawan a nəmos fəl əddəlil ən Yaysa Əlməsix. ⁶ Id Məşşina a innan: «*Imələwləwet ənnur day şiyay*», ənta iman-net a imalawlawan day wallan-nana, ikf-anax ənnur, a t-imosan masnat ən tanaya ən Məşşina ta təmələwlawat day udəm ən [Yaysa] Əlməsix.

*Əşşəxəl ən Buləs: Təməddurt ən Yaysa əd təmattant-net**Anammazul Buləs aggadəm a imos irkaman zun aytedan kul*

⁷ Mişan ərrəzəx wa, imosan masnat ən tanaya ən Məşşina, ikassan ən talaq, as nakkanay a tan-imosan, a daq-qu neway, fəl ad itəwəssən as, tarna wər nəla əddukad ta, şin Məşşina, wərgex şin-nana. ⁸ Wər t-illa day ətəwəsas wər nətawagga, mişan wər kala nətawaxalab; əqqanan xafawan-nana, mişan wər nətəkkəs attama. ⁹ Faw nətiwadgaz mişan wər danax-oyya Məşşina əd man-nana; nətawagadlu mişan nənakkar-du. ¹⁰ Fawda nəha tazak n igi ən tamattant şilat ən ta iga Yaysa, fəl ad tətəwənəy təməddurt-net ənta da day təxəswen-nana. ¹¹ Fəlas nakkanay win əddarnen, faw nəha tazak ən tamattant fəl əddəlil ən Yaysa, fəl ad tətəwənəy təməddurt ən Yaysa s əllux day təxəswen-nana əmosnen arat itamattin. ¹² Adi a fəl nəha faw tazak ən tamattant, fəl ad təggəzam kawanay tarrayt n agaraw ən təməddurt ta təxlalat.

Awa d-ixsalan day təməddurt n aytedan win Kəl-Korent

¹³ Əzəgzan-nana ola əd wa ittəmalan day Əlkəttaban as ənnan: «*Əzzigzanax! Adi a fəl əşşəwalax.*» Nakkanay da əzəgzan wen da a nəga, adi a fəl nəşşəwal nakkanay da. ¹⁴ Id nəssân as, Məşşina a d-issənkarən Əməli Yaysa day tamattant, a dana-d-issənkarə nakkanay da nəddew əd Yaysa, təzzar issəbdəd-ana dat-əs nakkanay dərwan. ¹⁵ Fəlas awa ketnet tənfa-nawan a fəl tu-nətaggu, fəl a din-tawəd arraxmat n Məşşina aytedan aggotnen, igatan godan i Məşşina, fəl zazwar-net.

*Ad wər nəkkəs attama gər za nətaxazzab wala natamattat**Tanaya təxlalat ta du-təzayat*

¹⁶ Adi a fəl wər za nəqqəl dəffər-na. Kud imos as şixəswen-nana ta n əmindi a əhanat, da iwallan-nana əntanay akk əzəl ətiwaşəşaynayan. ¹⁷ Fəlas təssust fəsusat wər za nihag ta nənnay əmərədda, a dana-za-takfit adkul iknan təzzəwwert ixlâlan. ¹⁸ Nakkanay wər nəswəd day aratan win tawanaynen, kalar win əhanen ətənkul a day nəswəd; fəlas awa itawahannayan, wər itihag; as iga awen, awa ihan ətənkul, ənta ixlâl.

5

Nəsikalal iket di ad nəha əddənət

¹ Nəssân as ihəktan win nəha əmərədda, almayna şixəswen-nana, ad əhləkan, amaran isimatag-ana Məşşina daɣ jənnawan şixəzmen əylələn, s ənta iman-net a tanat-ikrasan wərgəɣ ifassan n aytedan. ² Amaran ihəktan win nəha əmərədda, osaynat fall-anat təhənəffa, nəsidaran wəllen ad nagu i nan-nana win jənnawan iguz a itag awedan i səlsa aynaynen fəl wiyyad waşşarnen. ³ As iga adi, ad nəstər, wər za nəqqəl iman ɣas wər nəha taɣəssa. ⁴ Tidət as ihəktan win nəha əmərədda əmosan-ana şilat n əzuk zəwwəran a danaɣ-isihənəffen, eges wərgəɣ fəl aşşaddat ən tara n əməzzəy dər-san, kalar fəl aşşaddat ən tara n iguz ən təɣəswen-nana şin jənnawan, fəl ad təlməz təɣəssa ta təɣlalət, ta wər nəɣləl. ⁵ Amaran Məşşina iman-net a danaɣ-isammatagan awen, isattadd-anaɣ əs təhakkay ta danaɣ-iga Infas-net as, ad agu awen.

Nəkna igi n attama id tara a nəga gərrezat y Əməli

⁶ Daɣ adi faw təkna ənnəyat-nana id nəssân as, iket təmos taɣəssa ta ehan-nana, nəggug Əməli. ⁷ Fəlas awa nəzzəgzan as nəlkam, wərgəɣ awa nəhannay əs şittawen-nana. ⁸ Awalla adi a fəl ənnəy təkna ənnəyat-nana, mişan nəsof wəllen ad nəgməd taɣəssa ta nəha əmərədda s ahan-nana wa ɣur Əməli. ⁹ Awen da a fəlas, gər za nəha taɣəssa-nana wala deɣ wər tat-nəha, wər nədgez ar daɣ a das-nəgrəz. ¹⁰ Fəlas kundaba nəbdad ketnana dat Əlməsix, işrəɣ-ana. Akkiyyan daɣ-na ad igrəw awa dər ahoran mazalan win iga harwa iha taɣəssa-net, gər za win olaynen wala win wər noleɣ.

İmaşşaxalan ən Məşşina a nəmos, nəmos deɣ almawakkilan-net

Əşşəɣəl wa n igi n alxer gar-ena

¹¹ Daɣ adi, dad zamas nəssân awa təmos təksəda n Əməli, nəgammay daɣ aytedan a sər-əs əzzəgzanan əs gəlleyat. Məşşina issân wəllen awa nəmos, amaran əgeɣ attama n as kawanay da təssânam wəllen daɣ wallan-nawan awa nəmos. ¹² Wərgəɣ təmmal a nəllas iman-nana ɣur-wan, kalar əddəlil ɣas a kawan-nəhakku n igi ən baragan fall-ana, fəl ad tilem a tənnam y aytedan win tagginen ibaragan fəl awa iwaran azzahir, imos sokni wərgəɣ təla n əwəl zəddigan dat Məşşina. ¹³ Kud a itawannan tayttay-nana a dana-təgmədət, wədi saɣmar ən Məşşina a fəl nəga adi; kud deɣ wər dana-təgməd, wədi tənfa-nawan a imos. ¹⁴ Fəlas tara ta danaɣ-iga Əlməsix a tənnodat daɣ arat kul wa nətaggu. Id nəzzigzan as awedan iyyanda, a t-imosan Əlməsix, a immutan daɣ adag n aytedan kul; daɣ adi aytedan kul əddewan dər-əs daɣ tamattant ta iga. ¹⁵ Aba-tu daɣ adag n awedan kul, əgrawan aytedan təməddurt taynayət s əssəbab-net. Igâ awen fəl ad ammazayan əd təməddurt daɣ wər əlkəman ar i tara ən man-nasan. Kalar ad əlkəman y Əlməsix a immutan fəl əddəlil-nasan, itawasankar-du deɣ daɣ tamattant. ¹⁶ Adi a fəlas əmərədda ab'as nəga daɣ awedan waliyyan iduf wa daɣ-as əgan aytedan; kuddeɣ as kala ad nəttaf Əlməsix daɣ adag wa daɣ t-əttafan aytedan, mişan əmərədda wər tu-nəttef daɣ adag wen. ¹⁷ Daɣ adi awedan wa ilan tassaɣ d Əlməsix, iqqal taxlək taynayət. Ab'as imos awedan was kala a t-imos, fəlas təməddurt tas kala tat-iga iɣrad dər-əs; təggaz iyyat taynâyat edag-net. ¹⁸ Amaran awen kul Məşşina a t-igan, ənta a danaɣ-iknan əd man-net əs tarrayt n Əlməsix, ikf-ana deɣ nakkanay əşşəɣəl imosan igi n alxer, ¹⁹ imosan as: Məşşina eway-du alxer gar-es d əddənet ketnet əs tarrayt n Əlməsix, ab'as fall-asan ittaf ibakkadan-nasan. Əntanay da da isalan n igi n alxer win as danaɣ-inna a tan-nagu y aytedan. ²⁰ Daɣ adi nakkanay almawakkilan n Əlməsix a nəmos, id Məşşina iman-net as kawan-iɣarru əs tarrayt-nana. Nonsay-kawan fəl udəm n Əlməsix ad təkna əd Məşşina! ²¹ Əlməsix wər t-iwer abakkad waliyyan,

mišan issəwar-tu Məššina fəl əddəlil-nana ibakkadan-nana, fəl a sər-na du-tawəy tassaq-nana dər-əs taqqat dat Məššina.

6

¹ Dağ adi, dad imos as nəha əššəxəl wa dağ iha Məššina, nəgmây dağ-wan ad wər təsəbbənnanam arraxmat ən Məššina ta təgrawam da. ² Id Məššina iman-net as inna: «*As d-ewad alwaq wa dağ kawan-z-akfa arraxmat-in, ad əqbəla šiwatriwen-nawan, as d-ewad alwaq wa dağ kawan-z-əxləsağ, a dawan-ilalağ.*» Ənəyat za alwaq wədi, ewad-du, ənta da da deş əzəl wa n əlyillas-nawan.

Awa immozal Buləs əd tayaray ta iga Kəl-Korent

³ Wər nətəggu arat waliyyan as z'iqqəlan təsənkəft y awedan waliyyan, fəl ad wər itəwənəy lahan waliyyan dağ əššəxəl-nana. ⁴ Kalar arat kul wa nətəggu, nəsaknu dağ-as as imašşaxalan ən Məššina dağ a nəmos əs zəmmerat tagget ta nəga i təssust, d ašşawaşa əd təməxutar, ⁵ əd təwit, əd kasaw. Nəzmər deş dağ alyazab wa nəga dağ tənəjarwayen šin fall-ana əganen, d əššəxəl labasan wa nətəggu, d-iba n agaraw s etəs əd gələk. ⁶ Nəsaknu tišit-nana imašşaxalan ən Məššina əs man zaddoggen, əd masnat ta nəgraw, əd təzaydart ta dana-təhat, əd man mallolnen. Nəsakn-et deş əs tədhəlt ta danağ-iga Infas wa Zəddigan əd tara təgât s əwəl iyyanda ta dana-təhat. ⁷ Nəsaknu tišit-nana imašşaxalan ən Məššina s awal imosan tidət wa nəmmâl, əd fərregat ta danağ-ikfa Məššina. Nəsaknu tišit-nana imašşaxalan ən Məššina əs tətəzoli n əməgər ta n taqqat tas za nammagar naggəz iman-nana. ⁸ Gər za nətawasaxmar wala nətawalka; gər za nətawarbad wala nətətamal, nakkanay tidət a nəmmâl, kuddeş as itiwattaf as əsəxrək a nətəgg aytedan. ⁹ Nətawazday wəllen, mišan šilat n as wər nətawazday. Nəššigga dağ tamattant, mišan harwada nəddâr. Nətawaddab mišan wər nətəwənşu kərəz. ¹⁰ Əşşâdan man-nana mišan wər danağ-igdel awen as faw nəfilawas. Wər nəla wala mišan nəsağgargas aytedan aggotnen; wər nəla wala, ənta arat kul i-nana.

¹¹ Ya işəqqaxan-nana win Kəl-Korent, awa ihan iman-nana a dawan-tu-nəmmâl s əwəl iyyanda, amaran nolâm-awan iwallan-nana. ¹² Nakkanay wər dawan-nəxfel iwallan-nana, kawanay amaran təxfalam-ana win-nawan. ¹³ A dawan-anna awa z'annay i bararan-in: Aləmat-ana iwallan-nawan, zun awa dawan-nəga.

Ammar n aytedan s ad izdagan

¹⁴ Ad wər tətasağam d aytedan win wər nəzzəgzan s Elməsix. Manəmmək as z'asəş əllux d əšşur, wala asəş ənnur əd šiyyay? ¹⁵ Ma imos arat wa fəl z'inəmənnək Elməsix d Iblis? Ma idraw awedan izzigzanan s Elməsix d iyyan sər-əs wər nəzzəgzan? ¹⁶ Ehan n Əlyibada ən Məššina deş ma təmos tərəddawt ta z'agu d əssənəman? Fəlas nakkanay a əmosnen Ehan ən Məššina di iddaran, id Məššina a innan: «*Ad əxsəra dağ aytedan-in, idawa dər-san; əqqələş Əməli-nasan, əntanay deş əqqəlan tamattay-nin.*» ¹⁷ Awen dağ a fəl inna Əməli: «*Əgmədat-du aytedan win wər nəzzəgzan, tammazzayam dər-san, ad wər tədəsam a immidasan, əddi a kawan-əqbəla.*» ¹⁸ A dawan-əqqələş abba, təqqəlam bararan-in əd təbararen-in, adi a inna Məššina di n əməli ən tarna kul.»

7

¹ Dağ adi, imaran-in, dad zamas tawaggan-ana arkawalan win, zəzdəgat-ana iman-nana dağ arat kul wa isamadasan tağəssa d ənnəyat. Nəget tazdak təkmlat, iga awen əs təksəda ən Məššina.

Tədəwit ən Buləs şur tətubt ən Kəl-Korent

² Aləmat-ana iwallan-nawan, nakkanay wər kala ad nəga təkma y awedan waliyyan, wala nəxşâd-as arat wala deḡ nətša alxaq-net. ³ Wər ənney adi fəl a kawan-əssəwəra lahan waliyyan fəlas əmâlay-awan dat adi as nəsinahal-kawan tara. Təməddurt wala tamattant wər za təkəs tara tēdi day wallan-nana. ⁴ Wər day-wan əgeḡ aššak waliyyan. Tagga abarag day batu-nawan. Day təssust kul ta nənay təkna talḡa-nawan təsasmit n əwəl-in, amaran təfalawist-in wər təla əddukad.

⁵ As du-nosa akal ən Masedonəya wər kala ad nəgraw əs təsanfawt, kalar nəbdâd day təməḡutar labasnen as wər t-illa a day wər əgenat. Tagganat tamazaḡen dəgma-nana, amaran təh-âna tasa. ⁶ Mišan Məššina di n ənəssesməd ən man n i s əḡşadan man-net, isasmad iman-nana s assa wa dana-d-iga Titəs. ⁷ Wərgəḡ assa-net ḡas a danax-olaman fəl man; kalar əkənni wa das-təgam iman, d as imâl-ana əsənnəhəl wa təgam tara n a di-tənəyam, əd təmagrizt ta təgam, d əddəḡuz wa təgam day awer n aḡanna-nin; adi, a iknan əsəffəliwəs ən man-in.

⁸ Ab'as əmməgraza širawt ta dawan-in-əktaba, kuddeḡ as idâs-i as əmmigrazay akatab wa dawan-tat-in-əgeḡ, fəlas əssânaḡ as təḡşâd iman-nawan, mišan ya aḡşud di wər ihog. ⁹ Fadda əmərədda isidawat-i as dawan-tat-in-əktabaḡ, wərgəḡ fəlas təḡşad iman-nawan, kalar fəlas aḡşud wa əgan man-nawan əddi, eway-du sər-wan tətubt day bakkadan-nawan. Əzzənəf n əḡşud ən man wədi day a ira Məššina y aytedan-net, day adi wər dawan-nəḡşed arat waliyyan. ¹⁰ Fəlas Məššina ifrâḡ a sər-na d-awəy aḡşud ən man fəl ad nutab day bakkadan-nana, awəy-du sər-na əḡyillas. Wər danax-ilkem ad nəmmigraz əzzənəf n əḡşud ən man wədi. Aḡşud ən man amaran wa sər-na du-teway əddənət wər d-itaway tətubt, təsəlkaḡt-net tamattant. ¹¹ Ənəyat iket n əsəbdəd wa kawan-iga əḡşud ən man wa ira Məššina. Əsəbdəd wen ənta a d-ewayan ḡəlleyat ta təgam, d əggaz wa təgam iman-nawan, d alham wa day-wan iga, əd tasa ta sər-wan d-eway, d əsəddiran wa təgam anay-nin, d əddəḡuz wa təgam day amazal n awa olaḡan, d əggay wa sər-wan d-iga tara n ad awwaddaban aytedan win tagganen təkma. Təssîknam day anamod kul as, wər təlem lahan waliyyan day talḡa tēdi.

¹² Day adi širawt ta dawan-in-əktabaḡ əddi, wər tat-in-əkṭeba fəl əddəlil n awedan wa igan arak amazal wala was itawagga; kalar əktâbaḡ-awan-tat-in fəl ad tətawasaknu ḡəlleyat ta təgam day batu-nana dat Məššina. ¹³ Iknâ adi iman-nana. Amaran əkənni wa əgan man-nana den, iwar-tu as, isidawat-ana wəllen anay wa nəga Titəs ikna təfalawist fəlas ketnawan as das-təknam iman. ¹⁴ Əgeḡ-as abarag fall-awan, təqqimam wər di-təzzəbazam təkarakit. Amaran wər kala a dawan-nənnā arat wər nəmos tidət, abarag deḡ wa nəga i Titəs, ənta da, iqqal tidət. ¹⁵ Ikn-iwan tara, wəllen as d-ikta əbərdəḡ wa təgam ketnawan y igi n awa inna əd saḡmar əggen wa tu-təssəknam. ¹⁶ Iket təfalawist əgeḡ-qat, fəlas əfrâḡaḡ a fall-awan saffalla day arat kul.

Širgiten əmosnen tadhəlt n əlməsixitan win əyrəm ən Yerusalam

8

Tadhəlt d igi ən tənfa y aytedan

¹ Imədrayan-in, nəra a dawan-nagu isalan n arraxmat ta iga Məššina y Əlkənīsaten šin əhanen akal ən Masedonəya. ² Təssust labasat ta tanat-təgrawat, d əlləqqəw labasan wa tanat-idgazan wər dasnat-igdel igi ən təfalawist s awa təga day təzzəwwərt, teway-du sər-əsnat igi ən təhək n əlləllu iknan təzzəwwərt. ³ Fəlas silakanax-awan as, arat wa əfragnat a əragnat, fadda awa əkfanat, oḡar awa əlanat, amaran əḡânat awen ḡar-əssanat əd man-nasnat. ⁴ Fadda mansay a day ədgâznat a

danax-əganat a tanat-nayyu əgrəwnat arraxmat n ad ədhəlnat imizdagan win əxrəm ən Yerusalam əntanay da. ⁵ Arat wa əganat, ogar was nəga attama-net, ad t-imosan as azzarnat tehakkay ən man-nasnat y Əməli, dəffər adi əkfanat-anax iman-nasnat, imos awen arat ira Məşşina. ⁶ Adi a fəl nədgaz Titəs, s ənta a daɣ-wan d-igan əstizarat ad tagim širgiten, a dawan-ilal s ad tassandim əşşəxəl wa, imosan arraxmat. ⁷ Dad zamas təbbilalam s arat kul: almayna təknâm təla n əzəgzan, təknâm masnat n awal, təknâm təla ən masnat, təssânam gəlleyat daɣ arat kul, tədgâzam daɣ tara ta dawan-nəga; wədi arraxmat ta imos igi ən tərgiten da ədgəzat daɣ-as wəllen.

⁸ Wər dawan-ganna imos fall-awan əşsil igi n adi, kuddeɣ as Əlkənisaten šin hadatnen əknânat tara n igi-net. Kalar tara ɣas a əgeɣ ad əssəna da du-təqqal tara ta kawan-təhat. ⁹ Təssânam daɣ arraxmat ta danax-isəkna Əməli-nana ɣaysa Əlməsix. Ənta wa n əməggərgəs, isallaqqaw iman-net fəl əddəlil-nawan, fəl a kawan-isəggərgəs kawanay s ələqqəw-net. ¹⁰ Ənta da ənnəsixa wa dawan-əgeɣ daɣ batu tədi: of-awan ad təsəkkəsəwam arat âs kawanay iman-nawan ad t-issəntan ila adi əmərədda awatay, fəlas kawanay a zzarnen s igi-net, kawanay deɣ a t-id-iktan harwa daɣ tizarat. ¹¹ Daɣ adi əmərədda agiwat daɣ əsəkkəsəw n əşşəxəl di, əddəguz wa təgam as t-idu-təssəntam. Ərəgat daɣ arat a iqqal wa təlam awas təfragam širgiten-net. ¹² Fəlas kud deran issohen ill-ay wədi təhəkkut ad tətəwəqbəl s əlluɣ ewal awen s awa nəla wərgəɣ awa wər nəla. ¹³ Wərgəɣ agamay a tagga ad əsənəfləyax aytedan wiyyad, kawanay amaran əsəmməxiteraq-qawan. Kalar agamay ɣas a tagga ad tənəmiwəyam. ¹⁴ Əmərədda kawanay a əbbəlalten, immikkan ad tilalam y aytedan win təlaqqawen; as iga adi, as ənnəflayan a dawan-ilalan əntanay da əzəl wa ad təmayataram. Əmmək wədi as za tənəmiwəyam. ¹⁵ Ənnan Əlkəttaban: «Awedan wa išşedawan a əggen, wər išşedaw a t-ogaran; wa išşedawan a əndərran, wər ikataytay.»

Batu ta təqqalat Titəs daɣ ənnizam wa n širgiten y Əlkənisat ta n Yerusalam

¹⁶ Əggôdayax i Məşşina a ikfan Titəs gəlleyat daɣ batu-nawan šilat ən ta daɣ-as əgeɣ. ¹⁷ Fəlas wərgəɣ tərəddawt ɣas a iga s arat wa daɣ-as nəgmay, fadda issəwar adi as d-inkar gar-es əd man-net ikk-iwan-in fəl gəlleyat a iga daɣ batu-nawan. ¹⁸ Nəşşedaw-t-in d amadrax-nana iyyan âs Əlkənisaten ketnasnat əmmâlnat əşşəxəl wa itaggu daɣ batu n Əlinjil. ¹⁹ Ənta deɣ a sannafrannat Əlkənisaten y a dər-nax iddaw daɣ əşikəl wa za nagu newây arraxmat ta əmosnat tərgiten šin, y a dər-əs annattaf, nassaknu s adi adkul-nana Əməli d əddəguz wa nəga daɣ tilalt y aytedan. ²⁰ Təmos tidawt-nana dər-əs ədərreg y a danax-itəwəsəwər lahan a iqqal daɣ talxa n ənnəttaf wa nəga əd təhəkkut zəwwərat ta. ²¹ Fəlas nəgammay awa olaɣan dat Əməli d aytedan, nəgammay deɣ amazal sər-əs.

²² Meddan win sər-wan in-nəzammazal, nəşşedaw-tan-in d amadrax-nanax iyyan. Amadrax-nana wa, nərâm-tu daɣ taklaten aggotnen əs təməwiten aggotnen, faw iglây, wəllen əmərədda fəl awa dawan-iga daɣ fəllesat. ²³ Daɣ batu ta təqqalat Titəs, əmidi-nin a imos dər ədrâwax əşşəxəl wa dawan-taggaɣ, amaran daɣ batu ən mədrayan-nana win hadatnen win dər iddew, əntanay inəmmuzal a əmosan n Əlkənisaten, əşxâlnen gammayan adkul n Əlməsix. ²⁴ Daɣ adi, sakniwat-tan tara ta kawan-təhat d əddəlil wa nəla s igi ən baragan daɣ batu-nawan fəl a daɣ-san əkkəsənat Əlkənisaten aşşak, ənəynat-tan.

9

¹ Daɣ batu ta təqqalat tadhəlt ən mizdagan wər əddərara s a dawan-in-əktəbay širawt. ² Fəlas əssânaɣ daɣ gəlleyat ta təgam daɣ a dasan-tərəgam, d as əgeɣ y aytedan ən Masedonəya ibaragan fall-awan. Ənneɣ-asan: inalkiman n Əlməsix

win akal n Akayya harwa naydan ad ɛran ɛsɛgli ɛn tɛrgiten; fadda ɛddɛguz-nawan daɣ igi ɛn tɛrgiten a issɛran taššam-nasan ad ɛrɛgan ɛntanay da. ³ Adi a fɛl sɛr-wan in-zammazalay imɛdrayan-nana win di, fɛl ad wɛr ɛqqɛlan baragan win fall-awan nɛtaggu awal ɛn bannan. ɛnnɛy-asan as kawan-in-z-asin širgiten-nawan ɛmmotagnat. ⁴ As wɛr iga adi, har kawan-in-osey ɛddeway d arat daɣ Kəl Masedonɛya, nos-iwan-in wɛr tɛsammatagam; a dana-tabɛz tɛkarakit ɛn baragan win dasan-ɛgɛy fall-awan, amaran kawanay wɛllen a za tɛbɛz tɛkarakit. ⁵ Daɣ adi ɛnayaɣ as tɛga addararat s ad ɛgɛmmɛya daɣ mɛdrayan-nana win di a di-in-izaran y ad ɛššidɛwan širgiten šin as tɛgam arkawal-nasnat; assaknu adi as tɛgɛm-tanat s ɛllɛllu, wɛrgɛy ɛs gɛrrɛz.

Maruzat ta tɛhat igi ɛn tɛnfa y aytedan s ɛrrɛzɛyan-nana

⁶ ɛnta da awa ɛssoka ɛs batu tɛdi: Awedan wa inbalan amasa wɛr nɛggɛt, ad d-alɛy tɛnfa wɛr nɛggɛt; awedan dɛy wa inbalan amasa aggen, ad d-alɛy tɛnfa tagget. ⁷ Akk awedan akfet awas iga ɛnnɛyat n ad t-akfu daɣ man-net. Ad wɛr tɛqqɛl tɛhakkay-net arat imigras, wala imos as ɛššil; fɛlas Mɛššina ira awedan wa ihakkin ɛs man ɛrdɛnen. ⁸ Amaran Mɛššina ifrɛg a fall-awan d-izazzɛbbɛt ɛzzɛnɛfan n arraxmaten aggotnen, fɛl a tu-wɛr-imɛl arat a iqqal daɣ alwaq a iqqal as tɛddiraram, har tawadam igi ɛn mazalan kul win olaynen. ⁹ Adi a fɛl ɛnnan ɛlkɛttaban: «*Ihakku s ɛllɛllu, ihakku šilɛqqawen; taqqat-net, tɛylɛl.*» ¹⁰ Mɛššina a ihakkin amagyak amasa, ihakku dɛy isudar. ɛnta dɛy a kawan-z-akfin amasa s iggɛt, tɛzzar isɛggɛt tɛnfa ta du-teway taqqat-nawan. ¹¹ Awalla, Mɛššina a kawan-isɛbbɛlɛl daɣ arat kul fɛl ad tɛfrɛgam ad tallallem faw daɣ arat kul; awɛy-du adi s aytedan win as za nawɛy širgiten-nawan igi ɛn godan i Mɛššina. ¹² Fɛlas širgiten šin tɛgam, wɛrgɛy imizdagan win Yerusalam win maddararan ɣas as z'anfinat; kalar ad d-awɛynat s aytedan aggotnen igi ɛn godan i Mɛššina. ¹³ Širgiten šin di ɛntanatay a d-ewaynen ɛs mizdagan win Yerusalam zazwar ɛn Mɛššina fɛlas tɛssiknam ɛbɛrdɛg wa sɛr-wan d-eway lɛkkum wa tɛgam y ɛlinjil n ɛlmɛsix, tɛssiknam-tan dɛy ɛllɛllu ɛntanay d aytedan sahadan. ¹⁴ As dawan-taggin šiwatriwen a dawan-tanat-taggin ɛs man tɛdnay tara fɛl ɛddɛlil n arraxmat tɛknɛt tɛzzɛwwɛrt ta kawan-ikfa Mɛššina. ¹⁵ Gudɛyatanay i Mɛššina tɛhɛkkut wɛr nɛla tulat ta danaɣ-iga.

Bulɛs isasagru ibbillan dɛy fɛl ɛššɛyɛl-net wa n tišit n anammazul

10

Tanaya ɛn Bulɛs

¹ Nak Bulɛs, nak wa fɛl gannin aytedan as: šira šin dawan-in-kattabaɣ ɣas a daɣ ɛhɛla awal, mišan as kawan-ɛhɛy ad ɛqqɛlay awedan lɛmmidan; onsɛyaq-qawan fɛl udɛm ɛn talmat d ɛlluy win iga ɛlmɛsix, ² as, as kawan-in-osey, a di-wɛr-tɛšɛhhɛššɛlam a kawan-assakna taholat-in awal id otɛsaɣ ad assakna taholat-in awal aytedan win di gannin ɛddi nakkanay wɛr nɛlkem ar i tɛla n ɛddɛnet. A dawan-ɛlɛsa tɛnna: ɛgmɛya daɣ-wan a di-wɛr-tɛšɛhhɛššɛlam igi n ɛmazal di! ³ Tidɛt a imos as ɛddɛnet a nɛha, mišan wɛr nɛmmɛgar fɛl awa fɛl ɛmmɛgaran aytedan win ɛlkammen y ɛddɛnet. ⁴ Fɛlas tɛzoli tas nɛmmɛgar wɛr tat-tɛla ɛddɛnet ta, kalar tarna a danaɣ-ikfa Mɛššina as nɛmmɛgar; nɛtadagdag sɛr-ɛs idaggan ɛssohatnen win ittaf Iblis. Nɛssɛn daɣ bahutan-net, nɛsaffagg-en. ⁵ Nɛzaraz sɛr-ɛs tamazaq kul ta tɛgaddalat y aytedan ad ɛssɛnan Mɛššina. Tɛzoli tɛdi da as du-nɛtabaz imedranan kul n aytedan, fɛl ad abbardagan y ɛlmɛsix. ⁶ As tɛssɛknam alkamalat n ɛbɛrdɛg-nawan, nɛsimatag y ad nawwaddab awedan kul wa n ɛnɛmmɛzrɛy.

⁷ Ʒswədat daɣ awa illan dat šittawen-nawan, tagrim-tu. Kud awedan a kawan-ihan ikkâsan aššak as Ʒlməsix a t-ilan; issənet za as, nakkanay da ig-âna Ʒlməsix təla tədi da a das-iga əddi. ⁸ Wala ad əgeɣ ibaragan aggotnen fəl as danaɣ-ikfa Ʒməli tanaya, da wər di-z-izzəbəz adi təkarakit. Tanaya ta danaɣ-ikfa šin a kawan-nəsəssuhət, wərgəɣ a kawan-nəjəbbərəjjət. ⁹ Ʒnneɣ awen fəl ad wər tiɣalam šisəksədawen ɣas a dawan-tagga daɣ šira-nin! ¹⁰ Id itawannu sər-i: «A kawan-wər-iššəwəš Buləs. Širanet ši labasnen, əssohatnat, mišan ənta əs man-net as dana-d-osa wər fərur, amaran wər issen awal.» ¹¹ Awedan wa sər-i innan adi, əssənet as, awa din-nəkəttab daɣ šira-nana, ənta a za nəmmazal as kawan-in-nosa.

¹² Tidət âs, wər za nəhəl ad nəšišagda iman-nana wala nəšišalen d aytedan win di a dawan-əmmalnen iman-nasan; wər nədəkkəd iman-nasan ar əs man-nasan, šašagdin deɣ iman-nasan əd man-nasan. Wər əlen əgərri. ¹³ Nakkanay za, wər za nagu ibaragan fəl aratan win wər nəmos tadagart-nana; amaran wər z'akəyan baragan-nana tadagart ta danaɣ-ikfa Məššina, a tat-imosan as kawan-in-newad. ¹⁴ Iki wa dawan-in-nəga wər imos əsəssikəy fəl awa nətawakfa zun as kawanay wər təhem tədagart ta nəgraw, fəlas kawanay as nazzar nəšɣal ɣur-wan, nəmal-awan isalan n Ʒlinjil n Ʒlməsix. ¹⁵ Nakkanay wər nətəggu ibaragan fəl əššəɣəl ən wiyyad aytedan win əgrawnen tədagart wər nəmos ta nətawakfa nakkanay. Kalar attama-nana nəg-ay daɣ-âs, as ittiteɣ əzəgzan-nawan, a ɣur-wan nagu əššəɣəl as z'itizwaran wəllen, da wər nokay tədagart ta danaɣ-ikfa Məššina. ¹⁶ Almaɣna ad nəfrəg igi ən salan n Ʒlinjil daɣ kallan win dənnəg-wan əllanen, naqqam da wər nəga ibaragan fəl awa d-ixsalan daɣ əššəɣəl imôsan tadagart n awedan iyyan. ¹⁷ Ʒnnan Ʒlkəttaban: «I itaggin ibaragan, aget-tan fəl awa iga Ʒməli.» ¹⁸ Fəlas wərgəɣ awedan wa immalan iman-net a igrawan saɣmar, kalar awedan wa immâl Ʒməli a t-igrawan.

11

Buləs issinkad-anay i nəmmuzal win bahu

¹ Areɣ daɣ-wan a dər-i təzəzzəydəram! Ad aga arat ən təmətəkwayt n əmməskəl! Awalla, əzmarat y awa z'anna! ² Fəlas əgeɣ-awan tara ta n təsmiten, šismiten di da šin d-əfalnen Məššina, id təhâm-i šaššelan ən təntut əs wər kala a tat-idas aləs, a dər isimarkas aləs iyyanda, a t-imosan Ʒlməsix, amaran nak a das-isamarkasan dər-əs. ³ Mišan əksudaɣ ad təwərkəbnat taytwen-nawan əs təsədək iyyat, tammazzayam d əlyibada wa təgam Ʒlməsix s əwəl iyyanda [əd man zaddoggen], itəwəgg-awan ətəwəsəxrak wa iga məlul Xawa əs təkərras-net. ⁴ Fəlas as kawan-in-osa awedan iyyan ig-awan isalan ən Ʒaysa iyyan wər nəmos was dawan-nəga isalan-net, madəɣ təgrəwam infas iyyan wər nəmos Infas wa Zəddigan wa təgrawam, madəɣ ag-awan isalan n əlinjil iyyan wər nəmos wa təqbalam, tarmâd as das-taknim tərəddawt s awen. ⁵ Dər iga awen da za, wər ɣur-i iga as ill-ay arat as di-ogaran nəmmuzal-nawan wər nəla tulat win di. ⁶ Amaran kud awal wər ələɣ madas-net, masnat ənta, ələq-qat wəllen; nəssikn-awan-tat daɣ əkkulluk n arat s əmmək kul.

⁷ Awak abakkad a əgeɣ as əssərasaɣ iman-in fəl a kawan-əzzəzwəra kawanay s amel wa dawan-əgeɣ isalan n Ʒlinjil ən Məššina wər kawan-əzzərzama wala? ⁸ Oɣe-du Ʒlkənisanen šin hadatnen əs tədhəlt ta di-əganat s awas əddərara daɣ əššəɣəl wa dawan-əgeɣ. ⁹ Alwaq wa ɣur-wan əlle, wər kala əqqalax i waliyyan daɣ-wan əzuk as maɣatara s arat, fəlas imədrayan-nana win d-əfalnen akal ən Masedonəya a di-əkfanen awas əddərara. Ʒgdələx i man-in tišit n əzuk i waliyyan daɣ-wan daɣ əkkulluk n anamod, amaran ad agla daɣ igi n adi. ¹⁰ Agamad wa iga aššak tidət n Ʒlməsix ta di-təhat, ənta a iga as, wər iha awedan imədlan n akal n Akayya ifrâgan a di-igdəl igi n abarag wədi! ¹¹ Ma fəl əgeɣ adi? Awak iba ən tara-nawan? Məššina issân as areq-qawan! ¹² Arat wa tagga da amaran, ad agla daɣ igi-net, fəl ad əgdələx

igi ən baragan y aytedan win əränen ad əgrəwan tarrayt n ad annin əşşəxəl-nasan wər izlay əd wa-nana.

¹³ Fəlas meddan win di, inəmmuzal ən bahu a əmosan, əmosan dəx imaşşaxalan ən məkkəddal, sakninen as inəmmuzal n Əlməsix a əmosan. ¹⁴ Wər iqqen adi eɣaf, fəlas wala Aşşaytan itaggu iman-net angalos n ənnur itâggin tidət. ¹⁵ Daɣ adi aytedan win das-əşxalnen wər isammaklal ad agin iman-nasan zun maşşaxalan sasaxrinen aytedan taqqat. İlkâm ad əgrəwan awa dər əhoran mazalan-nasan.

Alyazab wa iga Buləs day tişit-net anammazul

¹⁶ A dawan-ələsa tənna, ad wər iɣal awedan waliyyan nak əmeskel. Mişan, kud əmeskel a di-təgam, təzməram-i, awa tətəggim y əmeskel, fəl ad agax arat ən baragan-in nak da. ¹⁷ Arat wa ənne da, wərgex arat as d-inna Əməli ad t-anna, kalar abarag adi, a di-təsisaga tulat-in d əmeskel. ¹⁸ Dad zamas əggətan aytedan win tagginen ibaragan fəl awa itaggu aggadəm daɣ əddənət, nak da, ad agax ibaragan. ¹⁹ Fəlas kawanay win malan ən tayttay, təzmâram i məskelan, isidawat-kawan adi! ²⁰ Təzmâram y i kawan-igan eklan, madex axu awa təlam, təzmâram y i daɣ-wan tat-igân əs təkərras-net, madex assakn-iwan məlka, madex iwət-kawan daɣ udəm. ^{21a} Isikarakad-i as, əlləqqəw-nana nakkanay, igdâl-ana a dawan-nagu aratan şilat ən win di.

^{21b} Dər iga awen da ya, arat a iqqal as ihal awedan a fall-as agu abarag, nak da, əhâlay a fall-as agax abarag. Batu ta əge da şilat n as ig-et əmeskel. ²² Kud Kəl-Ûibri a əmosan, nak da, əmosaq-qu. Kud Kəl-İsrayil a əmosan, nak da, əmosaq-qu. Kud əzzurrəyya n İbrahim a əmosan, nak da, əmosaq-qu. ²³ Kud imaşşaxalan n Əlməsix a əmosan, ogaraq-qan tişit-net. Batu ta əge da şilat n as ig-et əmeskel. Kud alɣazab a əgan, ogaraq-asan-tu; kud kasaw a əggazan, ogaraq-qan iguz-net; kud şiwwit a tawaggan, ogaraq-qan ətəwənxa; kud dəx tazak ən tamattant a əggazan, ogaraq-qan iguz-net. ²⁴ İwəddiban səmmos a di-əgan Kəl-Əlyəhud, s akk iyyan əkkozat təmərwen ən tawatay daɣ aba iyyat. ²⁵ Karadat tənəqq a di-əgan Kəl-İrrum s ələkkud, taklat iyyat əgməyan aytedan əd tənaxay-nin kərəz əs təgur ən təhûn, karad əxşudan da tənamazray a dər-i iga əɣlal n aman. Idâs-i dəx as əgeɣ ahad iyrâdan d əzəl daɣ ammas n agaraw əbukan aman a di-ətşin. ²⁶ Əgeɣ işikilan aggotnen. Əggâzax alɣarar n adi əbətan aman ən təsəssəngay şin raddaxa madex əgrəwan-i narkaban. Əggâzax alɣarar daɣ aytedan win-da-nin ən Kəl-Əlyəhud əd win tan-wər-nəmos. Əggâzax alɣarar daɣ xərman əd saffan. Əggâzax alɣarar n a di-atşu agaraw. Əggâzax dəx alɣarar daɣ aytedan win ganninen əs bahu əmosan imədrayan-in daɣ əddin. ²⁷ Əzdâyax əşşəxəl iha alɣazab əd talawayt, d əmikər n etəs aggen. Əzdâyax gələk əd fad, əyyəwana dəx əzum. Əzdâyax taysəst n asamed əd zəlləm. ²⁸ Adi ketnet, iwâr-tu əddəguz wa əgeɣ akk əzəl daɣ masnat ta əgeɣ daɣ İlkənisen kul. ²⁹ As daɣ-asnat irkam awedan, a di-idəs rəkkəm-net nak da; as daɣ-asnat d-eway awedan s əmidi-net igi n abakkad, ad tarxu temsay daɣ man-nin.

³⁰ Kud əşşil a fall-i imos igi ən baragan, wədi aratan win sakinen rəkkəm-in a fəl tan-z-aga. ³¹ İssân Məşşina di n Abba n Əməli Ƴaysa as, wərgə bahu a əgeɣ. Attamalet esəm-net har faw. ³² Aləs wa izzozar əmənokal Arestas y əxrəm ən Damas, kala ad omar meddan s ad əbdədan daɣ mawan n əxrəm fəl a di-əbəzan. ³³ Mişan tawagga daɣ azmam zəwwəran, tawasarasa əs fənətər ihân aɣalla wa iɣlayan aɣrəm, əddərragax-as.

12

Targət ən Buləs əd təsasmit ta təhat taxəssa-net

¹ Ilzâm-i igi n abarag. Kud wər infa igi-net wala da, ad aglay əmmâlay-awan aratan win di-issəkna Ğməli əd win di-isannafalal. ² Ğzdâyay aləs iyyan osâxan d Ğlməsix as kala ad immədkal har osa əjənna wa n əssa. Wər əssenay kud taxəssa-net a təmmədkalat den, wala dəx iman-net xas a əmmədkalnen, Məşşina xas a issanan. İla adi əmərədda maraw elan d əkköz. ³⁻⁴ Awalla əssânay as aləs wədi, immidkal har osa aljannat, isla dəx-as awalan simaklalnen as wər ifreg awedan emel-nasan dəx awal waliyyan, wala dəx xalal amel-nasan. Wər əssenay kud, taxəssa-net a təmmədkalat den, wala dəx iman-net xas a əmmədkalnen, Məşşina xas a issanan. ⁵ Ad aga abarag fəl awedan wədi, mişan wər tu-z-aga fəl man-in. Rəkkəm-in xas a fəl z'aga abarag. ⁶ Amaran kud arex igi ən baragan, da wər di-iga adi əmeskel, fəlas tidət a z'anna. Mişan ad ammazzaya d igi-nasan id wər arex a di-ittəf awedan waliyyan dəx adag ogaran wa dəx-i əgan mazalan-in d awa ganna.

⁷ Isinafalal-i Məşşina aratan əganen adkul wər nəla əddukad, adi a fəl di-igdal adakal ən man-nin s igi wa iga dəx alam-in əşənnan, imosan ənammazul n Aşşaytan a di-izaxazzaban fəl ad wər ədkelay iman-nin. ⁸ Karad gamayan dəx tanamazray a əgey dəx Ğməli a di-izəmməzzəy dər-əs. ⁹ Mişan inn-i: «Təgd-âk arraxmat-in; fəlas tarna-nin, rəkkəm a dəx tətəggu ənəfiləl wa ikmalan.» Dəx adi isaddawat-i igi ən baragan fəl rəkkəm-in, fəl a dəx-i təzdəy tarna n Ğlməsix. ¹⁰ Adi a fəl di-isaddawat rəkkəm, əd tərəbbad, d alxazab, d ətəwədgaz, əd təməxutar fəl əddəlil n Ğlməsix. Fəlas alwaq wad ərkama, ənta a dəx əssoheç.

Awa idgazan Buləs dəx batu ən Kəl-Korent

¹¹ Təşahhaşşalam-i əmazal imosan igi ən baragan âs əmeskel xas a t-itaggin; ənta kawanay as ihor a fall-i təsanamalam, fəlas kud wər əmosay arat da, wər di-ogeran nəmmuzal-nawan wər nəla tulat win di. ¹² Alxalamaten ən tişit-in anammazul wa n tidət tiwagganat gar-ewwan əddəwnat əd zəmmerat, igâ awen s alxalamaten əd təjujab əd təlməxjujaten. ¹³ Arat iyyanda xas a xur-wan wər əgeç, âs Ğlkənīsaten şin hadatnen əgeç-qu xur-əsnat, a t-imosan as wər dəx-wan əgmaya tadhəlt waliyyat. Surəfat-i-id ark amazal wədi!

¹⁴ Əmərədda simâtaga y a dawan-in-agay assa wa n karad, amaran wər dawan-z-əqqəlay əzuk; fəlas wər gəmməyay awa təlam, kalar kawanay a gammaya. Wərgəç bararan a iwar ad assansin arat iyyan i marwan-nasan, kalar imarwan a iwar ad assansin arat i bararan-nasan. ¹⁵ Nak za, isidawat-i a fall-awan akfa təla-nin kul, akfa harkid man-nin fəl əddəlil-nawan. Awak da dawan-əge tara togdat d awa, ad ifnəz adi ta di-təgam kawanay? ¹⁶ Təssânam as wər dawan-əmosay əzuk, mişan təgannim əməkkerrəs a əmosay, əgeç-qat dəx-wan əs təkərras-in. ¹⁷ Məni təməwit tas kawan-əkkərrasay? Awak iyyan dəx meddan win kawan-in-əssoka a dəx-wan itşan arat? ¹⁸ Nak a onsayan Titəs əgmaya dəx-as a kawan-in-akku, əşşədawaç-q-in d amadray-nana dəx əddin wa təzdayam. Awak arat iyyan a dəx-wan itşa Titəs? Awak wərgəç nak dər-əs tarrayt iyyadda as nəlkam s ənəyat iyyadda? Awak wərgəç almasal iyyanda as nəlkam?

¹⁹ Awak tədma a təgam, awal ketnet wa əgeç dəx batu ta, agamay a sər-əs nətaggu aggaz dəx-wan iman-nana? Kala! Dat Məşşina ad nəşawal, əs tarrayt ən tassaç-nana d Ğlməsix. Amaran, imaran-nana, əssənət as arat kul wa nətaggu tənfa-nawan a fəl tu-nətaggu. ²⁰ Əksuday a kawan-in-asa wər oggema taxara-nawan, kawanay dəx, wər toggəmam ta-nin; əksuday as mijas əllanat-tu tamaxəçen gar-ewwan, əd manjəç, d aşşar, d əzgən, əd tənnawen, d ədkul ən man, əd tənajarwayat, wər təgəmməyam ar tənfa ən man-nawan. ²¹ Əksuda dəx a kawan-in-asa iləs-i Ğməli-nin Məşşina əzəbəz ən təkərait xur-wan; əksuday ad əxşədan man-nin, fəlas wiyyad dəx-wan aggotnen a wər nəmməzzay d igi ən bakkadan win as kala a tan-taggin, wər

ətuban dəx dəx igi ən mazalan samadasnen win taggin, d igi n əzzəna əd mazalan zizallatnen win taggin.

13

Igi daw ayaf d əsəmmutəg y əşikəl wa n karad

¹ İki-nin y-awan wa n karad awa. Ənnan Əlkəttaban: «*Taytəst kul, təgəyya n əşšin aytedan madex karad a tat-isisuhen.*» ² Ƴur assa-nin y-awan wa n əşšin, əssinkadəx aytedan win di wər nəmməzzay d igi ən bakkadan, əntanay d aytedan kul win hadatnen. Əsənkəd za wədi da a dawan-əgex əmərədda harwa da əgguga, âs: As kawan-in-osex wər t-illa awedan itaggin ibakkadan, as z'aqqamin wər iwwəddab ³ dad zamas təgəmmayam a dawan-attaddu as Əlməsix a sər-i işşewalan. Amaran Əlməsix wər kawan-issəkna iba ən fərregat n arət, kalar issikn-iwan təlät-net tarna. ⁴ Fəlas illikan as irkam alwaq wa dəx itawataytay fəl təgəttawt, mişan iddar-du əs tarna ən Məşşina. Illikan dəx as nakkanay da nərkam fəl əddəlil ən tassaq ta nəga d Əlməsix, mişan əs tarna ən Məşşina ad nagu təməddurt ta iga Əlməsix, fəl əddəlil n əşşəxələn win dawan-nətaggu.

⁵ Şaggarat iman-nawan, təssənam kud tidət dəx âs təzzigzanam! Ərəmat iman-nawan! Wər təssenam as Ƴaysa Əlməsix iha iman-nawan? Məx əzəgzan-nawan a wər nəzmer i şaggara! ⁶ Amaran əgex attama-nin dəx as, ad tənəyam tarđim dəx s as, nakkanay da nənjâx dəx şaggara wədi, issiknəx as nakkanay inəmmuzal win tidət a nəmos. ⁷ Nətəttar əs Məşşina a dawan-igdalan igi ən təkma waliyyat. Wər dawan-nətəttər fəlas nənjâx dəx əşşəxəl wa Ƴur-wan nəga, kalar fəl tara n ad tagim awa olağan, kuddeş as itiwattaf as nakkanay wər nənjex. ⁸ Fəlas wər nəfreg əməzrəy ən tidət, kundaba Ƴas tebədday fall-as. ⁹ İsilawas-ana rəkkəm wa nəga, ənta kawanay təsohem. Awalla nətəttar a iknan tebədday-nawan dəx əzəgzan. ¹⁰ Adı a fəl dawan-in-kattaba harwa da əgugaq-qawan, fəl ad wər addarara s a dawan-aga ərruymatan əsəsnen as kawan-in-osex, fəlas tanaya ta di-ikfa Əməli fall-awan, ikf-i-tat fəl ad əşşəla dəx anamod wa kawan-z-issukin afalla, wərgəş wa kawan-z-ijəbbərəjjen.

Təsəxtəmt: Ənnəsixatan d assalaman win təzərəst

¹¹ Əmərədda, imədrayan-in, fəliwəsət! İqqələt aytedan əkmâlnen; tinəməgginen ənnəsixatan; tənimmannakam gar-ewwan. Iməlet alxer gar-ewwan. Əddi a dəx-wan issən Məşşina di ihakkin tara d alxer. ¹² Tinəməggat assalam zəddigan. Əhulan-kawan-in mizdagan kul win əllanen da da.

¹³ İgmâya dəx Məşşina a kawan-ikfan ketnawan arraxmat n Əməli-nana Ƴaysa Əlməsix, əd tara ta n Məşşina əd tassaq n İnfas wa Zəddigan.

Şirawt ta iktab Buləs i Kəl-Galatəya

İsənti

Təhult

¹ Şirawt a din-təfâlat Buləs imosan anammazul a du-wər-zammazalan aytedan, wala deş izimazal-t-id awedan waliyyan. Kalar Məşşina di n Abba s ənta a d-issənkaran Ҳaysa daş təmattant, əd Ҳaysa Elməsix iman-net a di-du-zammazalnen. ² Nahul-in Elkənisaten şin n akal ən Galatəya nak harkid mədrayan-in win şur-i əllanen. ³ Ig-awan Məşşina di n Abba-nana d Əməli-nana Ҳaysa Elməsix arraxmat d alxer. ⁴ Ҳaysa Elməsix ənta a ikfan iman-net fəl a danaş-agəz daş bakkadan-nana, ixləs-ana deş daş talbast n əddənet ta n əmərədda, inimannak awen əd tara ən Məşşina di n Abba-nana, ⁵ a ilan tanaya har faw! Amin.

Əlinjil iyyanda

⁶ İqqan-i eşaf wəllen əsətrəb wa təgam agamad ən batu ən wa kawan-d-işran əs tarrayt n arraxmat ta d-eway Elməsix, təlcamam y əlinjil iyyan ən bahu. ⁷ Əssənət əs wər t-illa əlinjil waliyyan ar wa dawan-əməla. Aytedan şas a t-əllanen a kawan-şawaşnen, saşraşan Əlinjil n Elməsix. ⁸ Amaran i igan isalan n Əlinjil wər nəmos win dawan-nəga, gər nakkanay iman-nana wala angalos a d-ifâlan ijənnawan, wədi itəwəlxənet! ⁹ Arat wa ənneş-awan-tu kala da, amaran a dawan-t-ələsa tənna əmərədda: As dawan-iga awedan iyyan isalan n Əlinjil wər nəmos win as təslam təqbalam-tan, wədi itəwəlxənet! ¹⁰ Ma tənnam: Awak əmərədda aytedan a daş gammaya saşmar meş Məşşina? Awak aytedan as gammayaş a dasan-əgrəza? Ənnar harwa da gammaya a di-iren aytedan, wər z'əqqələş akli işbâdan Elməsix.

Buləs ibillan fəl Əlinjil

Təməwit tas iqqal Buləs anammazul

¹¹ Arat da was areş a daş-as təssənəm imədrayan-in: Əlinjil wa əmmala, wər d-ifel aggadəm. ¹² Fəlas nak iman-in da wərgəş aggadəm a di-t-ikfan wala deş isisaşr-i-tu. Kalar Ҳaysa Elməsix iman-net as di-t-isannafalal.

¹³ A igan da təslâm alxal-in dat awa harwa ad əheş əddin wa n Kəl-Əlyəhud. Azzaman di əkneş wəllen əssus n Elkənisat ən Məşşina, gammaya d əhluk-net. ¹⁴ Harwa ad əheş əddin wa n Kəl-Əlyəhud, oğaraş kəl-tawşet-in aggotnen win jəytan-in əddəguz daş əddin, fəlas gəlleşat tagget a əgeş daş ləkkum y alşadat ən marawan-in.

¹⁵⁻¹⁷ Məşşina a di-isannafranən, harwa da aheş tadist n anna-nin, işr-i deş s arraxmat-net y ad t-əşbada. Amaran assaşa wa das-igraz a di-isənnəfiləl Barar-net fəl ad əmələş isalan-net a tan-imosan Əlinjil y aytedan win wər nəmos Kəl-Əlyəhud, assaşa wədi daş ad əkkeş Arabəya, dəffər adi əqqala-du Damas, da wər əşşəwwaraş awedan waliyyan, za wər əggəzzaya əs Yerusalam y ad əssuməra tanat meddan win di-azzarnen tişit ən nəmmuzal.

¹⁸ As əgeş karad elan dəffər awen, əkke Yerusalam fəl ad ammanayaş əd Qayfas nəməzdəya dər-əs, əgeş şur-əs maraw adan əd səmmos. ¹⁹ Wər ənaya waliyyan daş nəmmuzal win hadatnen. Yaqub wa n amadray ən Ҳaysa, di n Əməli-nana, şas a ənaya. ²⁰ Silakanaş-awan dat Məşşina as, isalan win dawan-in-kattabaş da, wər əmosan bahu. ²¹ Egmada Yerusalam əkkeş amaşdal wa n Surəya əd wa n Kilikəya. ²² Alwaş wədi aytedan n Elkənisaten şin Yahudəyya, wər di-əzdayan. ²³ Əslân şas əs: «Aləs wanad a danaş-iknan əssus da, əmərədda itaggu isalan n Əlinjil was kala

ad ira əjəbbərəjji-net.» ²⁴ Arat wen eway-du sər-san igi ən təmalen i Məşşina day batu-nin.

2

Buləs əd nəmmuzal win hadatnen

¹ As əgan maraw elan d əkkoz dəffər awen əlasa əgəzzəy əs Yerusalam nak əd Barnabas, əddewa dəx əd Titəs. ² Məşşina a di-d-isannafalalan as iwar-i iki ən Yerusalam y a day-as əmələx Isalan n Əlinjil win tagga y aytedan win wər nəmos Kəl-Əlyəhud. Arat wen amaran əkneq-qu wəllen emel i muzaran n Əlkənisat ən Yerusalam win ogarnen ətəwəsəxmar, fəl təksəda n ad abbannan əşşəxəl wa əgey əd wa z'aga dəffər awa. ³ Əqbalan-i nak əd Titəs a dər əddewa, imosan iyyan day Kəl-Əlyunan, s əmənəkəd da wər immənəkəd. ⁴ Awen wər t-igdel iguz wa danax-əgan məzzəgzan ən bahu wər nəmos arat day-na, kalar iguz xas a dana-d-əgan fəl ad əssənan əmmək was nəşaşxal tədarfit ta danax-ikfa Əlməsix Yaysa. Ərən a danax-əssuxələn əkkəlu wa nəga day əşşərixa wa n Əttawret. ⁵ Mişan aytedan win den wər dasan-nəga wala arat n amazay ən tərəddawt s awa əran. Arat wen nəg-ay fəl aggaz y-awan tidət ta n Əlinjil. ⁶ Aytedan amaran win ogarnen ətəwəsəxmar – wər əzlaya day awas kala ad t-əmosan: Məşşina wər itəggu təmərıt! – Aytedan win tawasaxmarnen en, wər di-şahhaşşalan wala. ⁷ Kalar əgran-in as isalan n Əlinjil tiwaggan-du day əfus-in y a tan-əməla y aytedan win wər nəmos Kəl-Əlyəhud, zund əmmək as tawaggan day əfus ən Butros y tan-agu y aytedan win Kəl-Əlyəhud. ⁸ – Məşşina ikfa Butros fərregat n ad iqqəl anammazul-net əs Kəl-Əlyəhud, nak amaran ikf-i fərregat ən tişit n anammazul-net s aytedan win wər nəmos Kəl-Əlyəhud. – ⁹ Yaqub əd Qayfas əd Yaxya itiwassannen day tişit ən təgəttawen n Əlkənisat əgran-in arraxmat ta di-tətawagat, əqbəlan-ana nak əd Barnabas əssəknan-ana tassağ ta gər mədrayan. Əmmək en da as əqbalan as nakkanay ad nakku aytedan win wər nəmos Kəl-Əlyəhud, əntanay amaran akkin Kəl-Əlyəhud. ¹⁰ Əgməyan day-na xas ad nəkittəw şiləqqawen. Arat wen amaran nak ədgəza day igi-net.

¹¹ Mişan assaxa wa d-osa Qayfas axrəm n Antəyoxəya, əşşewala fall-as udəm s udəm id tidət a wər iga, ¹² fəlas dat assa n aytedan wər nəggət win d-əşşokalnen xur Yaqub, idarraw imensewan d aytedan win wər nəmos Kəl-Əlyəhud; mişan as t-in-osan aytedan win, igaz şin n awer n aganna, fəl təksəda n əlməsixitan win as ələsəl-nasan Kəl-Əlyəhud zizawatnen day alxadaten n Əttawret. ¹³ Kəl-Əlyəhud win hadatnen n əlməsixitan əntanay da əgan awen da, əxbaran arat was əzzəgzanan zun awa iga Qayfas, har as Barnabas iman-net da ilkam i təmənufəqa-nasan. ¹⁴ Mişan assaxa wad ənayax as wər zalalaxan day ləkkum i tarrayt ən tidət ta n Əlinjil, ənnəx i Qayfas dat mədrayan-nana kul: «Kay was imos ələsəl-nak ag Əlyəhud, təgey təməddurt tolat əd ta n awedan wər nəmos iyyan day Kəl-Əlyəhud, toyyex tarrayt ta n Əttawret. Day adi manəmmək as za təşəhhəşşəlay aytedan win wər nəmos Kəl-Əlyəhud ləkkum y alxadaten n Əttawret?»

Aytedan kul əgrawan taqqat s əzəgzan əs Yaysa Əlməsix

¹⁵ Nakkanay as imos ələsəl-nana Kəl-Əlyəhud, wər nəmos «inasbakkadan» şila n aytedan win wər nəssen Məşşina. ¹⁶ Dər iga awen da aggadəm wərgəx ləkkum i tarrayt ta n əşşərixa wa n Əttawret a t-ihakkin taqqat xur Məşşina, kalar əzəgzan əs Yaysa Əlməsix. Awen da a fəl as nakkanay da nəzzəgzan s Əlməsix Yaysa fəl ad nəgrəw taqqat s əzəgzan s Əlməsix wərgəx əs ləkkum y əşşərixa wa n Əttawret. Awalla wər t-illa awedan waliyyan a z'igrəwan taqqat xur Məşşina əs ləkkum y əşşərixa wa n Əttawret.

¹⁷ Mišan as imos as, daɣ agamay wa nətaggu taqqat əs tərtəyt n Əlməsix, itawanay-du as nakkanay da nətaggu ibakkadan win taggin aytedan win wər nəmos Kəl-Əlyəhud, daɣ adi Əlməsix a danaɣ-illilan s igi n abakkad? Kala Kala! Wər ilkem ad iga adi! ¹⁸ As əlasay akaras n awa jabbarajjey a t-imosan tarrayt ta n ləkkum y əşşəriya wa n Əttawret, ad sənnəfiləlay as nak ənəmmezrəy a mosa. ¹⁹ Nak əssəbab n əşşəriya a fəl əmməzzayay əd təməddurt ta ihakku əşşəriya. Arat wen kul iga fəl ad iqqəl as təməddurt-in tartəyt əd Məşşina a daɣ təga. Nak ab-i fəl təgəttawt əddəway d Əlməsix. ²⁰ Əddâra mišan ab'as imos as nak a iddaran, kalar Əlməsix a iddaran iha iman-nin. Əmərədda təməddurt-in ta n tişit n aggadəm, əgeq-qat s əzəgzan əs Barar ən Məşşina as awa di-iga daɣ tara, iman-net a ikfa aba-tu daɣ adag-in. ²¹ Daɣ adi wər z'ugəya s ad əqbəlay arraxmat ən Məşşina əqqəla-du tarrayt ta n ləkkum y əşşəriya wa n Əttawret, fəlas ənnar ləkkum y əşşəriya a ihakkin taqqat ɣur Məşşina, wədi Əlməsix bannan as t-aba!

3

Əzəgzan a igarrawan arkawal

Tarrayt ta n əzəgzan meɣ ta n əşşəriya?

¹ Xa Kəl-Galatəya win aljahilan! Ma işwan tayttay-nawan? Awak wərgəɣ dat şittawen-nawan a dawan-təbbəyyan təmattant ən ɣaysa Əlməsix fəl təgəttawt ta fəl itawataytay? ² Əsəstan iyyanda ɣas as areɣ a dawan-t-aga, a t-imosan as: Awak ləkkum y Əşşəriya wa n Əttawret a kawan-ikfan Infas wa Zəddigan, meɣ əzəgzan wa təgam əs salan n Əlinjil win as təslam? ³ Awak igrâw-kawan iba n tayttay oğdân d adi? Awak dəffər as təssintam əs mazalan win ləkkum y Infas ən Məşşina, tara a təgam əmərədda ad tassandim əs mazalan win təgam kawanay iman-nawan? ⁴ Awak aratan win təjjərabam daɣ təməddurt-nawan kul əqqələn bannan? Wər t-illa əmmək as z'abbannanan! ⁵ Tehakkay ta kawan-iga Məşşina Infas-net di Zəddigan, iga daɣ-wan deɣ təlməxujaten, awak ləkkum-nawan y Əşşəriya wa n Əttawret a fəl dawan-iga awen, meɣ əzəgzan-nawan əs salan n Əlinjil win as təslam? ⁶ Aktiwat-du awa ənnan Əlkəttaban s ənnəbi İbrahim as ənnan: «*Izzəgzan əs Məşşina, awen daɣ a fəl t-ikfa taqqat.*»

⁷ Daɣ adi əssənət as aytedan win əzzəgzannen əs Məşşina əntanay a mosnen bararan n İbrahim. ⁸ Fadda Əlkəttaban ənnân harwa dat əzəl: Aytedan win wər nəmos Kəl-Əlyəhud, əssəbab n əzəgzan-nasan a fəl z'iqbəl Məşşina taqqat-nasan. Awen daɣ a fəlas Əlkəttaban əmâlan isalan n Əlinjil win y İbrahim a irəwan as ənnan: «*Ad əgrəwnat tawşeten kul n əddənət albaraka s əssəbab-nak.*» ⁹ Əmmək en daɣ as aytedan win əzzəgzannen əs Məşşina, əntanay a z'əgrəwnen albaraka wa igraw əməzzəgzən İbrahim.

¹⁰ Amaran aytedan win saffallanen fəl ləkkum-nasan y əşşəriya wa n Əttawret, win di təsəlkaht-nasan tulɣant, fəlas ənnan Əlkəttaban: «*Təwəret tulɣant awedan kul wa wər nəbbərdag faw y əşşərədan kul win əktabnen daɣ Əttawret.*» ¹¹ Daɣ adi wər t-illa awedan igrâwan əs ləkkum-net y əşşəriya taqqat ɣur Məşşina fəlas a ənnan Əlkəttaban: «*Awedan wa oɣadan daɣ tarrayt ta n əzəgzan a igarrawan təməddurt taynayat.*» ¹² Amaran əşşəriya wər idrew əd zagzan wala. Kalar ənnan Əlkəttaban: «*Əşşəriya ənta a z'akfin təməddurt y aytedan win d-əssəndanən əşşərədan-net.*» ¹³ Əlməsix ikkas-ana-du daɣ tulɣant ta danaɣ-issəwar əşşəriya wa n Əttawret, idkal-tat daɣ adag-nana, id Əlkəttaban a ənnanen: «*Təwâr tulɣant awedan kul wa itawaşalayan aşək.*» ¹⁴ Arat wen ig-ay Əlməsix ɣaysa fəl ad iqqəl tarrayt y aytedan win wər nəmos Kəl-Əlyəhud y ad əgrəwan daɣ albaraka n İbrahim, nəgrəw ketnanay əs tarrayt n əzəgzan Infas was iga Məşşina arkawal-net.

¹⁵ Imədrayan-in, a dawan-aga almasal s arat taggin aytedan: As iktab awedan imateran-net əs tēməwit təl-kāmat y əşşərixa, wər t-illa i ifragan a dər-san d-iqqəl dəffər adi gər za y a dağ-san ifnəz arat wala a dağ-san t-işşitu. ¹⁶ Amaran İbrahim d əzzurrəyya-net as iga Məşşina arkāwalān. Wər itawanna: «y əzzurrəyyatan-net», zun as ila əzzurrəyyatan aggotnen, kalar iyyanda ɣas, fəlas a das-itawannan: «əzzurrəyya-nak», almaɣna Əlməsix. ¹⁷ Dağ adi ənta da awas areɣ tənna-net: Arkawal ən tassaɣ iga Məşşina kala da, wər tu-z-iməs əşşərixa wa n Əttawret a d-osān əkkozat tēmad n awatay əd karadat tēmərwen dəffər awen, iqqəl as arkawal wen ab'as t-illa. ¹⁸ Amaran as iqqəl as əşşərixa a ihakkin təkāsīt ten, adi za ab'as imos as arkawal wa iga Məşşina y İbrahim a işxalan. Arkawal wen amaran, tarrayt-net as iga Məşşina arraxmat-net y İbrahim.

Tassaɣ d Əlməsix

¹⁹ Dağ adi mafel osa-du əşşərixa wa n Əttawret? Əşşərixa wa itiwaşata-du fəl a dutumman tēmazrəyt n aytedan iket di a d-itawad əzzurrəyya n İbrahim s ənta as iga Məşşina arkawal. Əşşərixa wen izzibbat-du əs tarrayt n angalosan, amaran aggadəm a imosan əməşşewəl dağ batu ten. ²⁰ Əməşşewəl amaran wər sər-əs təga addararat ar s ad t-illa awedan iyyan was z'işşiwəl, Məşşina amaran nəssan as ɣas-net a imos.

²¹ Awak almaɣna n awen as əşşərixa immizray arkawalan ən Məşşina? Kala Kala! Wər ilkem ad iga adi! Fəlas ənnar d-itiwakfa əşşərixa iyyan ihakkan tēməddurt taynayət, wədi illikan as ləkkum y əşşərixa as za tətəwəgrəw taqqat. ²² Kalar Əlkəttaban əmālan ās arat ketnet ila fall-as abakkad tarna fəl ad iqqəl ās: Arat was iga Məşşina arkawal-net kundaba inda fəl məzzəɣzan, fəl əddəlil ən təlɣudəla ən ɣaysa Əlməsix.

²³ Dat assa ən tarrayt ta n əzəɣzan, ig-anax əşşərixa iməskəsa, ittaf-ana har d-ewad alwaɣ wa dağ danaɣ-isannafalal Məşşina tarrayt ta n əzəɣzan as irəw təzaydu. ²⁴ Dağ adi əşşərixa a danaɣ-isassaɣadan har d-osa Əlməsix, fəl ad nəgrəw taqqat əs tarrayt ta n əzəɣzan. ²⁵ Amaran dad zamas tarrayt ta n əzəɣzan tosa-du, wədi ab'as danaɣ-isassaɣad əşşərixa.

²⁶ Fəlas ketnawan as tēmosam bararan ən Məşşina s əssəbab n əzəɣzan wa, dağ tassaɣ d Əlməsix ɣaysa. ²⁷ Awalla, ketnawan win tawasalmaɣnen dağ aman dağ tərtəyt d Əlməsix, Əlməsix en da a iqqalan zun telassay-nawan ta taynayət. ²⁸ Ab'as əzlayan Kəl-Əlyəhud, wala Kəl-Əlyunan, wala eklan, wala ilallan, wala əzlāyan meddan əd tədoden, fəlas ketnawan awedan iyyanda a tēmosam dağ tassaɣ d Əlməsix ɣaysa. ²⁹ Kud Əlməsix a kawan-ilan, wədi bararan n İbrahim a tēmosam, tēmosam iməkkusa-net əs tarrayt n arkawal wa das-iga Məşşina.

4

¹ Arat da was areɣ a dawan-t-anna: Amakkasu, iket mədrəy wər izlay d əkli, kuddey as ənta a ilan arat kul. ² Aytedan win dər-əs ənnəttafnen əd win ənnəttafnen əd təɣawşiwen-net as ilkam i tanat-nasan iket wər d-ewad alwaɣ wa imal abba-net. ³ Nakkanay da harwa ad nəmədrəy, wər nəlkem ar y əşşərədan win as təgla əddənət, nəmos zun eklan-nasan. ⁴ Mişan as d-ewad alwaɣ wa iskat Məşşina y awen, issəgla-du Barar-net, iggaz-du əddənət əs tarrayt ən təntut, ilkam y əşşərixa wa n Əttawret, ⁵ osa-du fəl ad isəddərfət aytedan win əmosnen zun eklan n əşşərixa. Osa-du deɣ fəl a danaɣ-akfu tarrayt n a danaɣ-iqbəl Məşşina dağ tişit ən bararan-net. ⁶ Amaran tişit-nana bararan ən Məşşina, ənta a fəl d-iga Məşşina dağ wallan-nana İnfəs ən Barar-net. İnfəs en da a idkalan əməsli igannu: «Abba! Abba!» ⁷ Dağ adi ab'as tēmosax akli, kalar barar ən Məşşina a tēmosa. Amaran dad zamas tēmosa barar ən Məşşina, wədi a kay-akfu Məşşina arraxmat tas iga arkawal-net i bararan-net.

Awa iššəwašan Buləs daɣ batu ən Kəl-Galatəya

⁸ Ənəyat Kəl-Galatəya! Kawanay əstizarat wər təssenam Məššina, təɣbâdam imalan ən bahu, təmosam eklan-nasan. ⁹ Mišan əmərədda, dad zamas təssanam Məššina, madeɣ dad zamas iqbəl-kawan Məššina daɣ tišit ən bararan-net, manəmmək as za tələsam ləkkum y əššərədan wər nənfa wala win as təgla əddənet, tələsam tišit n eklan-nasan? ¹⁰ Təsisahem wəllen ijilan, əd təlil əd təmeren, d elan wiyyad! ¹¹ Iššiwaš-i ad abbannan əššəxəl issohen wa əgeɣ fəl əddəlil-nawan.

¹² Ya imədrayan-in, are daɣ-wan ad təqqəlam šilaten-in dad zamas nak da əmosa šilat-nawan. Wər di-təgem talbast waliyyat. ¹³ Təkittəwam tarrayt tas dawan-əgeɣ isalan n Əlinjil əs tizarat a tat-imosan tarrayt ən təwərna-nin. ¹⁴ Təfrâgəm a di-talkim madeɣ tagləfam-i fəl əddəlil ən rəkkəm d əbrur ən təxəssa-nin. Mišan wər təgem awen! Kalar təgam-i əlqəbulat əs zun əmosaɣ angalos a d-ifalan Məššina, madeɣ Əlməsix ɣaysa iman-net.

¹⁵ Daɣ adi ma iga alxer ən man was kala tu-təgrawam? Fəlas əsilakanax əs ənnar immikkan adi, šittawen-nawan da a tanat-du-təkəkkərəm takfim-i-tanat. ¹⁶ Awak azangaw-nawan a əqqalaɣ əmərədda fəl as dawan-əmmala tidət?

¹⁷ Əssənət as aytədan di saknin-kawan as ədgâzan daɣ-wan mišan ənnəyaten-nasan wər oleynat. Tara ɣas a əgan a kawan-zəmməzzəyan dər-i, fəl ad təlkəmam y idufan-nasan, təzəzzəwem daɣ-san. ¹⁸ Olay wəllen gəlleɣat daɣ igi n awa olaɣan daɣ alwaq kul, wərgəɣ alwaq wad əlle ɣur-wan ɣas. ¹⁹ Bararan-in, nak əllâsa alɣazab fəl əddəlil-nawan, zun tantut tətaggazat amzur, iket wər ikna Əlməsix iguz ən man-nawan.

²⁰ Areɣ wəllen ad əlle ɣur-wan daɣ amazay wa, are deɣ a dawan-əššiwəlay s əmmək iyyan wər nəmos wa, fəlas iqqân aɣaf-in daɣ batu-nawan.

Masnət ta nəgraw daɣ əlqissat n Ənnəbi İbrahim

²¹ Əməlat-i: Kawanay a əranen ad tagim təməddurt a daɣ təlkâmam y əššəriɣa wa n Əttawret, awak masnət a wər təgem awa inna əššəriɣa? ²² Wərgəɣ ənnan Əlkəttaban: İbrahim ila əššin bararan, iyyan teraw-tu təklit, wa hadan teraw-tu tələllit? ²³ Wa teraw təklit ihəw-du əs tarrayt ta n attas n əggadəm, wa teraw tələllit amaran ihəw-du əs tarrayt ta n arkawal ən Məššina. ²⁴ Batu ta əlmital a təmos fəlas sanatat tədoden šin, əššin arkawalan ən tassaɣ a mosnət. Arkawal iyyan za iga fəl ədɣax wa n Sinay imos təhəwt ən bararan əmosnen eklan, amaran arkawal wa Hajara a tu-təmosat. ²⁵ Hajara amaran adɣax wa n Sinay a tat-imosan, ihân amaɣal n Arabəya, təmittal Yerusalam ta n əmərədda daɣ əddənet, fəlas təha əkkəlu ənta harkid bararan-net. ²⁶ Sa hadan Yerusalam ta təhat ijənnawan tələllit a təmos, amaran ənta a təmosat zun anna-nana. ²⁷ Fəlas ənnan Əlkəttaban: «*Fəliwəs tantut ta wər nətilu bararan, kam a wər ides aɣaraw ən barar. Ədkəl əməsli-nam wəllen takna tədəwit kam a wər nəzday təlawayt ta n əmzur. Fəlas bararan ən tantut ta tətawaksanat ad aɣəran win təntut ta wər izammazzay aləs-net igət.*»

²⁸ Kawanay amaran imədrayan-in, bararan as itiwagga arkawal-nasan a təmosam, zun İsəhaq. ²⁹ Mišan zun awas kala iga, wa d-ihəwan əs tarrayt ta n attas n əggadəm, əddəguz a itaggu wa d-ihəwan əs tarrayt ta n İnfəs ən Məššina, amaran arat wen da a igan har əmərədda. ³⁰ Awak wərgəɣ a ənnan Əlkəttaban: «*Əstəɣ taklit əd barar-net, fəlas barar wa n təklit wər z'inəməkusət əd barar*» wa n tələllit?

³¹ Daɣ adi imədrayan-in, əssənət as nakkanay wər nəmos bararan ən təklit, kalar bararan ən tələllit a nəmos.

5

¹ Əlməsix a danax-isaddarfen fəl ad nallallat. Awen daɣ a fəlas zəzzəwətət wəllen daɣ əlləllu wa, fəl ad wər təqqəlam əkkəlu.

Tədarfit n əlməsixitan

² Ənəyat, nak Buləs əmalax-awan kawanay əlməsixitan win wər nəmos Kəl-Elyəhud âs as təmmənkadam wər dawan-z-aknu Əlməsix wala. ³ Amaran arat wa ad t-ələsax emel y awedan kul wa itawasamankadan: Awedan wədi iwar-tu ad ilkəm y əşşərixa ketnet. ⁴ Təmmizzayam d Əlməsix kawanay win gammaynen taqqat əs ləkkum y əşşərixa; aba fall-awan arraxmat ən Məşşina. ⁵ Nakkanay amaran tarrayt n Infas wa Zəddigan as nəssəgad s ikus n aşşak i taqqat tas nəga attama n a danaq-qat-akfu əzəgzan. ⁶ Fəlas awedan was təlla tassağ gar-es d Əlməsix Үaysa, wər izlay əmənəkəd d iba-net. Wər Үur-əs imos arat ar əzəgzan. Əzəgzan amaran tara a tu-təsaknit.

⁷ Kawanay itittəy əzəgzan-nawan wəllen! Dağ adi ma dawan-iqqalan təsəwəq izzəbaz-kawan tarrayt wər nəmos ta n tidət ta n Əlinjil? ⁸ Tarrayt tas təqbalam iguz-net əddi, wər du-təfel wa kawan-d-iḡran, a t-imosan Məşşina. ⁹ Itawannu: «Arat ən xamira a isakafan tagəlla ketnet.» ¹⁰ Dər iga awen da ya, nak əgəx attama dağ Əməli Үaysa dağ talxa-nawan: Əgəx iduf n as wər za tagim imedranan əmmizraynen win-in. Mişan awedan wa sər-wan d-itawayan aşşawaşa a iqqal, ad awwaddab. ¹¹ Nak amaran imədrayan-in, ənnar emel a taggağ âs təga addararat s əmənəkəd, wədi məni əddəlil wa fəl tawadgaza harwa da? Kud arat wədi a sasaxra, adi za ətəwətəytay ən Үaysa fəl təgəttawt ab'as imos təsənkəft y aytedan! ¹² Amaran aytedan win kawan-əhanen əddi ətawayan-du sər-wan aşşawaşa dağ batu n əmənəkəd, əxrədanet azzam ən man-nasan!

Ənnəsixatan

Tarrayt ta n tara

¹³ Kawanay amaran imədrayan-in, iḡr-iwan-du Məşşina y ad taddarfem. Eges tədarfit ten ad wər təqqəl arat a sər-wan d ewayan ləkkum y arak deranan ən tara ən man. Kalar akkiyyan dağ-wan iqqəlet akli ən win hadatnen, iga awen əs tara. ¹⁴ Amaran əşşərixa wa n Əttawret kul as inda dağ batu iyyadda təmosat: «*Ad taga y əşşəqqay-nak tara ta təgəx i man-nak.*» ¹⁵ Ənkədat y ad tətənəmədidad zun imudaran, tətənəməggim talbast gar-ewwan, fəl ad wər tənəməhləkam.

Tarrayt ta n Infas wa Zəddigan əd ta n aggadəm

¹⁶ Arat da was arex a dawan-t-anna: Ayyiwat Infas wa Zəddigan ad annadu dağ təməddurt-nawan. As təgam adi, wər dawan-ilkem ad təmmožalam s arak deranan ən tara ən man. ¹⁷ Fəlas deranan win aggadəm iman-net, əllid a əmosan n Infas wa Zəddigan, Infas wa Zəddigan dəx əllid a imos ən deranan win aggadəm. Əgân əməzrəy wa n as a sər-wan d-awəy awen ad tammazzayam d igi n awa təram. ¹⁸ Amaran as imos as Infas wa Zəddigan a dağ-wan innodan, wədi ad ib'as fall-awan ixkam əşşərixa wa n Əttawret.

¹⁹ Imazalan win aggadəm iman-net əmmunan. Əmosan: Əzzəna d ammadas d igi n aratan win ogarnen taxxaramt, ²⁰ d igi n əmadraw əd şaxawan d əzzəngu d əməstan, əd manjağ d aşşar əd tara ən man d əzəmməzəy n aytedan d əzəmməzrəy-nasan ²¹ d iba ən təla n igda, d əməswəd, d əsəssikəy dağ tattay d aratan wiyyad olanen əd win. Ad dawan-ələsax emel harwa əmərədda âs: Aytedan win tagginen aratan win di wər z'əggəzan Taḡmar ta n Məşşina.

²² Aratan amaran win d-əfalnen Infas wa Zəddigan, əmosnen əllid ən win di, əmosan: tara əd təfalawist d alxer əd təzaydart əd man mallolnen, d əllux d əzəgzan, ²³ əd talmat, d ənudi dağ wallan-nana. Amaran wər t-illa əşşərixa işşakan alxalan win di. ²⁴ Awalla, aytedan win əkfanen iman-nasan y Əlməsix Үaysa, win di əkkasan-in dağ alxal-nasan tara ən man d arak deranan win dağ-san ənnodanen, əttəytayan-tan fəl təgəttawt ta fəl itawataytay Əlməsix.

²⁵ Dad zamas Infas wa Zəddigan a ħur du-təfal təməddurt-nana, nayyiwet-tu a daħ-na ixkəm.

²⁶ Ad wər nəqqəl aytedan əzzizwarnen iman-nasan. Mazzayatana əd tədləmt gar-ena d igi n attama daħ awa əlan midawan-nana.

6

Igi n awa olaħan y awedan kul

¹ Imədrayan-in, as ewad jarraba awedan iga ark əmazal a iqqal, kawanay a əlkamnen y Infas wa Zəddigan, səssiħədat-tu əs man lammodnen fəl a d-iqqəl tarrayt ta tolaħat. Ēnkədat wəllen əd man-nawan fəl a kawan-wər-awəd jarraba kawanay da.

² Akkiyyan daħ-wan idkəlet əzuk ən win hadatnen. Ēmmək en daħ as du-za-tassandim əlqanun wa n Ēlməsix; ³ fəlas wa igan i man-net iduf n as imos awedan zəwwəran, as iga awen wər imos wala, wədi bahu a itaggu i man-net. ⁴ Akkiyyan daħ-wan inzəret daħ mazalan-net. As inay as imazalan-net hossayan, əddi ad igrəw əddəlil n ad ifləs iman-net s əssəbab ən mazalan-net wərgəħ s ad išašalu iman-net d awedan iyyan. ⁵ Fəlas awedan kul kundaba ibdad fəl mazalan-net. ⁶ Awedan wa itawasasayrin awal ən Məššina, iwâr-tu ad idrəw ərrəzəħan-net kul əd wa t-isasayrin.

⁷ Ad wər tətəfam alxata: Məššina wər t-illa i z'ayyu isəmmədrəy-tu. Awalla, amasa wa inbal awedan ənta a du-z-aləy. ⁸ Illikan âs awedan wa igan imazalan win tara ən man, aroz-net ad t-iqqəl awa d-itaway ləkkum y arak deranan, a t-imosan ahluk. Mišan wa itaggin imazalan win d-əfalnen Infas wa Zəddigan, ad igrəw aroz a d-ifalan Infas wa Zəddigan a t-imosan təməddurt ta təħlalət.

⁹ Ad wər nəddəz igi n awa olaħan, as iga adi ad nəgrəw arozan daħ alwaq wa itawaskatan y awen, as wər nəqqəl dəffər-na. ¹⁰ Daħ adi iket di ad nəgraw tarrayt n awen, taggiwatanax awa infan aytedan kul, wəllen imədrayan-nana daħ əzəgzan s Ēlməsix.

Erruymatan win əlkamnen d assalaman

¹¹ Ēnəyat əlxərəfan win zawwarnen a. Ēfus-in as dawan-tan-in-kattaba. ¹² Aytedan win gammaynen a kawan-šəhhəššəlan âs iwar-kawan əmənəkəd, win di agamay a taggin a tan-əssəyməran aytedan. Amaran arət wa gammayan wəllen, a tan-wər-ədgezan aytedan fəl əddəlil n əzəgzan-nasan əs tamattant n Ēlməsix fəl təgəttawt.

¹³ Aytedan win tamankadnen da, wər əlkeman y əššəriħa fadda. Tara ħas a əgan a kawan-səmmənəkədan fəl ad agin ibaragan s awen. ¹⁴ Nak amaran wər ilkem ad sibaragax âr əs təgəttawt ta fəl itawataytay Ēməli-nana Ĥaysa Ēlməsix. Tarrayt ten daħ ən təgəttawt en ənta a du-təwayat as ark aratan n əddənət a kul əmosan sər-i a ammen, zund əmmək as nak da əmosax iri ammen daħ batu ta təqqalat əddənət.

¹⁵ Fəlas wərgəħ əmənəkəd wala iban-net a imosan əlməxsud, kalar axluk aynayan əs tarrayt n Ēlməsix a imosan əlməxsud. ¹⁶ Ihənəttətət Məššina y aytedan kul win əlkamnen y anamod wa, akf-en alxer, s əmmək was iga adi i tamattay-net!

¹⁷ A obazan ħur əmərədda, a di-wər-iləs awedan waliyyan əddəguz, fəlas elam-in əwarnat-tu təmijar ən ləkkum-in i Ĥaysa.

¹⁸ Ya imədrayan-in, əttâra s Ēməli-nana Ĥaysa Ēlməsix a kawan-ikfan arraxmat. Amin.

Širawt ta iktab Buləs i Kəl-Efez Assalam

¹ Awa nak Buləs, imosan anammazul n Elməsix Ƴaysa əs tərəddawt ən Məššina. Širawt ta təkka aytedan win əmosnen tamattay ən Məššina əhanen ayxəm n Efez, almaƳna aytedan win əxdalnen daƳ tassaƳ d Elməsix Ƴaysa. ² Egmaya daƳ Məššina di n Abba-nana, d Əməli-nana Ƴaysa Elməsix a kawan-ikfan arraxmat d alxer.

Təməddurt ta taynat, almaƳna təməddurt ta təgat daƳ tassaƳ d Elməsix

Təməddurt ta daƳ nəzzəƳzan s Elməsix

³ Təmmal i Məššina, imosan Abba n Əməli-nana Ƴaysa Elməsix! Ig-anax albaraka daƳ tassaƳ-nana d Elməsix əs tahakkay ta danaƳ-iga əkkulluk n albaraka wa d-izazzabbat Infas wa Zəddigan daƳ jənnawan. ⁴ DaƳ adi, əssənatanax as harwa dat əxluk n əddənət a danaƳ-isannafran Məššina y ad nəqqəl i-net əs tarrayt n Elməsix fəl a dat-əs nəqqəl aytedan zaddognen wər iwer a imosan lahan, fəl ad nagu təməddurt təha tara. ⁵ Məššina ənta a danaƳ-isannafran harwa daƳ tizarat y a danaƳ-agu bararan-net əs tarrayt ən Ƴaysa Elməsix. Awen daƳ a igrazan i Məššina, ⁶ amaran ig-ay fəl ad nəmməl tanaya-net d arraxmat-net tas danaƳ-isabbalal əs tarrayt ən Barar-net a ikna tara.

⁷ Tartəyt əd Barar-net en da a dana-təkfət tədarfit əs tarrayt n əzni-net. Tədarfit ten təmos təsureft ən bakkadan-nana, amaran nəgrāw-tat s arraxmat ən Məššina wər nəla əddukad ⁸ a fall-ana d-izazzabbat s igət, ikf-anax əzzənəfan kul ən masnaten d əgərri. ⁹⁻¹⁰ Awen ig-ay s əsusən wa daƳ-na iga əssir ən tara-net. Əssir wen imos əšidəw n aratan kul win əhanen ijənnawan əd win əwarnen amaƳal fəl ad ittəf Elməsix tanat-nasan. Tarrayt ten ig-et-du harwa a irəwan s əssəbab n Elməsix, amaran awen da das-igrazan. Igā awen fəl ad assandu tarrayt ten daƳ alwaƳ wa das-iskat.

¹¹ Isinafran-ana deƳ Məššina harwa daƳ tizarat, əs tarrayt n Elməsix y ad nəqqəl i-net inimannak awen əd tarrayt ta d-iktab Məššina s ənta a itaggin aratan kul s əmmək was tan-d-ikta əd was iga tanat-nasan. ¹² Məššina ig-ənaƳ awen fəl ad nagu təməddurt a daƳ-as nətaggu təmmalen fəl tanaya-net, nakkanay win azzarnen igi n attama daƳ Elməsix.

¹³ Kawanay da təslām y awal wa imosan tidət a t-imosan isalan n Əlinjil win kawan-hakkinen əlxillas əs tarrayt n Elməsix. Amaran as təzzəƳzanam, wədi issəwar-kawan Məššina əs tarrayt n Elməsix ejwal issiknan əs tamattay-net a təmosam. Ejwal wen, imos-tu Infas wa Zəddigan as iga arkawal-net. ¹⁴ Infas wa Zəddigan en ənta a imosan tədagart ta tazzarat daƳ awa dana-z-akfu Məššina daƳ jənnawan. Məššina issiwar-anax ejwal-net iket di a du-tətawad tədarfit ən tamattay ta iskat i man-net. Arat wen kul ad t-agu Məššina fəl ad təwəgginat təmmalen i tanaya-net.

Təwatray ən Buləs i Kəl-Efez

¹⁵ Awen daƳ a fəlas, nak da, dəffər as əsleƳ əzəƳzan-nawan s Əməli Ƴaysa, əd tara ta təssəknam i mizdagan ketnasan, ¹⁶ wər kala ad əməzzayax əd godan i Məššina daƳ batu-nawan alwaƳ kul wa kawan-d-əkteƳ daƳ təwatriwen-in. ¹⁷ EƳammaya daƳ Məššina imosan Əməli n Əməli-nana Ƴaysa Elməsix, imosan deƳ Abba wa ilan tanaya, a kawan-akfu Infas wa ihakkin masnat, isinəfilil deƳ aratan win əhanen ətənkul, fəl a tu-təssənəm. ¹⁸ Gammaya daƳ-as deƳ ad aləm iwəllan[-nawan] fəl ad

təknim əgərri n awa imos attama was kawan-işra, təssənam dəx awa dər ogdanat təhussay ən saşmar wa igarraw Məşşina şur-na nakkanay a n mizdagan, ¹⁹ təssənam dəx awa dər togda təzzəwwərt wər nəla əddukad ən tarna-net sər-naş nakkanay a əzzəgzannen əs mazalan əssohatnen ən tarna-net. ²⁰ Tarna-net ten işşışgal-tat dəx Əlməsix, s əsənkər wa t-id-iga dəx təməttant d əsəşşimi wa t-iga dəx əşil-net dəx jənnawan. ²¹ Ig-ay dənnəg taşmar kul əd təmənukəla kul, əd tarna kul, d əlxəkum kul. Iga esəm-net dənnəg esəm kul wa t-illan gər za dəx azzaman win əmərədda, wala dəx azzaman win d-əzaynen. ²² Arat kul ig-ay daw daran-net, təzzar ig-ay əmuzar n arat kul dəx Əlkənisat, ²³ təmosat taşəssa-net. Taşəssa en amaran ənta a dəx ikannu Əlməsix əlkamalat, ənta a ihan edag kul.

2

Təməttant əd tanakra əs tarrayt n Əlməsix

¹ Amaran kawanay aba-kawan fəl aganna wa iqqalan tassaş əd Məşşina s əssəbab n arak mazalan-nawan əd bakkadan-nawan. ² Dat awa təşşokalam dəx arak mazalan win, təlkāmam y alxal wa n əddənet, təlkāmam y awa ira əmuzar ən kəl ətənkul win alhawa, a t-imosan infas wa ixkaman dəx nəmməzray ən Məşşina dəx əddənet. ³ Ketnana as tizarat nəmos arat dəş-san. Dat awa nəlkām y arak deranan ən təşəswen-nana, nətamazal awa əranat təşəswen-nana əd medranan-nana. Dəx adi təsəlkamt-nana əstizarat, əs nakkanay da, a danaş-iwər attadib ən Məşşina wa iwaran aytedan kul.

⁴ Mişan təhanint ən Məşşina wər təla əddukad. Amaran əddəlil ən tara tagget ta danaş-iga, ⁵ nakkanay as zun danaş-aba s əssəbab n ark mazalan-nana, ənta a fəl danaş-ikfa təməddurt əs tarrayt n Əlməsix. Arraxmat ən Məşşina as təgrawam efsan. ⁶ Issənkər-ana-du nəddew d Əlməsix Şaysa, isayşam-ana dəx jənnawan nəddew dər-əs fəl əddəlil ən tassaş ta dər-əs nəga. ⁷ Awen ig-ay fəl ad assaknu dəx azzaman win d-əzaynen igət wər nəla əddukad a təga arraxmat-net əs tarrayt n əlluş-net y-anay fəl əddəlil ən tassaş ta nəga d Əlməsix Şaysa. ⁸ Fəlas illikan əs arraxmat as təgrawam efsan, əs tarrayt n əzəgzan-nawan. Amaran wərgəş kawanay a şur d-ifal awen, kalar təhəkkut ən Məşşina a imos. ⁹ Wərgəş imazalan win olaşnen a hakkinen efsan, ənnar adi a igan əzzəzwəran aytedan iman-nasan. ¹⁰ Şixəllak ən Məşşina a nəmos, a d-ixlāk əs tarrayt n Əlməsix Şaysa fəl ad nagu təməddurt dəx nətamazal awa olaşən əs Məşşina a t-isammatagan harwa dəx tizarat y a tu-nammazal.

Tamattay taynayat: Tamattay ta n Məşşina

Kəl-Əlyəhud əd win tan-wər-nəmos əgən alxer əs tarrayt n Əlməsix

¹¹ Dəx adi aktiwat arat wa: Dat awa təlām alşalamat dəx təşəswen-nawan təssiknat as wər təmosam Kəl-Əlyəhud. Aytedan win ənnanen əmminkadan, gannin wər təmmənkadam. Əntanay amaran əmənkəd-nasan wər imos ər arat əgən fassan n aggadəm. ¹² Aktiwat alşalat ta təham əstizarat. Azzaman win di wər təqbelam Əlməsix, itiwagdal-awan tişit ən tamattay n İsrayil. Təmosam inaftaşan dəx batu ta təqqalat arkəwal ən tassaş wa iga Məşşina. Alwaş wədi wər təlem attama waliyyan, wər təlem tassaş waliyyat əd Məşşina dəx əddənet. ¹³ Mişan əmərədda əs tarrayt ən tərtəyt-nawan d Əlməsix Şaysa, kawanay win as kala ad təggugam Məşşina, təhozam-du əs tarrayt n əzni n Əlməsix.

¹⁴ Əlməsix ənta a imosan alxer-nana, ənta a issərtayan Kəl-Əlyəhud əd win tan-wər-nəmos ig-en arat iyyanda, irza taşərt ta tan-təzammazayət, ikkas ənəməzənga gar-essan, əs tarrayt ən taşəssa-net ta ikfa fəl təgəttawt. ¹⁵ Arat wen ig-ay s ikus wa din-iga Əttawret d əlwajiban-net d əşşərədan-net. Iga alxer gər Kəl-Əlyəhud əd win

tan-wər-nəmos əs tarrayt ən tassaq ta dər-san iga, ig-en tamattay iyyadda taynayat. ¹⁶ Təmattant ta iga Əlməsix fəl təgəttawt, ənta as issərtay Kəl-Əlyəhud əd win tan-wər-nəmos, ig-en tağəssa iyyadda. Ig-asan alxer əd Məşşina, ikkas ənəməzəngə garesan s ətəwətəytəy wa iga fəl təgəttawt. ¹⁷ Amaran osa-du y a dawan-agu isalan n alxer, a tan-imosan Əlinjil, kawanay a namaggagnen əd Məşşina, iməl deyx alxer i win t-əhoznen. ¹⁸ Id Əlməsix ənta a ifragan a danağ-izənnəmihez ketnana əd Məşşina di n Abba, əs tarrayt n Infas-net di Zəddigan.

¹⁹ Emmək en dəy as ab-as təmosam inaftayan, wala iyərab. Kalar arat iyyanda a təmosam kawanay əd tamattay zəddigat ən Məşşina, təmosam kəl ahan ən Məşşina. ²⁰ Təmosam ehan əs inəmmuzal d ənnəbitan a mosnen şisəttəytay-net, imos Əlməsix Yaysa təhunt ta n təsəkbəlt-net. ²¹ Şihun şin as ikras ahan wen, kul əknənat ənəməttaf əs tarrayt ən tərtəyt d Əlməsix, əqqalnat ehan zəddigan n əlyibada əs tarrayt ən tassaq d Əməli. ²² Kawanay deyx tərtayam təqqalam əkərrus iyyanda fəl ad təqqəlam təməzduq ən Məşşina əs tarrayt n Infas wa Zəddigan. Awen kul iga əs tarrayt ən tərtəyt-nawan d Əlməsix.

3

Buləs iməl tarrayt təmosat əssir ta d-iga Məşşina – Əşşəyal ən Buləs

¹ Awen dəy a fəl əmosa nak Buləs, amaskasaw n Əlməsix [Yaysa] fəl əddəlil-nawan, kawanay a wər nəmos Kəl-Əlyəhud. ² A igan da təgrəwam isalan n əzuk wa di-issəwar Məşşina dəy batu n arraxmat-net ta di-tətawakfat fəl tənfa-nawan. ³ Almağna Məşşina a di-isannafalalan əssir ən tarrayt ta d-iga, s ənta a əktaba da imos arat ən təfir. ⁴ As təğram awa əktaba da, ad tənəyam awa dər-ogda əgərri a əgeyx y əssir n Əlməsix. ⁵ Əssir wa, wər tətawakfa masnat-net y aytedan n azzaman win okaynen, zun əmmək was itawasanafalal əməərədda əs tarrayt n Infas wa Zəddigan i nəmmuzal n Əlməsix d ənnəbitan-net a zaddogən. ⁶ Əssir wen ənta da: Aytedan win wər nəmos Kəl-Əlyəhud, əd məzzəgzan s Əlməsix win əmosnen Kəl-Əlyəhud əgrəwan təkəsət, əqqalan tağəssa iyyadda, əqqalan deyx arat iyyanda əs tarrayt ən tassaq ta əgan d Əlməsix dəy arkawal wa ihan Əlinjil. ⁷ Əlməsix en dəy as əqqalağ amaşşəyal-net a t-ixbâdan, s əssəbab ən tarna ən təhəkkut ən Məşşina təgât s arraxmat-net ta əgrawa.

⁸ Nak a ogaran təmmədrəyt dəy məzzəgzan di ən mizdagan ən Məşşina ketnasan, mişan əgrəwəyx arraxmat ta, a tat-imosan: Igi y aytedan win wər nəmos Kəl-Əlyəhud isalan n Əlinjil, imosan isalan n arraxmaten n Əlməsix as tu-wər-illa i ifrâgan əgərri-nasnat. ⁹ Sənnəfiləla deyx y aytedan [kul], əmmək was innəzzam Məşşina tarrayt ta, har tat-iyrad əsəkməl. Tarrayt ten, harwa dəy tizarat a tat-iga Məşşina a d-ixlakan arat kul, təmos əssir. ¹⁰ Ənəfilal wa təga tarrayt ta, ənta a du-z-awəyan əməərədda as tağmaren əd təmənukəla şin jənnawan, ad əzdəynat assayfaten wər nəla əddukad a təmos masnat ta n Məşşina. Arat wen tarrayt n Əlkənəsat as z'agu. ¹¹ Amaran awen ad agu s əmmək was t-innəzzam Məşşina imos arat ixlalan, ikmal-du deyx dəy Əlməsix Yaysa Əməli-nana. ¹² Tassaq ta nəga d Əlməsix Yaysa əs tarrayt n əzəgzan sər-əs a danağ-təkfət tədarfit n ad nəfrəg ənəmihez əd Məşşina əs təfləst. ¹³ Dəy adi əgmaya dəy-wan ad wər təqqəlam ələqqam fəl əddəlil n alğazab wa tagga da fəl əddəlil-nawan. Alğazab wa ənta a kawan-z-akfin tanaya.

Təwatray ta iga Buləs fəl ad tətəwəssən tara ta n Məşşina

¹⁴ Awen dəy a fəl əssəjada dat Məşşina di n Abba, ¹⁵ s ənta a igan esəm y id t-illa ayaşwan kul dəy jənnawan d amağal. ¹⁶ Awalla! Əgməyay dəy-as ad aknu əssəsuhı ən wallan-nawan əs tarrayt n Infas-net wa Zəddigan s əssəbab ən tanaya-net

təkmâlat. ¹⁷ Onsâyaq-qu ad izdəx Əlməsix dəx wallan-nawan, əs tarrayt n əzəgzan-nawan, id təqqalam aytedan zizawatnen wəllen sihaddan dəx fəl tara. ¹⁸ Onsâyaq-qu dəx adi ad taknim əzəzzəwi dəx əzəgzan-nawan, təfrəgam ad təməsəsəgrim əd məzzəgzan di zaddognden kul dəx batu ən tara n Əlməsix təkñât ilwi fəl aganna kul, ¹⁹ təzdəyam dəx tara ten təllât dənnəg masnat kul. Əddi a kawan-za-tədkər tanaya ən Məşşina s əmmək ikmâlan.

²⁰ Əmmək en dəx âs Məşşina ifrâg ad agu y arat kul igi ofân wa dəx-as nəgmay, ofa dəx awa nəxil. Arat wen, itagg-ay əs tarna-net ta dəx-na təşxalat. ²¹ Igrəwet Məşşina ətəwəsəxmar dəx Əlkənisat igâ awen dəx tassağ d Əlməsix dəx azzaman kul har faw. Amin.

Əşşərədan aynaynen: Əsənnəfiləl n ətəwəşşinay wa danay-itawaggan

4

Əzəzzəwi dəx ad təqqəl Əlkənisat arat iyyanda, a t-imosan təxəssa n Əlməsix – Ənəmännək ən məzzəgzan

¹ Dəx adi arat da wa dəx-wan gammaya, nak imosan amaskasaw fəl as əxbadəx Əməli: Kawanay a iyra Məşşina, agiwat alxal inihaggan d ətəwəxra wa tətəwaggam den. ² Əqqəlat faw aytedan wər nədkel iman-nasan, tilmadam, təqqəlam iməzəzzəydar. Nəməqbəlat gar-ewwan əs tara. ³ Ədgəzat faw dəx agamay ən tartəyt ta ihakku Infas wa Zəddigan əs tassağ n alxer ta təllat gar-ewwan. ⁴ Təxəssa iyyadda a tu-təllat, d Infas iyyanda. Əmmək en dəx as Məşşina iyr-iwan-du s ad tagim attama iyyanda, a t-imosan was du-tətəwəxram. ⁵ Əməli iyyanda a t-illan, ill-ay əzəgzan iyyanda, d alamağ dəx aman iyyanda, ⁶ Məşşina dəx iyyanda a imos, imos abba n awedan kul, ixkâm fəl i t-illân kul, itaggu igitan-net əs tarrayt n id t-illa iyyan, irtây dəx d id t-illa iyyan.

⁷ Dər iga awen da ya, akkiyyan dəx-na igrâw arraxmat ən Məşşina, ewâl awen s adagar wa t-ikfa Əlməsix dəx əşşəxəl-net. ⁸ Awen dəx a fəl ənnan Əlkəttaban: «*Iggəzzay əs daggan win ədkalnen, ewây win əhanen təla, təzzar iga şihəkkuten y aytedan.*» ⁹ Ma imos almağna ən batu ta n «iggəzzay»? Wərgəx almağna n awen as iras har imal daw amağal? ¹⁰ Wa d-izzəbben, ənta a iggəzzayan imal dənnəg jənnawan kul fəl ad idnəy edag kul d arat kul.

¹¹ Amaran Əlməsix, ənta a igan aytedan wiyyad inəmmuzal, iga wiyyad ənnəbitan, iga wiyyad imaggan ən salan n Əlinjil, iga wiyyad imadanan əd məssəsəxra. ¹² Şihəkkuten şin den ig-enat Əlməsix fəl əsəssuhi d əsəkməl ən məzzəgzan, fəl ad əfərgan əşşəxəl was təwəxran, y ad taknu təxəssa n Əlməsix assahat. ¹³ Əmmək en dəx as ketnanəx as za nawəd ənəmənnək dəx əzəgzan, iga awen dəx təməzdəyt ən Barar ən Məşşina. Təsəlkamt n awen as ad nəqqəl iməzzəgzan əkmələn, tənifalal dəx-na tişit təkmâlat n Əlməsix. ¹⁴ Əddi ad z'ib'as nəmos bararan madrornen, əddagnen sa əd sa əbbatan-tan əzzənəfan ən səssəxritan taggin nəsbuha ən məkkərras saxraknen aytedan. ¹⁵ Kalar əddi ad za nəmmal tidət, nag-as emel igân əs tara, nəttəy dəx əkkulluk n anamod dəx tarrayt ən wa imosan eğaf-nana, almağna Əlməsix. ¹⁶ Ənta en dəx a isadwalan təxəssa ketnet, ənta dəx a xur du-təgarraw təxəssa assahat-net, iga awen dəx tara. Ənta dəx a isannamannakan təxəssa tənəmattaf əs səmməxras əssohatnen fəl ad təfrəg təslət kul igi n əşşəxəl-net.

Aggadəm wa irəwan d aggadəm wa aynayan

¹⁷ Dəx adi əggəyyəx əsilakanəx-awan s esəm n Əməli as: Wər imməkkan ad tələsam igi ən mazalan win taggin aytedan win wər nəmos Kəl-Əlyəhud, a wər

nəlkem ar i tayttay-nasan təmosat şibənnan. ¹⁸ Tayttay-nasan wər tat-ihə ənnur, əmosan inaftaxan i təməddurt ta təssəxmarat Məşşina s əssəbab n əljəhəl-nasan a sər-san du-tewây tağart ən wallan-nasan. ¹⁹ Ab-as əssanan awa olağan wala awa wər noleğ. Əşşokalan dağ təmazrəyt, taggin imazalan zizallatnen aggadəm, d iba n təla n igda dağ əzzənəfan kul ən mazalan samadasnen, əknân tara n əddənet.

²⁰ Mişan kawanay wərgex əmmək wen as təssanam awa imos Elməsix. ²¹ Dad zamas təgrâwam isalan n Elməsix, tətawasasaxram dağ tørtəyt dər-əs, wədi tətivasâsanam tidət ta tēhât Ƴaysa. ²² Almağna n awen ad tammazzayam d alxal-nawan wa irəwan, a t-imosan alxal n aggadəm was kala a tu-təmosam, tawayan arak deranan-net s əxruk. ²³ Əqqələt aytedan işişanay Infas wa Zəddigan isimattay taytwen-nawan. ²⁴ Zund əmmək as ilassu awedan tabdoq, təqqələt təbdoq-nawan alxal aynayan wa d-iga Məşşina. Alxal wen, itinəfilil dağ taqqat əd tazdak şin təhakku tidət.

²⁵ Awen dağ a fəlas mazzayat d igi ən bahu. «*Akkiyyan dağ-wan işşiwəlet tidət Ƴas y əşəqqaq-ğ-net*», id akkiyyan dağ-na taslət a imos ən win hadatnen. ²⁶ «*As kawan-iggaz alham, ad wər tagim abakkad.*» Ad wər tudu təfuk ih-iwan alham. ²⁷ Ad wər taləmam y Iblis tarrayt as d-iggaz. ²⁸ Wa imosan abaydag ammazzayət əd şikra, işşəşxəlet şixurad-net, işxəlet əs fassan-net fəl ad igrəw tənfa a za uzan i maddararan.

²⁹ A du-wər-təgməd batu waliyyat labasat imawan-nawan. Kalar ad wər tətəggim ar batuten hossaynen a za təggəz tənfa, as təga addararat s awen, əqqələnət dey arraxmat i wa dasnat-ıslan. ³⁰ Ad wər tətəzzəkənzəram Infas wa Zəddigan ən Məşşina, fəlas tarrayt n Infas wa Zəddigan en as kawan-issəwar Məşşina ejwal-net y əzəl wa n tədərfit ta n tətərəst. ³¹ Təgmədət-kawan i tu-təlla təssəməmt, d əğşəşi, d alham, əd təhərəşset, d ərrəbdan, d a iqqal aşşar. ³² Tinəməggiwat awa olağan gar-ewwan, akkiyyan iqqəl awedan təha təhanint, ləmmid i midiwan-net. Akkiyyan dağ-wan isurəfet i win hadatnen zund əmmək as dawan-isoraf Məşşina əs tarrayt n Elməsix.

5

Agiwat təməddurt təğât dağ ənnur

¹ Dad zamas bararan ən Məşşina ikna tara a təmosam, wədi əlkəmat y almasal wa-net. ² Əqqələt aytedan əşşokalnen dağ tara, zund əmmək was danağ-ira Elməsix har as ikfa iman-net i Məşşina, imos təkəkut əd təkutay təlât Ƴur-əs ađu izodan. ³ Nəməggəgat d əzzəna, əd mazalan samadasnen a əqqalan, əd tara n əddənet. Aratan win di a du-wər-təmmadkel batu-nasan fadda Ƴur-wan. Awen dağ as ihor ad t-agin mizdagan ən Məşşina. ⁴ Ad wər tətəggim aratan jargonnen wala batuten wər nəla almağna âs zun tanat-iga əmeskel, wala batuten jargonnen. Adi wər itəwəggü. Kalar taggiwat igodan i Məşşina. ⁵ Fəlas əssənət wəllen as, awedan kul wa itaggin əzzəna, wədi immidas, iga attama-net dağ ərrəzəğan n aytedan, almağna ixbâd əssənəman, wədi wər z'igrəw adagar waliyyan dağ tağmar ta n Elməsix əd Məşşina.

Agiwat təməddurt ta taggin aytedan əhânen ənnur ən Məşşina

⁶ A kawan-wər-akkarras awedan waliyyan wala issəxrək-kawan əs batuten ən bannan, fəlas arat wen ənta a d-itawayan alham ən Məşşina s aytedan win nəffəllag. ⁷ Dağ adi ad wər tilem tassağ waliyyat d aytedan win. ⁸ Fəlas illikan âs dat awa kala ad təham şiyyay, mişan əmərədda tēhâm ənnur dağ tørtəyt d İməli. Agiwat alxal wa taggin aytedan əhanen ənnur, ⁹ fəlas tənfa ta d-itaway ənnur təmos əzzənəfan n aratan kul win olağan, əd win oğadnen əd win əmosnen tidət. ¹⁰ Dad zamas tēhâm ənnur, wədi gammayat wəllen d ad təssənam awa igrəzan y İməli. ¹¹ Amaran ad wər tədrəwam wala əd mazalan ən bannan n aytedan win əhanen şiyyay, kalar tugəyat

sər-san təsafaggim-tan. ¹² Fəlas illikan as awa taggin aytedan win di daɣ əssir, isikarakad fadda awal daɣ batu-net. ¹³ Mišan as əffəggan aratan win, əwaran azzahir, ad nəfiləlan mazalan-nasan ezal a mallan. ¹⁴ Amaran arat kul wa daɣ innəflay ənnur, wədi ənnur a imos. Awen daɣ a fəl itawanna:

«Ənkər-in kay wa insan,
 Ənkər-in daɣ nəmməttan,
 Eddi a fall-ak
 isəmmələwlew Elməsix ənnur-net.»

¹⁵ Daɣ adi ənkədat wəllen y alxal-nawan, ad wər təqqələm zun imeskelan, kalar əqqələt imalan ən tayttay. ¹⁶ Ad wər təsabannanam šimazayyaten šin təgarrawam, fəlas ark azzaman a nəha. ¹⁷ Awen daɣ a fəlas ad wər təqqələm zun aljahilan, kalar əqqələt aytedan əgranen awa fall-awan ira Əməli. ¹⁸ Amaran ad wər təsamaswadam iman-nawan s esmad, arat wədi əjəmməjəlləd a z'agu təməddurt-nawan. Kalar əqqələt aytedan idnây Infas ən Məššina, almaɣna n awen as: ¹⁹ tinəməggiwat əlməxizatan gar-ewwan əs təsarnaten n Azzabur, əd təgaytalen, əd sakkan a d-əgmədnen ɣur Infas wa Zəddigan. Agiwat isakkan əmosnen təmməlen ən Məššina. Agiwat awen y Əməli s əwəl iyyanda. ²⁰ Tigudəyat faw arat kul i Məššina di n Abba, s esəm n Əməli-nana Ƴaysa Elməsix.

Inəmad ən tassaɣ win aynaynen

Tassaɣ gər aləs əd taɣurəs – Aɣaywan n əlməsixitan

²¹ Akkiyyan daɣ-wan abbardaget i win hadatnen, təgām awen daɣ təksəda n Elməsix. ²² Šidoden, bardagmat i meddan-nakmat zun əmmək as təbbərdagmat y Əməli; ²³ id aləs ənta a imosan əmuzar ən təntut zund əmmək as Elməsix a imosan əmuzar n Əlkənisat təmosat taɣəssa-net, amaran ənta iman-net a imosan Ənəsəfsi-net. ²⁴ Zund əmmək as təbbərdag Əlkənisat y Elməsix, tantut kul tabbardaget y aləs-net daɣ arat kul.

²⁵ Meddan, iriwat šidoden-nawan, s əmmək as ira Elməsix Əlkənisat har as iman-net a ikfa fəl əddəlil-net, ²⁶ fəl a tat-iskət əs man-net dəffər as tat-izzizdag s aman, almaɣna Awal ən Məššina. ²⁷ Awen igmay sər-əs ad taknu Əlkənisat šihussay, wər tat-təwer a imosan tətənəqqet, wala ənəkəmmi, wala arat zun awen, fəl ad tizdag daɣ a imosan lahan. ²⁸ Əmmək en daɣ âs meddan da iwâr-tan ad iren šidoden-nasan zun tara ta əgan i man-nasan. Awedan wa iran taɣurəs, wədi iman-net a ira. ²⁹ Illikan âs wər kala ad itawanay awedan ikyâdan taɣəssa-net. Kalar awedan əšətši a itaggu iman-net, innittaf əd taɣəssa-net zun awa iga Elməsix y Əlkənisat, ³⁰ id nakkanay šisəllad ən taɣəssa n Elməsix a nəmos. ³¹ «Awen daɣ a fəl z'ifəl aləs abba-net d anna-net aglu irtəy əd taɣurəs əqqələlan taɣəssa iyyadda.» ³² Arat wa ənne da daɣ batu n Elməsix d Əlkənisat, imos əssir zəwwəran ən Məššina. ³³ Xasil əkkulluk n iyyan daɣ-wan agiwet i taɣurəs tara ta iga i man-net, tantut dəɣ təssəxməret aləs-net.

6

Tassaɣ gər bararan əd marwan-nasan

¹ Bararan, bardagat i marwan-nawan [zun as təbbirdagam y Əməli], fəlas awen daɣ a oɣadan. ² Alwajib wa azzaran as iga Məššina arkawal n as ad ilu arozan, a inna: «Səɣmər abba-nak d anna-nak, ³ fəl ad təgrəwax təfalawist, tileɣ taɣrəst tagget daɣ əddənet.»

⁴ Kawanay amaran abbatan, ad wər təšixəšəšem bararan-nawan, kalar sassayriwat-tan, tagim-tan daɣ tarrayt təmələm-asan awa fəl irɣam Əməli.

Tassaɣ gər eklan əd məssawsan

⁵ Eklan, bardagat i mæssawwan win əddənet əs saɣmar əd təksəda. Agiwat awen s əwəl iyyanda, zun əs Elməsix as təbbərdagam. ⁶ A dasan-wər-tətaggim əššəxəl olâxan fəl as kawan-ewalan, zun as wər tagəmməyam ar awa igrazan y aggadəm. Kalar agiwat y əššəxəl wa igi n əs eklan n Elməsix a təmosam. As tu-tətaggim təgamməyam s əwəl iyyanda a du-təssəxsəlam tara ən Məššina. ⁷ Agiwat-asan əššəxəl igân əs man ərdânen, zun as Əməli as təşxalam, wərgəx aggadəm. ⁸ Təssanam as: Arat kul olağan wa iga awedan, ad igrəw maruzat-net ɣur Əməli, gər imos awedan wen akli wala əlləlli.

⁹ Kawanay deɣ mæssawəs n eklan, agiwat aqqad en da y eklan-nawan. Ayyiwat-tan šihərəšša, id təssānam as Əməli a ihan ijənnawan ənta a imosan məššikkawan kawanay dər-san. Əməli amaran wər fall-as t-illa igi ən təmərıt.

Təbəllant əd talbast: əttəfat aɣər wa n Məššina

¹⁰ Xasil, a obazan ɣur əmərədda, əgməyat daɣ Əməli ad isəssuhət tartəyt-nawan d Elməsix əs tarna-net wər nəla əddukad. ¹¹ Əttəfat təzoli n əməgər ta n Məššina fəl ad təzməram i təmərkas n Iblis, ¹² id təbəllant ta nəga, wərgəx aytedan a dər tat-nəga əmosnen taɣəssa d əzni, kalar taɣməren, d əlxəkuman, əd muzaran əlanen tarna əd fərregat a tan-imosan taɣməren šin əxkamnen daɣ šıyyay əd kəl ətənkul win əhanen ijənnawan tawayan-du təkma a dər nəmməgar. ¹³ Awen daɣ a fəlas əttəfat təzoli n əməgər ta n Məššina fəl ad təfrəgam zəmmerat y ark əzəl, taqqamim da wər təqqəlam dəffər-wan daɣ təbəllant ta təgam dəffər as du-təssifalam dənnəg aratan win den.

¹⁴ Xasil zəzzəwətət daɣ əzəgzan-nawan, almayna n awen əs: Təqqəlet tidət əsatəb was totabam; təqqəl taqqat asalsaw n əməgər wa təzlagam. ¹⁵ Səmmutəgat i təbəllant ta dər d-osa Əlinjil n alxer wa nəzzəgzan, iqqəl Əlinjil en zun iɣateman-nawan. ¹⁶ Dənnəg adi kul, iqqəlet əzəgzan aɣər-nawan. Ənta a kawan-z-akfin fərregat n ad tanɣim abalagleg kul wa z'intəs Iblis. ¹⁷ Səwərat təkəbbut ta n əlyillas, təzlagam takoba ta n Infas wa Zəddigan a tat-imosan Awal ən Məššina.

¹⁸ Tattarat faw da əs tilalt n Infas wa Zəddigan, ad tətaggim əzzənəfan kul ən təwatriwen, əd mansayan ən Məššina. Əgləyat daɣ awen, a tu-tətaggim əs zəmmerat, ad tətaggim deɣ šiwatriwen i məzzəgzan di ən mizdagan ketnasan; ¹⁹ a di-tanat-tətaggim nak da fəl ad əgrəwəx masnat n awal, əššiwələx s ikus n aššak, aɣax isalan n əssir n Əlinjil əs tanaya. ²⁰ Əlinjil en daɣ as əmosax almawakkil-net daɣ əddənet, amaran əddəlil-net a fəl aheɣ iɣunan. Tattarat-in fəl ad t-əmmala y aytedan s ikus n aššak, s əmmək was ihor a sər-əs əššiwəla.

Assalaman win əlkamnen

²¹ Amadray-nana Tişik wa n əməri-nin imosan amaššaxal iɣdâlan n Əməli, a dawan-əgu kawanay da isalan-in kul, fəl ad təssənam alxalat ta aheɣ d awa tagga. ²² Əgməyax-in əsuki wa dawan-t-in-z-aga, fəl a dawan-əgu isalan-nana, aləm-awan fəl man.

²³ Onsaya Məššina di n Abba d Əməli ɣaysa Elməsix ad akfu imədrayan-nana kul alxer əd tara daɣ əttâfan əzəgzan-nasan. ²⁴ Ya Məššina təgeɣ arraxmat-nak y aytedan kul win əranen Əməli-nana ɣaysa Elməsix, əgân-as tara wər nətəməttəy.

Širawt ta iktab Buləs i Kəl-Filib

Šihulawen

¹ Awa nak Buləs əd Timotay əmosnen eklan n Elməsix Yaysa. Nəhul-in aytedan kul n əyrəm ən Filib win əmosnen arat day tamattay ən Məššina əs tərətəyt-nasan d Elməsix Yaysa, əd muzaran n Elkənisat əd madhalan-nasan. ² Əgmâya day Məššina di n Abba-nana d Əməli Yaysa Elməsix a fall-awan d-izazzabben arraxmat d alxer.

Igodan əd təwatriwen

³ I kawan-d-əktəy ad əggudəyay y Əməli-nin Məššina. ⁴ Šiwatriwen kul šin dawan-tagga, fawda təfalawist a day-wan tanat-tagga, ⁵ fəl əddəlil ən tədhəlt ta di-tətaggim day əzəwwəziwəz n Əlinjil, a d-obazan yur əzəl wa azzaran har əmərədda. ⁶ Fadda əkkasay aššak as, əššəxəl olağan wa day-wan issənta Məššina əddi, wər tu-z-izzərəz iket wər t-issənda əzəl wa day du-z-azzabbat Elməsix Yaysa. ⁷ Wərgəy bannan ifarray əwəl-in y adi day talxa-nawan ketnawan fəlas əkneq-qawan tara kawanay win dər-i ədrawnen arraxmat ta di-iga Məššina gər za əmərədda ad əheç kasaw wala deç day təbəllant ta əgeç fəl Əlinjil d əsəttəddi-net. ⁸ Məššina issan as tara ta dawan-əgeç ketnawan Yaysa Elməsix iman-net a du-təfal. ⁹ Amaran awa gammaya day təwatriwen-in, a day-wan tətittəy tara ta kawan-təhat day masnat ta n tidət d əgərri n id t-illa arat. ¹⁰ As iga adi ad təfrəgam əsənnəfrən n awa iknan əlluç, təqqəlam aytedan zaddogən wər iwer lahan waliyyan əzəl wa du-z-iqqəl Elməsix, ¹¹ təssəgətam imazalan win oçadnen as Yaysa Elməsix a yur d-əfalan fəl ad itəwəsəçmər Məššina attamal.

Isalan ən təməddurt ən Buləs d əššəxəl-net

¹² Arey ad təssənəm imədrayan-in as, arat wa di-igrawan da eway-du fadda as əslan aytedan aggotnen y Əlinjil. ¹³ Təzzar eway-du awen as əssanan sojitan kul win tagaznen əmənokəl d aytedan kul sa hadan as əddəlil n Elməsix a fəl aheç kasaw. ¹⁴ Amaran wərgəy adi ças, kalar iguz-in kasaw eway-du əs taššam ən mədrayan-nana day əzəçzan tətəyt ən təfləst ta əgan y Əməli, a day-san tətittəy taholat n amel n awal ən Məššina wər tan-taha tasa.

¹⁵ Tidət a imos as wiyyad day-san mançay əd tara n əməzrəy a fəl taggin isalan n Elməsix. Mišan win hadatnen taggin-tan s ənnəyat tolayat, ¹⁶ amaran tara a fəl taggin adi id əssānan as əddəlil ən təbəllant fəl Əlinjil a fəl aheç kasaw. ¹⁷ Mišan, aytedan win hadatnen wərgəy əwəl iyyanda as taggin isalan n Elməsix, kalar tənfa-nasan ças a gammayan, əgān iduf n as a fall-i əššitin s adi arkanay wa ənnaya day kasaw. ^{18a} Wər imos adi wala! Elməxsud as, gər za taggin adi s əwəl iyyanda wala deç s ark ənnəyat, isalan n Elməsix a taggin amaran isifalawas-i adi.

^{18b} A di-aknu deç əsəffəliwəs. ¹⁹ Fəlas əssanaç as, adi ketnet a d-awəy ad əgrəwəç efsan s əssəbab ən təwatriwen-nawan əd tilalt n Infas ən Yaysa Elməsix. ²⁰ Amaran əkneç əsəddirən wəllən əge deç attama n as wər di-za-tabəz təkarakit day arat waliyyan. Kalar gər za dat awa wala əmərədda, fawda əmosay amaqqajay fəl ad itəwəsəçmər Elməsix gər za əs təməddurt-in wala əs təmattant-in.

²¹ Fəlas nak Elməsix a imosan təməddurt-in, amaran təmattant tənfa-nin a təmos. ²² Mišan ya as imos as əššəxəl n Elməsix təh-as tənfa ad aylaç əddara, wədi wər əssena awa za sənnəfrəna. ²³ Əttirkaba fəl əššin gannatan. Sinahala tara n agamad n əddənet əməla yur Elməsix, arat s ənta a di-ofan wəllən. ²⁴ Mišan ya fəl əddəlil-nawan oğar tənfa ta tahat ad aheç əddənet. ²⁵ Arat wədi əkkasa day-as aššak.

Ëssanaḡ as ad aḡlaḡ əlle ḡur-wan fəl a dawan-ilala ketnawan s ad ittəy əzəḡzan-nawan, akn-iwan adi əsəffəliwəs. ²⁶ Adi a z'ışšitin saḡmar wa təgam Ƴaysa Ëlməsix əs tarrayt-in, s əssabab ən tawaḡlay ta kawan-in-z-aga.

Ëlməsix a imosan təməddurt-in – Almasal wa n Buləs

Təməddurt ta təmməttalat Ëlinjil

²⁷ Taḡara təgat da, agiwat alxal was imməkkan ad t-agin aytedan əzzigzannen s Ëlinjil n Ëlməsix. As iga adi, gər za oseq-qawan-in wala deḡ imos as isalan-nawan ḡas a əgrawa, ad əssənaḡ as təḡlayam daḡ igi n aḡaf iyyanda, tənimmannakam s əwəl iyyanda daḡ təbəllant ta təgam fəl əzəḡzan isihaddan fəl Ëlinjil. ²⁸ A daḡ-wan wər agin aytedan win kawan-əzzəngatnen tasa s arat waliyyan. A sər-san d-awəy adi ikus n aššak daḡ əhluk-nasan, kawanay awəy-du sər-wan ikus n aššak daḡ iguz wa təgam tarrayt ta n efsan. Amaran Məššina a z'agin adi. ²⁹ Məššina wərgəḡ arraxmat n əzəḡzan s Ëlməsix ḡas a kawan-ikfa, kalar ikf-iwan harkid ta n alḡazab fəl əddəlil-net. ³⁰ Ëmərədda təḡâm fall-as təbəllant šilat ən tas kala di-tənayam əgeq-qat fall-as, ənta deḡ as təsallim as harwa da taggaq-qat.

2

Tartəyt d əsəmmədrəy ən man

¹ Dad zamas tənayam təsasmit əs tərtəyt-nawan d Ëlməsix, tənayam allam fəl man wa du-tətaway tara-net, tənayam tassaḡ ta ihakku Infas wa Zəddigan, tənayam deḡ təhanint d əlluḡ n Ëlməsix, ² daḡ adi səkməlat təfalawist-in s ad tagim təməddurt daḡ tənimmannakam, tənimaram, tərtəyam s əwəl iyyanda, tagim ənnəyat iyyadda. ³ Ad wər tagim arat waliyyan a daḡ wər təḡəmməyam ar tənfa ən man-nawan ḡas, wala təzzəzwəram iman-nawan id wər infa awen wala. Kalar akkiyyan daḡ-wan isəmmədrəyet iman-net i win hadatnen, tagim fawda i midawan-nawan iduf n as ogaran-kawan. ⁴ Akkiyyan daḡ-wan igməyet tənfa ən midawan-net, wərgəḡ ta-net ḡas.

⁵ Agiwat tiddawt təḡât s alxal wa n Ëlməsix Ƴaysa.

⁶ Ənta di da a daḡ du-təxsal tišit ən Məššina ketnet.

Mišan tugdat əd Məššina ta igraw den

Wər igmay d a tat-ittəf fəl man-net.

⁷ Kalar oyya awen ketnet

s igi wa iga iman-net akli,

iga-du təhəwt ta du-taggin aytedan.

Awa imos kul issikna tulat-net d aytedan.

⁸ Isəmmədray iman-net

s əbərdəḡ wa iga har təmattant.

Təmməttant en daḡ ta təgat fəl təḡəttawt.

⁹ Adi a fəl t-ikfa Məššina edag wa ogaran adkul,

ikf-ay deḡ s arraxmat-net esəm

əs tu-wər-illa esəm wər oger,

¹⁰ fəl ad issəjəd i t-illan kul gər za daḡ jənnawan

wala fəl amaḡdal wala deḡ daw amaḡdal,

fəl saḡmar n esəm ən Ƴaysa;

¹¹ agḡayyat deḡ i t-illan kul

as Ƴaysa Ëlməsix a imosan Ëməli.

Imos awen arat izzizwaran Məššina di n Abba.

Ëmələwləw daḡ əddənet

¹² Dağ adi imaran-in zund əmmək as faw da təbbirdagam y Əməli agliwat təsinəfililam əs mazalan-nawan efsan win kawan-ikfa təgâm awen dağ təksəda-net. Awen dağ a təgam harwa a çur-wan əlle. Dağ adi ad wər tammazzayam d igi n adi, wəllen əmərədda ad wər əlle çur-wan. ¹³ Təfrâgam igi n adi fəlas Məşşina iman-net a işğalan dağ wallan-nawan, ihakk-iwan ənnəyat əd fərregat n igi n arat kul, ilkâm awen i tara-net.

¹⁴ Arat kul wa tətəggim, agat-tu da wala agatanten wala tamazaq ¹⁵ fəl ad təqqələm aytedan wər iwer lahan waliyyan, zaddoggen, əmosan bararan əkmâlne ən Məşşina, əhanen ammas n ark aytedan, əxrakne ən nəllubas. Təgâm dağsan əmələwləw wa iga ənnur dağ şiyay, ¹⁶ təzizawem dağ salan win hakkinen tēməddurt ta təxlalat. As təgam adi, ad əfləsəç iman-nin əzəl wa du-z-asu Əlməsix, fəlas ad assaknu adi əs əşşəçəl-in d arkanay wa ənaya wər əbbənnanan.

¹⁷ Mişan mijas a dağ-i təwəkkəsən man, əqqəla şilat ən təkutay tətivançalat a dutəssindat əşşəçəl wa kawan-isassagan əzəçzan-nawan. Kud iga adi da ad fəliwəsə nak, fəliwəsə deç nak dər-wan. ¹⁸ Kawanay da fəliwəsət, təfəliwəsəm deç nak dər-wan.

Timotay d Ebafroditəs

¹⁹ Əgeç attama dağ Əməli Çaysa n a kawan-in-əssuka Timotay. As kawan-d-ifal ad əgrəwəç isalan-nawan tansu tayttay-nin. ²⁰ Fəlas Timotay ças a ifarrayan y awas farraya, tewây-as talça-nawan əd man. ²¹ Amaran aytedan kul win hadatne tənfa ta n man-nasan ças a gammayan, wərgeç talça ta n Çaysa Əlməsix. ²² Amaran təssânam dağ tēməwit tas isitadda Timotay tişit-net awedan ilan almaçna, fəlas ənəməşçal wa itaggu barar d abba-net a dər-i inamagga, iddew dər-i dağ əşşəçəl wa n amel n Əlinçil. ²³ Dağ adi ənta as əgeç attama n a dawan-t-in-əssuka. Wər əqqələç ar y ad əssənəç awa dağ-i z'agin. ²⁴ Amaran əkkasəç aşşak çur Əməli, as a kawan-in-asa nak iman-in dağ alwaç ihozan.

²⁵ Ənâyəç as olâç as kawan-in-əsoçala Ebafroditəs, imosan amadray-nin imos deç əmidi-nin dağ əşşəçəl əd təbəllant ta əgeç təmosat amel n Əlinçil s ənta a sər-i dutəzammazalam ewây tadhəlt tas əddərara. ²⁶ Isidaran wəllen anay-nawan ketnawan, fəlas tədgâz-tu tasalay ta təgam tafrəyt-net. ²⁷ Awalla tədâs-tu təfrəyt zəwwərat har zama ad t-aba. Mişan ihanattat-as Məşşina. Amaran wərge ənta ças as ihannattat, kalar nak da ihinattat-i, igdal-i açşud ən man ogaran wa di-igrawan. ²⁸ Adi fəl ədgaza dağ a t-in-zəmmizəla sər-wan fəl a tu-tələsam anay təfəliwəsəm, isəssikəy-i adi açşud ən man nak da. ²⁹ Ağıwat-as əlçəbulat təçât əs təfalawist tagget id amadray-nawan a imos dağ əzəçzan s Əməli Çaysa, təssəçmərəm aytedan win şilat-net. ³⁰ Fəlas har iga iman-net dağ alçarar ən tēmattant fəl əşşəçəl y Əlməsix. Awen kul ig-ay fəl a di-agu tilalt tas wər təfregam a di-tat-tagim kawanay fəlas igəç a di-təgam.

3

Təlyudəla dağ tarrayt n Əlməsix

¹ Amaran, imədrayan-in, təsəffəliwəset-kawan tassaç ta təgam d Əməli Çaysa. Wər fall-i imos əzuk a dawan-in-ələsəç akatab n aratan win as kala dawan-tan-in-əktaaba, fəlas təha tənfa awen dağ aggaz-nawan. ² Ənkədat y aytedan win wər nəçlay əd çan, taggin əşşur, sisahen əmənçəd əttafan as ənta a itaggin dağ tamattay ən Məşşina. Ənkədat-asan wəllen. ³ Nakkanay a igan əmənçəd wa n tidət, fəlas əlyibada a nəga Məşşina s Infas wa Zəddigan. Çaysa Əlməsix a imosan abarag-nana. Wər nəga attama waliyyan dağ arat iga aggadəm.

⁴ Amaran nak iman-nin əleç əddəlilan s igi n attama-nin dağ aratan əçân aytedan. Kud ill-ay awedan ilân əddəlil s igi n attama-net dağ arat iga aggadəm, awedan wədi

ogaraq-qu tēla n əddəlil s awen, ⁵ fəlas nak a itiwassammankadan əzəl wa n əttam dəffər təhəwt-in. Əgmāda-du Kəl-Israyil, təl-i tawšət ta n Benyamin, əmosax aw Yibri wa n ələsəl, əssinda-du əššərədan ketnasan win əššərixa wa n Əttawret id Farisay as kala ad t-əmosa. ⁶ Awa əgey dəx gəlleyat dəx tarrayt ten, iyyəwanax əzəxxəzzəb n əlməsixitan. Dəx batu ta təqqalat aqqad dəx əššərixa, wədi wər əley lahan waliyyan. ⁷ Aratan kul win di, kala dəx-san əgey iduf n as əmosan-i tətəyt, mišan əmərədda əge dəx-san iduf n as afanaz a di-əmosan, fəl əddəlil n awa iga Əlməsix. ⁸ Fadda wərgə aratan win di xas, kalar arət kul əge dəx-as asawad n as afanaz a di-imos fəl əddəlil n ədkul a dənnəg wər illa iyyan a təga masnat n Əlməsix Yaysa, Əməli-nin. Əddəlil-net fəl əqbalax a di-igməd arət kul, amaran arət kul əgey-as iduf n as tadjargant a imos, fəl ad əttəya dəx tarrayt n Əlməsix, ⁹ almayna tassaq dər-əs. Wərgəx ləkkum y əššərixa wa n Əttawret a di-ikfan taqqat dat Məššina, kalar əzəgzan-in s Əlməsix. Məššina a ihakkin taqqat, amaran ihakk-et s əzəgzan s Əlməsix. ¹⁰ Arət wa arex masnat n Əlməsix, almayna ad əssəna tarna ən tanakra-net dəx təmattant, əd tətəyt dər-əs dəx alxazab wa iga, ala dər-əs dəx dəx təmattant ta iga. ¹¹ Adı a di-z-issəfrəgan igi n attama n a di-d-issənkər Məššina dəx təmattant.

Aggad n əlməxsud

¹² Wər ənnəx əgrāwax masnat tədi, ənta wala tišit n awedan ikmālan, kalar azzal a əgey dəx agamay n a tanat-əgrəwa, fəlas əddəlil n awen da a fəl di-d-obaz Əlməsix Yaysa əs man-net. ¹³ Imədrayan-in, wər ənnəx əgrāwa aratan win di; mišan ya arət iyyanda a tagga a t-imosan as: wər din-səggəda dəx awa okayan, kalar arət wa əfrəgax a tagga fəl ad awədəx awa illan dat-i. ¹⁴ Azzal a əgey s əsərkən, fəl ad əgrəwa tefert təmosat təxaray ta danax-iga Məššina əs jənnawan əs tətəyt d Əlməsix Yaysa. ¹⁵ Dəx adi nakkanay ketnana win as ikna əzəgzan-nana assahat immikkan ad nax alxal wen, amaran wala ad təgām alxal iyyan, Məššina a dawan-z-isənnəfiləlan awas ihor a tu-təssənam dəx batu tədi. ¹⁶ Arət iyyanda a dawan-z-annax as: dad zamas newad-du edag wa nəha da əmərədda, aglatana nəddew dəx anamod wa da.

¹⁷ Ya imədrayan-in, əqqəlat ketnawan imattalalan-in, tattalalam aytedan win əlkammen y almasal wa kawan-nəkfa. ¹⁸ Əmmalax-awan as əllan-tu aytedan aggotnen safraxnen s alxalan-nasan almayna ən təmattant n Əlməsix fəl təgəttawt. Iyyəwanax-awan igi ən batu ta, amaran əmərədda hāllax as dawan-tat-ələsax igi. ¹⁹ Tilkamat-nasan ahluq, fəlas šidusen-nasan a mosnen əməli-nasan, sinafasan arət was ihor a tan-isikarakad, wər təkka ənnəyat-nasan ar əddənət. ²⁰ Nakkanay amaran akal-nanax ijənnawan. Amaran ijənnawan en da as nəqqal y a sər-na tan-d-igməd Ənəsəfsi a t-imosan Əməli Yaysa Əlməsix. ²¹ Ənta a z'isəmməttəyan əs tarna ta ila fəl arət kul šixəswen-nana ərkammen, tamattatnat, iššəsil-enat əd ta-net təkənət tēla ən tanaya.

4

¹ Imədrayan-in əkney tara, sinahala tara n anay-nawan! Təmosam-i təfalawist, təmosam dəx əssəbab n ətəwəsəxmar-in. Imaran-in, zəzzəwətat dəx əzəgzan s Əməli.

İnnəsixatan

² Efodəya əd Santik, onsayaq-qamat ad tənəmənəkmat fəl əddəlil ən tassaq ta təgamat d Əməli. ³ Amaran kay da, imosan əmidi-nin wa n tidət dəx əššəxəl, əgmāya dəx-ak ad tilalax i tədoden di əs maknan gar-essanat fəlas əllilnat-i əs təbəllant fəl Əlinjil, nak əd Kəleman əd midawan-in win hadatnen dəx əššəxəl s əsmawan-nasan əktāban dəx əlkəttab wa əhan əsmawan n aytedan win əgrawnen təməddurt ta təxlalat. ⁴ Fəliwəsət faw dəx tassaq ta təgam d Əməli. Əlasa tənna n

adi, fəliwəsat. ⁵ Issənet awedan kul daɣ əlluɣ-nawan. Əməli ihôz. ⁶ A kawan-wər-işşəwəş arat waliyyan. Kalar a təqqal alxalat ta təggazam, əgməyat daɣ Məşşina arat was təddəraram, ad tətattaram s əwəl iha agoda. ⁷ As iga adi, alxer wa ihakku Məşşina, imosan alxer illân dənnəg arat kul was ifrag awedan əgərri-net, ad agəz iwəllan-nawan əd medranan-nawan daɣ arat kul id tartəyt a təgam d Əlməsix Ƴaysa. ⁸ Xasil imədrayan-in, aratan da win as ihor a tan-tagim faw da daɣ taytwen-nawan əd medranan-nawan: imazalan kul win əknanen əlluɣ, əhoran d i tan-imalan, əd mazalan win əmosnen tidət, əmosan əzzəbun, oɣadan, zaddogan, əssiran, tatamalan. ⁹ Əlməxsud as tamazalat faw s arat wa fall-i təɣram, təqbalamtu, təslam-as, tənəyam-i tamazalaq-qu. Əddi a daɣ-wan issən Məşşina di n əməggi n alxer.

Igodan ən Buləs i Kəl-Filib tadhəlt-nasan

¹⁰ Amaran əşəşsinəy wa təgam masnat ta daɣ-i təgam, eway-du sər-i təfalawist tagget daɣ tassaɣ-in d Əməli, kuddeɣ as dat awa da, təssānam daɣ-i mişan wər təgrewam tarrayt n əsəkni n adi. ¹¹ Wər ənnəy adi fəl as əddərara s arat iyyan, kalar nak əlmādaɣ əgəddi s alxalat kul ta əheɣ. ¹² Əssana təməddurt daɣ təməɣatirt, əssana deɣ təməddurt daɣ tənəfləyt. Amaran daɣ alxalaten kul şin əggaza əlmāda tewant, əlmāda deɣ gələk, əlmāda tənəfləyt harkid təməɣatirt. ¹³ Alxalaten kul əfragay-asnat əs tilalt ən wa di-ihakkin tarna. ¹⁴ Dər iga awen da ya, təgām a olaɣan as di-tədhəlam daɣ təməɣutar-in.

¹⁵ Amaran kawanay Kəl-Filib təssānam wəllen as, as əgmada akal wa n Masedonəya, azzaman win daɣ əssəntəy emel n Əlinjil, wər tu-təlla Əlkənisat a di-tədhəlat ar ta-nawan. ¹⁶ Fəlas wala alwaq wad əheɣ ayxəm ən Tesalonik təsisawayam-in awas əddərara har wərgəɣ taklat iyyadda. ¹⁷ Wərgəɣ agamay a taggaɣ a əgrawa, kalar arozan-nawan as gammayaɣ ad əttəyan.

¹⁸ Ələy arat kul was əddərara, ənniflaya. Wər din-odena wala id əgrāway təhəkkut-nawan ta di-d-eway Ebafroditəs, təmosat takutay iqbāl Məşşina, təla ɣur-əs aɟu izodan, oggam-tat. ¹⁹ Amaran əgmāya daɣ Əməli-nin, ilân tanaya wər nəla əddukad, a kawan-ikfan awas təddəraram kul fəl udəm n Əlməsix Ƴaysa. ²⁰ Adkul i Məşşina Abba-nana har faw. Amin!

Assalaman win təzərəst

²¹ Təhulam-in aytedan kul win əzzəgzannen s Əlməsix Ƴaysa. Əhulan-kawan-in mədrayan-nana n əlməsixitan win ɣur-i əllanən. ²² Iməzzəgzan əs Ƴaysa Əlməsix kul win əllanən da, əhulan-kawan-in. Wəllen win məşşaxalan n aɣaywan n əmənokəl Qaysara.

²³ Əttāra s Əməli Ƴaysa Əlməsix a kawan-ikfan arraxmat ketnawan.

Širawt ta iktab Buləs i Kəl-Kolosəya

Šihulawen

¹ Awa nak Buləs, imosan anammazul ən Ҷaysa Ғlməsix əs taradawt ən Məššina, nak d əmidi-nin daḡ əzəgzan Timotay, ənnānen əhulan-in ² Kəl-Kolosəya win əhanen tarrayt ən Məššina, ənnimanakan daḡ esəm ən Ҷaysa Ғlməsix, əmosnen imidawan-nana n alyadilan sər-əs. Izazzabbat-du fall-awan Məššina Abba-nana alxer d arraxmat.

Igodan əd təwatriwen

³ Faw da daḡ təwatriwen-nana nətigudəy-awan i Məššina di n Abba n Ғməli-nana Ҷaysa Ғlməsix, ⁴ fəlas nəslâ əzəgzan wa təgam əs Ҷaysa Ғlməsix, d əsəkni-nawan tara y i t-illân izzigzan sər-əs. ⁵ Ғzəgzan wa əd tara ta, eraw-tan-du attama wa təgam daḡ Məššina, n awa dawan-issənsa daḡ aljannat. Attama wa təgam-tu əzəl wa kawan-d-ewad Ғlinjil, a imosan isalan win tidət ən Ҷaysa Ғlməsix. ⁶ Ғlinjil wa ig-awan d assa ad d-iga fəl əddənət ketnet. Ғnta a isammattayan alxalan n aytedan s əlluḡ, ətittəyan məzzəgzan sər-əs. Ғmmək wa da a daḡ-wan igan kawanay da, a d-obazan ḡur əzəl wad təslam i salan n arraxmat ən Məššina əs tidət, təgrawam əgərri-net. ⁷ Ebafras, əməllil-nana, n əməri-nana, ənta a kawan-issosanan isalan win. Imos əməggi ən salan n alyadil n Ғlməsix y-awan, ⁸ ənta a danay-imalan tara ta iga Infas Zəddigan ən Məššina daḡ wallan-nawan.

⁹ Adi da fəlas a kawan-nəsla nətattar-awan əs Məššina. Nəgammay daḡ-as a kawan-aknu əsusən ən tara-net, s a kawan-akfu s Infas Wa Zəddigan, tayttay kul d əgərri. ¹⁰ Šiwatriwen šin nətagg-enat fəl ad tilem alxal ən məzzəgzan, isənnəhəl-tu Ғməli təggəma, ad tətəggim imazalan olâḡnen, tətittəy daḡ-wan masnat ən Məššina, ¹¹⁻¹² akn-iwan Məššina əsəssuhi daḡ anamod kul əs tarnə-net di maqqarat fəl ad tilem zəmmerat, təggəz-kawan tazaydart, təggudəyam əs man filawasnen y Abba wa kawan-issəfragan agaraw daḡ təkəsit ta issənsa daḡ taḡmar-net di təmosat ənnur təhat ijənnawan iskat y aytedan-net win əhanen tarrayt ta n Ғlməsix.

Assayfaten n Ғlməsix

¹³ Ғnta a dana-d-ikkasan daḡ əlxəkum n Iblis di imosân šiyay ig-anay daḡ wa n Barar-net Ҷaysa Ғlməsix a ikna tara. ¹⁴ Ғddəlil ən Barar-net a fəl nəgraw tədarfit, təmosat təsureft ən bakkadan-nana.

¹⁵ Barar wa, šašəlan ən Məššina a imos di wər nətəwəhənnəy,

imos deḡ əmuzar ən təxlək kul,

¹⁶ fəlas axluk a sər-əs d-iga Məššina aratan kul fəl amaḡal əd jənnawan,

win ətawahənnaynen

əd win wər nətəwəhənnəy,

šiyurad šin əttənkələn

gər əqqalnat tətəbəla wala taḡmar,

wala əlxəkum, wala təmənukəla,

aratan win kul ətiwaxlakan-du sər-əs,

fəl əddəlil-net.

¹⁷ Ҷaysa Ғlməsix ənta iman-net ill-ay dat təxlək kul,

aməran təxlək kul tənimmattaf əs tarrayt-net,

issan daḡ-as.

18 Ənta iman-net imos eɣaf n Əlkənisat,
ig-as tizart ta iga aɣaf i təxəssa.
Ənta ələsəl n Əlkənisat,
fəlas ənta ad azzaran tanakra daɣ win aba
fəl ad iqqəl ill-ay, azzâr y arat kul.

19 Aratan kul win ətawannanen s Əlməsix da,
kul tidət id fəlas Məşşina iman-net
a isaggatakken əs tara-net

əsəxsəl ən tişit-net di təndat daɣ Barar-net,
20 amaran ikna tolas iman-net əd təxəllak kul
şin amadal əd jənnawan s əddəlil ən Barar-net,
izazzabbat-du fall-asnat alxer
əs tanaxla n əzni ən Barar-net
ɣur təmattant-net fəl təgəttawt.

21 Kawanay da əstizarat tənimaggagam əd Məşşina təmosam imagzaran-net s
ark ənnəyaten-nawan d arak mazalan-nawan. 22 Mişan əmərədda, əs təmattant
ən Barar-net ikfan iman-net, Məşşina ikn-iwan əd man-net fəl a dat-əs təbdədam
təmosam aytedan zaddogñen, wər nəla lahan, 23 kud imos as təglam tətəfəm
əzəgzan-nawan, təzizawem daɣ-as iman-nawan, təzzikkem daɣ-as s assahat, wər
təkkəsem attama wa təgam as təslam y Əlinjil. Əlinjil wa, ittimalan y aytedan kul n
əddənet, ənta as əqqala nak Buləs əməggi ən salan-net.

Əşşəxəl wa n Buləs y Əlkənisat

24 Əmərədda isidawat i arkanay wa ənnaya fall-awan. Fəlas əmmək wa ənta as
əsakkasawa əs təxəssa-nin, daɣ aganna wa-nin, arat wa din-aba daɣ alɣazab wa
inay Əlməsix fəl təxəssa-net di, təmosat Əlkənisat ən nalkiman-net. 25 Əlkənisat ta
ənta as əqqala amaşşaxal-net s awa dər togda tanat-nawan ta di-issodaf Məşşina.
Izammazal-i-du fəl a kawan-əxrədaɣ əsusən n awal-net, 26 s a dawan-əsaffaggaɣ
əssir wa iɣbar elan s elan. Mişan əmərədda əssir wa itawasanafalal i win das-
əlkanñen, 27 əntanay as ira Məşşina a tan-issusən daɣ igət wa dər ogda ədkul n
əssir wa iqqalan şimattiwen n əddənet kul. Əssir wa imos-tu as: Əlməsix ixsâr daɣ
wallan-nawan adi da fəlas illikan as ad tilem tadagart daɣ əlxurma ən Məşşina.

28 Əlməsix wa ənta a nəmmal nakkanay. Nərakkab şiməzzugen n awedan kul,
nəsassaɣr-ay əs tayttay təndât fəl ad ikməl akkiyyan daɣ tənəmmənaka d Əlməsix.
29 Daɣ tara n aggad n arat wa a fəl əsannahalax əşşəxəl, əs tarna ta du-təfalat
Əlməsix, a daɣ-i tətımətəkwəyat s assahat tagget.

2

1 Arəɣ ad təssənam awa dər togda təbəllant ta fall-awan ətagga, kawanay d
aytedan n əxrəm wa n Lawodikəya, əd wiyyad şilat-nawan as wər kala ənayan udəm-
in. 2 Arat wa əgeq-qu fəl tara n ad tilem kawanay dər-san əlhimmat, tənəmərım
gar-ewwan s əwəl iyyanda, fəl ad təsənnəhəlam gəlleɣat təndât ta ihakku əgərri
ikkisawan, təssənam əssir ən Məşşina wa imos Əlməsix. 3 Əlməsix ənta ɣas a imosan
təsassarut ən təgərgist a təmos tayttay əd masnat.

4 Arat wa ənnəx-awan-tu fəl a tu-wər-iməl awedan a kawan-issəxrakan a əganat
batuten-net daɣ şizada. 5 Daɣ adi kud imos as wər ɣur-wan əlle s azzat-in da iman-in
əllân ɣur-wan amaran isidawat i as əsleɣ as tənizzamam, təzzikkem s assahat daɣ
əzəgzan wa təgam s Əlməsix.

Tənəddawt ən tarrayt ta n Əlməsix

6 Daɣ adi azzama təqbâlam as Əlməsix ɣaysa imos Əməli, wədi awəyat əd tarrayt-
net. 7 Səssəhətat daɣ-as iman-nawan. Əqqəlat aytedan əkrâsnen daɣ-as, əssohatnen

dağ əzəgzan-nasan, s əmmək was tətawasasağram, təqqələm deş aytedan əknanen dəkkur n agoda y Əməli.

⁸ Ənkədat i y ad t-imal awedan a kawan-issəxrakan s əljəmaten wər təha tənfa əd batuten ən təkərras ad əzzirratnen dağ tanaden n aytedan, əzzirratnat-du deş dağ təşurad šin əttənkələn, a du-wər-nəha s Əlməsix. ⁹ Fəlas Əlməsix ənta dağ təşəssa-net a dağ təşsar tişit kul ən Məşşina, ¹⁰ amaran kawanay win dağ-as ənamannaknen təgrāwam arat kul əs tənəddawt. Ənta a imosan eşaf n əlxəkuman kul əd təmənukəla kul.

¹¹ Dağ tənəmənəkə dağ as tətawasamankadam s əmənəkəd wər igā əfus n awedan mişan wa dawan-iga Əlməsix imosan as dağ-wan ikkas tişit kul ta n nasbakkadan, ¹² s alamağ-nawan dağ aman tənbalam təddewan dər-əs, amaran deş tətawasankaram-du sər-əs təddewam dər-əs fəlas əzəgzan a təgam əs tarna ən Məşşina di maqqarat a t-id-təssənkərat dağ tamattant. ¹³ Kala təmosam aytedan abā dağ wallan-nawan fəl əddəlil ən bakkadan-nawan d əddəlil n as wər təmosam arat dağ Kəl-Əlyəhud, wər təmmənəkadam, mişan əmərədda Məşşina ilas-kawan d əsudər təddəwam d Əlməsix, sas dawan-issoraf ibakkadan-nawan kul s arraxmat-net.

¹⁴ Imas arak mazalan-nana əd win-nawan əwərnen iğafawan-nana, irzam-tan fallana s ətəwətəytəy-nasan fəl təgəttawt. ¹⁵ Ikkas Məşşina assahat ta təhat təymaren ən kələsuf, oşaq-qanat ilway-tanat dat aytedan əmosnat əjjab, iğlab-tanat s Əlməsix.

¹⁶ Dağ adi a tu-wər-iməl awedan a kawan-z-işrəğan fəlas wər tətəggim awa ira gər iga dağ tattay wala tessay wala ijilan-nawan win maddan əd win əlyibada, ¹⁷ fəlas aratan win wər əmosan ar telay ən win d-əzaynen: tidət-nasan təha Əlməsix. ¹⁸ Ad wər tayyim iman-nawan y awedan a iqqal issəwər-kawan əlhigga fəl as sər-əs əzzodan mazalan n azzahir, issilaqqaw iman-net sər-san, izod sər-əs deş əlyibada n angalosan, isisahat iduf-net wa iga as tan-inay. İzzizwar iman-net əs medranan wər təha tənfa a d-əgmâdnən tayttay wər nəha tarrayt ta n Əlməsix, ¹⁹ amaran ab'as isassahat iman-net dağ tərtəyt d Əlməsix a imosan eşaf ən təşəssa. Təşəssa ta kul ənta a tətittəyat s Əlməsix s əmmək wa ira Məşşina, s ənəmənək ən təsəllad wa du-tawayan səmməşras əd zərwan.

²⁰ Azzama aba kawan-tənimmannakam d Əlməsix, tətawaytasam-du dağ təymaren ən kələsuf dağ əddənet, dağ adi mafel təlakkamam i batuten n əddənet, təqqabbalam əlqanunan əmosnen: ²¹ «ad wər təkələş awa», «ad wər tərəmağ awa», «ad wər tədəsağ awa»? ²² Aratan win wərge wər əgen ar y a tan-təgməd tənfa dəffər as sər-san iga əmazal? Wər əmosan ar əlqanunan d awalan n aytedan! ²³ Tidət as dağ anay-nasan aratan win oğâdan fəlas əkfân əs tayttay dağ mazalan-nasan əmosnen: əlyibada əs gəlleyat, əsələqqu ən man, əsəkni ən təşəssa arkanay. Mişan ya məssawsan wər əlen a imosan fərregat n iduf dağ tara ən man.

3

Təməddurt ta təzrayat dağ Əlməsix

¹ Dad zamas tətawasankaram-du kawanay d Əlməsix dağ təmattant, wədi əgammayat aratan win jənnawan dad illa Əlməsix iha ağıl ən Məşşina. ² Sədəgat ənnəyaten-nawan sa sər-san wərge sa sər win n əddənet. ³ Fəlas şilat n aytedan aba a təmosam ab'as tətamazalam aratan win tətamazalam əstizarat, amaran təməddurt-nawan tətâr s Əlməsix şur Məşşina. ⁴ As d-itawasanafalal Əlməsix a imosan təməddurt-nawan, kawanay da a du-tətəwəsənəfilələm dər-əs, təgrəwam əlxurma-net.

⁵ Dağ adi anşat dağ man-nawan ənnəyaten kul šin əddənet a tanat-imosan: əzzəna, ammadas, tara ən man, arak deranan, tara n əddənet təmosat əmadraw. ⁶ Aratan

win əddəlil-nasan a fəl itaggaz alham Məşşina n aytedan win ugaynen s as sər-əs əzzəgzanan. ⁷ Kawanay iman-nawan kala a tan-tətamazalam harwa ad wər təfregam iduf dağ man-nawan.

⁸ Əmərədda aratan win kul mazzayat dər-san a tan-imosan: alham, aššar, əzzəngu, šizmit, ark batuten. ⁹ Ad wər tətınəməggim bahu gar-ewwan, fəlas təjwaram təkkasam dağ man-nawan tişit-nawan ta tərəwat əd mazalan-net, ¹⁰ təzzar təgam dağ-san əmərədda iyyat təzrəyat. İman-nawan win əntanay a ətawaşəşaynaynen faw əs şaşelan n Əmaxlak-nasan fəl ad tilem masnat təndət ən Məşşina. ¹¹ Dağ təməwit ta təzrayat a, wər tu-təlla zələyat gər aytedan kul gər əqqalan Kəl-Əlyəhud wala win tan-wər-nəmos, gər win əmmənkadnen wala win wər nəmmənkad, gər əmosan iğərab wala aljahilan, gər əmosan eklan wala ilallan, əlməxsud as ketnasan əhən Əlməsix di imosan arat kul.

¹² Kawanay təhəm win d-isannafran Məşşina, issəwar-tan aganna ir-en. Dağ adi təggəzet-kawan təhanint, tilem iman mallolnen, təsəlləqqəwam iman-nawan, taləxam, təggəz-kawan tazaydart. ¹³ Nəmiwəyat gar-ewwan, ad tətınəməsufam gar-ewwan as inamaşşak iyyan dağ-wan d əmidi-net. Ad tətınəməsufam gar-ewwan kawanay da əs təməwit tas dawan-issoraf Əməli. ¹⁴ Aratan win kul agiwat tara dənneğ-san, as təgam adi ad taknim ənəmənək.

¹⁵ Alxer wa iga Əlməsix dağ wallan-nawan ixkəmet şinaden-nawan, fəlas alxer wen da as kawan-d-iğra Məşşina fəl ad təqqəlam arat iyyanda, a das-tətigudəyam. ¹⁶ İxsəret awal n Əlməsix dağ wallan-nawan s igət. Ad tətınəməsəşərim, tətınəməsəkdam gar-ewwan əs tayttay təndət, amaran ad tətaggim şigaytalen i Məşşina əs man əglaynen, əd təmmalen, əd sakkan win d əgmədnen dağ İnfəs Wa Zəddigan. Ətaggat-tan fəl ad tassaknim igodan-nawan i Məşşina. ¹⁷ Arat kul wa təgənnam əd wa tətaggam, mazalat-tu s esəm n Əməli Ƴaysa, a sər-əs tətigudəyam i Məşşina di n Abba-nana.

Aharog n aytedan dağ təməddurt ta təzrayat

¹⁸ Şidoden əlkəmmat i tənna ən meddan-nakmat əmmək as ihor a t-ətagginat tədoden şin əhanen tarrayt n Əlməsix.

¹⁹ Meddan iriwat şidoden-nawan amaran a kawan-wər-ətaggazan arak man sər-əsnat.

²⁰ Bararan bardagat i marwan-nawan dağ arat kul, fəlas adi da oggam Əməli. ²¹ Amaran kawanay imərwan ad wər tətihərəşəm bararan-nawan faw fəl ad wər Ƴaşşadan man-nasan.

²² Ekkan bardagat i məssawwan dağ arat kul. Ad wər tətaggim arat fəl as tətıwawalam Ƴas, tərəm igi n awa oggaman aytedan, kalar agat-tu gar-ewwan əd man-nawan əs təksəda n Əməli. ²³ Əşşəxəl wa tətaggim kul mazalat-tu s əwəl iyyanda. Agiwat as igi n as imos əşşəxəl təgəm y Əməli wərgəy y aytedan. ²⁴ Fəlas təssanam as Əməli a kawan-akfu alak imosan təkəsət ta issənsa y aytedan-net. Əlməsix ənta Əməli-nawan. ²⁵ İ igan ark əmazal ad t-irzəm fəlas əşşərixa ən Məşşina ola, wər tu-təha təmərit.

4

¹ Məssawəs n ekkan ətamazalat s alxaq d əşşərixa dağ tənəttuft ta təgam y ekkan-nawan, taktim as kawanay iman-nawan tələm Məşşikawan dağ jənnawan.

Aholan

² Sənnəhəlat təzakkit dağ igi ən təwatriwen a dağ-asnat tənakkadam, tətigudəyam i Məşşina. ³ A dana-tətaggim şiwatriwen nakkanay da fəl a danax-aləm Məşşina tarrayt n əzəwwəziwəz ən salan n əssir-net a imos Əlməsix. Əssir wa ənta a imosan

əddəlil n ətəwəttaf-in daɣ kasaw əmərədda. ⁴ A danaq-qanat tətəggim deɣ fəl ad akna fərregat n igi ən salan n Əlməsix s əmmək wa ihoran.

⁵ İliwat alxal olaɣan daɣ tassaɣ-nawan d aytedan win wər nəha tarrayt ta n Əlməsix, amaran ad wər təsabannanam şimazayyaten şin təgarrawam wər daɣ-asnat təgem isalan-net. ⁶ Awal-nawan ihor ad olâɣ imos in əlməxsud, fəl ad təfrəgam masnat n aljawab igân daɣ adag-net y əkkulluk n awedan.

Şihulawen şin əlkamnen

⁷ Amaran isalan kul win-nu əmidi-nana daɣ əzəgzan igân esəm Tişik n əməri-nana imosan amaşşaxal n alɣadil n əməllil-nana daɣ əşşəxəl n Əməli, ənta a dawan-tanz-iɣrədan igi. ⁸ Adi da a fəl as əgmâyax-in əzəmmizəl wa t-in-əge sər-wan fəl a dawan-agu isalan-nana, aləm-awan fəl man. ⁹ İddêw dər-əs əmidi-nana daɣ əzəgzan n alɣadil n əməri-nana igân esəm Onesim, imosan iyyan daɣ-wan. A dawan-agin isalan n arat kul wa itawamazalan da.

¹⁰ Aristarxus, a dər ənimaha kasaw, issislam-in fall-awan ənta əd Markus wa n əşşin ən Barnabas. Markus tərəwam as təgrawam isalan-net, amaran as kawan-in-osa təqbəlam-tu. ¹¹ Ƴaysa was itawannu Yustus, issislam-in fall-awan ənta da. Meddan win ən karad a əntanay ɣas iməzzəgzan daɣ Kəl-Əlyəhud win dər ənamaşşala i taɣmar ən Məşşina, amaran olâman i fəl man.

¹² Ebafras wa n iyyan daɣ-wan imosan akli n Əlməsix Ƴaysa, issislam-in fall-awan ənta da. Faw itagg-awan şiwatriwen, igammay daɣ Məşşina əs gəlleyat a kawan-isəssuhət daɣ tarrayt-nawan, təqqəlam aytedan əndânen daɣ əzəgzan, əkmâlnen daɣ ənnəyaten-nasan əndânen ətamazalnen tara ən Məşşina kul əs təməwit təkmâlat. ¹³ Nak iman-in əggəyeyəşşəxəl issohen wa dawan-iga kawanay əd Kəl Lawodikəya əd Kəl Yerafolis.

¹⁴ Luqa əməri-nana n anasmagal əd Demas əhulan-kawan-in. ¹⁵ Səslamat-anaɣ-in fəl midawan-nana daɣ əzəgzan win əhanen aɣrəm ən Lawodikəya əd Nimfa d Əlkənisat ta tətamanayat daɣ ahan-net.

¹⁶ Dəffər as təxrâdam təɣaray ən şirawt ta, agat təməwit a fəl za tətəwəxru y Əlkənisat daɣ Lawodikəya, taɣrim kawanay da şirawt ta-nasan ta dawan-du-z-assaglin.

¹⁷ Tannim y Arxifus: əkkəs aşşak daɣ əɣrud n əşşəxəl wa təggaza y Əməli.

¹⁸ Arat wa əfus wa-nu as t-əktaba: Assalaman a din-əgmâdnen daɣ Buləs. Daɣ təwatriwen-nawan a din-wər-tattawim ətəwəttaf wa əge da, daɣ kasaw. Izazzabbat-du fall-awan Məşşina arraxmat-net.

Širawt ta tazzarat iktab Buləs i Kəl-Tesalonik

Assalaman

¹ Awa širawt a din-təfâlat Buləs əd Silfanus əd Timotay. Nəhul-in Əlkənisat ta n əxrəm ən Tesalonik, təmosat tamattay tərtayət əd Məššina di n Abba d Əməli Ƴaysa Əlməsix. İkf-iwan Məššina arraxmat d alxer.

Buləs d əlməsixitan win Tesalonik

Əzəgzan ən Kəl-Tesalonik d almasal wa əmosan

² Faw da nətigudəy i Məššina dəy talça-nawan ketnawan assağa kul wa kawan-du-nəkta dəy təwatriwen-nana. ³ Faw da nəkittəw dat Məššina di n Abba-nana awa dər ogda əzəmmizəl wa təgam əzəgzan-nawan, d əmmək was təşxalam əs tara ta kawan-təhat, əd zəmmerat-nawan dəy igi n attama dəy Əməli-nana Ƴaysa Əlməsix.

⁴ Nəssân, imədrayan-nana as, isinafran-kawan Məššina, kawanay a ira, y ad təqqəlam tamattay-net. ⁵ Adi da fəlas isalan n Əlinjil win dawan-nəga, wər kawan-in-osen əmosan awal Ƴas, kalar əmosan imazalan ən tarna, d əsəggətəkki zəwwəran win ihakku İnfas wa Zəddigan. Təssânam wəllen imazalan win nəga gar-ewwan fəl agamay ən tənfa-nawan. ⁶ Təttəlalam-nana, təttəlalam dəy Əməli. Təmiğataram wəllen eges wər dawan-igdel awen əlqəbulat n awal ən Məššina əs tədəwit ta ihakku İnfas wa Zəddigan. ⁷ Əmmək wen dəy as təqqəlam almasal olâğan y əlməsixitan kul win əhanen akal ən Masedonəya, əd wa n Akayya. ⁸ Wərgəy Masedonəya d Akayya Ƴas a dəy tawaslan igitan n awal ən Məššina win Ƴur-wan əganen, kalar edag kul wizawazan dəy-as salan n əzəgzan-nawan əs Məššina har as wər nəddərar s əsuxəl n awen. ⁹ Ənta awedan kul immal əmmək was dana-təqbalam assağa wa kawan-in-nosa, d əmmək was təgmadam batu n əssənəman təmalallayam sa sər Məššina y a tu-təxbədam, ənta a imosan Əməli iddaran, ittidda. ¹⁰ Təqqəlam dəy y a d-ifəl Barar-net Ƴaysa ijənnawan s ənta a d-issənkar dəy təmattant, a danağ-agəz dəy alham ən Məššina əzəl a ilkaman.

2

Emel n Əlinjil dəy Tesalonik

¹ Kawanay iman-nawan imədrayan-nana, təssanam as assa wa dawan-in-nəga wər ibbənnan ² Təssanam harwa dəy as dat assa-nana y-awan, nətiwadgaz, tiwaggan-anax ərrəbdan dəy əxrəm ən Filib, mişan nəgraw tadhəlt ən Məššina s as danağ-ikfa taholat n a dawan-nəməl Əlinjil, kuddey as iyyəwanan aytedan agamay n a danağ-əgdəlan awen.

³ Aratan win dər kawan-nəsammatar wər əmosan a igmayan əsəxrək n awedan wala iga s ark ənnəyat wala əs təkərras. ⁴ Kalar dad zamas Məššina işşəggar iwəllan-nana fəl a danağ-isənnəttəf d amel n Əlinjil-net, dəy adi wər nətəggu awal a dəy nəgəmmay ad nəgrəz y aytedan, kalar Məššina as nərə a das-nəgrəz s ənta a itaşaggaran iwəllan-nana. ⁵ Təssanam wəllen as wər kala ad nəga batuten əmosnen şixiyyan, wala dəy nəga ənnəyat iyyat təxbârat təmosat agamay ən tənfa i man-nana, Məššina danağ-imosan təgəyya fəl adi. ⁶ Wər nəgmay dəy sağmar dəy aytedan, gər za dəy-wan wala dəy aytedan wiyyad. ⁷ Nəfrâg a kawan-nəssəwər igi n awa nərə fəlas nakkanay a mosnen inəmmuzal n Əlməsix, mişan talmat a kawan-nəssəkna. Zund əmmək as tətənatfə anna əd bararan-net, ⁸ əmmək en dəy as nakkanay da, fəl tara ta dawan-nəga, nara a dawan-nəgu isalan n Əlinjil a d-ifâlan Məššina. Amaran

wərgex isalan n Əlinjil ɣas, kalar iman-nana da nəga edag y a tan-nakfu fəl əddəlil-nawan, fəl awa dawan-nəga daɣ tara! ⁹ Təkittəwam ya imədrayan-nana əşşəxəl issohen izzəwat wa nətaggu ehad ezal fəl ad wər nəqqel əzuk i waliyyan daɣ-wan, assaɣa wa dawan-nəmmal Əlinjil a d-ifâlan Məşşina. ¹⁰ Təggiyyem iman-nawan, amaran Məşşina da iggiyyat as kawanay a mosnen iməzzəgzan, nəg-awan tidawt təgat əs tazdak, d əzəluləx, d iban əlxib waliyyan. ¹¹ Təssanam as əkkulluk n iyyan daɣ-wan nəg-as arat wa z'agu abba i bararan-net. ¹² Nəsimatar-kawan, nolam-awan fəl man, nəzzidgaz-kawan deɣ y ad tagim alxal wa ira Məşşina s ənta a kawan-iɣran fəl ad təggəzam taymar-net əd tanaya-net.

Əlqəbulat ən Kəl-Tesalonik awal ən Məşşina

¹³ Faw da nətigudəy i Məşşina fəl əddəlil n as təslam y awal-net wa dawan-nəmal, təqbalam-tu, wər das-təgem iduf n as awal n aytedan, kalar təgam-as iduf n awa imos, a t-imosan awal ən Məşşina a işxalan daɣ wallan-nawan kawanay a sər-əs əzzəgzannen. ¹⁴ Ənta imədrayan-nana, kawanay təqqalam aytedan əttılalnen əlməsixitan win Əlkənisaten ən Məşşina šin əhanen akal ən Yahudəyya. Awen da a fəlas kawanay da ziɣazzaban-kawan kəl akal-nawan zund əmmək as Əlkənisaten šin əntanatay da ziɣazzaban-tanat Kəl-Əlyəhud. ¹⁵ Əntanay a ənɣanen Əməli ɣaysa, d ənnəbitan, əmərədda ədgazan-ana wəllen nakkanay da. Wər əgrezan i Məşşina, amaran əmosan izənga n aytedan kul. ¹⁶ Gaddalan-anax ad nətamagrad i təmattiwen šin wər nəmos Kəl-Əlyəhud nətagg-asnat isalan n efsan win ihakku Məşşina. Əmmək en daɣ as faw sandin ibakkadan-nasan. Mišan illikan əs, ilkəm a fall-asan d-izəzzəbbət Məşşina alham-net.

Deran ən Buləs ad iləs iki ən Kəl-Tesalonik

¹⁷ Nakkanay amaran imədrayan-nana, illikan as isigalam-anax əzəmməzzəy wa danaɣ-əgan dər-wan azzaman, nənamaggag dər-wan daɣ akal mišan wərgə daɣ wallan, nədgāz wəllen daɣ agamay n anay-nawan fəlas nəsidaran-tu wəllen. ¹⁸ Awen da fəlas nara a kawan-in-nakku, wəllen nak Buləs. Wərgex taklat iyyadda ɣas a daɣ əgmayax a kawan-in-akka, mišan awen igdal-anaq-qu Aşşaytan. ¹⁹ Awak wərgex kawanay ɣas a mosnen attama-nana, təmosam əssəbab ən təfalawist-nana, təmosam fella-nana əzəl wad za nəbdəd dat Əməli-nana ɣaysa assaɣa wa du-z-asu? ²⁰ Awalla kawanay a imosan abarag-nana, təmosam deɣ əssəbab ən təfalawist-nana.

3

¹ Awen da fəlas imədrayan-nana, təgmad-ana təzaydart n əsəgəd wen, nəsof ad naqqam ɣas-nana nak əd Silfanus daɣ əxrəm n Atena. ² Təzzar nəzammazal-in amadray-nana Timotay, imosan əmadhal daɣ əşşəxələn win Məşşina, tan imosan əzəwwəziwəz ən salan n Əlinjil n Əlməsix, y ad isəssuhət əzəgzan-nawan aləm-awan fəl man, ³ fəl a kawan-wər-iggəz i oyyan iman-net issəfəl-du dənnəg-əs ətəwədgaz wa təgam. Təssānam iman-nawan as ətəwədgaz wədi iha aratan win as otas Məşşina harwa daɣ tizarat as a danaɣ-əgrəwan. ⁴ Harwa ɣur-wan nəlla nəyyəwan-awan igi daw axaf əs itiwatas ad nətəwədgəz, amaran arat wa, təssānam as ənta iman-net a igan əmərədda. ⁵ Awen da fəl di-təgmad təzaydart n əsəgəd, təzzar zammazalaɣ-in Timotay y a di-d-abəz isalan n əzəgzan-nawan, fəl təksəda n ad təfətəqqem daɣ taftawen n Ənəjjerrəb abbannan əşşəxəl issohen wa nəga.

⁶ Mišan əmərədda Timotay səket sər-anaq qawan-d-ifal, nəgraw ɣur-əs əmərregəz-nawan olāɣan. Imal-anax iduf wa təgam əzəgzan-nawan, əd tara ta kawan-təhat, d as təkittəwam-ana s əlluɣ. Təsidaranam wəllen a dana-tələsam anay, arat wa, ənta a nəga nakkanay da. ⁷ Əmmək en daɣ as imədrayan-nana, širəmmax, əd tarsəmmawen kul šin nəga, təkfām-ana təsasmit s əzəgzan-nawan. ⁸ Awalla

əmərədda əqqalan-ana-du man-nana, fəlas kawanay təglâyam dağ tərtəyt-nawan d Əməli. ⁹ Mas nəfrag igi-net y ad nəggudəy i Məşşina dağ talça-nawan əd tədəwit tagget ta sər-nax du-tewayam dat-əs? ¹⁰ Ehad ezal nətansay Məşşina əs gəlleyat a danax-akfu turagat n a kawan-nələs anay, d a kawan-naknu əsəssəgri fəl ad issuhət əzəgzan-nawan.

¹¹ Ayədet Məşşina di n Abba-nana d Əməli-nana Yaysa, tarrayt ta dana-za-təsəmmənəyat dər-wan! ¹² Kawanay amaran aget Əməli əşitəy aggen y ənəmərə wa təgam gar-ewwan, əd tara ta təgam y əkkulluk n aggadəm, zund əmmək as nakkanay da nəg-awan tara wər nəla əddukad. ¹³ Isəssuhətət Əməli iduf-nawan, fəl ad təqqələm imizdagan, wər nəla əlxib waliyyan dat Məşşina di n Abba-nana, əzəl wa du-z-iqqəl Əməli Yaysa iddew d aytedan kul win-net. Amin.

4

Ammaran

Təməddurt toyâdat

¹ Imədrayan-nana, nəssosan-kawan əmmək was za tagim təməddurt ta dağ za təgrəzam i Məşşina, amaran harwa əmərədda da awen dağ əs təlcamam. Əmərədda nəgmay dağ-wan əs gəlleyat s esəm n Əməli Yaysa ad təşşitim dağ anamod wen. ² Nəzzidgaz-kawan dağ awen fəlas təssānam awas kawan-nomar s ənta a danax-issəwar Əməli Yaysa.

³ Arat wa ira Məşşina, ad təqqələm imizdagan ogaznen iman-nasan dağ igi n əzzəna.

⁴ Əkkulluk n iyyan dağ-wan ittəfet tanat dağ təxəssa-net əs tazdak n əwəl d əzzəbun. ⁵ Taqqamim da wər təlcamam y arak deranan ən tara ən man, zun awa taggin nəmməzray wər nəssen Məşşina. ⁶ A kawan-wər-iggəz i igân iba n tidət y əmidi-net dağ batu tədi wala idləm-tu. Fəlas Əməli ad awwaddab awedan kul wa igan arak mazalan zun win di. Arat wa dat əzəl da nəg-awan-tu daw ayağaf. ⁷ Ənta Məşşina wər danax-ira ammadas, kalar tazdak a danax-ira. ⁸ Awen da fəlas awedan wa din-igaran ammaran win, wədi wərgəx awedan a inkur, kalar awedan wədi Məşşina a inkur s ənta a kawan-ikfan Infas-net Zəddigan.

⁹ Dağ talça ən tara ta gər mədrayan, wər təddəraram i dawan-in-iktaban şirawt, fəlas Məşşina a kawan-issosanan kawanay iman-nawan ənəmərə gar-ewwan. ¹⁰ Fadda ənəmərə wa ənta iman-net a təsannafalalam i mədrayan-nana kul win akal ən Masedonəya. Mişan nəgmay dağ-wan əs gəlleyat ya imədrayan-nana, ad təşatim dağ əsəkni ən tara ta. ¹¹ Eqqələt aytedan wər nədgez ar dağ igi ən təməddurt təgāt dağ alxer, tannattafam d əşşəxəlan-nawan, ad təgammayam təməddurt dağ təxurad-nawan. Adi da as kawan-nomar. ¹² Əmmək di dağ as sər-wan du-z-awəy alxal-nawan ətəwəsəxmar dağ aytedan win wər nəmos əlməsixitan, təqqələm aytedan wər nəmos əzuk y awedan waliyyan.

Isalan ən tanakra ən nəmməttan

¹³ Imədrayan-nana, nəsidaran ad təssənam awa imosan tidət dağ talça n aytedan win aba, fəl ad wər təqqələm aytedan as əxşadan man-nasan, zun awa igrawan aytedan win hadatnen wər nəga attama-nasan dağ wala. ¹⁴ Dad zamas nəzzigzan as Yaysa aba-tu inkar-du dağ təməttant, wədi ad nəzzəgzən as Məşşina a d-issuxəl əs tarrayt ən Yaysa aytedan win aba, əqqələn-du əddewan əd Yaysa. ¹⁵ Arat da wa dawan-za-nəməl dağ awa danax-isannafalal Əməli: Nakkanay win du-za-tagəz tewaylay n Əməli nəddar, wər za nagu wala arat ən tizart i win aba. ¹⁶ Fəlas Əməli iman-net as du-z-azzabbat dağ jənnawan xur əkuray, imosan əməsli n angalos wa zəwwəran, d anasax n asäk ən Məşşina. As iga adi aytedan kul win aba əzzigzan

s Elməsix, əntanay a du-z-izarnen tanakra. ¹⁷ Dəffər adi nakkanay win d-ogaz alwaq wen nəddar, a dər-san nidaw nəmmidkal dağ təgnawen, nəssəlkəd y Əməli dağ alhawa, nəməl xur-əs har faw. ¹⁸ Dağ adi əqqələnet salan win arat a du-tətinəməsəktim gar-ewwan, imos-awan ares ən təfalawist.

5

¹ Wər təddəraram imədrayan-in i dawan-in-iktaban dağ talxa n azzaman wala assayət ta dağ z'agin aratan win. ² Fəlas təssənam iman-nawan as əzəl wa ilkaman a d-agu assa wər nəla şisənnəfray, zund abaydag a d-idâlan ehad. ³ As ənnan aytedan: «Iket alxer, iket iba ən tazak waliyyat!»! Amazay wen da dağ fall-asan du-z-azzabbat alwaba ihân samal ən təlawayt ta du-tətasat tantut tətəggazat amzur, amaran wər z'əfrəgan əderrəg y-as. ⁴ Mişan kawanay, imədrayan-in, wərgə şiyay a təham əngəm a dawan-itaggu əzəl wədi təxdərt ta n abaydag. ⁵ Ənta ketnawan as təmosam bararan n ənnur, təmosam bararan n azal: Wərməd a danağ-ila ahad za wər danağ-ələnat şiyay. ⁶ Dağ adi ad wər nətaggu etəs wa taggin aytedan win hadatnen, kalar nəqqələt aytedan okaynen as əkkulluk n arat əttâfan dağ-as alwasat. ⁷ Win nassinen, ehad ad nassin, amaran win tamaswadnen, ehad ad samaswadan iman-nasan. ⁸ Mişan nakkanay a mosnen ənnur, nəqqələt aytedan əttâfnen alwasat dağ arat kul, təzzar nagu əzəgzan əd tara aḡər ilsân idmaran-nana, iqqəl-ana deḡ attama n efsan wa nəga təkəbbut ən təzoli ta n əməgər, ⁹ fəlas Məşşina wər danağ-otes temsay, kalar efsan a danağ-otas əs tarrayt n Əməli-nana Ƴaysa Elməsix ¹⁰ aba fəl əddəlil-nana, fəl ad iqqəl as nəddew dər-əs dağ təməddurt gər za nəddar wala deḡ ab-ana. ¹¹ Awen da fəlas akkiyyan dağ-wan issəsmədet əwəl n əmidi-net, tənəmədhəlam gar-ewwan dağ əşitəy n əzəgzan-nawan zun awa da tətəggim kala da.

İnnəsixa wa ilkaman

¹² Nəgmay dağ-wan ya imədrayan-nana, ad tətəggim a iknan əlluḡ y aytedan win dağ-wan əşxalnen id Əməli a dawan-tan-d-isannafranan y a dawan-izaran, agin-kawan dağ tarrayt-net. ¹³ Nəgmay dağ-wan a dasan-tagim saḡmar aggen igân əs tara fəl əşşəḡəl wa taggin. Imələt alxer gar-ewwan.

¹⁴ Nəgmay dağ-wan deḡ imədrayan-nana, ad tərəqqamam y aytedan win məssəndad, tətəggim ənnəsixatan olaḡnen i win əksannen iman, tədahhalam inərkam, təqqələm iməzəzzəydar y aytedan kul. ¹⁵ A tu-wər-iməl awedan izzizalan təkma s iyyat, kalar gammayat faw igi n awa olaḡan, gər za gar-ewwan kawanay iman-nawan, wala deḡ gar-ewwan d awedan a iqqal. ¹⁶ Əqqələt aytedan as faw filawasan. ¹⁷ Ad wər tammazzayam d igi ən təwatriwen. ¹⁸ Əkkulluk n alxalat fall-awan təgat, ad tətigudəyam i Məşşina. Ənta əddi da arat wa fall-awan ira Məşşina fəlas tərtayam əd Ƴaysa Elməsix.

¹⁹ Ad wər təgaddalam y Infas wa Zəddigan a kawan-isimələwləw. ²⁰ Ad wər tətəlkim awa gannin ələwlitan, ²¹ kalar arat kul nəzzarat dağ-as, tətəfam dağ-as awa olaḡan. ²² Nəməggəgat əd təkma ketnet, a təqqal.

²³ Nəgmay dağ Məşşina a ihakkin alxer, a dawan-agu əzəzdəg ikmâlan ənta iman-net, agəz-kawan əmmək wa təmosam, gər iman-nawan wala iwallan-nawan, wala taḡəssa-nawan, təqqələm aytedan as tu-wər-illa i ifragan a sər-san annu ark arat, har d-asu Əməli Ƴaysa, Elməsix! ²⁴ Məşşina kawan-d-îḡrân əs man-net, alḡadil a imos, amaran ənta z'agin əddi.

Assalaman

²⁵ Tattarat-anay-in imədrayan-nana: ²⁶ Səsləmat-in imədrayan-nana kul tassaknim-tan-in tara ta n tidət. ²⁷ Əgmaya dağ-wan fəl udəm n Əməli, ad taḡrim şirawt ta i mədrayan-nana kul.

²⁸ Izazzabbat-du fall-awan Əməli-nana Ƴaysa Əlməsix arraxmat-net!

Şirawt ta n sanatat iktab Buləs i Kəl-Tesalonik

Assalaman

¹ Şirawt a din-təfâlat nak Buləs əd Silfanus əd Timotay. Nəhul-in Elkənisat ta n əxram ən Tesalonik təmosat tamattay tərâyat əd Məşşina di n Abba-nana, d Əməli Ҳaysa Əlməsix. ² İkf-iwan Məşşina di n Abba-nana d Əməli Ҳaysa Əlməsix arraxmat d alxer.

Əşşəriya wa z'agin xur tawaylay n Əlməsix

³ İmədrayan-nana, iwâr-ana ad nətigudəy i Məşşina faw dağ talxa-nawan. İmos adi arat as inihagga a tu-nagu fəlas əzəgzan-nawan a itittəyan wəllen, itittəy əntada ənəmərə-nawan. ⁴ Adi da a fəlas nakkanay iman-nana nəsanamal fall-awan dağ Elkənisaten şin hadatnen ən Məşşina. Nəmmâl zəmmerat-nawan d əzəgzan-nawan dağ ətəwədgaz kul wa tatawaggam d arkanay wa tənnayam.

⁵ İsitadda adi aqqad n əşşəriya ən Məşşina, amaran adi da a kawan-z-issəhəran əd taymar-net ta fəl tənnayam arkanay. ⁶ Arat oğâdan xur Məşşina a imos ad izzəzəl dağ win kawan-zaxazzabnen. ⁷ Amaran kawanay win taxazzabnen əmərədda, a kawan-akfu təsasmit akf-anaq-qat nakkanay da. Arat wa, ad agu assaxa wa du-z-inəfiləl Ҳaysa Əlməsix ifâl-du jənnawan ənta d angalosan-net əlanen tarna, ⁸ dağ ammas ən təmsay təbilaglagat fəl ad awwaddab aytedan win wər nəssen Məşşina, ugayan əs ləkkum y Əlinjil n Əməli-nana Ҳaysa Əlməsix. ⁹ Attadib-nasan, ad iqqəl ahluk ixlâlan, nəməggəgan d Əməli-nana. Wər dasan-ilkem anay ən tanaya ən tarna-net. ¹⁰ Adi kul ad agu əzəl wa du-z-azzabbat Ҳaysa iha ammas n aytedan win mizdagan əd win sər-əs əzzəgzannen kul fəl ad t-əssəxməran ad t-əmmalan. Kawanay da a tan-təggəzam əzəl wədi fəlas təzzigzanam isalan win dawan-nəga. ¹¹ Adi a fəl dawan-nətansay Əməli-nana faw a kawan-issəharan əd tarrayt ta daq-qawan iga. Nəgammay dağ-as ad assandu əs tarna-net deranan-nawan kul win olaynen, agu deş əzəgzan-nawan arat təha tənfa. ¹² Eddi ad za təssəxməram esəm n Əməli-nana Ҳaysa, issəxmər-kawan ənta da s arraxmat ən Məşşina d Əməli-nana Ҳaysa Əlməsix.

2

Ezəbbi n Əlməsix

¹ İmədrayan-nana, dağ batu ta təqqalat əzəbbi wa du-z-agu Əməli-nana Ҳaysa Əlməsix əd tidawt ta za nagu xur-əs, nəgmây dağ-wan: ² Ad wər aşəw awedan waliyyan əd tayttay-nawan, wala təşşəwəşam fəl əddəlil ən batu as itiwanna isinafalal-ana-tat-du Məşşina s İnfas-net wa Zəddigan, wala təşşəwəşam fəl əddəlil ən batu nəgâ dağ anamod wen, wala deş şirawt iyyat as dawan-itiwanna nakkanay a din-təfal nəmmal dağ-as as əzəl wa ilkaman ewad-du. ³ A tu-wər-iməl əmmək as kawan-issəxrak awedan, fəlas əzəl wədi wər du-z-asu iket wər tənayam əfəlləg, təzzar inifiləl Ənəmməzrəy as itawannu In-Tajat as təsəlkamt-net ahluk. ⁴ İmos azangaw ən Məşşina a z'ammazrayan arat kul was itawanna ifâl-du Məşşina əd wa itawaybadan, agu iman-net dənnəg-san. Fadda ad aqqam dağ Ahan wa Zəwwəran n Əlxibada, agu iman-net əməli. ⁵ Awak takatawt a wər tətəggim as dawan-əmalay aratan win ketnasan harwa xur-wan əlle?

⁶ Amaran əmərədda təssānam awa t-in-iwaxan fəl a du-wər-inafalal iket wər d-osa alwaq-net. ⁷ Wala əmərədda da təmazrəyt tətawamazal daw amaçal, əngəm in za as ab'as t-illa wa tat-in-iwaxan. ⁸ Amaran inəfiləl-du In-Tajat mişan as d-osa Əməli

Ŷaysa a daŷ-as ikkəs iman s Infas-net, assabu tamayyamayt-net s əmələwləw n assa-net. ⁹ Assa n In-Tajat a d-agu əs tarrayt n Aššaytan iddew d əzzənəfan aggotnen ən təlməxjujaten d alɣalamaten əd təjujab əmosnen bahutan. ¹⁰ In-Tajat iddew d əkulluk n abakkad issixrakan aytedan win z'əhləknen, fəlas wər əqbelan za wər əren tidət ta təfragat əsəfsi-nasan. ¹¹ Eddəlil-net a fəl dasan-d-issəgla Məššina tarrayt təsaxrakat, fəl ad əzzəgzənan əs bahu, ¹² fəl ad awwaddaban win wər nəzzəgzan əs tidət, əssofan ləkkum y awa wər noxəd.

Akniwat əzəzzəwi daɣ əzəgzan-nawan

¹³ Nakkanay amaran imədrayan-nana ən maran n Əməli, iwâr-anax ad nətigudəy faw i Məššina daɣ talɣa-nawan fəlas kawanay təzzar a isannafran Məššina y ad təgrəwam efsan s əzəzdəg wa itaggu Infas ən Məššina d əzəgzan əs tidət. ¹⁴ Awen da as kawan-d-iyra s Əlinjil wa dawan-nəmal fəl ad təgrəwam tanaya n Əməli-nana Ŷaysa Əlməsix. ¹⁵ Daɣ adi imədrayan-nana, zəzzəwətət daɣ iduf n əsəssəxri wa dawan-nəga gər za s əmi wala da əs šira šin dawan-in-nəktab.

¹⁶ Amaran nəgmây daɣ Məššina di n Abba-nana d Əməli-nana Ŷaysa Əlməsix iman-net danaɣ-ərânen, əkfân-ana s arraxmat təsasmit təxlâlat d-igi n attama issohen, ¹⁷ a kawan-akfin təsasmit n əwəl, səssuhen-kawan fəl ad təfrəgam əmazal əd tənna n awa olaɣan.

3

Taggiwat šiwatriwen

¹ Əmərədda imədrayan-nana, tansayat-anax-in Məššina, fəl ad iwəziwəz awal n Əməli itəwəgg-as saɣmar wa das-itawaggan ɣur-wan. ² Egməyat ənta da daɣ Məššina a danaɣ-ogazan daɣ zənga əd nəzzulam fəlas wərgəy aytedan kul a əttafnen əzəgzan. ³ Mišan, Əməli alɣadil a imos, ənta a kawan-z-isəssuhen agəz-kawan daɣ Iblis. ⁴ Nəga attama s esəm n Əməli as tətamazalam awas kawan-nomar taglim deɣ tətamazalam-tu. ⁵ Issədəget Əməli iwallan-nawan sa sər tara ən Məššina əd zəmmerat ta ihakku Əlməsix.

Batu təqqâlat aytedan win məssəndad

⁶ Imədrayan-nana, nomâr-kawan fəl udəm n Əməli-nana Ŷaysa Əlməsix s ad tənəməggəgam əd məzzəgzan kul win məssəndad, wər əlkeman y awa tan-nəsassaɣra. ⁷ Kawanay iman-nawan, təssânam wəllen as immikkan ad tataggim awa nətag. Harwa a ɣur-wan nəlla, wər nəmos iməssəndad. ⁸ Wər nəgmây daɣ waliyyan daɣ-wan a danaɣ-işatşu bannan, kalar nərda s anay n arkanay d iduz labasan, nəşɣâl ehad ezal fəl ad wər nəqqel əzuk i waliyyan daɣ-wan. ⁹ Wər dana-isassaga adi iba ən təla n alxaq n a dana-tilalam, kala ar nəg-ay fəl a dawan-nəqqəl almasal. ¹⁰ Harwa kawan-nəha, nomâr-kawan s as: Wa uɣayan s əşşəxəl, ad wər atşu.

¹¹ Amaran əmərədda nəsla as ahân-kawan aytedan əglânen əs tamajalladat, wər tan-iha ar iguz ən taɣawşiwən a tan-wər-nəqqel. ¹² Aytedan win di nomâr-tan, nəgmây daɣ-san deɣ s esəm n Əməli Ŷaysa Əlməsix, ad agin əşşəxəl-nasan əs tənagrit fəl ad atşin daɣ əşşəxəl ən fassan-nasan. ¹³ Amaran kawanay imədrayan-nana, ad wər təddəzam igi n awa olaɣan. ¹⁴ Kud ih-iwan awedan wər nəlkem y awa nənna daɣ şirawt ta, əssənat-tu, a tu-wər-təməl tassaɣ waliyyat gar-ewwan dər-əs, fəl ad ikərəkəd. ¹⁵ Dər iga adi da, a das-wər-tagim iduf n azangaw, taggat-as ənnəsixa wa za tagim y amadray-nawan.

Şiwatriwen d assalaman

¹⁶ Akfet-kawan Əməli n alxer ənta iman-net alxer faw daɣ arat kul, ilal-awan ketnawan. ¹⁷ Əfus wa-nin iman-in a iktaban awa: Şihulawen a din-əgmadnen Buləs.

Awa da a imosan ejwal ən šira-nin kul. Emmək wa da as tanat-kattaba. ¹⁸ Məššina ya təkfeq-qawan arraxmat n Əməli-nana Ƴaysa Əlməsix.

Širawt ta tazzarat iktab Buləs i Timotay

Šihulawen

¹ Awa nak Buləs, anammazul n Elməsix Ƴaysa s ammar ən Məššina di n Ənəssefsi-nana d Elməsix Ƴaysa wa daƷ nəga attama-nana. ² Əhulax-in Timotay imosan bararin wa n tidət daƷ əzəgzan əs Ƴaysa Elməsix. Əgmâya daƷ Məššina di n Abba, d Əməli-nana Elməsix Ƴaysa, a fall-ak d-izazzabben arraxmat, əd təhanint, d alxer.

Arraxmat ən Məššina əd təbəllant ta tolayat

Ərruxmatan fəl səssəxritan win saxraknen

³ Ƴur iki-nin akal ən Masedonəya, əgmâya daƷ-ak ad taqqama daƷ əxrəm n Efez, fəl ad təzzərəzaƷ isəssəxritan saxraknen, a daƷ-as taggin aytedan wiyyad. ⁴ Annasan ad ammazzayan əd ləkkum i mayyan ən Kəl-Əlyəhud, əd masnat n əsmawan n aljadan, wər nəla təzərəst! Aratan win wər du-tiwəyan ar tamazaƷ wər təha alfoydat waliyyat, edag a n ad ədgəzan daƷ iduf n aratan win issəbdad Məššina daƷ tarrayt ta n əzəgzan. ⁵ Elməxsud n awas kay-omarax əddi, a tu-təməl tara daƷ aytedan s əwəl iyyanda, d ənnəyaten olaxnen, d əzəgzan wər təha təmənufəqa. ⁶ Aytedan wiyyad namaggagan d əššərədan win, fataqqen daƷ igi ən batuten šiyyad wər nəla almaƷna waliyyan. ⁷ Sidaranan ad əqqəlan imusanan n əššərixa wa n Əttawret, ənta wərmad əgrân awa gannin wala deƷ aratan win as əššewalan əkkasan daƷ-san aššak.

⁸ Nəssân as əššərixa wa n Əttawret olâx as das-ilkam awedan s əllux. ⁹ Nəssân deƷ as əššərixa wər d-osa fəl əddəlil n aytedan win oƷadnen, kalar osâ-du fəl əddəlil n arak aytedan, əd nəmməzray, d aytedan win wər nəksud Məššina, əd win nasbakkadan əd win wər nəha əddin əd maggan n alfawaxišan əd win əganen iman n abbatan-nasan d annatən-nasan əd win maggan ən man ¹⁰ əd maggan n əzzəna, əd win tinəməgginen əzzəna gər za meddan gar-essan, wala šidoden gar-essanat, d aytedan win din-zanzinen wiyyad, əd nəsbuha əd win tagginen tahuday ən bahu, d aytedan kul win əmməzraynen əsəssəxri wa isxan. ¹¹ Əsəssəxri wədi, igmâd-du Əlinjil ən Məššina ilân albaraka ila tanaya. Əlinjil en da a dər-i isannattaf.

Igodan ən Buləs i Məššina arraxmat-net

¹² Əgğodayax y Elməsix Ƴaysa əməli-nana a di-issəfragan igi n əššəxəl-in, fəlas əsənnəhi a di-iga əd təfləst, isannafran-i fəl a das-əšxəla, ¹³ nak was harwa das-wər-əlkema tibuduraƷ-qu, sakna inalkiman-net arkanay, rabbadaƷ-qan, mišan ihanattat-i fəlas əljəhəl d iba n əzəgzan sər-əs a daƷ əgeƷ awen. ¹⁴ Təzzar isannahal-i Əməli-nana tehakkay n arraxmat-net, ikf-i deƷ əzəgzan əd tara win sər-na du-tətaway tassaƷ əd Ƴaysa Elməsix.

¹⁵ Batu ta, igmâd-tat aššak, təhor deƷ d i tat-izzəgzanan ketnet təmosat as: Elməsix Ƴaysa osâ-du əddənet fəl ad assafsu inasbakkadan as nak eƷaf-nasan. ¹⁶ Mišan ihanattat-i Məššina, fəl a sər-i assaknu Elməsix Ƴaysa nak a ogaran inasbakkadan, tazaydart-net ketnet, əqqəlay almasal y aytedan win sər-əs z'əzəgzənnen əgrəwan təməddurt ta təxlalay.

¹⁷ Ya Əmənokal n Amaylol

Wər nətəməttəy har faw

wər itəwənəy

Wər ila əmidi.

Saymar d ədkul kul

kay a dər-san ihoran har faw.

Amin!

Awa iwaran Timotay

¹⁸ Ya barar-in Timotay, ənta da arat was kay omara, amaran inimannak əd batuten šin fall-ak əgan ələwlitan dat awa əs tilalt n Infas ən Məššina, imosan as, batuten šin di ag-enat təzoli-nak dağ əməgər olâyan wa təge d aytedan win safraynen awal ən Məššina. ¹⁹ As tətəggağ adi təttafağ əzəgzan-nak, təzinamazlaya wəllen gər awa olaxan d awa wər noləğ. Aytedan wiyyad teway-du sər-san tugəyt s adi as ibarajjat əzəgzan-nasan. ²⁰ Aytedan win di ih-en Himani d Alaskandər. Oyyeğ Aššaytan orn-en fəl ad aknin, ammazzayan d ikus ən tarna i Məššina.

2

İnnizam n Əlkənisat

Əlyibada dağ Əlkənisat

¹ Əgmâya dağ-wan dağ adi ad təgammayam dağ Məššina a iknan tumaxlaten n aytedan, tətattaram, tətansayam-tu y aytedan kul, tətigudəyam-as awa iga y akk awedan. ² Ad tətəggim adi da i mənokalan d aytedan kul win əhanen tağmar fəl ad nagu təməddurt tədrârat, iha alxer dağ nəksud Məššina d əzzəbun dağ əkkulluk n anamod. ³ Adi a olaxan, igray y Ənəssefsi-nana Məššina, ⁴ irân əsəfsi n aytedan kul, awədan məsnat ən tidət.

⁵ Fəlas Məššina iyyanda ças a t-illan, awedan dəğ iyyanda, a t-imosan Ƴaysa Əlməsix a imosan almawakkil gər Məššina d aytedan;

⁶ ikfa iman-net, fəl ad addarfen aytedan kul.

Ənta den da təgəyya ta iga Məššina dağ alwaq was imal.

⁷ Təgəyya ten da as di-isannafran Məššina y a tat-aga. Ig-i əməggi ən salan n Əlinjil, d anammazul. Issok-i aytedan win wər nəməs Kəl Əlyəhud y a tan-sassağra awa iqqalan əzəgzan əd tidət. Awa ənne da, tidət a imos, wərge bahu.

⁸ Dağ adi, dağ adag kul, as təddewam y əlyibada, əgmâya dağ məddan ad tattaran ədkâlan ifassan-nasan s əwəl zəddigan wər iha alham wala əsəmməsəndəd.

⁹ Əmmək en da as areğ ad tagginat tədoden telassay təzzibanat, tətârat, təhât edag. Ad wər ədləgnat iman-nasnət əs lətfan əmmittaynen, wala s urəğ əd təssağeren madeğ tabdoq təkniət əzzəwi.

¹⁰ Kalar ədləgnatet iman-nasnət əs mazalan olaxnen win tagginat tədoden šin əksudnen Məššina. ¹¹ Dağ alwaqan win əsəssəğri n əljəməğat, tantut iwâr-tat ad tədrər taknu əsəsəm a dağ təbbirdag y əməsəssəğri.

¹² Wər əkfe tantut turagat n əsəssəğri wala da tizart y aləs. Kalar iwâr-tat əsəsəm.

¹³ Fəlas Adəm a d-ixlak Məššina dağ tizarat, dəffər adi ixlak-du Xawa. ¹⁴ Harwa, wərge Adəm a issəxrak İblis; kalar tantut a issəxrak, təqqal tənəmmezrəyt. ¹⁵ Mišan

ya ad təgrəw əlxillas s əssəbab n as tətəlu bararan. Amaran šidoden ad əğləsnat as zazzawatnat dağ əzəgzan-nasnət, təh-enat tara, əgânat alxal zəddigan, əgânat awen dağ əzzəbun.

3

İmuzaran n Əlkənisat

¹ İllikan as awedan was imos amadammad-net tişit n əmuzar ən nalkiman ən Ƴaysa, əşşəğəl ihossayan a ira əddi. ² Əmuzar n Əlkənisat iwâr-tu a tu-wər-illa i ifragan a dağ-as d-inəy ark arat, izlâf tantut iyyadda, iğdal i təntut-net, imos awedan səmmidan, innoda dağ əwəl-net, ilə əzzəbun, ih-ay amagaru, ifrag wəllen əsəssəğri.

³ Wər t-itəqqəl əməşwi n esmad wala awedan n əməkkənəs. Kalar əmuzar n

Elkənisat iwâr-tu ad imos awedan ilân aladab, wər imos ənadlam, wər iwwəlat azrəf. ⁴ Iwâr-tu ad ittâf s əlluḡ tanat n aḡaywan-net, əbbirdagan bararan-net, iga awen s əzzəbun. ⁵ Awak awedan wa wər nəfreg ənəttaf ən wala aḡaywan-net, manəmmək as z'issən daḡ nalkiman ən Ḡaysa? ⁶ Ad wər iqqəl awedan as səket ilkam i Ḡaysa fəl ad wər idkəl iman-net dənnəḡ aytedan təzzar udu daḡ tədləmt ta daḡ iggədlə Iblis iman-net. ⁷ Iwâr-tu ad imos awedan əflâsan aytedan win wər nəmos əlməsixitan, fəl a tu-wər-iməl i ifrâgan a daḡ-as d-inəy ark arat, ifətəqqat daḡ taftaw n Iblis.

Imadhalan n Elkənisat

⁸ Imadhalan n Elkənisat, əntanay da iwâr-tan ad əttafan əzzəbun-nasan, təssiflas deḡ batu-nasan. Ad wər iqqəl alxal-nasan tessay n esmad wala tattan alxaram. ⁹ Iwâr-tan ad zizawen daḡ tidət ta tənafalalat təhât əzəḡzan s Elməsix, ilen ənnəyaten zaddognen. ¹⁰ Təwəjərrəbanet təzzar, dəffər adi kud wər t-illa i ifragan a daḡ-as d-inəy ark arat, assantin əşşəḡəl wa n tişit ən madhalan. ¹¹ Emmək en daḡ as şimadhale n Elkənisat da iwâr-tanat ad əlânat əzzəbun, wər tizəmnat, sammədnat, əḡdâlnat daḡ əkkulluk n arat. ¹² Emadhəl n Elkənisat iwâr-tu ad iḡdâl i təntut-net, iga ənəttaf olaḡan i bararan-net d aḡaywan-net. ¹³ Imadhalan n Elkənisat win tagganen əşşəḡəl-nasan s əlluḡ garrawan almaqam d ikus n aşşak ikmalan daḡ əzəḡzan s Elməsix Ḡaysa.

Essiran ən tarrayt ta n Eməli

¹⁴ Attama wa əḡeḡ n a kay-ənəya tarmad wər di-igdel a dak-in-əktəba isalan win di ¹⁵ fəl ad iqqəl as kud fall-ak in-əlləleḡ, da ad təssənəḡ alxal was imməkkan ad t-aḡin aytedan daḡ ahan ən Məşşina di n Aməḡlol a t-imosan Elkənisat. Elkənisat ta ənta a təmosat təḡəttawt ta n təsəkbəlt ən tidət. ¹⁶ Igmâd aşşak as əssir wa danəḡ-isannafalal Məşşina a t-imosan Elməsix, i zəwwəran:
Inafalal imos awedan.
Iggəyyat Infas ən Məşşina as oḡâd.
Ənâyan-tu angalosan.
Tiwaggan salan-net
y aytedan win wər nəmos Kəl-Əlyəhud.
Əzzigzanan sər-əs aytedan daḡ əddənət ketnet.
Immədkal əs jənnawan əs tanaya.

4

Esəssəyri wa olaḡan d amaşşəḡəl n Elməsix

Erruḡmatan fəl səssəyritan ən bahu

¹ Dər iga awen da ya Infas imâl s əlluḡ as daḡ azzaman win əlkamnen, aytedan wiyyad ad ammazzayan d əzəḡzan s Elməsix, əlkaman i kələsuf saxraknen, əd təssunen n Aşşaytan. ² Təssunen şin əfâlnat-du inəsbuha n əlmunafiqan, əs əmmutan wallan-nasan, ³ əḡdâlan azalaf, əryâman fəl tattay ən wiyyad imensewan as Məşşina a tan-d-ixlakan fəl a tan-atşin aytedan win əzzəḡzannen əḡḡodayan i Məşşina, əntanay a əssanen tidət. ⁴ Fəlas awa d-ixlak Məşşina kul olâḡ. Wər t-ihə a xaraman, iggudəyet ḡas awedan i Məşşina təzzar atşet awa ira. ⁵ Id izzizdak-ku awal ən Məşşina əd təwatray.

Amaşşəḡəl wa olaḡan ən Ḡaysa Elməsix

⁶ As təmmâləḡ isalan win dak-əḡe da i məzzəḡzan, ad təqqələ amaşşəḡəl olâḡan n Elməsix Ḡaysa, iddaran s Əlinjil imosan ənəfilal ən Məşşina daḡ Ḡaysa, əd təssunt tolâḡat tas təslə. ⁷ Ad wər təsasamay i mayyan ən bannan əmmizraynen awal ən Məşşina. Kalar səlməd iman-nak təməddurt ta daḡ tosaḡa əd Məşşina. ⁸ Əşşinən ən

taḡəssa wər tu-taha tənfa tagget, mišan əšinən n əwəl ləkkum y awal ən Məššina, tah-ay tənfa daḡ tarrayt kul, fəlas nəgarraw sər-əs əmərədda tēməddurt tas iga Məššina arkawal-net, nəgrəw-tat deḡ dəffər iba. ⁹ Batu adi igmâd aššak, tənlihat da sər-əs arđin aytedan kul. ¹⁰ Nənnây arkanay, nəbbillan fəlas nəgâ attama-nana daḡ Məššina di n Amaylol imosan Ğnəssefsi n aytedan kul, wəllen win sər-əs əzzəgzannen. ¹¹ Aratan əddi da win as za tətamaray aytedan təsasaḡray-asan-tan.

¹² Ad wər tayyay awedan waliyyan alkik fəl as wər tawaššera. Kalar əqqəl almasal i məzzəgzan s awa təganna d alxal-nak əd tara ta kay-təhat d əzəgzan-nak əd tazdak n əwəl-nak. ¹³ Ğgməd əs taḡaray n Awal ən Məššina i məzzəgzan, d əsəhəl-nasan d əsəssəḡri-nasan har din-asa. ¹⁴ Ad wər taqqama wər təššəḡyala təhəkkut ta təgrawa, ta kay-ikfa Məššina s awal wa sər-ək iga ələwli iyyan əs tarrayt n Infas ən Məššina, assaḡa wa kay-əssəwaran muzaran n Ğlkənisat ifassan. ¹⁵ Aratan win dak-əməla da, ədgəz daḡ-san, fəl ad ənəyan aytedan kul əməttəy wa tətagga.

¹⁶ Ğssən daḡ man-nak, təssəna ənta da daḡ aratan win təsassaḡra, ad wər tammazzaya d igi n adi. As tətaggaḡ adi, ad tassafsaḡ iman-nak, tassafsa deḡ aytedan win dak-sasammen.

5

Awa iwaran Timotay gar-es əd məzzəgzan

¹ Ad wər tətihərəššəy iḡmaran. Tagg-asan ənnəsixa šilat ən wa za taga y abba-nak; tagay i meddan win madrornen ənnəsixa wa za tagay i mədrayan-nak. ² Šiḡmaren ag-asnat ənnəsixa wa za taga y anna-nak. Taga deḡ i tədoden šin madrornen ənnəsixa wa za tagay i tēmədrayen-nak, iga awen s əwəl zəddigan.

³ Səḡmər šidoden šin as aba meddan-nasnat wər əlenat əšəqqay a dər-əsnat inəttafan, təssəna daḡ-asnat. ⁴ Mišan kud əlānat bararan madeḡ ihayawan, wədi zəmmizəlanet təksəda-nasan Məššina s ad əssənan daḡ marwan-nasan, ərzəman-asan əsədwəl wa tan-əgan fəlas adi da igrazan i Məššina.

⁵ Amaran ta wər nəla i dər-əs, təxsâr əd man-net ənta əddi təgat attama-net daḡ Məššina, təgammay daḡ Məššina a iknan tuməḡlaten-net, tətattar ehad ezal. ⁶ Mišan as imos as tantut as wər idder aləs-net, təga tēməddurt a daḡ təlkâm i tara ən man-net, kud imos as taḡəssa-net təddar, da fəl aganna wa n tassaḡ-net əd Məššina šilat n as wər tədder. ⁷ Ənta əddi da awa as kay-iwar a tanat-tətamara sər-əs, fəl a tu-wər-iməl i ifragan a daḡ-asnat d-inəy ark arat. ⁸ Amaran awedan wa wər nəssen daḡ aytedan-net, wəllen win nəmmuray-net, wədi zun as oyya əzəgzan-net, iššam-as fadda awedan wa wər nəzzəgzan.

⁹ Ad wər təktəba tantut as wər idder aləs-net daḡ šin as tətılal Ğlkənisat ar s ad təga sədisat təmərwen n awatay madeḡ tokay-tanat, ənta da, wər tat-ides ar azalaf iyyanda. ¹⁰ Ğggəyyen deḡ aytedan as tətag imazalan olaynen, əmosnen əsədwəl olāḡan ən bararan-net, d amagaru, wər təsassaḡar iman-net igi n əššəḡəl a iqqal i məzzəgzan, əd tilalt y aytedan win maḡatarnen, d əmazal n arat kul wa olayn s əwəl iyyanda.

¹¹ Amaran šidoden šin aynaynen, šin as wər ədderan meddan-nasnat ad wər təqbəla tilalt y-asnat fəlas as daḡ-asnat d-inkar Iblis, ad usafnat azalaf əššəḡəl y Ğlməsix. ¹² Təzzar ibəz-tanat əššəriḡa ən Məššina s agamad wa tanat-iga əzəgzan-nasnat s ənta arkawal-nasnat wa azzaran, ¹³ aqqaminat wər əlenat əššəḡəl waliyyan ar ilum gər nan. Adi ogar-tu âs, a tanat-təggəz šizmit; əššiwəlnat daḡ taḡawšiwən n aytedan, d aratan as wər imməkkan a daḡ-san šawalnat. ¹⁴ Daḡ adi šidoden šin aynaynen, šin as wər ədderan meddan-nasnat, əssofay ad əzləfnat, ilenat bararan, əssənnat daḡ ḡawnatan-nasnat fəl ad wər əgrəwnat i maksanan-nanaḡ tarrayt n a

daḡ-na d-ənəyan ark arat a sər-naḡ ənnan, ¹⁵ fəlas šiyyad daḡ-asnat har âs əxraknat, əlkamnat y Aššaytan.

¹⁶ Kud təll-ay təlməsixit təlât šişəqqaxen as wər ədderan meddan-nasnat, təssənet daḡ-asnat, aqqaminat wər əmosnat əzuk y Əlkənisat, fəl ad tilal i šin wər nəla i dər-əsnať.

Imuzaran n Əlkənisat

¹⁷ Imuzaran n Əlkənisat win tagginen tizart tolayat əhoran d ətəwəsəḡmar imosan ənətfus, wəllen win tagganen təlxutbat sasayrin Awal ən Məššina. ¹⁸ Fəlas a ənnan Əlkəttaban: «Ad wər tədbəḡa y azgar wa təššəšḡala». Ənnân deḡ: «Amaššaxal ihor d alxaq-net».

¹⁹ Ad wər tətattafa təxtəst tətiwaggat y əmuzar n Əlkənisat ar s a *tat-əggəyyen əššin aytedan madeḡ karad*. ²⁰ Imuzaran n Əlkənisat win tagginen ibakkadan, raqqam-asan dat Əlkənisat ketnet, fəl ad təggəz tasa əlməsixitan win hadatnen. ²¹ Onsayaq-qay fəl Məššina d Əlməsix Ḳaysa d angalosan win isannafran ad təlkəma y aratan win as kay-omara da, daḡ wər təgəḡ arak torda waliyyat, wala təmərit.

²² Ad wər tərrurəda əsəwər ən fassan-nak awedan, wala deḡ tileḡ adagar daḡ bakkadan n awedan waliyyan. Agəz iman-nak, tətəfa tazdak-nak. ²³ Mazzay əd tassay n aman ḡas, kalar sassu arat n esmad n alḡanab ad anfu adi tadist-nak, anf-ik daḡ təfrəyt ta sər-ək du-təsaxlayat. ²⁴ Əllan-tu aytedan as ibakkadan-nasan wər tan-iqqərat arat, tiwassanan harwa dat əššəriḡa, mišan wiyyad dəffər tərut ad tawanayan win-nasan. ²⁵ Emmək en daḡ as, imazalan win olaynen wər tan-iqqərat arat, amaran wala win iqqərat arat da wər təhigin əḡbâran.

6

Eklan əd məssawsan

¹ Əlməsixitan kul win əmosnen eklan, iwâr-tan saḡmar ən məssawsan wəllen fəl ad wər əkkesan aytedan tarna i Məššina, wala deḡ alkin təssunt ta nəsassaxru.

² Amaran win daḡ-san əlan əlməsixitan, ad wər assaknin məssawsan iba ən saḡmar fəlas dər-san əmosan arat iyyanda daḡ əddin. Kalar aginet-asan əššəḡəl ofân was kala a dasan-tu-taggin, fəlas aytedan win garrawnen tənfa n əššəḡəl-nasan əddi, əntanay da əlməsixitan a əmosan sinahalten ətəwəra.

Ammaran əkkanen Timotay imosan əmaray əs Məššina

Isəssəḡritan ən bahu d əzəḡzan wa n tidət

Adi a za tasassaxraḡ aytedan təzzədgəzaq-qan daḡ-as. ³ Awedan wa isasaxran aratan wər nəmos win dak-əmala da, harwa wər ilkem y awal wa isxan n Əməlinana Ḳaysa Əlməsix d əsəssəḡri wa d-itawayan təḡudəla, ⁴ wədi awedan anasbarag a imos n aljahil təssiran tara ən tamazaq əd takat wər nəḡa ar fəl almaḡna n əlxərəfan. Itaraw-du adi manjaḡ əd tamazaq d arak batuten d arak tordaten, ⁵ əd məzrəyan wər nərriz gər aytedan as wər oḡednat ənnəyaten-nasan, təḡmad-tan tidət. Əḡân iduf n âs a tan-isəggərgəḡs iguz n əddin. ⁶ Mišan illikan as, təksəda ən Məššina təmos təgərgist zəwwərat fəlas təhakk-anax təməddurt a daḡ nəḡda s awa nəla. ⁷ Fəlas wər neway wala as du-nəggaz əddənet zund əmmək en daḡ as a tat-nəḡməd wər neway wala. ⁸ Daḡ adi, agdet-anax as nəla isudar əd talassay. ⁹ Amaran aytedan win əranen təgərgist, tifətəqqen daḡ jarrabatan, əd taftawen d arak deranan aggotnen a tan-əkmanen, a du-wər-nətiwəy s awedan ar əbərəjji d əhluk. ¹⁰ Tara n əzrəf a təmosat ələsəl n əššur kul. Əllan-tu aytedan s awa das-əgan daḡ tara, əxrakan, igmad-tan əzəḡzan-nasan, ewayan-du əs man-nasan šiməḡraz aggotnen.

Ammaran əkkanen Timotay

¹¹ Amaran kay Timotay, imosan əmaray əs Məşşina, darrag y adi ketnet. Əgməy taqqat, əd təksəda ən Məşşina, d əzəgzan, əd tara, əd zəmmerat, əd talmat. ¹² Agu təbəllant ta tolaɣat, təmosat aggaz n əzəgzan. Əqbəl təməddurt ta təxlalat, fəlas Məşşina iyr-ik y a tat-təgrəwax, amaran batu-net a daɣ təmalay əzəgzan-nak dat təgəyyawen aggotnen. ¹³ Omâraq-qay fəl Məşşina a itaggin iman daɣ arat kul, d Əlməsix Ƴaysa a imalan s əllux əzəgzan-net dat Fons Bilatəs, ¹⁴ ad təlkəma y awas kay-omara, a daq-qay wər iwer lahan waliyyan, wər t-illa i ifragan a daɣ-ak d-inəy ark arat, har d-inəfiləl Əməli-nana Ƴaysa Əlməsix. ¹⁵ Ənəfilal-net ad agu daɣ alwaq wa issənsa Məşşina y awen,
 Ənta a ilan albaraka
 Ənta ɣas ənaxkim wa n tidət
 Əmənokal ən mənokalan,
 Əməli ən malan
¹⁶ Wər itəməttəy har faw
 Izdâɣ daɣ ənnur
 Wər din-itəwəhiz
 Wər t-illa awedan as kala ad t-inay
 Wala ifrag anay-net
 Ənta a ilan saɣmar əd tarna har faw.
 Amin!

Awa iwaran iməggərgas

¹⁷ Amər win əggərgasnen daɣ əddənət s ad wər ədkelan iman-nasan dənnəg aytedan wala agin attama-nasan daɣ təgərgist wər za nahag. Amər-tan s ad t-agin daɣ Məşşina a danax-ihakkin arat kul s igət fəl ad nagu təməddurt a daɣ nəddəwat. ¹⁸ Amər-tan s əmazal n awa olayan, aggərgasanet daɣ mazalan olaynen, təggəzet-tan tahakkay, ardinet əs tədrəwt d aytedan. ¹⁹ Əmmək di as z'əşşidəwan i man-nasan təgərgist a za təqqəlat təsəbdət tolaɣat y awa d-izayan əzəl a ilkaman fəl ad əgrəwan təməddurt ta n tidət.

Ənnəsixa wa ilkaman əd təhult

²⁰ Ya Timotay, agəz awa kay-issəɣlaf Məşşina. Nəməggəg əd batuten ən bannan əmmizraynen əddin, əd tamazaɣen əgânen daɣ təssunt ən bahu. ²¹ Wiyyad əlməsixitan əlkâmnən i təssunt tədi, əxrakan əmməzzayan d əzəgzan.
 Məşşina ya təgeɣ-awan arraxmat-net.

Širawt ta n sanatat ta iktab Buləs i Timotay

Təhult

¹ Awa nak Buləs, anammazul ən Ƴaysa əs tərəddawt ən Məššina. Iwâr-i amel ən tēməddurt tas danax-itawagga arkawal-net əs tarrayt ən tærtəyt d Elməsix Ƴaysa. ² Əhulax-in Timotay imosan zun barar-in əkney tara: Onsaya Məššina di n Abba, d Elməsix Ƴaysa Əməli-nana, a kay-ikfan arraxmat əd təhanint d alxer.

Ammar ən Timotay s ad aglu daɣ əššəɣəl-net

Agoda ən Buləs i Məššina daɣ batu ən Timotay d ammar-net

³ Nak əgğodayax i Məššina, s ənta a əɣbada s əwəl iyyanda zund əmmək as t-əɣbadan marawan-in, amaran kittəwaq-qay faw daɣ təwatriwen-in ehad ezal.

⁴ Kittəwaɣ iməttawan-nak əkney tara n a kay-ələsaɣ anay fəl ad aknin man-in təfalawist. ⁵ Kittəwa deɣ əzəgzan wa təgeɣ əs Ƴaysa s a wər nəmos sokni, amaran əzəgzan wa, ənta təga Lawisa ta kay-təsahhayawat, d anna-nak Anika. Əkkasaɣ aššak as kay da təgrāwaq-qu s əmmək en da. ⁶ Awen da fəl kay-du-saktaɣ as: sudər təhəkkut ta dak-iga Məššina, s əssəbab n əsəwər wa kay-əgeɣ ifassan. ⁷ Infas wa danax-ikfa Məššina, wər imos Infas ən tasa, kalar Infas a imos ən tarna əd tara d iduf n əzzəbun. ⁸ Daɣ adi a kay-wər-təggəz təkarakit n ad tətagayye fəl Əməli-nana, wala deɣ isəkkərəkəd-kay iguz-in kasaw fəl əddəlil-net. Kalar nərtəyet daɣ aɣazab wa tagga daɣ tarrayt n Əlinjil, iga awen əs tarna ən Məššina

⁹ s ənta danax-issəfsan,
ig-ana təɣaray zəddigat,
wəgeɣ fəl əddəlil ən mazalan-nana,
kalar fəl əddəlil n awa issəbdad Məššina əs tara-net,
d arraxmat ta dana-tətawakfat əs tarrayt n Elməsix Ƴaysa
harwa dat axluk-net əddənet.

¹⁰ Arraxmat ta isannafalal-tat-du əmərədda
assa n Ənəssefsi-nana Elməsix Ƴaysa
s ənta a ikkasan tarna daɣ təmattant,
isammalawlaw tēməddurt ta təɣlalət
tas itaggu Əlinjil isalan-net.

¹¹ Əddəlil n Əlinjil en da a fəl di-isannafran Məššina ig-i əməggi ən salan, n anammazul n əməsəsəɣri. ¹² Amaran əddəlil n aratan win da, a fəl tawazaɣazzabaɣ əmərədda, mišan wər fall-i imos awen təkarakit, fəlas əssana was əzzəgzana, əkney deɣ ikus n aššak as ifrâg ad agəz taɣlift ta ɣur-əs əle har əzəl a ilkaman. ¹³ Əlkəm y almasal wa ihan isalan ən tidət win dak-əgeɣ, təzəzzəwe daɣ-as s əzəgzan əd tara win du-tətaway tassaɣ n Elməsix Ƴaysa. ¹⁴ Taɣlift təhossayat ta təgrawa ɣur Məššina, agəz-tat əs tarna n Infas wa Zəddigan a danax-ihan. ¹⁵ Təssənaɣ əs aytedan kul win akal n Asəya əfalan dəffər-i, harkid Figelus, əd Hermogenus. ¹⁶ Əməli ya təzizabbe du təhanint-nak fəl aɣaywan n Onesiforus, fəlas faw italam-i fəl man, amaran wər ikarakad y iguz-in kasaw. ¹⁷ Kalar assaɣa wa din-osa Ərrum, iswad-i əs tidət har di-igraw. ¹⁸ Əməli ya təhinatəɣ-as əzəl a ilkaman. Kay iman-nak a issanan wəllen daɣ tilalt ta di-igi daɣ əɣrəm wa n Efez.

2

Anammagar wa n tidət n Elməsix

¹ Daḡ adi kay barar-in sæssuhæt iman-nak s arraxmat ta tæhat tartøyt n Ælmæsix ḡaysa. ² Amaran arat was di-tæsle ænneq-qu dat tægøyyawen aggotnen, sønnøttæf dær-æs aytedan æḡdâlnen, æfrâgnen a tu-sassayrin æntanay da i wiyyad. ³ Æzmær kay da i tadagart-nak daḡ alyazab fêlas adi da a itaggu anammagar wa n tidæt n Ælmæsix ḡaysa. ⁴ Awedan imosan anammagar, wær izlay daḡ tægawšiwen n æddønet sa hadan, fêlas wær igæmmøy ar gærrezat y æmænokal-net. ⁵ Zund æmmæk di daḡ as ænæbbellen wær inæjjæx ar s ad ilkâm y æššærødan kul win tæbøllant. ⁶ Amaran æmagyak wa igan æššæḡæl olâḡan, ænta a itizaran agaraw æn ḡarat. ⁷ Ænzær wøllen daḡ awa dak-ganna da, fêlas Mæššina a kay-z-akfin ægærri daḡ ækkulluk n arat. ⁸ Kattæw ḡaysa Ælmæsix, s ænta a d-itawasankaran daḡ næmmøttan, imos arat daḡ æzzurrøyya æn Dawød. Arat wa iššewal sær-æs Ælinjil wa æmmala. ⁹ Æddølil n Ælinjil en da, a fêl taḡazzaba, har as ægan-i ḡunan iguz a taggin y æjajøb n anasgafa. Mišan awal æn Mæššina ænta wær t-æhen ḡunan. ¹⁰ Awen da fêlas æddølil æn win isannafran Mæššina a fêl æzmara y arat ketnet, fêl ad ægrøwan æntanay da efsan æs tarrayt n Ælmæsix ḡaysa, ægrøwan tanaya tæḡlalat. ¹¹ Illikan as awal wa tidæt a imos:

As dær-æs nærtay daḡ tæmattant ta iga,
a dær-æs nærtøy deḡ daḡ tæmøddurt.

¹² As næzmar, wædi a dær-æs nærtøy daḡ taḡmar,
as tu-nænkur, wædi a danaḡ-unkar ænta da.

¹³ Kud nakkanay wær næḡdel, ænta faw iḡdâl,
fêlas wær z'unkar iman-net.

Amaššaxal itiwaqbalan

¹⁴ Aratan win as tæsley da, sakt-en-du i mæzzægzan tæzzar tægmoḡya daḡ-san fêl udøm æn Mæššina ad ammazzayan æd tamazaq æn tæfir. Wær tat-tæha tænfa waliyyat. Wær du-tætiwøy ar ahluk n aytedan win das-sasammen. ¹⁵ Gammay wøllen d ad tagay iman-nak alæs isitaddan æzælulæḡ-net dat Mæššina, tæqqølay awedan wær nætækærुकud daḡ æššæḡæl-net, tætaggay igi oḡâdan i salan win tidæt. ¹⁶ Næmøggøg d awalan wær nêla almayna waliyyan, æmosan ællid n æzægzan, fêlas win as æmosan awalan win æššæḡæl-nasan, iket tahagin kannin ænæmøggøg æd tæksøda æn Mæššina. ¹⁷ Awal-nasan iha ælmital an šiqqest labasat, a du-tøjibærøjjet elam. Aytedan win arat daḡ-san a imos Himani æd Filetos. ¹⁸ Æntanay a sannamaggagnen iman-nasan æd tidæt, ænnan tanakra æn næmmøttan wær tæmos arat ilkâman, kalar arat okâyan a tæmos, takkasan s awen æzægzan daḡ aytedan. ¹⁹ As iga awen šigøttawen šin issøbdad Mæššina, arat a mosnat izizawen, iwâr-tanat ejwal æn Mæššina imosan batuten šin: «*Æmæli issan win-net.*» Iwâr-tanat deḡ as: «Awedan kul wa innan ænta in Æmæli, wædi iwâr-tu ad ugag arat kul wa wær noḡed.» ²⁰ Aḡaywan zæwwøran ihossayan wærgøḡ ikassan n uræḡ d æzræf ḡas a t-æhanen, kalar æhan-tu win eškan, æd win talaq. Wiyyad za tiwasansan y æzæl a sær-san iskatan, win hadatnen amaran tiwasataymalan æzæl kul. ²¹ Daḡ adi as izzøzdaḡ awedan iman-net daḡ ark aratan win æmala da, ad immutøg y æššæḡælan a sær-æs æskâtnen, iqqæl awedan zøddigan tæha tænfa i mæššis, amaran igâr iri y igi æn mazalan kul win olaxnen. ²² Darrag y arak deranan æn tæmmødrøyt, ad tægammayay æd taqqat d æzægzan æd tara d alxer, tærtøya d aytedan win tansaynen Mæššina s æwæl zøddigan. ²³ Næmøggøg æd tæmazayen wær nêla almayna, æmosnat æljæhæl, id tæssânaḡ as ikønnasan a du-tawaynat. ²⁴ Akli n Æmæli wær ihor ad ikannas, kalar iwâr-tu ad sæmmid y aytedan kul, imos awedan ifrâgan æsæssæḡri, tah-ay tazaydart, ²⁵ iwâr-tu ad itaggu æsæssæḡri læmmidan y aytedan win das-tamazaynen, daḡ igi n attama n a tan-akfu Mæššina tètubt y ad ænøyan tidæt. ²⁶ Æddi a tan-du-za-tæqqæl tayttay-nasan ta tolayat, ækkøsan iman-nasan daḡ taftawen n Iblis a tan-ibâzan, ig-en daḡ agna-net.

3

Tilkamat n əddənət

¹ Əssən Timotay as azzaman win əlkamnen, a dağ-san agin jilan labasnen. ² Əddi aytedan ad ib'as kittəwan ar iman-nasan, iren azrəf, əqqəlan inasbaragan, əzzəzwəran iman-nasan, taggin alfawaxışan, ib'as əbbərdagan i marwan-nasan, ib'as tan-iha agoda, amaran wər z'əssəxmaran aratan win əqqalnen əddin. ³ İkwalan wallan-nasan, wər tan-təha təhanint, jiwanken dağ şizmit, wər əlen əzzəbun, əknân aşsar, əgzaran arat kul olağan, ⁴ əqqəlan iməkkəddal, əlkəman y awa dasan-d-ewayan medranan-nasan, ih-en əttəkəbbur wəllen, usafan deranan-nasan i talxa ta n Məşşina. ⁵ Ad əttəfan əddin dağ azzahir, mişan ad unkaran tarnə-net. Aytedan win, nəməggəg dər-san! ⁶ Əhan-tan wiyyad as imos alxal-nasan ilum gər yawnatan, tabazan əs taftawen-nasan şidoden şin ərkamnen, ən tənəsbakkaden. Şidoden şin den wər əlkemnat ar y arak deranan-nasnat əmosnen əzzənəfan. ⁷ Faw da əgammaynat teyaray mişan wər əfregnat masnat ən tidət. ⁸ Emmək was əmməzrayan məşşayawan ən Masar əmosnen Yanus əd Yanbres ənnəbi Musa, əmmək wədi dağ as əmməzrayan aytedan win di tidət. Meddan win taytwen-nasnat wər tanat-iha ar aşşud, amaran əzəgzan-nasan wər izmer i jarrabatan. ⁹ Mişan wər z'əgrəwan tətəyt waliyyat, fəlas əmməskəl-nasan ad inəfiləl y əkkulluk n awedan, zun awa igrəwan Yanus əd Yanbres.

Əgəlli dağ əzəgzan ən tidət

¹⁰ Kay amaran, təkneç ləkkum y əsəssəxri-nin d alxal-in, təssənəç wəllen aratan win as ənnəyyeç igi-nasan, tənəyəç wəllen əzəgzan-in əd təzaydart-in əd tara-nin əd zəmmerat-in ¹¹ d ətəwədgaz-in d alxazab-in. Təssəna dağ arat kul wa di-igrəwan dağ əçrəm n Antəyoxəya əd wa n İkonəyum əd wa n Lustra. Məni-tu ətəwədgaz wa wər əgeç? Mişan ikkas-i-du Məşşina dağ awen kul. ¹² Amaran aytedan kul win miksadan ən Məşşina əs tətəyt n Əlməsix Yaysa, win di ad təwədgəzan. ¹³ Mişan aytedan win maksanan, n əlmunafiqan, ad şatin dağ arak mazalan, saxrakan aytedan-nasan, saxrakan iman-nasan. ¹⁴ Kay amaran, aknu əsəggətəkki dağ aratan win təssana, təkkaşa dağ-san aşşak. Təssənəç wa dak-tan-issosanan. ¹⁵ Harwa da təmosa barar as təssənəç Əlkəttaban win Zaddogən, amaran əfrəgan a kay-akfin masnat ta tətəwayat s agaraw n əlyillas s əzəgzan s Əlməsix Yaysa. ¹⁶ Əlkəttaban win Zaddogən kul İnfəs wa Zəddigan a d-əfalan amaran təh-en tənfa dağ əsəssəxri n aytedan d əqqad-nasan d ikus-nasan dağ alxata d əsəssəxri-nasan dağ tarrayt ta toxadat. ¹⁷ Emmək di as awedan wa imosan əmaray əs Məşşina ad ifrəg, aknu deç əmutəg y igi n əşşəçəl kul wa olağan.

4

Emel ən salan win tidət

¹ Onsayaç-qay fəl udəm ən Məşşina, d Əlməsix Yaysa, s ənta a z'işrəçan win əddarnen əd win aba d udəm n ənəfiləl n Əlməsix əd taçmar-net as: ² Ədgəz dağ amel n awal ən Məşşina əs təməwit dağ du-wər-tətəqqəla dəffər-ək, gər za təgrəway edag n igi n awen wala. Əqqəl awedan a d-isardın aytedan əs wər əlen tidət, ad tərəqqama y aytedan tətəmaraç-qan, iga awen əs təzaydart təkmalat d əsəssəxri iknân. ³ Fəlas əlkəman azzaman a dağ wər z'əqbəlan aytedan əsəssəxri wa n tidət təzzar əlkəman y arak deranan, ad şadawan fəl man-nasan iməssəsəçra a dasan-ganninen aratan kul win as saddaranan tesalay y-asan. ⁴ Ad ədbəçan şiməzzugen-nasan i tidət, usafan əsəsəm i mayyan. ⁵ Kay amaran əqqəl awedan ilan əzzəbun dağ əkkulluk n arat, təzməra y alxazab, iqqəl əşşəçəl-nak emel n Əlinjil y aytedan. ⁶ Nak amaran alwaç ən teklay-nin ihoz-du, alwaç ewad-du wa dağ z'akfa təməddurt-in təmos takutay.

⁷ Æggâza s ælluḡ tæbellant, æggâza tammazaga har tæḡrad, ægleḡ ogâzaḡ æzægzan-in.
⁸ Daḡ adi, awa obazan ḡur æmæradða, tætiwasans-i tækæbbut ta n aqqad tæmosat aroz æn wa d-ornan, s ænta di-z-akfu Æmæli imosan æmašraḡ wa oḡadan, æzæl a ilkaman. Wærgæḡ nak ḡas as tat-z-akfu, kalar a tat-akfu y aytedan kul win æqqalnen æs tara y ænæfilal-net.

Ammaran ækkanen Timotay

⁹ Ædgæz wællen daḡ a di-du-takka daḡ ætrub, ¹⁰ fælas Demas igmad batu-nin id issôf lækkum y æddænet, ikka æḡræm æn Tesalonik. Kreses amaran ikka akal æn Galatøya, Titæs deḡ ikka akal æn Dalmatøya. ¹¹ Wær ḡur-i d-iqqim ar Luḡa. Idaw-du æd Markus fælas tah-i-tu tænfa daḡ æššæḡæl-in. ¹² Zimazala Tišik s æḡræm n Efez. ¹³ As du-tægle tæmmæraḡ-i-du æbærnuz wa din-oyye ḡur Karfus daḡ æḡræm æn Trowas, tæmmæraḡ-i-du deḡ ælkættaban-in, wællen win æganen daḡ agašek.

¹⁴ Alaskandær wa n anad issikn-i arak mazalan aggotnen labasnen. Æmæli a das-z-ixkæman æs mazalan-net. ¹⁵ Kay da ænkæd-as, fælas ikna tišit n ællid n awa næsassaḡru.

¹⁶ ḡur æššæriḡa-nin wa azzaran wær t-illa awedan iwâran aganna-nin, kalar awedan kul igmad batu-nin. Mæššina ya wær tan-tobeza s æmazal di. ¹⁷ Æmæli a iwaran aganna-nin, isassahat-i, fæl ad aslin aytedan kul win wær næmos Kæl-Ælyæhud y æmazal-net, šišawadaḡ æs tæmæwit tækmâlat, ikkas-i-du daḡ æmi n ahar. ¹⁸ A di-agæz Æmæli daḡ i t-illa æššur æn maksanan, assafs-i y a di-agu daḡ taḡmar-net ta n jænnawan. Ænta a ilan tanaya ta tu-tællat daḡ æḡlul æn tæmeren! Amin.

Šihulawen

¹⁹ Tæhulæḡ-in Friska d Akilas, æntanay harkid aḡaywan n Onesiforus. ²⁰ Erastus ænta iqqim-in daḡ æḡræm æn Korent. Trofimæs, as t-id-æfalæḡ irin daḡ æḡræm æn Miletæs. ²¹ Ædgæz wællen daḡ a du-tasa dat tægræst. Æhulan-kay-in id Ebulay æd Fudenæs æd Linæs æd Klawdøya æd mædrayan-nana kul daḡ æzægzan. ²² Illil-ak Æmæli, ikf-iwan arraxmat ketnawan! Amin!

Şirawt ta iktab Buləs i Titəs

İsanti

¹ Awa nak Buləs, imosan akli ən Məşşina, əmosa deş anammazul ən Ƴaysa Elməsix. Issiwar-i Məşşina əzuk n a d-awəyay əs tarrayt ta n əzəgzan aytedan win isannafran; əssusənaq-qan tidət ta tan-za-tassaknit anamod was z'agin təməddurt tənimanakat əd tara ən Məşşina. ² Emmək en daş as z'agin attama ən təməddurt ta təylalat. Təməddurt ten, Məşşina di wər nətəggu bahu a igan arkawal-net dat əxluk n əddənet. ³ Amaran Məşşina isinafalal awal-net daş alwaq was otas. Awal wen ənta a iha əlməyiza was du-tawaflasa s igi-net, daş əlkâma y awas omar Məşşina di n Ənəssefsi-nana. ⁴ Əhulaq-qay-in Titəs. Təmosa zun barar-in wa n tidət a dər ədrâwəş əzəgzan. Əgmâya daş Məşşina di n Abba, d Ənəssefsi-nana Ƴaysa Elməsix, a fall-ak d-izazzabben arraxmat d alxer.

Əşşəşəl ən Titəs daş Kəret

Ətəwəsənəfran ən muzaran d əşşəşəl wa tan-iwaran

⁵ Oyyeq-qay-in daş akal ən Kəret fəl ad təsəkkəsəwəş awa din-iqqiman daş əşşəşəl-nana, təzzar taga daş əkkulluk n əyrəm imuzaran y Əlkənisat ta tu-təhat. Aktəw aratan win as kay-omara, a tan-imosan as: ⁶ Akkiyyan daş muzaran win, ihor a tu-wər-illa i ifragan a daş-as d-inəy ark arət, izlâf tantut iyyadda, ila bararan əzzigzannen, as tu-wər-illa i z'annin əlan arak aladab, madəş wər əbbərdəgan. ⁷ Ənta amşar n Əlkənisat Məşşina a t-iflasan izzozar-tu i tamattay-net, daş adi ilzâm-tu ad imos awedan as tu-wər-illa i ifragan a daş-as d-inəy ark arət: Wər idkel iman-net dənnəş aytedan, wər ila tuksay n əwəl, wər imos əməşwi n esmad, wər imos əməkkənəs, wala deş itattu alxaram. ⁸ Kalar arət wa t-ilzaman ad imos aləs iha amagaru, ira imazalan win olaynen, imos ag əlməxsud, n əməzzələləş, n əmizdag innodan daş əwəl-net. ⁹ Isigatakkat wəllen daş ləkkum y awal wa ilan ələsəl s əmmək was itawasasayra. As iga adi, ad igrəw fərregat n ad itamar aytedan s əsəssəşri wa n tidət itaggu, ifrəş deş ad isattaddu y aytedan win das-əggewalnen as əntanay a əhanen alxata.

Ənnəkud i səssəşritan win bahu

¹⁰ Ənta əllan-tu aytedan aggotnen, wəllen win d-əşmadnen Kəl-Əlyəhud, əmosnen inəffəllag, əşşəwalnen ixərsan, saxrakan aytedan. ¹¹ Aytedan win di ilzâm ad təwədbəşan mawan-nasan, fəlas saxrakan işawnatan əşrâdnən s əsəssəşri n aratan wər nəmməkkan. Tattin s awen alxaram. ¹² Iyyan daş kəl akal-nasan, imosan ənnəbi a innan:

«Kəl-Kəret, har faw təməşam inəşbuha,
təməşam şilan wəşsan aşşarnən,
ən nəffərəşşa wər nəşəmədrin ar daş a ətşan.»

¹³ Amaran arət wa inna da, tidət a imos. Awen da fəlas ag-asan ərruşmatan əşəsnen, fəl ad izələləş əzəgzan-nasan, ¹⁴ aqqamin da wər əlkəman i mayyan ən Kəl-Əlyəhud d idufan n aytedan win əmməşraynen tidət. ¹⁵ Arət kul zəddig y aytedan win as zaddəgan man-nasan. Mişan aytedan win as wər zaddəgan man-nasan, ugâyan deş s əzəgzan, şur-san wər t-illa a zəddigan, fəlas taytwen-nasan, d ənnəyatən-nasan kul ih-enat iba ən tazdak. ¹⁶ Gannin əksudan Məşşina, mişan imazalan win taggin sataddin as ənkuran-tu. Əmosan aytedan tagginen igitan əşşiglafnen, əmosan inəmməşray a fəl tu-wər-illa igi n əmazal olaynen.

2

Əsəssəxri ikkan Əlkənisat

Ammaran əkkanen əzzənəfan n aytedan

¹ Amaran kay, tamar s aratan win namannaknen əd tarrayt ta imal əsəssəxri wa n tidət.

² Tannax i meddan win waşşarnen ad əqqəlan aytedan sammodnen, əttəfnen əzzəbun, ənnodan day wallan-nasan, issohat əzəgzan-nasan, təh-en tara, əknan zəmmərat.

³ Əmmək wen day as ilzam ad t-aginət tədoden şin waşşarnen. Amər-tanat s ad əttəfnat əzzəbun-nasnat dat Məşşina. Ad wər tazamnat wala iqqəl alxal-nasnat tessay n esmad aggen. Əqqəlmatet şidoden tamarnen s əmazal n awa olayan.

⁴ Ədgəznatet day ammar ən tədoden şin madrornen s ad irenat meddan-nasnat, əd bararan-nasnat. ⁵ Əqqəlmat şidoden ənnodanən day wallan-nasnat, aginat alxal zəddigan. Annattafnat d əşşəxəlan ən xawnatan-nasnat, aləxnat, abbardagnat i meddan-nasnat. As iga adi, wər z'itəwəlku Awal ən Məşşina.

⁶ Tamar harwa s əmmək wen da meddan win madrornen s ad annadin day wallan-nasan. ⁷ Kay iman-nak da ilzâm-kay ad tətəggəx imazalan olaynen day əkkulluk n anamod fəl ad təqqələx almasal y aytedan. Taggu əsəssəxri igân s əwəl iyyanda, ilân almayna. ⁸ Taggu batuten oxadnen as tu-wər-illa i dər-əsnat du-z-iqqəlan. As iga adi inəmmənkə-nanəx a dasan-iba a sər-nəx ənnən təha təkma, tabəz-tan təkarakit.

⁹ Amər eklan s ad abbardagan i məssawsan day əkkulluk n arət, a dasan-taggin arət wa fəl tan-z-irin, ayyin-tan təmazrəyt, ¹⁰ amaran a day-san wər takaran. Kalar əqqələnet aytedan əssiflasnen wəllen. As iga adi a d-awəyan ətəwəsəxmar igân day əkkulluk n anamod y əsəssəxri kul wa iqqalan Məşşina di n Ənəsəfsi-nana.

Arraxmat ən Məşşina

¹¹ Ənta arraxmat ən Məşşina tənifalal, tewây-du efsan y aytedan kul. ¹² Təsakn-anəx əmmək was za namməzzay əd mazalan win iba ən təkşəda ən Məşşina əd tara n əddənət, fəl ad nəgu day əddənət təməddurt a day nənnoda day wallan-nana, toxâdat, tənimmənkə əd tara ən Məşşina. ¹³ Arət wa a tu-nəgu nəssigəd, nəğa attama n əzəl isifalawasan, imosan ənəfilal n ədkul ən Məşşina di maqqaran, a t-imosan Ənəsəfsi-nana Yaysa Əlməsix. ¹⁴ Ənta a ikfan iman-net, fəl a danəx-isəddərfulu day id t-illa əşşur, izzəzdəg-ana, nəqqəl tamattay-net a sər-əs təkşətat, təsigatakkat day igi ən mazalan win olaynen.

¹⁵ Arət da da was kay-ilzam a tu-təsasəxra, d anamod was ilzam a sər-əs tətamarəx aytedan, təsuxuləx-asan-t-idu. Agu y əşşəxəl wa igi n aləs ilân batu. A tu-wər-iməl i kay-olkân.

3

Alxal was ilzam ad t-agin əlməsixitan

¹ Sakt-en-du as ilzâm-tan ad əbbirdagan y əlxəkumat d almawakkilan-net, əkkiwanan-asan, əgəran iri y id t-illa əmazal olayan. ² Ad wər taggin arak batuten s awedan waliyyan, wala əqqəlan inadlaman, ilen aladab, əqqəlan aytedan zamazalnen talmat y əkkulluk n awedan.

³ Fəlas nakkanay iman-nana da əstizarat wər nəla almayna, nəmos inəmməzray əxrâknən. Nəha əkkəlu fəlas nəlkâm y ark ənnəyatən d arak deranan, əmosnən əzzənəfan. Nəmos aytedan as kawalan wallan-nasan, əranən əddənət, nəla alxal isinaglafan, nənimaksan gar-ena. ⁴ Mişan assəxa wad tənəfalal ənniyəmat ən Məşşina di n Ənəsəfsi əd tara-net y aytedan, ⁵ issəfs-ana əs təhanint-net. Wərgəx imazalan

olaxnen win nətattu a fəl nəgraw efsan win. Kalar nəgraw-tan s əşirəd wa danax-iga Infas wa Zəddigan. Əşirəd wa, ənta a danax-ewayan əs təhəwt ta taynayət, isammattay-ana nəssənta tēməddurt iyyat taynayət. ⁶ Infas wa izazzabbat-t-idu fall-ana Məşşina s igət s əssəbab n awa iga Ƴaysa Əlməsix imosan Ənəssefsi-nana. ⁷ Arat wa ig-ay fəl ad nəqqəl iməkkusa ən tēməddurt ta təxlalat s ənta dəx nəga attama-nana, fəlas ikkas-ana-du dəx tişit ən nəmməzray-net, s arraxmat-net.

⁸ Arat wa imos awal illikanan, amaran arex a dəx-as tədgəza fəl ad awəy adi s aytedan win əzzəgzannen əs Məşşina ad səggətəkken dəx igi ən mazalan win olaxnen. Arat da da wa olaxan, təh-ay tənfa y aytedan.

Tərxəmt fəl əzənnəməzrəy n aytedan

⁹ Nəməggəg əd takkayen wər nəla almaɣna d agamay ən masnat n əsmawan n aljadan. Tənəməggəga dəx d amel gər aytedan əmmizraynen, d əməstan igân dəx talxa n əşşərixa ən Kəl-Əlyəhud, fəlas wər əlen alfaydat waliyyat, za wər tan-təha tənfa. ¹⁰ I igmayan d əzənnəməzrəy n aytedan, tərxəməx-as har sanatat təklaten. As ilas dəffər adi tətəxaq-qu dəx Əlkənisat. ¹¹ Fəlas təfragax ad təkəkəşax aşşak as aləs şilat ən wədi immizray tarrayt ta toxadat, amaran itaggu ibakkadan, izabaz iman-net y əşşərixa.

Ammaran win əlkamnen

¹² As sər-ək in-zammazalax Artemas madəx Tişik, tənəmənxa d a di-du-takka dəx əxrəm ən Nikobolis, fəlas ənta as otasa a dəx-as əkkəsa tamert ta dəx gaddalan konakan d asamed əşikəl. ¹³ Akn-in masnat dəx əşikəl ən Zaynas wa n əmusan n əşşərixa, d Abbolos. A tu-wər-iməl as miɣataran. ¹⁴ Amaran aytedan win-nana də iwar-tan ad əlmədan əsəggətəkki dəx igi ən mazalan win olaxnen, fəl a d-əssəxsəlan aratan win as təkna addararat igi, wərgəx ad əgân tēməddurt a dəx wər ənfen wala.

Şihulawen şin əlkamnen

¹⁵ Aytedan kul win dər namahax edag, əhulan-kay-in. Təhulax-in imaran-nana win dər nədraw əzəgzan. Məşşina ya təgeç-awan arraxmat ketnawan.

Širawt ta iktab Buləs i Filemona

Šihulawen

¹⁻² Awa nak Buləs, imosan amaskasaw fəl əddəlil n Elməsix Yaysa, nak d əmidi-nana daɣ əzəgzan Timotay, ənnanen əhulan-in əməri-nana Filemona n əmadhal-nana, d Əlkənisat ta tətamanayat daɣ ahan-nak. Nəhul-in deɣ təmidit-nana daɣ əzəgzan Affəya d Arxifus əmadhal-nana daɣ təbəllant. ³ Izazzabbat-du fall-awan Məššina di n Abba-nana əd Yaysa Elməsix, Əməli-nana, arraxmat d alxer.

Tara d əzəgzan ən Filemona

⁴ Əmidi-nin Filemona faw id əggaza šin igi ən təwatriwen a kay daɣ-asnat d-əkatta ətigudəya y Əməli-nin. ⁵ Fəlas əsləɣ tara ta təgeɣ y aytedan kul win əlkamnen y Əməli Yaysa, d əzəgzan wa sər-əs təge. ⁶ Šiwatriwen-in ətaggaq-qanat fəl ad təgrəwa s əlləllu-nak, wa d-igmadan əzəgzan-nak, əgərri iknan tənəddawt, n albaraka kul wa nəla daɣ ənəmənnak-nana əs ləkkum y Elməsix. ⁷ Tara ta kay-təhat amidi-nin teway-du sər-i tədəwit agget d allam fəl man, təssismada deɣ iwallan n aytedan kul win əlkamnen i Yaysa Elməsix.

Efsan ən Buləs Onesim

⁸ Awen daɣ a fəlas kud imos as tartəyt-in d Elməsix təkf-i fərregat n a kay-aməra s arat wa ihoran, ⁹ da əssofaɣ ad imos as agamay ɣas a daɣ-ak z'aga a di-taga tənəfust fəl əddəlil n ənəməra wa nəga. Nak Buləs imosan almawakkil n Elməsix Yaysa əhe kasaw əmərədda fəl əddəlil-net, ¹⁰ əgmâya daɣ-ak a di-taga tənəfust daɣ talɣa n Onesim, wa ɣur-ək d-iddərragan, imosan barar-in daɣ əzəgzan fəlas tarrayt ta n Yaysa Elməsix a daɣ t-əge harwa a ɣur-i illa da da daɣ kasaw. ¹¹ Kala a dak-ku-wər-təha tənfa mišan əmərədda təh-anaq-qu, gər za i kay wala i nak.

¹² Əmərədda əssoɣalaɣ-ak-k-in imos aganna-nin. ¹³ Əsidarana a ɣur-i illa da da iket əhe kasaw fəl əddəlil n Əlinjil, a di-ilal daɣ adag-nak. ¹⁴ Mišan wər areɣ igi n adi ar əs turagat-nak fəlas wər areɣ a kay-əšəhhəššəla əmazal a, olaɣan a, əssofa a tu-taga gar-ək əd man-nak. ¹⁵ Mijas Onesim wər dak-iga arat n afel, ar fəlas as kay-in-iqqal, a ɣur-ək aqqam har faw, ¹⁶ əmərədda wər imos akli ɣas, ogar akli, əmidi-nin daɣ əzəgzan n əməri-nin a imos. Wala nak əknêq-qu tara wəllen əngəm za kay a das-issərtayan tara ta n as imos akli-nak imos deɣ əmidi-nak daɣ əzəgzan s Əməli. ¹⁷ Daɣ adi kud amidi-nak daɣ əzəgzan a əmosa wədi əqbəl-tu tətəfaq-qu daɣ adag wa daɣ-i təttafa. ¹⁸ As imos as iɣšâd-ak arat made tər-wâsaɣ-as-tu wədi nak a daq-qu təssana. ¹⁹ Arat wa əfus wa-nu nak Buləs as t-əkataba: nak a dak-z-irzəman. Kud ira wər kay-d-əssəktay as kay təməddurt-nak iman-net a daɣ-ak əle. ²⁰ Əgmâya daɣ-ak əmidi-nin a di-taga tənəfust ta fəl udəm n Əməli. As di-təgeɣ adi fəl əddəlil ən tartəyt ta nəga daɣ Elməsix a di-taləma fəl man. ²¹ As dak-in-əkataba širawt ta əkkasaɣ aššak as arat wa daɣ-ak in-əgammaya da a di-tu-taga ənta madeɣ a t-ogaran. ²² Əgmâya daɣ-ak deɣ a din-təsəmmutəga edag ən təɣimit fəlas ordêɣ as a kawan-in-ətəwəsuxəla as iqbal Məššina šiwatriwen-nawan.

Šihulawen šin əlkamnen

²³ Ebafras wa n əmidi-nin daɣ kasaw fəl əddəlil n Elməsix Yaysa, issislam-in fall-ak, ²⁴ ənta əd Markus d Aristarxus əd Demas əd Luqa əmosnen imadhalan-in daɣ əššəɣəl. ²⁵ Izazzabbat-du fall-awan Əməli Yaysa Elməsix arraxmat-net.

Širawt ta tətawaktab i Kəl-Ÿibri

Ʒsənti: Məššina iššewal-ana əs tarrayt ən barar-net

¹ Dəffər as iššewal Məššina a irəwan i marawan-nana əs tarrayt n ənnəbitan, day taklaten aggotnen əd təməwiten aggotnen, ² iššewal-ana nakkanay da day azzaman win əlkamnen a, əs tarrayt ən Barar. Barar wen iga Məššina arat kul day əfus-net, ixlak-du dəx əddənet əs tarrayt-net. ³ Tanaya ən Məššina kul təmilawlaw fall-as, amaran tənda-du day-as tišit ən Məššina, awal-net dəx ilān tarna, ənta as ittaf arat kul. Dəffər as issinda əššəxəl wa n əzəzdəg-nana day bakkadan, ikka ijənnawan, iqqim day əxil ən Məššina di idkalan. ⁴ Almaqam-net ikna šigrat ən wa n angalosan, fəlas esəm wa t-ikfa Məššina ogar wəllen win-nasan.

Awa dər togda šigrat ən Barar ən Məššina y angalosan almaqam

Barar ən Məššina ogar angalosan

⁵ Amaran məni day angalosan was kala a das-inna Məššina: «*Barar-in a təmosa, azalada, ad əqqalax abba-nak.*» Məni dəx day angalosan was inna Məššina: «*Nak a das-əqqalax abba, ənta dəx iqqəl barar-in.*» ⁶ Amaran barar wa n aɣafadday en, as t-id-iga Məššina day əddənet, omar angalosan kul s a das-əssəjədan. ⁷ Day batu ta təqqalat angalosan, inna Məššina: «*Angalosan-net, ig-en zun aɣu, inaybidan-net ig-en zun abalagleg ən təmsay.*» ⁸ Day batu amaran ta təqqalat Barar, a inna Məššina: «*Taymar-nak, ya Barar-in di n Amadkol, təll-ay har faw, əttəbil-nak, əttəbil n əššərixa a imos.*» ⁹ «*Tarex taqqat, təkyâda təmazrəyt. Awen da fəlas ya Barar-in di n Amadkol, Ʒməli-nak Məššina a kay-igan əmənokəl, isannafran-kay ikf-ik təfalawist tagget, togarat ta n midawan-nak.*» ¹⁰ Innâ dəx Məššina: «*Kay Barar-in di n Amadkol, əstizarat, kay a d-ixlakan amaɣal, ijənnawan dəx kay a tan-d-ixlakan.*» ¹¹ «*Ad əməsan kul, mišan kay təlleq-qu har faw. Ketnasan ad aɣin əməndi wa tətəggu təbdoq.*» ¹² «*A dasan-tagax aɣda wa itawaggin i təkadkat, itəwagg-asan dəx əsəmməttəy wa itawaggan*» i səlsa. «*Mišan kay, har faw wər təmməttəy, tayrəst-nak dəx wər təla təzərəst.*» ¹³ Amaran, məni day angalosan was kala a das-inna Məššina: «*Qamu day əxil-in, har daw-ək əssərəsax izəngə-nak, əməlan daw daran-nak.*» ¹⁴ Awak angalosan, wərgəx iməttənkəl a mosan s akkiyyan ila əššəxəl-net, tiwazamazalan-du y ad ilalan y aytedan win z'əgrəwnen əlxillas?

2

Ad wər nə səttəlkək awal wa d-eway Barar ən Məššina

¹ Awen day a fəlas iwâr-anax ənnəkud wəllen, nə səssuhət aratan win as nəsla, fəl təksəda n ad nəgməd tarrayt ta tolayat. ² Arat kul wa əməlan angalosan i marawan-nanax ittidda, amaran abakkad kul əd təmazrəyt kul n awal wədi itiwagg-asan attadib wa dər əhoran. ³ Manəmmək as za naqqam wər nəwəddab as imos əs wər nəssəfrar əlxillas oğdān d awa təzzəwwərt? Fəlas əlxillas wa, Ʒməli iman-net a t-id-imalan day tizarat, win das-əslanen dəx sitaddan-anax as tidət a imos. ⁴ Məššina a isattaddan təgəyya-nasan s aɣalamaten, d aratan simaklalnən, əd təlməxjujaten əmosnən əzzənəfan, əd təhəkkuten a d-əfalnən Infas wa Zəddigan. Aratan win kul ig-en əs təməwit tənimmənkət əd tara-net.

Ʒsəmmədrəy ən man əd tanaya ən Barar ən Məššina

⁵ Wərgex angalosan a izzozar Məššina y əddənet ta du-təzayat, tas nəššewal day batu-net da. ⁶ Amaran təll-ay təgəyya day adag iyyan tənnât: *Ma imos aggadəm as t-idu-təkatta? Ma imos ag aggadəm as day-as tətassana?* ⁷ *Təssərasaq-qu day arat n azzaman, imal daw angalosan, dəffər awen təkfeq-qu tanaya d ədkul.* ⁸ *Təssərasay arat kul daw-əs.* Əzuzər wa t-iga Məššina y arat kul, ənta a d-ewayan as wər t-illa i ifragan təmazrəyt-net. Amaran harwa da, wər nəhənnəy âs arat kul illa daw tanat-net. ⁹ Mišan nənây Ȳaysa as iga arat n azzaman illa daw angalosan, dəffər awen igraw tanaya d ədkul fəl əddəlil n alɣazab wa iga əd təmattant ta iga. Emmək en day as iɣazankazat təmattant, imos awen arat iga fəl əddəlil n aytedan kul, s arraxmat ən Məššina.

¹⁰ Məššina a d-ixlakan aratan kul, amaran əddəlil-net a fəl t-əllan. Məššina amaran igrâz-as ad əgrəwan aytedan aggotnen day tanaya-net. Dad zamas Ȳaysa a imosan əssəbab n əlɣillas-nasan, wədi ilzâm ad t-akfu Məššina alkamalat kul əs tarrayt n alɣazab wa iga. ¹¹ Wa izazdagan, əd win tawazazdagnen, ketnasan iyyanda a d-əfalan, a t-imosan Məššina. Awen day a fəlas Ȳaysa wər fall-as imos təkarakit tənna ta dasan-itaggu: «Imədrayan-in», ¹² assaxa wad inna: *Ad əmmâlay esəm-nak i mədrayan-in. A dak-agay təmmalen day əljəmayat.* ¹³ Inna deɣ: *A tu-sənnəhəlay fəllesat.* Inna harwada: *Nak da, nak əd bararan win di-ikfa Məššina.* ¹⁴ Day adi, dad zamas bararan win olân, əgân day azni əd təxəssa, wədi, Ȳaysa da iggâz alxalat ta əhan. Arat wen ig-ay, fəl ad attaftaf əs təmattant-net wa ittafan tarna ən təmattant, a t-imosan Iblis, ¹⁵ isəddərfət deɣ aytedan win əhanen əkkəlu day təxrəst-nasan fəl təksəda ta əgan i tamattant. ¹⁶ Igmâd aššak as Ȳaysa wər d-osa fəl ad issən day angalosan. Kalar əzzurrəyya n ənnəbi Ibrahim a d-ikka y a day-as issən. ¹⁷ Awen day a fəlas ilzâm ad alu əd mədrayan-net day arat kul, fəl ad iqqəl əlimam wa zəwwəran, imosan əməhhenən n alɣadil day əlɣibada ən Məššina. Emmək en da as z'igrəw təsureft ən bakkadan ən tamattay. ¹⁸ Fəlas, alɣazab wa iga assaxa wad itawajarrab, ikf-ay fərregat n ad agəz win tawajarrabnen.

3

Ȳaysa ənta ogaran tišit n alɣadil, ogar deɣ Musa almaqam

¹ Adi day a fəlas ya imədrayan-in kawanay a zaddognen iɣr-iwan Məššina y a təgrəwam tadagart day əššəxəl-net, agiwat ənəzər-nawan day anammazul s ənta a imosan əlimam wa zəwwəran ən tarrayt ta nəha, a t-imosan Ȳaysa. ² İxdâl i Məššina di a t-isannafranan, zun awa iga ənnəbi Musa i tamattay ketnet ən Məššina. ³ Amaran, itiwaxkam-as âs ihor əd tanaya təkñât šigrat ən ta n Musa, zund əmmək âs əmakras n ahan, ogar ehan iman-net almaqam. ⁴ Ehan kul ill-ay wa t-ikrasan, Məššina amaran, ənta a ikrasan əkkulluk n arat. ⁵ Musa ixdâl i tamattay ketnet ən Məššina, amaran amašşaxal a imos işewalan day batu n aratan win z'iməl Məššina. ⁶ Elməsix amaran barar n ahan ən Məššina a imos, ixdâl i tamattay ən Məššina, imos əmuzar-net. Ehan wen amaran nakkanay a t-əmosnen as imos as nəzazzawat day təfləst təglayat d attama was nəsabaraq.

Edag ən təsanfawt wa ihakku Məššina i win əzzəgzannen əd tarna n awal ən Məššina

⁷ Awen day a fəl inna Infas wa Zəddigan: «Azalada, as təslam y awal-net, ⁸ ad wər təsəggərməmam iwallan-nawan zun alwaq wanad n əfəlləg ən marawan-nawan win ərəwnen. Əzəl wa di-əjjarraban day taneray, ⁹ əgan-i tənagmayt təmosat jarrabnin, ənâyan igitan-in ¹⁰ har əgan əkkozat təmərwen n awatay. Awen day a fəl di-iggaz alham wəllen ən tamattay n azzaman win den. Təzzar ənnex: Aytedan win,

iwallan-nasan faw əxrâkan, wər kala ad əssanan tarrayen-in. ¹¹ *Alham en daɣ a sər-i d-ewayan tahuday n âs wər ilkem ad əggâzan akal wa sammataɣay i təsanfawt-nasan.»* ¹² *Ənkədat ya imədrayan-in! A kawan-wər-iggəz i ilân əwəl aššaran wər nəzzəgzan har awəd awen ad ammazray šiyyat Məššina di iddaran.* ¹³ *Kalar tinəməggiwat təlxtutbat gar-ewwan akk əzəl, iket əfragan aytedan ad annin: «azalada», fəl a kawan-wər-iggəz i udân daɣ jarraba n abakkad aggarmam əwəl-net.* ¹⁴ *Nakkanay imidawan n Əlməsix daɣ əššəxəl a nəmos as imos as nəzazzawat har təzərəst daɣ gəlleyat ta nəga harwa daɣ tizarat.* ¹⁵ *Ənnan Əlkəttaban: «Azalada, as təslam y awal-net, ad wər təsəggərməmam iwallan-nawan zun alwaq wanad n əfəlləg.»* ¹⁶ *Amaran ma mosan aytedan win əfəllagnen fəl Məššina dəffər as əslân y awal-net? Awak wərgəx aytedan win d-əgmadnen Masar azâr-asan Musa? ¹⁷ Ma mosan za aytedan win as iga Məššina əkkozat təmərwen n awatay ih-ay alham-nasan? Awak wərgəx win əganen abakkad amaran əxradan maxsay daɣ taneray? ¹⁸ Təzərəst n awen âs ma mosan aytedan win as ihad Məššina âs wər ilkem ad əggâzan akal wa isammataɣ i təsanfawt-nasan? Awak wərgəx win ugaynen s a das-abbardagan? ¹⁹ Daɣ adi nəhannay as wər əgrewan iguz n akal wa n təsanfawt fəlas tugəyt a əgan sa sər-əs əzzəgzənan.*

4

¹ *Daɣ adi, iket di ad t-illa arkawal ən Məššina wa n ad nəggəz akal ən təsanfawt wa imal, ənkədat wəllen a kawan-wər-iggəz awedan waliyyan igân iduf n as ab'as ogaz wala.* ² *Fəlas igmâd aššak as isalan n Əlinjil nəg-asan agaraw zun wa dasan-əgan daɣ taneray. Mišan awal was əssəsaman wər dasan-ikna wala fəlas wər əgen əzəgzan wa əgan aytedan win t-əqbalnen.*

³ *Nakkanay win sər-əs əzzəgzannen, ad nəggəz akal ən təsanfawt was inna Məššina daɣ batu-net: «Igaz-i alham-nasan. Alham en daɣ a sər-i d-ewayan tahuday n âs wər ilkem ad əggâzan akal wa sammataɣay i təsanfawt-nasan.»* *As itaggu awen da Məššina ixrâd arat kul harwa xur ənətti n əddənət.* ⁴ *Fəlas ill-ay adag a daɣ innâ, daɣ batu n əzəl wa n əssa: *Təzzar izzərəz Məššina əššəxəl-net kul wa n əxluk ən jənnawan d amaɖal, əzəl wa n əssa.** ⁵ *Ənnân deɣ Əlkəttaban: *Igmâd aššak as wər z'əggəzan akal ən təsanfawt ta hakka.** ⁶ *Daɣ adi, dad zamas əgrâwan wiyyad iguz ən təsanfawt ten, amaran win əslanen isalan n alxer əstizarat wər əgrewan iguz n akal ən təsanfawt wen fəl tišit-nasan inəmməzray,* ⁷ *ikkas Məššina əzəl iyyan aynâyan daɣ batu ten, *a t-imosan azalada,* əs tənna ta iga dəffər awen wəllen əs tarrayt n ənnəbi Dawəd, s əmmək was t-inna dat awen: *Azalada, as təslam y awal-net, ad wər təsəggərməmam iwallan-nawan.** ⁸ *Awalla, ənnar iddew Joswe əd tamattay ten har tat-išašşawad edag ən təsanfawt wen, wədi wər z'ammagrad Məššina daɣ batu n əzəl iyyan ən təsanfawt dəffər awen.* ⁹ *Almaɣna n awen as harwada təll-ay təsanfawt i tamattay ən Məššina, tolât d əzəl wa n əssa s ənta daɣ izzərəz Məššina əššəxəl-net kul wa n əxluk ən jənnawan d amaɖal.* ¹⁰ *Amaran awedan wa iggazan edag ən təsanfawt ta ihakku Məššina, wədi ad assanfu daɣ əššəxəl-net, zun awa iga Məššina daɣ win-net iman-net.* ¹¹ *Daɣ adi ədgəzatana wəllen daɣ iguz n adag ən təsanfawt ta, fəl ad wər ixrək waliyyan daɣ-na awa əgan marawan-nana a əməzraynen Məššina.*

¹² *Fəlas awal ən Məššina iddâr, ila tarna, amaran təwala-net togar ta n takoba. Itaggaz iman n aytedan əd wallan-nasan, igallu har isəmməxras, d əkəlkəl ən xasan. Amaran awal ən Məššina ənta a ixakkaman y awas ifarray awedan daɣ man-net d awa isamadran daɣ əwəl-net.* ¹³ *Wər tu-təlla təxlək as wərgəx ihannay-tat Məššina. Arat kul immun-as, inniflay daɣ-as. Amaran ənta a dat za nəbdəd fəl mazalan-nana.*

Awa dər ogda almaqam ən Barar ən Məşşina, imosan Əlimam-nana wa Zəwwəran, daɣ batu ən təkutawen

Nəla əlimam wa zəwwəran ikmâlan ihân ijənnawan

¹⁴ Dad zamas nəla əlimam wa ogaran ilimaman kul, ihân ijənnawan, a t-imosan Ÿaysa, Barar ən Məşşina, wədi zəzzəwətətana daɣ əzəgzan-nana. ¹⁵ Fəlas əlimam-nana wa zəwwəran en, ifrâg a danaɣ-ikbəl daɣ rəkkəm-nana, id əgrâwan-tu jarrabatan zun win danaɣ-garrawnen daɣ anamod kul, eges kala wər iga abakkad. ¹⁶ Daɣ adi ihazatanax-in əmənokal-nana a t-imosan Məşşina di n əməggi n arraxmat, nəgâ awen əs təfləst, fəl ad nəgrəw əhənətta, nəgrəw deɣ arraxmat s ənta dana-za-takfit tilalt daɣ alwaq wa daɣ nəddərar s awen.

5

Ÿaysa Əlməsix itiwasafrən imos əlimam daɣ taggayt ta n Malək-Assaddeq

¹ Əkkulluk n Əlimam wa Zəwwəran, itiwasafrən daɣ aytedan, amaran tənfa n aytedan en da a fəl itawazazar y ad agu əşşəxəl ən Məşşina, agu şihəkkuten əd təkutawen fəl agamay ən təsureft ən bakkadan-nasan. ² Əlimam wen, ifrâg əgərri n aljahilan d aytedan win əxraknen, id ənta iman-net da irkäm. ³ Rəkkəm-net en daɣ a fəlas iwâr-tu ad agu şikutawen fəl agamay ən təsureft ən bakkadan win-net, harkid win tamattay. ⁴ Amaran wər t-illa awedan ifrâgan ad akfu iman-net almaqam ən tişit n Əlimam wa Zəwwəran. Kalar Məşşina a sər-əs d-iɣarrin aytedan, zund əmmək as sər-əs d-iɣra Harun.

⁵ Əmmək en daɣ əs Əlməsix wərgəx ənta a ikfan iman-net tanaya ən tişit n Əlimam wa Zəwwəran. Kalar Məşşina a ɣur igraw tanaya ten s ənta a das-innan: *Barar-in a təmosay. Azalada əqqalay abba-nak.* ⁶ Zund əmmək was inna Məşşina daɣ Əlkəttaban: *Əlimam a təmosa har faw, daɣ taggayt ta n Malək-Assaddeq.* ⁷ Əlməsix harwa ad iha əddənet, ittâr əs təkalelt əd məttawan, onsay Məşşina s ənta a ifragan ad t-iɣləs daɣ tamattant. Iqbal Məşşina təwatray-net, fəlas əmiksad ən Məşşina a imos. ⁸ Əlməsix Barar ən Məşşina a imos, mişan ilmâd əbərdəg id alyazab a iga. ⁹ Əmmək en da as igraw alkamalat kul, iqqal wa ihakkin əlyillas iɣlâlan i win das-əbbərdagnen, ¹⁰ id Məşşina a t-ikfan tişit n əlimam wa zəwwəran daɣ taggayt ta n Malək-Assaddeq.

Ammar s əzəgzan ikmâlan d ammar s ad wər nəqqəl dəffər-na

¹¹ Aratan aggotnen as nəfrag a tan-nannu daɣ batu ta, as izzəwat əsəssəgri-nasan id aytedan a təqqalam a fəl izzəwat əgərri. ¹² Edag an əs tərəwam as təqqalam iməssəsəɣra, kalar har harwada təddiraram s ad tətawasasəɣrim aratan win təsəntit n awal ən Məşşina. Təhâm edag was wərgəx imensewan win əqqurnen as təddərararam, kalar harwada təddiraram s əx. ¹³ Amaran awedan was harwada iddirar s əx, wədi harwada wər ifreg zələy gər awa olaɣan d awa wər noleɣ. Awedan wa, imos zun ajanɣay. ¹⁴ Imensewan win əqqurnen i n aytedan win ədwalnen. Aytedan win, əntanay a əgrawnen masnat ta tan-təkfət zələy n awa olaɣan d awa wər noleɣ fəlas əjjiraban aratan win di.

6

¹ Daɣ adi, akəyatanax edag wa n əsənti ən taɣaray daɣ batu n Əlməsix. Akkiwatana dat y ad nawəd alkamalat da wər nəles tewaylay n əsənti iyyan aynayan, almaɣna n awen: tətubt d əməzzəy d arak mazalan tawaynen aggadəm s əhluk d əzəgzan əs Məşşina ² d əsəssəɣri igân daɣ batu n əzəzdəg d əsəwər n aytedan ifassan d əsənkər

ən nəmməttan d əššərixa wa n əzəl wa n tabadday. ³ Amaran awen daɣ a za nagu, kud irda Məššina.

⁴⁻⁶ Aytedan win əjwarnen əgrawan ənnur ən Məššina, əsammətatammen təhəkkut ən Məššina, əgrawan Infas wa Zəddigan, ənayan as awal ən Məššina ihôssay, ənayan deɣ tarna ta təsaknit əddənet ta du-təzayat, amaran əmməzrayan tarrayt ta tolayat, win di, wər t-illa əmmək as əlasan tətubt; fəlas agamay ən tənfa ən man-nasan a fəl əlasan ətəytəy ən Barar ən Məššina fəl təgəttawt, sammadrayan-tu dat awedan kul. ⁷ Amaɖal igarrawan akonak olaɣan, amaran itaraw-du annabatan təha tənfa i win tu-gayaknen, amaɖal wədi igrāw albaraka ən Məššina. ⁸ Mišan amaɖal wa d-erawan y aytedan annabatan aššarnen, wədi wər infa wala. Tulɣant a tu-za-təwərat, amaran təsəlkamt-net ahluk igān əs təmsay.

⁹ Ya imaran-in, kud imos əs nəššewal-awan s əmmək wa, da nəkkəs aššak əs izay-kawan-du arət iknān əlluɣ a t-imosan əlɣillas. ¹⁰ Awalla, Məššina Əməli oɣadan a imos, daɣ adi wər din-z-attaw imazalan-nawan, wala tara ta tu-təssəknam daɣ əššəɣəl wa təgam fəl saɣmar n esəm-net i məzzəgzan əs harwada tətaggim-tu. ¹¹ Mišan nəsidaran əs akkiyyan daɣ-wan ad assaknu gəllejat tədi da har təzərəst, fəl ad təgrəwam igi n attama indān. ¹² As təgam adi wər za təqqələm iməssəndad, kalar ad tattalalam win əgrawnen arraxmat tas itawagga arkawal-net əs tarrayt n əzəgzan-nasan əd təzaydart-nasan.

¹³ Amaran, assaɣa wad iga Məššina arkawal y ənnəbi Ibrahim, wər t-illa esəm iyyan ogaran wa n Məššina əngəm ihəd sər-əs. Awen daɣ a fəl *ihad Məššina s azzat-net*, ¹⁴ inna: *Illikan əs a kay sənnəhəlay tehakkay n albaraka, akna deɣ əsəgət n əzzurrəyya-nak*. ¹⁵ Əmmək en daɣ əs dəffər as issikna Ibrahim təzaydart-net, igraw arət was das-itawagga arkawal-net. ¹⁶ Aytedan, tahuday a taggin s esəm wa ogaran win-nasan, amaran tahuday ten, ənta a təsataddit batu-nasan, təgdəl a dər-əs d-iqqəl awedan waliyyan. ¹⁷ Əmmək en daɣ as Məššina, isigatakkat y ad issusən aytedan win as iga arkawal əs aratan win issəbdad wər təməttəyan. Awen daɣ a fəl *ihad Məššina daɣ batu ten*. ¹⁸ Daɣ adi əššin aratan a t-əllanen wər nətəməttəy, amaran wər t-illa əmmək as daɣ-san iga Məššina bahu. Aratan win əntanay a dana-za-səssuhətne wəllen, nakkanay a oyyanen arət kul nəgmay taggast s əzəzzəwi-nana daɣ attama wa danaɣ-itawakfan. ¹⁹ Attama wen, ənta a danaɣ-imosan šisəttəytay əssiflasnen, əssohatnat, amaran ənta a danaɣ-ewayan har dənnəg anaxer wa illan gər adag wa zəddigan əd wa ogaran tazdak. ²⁰ Edag wen ənta a iggaz ɣaysa fəl əddəlil-nana, azzar-anax-in sər-əs, iqqal əlimam wa zəwwəran har faw, daɣ taggayt ta n Malək-Assaddeq.

7

Taggayt ta n Malək-Assaddeq

¹ *Malək-Assaddeq* wen, ənta as kala ad imos *əmənokəl n əɣrəm ən Salem*, imos *əlimam ən Məššina di n Amadkol*. *Ənta a issəlkadan y ənnəbi Ibrahim, assaɣa wad irza imənokalan, ittar y Ibrahim a das-igan albaraka*. ² Ənta en da a *ikfa Ibrahim təməssədək n awa ila kul*. *Almayna* n esəm wa n Malək-Assaddeq: *Əmənokəl ən taqqat, imosan deɣ əmənokəl ən Salam*, almayna "əmənokəl n alxer". ³ Wərmad ila abba, wala anna, wala aljadan. Təməddurt-net wər təla ənətti za wala təzərəst. Itawašašala əd Barar ən Məššina, iqqal əlimam har faw. ⁴ Ənzərat daɣ ədkul n əlimam wen, har əs Ibrahim iman-net wa n aljad-nanaɣ a t-ikfan təzunt ta n marawat n awa d-oɣa. ⁵ Ilimaman win Kəl-Lebi, ikf-en alwajib ihān Əttawret alxaq n ad garrawan šiməssədək ən tamattay n Israyil, əmosnen imədrayan-nasan, kuddeɣ əs əntanay da ihayawan n Ibrahim a mosan. ⁶ Malək-Assaddeq amaran, wər imos

iyyan daɣ Kəl-Lebi, mišan igraw tēməssədək n awa ila Ibrahim. Təzzar ittar Malək-Assaddeq a igan albaraka y Ibrahim s ənta as iga Məššina arkāwalan! ⁷ Igmād aššak âs wa ogaran adkul ənta a itattaran a igan albaraka i wa das-əndərran. ⁸ Ilimaman win garrawnen šiməssədək ən tamattay, aytedan a mosan a z'iba əzəl iyyan, Malək-Assaddeq amaran, sitaddan Elkəttaban âs iddâr. ⁹ Xasil Kəl-Lebi iman-nasan, s əntanay a garrawnen šiməssədək, irzâm fall-asan Ibrahim tēməssədək əs tahakkay ta tat-iga i Malək-Assaddeq. ¹⁰ Fəlas as issəlkad Malək-Assaddeq y Ibrahim, Lebi wər ihəw.

¹¹ Ənnar ikmâl ənnizam wa n limaman win Kəl-Lebi, s ənta a isəbdadan əlqanun wa issəwar Məššina tamattay, wədi wər tu-z-iməl əlimam ən taggayt ta n Malək-Assaddeq daɣ adag ən limaman ən taggayt ta n Harun. ¹² Amaran dad zamas imməttay ənnizam wa n limaman, wədi əlqanun da ilzâm ad ammattay. ¹³ Əlimam wa fəl əmməgradan salan win, in tawšət iyyat. Tawšət ten amaran wər tat-iha awedan as kala ad iqqal əlimam. ¹⁴ Illikan âs Əməli-nana, tawšət ta n Yahuda a d-igmad, tawšət ta amaran wər d-idkel Musa batu-net fadda daɣ batu n əššəxəl wa n tišit n əlimam. ¹⁵ Arat wen, isitadd-ay wəllen as d-inafalal əlimam iyyan olân əd Malək-Assaddeq. ¹⁶ Əlimam wa, wər d-iga iguz n ənnizam wa n ənəməkusa. Kalar iguz ən tarna ən tēməddurt təxlâlat a d-iga, ¹⁷ fəlas ənnan Elkəttaban daɣ batu-net: *Əlimam a təmosa har faw, daɣ taggayt ta n Malək-Assaddeq.* ¹⁸ Əlqanun wa t-illan kala da, itawakkas-in, fəlas wər ila tarna waliyyat za wər infa wala. ¹⁹ Əlqanun wa, wər d-issəxsal arat waliyyan ikmâlan. Attama amaran wa danaɣ-itawakfan ofâ wa n əlqanun wen. Attama wa, ənta a danaɣ-issəfragan ənəmihaz əd Məššina.

²⁰ Arat wa kul Məššina a ihadan daɣ batu-net. Ilimaman win hadatnen wər ihed Məššina daɣ batu-nasan, ²¹ Ȳaysa amaran, Məššina a ihadan daɣ batu-net, id Elkəttaban a ənnanen: *Əməli a ihadan, amaran wər ilkem a d-iqqal daɣ batu-net. Əlimam a təmosa har faw.* ²² Emmək en daɣ as tarrayt ta n Ȳaysa a fəl nəkkas aššak âs nəgrâw arkawal ən tassaɣ əd Məššina ofân wa irəwan. ²³ Ilimaman əknânen igət a t-əmalnen s ənəməkusa, fəlâs wər tan-toyya tēmattant s ad t-əməlan har faw. ²⁴ Ȳaysa amaran ill-ay har faw. Awen daɣ a fəlas tišit-net əlimam wər tətəməttəy. ²⁵ Daɣ adi ifrâg tehakkay n əlyillas ikmâlan y aytedan win din-əzzəhaznen iman-nasan Məššina əs tarrayt-net, id iddâr har faw, y ad iššâwal i Məššina s esəm-nasan. ²⁶ Ȳaysa ənta a imosan əlimam wa zəwwəran was nəddərar, id zəddig, wər t-iwer lahan waliyyan, wər kala ad iga abakkad, wər ola əd nasbakkadan alxal, immədkal imal dənnəg jənnawan. ²⁷ Ilimaman win hadatnen zawwarnen ilzâm-tan igi ən təkutawen akk əzəl fəl əddəlil ən bakkadan win-nasan iman-nasan təzzar, dəffər adi win tamattay. Ȳaysa amaran ənta wər iddərar s awen, fəlas takutay iyyadda a iga, ig-et šiyyat əs tahakkay ta iga iman-net. ²⁸ Ilimaman win zawwarnen isannafran Əttawret, aytedan a mosan ərkamnen. Mišan wa isannafran Məššina ig-ay əlimam wa zəwwəran əs təhuday ta iga daɣ batu ten, wədi Barar-net a imos, igrâwan alkamalat har faw. Tahudday ten ig-et Məššina dəffər as iziraz ənnizam wa n Əttawret.

8

Əlməsix, ənta a imosan Əlimam wa zəwwəran daɣ arkawal wa idkalan

¹ Amaran, əntada əlməxsud n awas nara tənna-net: Nəla əlimam igân ta daɣ təzzəwwərt, iqqiman daɣ əxil ən Məššina daɣ taɣmar-net di maqqarat daɣ jənnawan, ² iha əššəxəl wa n adag wa zəddigan, s ənta a imosan ahaket wa n tidət, ahaket was Əməli Məššina iman-net a t-ikrasan, wərgəɣ aggadəm.

³ Əkkulluk n əlimam wa zəwwəran, əššəxəl-net igi ən təhəkkuten əd təkutawen. Daɣ adi əlimam wa-nana da iwâr-tu ad agu takutay ta-net. ⁴ Ənnar iha Ȳaysa əddənət

dada, wədi wər z'iqqəl əlimam, fəlas əššəxəl wen əhân-tu limaman win tagginen šikutawen s əmmək wa imal Ettawret. ⁵ İlimaman win, ƣabbadan Məššina s əmmək imosan əsəkbar əd šaššelan n aratan win əhanen ijənnawan. Fəlas assaxa wad isimutug Musa y akaras n ahaket, omar-tu Məššina inn-as: *İnəy, arat kul ag-ay s əmmək iman-net wa kay-itawasaknan fəl ədƣax.* ⁶ Amaran əmərədda, əššəxəl ogaran wəllen wa n limaman a itawakfan Ÿaysa s ənta a imosan əlimam-nana wa zəwwəran, fəlas ənta a imosan almawakkil-nana daƣ arkawal ən tassaƣ ta tofat, təbdâdat fəl arkāwalan win ofänen.

⁷ Amaran, ənnar ikmâl arkawal wa azzaran, wər za tagu addararat s ad iggəz wa aynayan edag-net. ⁸ Tidət as Məššina issiwar tamattay-net lahan, assaxa wad inna: «Inna İməli: *İnəy! İzayan-du adan a daƣ za nəməggax əd tamattay n İsrayil əd ta n Yahuda arkāwal ən tassaƣ aynayan.* ⁹ Arkawal ən tassaƣ wa, wər z'alu əd wa namaggax əd marawan-nasan, assaxa wa tan-d-ədkalax əkkasaƣ-qan-du daƣ Masar. Dad zamas wər əƣdelan daƣ arkawal ən tassaƣ wa dər-san namagga, wədi əgmada batu-nasan, inna İməli. ¹⁰ Amaran ənta da arkawal wa aynayan ən tassaƣ wa za nəməggax əd maddanəs n İsrayil dəffər adan win den, inna İməli: *Ad agax əššərədan n əššəriƣa-nin daƣ əgərri n akkiyyan daƣ-san, əktəbaƣ-qan daƣ wallan-nasan, əqqəlay İməli-nasan, əqqəlan tamattay-nin.* ¹¹ Wər tan-iha i z'iləsan əsəssəƣri n əmidi-net, wala amadrax-net ann-as: *"İwâr-kay ad təssəna Məššina"* fəlas ketnasan a di-əssənan a d-ibazan ƣur wa əddarran-nasan, har wa waššaran-nasan. ¹² Fəlas a dasan-əhənətteƣ daƣ talbast ta əgan, əssurəfay-asan ibakkadan-nasan šiyyat.» ¹³ Dad zamas Məššina inna: *wa aynayan, daƣ adi arkāwal wa azzaran iqqal arat waššaran.* Amaran arat as waššar, wədi iha tarrayt n ad iba tamayyamayt-net.

9

Adkul ən təkutay ta n arkawal wa aynayan

Arkawal wa irəwan əd wa aynayan

¹ Arkawal wa azzaran ila əššərədan win əlyibada, ila deƣ edag n əlyibada ihân əddənet dada. ² Ahaket a itawakrasan, imosan əššin daggan. Edag wa azzaran ih-ay əsəkbəl ən fətəlaten əd tabəl əd təgəlwen šin tat-əggarnen a d-əmmewaynen əmosnat šikutawen y İməli. Edag wen esəm-net Edag wa Zəddigan. ³ Amaran dəffər anaxer wa n əššin illân den, ill-ay adag was itawannu Edag wa Ogaran Tazdak. ⁴ Edag wen ih-ay majmar n urəƣ a fəl tawasaqqadan ađutan win əzodnen. Ill-ay deƣ əssənduƣ wa n tassaƣ ilsân urəƣ. Əssənduƣ wen ih-ay əƣəzu n urəƣ ihâ amensay wa n Manna, tah-ay deƣ tallaq ta n Harun tənžârat, əd səlluman əššin win fəl iktab arkawal ən tassaƣ. ⁵ Afalla n əssənduƣ wen, əbdâdan fall-as šaššelan n angalosan win Kəruban əssiknanen tanaya ən Məššina əgân telay s əfrutan-nasan y əsəhər-net s ənta a fəl inaqqal əzni ən takutay ta təmmasat ibakkadan. Mišan əmərədda wər za nagu isalan kul daƣ batu ta. ⁶ Amaran Ahaket wa n əmənəy imos əššin daggan, a tan-imosan Edag wa Zəddigan d Adag wa Ogaran Tazdak. Edag wa Zəddigan taggazan-tu limaman alwaƣ kul, agin daƣ-as əššəxəl-nasan wa n əlyibada. ⁷ Edag wa n əššin daƣ Ahaket amaran, Əlimam wa Zəwwəran ƣas a das-itaggan iguz iyyanda daƣ awatay. Den daƣ ad itaway əzni n əmudar ag-ay takutay dat Məššina fəl ad igrəw təsureft ən bakkadan win wər nəga s əttənəgmur gər za win-net wala win tamattay. ⁸ İnfas wa Zəddigan issikn-anax s awen âs, tarrayt ta n Adag wa Ogaran Tazdak wər za tənəfiləl iket əşƣalan aytedan s ahaket wa azzaran n arkawal. ⁹ Arat wen, imos əlmital n azzaman win nəha əmərədda. Almaƣna n awen as šihəkkuten əd təkutawen wər əfregnat ad əzzəzdəgnat iwallan n aytedan win ƣabbadnen Məššina s əmmək wa. ¹⁰ Aratan win əmosan əššərədan əqqâlnen imensewan, d aratan win tamašwinen, d

əzzənəfan aggotnen n alwallatan. Əşşərədan win den, əntanay as əşşalan aytedan har d-ewad alwaq wa dağ issəbdad Məşşina ənnizam wa aynayan.

¹¹ Mişan Elməsix osâ-du imos əlimam wa zəwwəran n aratan olâynen win t-əlanen. Iggaz ahaket wa ogaran təzzəwwert, ikmâlan, âs wərgex ifassan n aytedan a t-əganen, almayna wər iha əddənet dada. ¹² Elməsix iguz iyyanda a iga šiyyat y Adag wa Zəddigan. Amaran azni-net iman-net a ikfa imos takutay, wərgex azni ən zulağ wala izəgran. Emmək en dağ as dana-d-igray əlyillas ixlâlan. ¹³ Fəlas, dad zamas azni ən zulağ d əzni ən zəgran d ežəd ən təharaten šin rakammətnen win tawanbasnen əfrâgan əzəzdəg ən təğəssa-nana, ¹⁴ ma dər z'agdu əzəzdəg wa dana-z-agu əzni n Elməsix, izzəzdəg iwallan-nana dağ arak mazalan win tawaynen aggadəm s əhluk, fəl ad nəxbəd Məşşina di iddarən, id Elməsix a ikfan iman-net i Məşşina əs tarrayt n Infas wa Zəddigan di ixlâlan, imos takutay wər nəla a imosan əlyib.

¹⁵ Awen dağ a fəlas Elməsix a imosan almawakkil-nana dağ arkawal ən tassağ wa aynayan. Dad zamas Elməsix aba-tu fəl ad əgrəwan aytedan tədarfit dağ bakkadan win əgan dağ azzaman ən tassağ ta tərəwat, aytedan win du-tawaxranen, ad əgrəwan təkəsit təylâlat tas itawagga arkawal-net. ¹⁶ Amaṭer ilzâm as kundaba igmad ašşak təmattant ən wa t-igan, ¹⁷ fəlas amaṭer, wər sər-əs itəwəggu əşşəğəl iket wər aba wa t-igan, id wər z'itəwəqbəl iket iddâr məşşis. ¹⁸ Awen dağ a fəlas arkawal wa azzaran, ənta da tanaxla n əzni as inta. ¹⁹ Dəffər as imâl ənnəbi Musa alwajiban kul win Əttawret i tamattay, idkal-du azni ən zəgran əd zulağ d aman, idkal-du təduft zaggayət d agabal ən xisof, infas sər-əs əlkəttab iman-net əd tamattay ketnet, ²⁰ igannu: Ənta da *azni n arkawal ən tassağ wa dawan-issəbdad Məşşina*. ²¹ Dəffər awen, infas Musa s əmmək wen da s əzni wen Ahaket əd mutag-net kul win əlyibada. ²² Dağ awa inna Əttawret, tašşam n aratan azni as tawazazdagan, amaran wər tu-təlla təsureft ən bakkadan âr s ad inxâl əzni.

²³ Dağ adi, ilzâm as šašşelan n aratan win əhanen ijənnawan əmmək wen dağ den as z'izdagan, aratan amaran iman-nasan win əhanen ijənnawan, ilzâm ad izdagan əs təkutawen ədkâlnen wəllen. ²⁴ Amaran Elməsix, wərgex Edag wa Ogaran Tazdak əkrâsan aytedan imos əlmital ən wa n tidət a iggaz, kalar ijənnawan iman-nasan a iggaz, fəl ad iməl dat Məşşina har əmərədda, imos almawakkil-nana. ²⁵ Wər iggez değ edag wen y a dağ-as akfu iman-net imos takutay dağ taklaten aggotnen, zun awa itaggu Əlimam wa Zəwwəran əkkulluk n awatay itaway-in azni wər ila. ²⁶ Ənnar adi a igan, wədi Elməsix a du-tənta əddənet itaxazzab. Kalar ənəfilal iyyanda šiyyat a iga Elməsix, dağ ələqqam n azzaman, fəl ad iməs ibakkadan n aytedan əs tahakkay ta iga iman-net imos takutay. ²⁷ Zund əmmək âs aggadəm təsəlkamt-net təmattant iyyadda, dəffər adi ibdəd fəl mazalan-net, ²⁸ əmmək wen dağ den âs Elməsix da ətəwəkfa iyyanda a itawagga imos takutay, fəl ad iməs ibakkadan n aytedan aggotnen. Amaran assa-net wa n əşšin, wər d-igla fəl ames ən bakkadan, kalar fəl ad ixləs win das-əssəğadnen əknân tara n a d-asu.

10

Əşşəğəl ikmâlan wa təmos təkutay ta iqqal Elməsix

¹ Əşşərixa wa n Əttawret šašşelan ɣas a imos ən tənəfawen šin d-əzaynen. Əlmital-nasnat da wər t-ewed. Awen dağ a fəlas šikutawen šin izzəlam ənnizam wa n Əttawret, tawagginen har faw dağ əkkulluk n awatay, wər ilkem ad əfragnat tehakkay n alkamalat i win əybadnen Məşşina. ² Ənnar ihakku əşşərixa wen alkamalat, wədi aytedan win əganen šikutawen šin den ad ammazzayan d igi-nasnat fəlas irəw as əgrəwan təsureft ən bakkadan-nasan šiyyat, zaddogan wallan-nasan

dağ id t-illa abakkad. ³ Kalar šikutawen šin den, əkkulluk n awatay əssiktanat-du aytedan ibakkadan-nasan. ⁴ Fəlas wər t-illa əmmək as ifrâğ əzni ən zəgran wala wa n zulağ emes ən bakkadan.

⁵ Awen dağ a fəlas assağa wa d-iggaz Əlməsix əddənet, inna i Məşşina: *Wərmad təddirarəğ əs təkutay za wala təhəkkut, mišan təkfeğ-i tağəssa.* ⁶ *Wərmad dak-əgraznat təkutawen šin tirəkəmmittnen za wala šin takkasnen ibakkadan.* ⁷ Awen dağ a fəl ənne: *Nak da a d-osan da, fəlas batu-nin a dağ əşşewalan əlkəttaban. Ose-du ya Əməli-nin y ad ağay tara-nak.*

⁸ Inna: *Wərmad tareğ šikutawen, wala šihəkkuten, wala šikutawen šin tirəkəmmittnen, wala šikutawen šin takkasnen ibakkadan, wər dak-əgreznat wala andərran.* Dər iga awen da ya šikutawen šin den, tiwagğanat s əmmək iman-net wa imal əşşəriğa wa n Əttawret. ⁹ Dəffər awen inna: *«Nak da a d-osan da y ad ağay tara-nak.»* Əmmək en dağ as izzərəz ənnizam wa azzaran, issəbdad wa n əşšin. ¹⁰ Tehakkay ta iga Ƴaysa Əlməsix tağəssa-net əs tara ən Məşşina, ənta a danağ-takfat tazdak əs tarrayt ən təkutay iyyadda ta n təzərəst ta təqqal təğəssa-net.

¹¹ Əkkulluk n əlimam iha edag n əşşəğəl-net akk əzəl y ad agu šikutawen aggotnen olânen, mišan wər ilkem ad əfragnat emes ən bakkadan n aytedan. ¹² Əlməsix amaran, dəffər as iga takutay iyyadda ta n təzərəst fəl bakkadan n aytedan, iqqim dağ əyil ən Məşşina. ¹³ İlla den da iqqâl y əzəl wad za təwəggin zənga-net daw daran-net. ¹⁴ Takutay iyyadda wər nəla təmidit as ikfa alkamalat har faw y aytedan win izzəzdağ dağ bakkadan-nasan.

¹⁵ İnfas wa Zəddigan isitadd-anax batu ta, id a inna: ¹⁶ *Ənta da arkawal wa dər-san za nəməgga dəffər adan win den, inna Əməli: Ad ağay əşşərədan n əşşəriğa-nin dağ wallan-nasan, əktəbaq-qan dağ əğərri n akkiyyan dağ-san.* ¹⁷ Dəffər awen inna: *Wər ilkem a d-ələsa təkatawt ən bakkadan-nasan, wala talbast-nasan.* ¹⁸ Amaran, dad zamas ibakkadan tawasarafan, wədi ab'as təga addararat əs təkutawen šin əmmasnen ibakkadan.

İzəgzan əd zəmmərat

Ənəmi haz n Əməli d iba n tawaylay n ələqqam

¹⁹ Dağ adi imədrayan-in, nakkanay nəkkâs aşşak dağ iguz n Adag wa Ogaran Tazdak, id Ƴaysa a inğalan azni-net fəl əddəlil-nana. ²⁰ Ƴaysa a danağ-olaman tarrayt ta taynayət, təddârat, issəğras-anax anaxer s Adag wa Ogaran Tazdak, almağna issəğras-anax əs təğəssa-net iman-net. ²¹ Əmmək en dağ âs nəla əlimam wa zəwwəran s ənta a itawazazaran y ahan ən Məşşina. ²² Dağ adi, zənnəmi həzatanax iman-nanax əd Məşşina əs wallan əğdâlnen, d əzəgzan ikmâlan, fəlas ətəwəzəzdağ a əgan wallan-nana dağ igi n id t-illa arak əmedran, tətawaşarad təğəssa-nana s aman win zaddoggen.

²³ Zəzzəwətətana wəllen dağ əzəgzan d attama win nəga, nəkkâs dağ-san aşşak, fəlas wa danağ-igan arkəwalan issiflas wəllen.

²⁴ Akkiyyan dağ-na issənet dağ win hadatnen, fəl ad nətinəməggu aholan ən tara əd mazalan win olağnen, nəga awen əs gəlleyat. ²⁵ Ad wər nəgməd əljəməyat ən məzzəgzan ta nəha, zun awa imosan alxal n aytedan wiyyad. Kalar tinəməgğiwatanax ənnəsixatan id təhannayam as əzəl wa ilkaman ihoz.

Ərruymatan d ənnəsixatan: Ad wər nəmməzəzay d igi n attama

²⁶ Amaran as nətaggu abakkad igân s əttənəgmur, dəffər as nəssân tidət, wədi wər tu-təlla təkutay iyyat a fall-anaq-qu za təməsət. ²⁷ As iga adi, ad ib'as tu-təlla tarrayt waliyyat âr ta n əsəgəd y əşşəriğa labâsan ən Məşşina əd təmsay ta za təsərrəkəmmet aytedan kul win əmosnen izənga ən Məşşina. ²⁸ As uğay awedan əs ləkkum y əşşəriğa wa n Əttawret, imos âs əllânat-tu sanatat madəğ karadat

təgəyyawen a t-ənaynen, wədi wər das-tu-təlla təsureft waliyyat, kalar əşşərixa-net təmattant. ²⁹ Dağ adi, ma dər z'agdu attadib wa dər ihor awedan wa issəknan iba ən safrar i Barar ən Məşşina, issəkna məlka y əzni ən tassağ wa t-izzəzdagan, isammadray Infas wa Zəddigan ihakkin arraxmat? ³⁰ Nakkanay nəssân wa innan: *Nak a itabazan s əşşərixa, nak a z'ixkəman y awedan kul awa dər ihor.* Innâ değ: *Əməli ad abəz tamattay-net s əşşərixa.* ³¹ Arat səksədan wəllen a imos ad iggəz awedan ifassan ən Məşşina di iddaran.

³² Aktiwat-du azzaman win azzarnen, dəffər as kawan-ikfa Məşşina ənnur-net, təmmiqqasam d alğazab labasan, əd təbəllant təsohet, ³³ fəlas alwağ iyyan tətawakaggaram dat awedan kul, tətawasaknim arkanay, alwağ iyyan amaran tətawayam tadhəlt-nawan y aytedan win tawasakninen alğazab zun wen. ³⁴ Təhinattem y aytedan win əhanen kasaw, təssânam dağ-san, təqbalam əs man filawasnen a dağ-wan attarmasan ərrəzəğan-nawan, id təssânam âs təlâm ərrəzəğan ədkâlnen, a t-əllânen har faw. ³⁵ Dağ adi, ad wər tammazzayam d ikus n aşşak wədi, fəlas ənta a kawan-z-akfiñ arozan zawwarnen. ³⁶ Təddiraram əs zəmmerat fəl a du-tassandim tara ən Məşşina təgrəwam arat was iga arkawal-net. ³⁷ Fəlas inna Məşşina: *Wər din-iqqim âr arat n azzaman, azzaman wər nəggət ças, y a d-asu was ihor a d-asu. Wər din-z-ahag.* ³⁸ Fəlas wa dat-i oğadan, ad igrəw təməddurt ta təylalat s əzəgzan-net. *Mişan as iqqal dəffər-əs, wədi ad ib'as t-əran man-in.* ³⁹ Nakkanay amaran, wər nəha aytedan win taqqalnen dəffər-san abəzan tarrayt ta n əhluk. Kalar nəha win əttafnen əzəgzan-nasan y ad əgrəwan əlyillas.

11

Əzəgzan ən təgəyyawen n arkawal wa irəwan

¹ Əzəgzan almağna-net âs arat was nəga attama-net, wədi nəkkâs aşşak as nəgrâw-tu. Almağna-net ikus n aşşak dağ aratan kudde wər tan-nəhənnəy. ² Əzəgzan en dağ a fəl əgrəwan marəwan-nana ətəwəqbal çur Məşşina. ³ Amaran ənta a danax-isassagran âs əddənət awal ən Məşşina as du-təxlak. Əmmək en dağ as awa nəhənnay, igmâd-du a wər nətəwəhənnəy.

⁴ Əzəgzan, ənta a fəl ikfa Habila takutay tofât ta ikfa Qayin. Əzəgzan en dağ a fəl tətəwəqbal tişit ən Habila alğadil id Məşşina iman-net a iggəyyen as şikutawen-net tiwəqbalnat. Əzəgzan a d-əwayan âs Habila aba-tu mişan har harwa işşewal. ⁵ Əzəgzan, ənta a fəl immədkal Xenok əs jənnəwan, wər tu-tədes tamattant. *Wər kala ad ilas ətəwənanay dəffər awen, fəlas Məşşina a t-idkalan.* Amaran dat əmədkəl-net, igrəw ətəwəqbal çur Məşşina id ənnan Əlkəttaban: *Xenok igrâz i Məşşina.* ⁶ Əzəgzan ənta ças a ihakkin aytedan ad əgrəwan gərrezat i Məşşina, fəlas awedan wa iqbalan Məşşina dağ əwəl-net, wədi kundaba izzəgzan âs Məşşina ill-ay, izzəgzan değ âs itaggu arozan i win gammaynen masnat-net. ⁷ Əzəgzan, ənta a fəl ikras ənnəbi Nux aylal n aman fəl ad iyləs ağaywan-net, id əmiksad ən Məşşina a imos ikkâs aşşak dağ arat wa das-isannafalal Məşşina, kudde wər t-ihənnəy. Əmmək en dağ as obaz Nux əddənət s əşşərixa, iqbal Məşşina tişit-net aləs oğadan əs tarrayt n əzəgzan-net.

⁸ Əzəgzan a fəl ibbərdağ ənnəbi İbrahim i Məşşina s iki wa iga akal was das-itawanna ilkâm ad iggəz təla-net, assağ wa t-iyra Məşşina. Ifal akal-net, igla da wər issen id ikka. ⁹ Əzəgzan a fəl igla İbrahim, ikka akal was das-iga Məşşina arkawal-net, iqqal dağ-as ənaftax, ixsâr dağ həktan ənta d İsəhaq əd Yaqub âs ənta dər-san as iga Məşşina arkawal wen. ¹⁰ Arat wen ig-ay İbrahim fəlas issigad y əğrəm wa wər nətəbərəjjit, əğrəm was Məşşina iman-net a t-id-inzaman ikras-tu. ¹¹ Əzəgzan a ikfan Sarata barar dağ tuşaray-net. Sarata wər tətəlu bararan, mişan təgrəw əzzurrəyya, id əzəgzan a təga s arkawal ən Məşşina di n alğadil. ¹² Awen dağ a fəlas aləs iyyanda,

ihân ələqqam ən təxrəst-net, a igrawan əzzurrəyya igân igət wa əgan etran day jənnawan, madex šiblalen n amaḍal əs tu-wər-illa i ifrāgan əšidən-nasnat.

¹³ Əzəgzan en day a əgan aljadan win den, har tan-aba da wər əgrewan aratan win as dasan-itawagga arkawal-nasan, mišan awa sər-san əgan day əzəgzan zun as ənayan-tan day igəg, əgâran fall-asan assalam, əggiyyen dat awedan kul âs inaftaxan əd xərab xas a mosan day əddənet. ¹⁴ Amaran win əganen awal wa, sitaddan sər-əs âs gammayan akal ən man-nasan. ¹⁵ Ənnar tan-iggâz əsuf n akal wa d-əfalan, wədi ad t-əqqəlan, fəlas əgrāwan edag n awen. ¹⁶ Mišan, akal idkâlan dənnəg wen as əgan ənnəyat-net, almayna ijənnawan. Awen day a fəlas, Məššina wər fall-as imos təkarakit tišit ta iga Əməli-nasan, fəlas isimatag-asan axtəm day jənnawan.

¹⁷ Əzəgzan ənta a fəl ikfa Ibrahim barar-net Isəhaq y ad iqqəl təfaskay assaxa wad ijərrab Məššina əzəgzan-net. Barar-net a n iyyanda a ikfa, ənta wa igrawan arkawal. ¹⁸ Amaran ənta en day as inna Məššina: *Tarrayt n Isəhaq as za təgrəway əzzurrəyya*. ¹⁹ Day iduf n Ibrahim, Məššina ila tarna n əsənkər day təmattant. Awen day a fəl das-oyya Məššina barar-net, zun as issinkar-as-t-idu day tamattant. ²⁰ Əzəgzan a fəl ittar Isəhaq i bararan-net Yaquub d Ezaw a dasan-igan albaraka day azzaman win d-əzaynen. ²¹ Əzəgzan a fəl ittar Yaquub day ələqqam ən təxrəst-net y akkiyyan day bararan ən Yusəf, *issəjad issîdad s əmi ən tallaq-net*. ²² Əzəgzan a fəl iššewal Yusəf i Kəl-İsrayil dat təmattant-net, day batu n agamad-nasan Masar, omar-tan s awa z'agin i xasan-net.

²³ Əzəgzan ənta a fəl itawayxbar Musa xur təhəwt-net har iga karadat təlil. Əxbaran-tu marwan-net id ənâyan as barar ihossayan a imos, amaran əzəgzan-nasan a dasan-igdalan a tan-təggəz tasa n awas omar Firxawna, imosan əmənokəl ən Masar. ²⁴ Əzəgzan a fəl ugay Musa dəffər tadwala-net s ad iqbəl tišit ən barar n elles ən Firxawna. ²⁵ Əzəgzan en day a fəl issof Musa ad irtəy əd tamattay ən Məššina day alyazab, iksan tənəfləyt n əddənet əd bakkadan-net wər nəmos âr arat n adan. ²⁶ Musa issof ad itəwəsəknu məlka wa itawasakna Əlməsix, fəlas arozan win z'igrəw əs tarrayt ten, ogaran wəllen ərrəzəxan ən Masar; Musa iswâd day aratan win d-əzaynen, a tan-imosan arozan win ihakku Məššina. ²⁷ Əzəgzan a fəl igmad Musa Masar, wər tu-taha tasa n əmənokəl iha alham labasan, fəlas əsəggətəkki a iga id ihannay a wər nətəwənəy. ²⁸ Əzəgzan a fəl iga Musa təfaskay ta n əmud wa n Akkay, infäs azni ən təfaskay ten i tamawen ən təsəhar ən nan ən Kəl-İsrayil, fəl ad wər idəs əməhlak ixfədda-nasan.

²⁹ Əzəgzan a tan-issəxrasan Agaraw was itawannu wa Zaggaxan, jiwanken fəl amaḍal iqquran, ilmaz agarew en Kəl-Masar win əgmaynen d a tan-awədan. ³⁰ Əzəgzan a iggədlan afarag wa ixləyan axtəm ən Yerikaw, dəffər as əgân Kəl-İsrayil əssa adan xallayan-t-id. ³¹ Əzəgzan wa təga Rahab ta n təkərwat ənta a das-igdalan a tat-iba assaxa wad əhlakan aytedan win ugaynen s əbərdəg i Məššina, id Rahab a təqbalat a xur-əs əssəgənan nassasaman n İsrayil, təg-asan isəxlak.

³² Ma dawan-z-anna dəffər aratan win? Wər z'əgrəwayx alwaq ewâdan a dawan-əššiwəla day batu ən Jedeyon d Əmbarək əd Samson əd Yeftay əd Dawəd əd Saməwel, d ənnəbitan win hadatnen. ³³ Əzəgzan as obazan meddan win ikallan, əxkaman fall-asan s əššərixa oxadan, əgrawan arkāwalan win dasan-tawagganen, ədbaxan imawan ən harran. ³⁴ Əzəgzan as ənğan šiməs zawwarnen, əxlasan day təkabiwen əknânen tawala, əgrawan tarna day adag ən rəkkəm was kala t-əgan. Əssəknan tišit-nasan inammagaran, ərgan igənan. ³⁵ Əzzəgzannat tədoden tawasankaran-asnat-du nəmməttan-nasnat day təmattant. Wiyyad amaran tawasaknan alyazab səksədan, mišan ugayan s ad əgrəwan tədarfit xur aytedan win tan-zaxazzabnen. Arat wen əgân-tu fəl ad əgrəwan təməddurt ta təxlalat dəffər tanakra-nasan day tamattant.

³⁶ Wiyyad əgrawan-tan jarrabatan labasnen əgânen daɣ tēmakkakkayt, əd təwit, əd tēzabagawen, əd kasaw. ³⁷ Wiyyad tawanɣan əs tēgur ən tēhun, wiyyad əmmolayan əs təkəjaten, wiyyad tawanɣan əs təkabiwen. Wiyyad itāway-tan aɣaf wər əssenən is ədagan, əlsân igəşkan n ayfəd əd win wəlli, wər əlen a d-ixlâkan, irtây-asan awen d as tiwadgazan, tawasaknin arkanay. ³⁸ Aytedan win, wər tēhor əddənet d a tat-əhân, itāway-tan aɣaf daɣ tənariwen, d ədɣaɣan, əd kəzman əd ɣaɣan.

³⁹ Aytedan win kul iqbal-tan Məşşina əs tarrayt n əzəgzan-nasan, mişan wər tan-ihā i ināyan arkawal wa dasan-itawaggan. ⁴⁰ Məşşina kala dâ issins-anay arat idkâlan wəllen fəl ad wər əgrewan aytedan win den alkamalat iket wər dər-san nəjjəyat agaraw-net.

12

Ləkkum i tarrayt ta n zəmmerat d igi ən tēməddurt zəddigat

¹ Awen daɣ a fəlas nakkanay da, dad zamas ɣilayɣalayan-ana məzzəgzan əgânen igət ogdân d awa, wədi əgəratanaɣ-in əzuk kul wa danaɣ-iwaran, əd bakkadan əssirɣasnen alamaz-nana, naglu har tēzərəst ən tēbəllant ta danaɣ-issəwar Məşşina.

² Əswədātana faw daɣ Ƴaysa s ənta a danaɣ-olaman tarrayt ta n əzəgzan, tēhakkit alkamalat. Ƴaysa iqbal alɣazab fəl tēgəttawt imosan təkərakit zəwwərat, id təkərakit ten wər ɣur-əs tēmos wala, fəlas ihannay tēfalawist ta das-təqqalat. Dəffər awen ikka ijənnawan, iqqim daɣ əɣil ən Məşşina daɣ taɣmar-net.

³ Awalla, aktiwat was əgan nasbakkadan akyud ogdân d awa, fəl ad wər tayyim iman-nawan tēgmədam tarrayt. ⁴ Tēbəllant ta tēgam d abakkad, wər tat-təgem har tamattant. ⁵ Təttəwam-in ammar wa dawan-iga Məşşina, olân d ənnəsixa wa itaggu awedan i bararan-net, inna: *Barar-in, ad wər təsəttəlkəkəɣ attadib n Əməli, ad wər təqqəla dəffər-ək as kay-issəwar Əməli lahan.* ⁶ *Fəlas Əməli itawaddab win ikna tara, iggât win iqbal daɣ tişit ən bararan-net.* ⁷ Əqbəlat alɣazab wa tətəggim. Məşşina itawaddab-kawan fəlas bararan-net a tēmosam. Awak ill-ay barar wər itəwəddib abba-net? ⁸ As imos âs wər kawan-itəwəddib Məşşina, zun awa itaggu i bararan-net kul, wədi wər tēmosam bararan-net win tidət, kalar bararan ən bannan a tēmosam. ⁹ Dad zamas ketnana nəla abbatan daɣ əddənet a dana-tawaddabnen, nəssiɣmar-tan, manəmmək as wər za nabbardag i Məşşina s ənta a imosan Abbanana wa ihan ijənnawan, fəl ad nəgrəw tēməddurt ta təɣlalat? ¹⁰ Abbatan-nana win əddənet tawaddaban-ana daɣ arat n azzaman wər nəggət daɣ batu n idufan-nasan, Məşşina amaran, tənfa-nanaɣ a fəl danaɣ-itawaddab, fəl a danaɣ-iqbəl daɣ tazdak-net. ¹¹ Attadib wər imos arat izodan s awedan daɣ amazay wa das itawaggu, kalar arat a imos iɣaşşadan iman. Mişan win tawawaddabnen, təsəlkamt-nasan ad əgrəwan alxer, əd tēməddurt toɣâdat.

¹² Awen daɣ a fəlas: ifassan-nawan ərkaman, ifaddan-nawan deɣ ərkaman, daɣ adi səssuhətat-tan. ¹³ Əlkəmat i tarrayen şin oɣadnen. As tēgam adi, aytedan win ərkammen, wər dasan-z-ittəy rəkkəm, kalar ad əzzəyan.

¹⁴ Aqliwat daɣ igi n alxer d awedan kul, tagim tēməddurt zəddigat. Awedan wa wər nəga tēməddurt zun tēdi, wədi wər z'ammanay d Əməli. ¹⁵ Əgləyat wəllen, fəl a tu-wər-iməl awedan issiban fəl man-net arraxmat ən Məşşina. A daɣ-wan tu-wər-iməl awedan waliyyan a z'iqqəlan zun annabat səməman a du-z-idwəlan awəy-du iɣşudan a z'əgdələn y aytedan aggotnen tazdak. ¹⁶ Ad wər ikkəs waliyyan daɣ-wan tarna i Məşşina, madəɣ isəmmədrəy aratan win zaddognen zun awa iga Ezaw a din-izzənzən alxaq-net wa n tişit n aɣafadday, isammaskal-tu amensay. ¹⁷ Təssānam âs dəffər awen, igmay albaraka wa n tişit n aɣafadday, mişan igdal-as-tu abba-net. Iyyəwan tala, mişan indar-as a d-issuxəl abba-net daɣ batu ten.

Təkawent i Məşşina d əlyibada-net

¹⁸ Amaran, wərgex arat as ifrâg awedan edes-net a din-təhozam, zun təmsay təmihandarət, madeş şiyay, madeş əhu, madeş tazəkkay, zun awa əgan Kəl-İsrayil daş taneyay. ¹⁹ Wərmad təslâm y anasay n asak, wala tərnuq zun tas əslan Kəl-İsrayil, əgmayan a das-wər-ələsan tesalay, ²⁰ fəlas wər əqbelan tarxəmt ta dasan-tənnat: *Wa idasan adxaş, gər iqqal awedan wala əmudar, wədi ad ammat əs təgur ən təhun.* ²¹ Arat wa itawanayan den, i səksədan wəllen, har əs idkal Musa əməsli-net inna: «*Tah-i tasa wəllen, təga daş-i taysəst.*» ²² Kala kalar kawanay, təhozam-in adxaş wa n Səyon, d əyrəm ən Məşşina di iddaran, a t-imosan Yerusalam ta təhat ijənnawan, təhozam-in deş şimərwen ən gimən n angalosan əmminaynen əknân təfalawist. ²³ Təhozam-in deş tiddawat ən xəfədda win as iktab Məşşina esmawan-nasan daş jənnawan, təhozam-in Məşşina s ənta əmaşraş n aytedan kul, təhozam-in aytedan kul win oşadnen, əgrâwan alkamalat şur Məşşina. ²⁴ Təhozam-in deş Şaysa, s ənta a imosan almawakkil-nana daş arkawal ən tassaş wa aynayan, d əzninet wa inşalan, ogaran wa n Habila təla n əməsli daş jənnawan.

²⁵ Daş adi ənkədat y ad təzəmməzəgam i wa išşewalan. Dad zamas Kəl-İsrayil win ugaynen s ad əqbəlan awa dasan-itawaggan daw aşaf daş əddənet da da, ketnasan əwwəddaban, wədi ma dər z'agdu attadib wa dana-z-itəwəggin as nəzammazag i wa dana-d-işşewalan daş jənnawan? ²⁶ Əməsli-net isannagaynagay amadəl daş azzaman win okaynen, amaran əmərədda arkawal da wa iga: «*Taklat ta du-təzayat, wərgex amadəl şas a za sənnəgəynəgəya, kalar ijənnawan da a tan-sənnəgəynəgəya.*» ²⁷ Batu ta n «taklat ta du-təzayat» almaşna-net əs arat kul ad iba tamayyamayt-net, fəl a d-aqqamin aratan win as wər ilkem ad nigaynagayan. ²⁸ Daş adi, dad zamas nəgrâw taşmar as wər ilkem ad tənigaynagay, sənnəfiləlatanay agoda i Məşşina, nag-as əlyibada wa das-igrazan igân s əbərdeş, əd saşmar, ²⁹ fəlas, Əməli-nana, təmsay da imos-tat təsirəkəmmet.

Təsəxtəmt

13

Ənnəsixatan aggotnen

¹ Ad wər tammazzayam d ənəmərə wa taggin mədrayan. ² Əqqələt aytedan iha amagaru. Ad wər talkim adi fəlas aytedan win iha amagaru, wiyyad daş-san simagaren angalosan da wər əssenən. ³ Aktiwat aytedan win əhanen kasaw, zun as tənimaham-tu dər-san. A din-wər-tətatawim aytedan win tawasakninen arkanay, fəlas kawanay da təlâm taşəssa zun tada-nasan. ⁴ Səşmərat azalaf ketnawan. Aləs əd tətut win ənnəzlafnen, əşdəlanet gar-essən fəlas Məşşina ad awwaddab imaggan n əzzəna. ⁵ Ad wər təqqələm aytedan əwwəlatnen azrəf. Agdiwat s awa təlam əmərədda, fəlas Məşşina iman-net as inna: *Wər ilkem a kay-oyye za wər ilkem ad əgmada batu-nak.* ⁶ Awen daş a fəlas nəfrâg ad nannu, s ikus n aşşak: *Əməli a imosan fella-nin, wər əksuda wala. Ma di-z-işşəd aggadəm?*

⁷ Aktiwat imuzaran-nawan win şur təslam y awal ən Məşşina. Əttəfat awa dawan-d-oyyan, tattalalam əzəgzan-nasan. ⁸ Şaysa Əlməsix iman-net awa imos əndazəl ənta a imos azalada, imos-tu deş har faw.

⁹ Ad wər tarđim əssəxrəkan-kawan səssəşritan wər nəmos win as nəzzəgzan. Fəlas aggadəm, ofa ad igrəw assahat ta təhakku arraxmat ən Məşşina, wərgex ta hakkin mensewan. Əşşərişə wa iqqalan batu ən mensewan, wər ikna wala i win das-əlkammen. ¹⁰ Nəla edag wa n əsəqqəd ən təkutawen, mişan ilimaman win əşşalnen daş Ahaket wa n əlyibada, wər əlen turagat ən tattay ən təkutawen şin daş-as tawakfinen. ¹¹ Azni ən mudaran wa itawakfan wa d-immewayan y ames ən

bakkadan, əlimam wa zəwwəran a t-itawayan s Adag wa Ogaran Tazdak, amaran şifəkkawen ən mudaran win den, təwəsəqqədnat sədi y aɣaywan. ¹² Awen daɣ a fəlas Ƴaysa da, aba-tu dəffər as itiwakkas daɣ əxrəm fəl ad izzəzdəg tamattay s əzni wa-net iman-net. ¹³ Daɣ adi əgmədatanaɣ aɣaywan, nəlkam-as, nəgər iri y ad nətəwəsəknu məlka wa itawasakna. ¹⁴ Fəlas daɣ əddənət dada, wər nəla edag ən təməxsurt ixlâlan. Kalar aɣrəm wa d-izayan a daɣ nəgammay edag ən təməxsurt. ¹⁵ [Daɣ adi] iwâr-anaɣ ad nətaggu faw i Məşşina şikutawen əs tarrayt ən Ƴaysa. Şikutawen şin əmosnat təmmalen, almaɣna şigaytalen a daɣ nəqbâl dat awedan kul as ənta a imosan Əməli. ¹⁶ Ad wər tammazzayam d əmazal n awa olayan, d əsəssuhi ən tassaɣ gar-ewwan, id awen daɣ a imosan şikutawen şin əgraznen y Əməli.

¹⁷ Bardagat i muzaran-nawan, takkawanam-asan. Əntanay a kawan-ogaznen, id əssânan âs ilkam ad əbdədan fəl mazalan-nasan dat Məşşina, daɣ batu n əşşəxəl wa tan-issəwar. As dasan-təbbərdagam, ad agin əşşəxəl-nasan əs man filawasnen, fəlas as t-əgan əs man əxşâdnən əd təhənəffa, wər dawan-tu-za-təggəz tənfa waliyyat.

¹⁸ Agliwat daɣ igi y-anaɣ şiwatriwen, fəlas nəkkâs aşşak âs iman-nanaɣ i zaddognen id əlqəbulat a nəga əzəluləx daɣ əkkulluk n anamod. ¹⁹ Onsâyaq-qawan wəllen ad taglim daɣ təwatriwen, fəl a kawan-in-təwəsuxəla tarmad.

Assalaman əd təwatriwen

²⁰ Məşşina di n Əməggi n alxer a d-issənkaran daɣ təmattant Əməli-nana Ƴaysa imosan amadan wa ofan imadanan, əs tarrayt n əzni n arkawal ən tassaɣ ixlâlan, ²¹ əgmâya daɣ-as a kawan-issəfrəg igi n arat kul wa olayan y ad tammazalam taranet. Agiwet sər-na Məşşina arat kul wa das-igrazan əs tarrayt ən Ƴaysa Əlməsix s ənta a ilan tanaya har faw! Amin!

²² Şirawt ta əzzigzala daɣ-as wəllen, amaran əgmâya daɣ-wan imədrayan-in, ad təqbəlam təlxutbat ta, təzəzzəwem daɣ-as. ²³ Əssənət âs amadray-nana Timotay, igmad-du kasaw. As di-d-osa tarmad, a dər-əs in-idawa sər-wan.

²⁴ Təhulam-in imuzaran-nawan kul, əd tamattay zəddigat ən Məşşina. Əhulan-kawan-in şəqqaqan-nana win akal n Italəya. ²⁵ Ig-awan Məşşina arraxmat-net ketnawan.

Širawt ta iktab Yaqub Assalaman

¹ Awa nak Yaqub, akli ən Məššina d Əməli Ƴaysa Əlməsix, a din-ihulan marawat tawšeten əd sanatat wizawaznen daƷ əddənet.

Əlməsixi əd jarrabatan

Əzəgzan əd zəmmerat

² Ya imədrayan-in, as fall-awan d-osan jarrabatan əmosnen əzzənəfan, əqqəlanet arat a kawan-isifalawasan wəllen. ³ Fəlas təssānam as, ətəwəjərrab n əzəgzan-nawan a sər-wan d-itarawan zəmmerat. ⁴ DaƷ adi ayyat zəmmerat tədi, a daƷ-wan tassəndu əššəxəl-net, fəl ad təqqələm aytedan əndānen, əkmālan. ⁵ Kud ih-iwan awedan iddiraran əs masnat, ansəyet Məššina, a das-tat-akfu; fəlas Məššina illillat, ihakku awedan kul, da wala təgna. ⁶ Mišan ansəyet Məššina, iziƷzan, wər iga aššak. Fəlas awedan wa igan aššak wər izlay əd tanazzamaren n agaraw wa zəwwəran isaggād ađu, ibbāt-tanat sa əd sa. ⁷ Awedan šilat ən wədi, ad wər agu attama n as ad igrəw arat waliyyan Ʒur Əməli, ⁸ id əwəl-net a izunan, wər t-illa arat itaggu a daƷ ittāf edag iyyanda.

⁹ Amadray-nana wa n tələqqay addawatet, isəbbərəg fəl adkul wa igrəw Ʒur Məššina əddi. ¹⁰ Amadray-nana deƷ wa n əməgğergəs addawatet, isəbbərəg fəl əsəmmədrəy wa t-iga Məššina əddi; id taƷart a tətəggu takawkawt ən yel, iba tamayyamayt-net a z'agu ənta əd təgərgist-net. ¹¹ Yel, as du-təgmad təfuk, təga tuksay, a tu-təssəxər, tərtək takawkawt-net, iba šihussay-net. Adi da za a igarrawan awedan n əməgğergəs ozālan daƷ taƷawšiwən-net.

¹² Ibbilal awedan wa izmaran i jarrabatan, fəlas as fall-as okayan ad igrəw alak imosan təməddurt təxlālat, tas igā Məššina arkawal-net y aytedan win t-əranen.

Jarrabatan d arak deranan

¹³ As itawajarrab iyyan daƷ-wan, ad wər annu: «Məššina a di-ijərraban», fəlas Məššina iman-net wər t-igərrəw jarraba n igi n ark əmazal, wala deƷ itajarrab awedan s igi-net. ¹⁴ Kalar akk awedan ləkkum y arak deranan-net a tu-tawaynen, har tu-səffətəqqən daƷ jarraba. ¹⁵ Arak deranan win, əntanəy a du-tawaynen igi n abakkad. Abakkad amaran, as innoda daƷ əwəl n aggadəm, a d-awəy təməttant ta təxlalat.

¹⁶ Ya imədrayan-in əknəx tara, ad wər tətəwəsudəfam alxata! ¹⁷ Əssənat as təhəkkut kul ta tolayat əd ta n təfərənt, Məššina di n Abba s ənta a imosan əmaxlak ən təfuk əd təllit d etran a tat-d-izazabben fəl aytedan. Wərmad itamattay, wala deƷ itaggu y edag-net agamad a das-tətəggu telay. ¹⁸ Arat irā a təmos tahakkay ta danaƷ-iga təməddurt ta taynayət s awal-net imosan tidət, a t-imosan Əlinjil, fəl ad nəqqəl šilat ən Ʒəfədda daƷ təxəllak-net šin ikfa təməddurt ta taynayət.

Imazalan n əzəgzan

Awal ən Məššina d əbərdəg

¹⁹ Ya imədrayan-in əknəx tara, səsəmat: əgmāya daƷ əkkulluk n awedan ad issərxəs əsəsəm, ayyu tararada n awal, wala irƷas alham-net. ²⁰ Fəlas awedan iha alham wər ifreg əmazal n awa oƷadan Ʒur Məššina. ²¹ DaƷ adi, mazzayat əd mazalan kul win kawan-samadasnen, əd təllabəst kul ta tətəmazalam, təqbələm əs

man lammodnen awal wa itawaggan daɣ wallan-nawan, ifrâgan a kawan-iɣlæs daɣ Jahannama.

²² Ad wær iqqəl âs əsəsəm ɣas a tətəggim y awal ən Məššina, amaran wær tətəmizilam s awa inna, təssəxrəkam iman-nawan s adi. ²³ Fəlas awedan wa isasaman ɣas y awal wa, amaran wær itəmizil s awa inna, wədi ola d awedan iššəgga daɣ šišset, ²⁴ izaggazda udəm-net, igla, ittəw-in daɣ tamazayt ten da awa dər ola. ²⁵ Mišan awedan wa iššəgga daɣ əššəriɣa ikmālan ən Məššina, s ənta a imosan əššəriɣa wa isadarfen, ittaf-tu, ad itamazal s awa inna, wær din-ittəw awas isla, awedan wədi ad abbalal daɣ awa itamazal.

²⁶ Kud ih-iwan awedan a ɣur iga as ittâf əddin, ənta wær innoda daɣ iləs-net, wədi iman-net a isaxrak. Amaran iduf-net əddin wær infa wala. ²⁷ Əddin wa zəddigan wær ila əlɣib dat Məššina di n Abba, imos-tu ad issən awedan daɣ gugelan win maɣatarnen əd tədoden šin as aba meddan-nasnat əddirarnat, igdəl deɣ i man-net a tu-təssəwər əddənət əlɣib waliyyan.

2

Ad wær tətəggim təmərıt

¹ Ya imədrayan-in, kawanay win əzzəgzannen s Əməli-nana, ɣaysa Əlməsix ilân tanaya, ad wær tətəggim təmərıt. ² Nənnə masalan, osan-kawan-du meddan əššin daɣ Əlkənisat-nawan. Iyyan za əməgğergəs as ədnaynat təsəndar n urəɣ idədwan-net, ilsa isəlsa əknanen šihussay, wa hadan amaran talaqqay ilsân irakkan. ³ As din-təgram aləs wa ilsan isəlsa win hossaynen, tənnam-as: «Mandam, edag da wa ofan, qam daɣ-as»; amaran aləs wa n tələqqay ənta tənnam-as: «Xa! Əbdəd den» madəɣ «qam daɣ amadal.» ⁴ Wərgəɣ əzənəməzləy a təgam aytedan-nawan əddi, təzzar isəkna adi as imazalan-nawan əlkâman y arak medranan-nawan?

⁵ Ya imədrayan-in əkney tara, səsəmat: Awak wərgəɣ aytedan win əlləqqawnen daɣ əddənət a isannafran Məššina fəl ad əqqəlan iməgğergas fəl aganna wa iqqalan əzəgzan-nasan, əqqəlan deɣ iməkkusa ən taɣmar tas iga arkawal-net y aytedan win t-əranen? ⁶ Eges kawanay tolkâm-tan. Awak wərgəɣ iməgğergas a kawan-ədgaznen, tawayyan-kawan s adag n əššəriɣa? ⁷ Awak wərgəɣ əntanay a tibudurnen esəm idkâlan n Əlməsix was tətawayrim?

⁸ Illikan as kud əsəndi a du-təgam əššəriɣa ən taɣmar ta n Məššina əs təməwit tas iktâb daɣ Əlkəttaban as: «*Agu y əšəqqay-nak tara ta təgeɣ i man-nak*» wədi təgâm a olâɣan. ⁹ Mišan kud təmərıt a tətəggim, wədi təgâm abakkad, ibâz-kawan əššəriɣa s əməzrəy wa tu-təgam. ¹⁰ Ənta awedan wa ilkaman y əššəriɣa ketnet amaran inagartattaf daɣ alwajib-net iyyanda, wədi əššəriɣa ketnet as t-imməzray. ¹¹ Fəlas wa innan «*Ad wær tagay əzzəna*» inna «*Ad wær tagay iman*» da. Daɣ adi, as təgeɣ iman n awedan, ad tammazrayəɣ əššəriɣa ketnet, kuddeɣ wær təgeɣ əzzəna. ¹² Adi a fəlas, aratan win təgannim madəɣ win tətamazalam taggiwat-asan igi daɣ təssânam as ilkâm daɣ-wan əššəriɣa wa isadarfen. ¹³ Fəlas əššəriɣa wær təha təhanint a z'itəwəggin y awedan wa wær təha təhanint. Əsəkni wa itaggu Məššina y aytedan təhanint ogâr abbaz wa tan-itaggu s əššəriɣa.

Əzəgzan əd mazalan

¹⁴ Ya imədrayan-in, ma z'aknu y awedan ad igannu izzigzan, ənta wær itəggu imazalan olaynen sitaddanen əzəgzan-net? Awak ifrâg əzəgzan wədi əlɣillas-net? ¹⁵ Nənnə masalan inay iyyan daɣ-wan amadrəy-net daɣ əddin madəɣ tamadrəy-net əzlâmnən madəɣ wær əlen a ətšan. ¹⁶ Awak ma dasan-z-aknu a dasan-annu: «Aglawat

day alxer, yawanat, talsim», ənta wər tan-ikfa aratan win as əddərarnat təxəswen-nasan? ¹⁷ Emmək di da za as, əzəgzan xas wər igda. Əzəgzan wa wər nətəwənəy əs mazalan olaxnen, wədi immut, wər infa wala.

¹⁸ Amaran as inna awedan: «Nak əzəgzan-in a fəl saffalla.» Inn-as iyyan: «Kay əzəgzan-nak a fəl təsaffalla, nak amaran imazalan olaxnen win tagga fəl saffalla. Sakn-i əzəgzan-nak da wala imazalan olaxnen, nak a kay-assaknağ wa-nin əs mazalan-in olaxnen.» ¹⁹ Wərgex təzzigzanax as Məşşina iyyanda? Təgex a olâğan, əssən z'âs Iblis da əzzigzan adi, amaran issindaw-tu taysəst. ²⁰ Xa əljahil wa, awak əgərri a din-wər-təgex as əzəgzan wər nəddew əd mazalan olaxnen, wər infa wala?

²¹ Məni əmmək was igrav amaraw-nana Ibrahim tişit n alxadil dat Məşşina? Wərgex əddəlil ən mazalan-net, alwaq wad ikfa barar-net Isəhaq y ad iqqəl tənagzamt i Məşşina fəl edag ən təkutawen. ²² Təhannayax? Əzəgzan-net iddew əd mazalan-net day arat kul wa itaggu. Imazalan-net a əssəkmalnen əzəgzan-net.

²³ Təxsal-du batu ta tənnat day Elkəttaban: «*Izzəgzan Ibrahim əs Məşşina, ikfay Məşşina taqqat fəl əddəlil n awen*», təzzar itawagg-as esəm: Əmidi ən Məşşina.

²⁴ Xasil, təhannayam as awedan əddəlil ən mazalan-net d əzəgzan-net a fəl t-ihakku Məşşina tişit n alxadil, wərgex əddəlil n əzəgzan-net xas.

²⁵ Rahab za ta n təkərwat ənta məni əmmək was təgraw taqqat dat Məşşina? Awak wərgex əddəlil ən mazalan-net alwaq wad təsammagarat inassasaman ən Kəl-İsrayil təsəlxas-tan day ahan-net, təzzəbaz-tan tarrayt iyyat əgmadan akal. ²⁶ Zund əmmək as təxəssa wər əhen man təmmût, əmmək di day as əzəgzan wər nəddew əd mazalan olaxnen ənta da immût.

3

Iduf ən tanat day iləs

¹ Ya imədrayan-in, a day-wan wər igatan əlfəqqitan fəlas təssânam as nakkanay win əlfəqqitan a danağ-itəwəggu əşşərixa labasan ogaran wa z'itəwəggin y aytedan win hadatnen. ² Fəlas ketnana nətinegərtəttif day tarrayen aggotnen; amaran kud ill-ay awedan as wər kala inagartattaf s a du-təgmad ark batu imi-net, awedan wədi, ikmâl, ifrâg iduf ən tanat day təxəssa-net ketnet.

³ Nətaggu ağaba day ays fəl a day-as nəttəf tanat, nəssuk-ay edag was nərə. ⁴ Ənəyat dəx aylal n aman wala ad ikna təzzəwwərt, ibât-tu ađu iknan assahat, da ašək iknân təmmədrəyt as t-itukurit awedan wa t-ewayan fəl aman, isadak-ku s as ira. ⁵ Adi da a iga iləs n aggadəm. Taslət əndərrat a imos day təxəssa, mišan aratan zawwarnen as ifrag igi n abarag-nasan. Zund as, arat ən tamantast təfrâg əsəbbələgləg n əgoras iknân təzzəwwərt! ⁶ İləs, ənta da temsay a imos. Wər t-illa əzzənəf ən talbast a tu-wər-nəha, isamadas şisəllad-nana kul, issirxa fall-ana temsay day əddənət wa n təhəwt-nana har iba-nana, amaran ənta iman-net temsay ta n Jahannama a tu-təsəbbalaglat.

⁷ Wər t-illa əzzənəf ən tawaqqast wala əgədid, wala əmudar imiraradan fəl amađal wala iyyan n aman as wər ifreg aggadəm əşinən-net, amaran işşonan-tan dəx. ⁸ Eges iləs, ənta wər t-illa awedan ifrâgan əşinən-net. Talbast a imos din-wər-ikka awedan d arat, amaran idkâr assam inaqqin.

⁹ Ənta as nətagg təmmalən y Əməli di n Abba-nana, ənta dəx as nəbayyak aytedan, as Məşşina a tan-d-ixlakan əs şaşşelan-net. ¹⁰ Imi iyyanda a du-gammadnat təmmalən igammad-t-id dəx abayak. Ya imədrayan-in, arat wədi wər imməkkan ad itaggu. ¹¹ Awak şat n aman iyyadda, taffayan-du day-as aman əzodnen əd win samomnen? ¹² Ya imədrayan-in, awak ašək ən fig itaraw zaytun, wala dəx itaraw

asab n alɣanab fig? Šat n aman za əganen tembay n əsalaɣ, ənta da wər tat-du-gəmmadan aman əzodnen.

Masnat ta n tidət

¹³ Məni-tu daɣ-wan wa imosan əmusan ila deɣ əgərri? Awedan wədi, assaknet adi s alxal olaɣan əd mazalan əgānen əs talmat ən man əd masnat. ¹⁴ Mišan kud kawanay iwallan-nawan manjaɣ labasan a tan-ihan, wər təgəmməyam ar tənfa ən man-nawan, wədi wər təhoram d igi ən baragan fəl masnat-nawan. Arat wədi isəbbəhəw a imos ən tidət ən Məššina. ¹⁵ Masnat tədi, wər du-təfel Məššina, kalar šin əddənet ta da. Šin awedan ilkāman i tara ən man-net d Iblis. ¹⁶ Fəlas id t-imal manjaɣ d agamay n awa infan iman ɣas, a t-iməl iba n ənəmənnək labasan d əzzənəfan kul n arak mazalan.

¹⁷ Mišan masnat ta du-təfalat Məššina, arat wa azzaran təga əs ši zəddigat. Awedan wa tat-igrawan, ira alxer, ləmmid, igarru, təkən-ay təhanint iguz, itaggu deɣ imazalan olaɣnen. Wər itəggu təmərit za wər tu-təha təlmənufəqa. ¹⁸ Amaran aytedan win maggan n alxer amasa imosan alxer a ənabalan təzzar ələyan-du tənfa təmosat aqqad dat Məššina.

4

Erruɣmatan aggotnen

Erruɣmatan fəl əkənnas

¹ Ma d-itawayan gar-ewwan šimazaɣen əd kənnasan? Wərgəɣ arak deranan-nawan əmmigarnen daɣ təɣəswen-nawan? ² Tətaggim attama n arat taqqamim wər tu-təgrewam. Təmosam imaggan ən man, təmosam deɣ inəmmənzaɣ, amaran wər təfregam agaraw n awa taram. Aratan win təgəmməyam-tan əs təmazəɣen əd kənnasan. Wər təlem awa taram, fəlas agamay a tu-wər-təgem daɣ Məššina. ³ Amaran kud daɣ-as tu-təgməyam da, wər tu-təgərrəwam fəlas əddəlil wa fəl daɣ-as tu-təgəmməyam a wər noleɣ, id wər təgəmməyam ār ark aratan win əran man-nawan.

Erruɣmatan fəl tara n əddənet

⁴ Xa inəmməzray ən Məššina! Masnat a wər təgem as, tara n əddənet gezzar ən Məššina a təmos? Daɣ adi awedan wa igan iman-net əmidi n əddənet, wədi azangaw ən Məššina a imos. ⁵ Məɣ ak təxilt a təgam as Əlkəttaban tənna ən bannan a əgan as: Məššina ikna tara n Infas wa daɣ-naɣ iga. ⁶ Mišan tara n Infas wa, togar-tat arraxmat ta danaɣ-ihakku. Adi a fəl ənnan Əlkəttaban: «*Məššina ɪrnâz y aytedan win əzzəzwarnen iman-nasan, amaran win əssərasnen iman-nasan arraxmat-net a tan-ihakku.*»

⁷ Daɣ adi bardagat i Məššina, təgdəlam iman-nawan y Iblis, a kawan-ugag. ⁸ Zənnəmihezət iman-nawan əd Məššina, a dər-wan inəmihez. Xa inasbakkadan, širədat ifassan-nawan daɣ igi ən bakkadan, təzzəzdəgam iwallan-nawan, təkəkəsam daɣ-san igi n aššak! ⁹ Əɣšədanet man-nawan, talim d aytedan a fəl təga təfəyyawt, təhallim. Təggəzet tala edag ən tadaza-nawan, təggəz təkenzert edag ən təfalawist-nawan. ¹⁰ Sərəsat iman-nawan dat Əməli, a kawan-idkəl.

Erruɣmatan fəl šizmit

¹¹ Ya imədrayan-in, ad wər təməl šizmit gar-ewwan. Awedan wa oɣaman amadrəy-net madəɣ issəwar-tu lahan, wədi əššəriɣa a oɣam, issəwar-tu lahan. Amaran awedan wa issəwaran əššəriɣa lahan, wədi ab'as ilkam y əššəriɣa, iqqal əmašraɣ ənta iman-net. ¹² Məššina ɣas a imosan Amašraɣ iɣattasan əššəriɣa, isafsu, ihallak deɣ. Kay ma təmosaɣ as təšaraɣa y iyyan awedan?

Erruyxmatan fəl zazwar ən man

¹³ Səsəmmat za, kawanay win ganninen: «Azalada madex tufat ad nakku aɣrəm mandâm, nag-in daɣ-as awatay nəgâ jola, nəgrəw riba.» ¹⁴ Ēnta kawanay wər təsənam wala ɣas awa dər kawan-du-z-ifaw! Wər təzlayam d əhu, s ad t-illa, mišan as z'agu arat n amazay, wər t-illa. ¹⁵ Edag n ad tannim: «Kud Ēməli irɗa, ad nəddər, nagu awa madex awa.» ¹⁶ Mišan əməredda ibaragan a tətəggim tədkâlam iman-nawan. Ibaragan za kul win šilat ən win di talbast a əmosan. ¹⁷ Daɣ adi awedan kul issanan əmazal wa olaɣan amaran iqqim wər t-iga, wədi abakkad zəwwəran a iga di.

5*Erruyxmatan fəl iba n əššəriɣa wa tamazalan məggərgas*

¹ Amaran kawanay iməggərgas, səsəmat-i: Əggəzat šin tala, təsəkkələlam fəl əddəlil n əlməssibaten šin kawan-d-əzaynen. ² Təgərgist-nawan tərka, isəlsanawan tətš-en təwəkay. ³ Urəɣ-nawan d əzrəf-nawan tətš-en tənək. Amaran tənək di da a fall-awan za taggayet, tatšu šiɣəswen-nawan zun tanat-tətša təmsay. Təššədawam təgərgist daɣ adan win, s əntanay a əmosnen təsəlkamt n əddənət. ⁴ Ēnəyat, alxaq ən məšəɣalan win təsəssalayam šiwəgas-nawan, isîɣarat fall-awan; amaran təkuraɣt-nasan, tewad Məššina di n Ēməli ən tarna. ⁵ Tənniflayam daɣ əddənət, təhâm tara ən man-nawan. Təsâdarem iman-nawan y əzəl wa n agazam. ⁶ Təbazam s əššəriɣa alyadılan ən Məššina a kawan-in-wər-nəkka d arat, təgam iman-nasan.

Innəsixatan aggotnen*Təzaydart daɣ alyazab*

⁷ Ya imədrayan-in, daɣ adi zəzzəydərat har d-asu Ēməli. Ēnəyat tewaylay a itaggu əmagyak i tənfa ta du-təgammadat tawagost-net. Əzəzzəydər a itaggu har təgrəw tawagost-net akonak wa azzaran əd wa ilkaman. ⁸ Kawanay da za, zəzzəydərat, tilem əwəl, fəlas assa n Ēməli ihôz.

⁹ Ya imədrayan-in, ad wər tətinəməššikam gar-ewwan ibəz-kawan əššəriɣa. Ēnəyat! Ēmašraɣ wər iggug, illa ɣur imi n ahan. ¹⁰ Daɣ batu ta təqqalat alyazab əd təzaydart, ya imədrayan-in əqqəlat aytedan olânen d ənnəbitan win əššəwalnen s esəm n Ēməli. ¹¹ Ēnəyat, a nəgannu aytedan win əlanen zəmmerat əbbilalan. Təslâm əlqissat ən zəmmerat n ənnəbi Ayuba, tənâyam deɣ təsəlkamt ta das-iga Ēməli, id Ēməli təkna-ay tara əd təhanint iguz.

Innəsixa daɣ batu ən təhuday

¹² Ya imədrayan-in, are daɣ-wan dat arat kul ad wər təhhadam gər za əs jənnawan wala s amaɗal wala s arat a iqqal. Ganniwat ɣas «Ayew» y awa imosan tidət, təgannim «kala» ɣas y awa tat-wər-nəmos fəl a kawan-wər-iwər abakkad, ibəz-kawan əššəriɣa.

Šiwatriwen i miranan

¹³ Awak ih-iwan i itayazzaban? Wədi aget šiwatriwen. Awak ih-iwan awedan ifilawasan? Wədi aget təmmalen i Məššina. ¹⁴ Awak ih-iwan awedan irinan? Issəgməyet imuzaran n Ēlkənisat a das-əttəran, əzwəyan-as widi s esəm n Ēməli ɣaysa. ¹⁵ Təwatray ta təgat s əzəgzan ad tassafsu əmiran wa fəl təga, izzuzəy-tu Məššina daɣ təwərna. Wala ad imos as ibakkadan a sər-əs tat-d-ewaynen, a das-ətəwəsurəfan. ¹⁶ Daɣ adi, tinəməmilat gar-ewwan ibakkadan-nawan, tutabam daɣsan, ad tətinəməggim šiwatriwen fəl ad təzzəyam. Təwatray təglâyat n awedan oɣadan təh-et tarna tagget əd tənfa.

¹⁷ Ilyas, awedan a imos ən šilat-nana. Iga tawatray a daɣ iglây a igdalan y akonak ewet. Təzzar iga akonak karad elan əd sədisat təlil wər itteb fəl amaɖal. ¹⁸ Dəffər awen ittar, ifay-du akonak daɣ jənnawan, ikkas-du amaɖal tənfa-net.

Batu ən məzzəgzan win əxraknen

¹⁹ Ya imədrayan-in, as ixrak iyyan daɣ-wan igmad tidət, issuxəl-as-tat-du əmidi-net, ²⁰ təssənam as, awedan wa d-issoɣalan anasbakkad, ikkas-t-idu daɣ axarak wa iga, wədi iman a d-issəfsa daɣ təmattant, eway-du deɣ təsureft ən bakkadan aggotnen.

Širawt ta tazzarat iktab Butros

Šihulawen

¹ Awa nak Butros imosan anammazul ən Ƴaysa Ǝlməsix, a din-ihulan iməzzəgzan win wazawaznen, əmosan iğərab dağ kallan ən Fontəs, əd Galatəya, əd Kabadokəya, d Asəya, əd Bitinəya. Isinafran-tan Məššina ² di n Abba harwa dat alwaq əs masnat-net d ənnizam-net. Ig-en aytedan a sər-əs əskâtnen s əssəbab n Infas wa Zəddigan, fəl ad abbardagan i Ƴaysa Ǝlməsix, təwəzəzdəgan deɣ s əzni-net. Məššina ya təzizabbe-du fall-awan arraxmat, d alxer wər nəla əddukad.

Tiŝit n əlməsixi

Agoda i Məššina attama wa danax-ikfa

³ Təmmal i Məššina di n Abba n Ǝməli-nana Ƴaysa Ǝlməsix. Təhanint-net wər nəla əddukad as danax-iga aytedan əgânen təhəwt taynayət, fəl ad nagu təməddurt təgât s attama ittiddan, s əssəbab ən tanakra ən Ƴaysa Ǝlməsix dağ təməttant, ⁴ nəgrəw deɣ təkəsit n arət wər nətəməndu, wər itəmədis, za wər itəbəkəssit, a dawan-itiwagazan dağ jənnawan. ⁵ Kawanay a ogaz Məššina əs tarnə-net, fəlas əzəgzan a təgam, fəl ad təgrəwam efsan. Efsan win isimatak-kan Məššina fəl ad təwəgrəwan dağ azzaman win əğrud n əddənet.

⁶ Isəffəliwəset-kawan awen, kuddeɣ as əmərədda ihhišsal a kawan-zəzzəkənzəran jarrabatan əmosnən əzzənəfan, mišan ya awen wər z'ihag. ⁷ Jarrabatan win, əntanay a sataddinen assahət n əzəgzan-nawan ogaran urəɣ almaqam. Urəɣ iman-net wər iğləl, amaran temsay a dağ itawaggu fəl ad itəwəssən kud imos wa n ələsəl wala. Ǝzəgzan-nawan da za kundaba itawajarrab. Əddi amaran, assaɣa wa du-z-azzabbat Ƴaysa Ǝlməsix, itəwəsənəfiləl y əddənet ketnet, ad təgrəwam təmmalen d ədkul əd saɣmar, s əssəbab n assahət n əzəgzan-nawan. ⁸ Ƴaysa Ǝlməsix tərâm-tu təzzigzanam sər-əs da wər tu-tənayam harwa da. Awen dağ a fəl təgam təfalawist as tu-wər-illa i ifragan emel-net za wər tu-təlla tulat-net. ⁹ Təfalawist tədi təgâm-tat fəlas aggad a təgam əlməxsud n əzəgzan-nawan, a t-imosan agaraw n efsan.

¹⁰ Efsan win di, əyyəwanan ənnəbitan win əmalnən arraxmat ta dawan-z-əgu Məššina agamay d əgərri-nasan. ¹¹ Ǝdgâzan wəllen dağ ad əssənən awa mosan azzaman d alxalaten, win z'assakninen awa imal Infas n Ǝlməsix. Infas wa, illa ɣursan kala da; amaran imâl-asan alɣazab wa z'əgu Ǝlməsix əd tanaya ta du-za-təlkəmat y awen. ¹² Isannafalal Məššina y ənnəbitan as isalan win d-əgrawan den, wərgəɣ əntanay a d-əkkan, kalar kawanay a d-əkkan, iwâr-tan a dawan-tan-əgin. Isalan win əntanay a dawan-əmalan məssəsəɣra win sasəɣrinen Ǝlinjil əs tilalt n Infas wa Zəddigan. Infas wa, ijənnawan a dağ d-itawasagla. Ǝlinjil, angalosan da sidaranan wəllen masnat-net.

Alxal wa issəɣmaran Məššina

¹³ Dad zamas tayttay-nawan təsimatag y əššəɣəl, təttafam deɣ alwasat dağ arət kul, wədi agiwat attama-nawan ketnet dağ arraxmat ta za təgrəwam ɣur əzəbbi ən Ƴaysa Ǝlməsix d ənəfilal-net y əddənet. ¹⁴ Bardagat y Ǝməli-nawan, awa taggin bararan y abba-nasan, tammazzayam d arak deranan win as kala a tan-tətaggim harwa ad təmosam aljahilan. ¹⁵ Ǝmmək was zəddig wa kawan-d-iğran əs man-net, əmmək en dağ as kawan-iwar ad izdag alxal-nawan kawanay da, ¹⁶ Fəlas iktâb as: «izdagat, fəlas nak əmizdag a mosa.»

¹⁷ Amaran dad zamas təgənnim dağ təwətriwen-nawan «Abba» i wa wər nəzlay aytedan, kalar ixakkam akkiyyan dağ-san əs mazalan-net, dağ adi agiwat təməddurt

a daḡ tək sudam Məššina daḡ azzaman win əmərədda, a daḡ təmosam inaftaḡan daḡ əddənet. ¹⁸ Alxal wa dawan-d-oyyan marawan-nawan wər infa wala. Təssānam as Məššina irzām əlqim zəwwəran y a kawan-d-ikkəs daḡ anamod ən təməddurt wen. Amaran inazzan win den, wər əgen s əzrəf, wala urəḡ a mosnen aratan tamandinən, ¹⁹ kalar azni ilān almaqam wəllen n Əlməsix as əgan. Azni wa, iha əlmital n əzni n ajaḡol wər nəga əlḡib. ²⁰ Əlməsix təga fall-as masnat dat əxluk n əddənet, amaran itawasanafalal daḡ azzaman win əlkammen a fəl əddəlil-nawan. ²¹ Əddəlil-net a fəl təzzəḡzanam əs Məššina s ənta t-id-issənkaran daḡ təməttant ikf-ay tanaya. Adi a d-ewayan as təzzəḡzanam əs Məššina təgam daḡ-as attama-nawan. ²² Təzzizdagam iman-nawan s əbərdəḡ wa təgam i tidət fəl ad tagim ənəmərə igān s əwəl iyyanda, awa taggin mədrayan. Daḡ adi akniwat ənəmərə əs wallan zaddogən. ²³ Əssənət as təhəwt taynayət a təgam təlāt ələsəl iḡlālan, wərgəḡ təhəwt ta n aggadəm təmosat arət wər nəḡləl. Kalar awal ən Məššina iḡlālan ihakku təməddurt a imosan ələsəl ən təhəwt ta təgam da. ²⁴ Id iktāb as: «*Aggadəm wər izlay əd yel, tanaya-net deḡ ketnet wər təzlay əd təjigay ən yel. Yel amaran taḡart a itag tərtək təjigay-net,* ²⁵ *mišan awal wa n Əməli ənta, ill-ay, iḡlāl.*»

Amaran awal wen Əlinjil wa dawan-ittəmalan a t-imosan.

2

Awa təmos tamattay ta n Məššina

¹ Daḡ adi sənnəməḡḡəḡat iman-nawan d a imosan əzzəngu, əd təkərras, əd təlmənufəqa əd manjaḡ, d əzḡən. ² Awal ən Məššina zun ax wər nəqḡer a dawan-imos. Agiwat-as tara ta taggin bararan əs səket əhəwan y əx, fəl a kawan-issəd wəl daḡ tišit-nawan əlməsixitan. ³ Tara ten da a das-za-tagim as imos as «tənayam kawanay iman-nawan awa dər oḡda əlluḡ n Əməli.»

⁴ Zənnəmihezət iman-nawan d Əməli s ənta a imosan təhənt təddarat, tas aytedan za əḡaran-tat-in, ḡur Məššina amaran ənta a təmosat təhənt ta tənəfranat təla almaqam. ⁵ Dad zamas kawanay da təmosam zun təhun əddarnən, itawakras sərwan ahan n əlḡibada ən Məššina əs tilalt n Infas wa Zəddigan, wədi təqqalam ilimaman zaddogən hakkinən šikutawen šin imal Infas wa Zəddigan s əntanata y a əgraznən i Məššina əs tarrayt ən ḡaysa Əlməsix. ⁶ Ənta Məššina inna daḡ Əlkəttaban: «*Ənəyat, əssinsa daḡ Səyon təhənt ta təkəbbalat ehan, tənifranat, təlat almaqam. Wa sər-əs izzəḡzanan, wər z'ikərukəd.*»

⁷ Daḡ adi kawanay a əzzəḡzannən, təkfiwan təhənt ta ətəwəsəḡmar. Aytedan amaran win wər nəzzəḡzan əssənənet as: «*Təhənt ta din-əḡaran makrasan, ənta a təqqalat təhənt ta təkbalat ehan.* ⁸ *Amaran təhənt ta təmos təsənkəft y aytedan, tətagadl-en.*»

Təhənt ten nəkkafan-as aytedan, tətagadl-en, fəl tuḡəyt ta əgan s ad əzzəḡzənan s Awal ən Məššina, amaran tuḡəyt ten da a dasan-tətawatasat.

⁹ Kawanay amaran:

«Tawšət tənifranat a təmosam,
tiddawat ən limaman ən Məššina di n Əmənokəl,
təmosam harwa da aḡrəf iskatan əs Məššina,
təmosam deḡ tamattay-net.

Ikkas-kawan-du
fəl ad təmmalam igitan simaklalnən,»

win iga id ənta a kawan-d-iḡran daḡ šiyay, ig-iwan daḡ ənnur-net isinahalan əmələwələw. ¹⁰ Kawanay dat awa, wər təmosam fadda tamattay, amaran əmərədda təqqalam tamattay ən Məššina. Dat awa wər təḡrewam əhənətta fadda, əmərədda amaran təḡrawam-tu.

Alxal wa iwaran əlməsixitan

Alxal wa iwaran əlməsixitan gar-essan d aytedan

¹¹ Imaran-in dad zamas əddənet a inaftaxan əd xərab a daɣ-as təmosam, wədi onsâyaq-qawan ad tənəməggəgam d arak deranan win aggadəm, fəlas əntanay a əmosnen izənga n əzəgzan-nawan. ¹² Ad wər tammazzayam d alxal wa olayan dat aytedan win wər nəksud Məşşina. Əddi as imos as sawaran-kawan bahutan ən tişit ən nəsgufa, iman-nasan as z'ənəyan igitan olaynen win tətəggim daɣ anamod wen, awəy-du sər-san awen saɣmar n Əməli əzəl wa du-z-asu. ¹³ Bardagat i muzaran-nawan kul fəl udəm n Əməli, gər əmənokal s ənta a ixkaman fəl arat kul, ¹⁴ wala deɣ inaxkiman-net win d-izammazal imos əşşəxəl-nasan əwəddəb n aytedan win tagginen təkma, əd tahakkay n almaqam i win tamazalnen awa olayan. ¹⁵ Məşşina a ira ad tətəggim awa olayan fəl ad tədbəxam imawan n ark aytedan n aljahilan. ¹⁶ Agiwat alxal ən lallan, mişan əlləllu-nawan a tu-wər-tagim arat a daw təssolamam aşşar, kalar taggiwat imazalan n as təmosam eklan ən Məşşina. ¹⁷ Səxmərat aytedan kul. Iriwat imədrayan-nawan kul daɣ əzəgzan. Iksadat Məşşina, təssəxməram imənokalan-nawan. ¹⁸ Eklan, bardagat i məssawwan, tagim-asan saɣmar kul wa kawan-iwaran, gər za əmosan aytedan olaynen, lammodan, wala deɣ əmosan ark aytedan labasnen, ¹⁹ fəlas arraxmat a imos ad izmər awedan, izəzzəydər d alɣazab imosan tādłəmt, as imos əs təkatawt ən Məşşina a fəl iga awen. ²⁰ As imos as təgeɣ abakkad, ma imos aroz wa za təgrəwa daɣ əzəzzəydər d attadib n awen? Mişan ya as imos as təmosaɣ awedan itamazalan awa olayan, amaran təzmâra y ətəwəzəxəzzab imosan tādłəmt, wədi əssən as arraxmat a təgrəwa xur Məşşina.

²¹ Awalla, ənta da da awas tətəwəxram, fəlas Əlməsix iman-net da iɣxizzab fall-awan, oyy-awan-du almasal, fəl ad təkəmam y awa iga. ²² Əlməsix amaran, ənta as wər kala ad iga abakkad, za wala iga bahu y awedan waliyyan. ²³ Ənta a iyyəwanan ətəwərbad, mişan wər izzəzal. As itawazaɣazzab, wər iga arak batu y awedan waliyyan, kalar talxa-net kul as tat-iga daɣ əfus n Əmaşraɣ wa Oɣadan a t-imosan Məşşina. ²⁴ Ənta deɣ a itawataytayan fəl təgəttawt, idkal ibakkadan-nana, nəga əd bakkadan ənəməggag wa təga təməddurt əd təməttant, fəl ad nagu təməddurt a daɣ noxâd. Daɣ adi Əlməsix ənta a kawan-izzozayan əs busan win daɣ-as tawagganen. ²⁵ Əstizarat təmosam zun ayfəd əssiggalnen, mişan əmərədda təqqalam-du amadan-nawan, s ənta a imosan əmagaz ən man-nawan.

3

Alxal wa iwaran əlməsixitan daɣ azalaf

¹⁻² Kamatay deɣ şidoden, bardagmat i meddan-nakmat. As təgamat adi, kud imos as wiyyad daɣ-san wər əzzəgzanan s awal ən Məşşina da, as hannayan alxal-nakmat olâx zəddig, hannayan deɣ saɣmar wa dasan-təgamat, a sər-san d-awəy awen əzəgzan da wər dasan-təşşewalmat. ³ Ad wər əqqəlnat təhussay-nakmat arat iwâran azzahir xas, a du-wər-eway ar əzzənəfan ən latafan wiyyad əmmittaynen, madəx uɣənan n urəx, wala şibəddəx əknanen əzzəwi. ⁴ Kalar əgməymat şihussay şin əxbarnen daɣ əwəl, s əntanatay a wər nəgəmməd, əmosnen talmat d əsənsi ən tayttay. Şihussay den da şin əknanen təla n almaqam xur Məşşina. ⁵ Ənta den daɣ əmmək was dallagnat tədoden şin dat awa a əskatnen əs Məşşina əgânat daɣ-as attama-nasnat, əbbirdagnat i meddan-nasnat, ⁶ zun Sarata, s awa təga y Ibrahim daɣ əbərdəg, a das-təgannu: Məşşi. Əmərədda kamatay a mosnen şibararen-net, as imos as tətamazalmat awa olayan a daɣ wər toyyemat iman-nakmat təggəz-kamat tasa n arat waliyyan. ⁷ Kawanay deɣ meddan agiwat i tədoden-nawan tidawt təgât s ənəməsəsəgra, a daɣ təssânam fəl tişit a əgânat tədoden şinərkam. Səxmərat-tanat,

fêlas têdrawam dêr-êsnat têkasit n arraxmat têmosat têmêddurt. As dasnat-têgam adi, wêr t-illa a z'inkêfan i têwatriwen-nawan.

Alxal wa iwaran êlmêsixitan gar-essan

⁸ Xasil iliwat tayttay iyyadda, tilem tafreÿt i têkmawen n aytedan kul. Êqqêlat aytedan a daÿ teggêt tara ta têllat gêr mêdrayan d êlluÿ d iban zazwar ên man. ⁹ Ad wêr têzazalam daÿ aytedan win dawan-tagganen têkma wala takaggaran-kawan. Kalar tattarat-asan a dasan-igan arraxmat, fêlas awen da as têtawaygram s a tu-têtaggim, fêl ad têqqêlam imêkkusa ên maruzat ta dawan-tênsat. ¹⁰ Ênnan Êlkêttaban:

«As ira awedan ad igrêw têmêddurt a daÿ iddêwat,
ifaw-du fall-as ijilan a daÿ inniflay,
wêdi agêzet ilês-net daÿ têkma,
igdêl-as êllêfêd n awa imosan êikêrras.

¹¹ Isênnêmêggêget iman-net êd têkma,
ad itamazal awa olayan.

Igmêyet alxer; îêêikêl daÿ-as.

¹² Amaxlol iswêd daÿ aytedan win oÿadnen,
amaran iqabbal êiwatriwen-nasan.

Amaran win êêêokalnen daÿ têkma, akyud a tan-iga.»

Alxal wa olayan êttêlal n Êlmêsix a t-imosan

¹³ Awak ma imos wa dawan-z-agin têkma as imos as têsigatakkem daÿ êmazal n awa olayan? ¹⁴ Amaran as imos as affaw-du fall-awan êzêl iyyan a daÿ têÿÿizzabam fêl as têmmoalam awa oÿadan, wêdi têbbilalam!

Ad wêr tiksadam awa êksudan aytedan,
amaran ad wêr êÿêdan man-nawan.

¹⁵ Zêzwêrat daÿ wallan-nawan Êlmêsix imosan Êmêli, tardim as ênta a imosan Êmizdag. Sêmmutêgat faw y êsêssêgri n awedan kul wa kawan-issêstanan daÿ batu n attama wa têgam. ¹⁶ Awen amaran agiwat-tu ês talmat êd saÿmar n aytedan. A tu-wêr-imêl arat waliyyan a daq-qawan têha têrêk. As iga adi edag iman-net wa daÿ sêr-wan tawagginat batuten êbrarnen, a daÿ-as kêrukêdan aytedan win jajargannen alxal olayan wa têgam daÿ tassaqa-nawan d Êlmêsix, ¹⁷ fêlas ofa ad aÿÿazzab awedan itamazalan êlluÿ, as imos as awen daÿ a ira Mêêêina, y ad aÿÿazzab awedan itamazalan têkma. ¹⁸ Êlmêsix iman-net iga alÿazab iyyanda, aba-tu fêl bakkadan n aytedan. Ênta wa n alÿadil, aba-tu fall-awan kawanay a wêr nêÿdel, fêl a kawan-izênnêmihêz êd Mêêêina. Têmattant ta n têÿêssa-net a iga, miêan iddar-du ês tarna n Infas Wa Zêddigan. ¹⁹ Amaran tarna n Infas wa Zêddigan as igla Êlmêsix iga têlxutbat i win êhanen alaxirat êÿfêlan. ²⁰ Aytedan win êntanay as kala ad êffêllagan ês Mêêêina daÿ azzaman ên Nux. Azzaman di izizaydar Mêêêina iqqêl y ad iÿrêd Nux akaras n êÿlal-net. Êttam aytedan ÿas a êggaznen aÿlal wen êragan-du daÿ akonak wa n Nux. ²¹ Arat wen êlmital a imos n alamay daÿ aman was ênta a kawan-issêfsan êmêrêdda ês tarna tas d-inkar ÿaysa Êlmêsix daÿ têmattant. Alamay wa wêrgêÿ êêirêd ên êiday fêl têÿêssa a imos, kalar igi n arkawal dat Mêêêina ês man wêr têha têrêk waliyyat a t-imosan. ²² Illikan as ÿaysa Êlmêsix a d-obazan ÿur êgêzzêÿ-net ês jênnawan, iqqim daÿ êÿil ên Mêêêina, angalosan, êd têmênikêla kul êd taÿmaren kul êbbirdagan-as.

4

¹ Daÿ adi, dad zamas Êlmêsix da taÿêssa-net tênêÿ alÿazab, kawanay da sêmmutêgat y arat zun wen da. Fêlas awedan wa iÿêzzaban ês têÿêssa-net daÿ

anamod wen, wædi immizzay æd bakkadan. ² Awen day a fêlas a obazan ħur azala, ad wær tælêsam ſiyyit æn man-nawan tælkamam i deranan win aggadæm, kalar ælkæmat i tara æn Mæſſina day awa din-iqqiman day tæħerras-nawan. ³ Igd-awan awas kala tu-tægam, imosan awa æran aytedan wær næssen Mæſſina. Wær tæzlayam a tæmmozalam, tætaggim arak deranan, tæmosam imaſwan n esmad. Tætaggim tettay tagget, æd tassay tagget, tæħbâdam æssenæman æmosnen arat issiksadan. ⁴ Amaran ark aytedan win isimaklal sær-san as dasan-wær-tælkemam day arak mazalan win taggin æmosnen æsæssikæy aggen day tæmazræyt, æqqiman amaran ħaſſadan-awan esæm. ⁵ Kundaba æbdadan fæl mazalan-nasan dat wa isammatagan y ad iſræħ win æddarnen æd win aba. ⁶ Awen day a fêlas win æmosnen inæmmættan æmæredða, da itiwamal-asan Ælinjil. Arat wen itiwagg-asan fæl ad awwaddaban æs tæmæwit tas tawaddaban aytedan day æddænet, agin deħ dæffer awen tæmæddurt a day innoda Infas wa Zæddigan æs tæmæwit ta ira Mæſſina. ⁷ Tæzæræst n æddænet tæhöz. Æqqælat aytedan ælanen æzzæbun tannadim day man-nawan, fæl ad tæfrægam igi æn tæwatriwen. ⁸ Zuzærat y arat kul ænæmæra aggen gar-ewwan, *fêlas tara, ænta a tæħakkit tæsureft æn bakkadan aggotnen.*

⁹ Æqqælat aytedan iha amagaru gar-ewwan æs man ærdânen. ¹⁰ Akkiyyan day-wan agiwet i win hadatnen tænfa æs tæħækkut ta tægrawam s arraxmat æn Mæſſina. Emmæk di da as za tæqqælam inæħlifan olaħnen n arraxmaten aggotnen ſin dawan-iga Mæſſina. ¹¹ I day-wan iſſewalan, aget awal n as Mæſſina a t-id-izammazalan. I day-wan idahhalan imidawan-net, idhælet-tan æs færregat ta danæħ-ihakku Mæſſina fæl ad itæwæsæħmær Mæſſina day arat kul, æs tarrayt æn Ĥaysa Ælmæsix. Ænta a ilan tarna, æd tanaya har faw! Amin!

Allam fæl man d ænnæsixa y aytedan day azzaman win alħazab

Alħazab fæl Ælmæsix

¹² Imaran-in, ad wær æqqænan ħafawan-nawan i tæmsay n alħazab ta kawan-tæhat æddi tæmos jarraba-nawan, a das-wær-tagim iduf n as igraw-kawan arat immittayan. ¹³ Kalar isæffæliwæset-kawan as tædrâwam d Ælmæsix alħazab, fæl ad taknim tæfalawist æd tædæwit assaħa wa du-za-tænæfilæl tanaya-net.

¹⁴ Tæbbilalam kawanay win tawarbadnen fæl as kawan-ila Ælmæsix id Infas wa ilan tanaya, a t-imosan Infas æn Mæſſina, a dær-wan iddewan. ¹⁵ A kawan-wær-iggæz i iħħizzaban fæl igi æn man, wala ſikra, wala tiſit n anasgafa, madæħ awedan itaggazan ſiħawſiwen a tu-wær-næqqel. ¹⁶ Miſan as tætaħazzabam fæl tiſit n ælmæsixitan, a kawan-wær-isækkærukæd awen, kalar sænnæmælat fæl Mæſſina, fæl awer wa kawan-iga esæm n Ælmæsix.

¹⁷ Fêlas alwaq ewad-du wa day z'antu æſſæriħa, amaran tamattay ta n Mæſſina as inta. Day adi dad zamas nakkanay as issænta æſſæriħa-net, ma dær za talu tæsælkamt æn win wær næzzægzan s Ælinjil-net? ¹⁸ Ænnan Ælkættaban: «*Dad zamas aytedan win oħadnen da gærrid as z'afsin, ma dær z'alín win wær næksud Mæſſina æſſokalan day igi æn bakkadan?*»

¹⁹ Day adi win taħazzabnen day æddænet fæl as æmmozalan tara æn Mæſſina, aginet iman-nasan day tæħlift n Æmaxlak n ækkulluk n arat, s ænta a imosan alħadil, aglin day æmazal n awa olaħan.

5

Tizart day Ælkænisat

¹ Æmæredða ad agæħ ænnæsixatan ækkânen win day-wan æmosnen imuzaran n Ælkænisat. Æſſewalaħ-asan s esæm æn tiſit-in æmuzar nak da, ſilat-nasan, æmosa deħ tægæyya n alħazab n Ælmæsix, æddewa dær-æs deħ day tanaya ta du-za-tænæfilælat.

² Ʒd̄ənat eharay wa kawan-issəɣlaf Məššina. Ʒssənat daɣ-as s a wər nəmos əššil, kalar əs man ərđanen s əmmək was ira Məššina. Ad wər tətəggim adi fəl tara n əddənet, kalar taggiwat-tu s əwəl iglayan. ³ Ad wər tətəggim adi s əddəguz ən məzzəgzan win kawan-tawasaylafnen, kalar agiwat-as igi a daɣ təmosan almasal olayan i tamattay ən Məššina. ⁴ Ʒddi assayə wa du-z-inəfiləl əmuzar ən madanan n əlməsixitan, ad təgrəwam maruzat təmosat təkəbbut ən tanaya wər nətəməndu. ⁵ Ʒmmək en daɣ as əɣrəɣ aytedan win əmosnen təmmədrəyt s ad abbardagan i muzaran n Ʒlkənisat. Daɣ tassaɣ ta təgam, əqqəlāt aytedan əssirasnen iman-nasan, gar-ewwan, fəlas a ənnan Ʒlkəttaban: «*Məššina ɪr̄nâz y aytedan win əzzəzwarnen iman-nasan, amaran win əssərasnen iman-nasan arraxmat-net a tan-ihakku.*»

⁶ Sərəsat iman-nawan dat Məššina di ən Məššis ən tarna, fəl a kawan-izzəzwər alwaɣ was otas. ⁷ Agiwat talɣiwen šin kawan-əššəwəšnen kul daɣ təɣlift ən Məššina, fəlas ənta a daɣ-wan issanan. ⁸ Ʒqqəlāt aytedan ənnodanen daɣ man-nasan, tənəkədam. Azangaw-nawan Iblis, itixələyɣələy-kawan zun ahar ihhirnanan, igammay i ijalaqqat. ⁹ Ʒgdəlāt-as iman-nawan, s ad təsəggətəkkem daɣ əzəgzan. Təssānam as imədrayan-nawan daɣ əzəgzan, taggin alɣazab olān əd wa da tətəggim əddi daɣ adag kul wa əhan daɣ əddənet.

Igi n attama daɣ Məššina daɣ alɣazab

¹⁰ Məššina di n Ʒməggi n arraxmat, s ənta a kawan-d-ixran əs tanaya-net təɣlalāt daɣ tassaɣ d Ʒlməsix, ənta iman-net as dawan-italam fəl man, isisuhit-kawan, ihakk-iwan fərregat n ad təzəzzəwem daɣ əzəgzan, dəffər as təgām arat ən tamert n alɣazab. ¹¹ Ʒnta a ilan tarna har faw! Amin!

Šihulawen šin əlkammen

¹² Ʒgəɣ-awan-in arat ən batuten šin əssiktaba Silfanus imosan amadrəy-nana n alɣadil, əmosnat ənnəsixa y-awan, əd təgəyya y-awan as arraxmat ən Məššina ta n tidət, ənta əddi da təgrawam əddi təzizawem daɣ-as. ¹³ Təhul-kawan-in Ʒlkənisat ta n əɣrəm ən Babəylon, as Məššina a tat-isannafranan zun awa dawan-iga. Barar-in Markus da ihul-kawan-in. ¹⁴ Nəsəsləmat ketnawan əs təzələmma šin tinəməggin mədrayan. Ig-awan Məššina alxer ketnawan kawanay a ərtaynen d Ʒlməsix!

Širawt ta n sanatat iktab Butros

Šihulawen

¹ Awa nak Simxon Butros, wa n əkli d anammazul ən Ƴaysa Elməsix, a din-ihulan aytedan kul win əgrawnen əzəgzan ilân almaqam zun wa nəgraw. Əzəgzan wa, nəgraw-tu əs taqqat n Əməli-nana, n Ənəssefsi-nana Ƴaysa Elməsix. ² Ig-awan Məššina arraxmat d alxer wər nəla əddukad, əs masnat ta təgam Məššina, d Əməli-nana Ƴaysa!

Ətəwəxra n əlməsixitan d ətəwəsənəfran-nasan

³ Əgeç-awan təwatray tədi fəlas tarna ən Məššina as danax-ihakku arat kul was nəddərar y ad nagu təməddurt a daq-qu nəksud. Ənta a danax-iknan əsusən ən wa danax-ixran əs tanaya-net d əlluç-net. ⁴ Əssəbab ən tanaya-net d əlluç-net əntanay as nəgraw arkawalan win ogarnen təla n almaqam, ogaran dəç təzzəwwert. Arkawalan win, təgrawam-tan fəl ad tagim alxal wa d-ifalan Məššina, tənəməggəgam d arat kul wa ihallakan a du-tawayan arak deranan n əddənet. ⁵ Fəl əddəlil n awen dəç as, agiwat awa təfragam kul fəl ad təssərtəyam əzəgzan-nawan d əlluç, təssərtəyam əlluç əd masnat, ⁶ təssərtəyam masnat d ənudi dəç wallan-nawan, təssərtəyam ənudi dəç wallan-nawan əd zəmmerat, təssərtəyam zəmmerat əd təksəda ən Məššina, ⁷ təssərtəyam təksəda ən Məššina əd təmmədrəyya gar-ewwan təssərtəyam təmmədrəyya əd tara. ⁸ As dəç-wan d-əndan aratan win di, əqlan tittəyan dəç-wan, ad təqqələm aytedan təha tənfa tətittəy dəç-san masnat n Əməli-nana Ƴaysa Elməsix. ⁹ Mišan awedan wa dəç du-wər-ənden aratan win di, wədi ola d əmədderçəl. Əgərri-net wər fərur, ittəw-in fadda as itiwazazdag dəç bakkadan-net win ərəwnen.

¹⁰ Awen dəç a fəlas əgmâya dəç-wan imədrayan-in, ad taknim əddəguz wəllen, təsəssuhem təçaray ta kawan-iga Məššina, d əsənnəfrən wa kawan-iga. Fəlas arat wədi as tu-təgam, wər dawan-ilkem ad tudâm dəç a imosan təkma. ¹¹ Əmmək en dəç as za tagim agaraw ikmalan y iguz ən təçmar təçlalət n Əməli-nana, s ənta Ənəssefsi-nana, a t-imosan Ƴaysa Elməsix. ¹² Ənta da da əddəlil wa fəl kawan-du-saktaç har faw aratan win, kuddeç as təssānam-tan kala da təzizawem dəç tidət ta təttafəm. ¹³ Mišan iket əheç əddənet iwâr-i a kawan-du-sakta batu ta fəl ad tənçadam. ¹⁴ Fəlas dəç awa di-isannafalal Əməli Ƴaysa Elməsix agamad-in əddənet ihôz wəllen. ¹⁵ Mišan ad agaç awa əfraga kul y ad iqqəl as dəffər təməttant-in da, ad taglim təkattim-du aratan win har faw.

Tanaya n Elməsix d awa ənnan Ənnəbitan

¹⁶ Amaran əssənət as wərgəç imayyan a du-tiwanzammen əs təla ən tayttay tagget as nəlkam, nəsusun-kawan sər-san fəl tarna n Əməli Ƴaysa Elməsix d assa-net. Kalar adkul-net a nənay əs şittawen-nana. ¹⁷ Fəlas igraw ətəwəşəçmar əd tanaya çur Məššina di n Abba. Aratan win igraw-tan assaçə wad isla y əməsli isinnahalan təla ən tanaya, as das-inna: «Wa, ənta a imosan barar-in wa əkneç tara, ikna əsəffəliwəs ən man-in.» ¹⁸ Əməsli wa nakkanay iman-nanaç as das-nəsla as d-igmad ijənnawan, assaçə wad nəddew d Əməli Ƴaysa fəl ədçaç wa zəddigan.

¹⁹ Awa dawan-ənneç əddi, ittəy-du fall-as awal n ənnəbitan s ənta a ihoran wəllen d ətəwəzəgzan. Əmazal wen, təgām tanat tolâçat as sər-əs təzzəgzanam, təssəçmaram-tu, fəlas iha əlmital a ən fətəla təbilazlat dəç adag əhānat šiyyay, har d-assarrat azal, isəmmələwləw Elməsix imosan atri wa n tifawt iwallan-nawan.

²⁰ Arey a kawan-əssusənax təzzar as wər t-illa awal n ənnəbitan ihân Əlkəttaban as

ifrag ənnəbi a t-id-inzəm gar-es əd man-net. ²¹ Fəlas wər t-illa awal n ənnəbitan imosan arat a d-ifalan aggadəm wala ewâl s awa ira aggadəm. Kalar Infas wa Zəddigan a d-igan daɣ wallan n aytedan as əmməgradan s awal a d-ifâlan Məššina.

2

Aytedan win sasaxrinen bahutan

¹ Kala ad əhan ənnəbitan ən bahu tamattay n Israyil. Əmmək en daɣ as kawayay da a daɣ-wan t-əməlan musanan sasaxrinen bahu, a daɣ-wan du-z-əssədnen əs təkərras masnaten saxraknen, a du-tawaynen ahluk, har as ad unkaran Əməli wa tan-isaddarfan; awəy-du sər-san awen ahluk ən man-nasan a fall-asan du-z-əgin əzəbbi a tan-iɣdâran. ² A dasan-əlkəman aytedan aggotnen daɣ igi ən mazalan win ogarnen taxxaramt, amaran iməssəsəxra ən bahu en da a du-z-awəynen iba n ətəwəsəfrar ən tarrayt ta n tidət. ³ Tara-nasan əddənet, a sər-san du-tawəy âs a daɣ-wan ayyawanan agaraw ən tənfa əs batuten a d-ənzaman. Aytedan win irəw wəllen as tan-ibaz əššərixa, amaran ahluk-nasan wər iggug! ⁴ Məššina wər iɣles angalosan win əganen abakkad, kalar igar-tan daɣ anu wər nəl-eder, tawattafan daɣ-as əs sassaran den da daɣ šiyyay har əzəl wa n tabadday. ⁵ Aytedan win ərəwnen da, iwwiddab-tan Məššina fəl bakkadan-nasan. Mišan assaxa wa tan-iɣrad ahluk s alwabil wa zəwwəran, issəfsa Nux a itamaran aytedan əs tarrayt ta n taqqat. Issəfsa deɣ əssa aytedan wiyyad. ⁶ Məššina ihlâk aɣrəm an Sədom, əd wa n Gamora əs təmsay, har əqqalan əzəd. Iwwiddab-tan Məššina s əhluk wen fəl ad əqqəlan almasal y aytedan win tu-wər-nəksud. ⁷ Mišan iɣlas Lot a imosan awedan oɣâdan, iɣšâd ark alxal labasan ən nəmməzray win den iman-net. ⁸ Fəlas Lot aləs iɣdâlan a imos, izdâxan ammas n ark aytedan win, ihannay, isallu deɣ y ark aratan wər nəmməkkan win taggin əkkulluk n əzəl. Arat wen da a izzozaran iman ən Lot wəllen fəlas əwəl-net a iɣdalan. ⁹ Daɣ adi arat wa, issikna as Əməli issân əmmək was z'iɣləs daɣ jarrabatan aytedan win t-əksudnen, issân deɣ əmmək was z'ittəf aytedan win tu-wər-nəksud, har d-awəd əzəl a ilkaman s ənta a daq-qan z'awwaddab. ¹⁰ Aytedan win əlkammen y arak deranan samadasnen šiɣəswen-nasan, olkân taɣmar ən Məššina, əntanay wəllen a z'awwaddab.

Iməssəsəxra ən bahu win, olkân aytedan, əzzizwaran iman-nasan, wər əgen wala arat ən safrar i Kəl Tanaya win jənnawan, kalar takkasan-asan tarna. ¹¹ Wala angalosan, a tan-ogarnen wəllen təla ən fərregat, ogaran-tan təla ən tarna, da wər təkəsan tarna dat Məššina i Kəl Tanaya win. ¹² Mišan aytedan win, wər əssenən a taggin den, wər əzlayan əd wəxsan a du-wər-nəhəw ar y ad tatarmasan, tâwanxin. Aytedan win takkâsan tarna y a wər əzdayan, amaran ad əgin ətəwənxə wa tawaggin wəxsan. ¹³ Ənta den daɣ attadib wa dasan-z-itəwəggin fəl arak mazalan-nasan. Ezal a mallan ad tamazalan arak deranan-nasan. As dər-wan naɣaman daɣ məgura, ad arin a kawan-takarrasan, amaran ənəxima-nasan iɣšad-awan esəm wəllen. ¹⁴ Šittawen-nasan, wər tanat-iha ar tara n igi n əzzəna, faw da ərân igi n abakkad, takarrasan-du əs man-nasan aytedan win as irkam əzəgzan-nasan y a tan-səssugin ibakkadan. Aytedan win, faw da wər gəmməyan ar a əgrawan əs təməwit wər noɣed, amaran təwâr-tan tulxant. ¹⁵ Əgmadan tarrayt ta tolaɣat, əlkaman i Balɣam wa n ag Bosor, əxrakan. Balɣam tara n əzrəf n alxaram a tu-tewayat s as irda s igi ən təkma. ¹⁶ Mišan ya isla y ərruxmatan fəl təmazrəyt ta iga den. Tajat fadda, a təššewalat s əməsli n aggadəm, təgdal y ənnəbi wen igi n əmazal n əmməskəl was otas igi-net den.

¹⁷ Iməssəsəxra ən bahu win, olân d enwan wər əhen aman, əd garakan təbbât təzəkkay sa əd sa. Edag-nasan issins-asan-tu Məššina daɣ šiyyay šin ogarnen tallabəst. ¹⁸ Awal-nasan wər nəla almayna waliyyan, za wər ənfen wala, d arak deranan-nasan as du-takarrasan aytedan win as səket a d-əggazan tarrayt ta tolaɣat,

əmməzzayan-du d aytedan win əxraknen, a tan-sisuginen əzzəna. ¹⁹ Gannin-asan a tan-əkkəsan daɣ təla, ənta iman-nasan as əmosan eklan n arak deranan-nasan tawaynen s əhluk. Ənta awedan kul akli a imos n arat wa t-ornan. ²⁰ Kud aytedan win əssannen Əməli-nana Ƴaysa Əlməsix, imosan Ənəssefsi-nana, namaggagan əd tadjarganen n əddənet, dəffər adi amaran oyyan iman-nasan əqqalan tadjarganen šin den, adi za tawarnan. Alxalat ta əggazan den təššam-as fadda ta d-əgmadan əs tizarat. ²¹ Fəlas of-asan fadda, ad imos as wər kala ad əzdayan tarrayt ta n taqqat y ad imos as əzdəyan-tat, dəffər awen amaran ammazrayan alwajib zəddigan was dasan-itawanna a das-əlkəman. ²² Awa igrawan iməssəsəɣra ən bahu win, isitadda batu ta əgan kəl awal as ənnan: «Idi as iga afši, a t-id-iqqəl atš-ay.» Ənnan deɣ: «Əzubara kud das-təššorada da, amazay wədi da a daɣ z'iqqəl talaq izəggəluləz daɣ-as.»

3

Arkawal ən tawaɣlay n Əməli

¹ Ya imaran-in, širawt-in ta, ənta ta n sanatat a dawan-in-əktaba. Šira šin kul, gammaya daɣ-asnat a dawan-agay ənnəsixa n ad tətəgim ənnəzər olaɣan igân s əwəl iyyanda daɣ əsəssəɣri wa təgrawam. Awen daɣ as areɣ a dawan-t-id-assakta. ² Əddi ad za taktim awalan win as kala tan-əgan ənnəbitan a zaddognen. Taktim deɣ alwajib wa dawan-əmalan nəmmuzal-nawan. Alwajib wa, ifəl-du wa imosan Əməli, imos deɣ Ənəssefsi. ³ Daɣ tizarat, areɣ ad təssənam əs daɣ adan win əlkammen, ad t-əməlan nujaban labasnen, wər nəlkem ar y arak deranan-nasan, ad tajaban daɣ əzəgzan-nawan. ⁴ Ad gannin: «Inna a d-asu! Ənda ya, mas iqqal asa-du? Imarawan-nana da aba-tan, amaran wa du-tənta əddənet, wər imməttay wala daɣ talɣa ta har əmərədda!» ⁵ Mišan aytedan win ganninen awa, ill-ay arat iyyan a din-tatawin, amaran əgmayan-in awen, a t-imosan as ijənnawan d amaɖal, a irəwan wəllen a d-əxlakan. Məššina a izammazzayan aman d amaɖal s awal-net, amaran aman en da, as d-ixlak amaɖal. ⁶ Aman win daɣ den, as təhlak əddənet ta tərəwat, əɣradan-tat alamaz. ⁷ Amaran awal wen daɣ den as tawagazan jənnawan d amaɖal har harwa da, fəl ad təwəkfin i təmsay, har d-awəd əzəl wa daɣ z'abəz əššəriɣa aytedan win wər nəksud Məššina əhləkan.

⁸ Dər iga awen da ya, ill-ay arat iyyan as a t-in-wər-tattawim, imaran-in, a t-imosan as: Ƴur Əməli, əzəl iyyanda wər izlay d əgim n awatay, amaran agim n awatay wər əzlayan d əzəl. ⁹ Əməli wər isəlulit əsəndi n arkawal, awa əɣilan aytedan wiyyad. Təh-ay təzaydart wəllen y-awan. Wər ira ad ihlək awedan waliyyan. Kalar a ira ad utaban aytedan kul. ¹⁰ Əzəl wa ilkaman, a d-agu assa wa d-itaggu abaydag. Əzəl wen, ad təxrəd təmsay ahluk n awa ihan ijənnawan kul, iba tamayyamayt ən jənnawan, iddew awen d əməsli iknân tallabəst, ikšəf amaɖal d awa fall-as itawamazalan kul fəl ad təwəxkəman. ¹¹ Dəd zamas aratan win kul ad əxrədan ahluk, wədi əssənət ənnuɣ n anamod was kawan-iwâr a das-təlkəmam daɣ təməddurt-nawan. Iwâr-kawan ad tagim alxal zəddigan wa ira Məššina, tiksadam-tu, ¹² awen agiwat-tu təssigadam, tədgâzam daɣ a d-awəd əzəl a ilkaman, imosan əzəl a daɣ za bələgləgan jənnawan, ibələgləg deɣ awa tan-ihan kul, əlyəman. ¹³ Nəqqâl y ad t-əməlan jənnawan d amaɖal aynaynen, a daq-qu z'iməl əššəriɣa oɣadan, imos as awen daɣ as danaɣ-iga Məššina arkawal-net.

Aholan win əlkammen

¹⁴ Daɣ adi imaran-in, daɣ əsəgəd wa təgam da, ədgəzat wəllen, daɣ agamay n a kawan-d-asu Əməli təzəddigam, wər təlem a imosan əlyib, təssibdadam awa imosan alxer gar-ewwan əd Məššina. ¹⁵ Agiwat iduf n as təzaydart n Əməli-nana, ənta a təmosat efsan-nawan. Arat wədi amadray-nana n əməri-nana Buləs da imâl-awan-tu daɣ širawt-net, əs masnat ta t-ikfa Məššina. ¹⁶ Awen daɣ a itaggu daɣ šira-net kul

šin day iga batu ta. Šira šin, əhân-tanat daggan as izzəwat əgərri-nasan. Idaggan win, safraxan-tan aytedan win aljahilan, as irkam əzəgzan-nasan, awa taggin y Elkəttaban win hadatnen, amaran awen hallakan sər-əs iman-nasan.

¹⁷ Ya imaran-in, dad zamas təgrāwam isalan, ənkədat wəllen, fəl ad wər təl-kəmam y əxruk wa əgan aytedan win wər nəksud Məššina, fəl ad wər tammazzayam d əsəggətəkki wa təgam day əzəgzan-nawan. ¹⁸ Kalar are day-wan ad təššitim əzəzzəwi day arraxmat ta təgrawam, əd masnat ən Ƴaysa Əlməsix, s ənta Əməli-nana n Ənəssefsi-nana. Ənta a ilan tanaya əmərədda, il-et dəx har faw. Amin!

Širawt ta tazzarat iktab Yaxya

Təzugəst ən salan

¹ Nəkattab-awan-in isalan ən wa imosan awal ihakku tēməddurt. Awal wa ill-ay dat ənətti n əddənət: nəsl-as nənay-tu əs šittawen-nana, nəzigəzd-ay, amaran ədâsan-tu fassan-nana. ² Wa imosan tēməddurt, itawasanafalal-du nənay-tu nəggəyat-as, amaran nəmmâl-awan tēməddurt ta təxlalat tas kala təlla ħur Abba. Tēməddurt ta əmərədda tətawasanafalal-ana-du. ³ Tidət a imos as arət wa nənay əd was nəsla nəmâl-awan-tan, fəl ad təqqəlam kawanay da aytedan a dər-na ərtaynen. Tartəyt ta tidət a imos as nəg-et əd Məššina Abba-nana əd Barar-net Ƴaysa Əlməsix. ⁴ Aratan win wər dawan-tan-in-nəkəttəb ar fəl ad tandu tədəwit-nana.

Məššina ənnur a imos

⁵ Əntanay da isalan ən Ƴaysa Əlməsix win as nəsla, nətagg-awan-tan: Məššina ənnur a imos, wər t-iha a imosan šiyyay.

⁶ Kud a nənna nərtay dər-əs amaran nəgla nəjiwankat dəx šiyyay, wədi nakkanay inəsbuha, wər nəlkem y arət wa dana-iwaran imosan əmazal əs tidət. ⁷ Mišan as nəjiwankat dəx ənnur s ənta a iha Məššina iman-net, wədi nərtây, amaran azni ən barar-net Ƴaysa izzizdag-ana dəx id t-illa abakkad.

⁸ As nənna wər dana-iwer abakkad waliyyan wədi bahu a nətaggu i man-nana, amaran wər təha tidət iwallan-nana. ⁹ Mišan as wər nənkur ibakkadan-nana, dad zamas imos alxadil, oġâd, wədi a danaq-qan-issurəf, izzəzdəg-ana dəx arət wər noyed kul wa nəmmozal. ¹⁰ As nənna wər nəga abakkad waliyyan wədi əsəbbəhəw a nəga Məššina, amaran awal-net wər iha iwallan-nana.

2

¹ Bararan-in arət wa əkattabaġ-awan-t-in fəl ad wər tətəggim ibakkadan. As iqqal as iga iyyan dəx-wan abakkad wədi nəla almawakkil ħur Abba a t-imosan Ƴaysa Əlməsix s ənta a oġadan, ² fəlas iman-net a ikfa iqqal takutay ta təmmasat ibakkadan-nana. Amaran wərgəġ ibakkadan win-nana ħas kalar harkid win aytedan kul.

Ammar irəwan aynay

³ Ənta da arət wa dana-z-issusənan as nəssân-tu: Ad nətamazal arət kul was danax-omar. ⁴ As inna awedan issân-tu ənta amaran wər itəmizil arət was omar, awedan wədi anasbahu a imos isitaddan as wər təha tidət iman-net. ⁵ Mišan wa itamazalan s awal-net wədi tənifalal dəx-as tara ən Məššina təkmalat. Ənta da əmmək was nəssan as nərtay d Əlməsix:

⁶ Wa innan iha Əlməsix iman-net iwâr-tu igi ən tēməddurt ta iga Əlməsix. ⁷ Imaran-in ammar wa wər imos arət aynayan a dawan-in-kattaba, ammar awa wanad da irəwan a, təgrâwam harwa dəx tizarat imosan isalan win as təslam. ⁸ Dər iga awen da ya ammar wa dawan-in-kattaba da aynay. Šinaya-net tətawahannay dəx Əlməsix, tətawahannay dəx dəx-wan, fəlas šiyyay a tamattatnen itimələwləw d ənnur wa n tidət.

⁹ Wa innan iha ənnur ənta ikyad amadrəy-net wədi harwa da iha šiyyay. ¹⁰ Wa iran amadrəy-net wədi ənnur a iha, amaran dad zamas iha ənnur wədi wər tu-təlla təsənkəft a tu-za-taggadlit. ¹¹ Mišan wa ikyadan amadrəy-net wədi šiyyay a iha, ijiwankat dəx-asnat, wər issen sas idag fəlas sidarġalnat-tu.

Əddənət əd zənga n Əlməsix

¹² Bararan əkattabağ-awan-in as: ibakkadan-nawan ətiwasarafan-awan s əssəbab n arat wa iga Ƴaysa Əlməsix. ¹³⁻¹⁴ Bararan, kattabağ-awan-in fəlas təssânam Abba.

Abbatan əkattabağ-awan-in fəlas təssânam wa t-imalan harwa dağ tizarat.

Təmmədrəyt, əkattabağ-awan-in arat wa fəlas assahat a təgam dağ tarrayt ta n Məşşina tornâm əlxəkum n Iblis.

¹⁵ Ad wər tirem əddənet wala tirem arat a tat-ihan təll-ay. As ira awedan əddənet tara ta n Abba wər tu-za-təggəz. ¹⁶ Fəlas aratan kul win əddənet, a tan-imosan: tara ən man, tara n əddənet, zazwar ən man wa du-tətaway təgərgist, aratan win kul wər d-əfəlan Abba, kalar in əddənet. ¹⁷ Əddənet d ətəwəra-net ad əyrədan, mişan win əlkammen i tara ən Məşşina ad əxləsan har faw.

¹⁸ Bararan-in tilkamat n assağat tənta. Təslam as a d-asu awedan imosan azangaw n Əlməsix. Əmərədda aytedan aggotnen a d-osanen əmosnen izənga-net. Arat wa da a danax-issosanan as təməstant tənda. ¹⁹ Aytedan win əmosnen izənga n Əlməsix nakkanay a da din-əgmədan, mişan wər əmosan arat dağ-na. Fəlas ənnar t-əmosan wər dana-z-əgmədan. Mişan əfəlan-ana fəl ad igməd aşşak as wər əmosan arat dağ-na. ²⁰ Amaran kawanay ikf-iwan Infas wa Zəddigan tarna s ənta a kawan-təkfət ketnawan masnat n arat kul wa imosan tidət. ²¹ Wərgəx fəlas wər təssenam tidət a fəl dawan-in-kattaba, kalar fəlas tat-təssanam, tidət amaran wər t-illa bahu a tat-du-z-igmədan.

²² Dağ adi ma imosan anasbahu ar wa inkuran as Ƴaysa a imosan Əlməsix? Wədi ənta a imosan azangaw n Əlməsix, inkuran Abba əd Barar. ²³ I inkuran as Ƴaysa a imosan Barar wədi Abba da wər t-iqbel, amaran wa iqbalan Barar, wədi Abba da iqbâl-tu.

²⁴ Adi da fəlas sənnəhəlat iduf ən salan win təgrawam dağ tizarat. As təqlam tətəfam arat was təslam dağ tizarat wədi har faw tətəyam əd Barar d Abba. ²⁵ Amaran ənta da arkawal wa dawan-iga Əlməsix: A kawan-akfu təməddurt ta təxlalat.

²⁶ Aratan win kattabağ-awan-tan-in fəl əddəlil n aytedan win gammaynen d əsəxrək-nawan. ²⁷ Amaran kawanay tarna n Infas wa Zəddigan ta təgrawam xur Əlməsix, tah-iwan. Dağ adi wər təddəraram s ətəwəsəsəxra fəlas tarna tədi da a kawan-təsasaxrit arat kul. Arat wa təsasaxru tidət a imos, fəlas wər tətəggu bahu. Nəmənnəkət dağ esəm ən Ƴaysa s əmmək was kawan-isassaxra Infas wa Zəddigan.

Bararan ən Məşşina

²⁸ Bararan-in akniwat tassağ d Əlməsix, əddi as du-z-inəfiləl da nəkkâs aşşak fəl man-nana, wər dər-əs nənamaggag, wər nəkarakad xur assa-net. ²⁹ Təssânam as Əlməsix ənta a oğadan, dağ adi awedan kul wa itamazalan awa oğadan, wədi irtây d Əlməsix imos dəx barar ən Məşşina.

3

¹ Təhannayam as awa dana-iga Abba da tara a danax-itawannan bararan ən Məşşina. Amaran nəmos-tan. Əddənet wər dana-təssen, fəlas wər təssen Əlməsix.

² İmaran-in nakkanay əmərədda bararan ən Məşşina a nəmos, amaran arat wa za nəqqəl dəffər awa harwa da wər dana-d-inafalal. Nəssân xas as Əlməsix as du-z-inəfiləl nola dər-əs, fəlas anay a tu-za-nagu ənta iman-net. ³ Aytedan win əganen attama wa, win di əzzizdagan iman-nasan s əmmək as zəddig Əlməsix.

⁴ Wa igan abakkad wədi immizray əşşərixa ən Məşşina fəlas abakkad almağna-net əməzrəy n əşşərixa. ⁵ Amaran təssânam as Əlməsix osa-du fəl a fall-anax ikkəs ibakkadan. Ənta iman-net wər kala a tan-iga. ⁶ Dağ adi wa dər-əs irtayan iməzzay d igi ən bakkadan, mişan wa tan-itaggin wədi wər issen Ƴaysa za wər igra awa imos.

⁷ Bararan-in a tu-wər-iməl awedan a kawan-issəxrakan. Awedan wa oɣadan ənta a izalalaxan daɣ tarrayt, s əmmək as oɣad Əlməsix. ⁸ Wa itaggan ibakkadan Iblis as ilkam fəlas Iblis ɣur ənətti ad iggaz šin igi ən bakkadan. Amaran Barar ən Məššina osâ-du fəl ad izzərəz əššəxəl n Iblis. ⁹ Awedan kul wa imosan barar ən Məššina wər itəggu ibakkadan fəlas tēməddurt ta du-təfalat Məššina təha iman-net. Wər ifreg igi ən bakkadan fəlas barar ən Məššina a imos. ¹⁰ Ənta da arat wa izlayan bararan win Məššina əd win Iblis: Aytedan kul win wər nətəmizil awa oɣadan, wər əren deɣ imədrayan-nasan win əzzəgzannen s Əlməsix. Aytedan win di əntanay a əmosnen bararan win Iblis.

Tara gər mədrayan daɣ əzəgzan

¹¹ Təkittəwam isalan win as təslam harwa daɣ tizarat əmosnen âs: «Nəmərətana gar-ena!» ¹² Daɣ adi a dana-wər-iggəz i igân awa iga Kayin, ilkaman y Iblis iga iman n amadray-net. Mafel za itagg-en? Iga iman n amadray-net fəlas alxal-net a wər noɣed amaran wa n amadray-net oɣâd.

¹³ Daɣ adi imədrayan-in, a dawan-wər-iqqən eyaf as tətewakyadam daɣ əddənət. ¹⁴ Nakkanay nəssân as nəgmâd-du tēmattant əs tēməddurt tēzrâyat fəlas imədrayan-nana daɣ əzəgzan a nərə. Awedan wa wər nərə amadray-net daɣ əzəgzan, wədi harwa da ənəmmettən a imos. ¹⁵ Awedan wa ikyadan amadray-net daɣ əzəgzan, wədi əməggi ən man a imos, amaran təssânam as əməggi ən man wər das-tu-təlla tēməddurt ta təɣlalət. ¹⁶ Tehakkay ta iga Ƴaysa iman-net fəl əddəlil-nana, ənta a dana-təssosanat awa təmos tara. Nakkanay da iwâr-anax ad nakfu iman-nana fəl əddəlil ən mədrayan-nana daɣ əzəgzan. ¹⁷ Awedan n əməggergəs inayan amadray-net daɣ əzəgzan iddiraran izazzandar-tu, manəmmək as z'itəwənnu təha tara ən Məššina əwəl-net? ¹⁸ Bararan-in ad wər təqqəl tara-nana arat ihân imi ɣas, kalar tamazalat-tat əs tidət əs mazalan a tat-sinafalalnen.

Ikus n aššak fəl man-nana ɣur Məššina

¹⁹ Təməwit ta da as nəssan as aytedan əlkâmnen i tidət a nəmos, daɣ adi wər danaɣ-iššəwaš wala dat Məššina, ²⁰ kudde tihammen-ana wallan-nanax arak əmazal. Fəlas Məššina ogar iwallan-nana, amaran issân daɣ arat kul. ²¹ Imaran-in, as dana-wər-tahammen wallan-nana arak əmazal, wədi nəkkəset aššak fəl man-nana ɣur Məššina. ²² Arat kul wa daɣ-as nəgməy a danaq-q-akfu fəlas alwajiban-net as nəlkam, amaran nətamazal awa das-igrazan.

²³ Ənta da arat was danaɣ-omar: Ad nəzzəgzən s esəm ən Barar-net Ƴaysa Əlməsix nənəmərü gar-ena s əmmək was danaɣ-omar. ²⁴ Awedan wa ilkaman i tənna ən Məššina wədi Məššina iha iman-net. Ma danaɣ-issosanan za as iha iman-nana? Adi za Infas wa Zəddigan wa danaɣ-ikfa.

4

Mas za nəssən wa d-ifalan Məššina

¹ Ənkədat imaran-in, ad wər təzagzanam y i d-iggadan kul inna Məššina a t-id-izammazalan, kalar jarrabat-tan təzzar har təssənam daɣ-san win d-izammazal Məššina, fəlas ənnəbitan ən bahu aggotnen a əhanen əddənət. ² Ənta da əmmək was za təssənam awedan wa d-issəgla Infas wa Zəddigan: Awedan kul wa iqbala as Ƴaysa Əlməsix osâ-du əddənət iha taɣəssa n aggadəm wədi Infas wa Zəddigan t-id-izammazalan. ³ Mišan awedan kul wa inkuran Ƴaysa wədi wər t-id-izammazal Məššina. Awedan wədi əmagzar n Əlməsix was təslam âs a d-asu a t-id-izammazalan. Əmagzar n Əlməsix wədi iha əddənət əmərədda.

⁴ Kawanay bararan-in, Məššina a kawan-ilan amaran tornâm ənnəbitan ən bahu win, fəlas wa dər tətəyam ogar wa išxalan y əddənət. ⁵ Əntanay kəl əddənət

a əmosan. Adi da a fəlas batuten šin n əddənet a taggin, amaran sasaman-asan aytedan. ⁶ Nakkanay Məşşina a dər nərtay; awedan wa issanan Məşşina isasam-ana, wa tu-wər-nəssen amaran wər danağ-isəsim. Emmək wa da as za nəfrəg zələyat gər awedan wa d-izammazal Infas wa Zəddigan əd wa d-izammazal əməssexrək.

Məşşina tara a imos

⁷ Imidawan-in ən maran-in nəməratana gar-ena fəlas tara Məşşina a du-təffal. Awedan wa təha tara, barar ən Məşşina a imos amaran issân-tu. ⁸ Wa wər təha tara wər jissen Məşşina fəlas Məşşina ənta tara. ⁹ Ənta da əmmək was dana-isannafalal Məşşina as ir-ana: Barar-net an iyyanda a d-issoka əddənet fəl a sər-əs nəgrəw təməddurt taynayət. ¹⁰ Ənta da awa təmos tara: Wərgəx nakkanay a issəknan Məşşina tara, kalar ənta a danaq-qat-issəknan issoka-du Barar-net əddənet fəl ad iqqəl takutay təmmasat ibakkadan-nana.

¹¹ Imaran-in, dad zamas Məşşina ig-ana tara togdât d awa wədi nəməratana gar-ena nakkanay da. ¹² Məşşina wər kala ad t-inay awedan. Mişan kud nənimara gar-ena wədi iha iman-nana, tənifalal-du dağ-na tara-net əs təməwit təkmâlat. ¹³ Infas-net wa Zəddigan a danağ-ikfa, a di da a danağ-issosanan as nərtay dər-əs iha iman-nana. ¹⁴ Abba issigla-du Barar-net fəl ad iqqəl Ənəssefsi n əddənet. Nənây-tu əs şittawen-nana, nətagayyat dəx awen.

¹⁵ I innan s əwəl iyyanda Ƴaysa Barar ən Məşşina a imos, wədi Məşşina iha iman-net, amaran irtây əd Məşşina. ¹⁶ Nakkanay nəssân dağ tara ta danağ-iga Məşşina nəzzigzan-tat dəx. Məşşina tara a imos. Was təha tara iman-net irtây əd Məşşina iha Məşşina iman-net.

¹⁷ As du-təga tara ta ənəfilal ikmâlan dağ wallan-nana, ad nəkkəs aşşak fəl man-nana əzəl wa n tabadday, fəlas təməddurt-nana dağ əddənet a tolat əd ta n Əlməsix. ¹⁸ Tara wər tərəttəy əd təksəda, fəlas tara təkmâlat asatağ a tətag təksəda. Dağ adi wa taha tasa wər dağ-as təkmel tara fəlas tasa mərda ən tazak n əttadib a təmos. ¹⁹ Nakkanay təha tara iwallan-nana, fəlas Məşşina a danağ-iran əstizarat. ²⁰ As inna awedan ənta ira Məşşina amaran ikyad əmidi-net, awedan wədi anasbahu. Fəlas wa wər nara əmidi-net ihannay manəmmək as z'iru Məşşina a wər ihənnəy? ²¹ Alwajib da wa dana-d-oyya Əlməsix: I irân Məşşina, iret əmidi-net.

5

Əzəgzan təgəyya ən Məşşina

¹ I izzəgzanan as Ƴaysa ənta Əlməsix wədi barar ən Məşşina a imos. I iran əmaraw, ad iru bararan-net. ² Əntada awa danağ-issosanan as nəra bararan ən Məşşina: Tara a nəga Məşşina nəlkâm y alwajiban-net. ³ Tara ən Məşşina ləkkum y alwajiban-net, amaran alwajiban ən Məşşina wər əmosan əzuk, ⁴ fəlas bararan ən Məşşina kul ornan əddənet, amaran tarna ta təylabat əddənet tədi əzəgzan-nana.

⁵ Ma imos za wa ornan əddənet? Adi za awedan wa izzəgzanan as Ƴaysa Barar ən Məşşina a imos. ⁶ Ƴaysa osâ-du əddənet, itawasalmağ dağ aman, azni-net dəx inçal fəl təgəttawt, dağ adi wərgəx aman Ƴas as d-inafalal, kalar aman d əzni as d-inafalal. Infas wa Zəddigan a isattaddan arat wa, Infas wa Zəddigan amaran tidət a imos. ⁷ Dağ adi karadat təgəyyawen a t-əllanen əmosnen: ⁸ Infas wa Zəddigan d aman d əzni, amaran ketnasnat fəl karadatesnat nimannaknat əs təgəyya ta. ⁹ As əggəyen aytedan fəl arat ad nəqbəl təgəyya-nasan. Mişan təgəyya ta n Məşşina ənta a zəwwərat, amaran ənta a iga i Barar-net. ¹⁰ Wa izzəgzanan əs Barar ən Məşşina, ənta da təha təgəyya ta iman-net. Wa wər nəzzəgzan əs Məşşina wədi əsəbbəhəw a t-iga, fəlas əzəgzan a wər iga təgəyya ta iga Məşşina fəl Barar-net.

¹¹ Ma təsətadda təgəyya ta? Təsitadda as Məşşina ikf-ana tēməddurt ta təxlalat, amaran tēməddurt ta ənta a du-təgmadat Barar-net. ¹² Wa izzəgzanan əs Barar ən Məşşina igrâw tēməddurt ta, wa sər-əs wər nəzzəgzan wər tat-igrew.

Əzəgzan igmâd aššak

¹³ Aratan win əkattabağ-awan-tan-in fəl ad təssənam as təgrâwam tēməddurt təxlalat, kawanay a əzzəgzannen s esəm ən Barar ən Məşşina. ¹⁴ Ənta da əmmək was nəkkas aššak fəl man-nana çur Məşşina: As dağ-as nəgmay arat inimannakan əd tara-net wədi ipsisam-ana. ¹⁵ Amaran dad zamas nəssân as ipsisam-ana wədi arat wa dağ-as nəgmay nəssân as nəgrâw-tu.

¹⁶ As inay iyyan dağ-wan amadray-net dağ əzəgzan itaggu abakkad a tu-wər-nəşşətša i təmsay, igməyet-as dağ Məşşina a das-issurəf. Aytedan as ganna win tagginen ibakkadan win wər nəşətšu əs təmsay. Mišan ill-ay abakkad wa itawayan əs təmsay, amaran wərgəç ənta as dawan-ənneç ad tətteram i wa t-igan. ¹⁷ Tidət as iba n aqqad abakkad a imos, mišan wərgəç ibakkadan kul šatšin əs təmsay.

¹⁸ Nəssân as bararan ən Məşşina wər gəllin taggin ibakkadan, fəlas Barar ən Məşşina a tan-ogazan. Adi da fəlas wər dağ-san ifreg İblis wala. ¹⁹ Nəssân as nakkanay Məşşina a danaç-ilan, amaran əddənət ketnet innoda dağ-as İblis. ²⁰ Nəssân as Barar ən Məşşina osâ-du, amaran ənta a danaç-ikfan əgərri fəl ad nəssən Əməli wa n tidət, amaran nərtây d Əməli wa n tidət əs tarrayt ən Barar-net Үaysa Əlməsix. Ənta a imosan Əməli wa n tidət ihakkan tēməddurt ta təxlalat.

²¹ Bararan-in agəzat iman-nawan dağ əssənəman.

Širawt ta n sanatat iktab Yaxya

Šihulawen

¹ Awa nak amɣar a din-ihulan Ɛlkənisat ta tənnəfranat əd bararan-net. Areq-gawan əs tidət, amaran wərgəɣ nak ɣas a kawan-iran, aytedan kul win əssannen tidət aran-kawan. ² Nar-iwan fəlas tidət a təhat iman-nana, wər tan-təgəmməd har faw. ³ Ɛgmaya daɣ Məššina di n Abba əd Barar-net Ƴaysa Ɛlməsix a danaɣ-ikfan arraxmat əd təhanint, d alxer, attaddin daɣ-na əs tidət əd tara.

Təməddurt ta təlkat i tidət

⁴ Ɛkneɣ təfalawist wəllen as əsleɣ as wiyyad daɣ bararan-nam əzilalaɣan daɣ tarrayt ta n tidət s əmmək was dana-omar Abba-nana. ⁵ Ɛmərədda, Ɛlkənisat, ənta da arat wa daɣ-am gammaya: ad nənəmərü gar-ena. Wərgəɣ alwajib izrayan a dam-in-əktaɣ da kalar alwajib awa nəgraw harwa ɣur ənətti. ⁶ Tara almayna-net ad nəzəluləɣ daɣ alwajiban ən Məššina. Ɛnta da da alwajib was za təlkməm s ənta as təslam harwa ɣur ənətti.

⁷ Iməssəxrak aggotnen əwizawazan daɣ əddənət. Ma imosan za əməssexrək n aytedan imos deɣ azangaw n Ɛlməsix? Adi za wa inkuran as Ƴaysa Ɛlməsix osâ-du əddənət imos aggadəm. ⁸ Daɣ adi ənəkədat əd man-nawan fəl ad wər təsəbbənənam əššəɣəl-nawan. As təgam ənəkud wa ad təgrəwam aroz-nawan indân.

⁹ Awedan kul wa inamaggagan d əsəssəɣri n Ɛlməsix wədi wər irtay əd Məššina. Amaran wa iglan ittâf əsəssəɣri wa, wədi irtây d Abba əd Barar-net. ¹⁰ As kawan-d-osa awedan d əsəssəɣri iyyan wər nəmos wa, a tu-wər-təqbəlam, amaran a das-wər-tayim assalam fadda. ¹¹ Fəlas i das-oɣan assalam wədi inimannak dər-əs daɣ arak mazalan-net.

Šihulawen šin əlkamnen

¹² Ɛllan-tu aratan aggotnen as areɣ a dawan-tan-in-annaɣ mišan s a wər nəmos akatab ən širawt əs taddawat. Ɛssofaɣ a kawan-in-asay iman-in annaɣ-awan-tan s əmi d əmi fəl ad təkməl təfalawist-nana. ¹³ Ɛhulan-kawan-in bararan ən təmidit-nawan ta tənnəfranat.

Širawt ta n karadat iktab Yaxya

Šihulawen

¹ Awa nak amyar a din-ihulan əməri-nin Gayəs arex əs tidət. ² Əməri-nin əsidaranax-ak tətəyt dəx anamod kul, d assahat ən təxəssa-nak zun ta təge dəx əzəgzan-nak. ³ Əknêx təfalawist wəllen y assa wa di-d-əgan mədrayan-nana dəx əzəgzan, əmalan-i ənəfilal wa du-təga tidət dəx təməddurt-nak d əzəluləx wa dəx-as təge. ⁴ Wər t-illa a di-igân əsəffəliwəs ewadan wa di-iga ad aslay as bararan-in əlkâman i tidət.

Ənəmännak d əməzrəy

⁵ Əməri-nin tətamazala s alxadala dəx arat kul wa tətəgga i mədrayan-nana dəx əzəgzan, wəllen win dak-əmosnen inaftəyan. ⁶ Əntənay dak-əggəyatnen dat Əlkənisat fəl tara ta kay-təhat. Ad tagəx arat oləyan as dasan-təsamatəga əşikəl-nasan s əmmək wa igrəzan i Məşşina.

⁷ Fəlas wər imos əşikəl-nasan ar igi ən salan n Əlməsix, amaran wər əgmayan wala dəx aytedan win wər nəssen Məşşina. ⁸ Dəx adi nakkanay a iwar ad nədhəl aytedan ən šilat ən win di fəl a dər-san nənəməşxəl dəx tarrayt ta n tidət.

⁹ Kala a din-əktabəx arat ən širawt gəzzulat y Əlkənisat mišan Dəyodrefəs irân a dasan-azzâr dəx arat kul, wər iqbel a danax-in-igmâdan. ¹⁰ Adi da a fəlas as din-osey a dawan-agəx isalan n aratan win immozal, əmosnen arak əwalan win sər-nəx itaggu. Amaran wər das-igda əwen xas, fəlas tugəyt a iga s ad issəgən i mədrayan-nana dəx əzəgzan əmosnen iməşşukal, igdal dəx y aytedan a tan-səmməguren, istaq-qan dəx Əlkənisat. ¹¹ Əməri-nin täläl awa oləyan, wərgəx awa labasan. Awedan wa itaggan a oləyan ənta a irtəyan əd Məşşina, wa itaggan awa labasan wər issen Məşşina.

¹² Dəx batu ta n Demetrəyəs aytedan kul əgân fall-as təgəyya tolayat, amaran tidət tas ilkam, iman-net as fall-as təgəyyat. Nakkanay dəx nəga fall-as təgəyya tolayat, amaran təssânəx as təgəyya ta-nana ənta tidət.

Šihulawen šin əlkamnen

¹³ Əllan-tu aratan əgğotnen as arex a dak-kan-in-annəx mišan s a wər nəmos akatab ən širawt əs taddawat, ¹⁴ fəlas əknêx mərda n a kay-ənəya tarməd fəl a dak-kan-anna s əmi d əmi. ¹⁵ Əgmâya dəx Məşşina, a fall-ak d-izəzzabben alxer. Əhulan-kay-in midawan-nana. Təhuləx-in imidawan-nana, əkkulluk n iyyan təmaləx-as.

Širawt ta iktab Yuday

Šihulawen

¹ Širawt a din-təfalat Yuday, imosan akli ən Ƴaysa Ɖlməsix, imos deƳ amadray ən Ƴaqub. Ɖhulay-in aytedan win iƳra Məššina di n Abba, ir-en, ogâz-tan y əzəl wa du-z-iqqəl Ƴaysa Ɖlməsix. ² Məššina ya təgeƳ-awan tehakkay təkmlat i təhanint-net d alxer-net əd tara-net!

Batu ta daƳ təmməgrad širawt ta

³ Ya imaran-in, ədgâza wəllen daƳ a dawan-in-əktəba daƳ batu n efsan win nəgraw ketnana. Ɖmərədda amaran ənayay as ilzâm-i a dawan-in-əktəba fəl a daƳ-wan əgməyay ad tabballanam fəl əzəgzan wa ikfa Məššina i win iskat i man-net. Ig-asan y as tehakkay iyyadda, ⁴ əkattabaƳ-awan-in fəlas aytedan wər nəksud Məššina a kawan-əggaznen daw amaɗal. Safraxan əmazal iqqalan arraxmat wa dana-d-issoka Ɖməli-nana Məššina, fəl ad əgrəwan tarrayt n ad ammazalan aratan win ogarnen taxxaramt. Ɖnkuran deƳ Ɖmakraz-nana n Ɖməli-nanay an iyyanda a t-imosan Ƴaysa Ɖlməsix. Ark aytedan win, a irəwan wəllen ad əmalan Ɖlkəttaban attadib wa dasanz-itəwəggin.

IməssəsəƳra win bahu

⁵ A kawan-d-assaktaƳ aratan as ketnawan təkittəwam-tan. Aktiwat ikus n Ɖməli tamattay-net daƳ Masar a daƳ təha əkkəlu, dəffər adi ihlak win ugaynen s a sər-əs əzzəgzənan. ⁶ Aktiwat əlqissat n angalosan win as wər təgda tarna ta əgrawan, əgmadan edag was kala ad t-əhan. Awen a fəl tan-iway Məššina daƳ adag a daƳ tiwagazan har faw, əqqānan, əhân šiyyay har əzəl maqqaran wa ilkaman. ⁷ Aktiwat-du əlqissat ən Sədom əd Gamora əd Ƴərman win tan-əhoznen. Ɖntanay da zund əmmək en daƳ as əgan ibakkadan əmosnen əzzəna, gammayan deƳ igi n əzzəna əd təxəllak šiyyad. Ɖmərədda təƳazzaban daƳ təmsay təxləlat, fəl ad əqqəlan almasal.

⁸ Ɖssənat as əhan-kawan aytedan əddi da tagginen targəten, taggin imazalan zun win nəmal əddi. Targəten šin den nazzman-tanat-du fəl ad əlkəman y arak deranan ən təƳəssa-nasan, olkan təƳmar n Ɖməli taggin alfawaxišan daƳ batu n angalosan əlanen tanaya. ⁹ Wala Mikayil s ənta a imosan əmənokəl n angalosan da assaya wad imməstan d Iblis daƳ batu ən təƳəssa ən Musa, wər ihel šikəggar-net. Kalar tənna Ƴas a das-iga: Awwaddabet-kay Ɖməli! ¹⁰ Ark aytedan win amaran, takaggaran i wər əzdayan fadda. Amaran arat wa əssanan, əgân-as masnat zun ta n mudaran a wər nəla əgərri, ahluk Ƴas a tan-z-agu.

¹¹ Iket aƳazab ad t-agin! Fəlas ləkkum a əgan i tarrayt ta n Kayin. Tara n a əgrawan a sər-san du-tewayat as oyyan iman-nasan əggazan alxata olân əd wa n Balxam. Ad əƳrədan ahluk fəlas əgan əfəlləg zun wa iga Quray. ¹² Awalla olân əd təkmawen əllanen daw amaɗal. Taggazan-kawan daƳ tədrəwt ta tətəggim imensewan garəwwan kawanay a n əlməsixitan. Tattin s igət, wər əlen təkarakit, wər kəttəwan ar iman-nasan. Olân deƳ d əgnawan wər iha akonak ibbat-tan aɗu. Olân harwa da d eškan as d-ewad alwaq n ara-nasan wər tan-iha ara waliyyan, tiwalbayan-du əd kewan-nasan, əknân təƳart. ¹³ Ɖgân arak mazalan-nasan əmosnen təkarakit olân əd fanxalan win iggar agarew əs təsəšwit-net. Olân d etran itaway aƳaf wər əssenən is ədagan, əqqiman daƳ šiyyay šin ogarnen har faw.

¹⁴ Ɖntanay da təqqal-tan batu ta iga ənnəbi Xenok, imosan ahaya wa n əssa n Adəm. Inna sər-san: «Ɖnəy, Ɖməli a d-asu iddew əd təmərwən ən gimən n angalosan,

¹⁵ *fəl ad išrəx y əddənet ketnet. Ad issəbdəd aytedan kul fəl mazalan wər noxəd win əgan əmosnen iba n təksəda ən Məššina. Ad issəbdəd dəx inasbakkadan fəl ikus wa əgan tarna y esəm-net.»*

¹⁶ Aytedan win, wər əlen igda, faw əššakan awa tan-igrawan, əlkâman y arak deranan-nasan. Taggin batuten əmosnen ibaragan, əmmalan aytedan imos awen agamay n a əgrawan.

Awal ən nəmmuzal d ənnəsixa

¹⁷ Mišan kawanay ya imaran-in, aktiwat awa əmalan nəmmuzal n Əməli-nana Ҳaysa Əlməsix. Arat wa harwa da wər iga as t-əmalan, a t-imosan ¹⁸ as dawan-ənnan: «Dəx azzaman win əlkammen, ad t-əməlan ark aytedan ən nujaban a z'əlkəmnen y arak deranan-nasan.» Awa taggin aytedan win issikna as wər əksudan Məššina. ¹⁹ Əntanay əddi da aytedan win zamazzaynen əlməsixitan. Wər əlkeman ar i tara ən man-nasan, wər tan-iha Infas wa Zəddigan.

²⁰ Mišan kawanay ya imaran-in, səssuhətət əzəgzan-nawan a dəx təsihaddam fəl əsəssəxri ittiddan zəddig, ad tətattaram əs tilalt n Infas wa Zəddigan. ²¹ Zəzzəwətət dəx tara ən Məššina. Agiwat attama-nawan dəx Əməli-nana Ҳaysa Əlməsix, a dawan-ihənəttət, akf-iwan təməddurt ta təxlalat. ²² Hənəttətət y aytedan win as iha aššak əzəgzan-nasan. ²³ Safsiwat win dəx togazam arat təkəkəsam-tan-du dəx təmsay. Win hadatnen amaran hənəttətət-asan a daq-qan təksudam, takədam əd wala šibəddəx-nasan fəlas simadasan-tanat bakkadan-nasan.

²⁴⁻²⁵ Agiwatana təmmalen i Məššina di n iyyan s ənta a danəx-issəfsan əs tarrayt n Əməli-nana Ҳaysa Əlməsix! Ənta a ifragan agadal y-awan ad təfətəqqem dəx igi ən talbast. Ifrâg a kawan-agu aytedan as tu-wər-illa i ifragan a dəx-san d-inəy ark arat, taknim təfalawist fəlas tərtâyam dər-əs dəx tanaya-net. Ənta a ihoran əd tanaya d ədkul əd tarna əd təxmar, har faw, gər dəx azzaman win okaynen, wala əmərədda, wala awa d-izayan! Amin!

Elkəttab wa n Ənəfilal Əsənti d assalaman

Əsənti

¹ Elkəttab wa tidət təybârat a mosan salan win t-əhanen, amaran Ƴaysa Əlməsix a tan-isannafalalan. Məşşina a t-issosanan dəx tidət ta, fəl ad assaknu inaxbidan-net aratan a z'aginen dəx azzaman wər nəggug. Ƴaysa Əlməsix a issosanan aratan win y ənaɣbid-net Yaxya s əsuki wa t-id-iga angalos-net. ² Arat kul wa inay Yaxya da, illikan as awal ən Məşşina a imos, illikan dəx as təgəyya ən Ƴaysa Əlməsix a imos. ³ İbbilal wa iɣarrin s əməsli idkâlan isalan win nafalalnen dəx əlkəttab wa əşşewalnen dəx batu n aratan win əmərədda əd win d-əzaynen! Əbbilalan win das-sasammen, əbbirdagan-as, fəlas alwaq wər iggug.

Assalaman

⁴ Awa nak Yaxya, a din-iktâban y Əlkənīsaten a n əssayət əhanen akal n Asəya. Əməli s ənta a t-illan kala da, ill-ay dəx əmərədda, amaran ənta a d-izayan, a dəx əgməyay a dawan-əgu arraxmat d alxer. Təgrəwamet arraxmat d alxer ɣur əssa ərruxanitan win əllanen dat təxawit ta n təɣmar n Əməli! ⁵ Təgrəwamet-tan dəx ɣur Ƴaysa Əlməsix, imosan təgəyya təssiflasat, imos dəx Barar wa n aɣafadday a d-inkaran dəx təməttant, imos əmuzar ən mənokalan n əddənət. Ƴaysa Əlməsix ir-anay amaran isaddarfət-ana dəx bakkadan-nanay, əs təkutay ta iqqal əzni-net. ⁶ İg-anay imənokalan əd limaman i Məşşina di n Abba-net. Ənta a ilan tanaya, azzar y arat kul har faw! Amin!

⁷ Ənta əddi a d-izayan əddi iha-du şignawen.

Aytedan kul ad t-ənəyan

harkid win t-ədagnen saxxarabben-tu əs təzoli.

Tawşeten n əddənət kul a fall-asnat tagu təfəyyawt

dəx talɣa n awa t-igrawan.

Awalla awen dəx a igan. Amin!

⁸ Əməli Məşşina ənta a innan: «Nak a imosan Alfa, əmosa dəx Omega, almaɣna wa azzaran, ilkâm. Əmosa wa t-illan kala da, əmosa wa t-illan əmərədda, əmosa dəx wa d-izzayan; əmosa Məşşina di n əməli ən tarna kul.»

Aratan win nafalalnen i Yaxya

Ənəfilal ən Wa d-Inkaran dəx taməttant əd şira əkkanen Əlkənīsaten şin əssayət

Ənəfilal ən Wa d-Inkaran

⁹ Nak Yaxya, amadray-nawan a mossa, əheɣ təssust zun ta dəx təham, ədrâwa dər-wan Təɣmar ta n Məşşina əd zəmmerat. Awen kul ədrâwaq-qu dər-wan dəx tərtəyt əd Ƴaysa. Əheɣ akal imosan gərwətlan as itawannu Fatmos fəlas emel a əgeɣ awal ən Məşşina, əmosa dəx təgəyya n awa iga Ƴaysa. ¹⁰ Əzəl n alxad imosan əzəl iskâtan y Əməli, tobaz-i tarna n İnfəs wa Zəddigan ən Məşşina, əsleɣ dəffər-i y əməsli issohen olân d əməsli n anasay n asak. ¹¹ İnn-i əməsli wen: «Əktəb dəx əlkəttab awa təhannaya da, təsəssiwəyaq-qu y Əlkənīsaten a n əssayət a tanat-imosan: ta n Efez əd ta n Əsmurna əd ta n Fergamos əd ta n Təyatir əd ta n Sardes əd ta n Filadelfəya əd ta n Lawodikəya.»

¹² Malallayay-in y ad əssənay awa imos əməsli wen. As din-malallayay, ənayay əssa səkbəl ən fətəlaten əgânen dəx urəɣ. ¹³ Ogge dəx garegaray-nasan azzat tolât əd ta n aggadəm. Azzat ten, təzlâg təkadkat zagret, totâb idmaran-net s əsatəb n

urəx. ¹⁴ Eɣaf-net əd jəkkad-net əgân təməllay ta n təduft, madəx təməllay ta n əx. Şittawen-net olânat d abalagleg ən təmsay. ¹⁵ Idaran-net imilawlawan zun darox illixlayən, ikna səllul, əməsli-net amaran ola d əjit zəwwəran n aman aggotnen. ¹⁶ Əfus-net wa n əxil əhan-tu əssa etran, imi-net təgammad-t-idu takoba təkənât tawala fəl əşšin fayyan-net. Udəm-net iga əmələwləw wa n təfuk a du-təkənât əzərəyyi.

¹⁷ As t-ənaya, fataqqe xur daran-net, zun âs əgmâdan-i man. Təzzar issəwar-i əfus-net wa n əxil, inn-i: «A kay wər təggəz tasa! Nak a imosan wa azzaran, əmosa dəx wa ilkaman. ¹⁸ Əmosa wa iddaran! Kala a di-aba, mişan əmərədda, nak da iddaran da, har faw! Əttâfa tanat ən təmattant d alaxirat. ¹⁹ Daɣ adi əktəb awa təhannaya, gər za wa itaggin əmərədda, wala dəx wa d-izayan. ²⁰ Ənta da almaɣna n əssir wa n əssa etran win əhanen əfus-in wa n əxil d əssa səkbəl ən fətəlaten win əganen daɣ urəx: Əssa etran win, əmosan angalosan win əssa n Əlkənisanen a n əssayat, amaran isəkbəl ən fətəlaten win əssa əmosan Əlkənisanen a n əssayat iman-nasnat.»

2

Şirawt təkkât Əlkənisan ta n Efez

¹ Əktəb y angalos n Əlkənisan ta n Efez as: «Arat da wa inna wa ittafan etran win əssa daɣ əfus-net wa n əxil, ijiwankat gər səkbəl ən fətəlaten win əssa n urəx: ² "Kawanay kəl-Əlkənisan ta n Efez, əssâna daɣ mazalan-nawan, d əşşəxəlan win təgam, əd zəmmerat-nawan. Əssânaɣ âs wər təqbelam inəllubas, tətajarrabam dəx win ənnanen əs bahu əmosan inəmmuzal. Təsattaddam as bahu a taggin. ³ Təmosam Əlkənisan təzmarat y aratan kul. Təyyəwanam aɣazab fəl əddəlil n esəm-in, mişan wər sər-wan d eway awen tewaxlay dəffər-wan. ⁴ Mişan ya ill-ay arat a daɣ-wan əşşâka, a t-imosan şiyit ta təgam tara ta kawan-təhat əstizarat. ⁵ Daɣ adi, a din-wər-tattawim igəg wa din-təgam daɣ igi ən bakkadan! Utabat, tərəzam daɣ igi-nasan, ad tətəggim imazalan olaxnen win tətəggim harwa daɣ tizarat. As wər tətubam, wədi a kawan-in-asa, əkkəsax əsəkbəl ən fətəlaten-nawan daɣ adag-net. ⁶ Dər iga awen da ya, təlâm əlxislat tolaɣat a tat-imosan as təkəyâdam imazalan âs nak da əkyâdaq-qan win taggin aytedan win Nikolayitatan. ⁷ Wa isallin aslet y awa inna Infas wa Zəddigan y Əlkənisanen: "Wa d-ornan, ad t-aşşatşax ara n aşək wa n təməddurt, ihân aljannat ən Məşşina."»

Şirawt təkkât Əlkənisan ta n Əsmurna

⁸ Əktəb y angalos n Əlkənisan ta n Əsmurna as: «Ənta da awa inna wa imosan wa azzaran, imos dəx wa ilkaman, aba-tu inkar-du daɣ təmattant: ⁹ "Kawanay Kəl-Əlkənisan ta n Əsmurna əssâna daɣ təssust ta kawan-təgrawat, d əlləqqəw-nawan labasan. Mişan arat wa imosan tidət, as iməggərgas a təmosam! Əssâna daɣ ərrəbdan win kawan-taggin aytedan win ganninen əmosan Kəl-Əlyəhud əs bahu, əntanay amaran wər əmosan ar tiddawat ən nalkiman n Aşşaytan! ¹⁰ Ad wər tiksadam aɣazab wa daɣ-wan ilkaman. Səsəmat, kəl-Əlkənisan ta n Əsmurna! İblis a kawan-ajjarrab s ad agu arat daɣ-wan daɣ kasaw. Ad tagim maraw adan tətihadgazam. Əxdəlat daɣ əzəgzan-nawan iket təddaram, əddi a kawan-akfaɣ aroz imosan təkəbbut ta n annajax. ¹¹ Wa isallin aslet y awa inna Infas wa Zəddigan y Əlkənisanen! Wa d-ornan, wər z'iggəz Jahannama."»

Şirawt təkkât Əlkənisan ta n Fergamos

¹² Əktəb y angalos n Əlkənisan ta n Fergamos as: «Arat da wa inna wa ilan takoba ta təkənât tawala fəl əşšin fayyan-net: ¹³ "Kawanay kəl-Əlkənisan ta n Fergamos, əssâna dad təllam, amaran əddi daɣ ad təlla taɣmar n Aşşaytan. Təsigatakkem

dağ tarrayt ta-nin. Wər təmməzzəyam d əzəgzan sər-i. Təttafam əzəgzan-nawan harkid dağ azzaman win dağ tawaggan man n Antifas, imosan ənalkim-in ixdalan, imos deş təgəyya-nin. Itawança dağ ayrəm-nawan, imosan dad illa Aşşaytan. ¹⁴ Mişan ya, əllan-tu aratan a dağ-wan əşşâka, a tan-imosan âs: Əhân-kawan aytedan əlkâmnən i tarrayt ta n Balğâm s ənta a isassayran əmənokal Balaq əmmək was z'agu taftaw i Kəl-İsrayil y a tan-isəssugu abakkad. Ig-asan təmərkest a fəl z'atşin isan əmmidasnen ən təkutawen tiwagganen y əssənəman, agin deş əzzəna. ¹⁵ Əmmək en dağ as kawanay kəl-Əlkənisat ta n Fergamos əhân-kawan aytedan zizawatnen dağ tarrayt ta n Nikolayitatan. ¹⁶ Utabat dağ adi. As wər iga adi, a kawan-in-asa tarmad, ammagara d aytedan win di, əs takoba, a tat-imosan awal-in. ¹⁷ Wa isallin aslet y awa inna Infas wa Zəddigan y Əlkənisaten! Wa d-ornan, ad t-akfaş manna təşbârat, akfaş-qu deş təhunt mallat a fəl iktâb esəm aynayan as tu-wər-illa i t-issânan ar wa t-igrawan."»

Şirawt təkkât Əlkənisat ta n Təyatir

¹⁸ Ektəb y angalos n Əlkənisat ta n Təyatir as: «Ənta da awa inna Barar ən Məşşina, as şittawen-net olânat d abalagleg ən təmsay, amaran milawlawan daran-net zun daroş illiğlayan, ikna səllul: ¹⁹ "Kawanay kəl-Əlkənisat ta n Təyatir, əssânaş awa tətamazalam, əssâna dağ tara ta kawan-təhat, d əzəgzan-nawan d əşşəşəl-nawan əd zəmmerat-nawan. Əssânaş deş as əşşəşəlan-nawan win əzraynen, ogaran win azzarnen. ²⁰ Mişan ya ill-ay arat a dağ-wan əşşâkaş a t-imosan as toyyam tantut ta təgat Yezabel, təgannu tənnəbit a təmos. Təsasaşru inaybidan-in təsaxrak-kan, təsisug-en arak mazalan əmosnen əzzəna, əd tattay ən şan ən təkutawen tiwagganen y əssənəman. ²¹ Ekfeş-qat alwaş ewâdan ad tutab, mişan wər tara əməzzəy d alxal-net wa n igi n əzzəna. ²² Awen dağ a fəlas a tat-in-əssukaş təwərna d alğazab əmosnen attadib-net. Win dər tənammagga əzzəna, a sər-san d-awəya təssust labasat as wər ətuban dağ arak mazalan win tan-təsisugu. ²³ Ad əhləkaş inalkiman ən təntut ten. Əlkənisaten kul ad əssənnat as nak əmosa wa itamayyan iwəllan, amaran akkiyyan dağ-wan ad t-akfaş awa tu-şaşşawadan mazalan-net. ²⁴ Kawanay amaran kəl-Əlkənisat ta n Təyatir win wər nəlkem i tarrayt ten, za wər təzdayam aratan win as gannin aytedan win den 'əssiran win din-əggugnen n Aşşaytan', arat da wa ənne dağ batu-nawan: wər kawan-əssəwəra lahan iyyan. ²⁵ Zəzzəwətət şas dağ əzəgzan-nawan har din-asa. ²⁶ Wa d-ornan ilkâm y alwajiban-in har təzərəst, wədi ad t-akfaş tizart i tawşeten n əddənət. ²⁷ A dasnat-izar əs taymar təkənât assahat, addagdak-kanat zun təkən ən talaş, ²⁸ s əmmək as di-ikfa Abba-nin tizart. Ad t-akfa deş atri wa n aşora, almaşna a dər-əs ədrəwa taymar-in. ²⁹ Wa isallin aslet y awa inna Infas wa Zəddigan y Əlkənisaten!"»

3

Şirawt təkkât Əlkənisat ta n Sardes

¹ Ektəb y angalos n Əlkənisat ta n Sardes as: «Arat da wa inna wa ilan əssa ərruxanitan d əssa etran: "Kawanay kəl-Əlkənisat ta n Sardes, əssânaş imazalan win tətəggam. Itawannu 'Əlkənisat ta n Sardes təddar', kawanay amaran zun as aba-kawan. ² Ənkədat, təsəssuhem awa dawan-d-iqqiman dağ aytedan. Ad wər iğrəd adi ketnet təməttant, fəlas əğreş-in as waliyyan dağ mazalan-nawan, wər imos arat ikmâlan dat Əməli-nin Məşşina. ³ Dağ adi, aktiwat Əlinjil was təslam d əsəssəşri wa təğrawam. Aşədət dağ-as, tutabam. As wər tənkeram dağ etəs, a din-asay əheş əlmital n abaydaş, wər za təssənam alwaş wa daş-qawan in-z-əşdəra. ⁴ Dər iga awen da ya, əhan-kawan aytedan âs harwa da wər əmməzrayan Məşşina. Win di a dər-i idawan, əmosan isamlalan, id əhoran d awen. ⁵ Əmmək en dağ as wa d-ornan ad

alsu tabdoq tægat tæmëllay tæsiraqqet, amaran wër z'ëmësax esëm-net day ælkættab wa ehan æsmawan n aytedan win ægrawnen tæmëddurt ta tæxlalat. Ad æqbëla dat Abba-nin, d angalos-an-net âs awedan wædi i-nin. ⁶ Wa isallin aslet y awa inna Infas wa Zëddigan y Ælkænisaten!"»

Širawt tækkât Ælkænisat ta n Filadelfæya

⁷ Æktëb y Angalos n Ælkænisat ta n Filadelfæya, as: «Ënta da awa inna wa imosan æmizdag, imos tidët, amaran ënta a ittafan *tæsassarut ta n æmænokal Dawëd, s ënta âs, as olam arat wër t-illa i ifragan tæmëhirt-net, as ihar dex wër t-illa i ifragan allam:* ⁸ "Kawanay kæl-Ælkænisat ta n Filadelfæya, æssânax imazalan win tægam, æssânax as wër tælem šixurad aggotnen, dër iga awen da ya tæxdâlam day awal-in, wër di-tënkuram. Æssënat za as olâmax-awan tæsëhërt, as wër t-illa i ifragan tæmëhirt-net. ⁹ Ænëyat, ënta da awa z'agin: tiddawat ën nalkiman n Aššaytan, a tat-aga day fassan-nawan. Gannin æmosan Kæl-Ëlyëhud ënta wër tan-æmosan, taggin bahu. Ænëyat, ënta da awa dasan-z-aga: A tan-d-assaglay, æssëjëdan xur daran-nawan, amaran ad æssënan, æqbëlan dex as areq-qawan. ¹⁰ Dad zamas tælkâmam y awal-in omaran æs zëmmerat, wædi nak da a kawan-agëza day tamert ta n jarrabatan win d-ëzaynen æddënet ketnet, fël ad iqqël awen jarraba ægëx y aytedan n æddënet kul. ¹¹ A din-asa tarmad. Akniwat æzëzzëwi day awa tëlam, fël a day-wan wër abëz awedan waliyyan aroz-nawan imosan šikëbba-nawan šin tarna. ¹² Wa d-ornan, ad t-aga tægëttawt day ahan n ælxibada ën Mëššina di n Æmëli-nin, amaran wër t-idu-z-igmëd har faw. A fall-as æktëbax esëm ën Mëššina di n Æmëli-nin, d esëm n æxrëm n Æmëli-nin Mëššina, a t-imosan Yerusalem ta taynayat, a du-tëzzibbet day jënnawan, isisaway-tat-du Æmëli-nin, æktëbax dex fall-as esëm-in wa aynayan. ¹³ Wa isallin aslet y awa inna Infas wa Zëddigan y Ælkænisaten!"»

Širawt tækkât Ælkænisat ta n Lawodikæya

¹⁴ Æktëb y angalos n Ælkænisat ta n Lawodikæya, as: «Arat da wa d-inna was itawannu "Amin", s ënta a imosan tægëyya ta tæxdalat, tëmos tidët, amaran ënta ælësël n ækkulluk n arat: ¹⁵ "Kawanay kæl-Ælkænisat ta n Lawodikæya, æssânax awa tëtëamazalam: Wërmad tësëmmidam, za wër tækkusam. Ænnar tësëmmidam madëx tækkusam! ¹⁶ Mišan dad zamas tëlimzayyanam, wërmad tësëmmidam za wër tækkusam, wædi a kawan-d-afsa, ¹⁷ id a tægannam: 'Nëggirgas, amaran iman-nana a nësaggargas. Wër nëddërar æs wala.' Awen tægannim-tu fëlas wër tësënam as kawanay tëllam-tu d æxšud ën man, tëhoram d i dawan-ihanatten, tëmosam šilëqqawen, tëddirxalam, wër tëlsem wala. ¹⁸ Ægëx-awan ënnësixa n a xur-i tazzanzim urëx wa itawajarraban æs tëmsay, fël a sër-ës taggargasam, tazzanzim xur-i dex tabdoq mallat, fël ad talsim, ib-as kawan-tëtabaz tëkarakit n as tëzzafam, tazzanzim xur-i dex amagal a za tëzwëyam i šittawen-nawan, iqqël-kawan-du asawad-nawan. ¹⁹ Nak, aytedan win arex, ëntanay a fël šawala, suxulaq-qan-du tarrayt. Day adi akniwat gälleyat, tutabam. ²⁰ Ænëyat! Nak ælëx xur tësëhërt n ahan takawkawaq-qat. As di-isla awedan, olam-i ehan, ad æggëzax a xaywan-net, ædrëwa dër-ës tëmëklawt. ²¹ Wa d-ornan, a t-akfax tëtëtëyt n a dër-i inëximu fël tëxawit ta n taymar-in, zund ëmmëk as nak da assaxa wa d-orneux, æglëx nayama d Abba-nin fël tëxawit ta n taymar-net. ²² Wa isallin aslet y awa inna Infas wa Zëddigan y Ælkænisaten!"»

4

Awa du-z-inæfilalan day jënnawan

Ænæfilal ën tëxawit ta n taymar ën Mëššina

¹ Dəffər awen ənaya təsəhərt tənnolamat dəx jənnawan. Əsleḡ y əməsli was əsleḡ dat awen, olân d anasaḡ n asak. Igann-i əməsli wen: «Gazzay-du sa da, a kay-assaknaḡ arat was kundaba iga dəffər awa.» ² Wala ihoggan tobaz-i tarna n Infas wa Zəddigan, oggeḡ təxawit ən taḡmar ta təhat ijənnawan. Təxawit ten iqqim fall-as awedan. ³ Wa iqqiman fəl təxawit ten, iga əmələwləw a n təhənt iyyat təlât almaqam, as itawannu jasfa d iyyat as itawannu sardwan. Təḡlay-tat təzzəl-adar a du-təsaktit təhənt iyyat təmilawlawat təlât almaqam as itawannu emrod. ⁴ Təxawit ta n taḡmar en, əḡlaynat-tat sanatat təmərwən ən təxawit ən taḡmar d əkkozat, a fəl əqqiman sanatat təmərwən n əmḡar d əkkoz ən samlalan, əssiwarnen šikəbba ən taḡmar əgânen dəx urəḡ. ⁵ Gammadan-tat-du esman əd maslan d eggagan. Ərḡân dat-əs əssa belan ən təmsay, əmosnen əssa ərrixanitan ən Məššina. ^{6a} Təxawit ta n taḡmar en, oray-tat-du arat olân d agaraw imilawlawan wəllen, igân əḡətəs a n təlfənjart.

^{6b} Ammas-net əd ḡələyḡələyan-net əhân-tan əkkoz mudaran as ilamawan-nasan əlsân šittawen sa sər dat, əlsân-tanat dəx sa sər ələqqam. ⁷ Əmudar wa azzaran ola d ahar, wa n əššin ola d əhəri, wa n karad amaran isakta-du udəm-net wa n aggadəm, wa n əkkoz ola əd tənagmart təggâdat. ⁸ Amaran imudaran win əkkoz en, əkkulluk n iyyan dəx-san ila sədis əfrutan əlsânat šittawen sas ammas əd sas afalla. Wər təfəstin ehad ezal gannin:

«Əmizdag, Əmizdag, Əmizdag,
 Əməli Məššina s ənta a imosan
 məššis ən tarna kul,
 imos wa t-illan kala da,
 imos dəx wa t-illan əmərədda,
 amaran izay-du!»

⁹ Əsiggadan dəx təmmalen ən tanaya əd saḡmar əd godan i Məššina, s ənta a iqqiman fəl təxawit ta n taḡmar, ill-ay har faw. ¹⁰ Amaran id əssəggadan mudaran win den, ad əssəjədan əmḡaran ḡur daran ən wa iqqiman fəl təxawit ta n taḡmar, assansin šikəbba-nasan šin taḡmar, annin:

¹¹ Ya Əməli-nana Məššina,
 kay a ihoran əd tanaya
 d ətəwəsəḡmar, əd tarna,
 id kay a d-ixlakan əkkulluk n arat.
 Aratan kul əllan-tu əs tarrayt ən tara-nak,
 amaran kay a tan-d-ixlakan.

5

Ənəfilal n Əjemar d əlkəttab wa təwar talxatimt

¹ Təzzar oggeḡ dəx əfus wa n əḡil ən wa iqqiman fəl təxawit ta n taḡmar əlkəttab iwar akatab sa sər ammas əd sa sər afalla. Elkəttab wen əwarnat-tu əssayət təlxatimen, a das-əmosnen šisəḡfal. ² Oggeḡ angalos iknân təla ən tarna igannu s əməsli issohen: «Ma imos wa ewadan ad aləm əlkəttab wa, aru təlxatimen šin t-əwarnen?» ³ Mišan wər t-illa dəx jənnawan za wala amaḡal, wala daw amaḡal, i ifragan allam n əlkəttab wen, wala inəy awa t-ihan. ⁴ Təzzar ad halla wəllen id wər t-illa i ifragan allam n əlkəttab wen, wala dəx ifrâḡ anay n awa t-ihan. ⁵ Təzzar inn-i iyyan dəx əmḡaran: «Ayyu tala! Ənəy, ahar wa n tawšət ən Yahuda, a d-igmâdan əzzurrəyya ən Dawəd, ənta a d-ornan, amaran ənta fadda a z'aləman əlkəttab wa d əssayət təlxatimen-net.» ⁶ Təzzar oggeḡ Əjemar ibdâdan dəx ammas ən təxawit ta n taḡmar əd mudaran win əkkoz, dəx garegaray n əmḡaran. Əjemar wen ola d əmudar igzaman, amaran ila əssa əskawan d əssayət šittawen əmmittalnen [əssa]

ərruxanitan ən Məşşina a d-issoka əddənət ketnet. ⁷ Ihoz-in y ad igrəw əlkəttab dəy əfus wa n əxil ən wa iqqiman fəl təxawit ta n təxmar. ⁸ Assaxa wad igrəw Əjemar əlkəttab, ənkarən mudarən win əkkoz, d əmğarən win sanatat təmərwen d əkkoz əssəjadən dat-əs. Akkiyyən dəx-san ittâf təhərdânt, əd təkərwasen n urəx ədnâynen ađutan əzodnen taqqadnen əmmittalnen šiwatriwen ən mizdagan. ⁹ Əssiggadan dəy təmmal taynayət, gannin:

Kay a ihoran d agaraw n əlkəttab, tarzax talxatimt-net, id ətəwəgzam a təgeç.

Amaran azni-nak as tərzama tədarfit n aytedan ən tawseten kul d awalan kul əd təmattiwen kul əd kallaan kul, tewayaq-qan-du əs tarrayt ta n Məşşina.

¹⁰ Təgeç-qan imənokalan əd limaman, əxbâdnen Əməli-nana, amaran ad əxkəman fəl əddənət.

¹¹ Əlasax-in asawad, təzzar əsleç i maslan n angalosan əknânen igət. Əmosan igiman ən gimən, çilayçalayan təxawit ta n təxmar, çilayçalayan imudarən d əmğarən. ¹² Əssiggadan gannin s əməsli issohen:

«Əjemar wa igzaman iqqal takutay,
ihor d agaraw ən tarna
əd təgərgist əd masnat
əd təxurad d ətəwəsəçmar
əd tanaya əd təmmalen!»

¹³ Təzzar əsleç dəy amazay wen da i təxəllak kul dəy çənnawan d amađal, əd daw amađal, əd gərwan, ganninat:

«Təmmalen əd saçmar əd tanaya
əd tarna hər faw
in wa iqqiman fəl təxawit ta n təxmar
d Əjemar!»

¹⁴ Təzzar ənənən mudarən win əkkoz: «Amin!» Əssəjadən əmğarən əxbadan Məşşina d Əjemar.

6

Talxatimen šin əssayat

Əniləm ən talxatimt ta tazzarat

¹ Dəffər awen oggeç Əjemar as olam talxatimt ta tazzarat dəy šin əssayat, əsleç y iyyən dəy əkkoz mudarən as inna s əməsli olân d eggag: «Iyyaw!» ² Təzzar əswadaç ənayax ays mallan as d-osa. Ays wen amawan-net ila təganzay. Itawakfa təkəbbut ta n tarna. Iğla, imos wa d-ornan, igâ deç ənnəyat n ad işitu annajax.

Əniləm ən talxatimt ta n sanatat

³ As olam talxatimt ta n sanatat, əsleç y əmudar wa n əşšin as inna: «Iyyaw!» ⁴ Təzzar ənayax ays iyyən igân təzuçay ta n təmsay. Itawakfa amawan n ays wen fərregat n ikus n alxer dəy əddənət, fəl ad tinəmənçin aytedan, itawakfa deç takoba zəwwərat.

Əniləm ən talxatimt ta n karadat

⁵ As olam Əjemar talxatimt ta n karadat, əsleç y əmudar wa n karad as inna: «Iyyaw!» Təzzar əswadaç ənayax ays kawalan. Wa iwanan ays wen, ittâf əlmizan dəy əfus-net. ⁶ Əsleç y a olân d əməsli a d-ifalan imudarən win əkkoz, igannu: «Ağanna ən təyya n alkama ças as itawarçam əzəl iyrâdan n əşşəçəl. Amaran arət wen əlqimat-net wər tokay təyya d ağanna n əşşəçir. Widi n azzayt d esmad n alçanab amaran a tan-wər-tədəsa.»

Əniləm ən talxatimt ta n əkkozat

⁷ As olam talxatimt ta n əkkozat, əsleḡ y əməsli n əmudar wa n əkkoz as inna: «Iyyaw!» ⁸ Təzzar əswadaḡ oggeḡ ays igân taddalət ta n yel təlhây təməllay. Wa iwanan ays wen, esəm-net təmattant, iddew d alaxirat. Təzzar tətawakfa təmattant d alaxirat tarna fəl təzunt ta n əkkozat n amaḡal, fəl ad anḡinat kərəz aytedan əs takoba əd laz əd təwərnawen əmosnen alwaba əd mudaran n əsuf win tattinen aytedan.

Əniləm ən talxatimt ta n səmmosat

⁹ As olam talxatimt ta n səmmosat, oggeḡ daw majmar wa zəwwəran n əsəqqəd ən təkutawen iman n aytedan win as tawaggan man-nasan fəl əddəlil n awal ən Məşşina əd təgəyya tolaḡat ta əgan daḡ batu n Əlməsix. ¹⁰ Ad saḡaren wəllen gannin: «Əməli, imosan əmizdag, imos tidət, har əmmay tətıluleḡ wər təwwəddabaḡ aytedan n əddənet, fəl a daḡ-san izəl əzni-nana wa ənḡalan?» ¹¹ İman n aytedan win ənaya daw majmar, akkiyyan daḡ-san itiwakfa təkadkat zagret mallat, təzzar itawann-asan ad əşşitin daḡ təzaydart har d-andin mədrayan-nasan win dər olan əşşəḡəl daḡ tarrayt ta n Əməli, s əntanay da əhan tarrayt n a dasan-tətəwəggu tanaxay zun ta dasan-tətawagga.

Əniləm ən talxatimt ta n sədisat

¹² Dəffər awen oggeḡ Əjəmar as olam talxatimt ta n sədisat. Təzzar iga amaḡal ənəgəynəgəy labasan. Təqqal təfuk şikawalat, təga təllit ketnet təzuḡay ta n əzni. ¹³ Fataqqen-du etran daḡ jənnawan fəl amaḡal, zund əmmək as tifətəktikan aratan n aşək a fəl d-igâr aḡu issohen. ¹⁴ Ad tatankalan jənnawan, gallin zun təsalat a din-tətatit, əmmədkalan ədḡaxan kul, əd gər wətlan win əhanen igərwan, tawakkasan daḡ daggan-nasan. ¹⁵ İmənokalan n əddənet kul d aytedan win daḡ-as əlanen almaḡam əd muzaran ən sojitan əd məggərgas əd kəl tarna d eklan əd lallan, kul əḡradan alaxas daḡ kəzman d ammas n ədḡaxan. ¹⁶ Gannin y ədḡaxan, əd təhun: «Fətəqqətət fall-ana. Səlxəsət-anax ad nugag wa iqqıman fəl təxawit ta n taymar. Səlxəsət-anax ad nənəməggəg d alham n Əjəmar, ¹⁷ id əzəl wa zəwwəran n alham-nasan a d-osan, amaran məni wa ifragan zəmmerat y-as?»

7*Təmeday n əgim d əkkozat təmərwen d əkkoz win təwar talxatimt ən Məşşina*

¹ Dəffər awen, oggeḡ əkkoz angalosan əbdâdnen daḡ əkkozat təḡəmmar n amaḡal. Əttâfan-in əkkoz aḡutan fəl amaḡal, fəl ad wər iger aḡu fəl amaḡal, wala fəl agarew, wala deḡ iger fəl aşək waliyyan. ² Təzzar əswadaḡ sa sər dənəg oggeḡ angalos iyyan itagazzayan əs jənnawan, ittâf talxatimt ən Məşşina di İddaran. İsaḡḡarat s əməsli issohen y əkkoz angalosan win əgrawnen tarna n igi ən təkma y amaḡal əd gərwan. ³ İnn-asan: «Ad wər tagim təkma y amaḡal, wala agaraw, wala eşkan, iket wər nəjjəjwal əs talxatimt ən Məşşina şikannaren ən naḡbidan n Əməli-nana.» ⁴ Təzzar əsleḡ y əket n aytedan win tətawasawar talxatimt ən Məşşina. Əmosan təmeday n əgim d əkkozat təmərwen d əkkoz ən tawşeten kul n İsrayil:

⁵ Maraw gim n awedan d əşşin daḡ tawşet ta n Yahuda

a təwar talxatimt ən Məşşina,
təwar maraw gim d əşşin daḡ tawşet ta n Ruben,
əd maraw gim d əşşin daḡ tawşet ta n Gad,

⁶ əd maraw gim d əşşin daḡ tawşet ta n Aşşer,
əd maraw gim d əşşin daḡ tawşet ta n Naftali,
əd maraw gim d əşşin daḡ tawşet ta n Manasay,

⁷ əd maraw gim d əşşin daḡ tawşet ta n Şiməḡon,

æd maraw gim d æššin daḡ tawšet ta n Lebi,
 æd maraw gim d æššin daḡ tawšet ta n Issakar,
⁸ æd maraw gim d æššin daḡ tawšet ta n Zəbulun,
 æd maraw gim d æššin daḡ tawšet ta n Yusəf,
 æd maraw gim d æššin daḡ tawšet ta n Benyamin,
 kul təwâr-tan talxatimt ten.

Təmmal n əljəməḡat

⁹ Dəffər awen əlasaḡ asawad, oggeḡ tiddawat zəwwərat wəllen, as wər t-illa i ifragan əšidən-net. Tiddawat ten təga daḡ ḡərfan n əddənət kul, æd tawšetən kul, æd təmattiwen kul, d awalan kul win tawašawalnen. Əbdâdan dat təxawit ta n taḡmar, dat Əjemar, əzlâgan šikadkaden zagrotnen mallolnen, əttâfan ilədlad ən tagayt. ¹⁰ Saḡaren s əməsli issohen, gannin: «Efsan Əməli-nana Məššina a tan-ihakkin s ənta a iwaran təxawit ta n taḡmar, ənta d Əjemar.»

¹¹ Təzzar əḡradan angalosan kul tebadday den da, ḡilayḡalayan təxawit ta n taḡmar, d əmḡaran, æd mudaran win əkkoz. Əssəjadan dat təxawit ta n taḡmar en, əḡbadän Məššina, ¹² gannin:

«Amin!
 Təmmalen æd tanaya æd masnat
 æd godan d ətəwəsəḡmar
 æd tarna æd fərregat,
 kul in Əməli-nana Məššina, har faw!
 Amin!»

¹³ Təzzar iššewal iyyan daḡ əmḡaran, inn-i: «Awak ma mosan win əzlagnen šikadkaden zagrotnen mallolnen en, mənīs d-əhan?» ¹⁴ Ənnəḡ-as: «Təssanaḡ awa mosan, Əməli-nin.» Təzzar inn-i: «Awen aytedan win d-əḡmadnen təssust ta labasat. Ərbazan šikadkaden-nasan, əssəmlalan-tanat s əzni n Əjemar. ¹⁵ Awen daḡ a fəl əbdadan dat təxawit ta n taḡmar ən Məššina, əḡbâdan-tu ehad d azal daḡ adag-net wa n əlḡibada. Amaran wa iqqiman fəl təxawit ta n taḡmar, *a dər-san z'inəməxsəran aḡəz-tan.* ¹⁶ Wər ilkem a tan-iggâz ḡələk, za wala fad. *Wər ilkem a tan-təlâs təfuk əzəḡḡəzzəb,* za wala tuksay waliyyat, ¹⁷ id Əjemar wa ihan ammas ən təxawit ta n taḡmar a dər-san z'annattafan, s əmmək as itanattaf amadan d aharay-net, awəy-tan əs šittawen n aman win sidurnen, təzzar *iməs Məššina iməttawan-nasan kul.*»

8

Əniləm ən talxatimt ta n əssayat

¹ As olam Əjemar talxatimt ta n əssayat, təga təfastit daḡ jənnawan tewadat amaḡal n aḡanna n alwaḡ.

Anasaḡ n əskawan win əssa

Angalosan win əssa

² Oggeḡ əssa angalosan win əbdadnen dat Məššina, as tawakfan iskawan əssa. ³ Təzzar osâ-du angalos iyyan ibdad ḡur majmar wa n əsəqqəd n aḡutan win əzodnen igân daḡ urəḡ, ittâf majmar əndərran n əsəqqəd ən taḡəlbast igân ənta da daḡ urəḡ. Itawakfa taḡəlbast təgget y a tat-isəqqad, təmos takutay, fəl majmar wa n əsəqqəd n aḡutan, dat təxawit ta n taḡmar, iddew awen æd təwatriwen ən mizdagan kul. ⁴ Iḡmad-du əhu ən taḡəlbast ten əfus n angalos, iggəzzay dat Məššina, iddew awen æd təwatriwen ən mizdagan. ⁵ Dəffər awen inkar angalos əs majmar wa n əndərran n əsəqqəd ən taḡəlbast as kala da ittaf-tu, idkar-t-idu šimakaten əḡḡanen daḡ majmar

wa n əsəqqəd n ađutan, igar-tu fəl amađal. Əmalan-tu eggagan, əd maslan, d esman, d ənəgəynəgəy n amađal. ⁶ Təzzar ənkarən əssa angalosən win əttafnən iskawan win əssa ad simutugan y anasağ-nasan.

Əkkoz əskawan win tawansağnən day tizarat

⁷ Insağ angalos wa azzaran esək wa ittaf, təzzar əmalan-tu dagrazan əd təmsay ərtaynən d əzni, iffay-du awen kul fəl amađal. Tərakammat təzunt ta n karadat n əddənət, tərakammat təzunt ta n karadat n eşkan kul, irakammat yel kul.

⁸ Insağ angalos wa n əşšin esək wa ittaf. Itawagar-du arət olân d ədyağ zəwwəran ibilaglagan, irtak day agaraw. Təqqal təzunt ta n karadat n agaraw ketnet azni. ⁹ Təzzar təmmut təzunt ta n karadat ən mudaran win əhanən agaraw, təhlak dey təzunt ta n karadat n əğlalan n aman kul win əwarnən agaraw.

¹⁰ Insağ angalos wa n karad esək wa ittaf. Irtak-du ətri zəwwəran day jənnawan, igân əbələzləz an abela ən təmsay, irtak fəl təzunt ta n karadat ən gərwan win əngaynən, əd şittawen n aman. ¹¹ Atri wen esəm-net «Abəsintəs». Təmməttay təzunt ta n karadat n aman n əddənət, təqqal aman samomnən, əgânen təssəməmt ta da iga abəsintəs. Təzzar aba aytedan aggotnən win əşwânen aman win den.

¹² Insağ angalos wa n əkkoz esək wa ittaf. Təzzar ihlak awen təzunt ta n karadat ən təfuk, əd təzunt ta n karadat ən təllit, əd təzunt ta n karadat n etran. Awa day-san immar awen kul iqqal şiyay. Ezal da təgmad-tu təzunt ta n karadat n ənnur-net, ehad dey awen da.

Ətəwəmal n əlwabatan win karâd

¹³ Təzzar əswadağ ənayax tənagmart təggâdat day təsəggərigərəyt ən jənnawan, əsley as təgannu s əməsli issohen: «Xaşša! Xaşša! Xaşša wəllen i win əhanən əddənət, çur anasağ n əskawan win z'ənsəğan angalosən win karad dəffər win!»

9

Anasağ n asak wa n səmmos

¹ Inkar angalos wa n səmmos insağ esək wa ittaf. Oggeç atri as d-irtak day jənnawan fəl amađal. Atri wen itiwakfa təsassarut n əxəçi wa wər nəla eder. ² Olam əxəçi wa, iggəzzay-du day-as əhu olân əd wa d-igammadan əxəçi a day təmihandar təmsay. Arat wen issəkwal təfuk, d əlhawa ketnet. ³ Təzzar əgmadan-du əjwalan əhu wen, əllilan əddənət ketnet. Tawakfan əjwalan win talbast togdât əd ta n təzurdam. ⁴ Itawarğam-asan fəl igi n a imosan təkma i taddalət a təqqal, gər za yel a ilsan amađal, wala eşkan. Kalar tawamaran s ad zəğxəzzəban aytedan ças win as wər iwer ejwal ən Məşşina şikannaren-nasan. ⁵ Wər tawakfan turagat ən tanaxay n aytedan win den kərəz. Kalar tawamaran ças s a tan-zəğxəzzəban wəllen har səmmosat təlil. Amaran əsəsnən ən tədud n əjwalan win den, ogda əd wa n taddod ən təzardəmt. ⁶ Azzaman win den a day-san səddirənan aytedan təməttant, mişan wər tat-z-əgrəwan. Ad gammayan təməttant, tətənəməggig dər-san.

⁷ İjwalan win den olân d əggəsan simatagnən y iki n əməgər. İçafawan-nasan iwar-tan arət olân əd təkəbba ən tağmar əgânen day urəç, amaran udmawan-nasan olan əd wa n əggadəm. ⁸ İjəkkad-nasan olân əd jəkkad ən tədoden, işenan-nasan olân əd şenan n ahar. ⁹ İdmâran-nasan ils-en arət olân əd təzoli, amaran imaslan n əfrutan-nasan olân d əməsli n amalankaytan n əməgər əlwâyan əggəsan aggotnən, ozâlan s adag n əməgər. ¹⁰ Əlân şisbaten olânen əd şin təzurdam, əlânen işkaran zun win day ən təzardəmt, amaran imawan ən təsbaten-nasan en da a day iddew aşşar n igi ən təkma labasat y aytedan har səmmosat təlil. ¹¹ Ark angalos n Aşşaytan wa ihan əxəçi wər nəla eder, a imosan əmənokəl n əjwalan win den. Esəm-net day

təlxibrit Abaddon, daɣ awal ən Kəl-Əlyunan esəm-net Aboləyon, almaɣna n awen «Əmahlak.»

¹² Okay albala wa azzaran, amaran əllan-tu əşšin wiyyad as kundaba əlkaman-as-du.

Anasay n asak wa n sədis

¹³ Insay angalos wa n sədis esək wa ittaf. Təzzar əsleɣ y əməsli a d-igmâdan [əkkozat] təxəmmar ən majmar n urəɣ wa illan dat Məşşina, imosan majmar wa n əsəqqəd n adutan. ¹⁴ Əməsli wen igannu y angalos wa n sədis ittafan esək: «Ara-du əkkoz angalosan win əqqannen daɣ təgadamayt n agarew wa zəwwəran, a t-imosan Efrat.»

¹⁵ Təzzar tawâran-du angalosan win əkkoz en tiwasamatagnen y alwaq wen da, daɣ əzəl wen da, daɣ təllit ten da, daɣ awatay wen da, fəl ad əhləkan təzunt ta n karadat n aytedan kul n əddənet. ¹⁶ Əmosan sanatat təmad ən miləyaw n amawan n ays. Ənta den da meɗan-nasan, amaran əsleɣ-as. ¹⁷ Əmmək da was di-du-nafalalan əggəsan win den əd mawanan-nasan daɣ targət-in. Əggəsan win, idmaran-nasan ils-en əxər igân karad əlmawan əmosnen: təzuxay ta n təmsay, əd taddalət ta n jənnawan tədâgat sa sər takkawalt ta n təhunt iyyat təlât almaqam as itawannu safır, əd təruxay ta n adaxas-ən-tahart. İxafawan n əggəsan win, olân əd xafawan ən harran, imawan-nasan təgammad-tan-du təmsay d əhu d adaxas-ən-tahart irxân. ¹⁸ Albalatan win karad en əmosnen temsay d əhu d adaxas-ən-tahart irxân, əhlakan təzunt ta n karadat n aytedan kul n əddənet. ¹⁹ Fəlas tarna n əggəsan win den, təha imawan-nasan, əd təsbaten-nasan, id şisbaten-nasan olânat əd taşşolen, əlânat ixafawan as tagginat y aytedan təkma labasat.

²⁰ Mişan aytedan win wər aba daɣ albalatan win den, wər ətuban daɣ ark aratan win tamazalan. Wər əmməzzayan d əlxibada ən kələsuf, wala əssənəman n urəɣ əd win əzrəf əd win daroy əd win təhun əd win eşkan. Əssənəman win den, wərmad za as hannayan, wala sallin, wala əfrâgan əmətəkwəy. ²¹ Aytedan win, wər ətuban daɣ igi ən man, wala igi ən şaxawan, wala əzzəna, wala şikra.

10

Elkəttab wa əndərran

¹ Dəffər awen oggeɣ angalos iyyan iknân təla ən tarna, itazabbat-du daɣ jənnawan, ils-ay əgnaw zun awedan ilsan təkadkat zagret. Eɣaf-net təɣlay-tu təgələllet təgât daɣ təzzəl-adar təbilazlazat. Udəm-net ibilazlaz s ənnur zun təfuk. Elyan-net olân əd lallagan ən təmsay. ² Ittaf daɣ əfus-net arat n əlkəttab innolaman. Issənsa adar-net wa n əxil fəl agaraw, issənsa wa n zalgat fəl amaɗal.

³ İga y əməsli-net adakal issohen, olân əd tənagawt n ahar. As iga y əməsli-net adakal wen, əgan eggagan win əssa əmosnen zun awal. ⁴ Təzzar əgmaya d ad əggəza şin akatab n awa ənnan eggagan win den. Amazay wen daɣ ad əsleɣ y əməsli a d-igmadan ijənnawan as di-inna: «Əxbər daɣ əwəl-nak awa ənnan eggagan win əssa di. A daɣ-as wər təktəba wala!»

⁵ Təzzar inkar angalos wa ənayax ibdâd fəl amaɗal d agaraw izzal əfus-net wa n əxil sa sər jənnawan, ⁶ ihad s esəm ən wa iddaran har faw, s ənta a d-ixlakan ijənnawan d awa tan-ihan, d amaɗal d awa t-iwaran, əd gərwan d awa tan-ihan, as wər tu-za-tələs təmastant emel. ⁷ Mişan amazay wa daɣ iggaz angalos wa n əssa şin anasay n asak wa ittaf, ənta a daɣ z'assandu Məşşina əsənnəfiləl n əssir-net, s əmmək was isabbayyan isalan win den i naxbidan-net, a tan-imosan ənnəbitan.

⁸ Təzzar ilas-i əməsli was əsleɣ den awal daɣ jənnawan inn-i: «Ədkəl arat n əlkəttab əndərran wa ihan əfus n angalos wa ibdadan fəl agaraw d amaɗal.» ⁹ Əkkey angalos ənnəx-as a di-d-akfu əlkəttab wa əndərran en. Inn-i: «Ədkəl-tu tatsaq-qu.

Ad tədnəy təsəmmay-net tadist-nak, mišan dağ əmi-nak iga şizada an turawat.»
¹⁰ Ədkala-du arat n əlkəttab wen dağ əfus n angalos en, ətşeq-qu. Iga şizada an turawat dağ əmi-nin, mišan as t-ətşex, tədkar tadist-in təsəmmay-net. ¹¹ Dəffər awen itawann-i: «Harwada iwar-kay amel ən salan win d-izazzabbat Məşşina dağ batu ən təmattiwen aggotnen, əd xərfañ aggotnen, d awalan əd mənokalan aggotnen.»

11

Şigəyyawen şin sanâtat

¹ Təzzar tawakfağ agabal ən telant, olân əd təburək tas tətəggu takkot. Itawann-i: «Ənkər, təkətağ edag n əlxibada ən Məşşina, əd majmar wa n təkutawen, təxsəba win dağ-as əxbadnen. ² Mišan ağarğar wa ixlayan edag wa n əlxibada, ayy-ay s aganna, a tu-wər-təkəta, fəlas itiwakfa y aytedan win wər nəksud Məşşina. Aytedan win di ad agin əkkozat təmərwen ən təllit əd sanatat tidəyəzdəyizan ağrəm wa zəddigan di. ³ Amaran a din-assagla sanatat təgəyyawen, əmosnen ənnəbitan-in, əlsânen şibəddəğ ən təfəyyawt. Ənnəbitan win ad əmmalan isalan a d-izizabbat Əməli har agin agim n əzəl əd sanatat təmad əd sədisat təmərwen. ⁴ Şigəyyawen şin sanatat en əmosnat əşşin eşkan ən zaytun əd sanatat fətəlaten şin əzzəkəkatnen dat Əməli n əddənət. ⁵ As ira awedan igi y-asnat təkma, a du-təgməd təmsay əs mawan-nasnat təsərrəkəmmət-tu. Awalla, wa iran igi y-asnat təkma, əmmək en dağ as tu-z-iba. ⁶ Ənnəbitan win əşşin en əmosnen şigəyyawen-in əlân fərregat n agadal y akonak ewet dağ azzaman win dağ əmmalan isalan win d-izazzabbat Əməli. Əlân fərregat n əsəmməttəy n aman əqqəlan azni. Əfragan dəğ a d-awəyan s əddənət əzzənəfan aggotnen n albalatan, iket ərân awen.»

⁷ Mišan as əğradan təgəyya ta taggin den, a dər-san ammagar əmudar səksədan wa du-z-igmədan əğəxi wər nəla eder, arn-en, anğ-en kərəz. ⁸ Şiməxxa-nasan ad ansinat fəl tarrayt dağ ağrəm zəwwəran wa dağ itawataytay Əməli-nasan. Ağrəm wen itawann-as «Sədom» əd «Masar», imos awen tədugent as isinafal Məşşina awa t-id-izayan. ⁹ Edes n aytedan ən təmattiwen kul əd tawşeten kul d awalan kul əd kallan kul ad agin karad adan d aganna hannayan şiməxxa n ənnəbitan win əşşin en, əgdəlan-asan dəğ a din-təwənbəlan. ¹⁰ Iba-nasan isidawat aytedan n əddənət kul, har as əknân saday, tinəməggin şinəfas gar-essan, id əzəğxəzzəb aggen a dasan-əganat təgəyyawen şin sanatat en.

¹¹ Mišan dəffər karad adan d aganna win, iga Məşşina infas ən təməddurt dağ ənnəbitan win aba den, əddaran-du, əbdadan. Təggaz tasa səksədat aytedan win tan-ənaynen. ¹² Əslan dağ jənnawan y əməsli issohen igannu y ənnəbitan win əşşin: «Gəzzayat-du sa da!» Əggəzzayan əs jənnawan əhân ignawan, hânnyan-tan zəngan-nasan. ¹³ Amazay wen da a dağ iga amağal ənəgəynəgəy labasan, təbarajjat təzunt ta n marawat n ağrəm en, təzzar aba əssa gim n awedan dağ əhluk wa igan den. Win d-əragən dağ awen, təggaz-tan tasa səksədat, əssəğmaran Məşşina di n Əməli ən jənnawan.

¹⁴ Okay alwaba wa n əşşin, amaran wa n karad izay-du tarmad.

Anasay n asak wa n əssa

¹⁵ Insay angalos wa n əssa esək wa ittaf. Itawasla i maslan zawwarnen dağ jənnawan. Imaslan win den gannin: «Əmərədda tarna ta n tizart y əddənət şin Əməli-nana Məşşina d Əlməsix-net. Ad iqqəl əmənokal har faw.»

¹⁶ Ənkaran əmğaran win sanatat təmərwen d əkkoz əqqimnen fəl təxiwa-nasan dat Məşşina, fataqqen dəx amađal, əssəjadan, əğbadan Məşşina. ¹⁷ Ad gannin:

«Nəggoday-ak Əməli,

kay a imosan Məşşina di n əməli ən tarna kul,

kay a t-illan əmərədda,

təlleq-qu dəx kala da.

Nəggoday-ak id əşşəxəl a təgeş tarna-nak zəwwərat

y ad təssəbdəda təğmar-nak,

¹⁸ şimattiwen n əddənət iggâz-tanat alham labasan,

mişan əmərədda alham wa nak a d-ewadan.

Alwaq wa n əşşərixa ən nəmməttan a d-osan.

Alwaq ewad-du wa dəx za tərzəmaş y eklan-nak

a tan-imosan ənnəbitan,

takfaq-qan arozan-nasan,

əntanay əd mizdagan kul,

d aytedan kul win miksadan-nak,

gər win muzaran wala win tan-wər-nəmos.

Alwaq ewad-du wa n əhluk ən win hallaknen əddənət!»

¹⁹ Təzzar innolam ahan n əlyibada ən Məşşina wa ihan ijənnawan, inafalal-du dəx-as əssənduq wa n arkawal ən tassaq. Dəffər awen əgan esman, əmalan-tu maslan d eggagan d ənəgəynəgəy n amađal əd dagrazan labasnen.

12

Ənəfilal ən təntut ta təgat tadist

¹ Tənafalal-du alğalamat zəwwərat dəx jənnawan: Alğalamat ten təmos tantut təlsət təfuk, təlla təllit daw daran-net, təssiwar təkəbbut ta n tarna təgat dəx maraw etran d əşşin. ² Təsikaray əd təlawayt n iguz n əmzur. ³ Tənafalal-du alğalamat iyyat dəx jənnawan. Imos awen əməxluk olân d əzzənəf n ağata igân təzzəwwərt səksədat. Iga təzuşay a n təmsay, ila əssa şafawan əd maraw əskawan, amaran əkkulluk n iyyan dəx şafawan win den təwar-tu təkəbbut ta n təğmar. ⁴ İfrađ əs təsbat-net təzunt ta n karadat n etran, igar-tan-du fəl amađal. Təzzar imal əməxluk wen dat təntut ta tətaggazat amzur fəl ad atşu barar-net dəx amazay wa da dəx du-z-ihəw. ⁵ Təntut ten təgraw barar ən yay, s ənta a z'izaran i təmattiwen n əddənət kul əs təğmar təknât assahat. Təzzar immeway barar wen əs təxawit ən təğmar ta fəl iqqim Məşşina. ⁶ Təddəggag təntut ten s əsuf təkka edag iskât Məşşina y awen. Den da a dər-əs z'agu ənəttaf har əgim n əzəl əd sanatat təmad, əd sədisat təmərwen.

⁷ Təzzar iga əməgər dəx jənnawan. İmməgar Mikayil d angalosan-net d əməxluk wen. İmməgar dər-san dəx əməxluk ənta d ark angalosan-net. ⁸ Mişan itawarna əməxluk d angalosan-net, ab-as dasan-t-illa adag dəx jənnawan. ⁹ Əməxluk wa zəwwəran en, imosan aşşol wa irəwan, as itawannu İblis, itawann-as dəx Aşşaytan, s ənta a isaxrakan aytedan dəx adag kul wa əhan dəx əddənət, itawagar-du fəl amađal, iddew d angalosan-net. ¹⁰ Dəffər awen əsleş y əməsli issohen igannu dəx jənnawan: «Əmərədda alwaq wa n efsan osa-du! Əmərədda Əməli-nana isinafalal tarna-net, əd təğmar-net! Əmərədda təğmar təlla gər fassan n Əlməsix-net, id Aşşaytan s ənta a isawaran imədrayan-nana lahanan dat Məşşina ehad ezal, a d-itawakkasan dəx jənnawan, itawagar-du s amađal. ¹¹ Mişan ya ornan-tu mədrayan-nana win əs tarrayt n əzni n Əjəmar əd tarrayt ən salan n Əlinjil win əmalan. Əqbalan tehakkay

ən man-nasan, iba-tan daɣ tarrayt ten. ¹² Dawatat daɣ adi ijənnawan əd win tan-əzdaɣnen! Mišan iket alɣazab ill-ay y amaɗal əd gərwan, id Iblis izzəbbat-in sərwan, ih-ay alham wəllen, fəlas alwaq əndərran a das d-iqqiman, amaran issân daɣ awen.»

¹³ As inay əməxluk as itiwagar-du fəl amaɗal, istaɣ tantut ta təggazat amzur ən barar ən yay. ¹⁴ Mišan tətawakfa təntut ten əşšin əfrutan ən tənəgmart ta zəwwərat. Emmək en daɣ as təfrag şigget s əsuf, s adag wa daɣ za tənəməggag d aşşol. Den daɣ a dər-əs z'agu ənəttaf har karad elan d aganna. ¹⁵ Təzzar ifsa-du aşşol aman əmosan zun agarew dəffər təntut, fəl a tat-əbətan. ¹⁶ Mišan illil amaɗal i təntut. Ora amaɗal imi-net, ilmaz agarew wa d-ifsa əməxluk. ¹⁷ Əməxluk ih-ay alham labasan ən təntut, təzzar igla y ad ammagar əd maddanəs ən təntut win hadatnen, a tan-əmosnen win əbbərdagnen y alwajiban ən Məşşina, tagayyen daɣ batu ən Ƴaysa Elməsix. ¹⁸ Dəffər awen ikka əməxluk təgadamayt n agarew, isammatag y əməgər.

13

Ənəfilal n əmudar səksədan wa d-igmadan agaraw

¹ Dəffər awen oggeɣ əmudar səksədan as d-igmad agaraw. Əmudar wen ila maraw əskawan, d əssa ɣafawan. Əkkulluk n iyyan daɣ əskawan-net təwar-tu təkəbbut ta n tarna, amaran əkkulluk n iyyan daɣ ɣafawan win əssa en, iwâr-tu esəm imosan ikus ən tarna i Məşşina. ² Əmudar wa oggeɣ den, ola d əzzənəf n adal. Idaran-net olân əd daran n əmudar iyyan igân urəs, imi-net ola d əmi n ahar. Ikf-ay əməxluk tarna-net, əd təxawit-net ta n taɣmar, əd taɣmar zəwwərat. ³ Iyyan daɣ ɣafawan-net olâ d as ih-ay əbus inaqqin, mišan izzây. İqqanan ɣafawan n aytedan n əddənet kul, əlkaman y əmudar wa səksədan en. ⁴ Əssəjadan aytedan dat əməxluk id taɣmar-net a ikfa y əmudar. Əɣbadan əmudar, gannin: «Məni-tu wa olân d əmudar wa səksədan, məni wa ifragan əməgər-net?» ⁵ İgraw əmudar wa səksədan en fərregat n igi ən batuten əmosnen zazwar ən man-net, d ikus ən tarna i Məşşina. İgraw turagat n igi ən mazalan win den, har əkkozat təmərwen ən təllit əd sanatat. ⁶ Ad itakkəs əmudar en tarna i Məşşina, d adag wa iha, əd win əzdaɣnen ijənnawan kul. ⁷ Itawakfa fərregat n əməgər əd mizdagan ən Məşşina əd tarna-nasan. Itawakfa tizart i tawşeten kul əd təmattiwen kul d aytedan a əşşewalnen awalan kul əd kallan kul. ⁸ Aytedan n əddənet kul ad t-əɣbədan ar win as əktaban esmawan-nasan daɣ əlkəttab wa n təməddurt harwa ɣur əxluk n əddənet. Elkəttab en in Əjemar wa igzaman iqqal takutay.

⁹ Wa isallin aslet! ¹⁰ Kud kasaw a itaggaz awedan ad t-iggəz. Kud ətəwənyə a z'agu əs təzoli, a sər-əs itəwənyu. Win əmosnen imizdagan ən Məşşina, alwaq-nasan da da wa n əşitəy ən zəmmerat d əzəgzan.

Ənəfilal n əmudar wa d-igmadan amaɗal

¹¹ Təzzar oggeɣ əmudar iyyan səksədan as d-iggəzzay igmâd-du amaɗal. Əmudar wen ila əşšin əskawan olânen əd win akar, amaran itaggu awal olan əd wa n əməxluk. ¹² İşşəşɣal tarna kul n əmudar wa azzaran a d-osan dat-əs, təzzar eway-du s amaɗal əd win t-əwarnen, as əssəjadan y əmudar səksədan wa azzaran as izzay əbus-net imosan abus inaqqin. ¹³ Ad itaggu təlməxjujaten zawwarnen, har as temsay a d-izazabbat daɣ jənnawan fəl amaɗal, əswâdan aytedan. ¹⁴ İssəxrak aytedan n əddənet əs təlməxjujaten şin as igraw igi-nasnat dat əmudar wa das-d-azzaran. İgannu y aytedan ad agin şaşşelan n əmudar wen, təsabasa takoba, iddar-du. ¹⁵ İgraw fərregat n igi ən man daɣ şaşşelan n əmudar wa das-d-azzaran, təzzar eway-du awen əs şaşşelan wen as išawal, isasanyu deɣ kərəz aytedan win ugaynen s ad t-əɣbədan. ¹⁶ Eway-du as aytedan kul, gər win wər nəla almaqam, wala

win t-əlānen, gər win məggərgas wala win məggənza, gər ilallan wala eklan, kul išahhaşşal-tan as iwar ejwal-net ifassan-nasan win əxil, madex şikannaren-nasan. ¹⁷ Təzzar ab-as t-illa awedan ilān turagat n ad azzanzu, wala dex azzanz-in ar s ad t-iwar ejwal n əmudar wen d esəm-net, madex međan wa iddewan d esəm-net. ¹⁸ Den dağ ad za tagu addararat əs tayttay əd masnat. Wa ilan tayttay, ixşəbet međan n əmudar wen. Međan wen immittal esəm n awedan, amaran imos sədisat təmad əd sədisat təmərwen əd sədis.

14

Ənəfilal n Əjemar əd međan wa n 144000

¹ Elasağ asawad, oggeğ Əjemar ibdād fəl ədğax wa n Səyon. Əllān xur-əs aytedan əmosnen temeday n əgim d əkkozat təmərwen d əkkoz. Aytedan win den iwār esəm n Əjemar d esəm n Abba-net şikannaren-nasan. ² Əsley y əməsli a d-igmadan ijənnawan. Əməsli wen ola d əjit zəwwəran n aman aggotnen d əməsli n eggag zəwwəran, ola dex d əməsli ən təhərdanen aggotnen. ³ Aytedan win den əssiggadan dağ təmmal iyyat taynayət dat təxawit ta n taymar, dat mudaran win əkkoz d əmyaran. Wər t-illa awedan ifrāgan ad issən təmmal ten, ar temeday n əgim d əkkozat təmərwen d əkkoz, win d-isaddarfət Məşşina dağ aytedan n əddənet. ⁴ Əntanay wər sammadasan iman-nasan s əzzəna fəlas wər kala ad əlan tassağ waliyyat əd tədoden. Əlkāman y Əjemar s adag kul wa ikka. Tawasadarfen-du dağ aytedan əmosan zun tənfa ta tazzarat ən təwəgas təskātət i Məşşina d Əjemar. ⁵ Amaran imawan-nasan wər tan-d-igmed a imosan bahu, wər t-illa a imosan lahan a tan-iwāran.

Ənəfilal n angalosən win karād əd mazalan win d-əssəglan

⁶ Təzzar oggeğ angalos iyyan as iggad dağ təsəggərigərəyt ən jənnawan. Angalos wen eway Əlinjil di ixlalan a z'iməl y aytedan n əddənet, dağ kalla kul əd tawşeten kul d awalan kul əd təmattiwen kul. ⁷ İdkāl əməsli-net wəllen igannu: «Səymərat Məşşina, tagim-as adkul wa dər ihor, id alwağ osa-du wa dağ z'agu əşşərixa-net. Əxbədat wa d-ixlakan ijənnawan d amađal d agaraw əd şittawen n aman.»

⁸ İnkər angalos iyyan wa n əşşin, ilkam-du i wen, igannu: «Babəylon ta n təmizwart, tuda! Awalla tuda Babəylon tas tallabast n igi-net əzzəna, ihan əlmital n əşşəwi n aytedan esmad, təsəxrək şimattiwen kul n əddənet, teway-du sər-əsnat as tanat-ibaz əşşərixa ən Məşşina.»

⁹⁻¹¹ İlkam-as-du angalos iyyan wa n karad, igannu s əməsli ihhoken: «Aytedan win əxbadnen əmudar wa səksədan əd şaşşəlan-net, iwār-tan asannal-net dağ təkannaren, madex ifassan, win di ad aşwin esmad wa n alham ən Məşşina. Esmad wen izdār amaran a dasan-itəwəggu dağ təkabart ta n alham ən Məşşina, agin alğazab səksədan igan əs təmsay d adaxas-ən-tahart irxān, dat angalosən a zaddoggen d Əjemar. Əhu n alğazab-nasan, ill-ay har faw, amaran wərmad a dasan-tu-təlla təsasmit ehad, za wala ezal. ¹² Alwağ wen ənta wa n zəmmerat ən mizdagan ən Məşşina, əbbirdagnen y alwajiban-net, əknān dex təlxudəla i Үaysa.»

¹³ Dəffər awen əsley y əməsli a d-ifalan ijənnawan as inna: «Ektəb as: "Əbbilalan aytedan win as harwa əmərədda da ertāyan d Əməli, iba-tan dex ertāyan dər-əs." Awalla, inna İnfəs wa Zəddigan, assanfinet dağ əşşəğəl wa əgan, fəlas ad əgrəwan maruzat ən mazalan-nasan.»

Ənəfilal ən tənfa ta du-təgmadat amađal

¹⁴ Elasağ asawad oggeğ agnaw mallan. Agnaw wen təqqim fall-as azzat tolāt əd ta n aggadəm. Əxaf-net təwar-tu təkəbbut ən taymar təgāt dağ urəğ, ittāf əlmoşi iwalan wa n allay ən təwəgas.

¹⁵ Dəffər awen igmad-du angalos iyyan ehan n əlxibada isaxxarat wəllen inna i wa iqqiman fəl əgnaw: «Şəşxəl əlmoşi-nak wa n allay, taləya xarat. Alwaq ewad-du wa n əmiləy ən xarat, annabatan win əwarnen amaḍal əḥḥən.» ¹⁶ Təzzar inkar wa iqqiman fəl əgnaw olay s əlmoşi-net awa iwaran amaḍal ketnet daḡ tənfa.

¹⁷ Dəffər awen igmad-du angalos iyyan ehan n əlxibada wa ihan ijənnawan. Ənta da ila əlmoşi iwalan wa n allay ən təwəgas.

¹⁸ Təzzar igmad-du angalos iyyan majmar wa n təkutawen. Angalos wen ixkâm fəl təmsay, idkal əməsli-net wəllen, inna s əməsli issohen i wa ittafan əlmoşi iwalan wa n allay ən xarat: «Şəşxəl əlmoşi-nak wa n allay ən xarat, taləyaḡ-du ara n alxanab kul wa iwaran amaḍal, fəlas şibaşakşaken-net kul əḥḥənət, isimatag y əşşəriḡa ən Məşşina.» ¹⁹ Təzzar olay angalos s əlmoşi-net, alxanab kul wa iwaran amaḍal, igartu ketnet daḡ təgdayt ta daḡ itawazmu alxanab, a tat-imosan tagdayt zəwwərat ta n alham ən Məşşina. ²⁰ Təzzar itawadayzdayaz alxanab wen itawazma sədi y əxṛəm. Ingay-du daḡ-as əzni har ilsa karadat təmad ən kilaw, iggəzzay har ewad edag ən karad xalan.

15

Ənəfilal n angalosan win əssâ d agaraw

¹ Təzzar ənaya daḡ jənnawan alxalamat iyyat zəwwərat, təkənât əsəmməkləl, təmosat: Əssa angalosan əttafnen əssa alwabatan win əlkammen s əntanay a daḡ d-inda alham ən Məşşina. ² Ənayax arat olân d agaraw igân daḡ arat a d-isaktin təlfənjart tərtaḡat əd təmsay, amaran əbdâdan fall-as win ərzanen əmudar səksədan əd şaşşelan-net əd meḍan wa iddewan d esəm-net, ətâfan şihərdänen a tan-ikfa Məşşina. ³ Əssiggadan daḡ təmmal n əkli ən Məşşina, a t-imosan Musa əd təmmal ta n Əjəmar, gannin:

«Igitan-nak zawwarnen, simaklalan, ya Əməli Məşşina!

Kay a imosan məşşis ən tarna kul!

Tarrayen-nak əntanatay a oḡadnen, əmosnat tidət, ya Əmənokəl ən təmattiwen.

⁴ Ma imos wa ewadan a kay wər iksud ya Əməli?

Ma imos wa wər za nəssəxmər esəm-nak?

Fəlas kay xas a imosan əmizdag.

Amaran tawşeten kul a d-asinat, əḡbadnat-kay, fəlas igitan-nak oḡadnen a nafalalnen.»

Şikərwesen şin əssâyat n alham ən Məşşina

⁵ Dəffər aratan win den, əswadaḡ oggeḡ edag wa zəddigan n ahaket wa n əmənəy as innolam daḡ jənnawan. ⁶ Təzzar əgmadan-du angalosan win əssa edag wa zəddigan əttâfan alwabatan win əssa, əlân tabdoḡ ən lin iqqitasan isiraqqen, otâban idmaran-nasan əs sutab n urəḡ. ⁷ Inkar iyyan daḡ mudaran win əkkoz, ikfa angalosan win əssa əssayət təkərwesen n urəḡ ədkârnen alham ən Məşşina di iddaran har faw! ⁸ Idkar adag wa zəddigan əhu a d-ifalan tanaya ən Məşşina əd tarna-net. Wər t-illa i ifragan iguz n adag wa zəddigan en, iket wər ənden əssa alwabatan win d-ewayan angalosan win əssâ.

16

¹ Dəffər awen əsleḡ y əməsli zəwwəran as d-igmad ehan n əlxibada, inna y angalosan win əssâ: «Aḡliwat tənḡəlam fəl amaḍal ketnet əssayət təkərwesen şin alham ən Məşşina.»

² Təzzar igla wa azzaran dağ-san, inçal təkərwast-net fəl amaḍal. Əwatnat šiqqas labasnen aytedan kul win iwar ejwal n əmudar, əxbâdan şaşşelan-net.

³ Inçal angalos wa n əşşin təkərwast-net fəl gərwan, əqqalan aman-nasan azni olân d əzni n ənəmmettən. Immut id t-illa əmudar kul ihan igərwan.

⁴ Təzzar inçal wa n karad dağ-san təkərwast-net dağ təsəssəngay əd şittawen n aman, əqqalnat azni. ⁵ Əsleḡ y angalos wa inəttafan d aman igannu:

«Toḡâda, kay wa t-illan əmərədda,
təlleq-qu kala da, təmosaḡ əmizdag,

id əmmək wa da

as təkəməḡ aratan win y aytedan n əddənət.

⁶ Fəlas tanaḡla a əgan azni ən mizdagan d ənnəbitan,

amaran təkfeq-qan azni y ad t-aşwin,

id əhoran dər-əs.»

⁷ Əsleḡ i majmar wa n təkutawen igannu:

«Awalla, Əməli Məşşina

s ənta a imosan məşşis ən tarna kul,

əlxəkuman-net tidət a mosan, oḡâdan.»

⁸ Inçal angalos wa n əkkoz təkərwast-net fəl təfuk, tətawakfa təfuk fərregat n akaway n aytedan. ⁹ Tosa-du tuksay labasat ad təkaggay aytedan. Təzzar ad takasan tarna y esəm ən Məşşina s ənta a ixkaman dağ alwabatan win, edag an a das-ətuban əssəxməran-tu.

¹⁰ Təzzar inçal angalos wa n səmmos təkərwast-net fəl təxawit ta n taḡmar n əmudar wa səksədan. Əlsanat šiyyay taḡmar n əmudar, əgan aytedan təkəraḡit tas har əqqiman əddâdan idədwən-nasan. ¹¹ Ad takkasan tarna i Məşşina di n Əməli ən jənnawan fəl əddəlil ən təsənnay səksədət ta taggin əd šiqqas şin tan-əhanen, wər ətuban dağ mazalan-nasan.

¹² Inçal angalos wa n sədis təkərwast-net fəl agarew wa zəwwəran n Efrat. Əstakan aman-net, fəl ad təmmutəḡ tarrayt ən mənokalan a d-əfalnen dənnəḡ. ¹³ Təzzar oggeḡ imi n əməxluk, əd wa n əmudar, əd wa n ənnəbi ən bahu as tan-d-əḡmadan karad aşşayatınan əhânen assawwarat ən garan. ¹⁴ Aşşayatınan win den əntanay a tagginen təlməxjujaten, əntanay deḡ a z'akkinen imənokalan n əddənət kul y a tan-d-əşşidəwan y əməḡər wa z'agin dağ əzəl wa zəwwəran n Əməli Məşşina di s ənta məşşis ən tarna kul. ¹⁵ Ənta da awa z'agin: a din-agay assa zun wa d-itaggu abaydag. İbbilal wa okayän, iqqân isəlsa-net fəl ad wər ijəwənkət izzâf tətəwənəy alḡawrat-net. ¹⁶ Təzzar əşşədawan-du aşşayatınan imənokalan n əddənət kul dağ adag iyyanda. Edag wa itawann-as dağ təlxibrit: «Armagedun».

¹⁷ Inçal angalos wa n əssa təkərwast-net dağ alhawa. Təzzar igmad-du əməsli issohen ehan wa zəddigan əd təxawit ta n taḡmar ən Məşşina igannin: «Arat kul iḡrad!» ¹⁸ Əgan esman əd maslan d eggagan, iga amaḍal ənəḡəynəḡəy as wa d-əwaran aytedan tesayt n amaḍal wər iga ənnux-net. ¹⁹ Təzzar iga əḡrəm wa zəwwəran ən Babəylon karadat təzunen. Barajjen ḡərman ən kallan kul. Aḡrəm wa zəwwəran ən Babəylon ikittəw Məşşina ibakkadan-net. Adi a fəl t-işşəşwa təkabart n esmad n alḡanab immittalan alham-net d əşşəriḡa-net labasnen wəllen. ²⁰ Təzzar əmasan kallan kul win gərwətlan, aba təmayyamayt n ədḡayan. ²¹ A du-tifətəqqen dagrazan as akkiyyan dağ-san imos əzuk-net edag n əkkozat təmərwən ən kilaw, rattakan fəl aytedan. Ad takkasan aytedan tarna i Məşşina fəl əddəlil n alwaba wa n dagrazan ən, fəlas alwaba iknân təzzəwwərt wəllen a imos.

Əşşəriyə wa z'itəwəxkəman i təkərwat ta labasat

¹ Dəffər adi oşa-du iyyan daş əssa angalosın win əttafnən əssayət təkərwəsən, işşewal-i, inn-i: «İyyaw a kay-assaknaş əşşəriyə ən təkərwat labasat ta təqqimat fəl aman aggotnən. ² Ənta a dər namaggan mənokalan n əddənət əzzəna, təzzar ad taggin aytedan n əddənət əzzəna s igət, əknân tara n awen, zun awedan isassin esmad s igət amaran ikna tara n awen.» ³ Eway angalos iman-in s əsuf, tobaz-i tarna n İnfəs wa Zəddigan. Təzzar oggeş tantut təqqimat fəl əmudar zaggayan əwəran əsmawan aggotnən əmosnən ikus ən tarna i Məşşina. Əmudar wen ila əssa şafawan əd maraw əskawan. ⁴ Tantut ten təlsa tabdoq zaggayət d iyyat təgāt təzuxay tənğāt, təqqân urəş əd təhun şin əlanen almaqam, d əljuhər. Təttāf təkəbart n urəş təkərat imazalan zizallatnən aggadəm, d ammadəs, win tişit-net təməggit n əzzəna. ⁵ Təkannart-net iktāb fall-as esəm əs almaşna-net imos əssir. Ənta da awa inna akatab wa iwaran təkannart-net: «Aşrəm wa zəwwəran ən Babəylon, ənta imosan anna ən təkərwaten əd mazalan win zazallatnən aggadəm.» ⁶ Təzzar oggeş tantut ta təgat iman ən mizdagan aggotnən əd nalkiman aggotnən ən Şaysa win fall-as tagganen təgəyya tolayət. İqqal igi ən man wen arət a tat-isimaswadan zun tassay n esmad. As tat-oggeş, iqqan aşaf-in wəllen.

⁷ Təzzar inn-i angalos: «Mafel iqqān aşaf-nak? A dak-əmələş əssir wa təssəkna təntut-en d əmudar wa təwan, əd şafawan win əssa, d əskawan win maraw. ⁸ Əmudar səksədan wa toggeş əddi, kala ad t-illa, mişan əmərədda ab-as t-illa. Daş alwaq wər nəggug, a d-igməd əşəxi wa wər nəla eder, akku edag n əhluk. Amaran aytedan n əddənət kul win as wər əkteban esmawan-nasan daş əlkəttab wa n təməddurt harwa şur ənətti n əddənət, ad əqqənan şafawan-nasan as ənayan əmudar id kala ad t-illa, dəffər adi ab-as t-illa, amaran ijwār a d-osa.

⁹ Den daş ad təga addararat əs tayttay əd masnat. İşafawan win əssa a, almaşna-nasan əssa ədşayan win fəl təqqim təntut. Əmosan dəş əssa mənokalan ¹⁰ as səmmos daş-san ab'as t-əllan, iyyan ill-ay, ixkām, iyyan amaran harwa da wər d-osa, amaran as d-osa, ad agu arət n azzaman. ¹¹ Əmudar səksədan was kala ad t-illa, ab'as t-illa əmərədda, ənta da əmənokəl a imos. Ənta a imosan wa n əttam, idrāw dəş əlməxsud iyyanda d əssa win hadatnən, amaran ad akku edag n əhluk. ¹² Maraw əskawan win tənayaş, almaşna-nasan maraw mənokalan as harwa da wər əğrewan təşmar-nasan, mişan ad əğrəwan arət n azzaman ən təşmar əntanay d əmudar. ¹³ İduf iyyanda a əgan, amaran əkfān tarna-nasan əd təşmar-nasan y əmudar. ¹⁴ Ad ammagaran d Əjəmar, mişan a tan-arnu arz-en, id ənta a imosan Əməli ən malan, imos əmənokəl ən mənokalan. Aytedan win du-tawaşranen, tawasanafranan əmosan aşadılan, ad idawan d Əjəmar daş tarna ta du-z-agu den.»

¹⁵ İgla angalos işşewal, inn-i: «Aman win toggeş təqqim fall-asan təkərwat, adi şimattiwen əd tiddawaten əd tawşeten d awalan. ¹⁶ Maraw əskawan win toggeş d əmudar, ad azzangen təkərwat, əkkəsən daş-as tələmməst, əzzəfan-tat, atşin isan-net, sərrəkəmən-tat əs təmsay. ¹⁷ Awalla Məşşina a d-igan daş wallan-nasan as ad ammazalan s awa ira, ammazalan əlməxsud iyyanda, akfın təşmar-nasan y əmudar. Arət wen daş a z'agin iket wər d-ewəd alwaq wa daş z'andin aratan win ixkam Məşşina. ¹⁸ Amaran tantut ta toggeş den, təmmittal aşrəm wa zəwwəran azzaran i mənokalan n əddənət.»

18

¹ Dəffər awen oggeş angalos iyyan ilān təşmar wəllen itazabbat-du daş jənnawan, imalawlaw amađal ketnet s ənnur ən tanaya-net. ² İnnə s əməsli issohen wəllen: «Babəylon ta n təmizwart, tuda! Awalla tuda Babəylon!

Təqqal edag ən təməxsurt n aššayatınan
 d adag ən təməxsurt ən kələsuf
 d asammanay ən gəḍad kul win xaramnen
 [d asammanay n əzzənəfan kul
 ən mudaran win xaramnen]
 əd win wər əren man əd win ətawaglafnen.

³ Şimattiwen n əddənet kul əddewnat dər-əs
 daḡ arak deranan-net labasnen n igi n əzzəna,
 imos awen zun esmad sassinat.
 Imənokalan n əddənet nimaggan dər-əs əzzəna,
 kəl jola n əddənet dey
 isaggargas-tan əxrəm wa n Babəylon,
 s ərrəzəḡan-net əknānen igət.»

⁴ Təzzar əsleḡ y əməsli iyyan as d-igmad ijənnawan inna:
 «Əgmədat-du əxrəm
 wədi kawanay win əmosnen tamattay-nin,
 fəl ad wər təgem ibakkadan win itaggu,
 awəd-kawan-in albala wa fall-as z'uden.

⁵ Fəlas ibakkadan-net əqlan har ewadan ijənnawan,
 amaran Məššina ikittəw
 arak mazalan labasnen n əxrəm wədi.

⁶ Ərzəmat-as s əmmək was irazzam,
 takfim-tu ənətfus ən mazalan-net!
 Təkabart tas ikkat, əkətət-as ənətfus-net.

⁷ Əmmək was idkal iman-net,
 immozal arat kul wa əran man-net,
 əmmək di daḡ as agiwat-as əzəḡḡəzzəb səksədan,
 təsəssugim-tu təkenzert labasat ogdānen d awen da,
 id tənna a itaggu əxrəm wa n Babəylon:
 "Təxawit ta n təmənukəla a fəl əqqima,
 wər əmosa tantut as aba aləs-net,
 wər ilkem ad əggāzaḡ afartay."

⁸ Awen daḡ a fəlas albalatan zawwarnen
 əddi win das-ənsanen:
 Təmattant əd təkenzert labasat əd laz.
 Əzəl iyyanda a fall-as z'uden albalatan win di,
 təsərrəkəmmət-tu dey temsay.
 Awalla, Əməli Məššina
 imosan Məšşis ən tarna
 a itawaddaban əxrəm wen.»

İsəmmədənnigan əgānen fəl əxrəm ən Babəylon

⁹ Imənokalan n əddənet kul win dər-əs əddewnen, nimaggan dər-əs əzzəna
 d aratan win əran man-nasan daḡ əddənet, ad ənəyan əhu ən təmsay ta tu-za-
 təsərrəkəmmət, ad hallin səkkələlan fəl awa z'agu əxrəm wen daḡ alḡazab. ¹⁰ A
 dər-əs nəməggəgan, fəl təksəda n a tan-in-awəd alḡazab wa z'agu den. Ad gannin:
 «Xašša! Xašša wəllen
 y əxrəm wa zəwwəran ən Babəylon ilan tarna.
 Alwaq iyyanda ḡas a fəl t-iwwəddab Məššina!»

¹¹ Kəl jola n əddənet kul ad hallin fəl tərəmməq y əxrəm wen. Wər t-illa awedan
 a ḡur-san izanzin awa əssətaḡan, ¹² gər urəḡ, wala azrəf, wala şihun şin əlanen
 almaḡam, wala əljuhər, wala lin, wala tabdoq təḡāt təzuḡay təḡḡāt, wala əlxərir,
 wala tabdoq ta təḡat təzuḡay təhossayət, wala eşkan kul win as izod aḡu-nasan,

wala aratan win əganen daɣ təhunt təknât təməllay s ənta daɣ itaggu uɣən wa n xummaysa, wala win eʃkan win əlanen almaqam, wala win daroɣ, wala win təzoli, wala win təhun ʃin hossaynen, ¹³ wala egel n aʃək was itawannu kanel, wala əzzənəfan n annabatan win əlanen aɗu, wala alwarditan, wala aɗutan win əzodnen əmosnen mir d əlməsək, wala esmad n alɣanab, wala widi wa n azzayt, wala egel, wala alkama, wala ʃitan, wala ayfad, wala əggəsan wala amalankaytan wala eklan, wala ikefəlan. ¹⁴ Ad gannin kəl jola y əɣrəm wen:

«Aratan win əran man-nak kul
əddəggagan fall-ak.

Tənafləyt, d aratan win hossaynen,

əzodnen aba-tan fall-ak.

Wər ilkem ad əlasan ətəwənay!»

¹⁵ Kəl jola win əggərgasnen daɣ əsətəg wa taggin daɣ əɣrəm wen, a dər-əs nəməggəgan fəl təksəda n a tan-in-awəd alɣazab-net. Ad hallin, sikalalan; ¹⁶ gannin:

«Xaʃša! Xaʃša wəllen
y əɣrəm wa zəwwəran a!

Dat awa ilsa tabdoq ən lin ihossayan,

əd tabdoq təgât təzuxay təɳɳât

əd tabdoq ta təgat təzuxay təhossayat,

iqqân uɣənan hossaynen n urəɣ

əd təhun ʃin əlanen almaqam d əljuhər.

¹⁷ Amaran alwaq iyyanda ɣas

a fəl aba təgərgist ten!»

Aytedan kul win azzarnen y əɣlalan win aman əzzozalan-tan d aytedan kul win ʃakalnen fəl gərwan win zawwarnen əd win maʃʃaxalan n əɣləlan n aman əd win əganen jola gər kallaŋ əs tarrayt ən gərwan, əbdadan-in daɣ igəg ¹⁸ assaxa wad ənayan əhu ən təmsay ta təsirəkəmmet aɣrəm wen, sakkarayan gannin:

«Wər kala ad itawanay

arat ʃilat ən wa igraw əɣrəm ogdân əd wa.»

¹⁹ Sawaran iɣafawan-nasan aboqqə, hallin, əɣʃâdan man-nasan wəllen, sikarayan gannin:

«Xaʃša! Xaʃša wəllen
y əɣrəm wa zəwwəran a,

s ənta a daɣ əggərgasan aytedan kul

win əlanen iɣlalan n aman win zawwarnen,

miʃan alwaq iyyanda ɣas a fəl iɣrad ahluk!»

²⁰ «Dawatat ijənnawan!

Aɣrəm iɣrad ahluk!

Dawatat kawanay da win əmosnen imizdagan ən Məʃʃina

əd nəmmuzal d ənnəbitan.

Awalla, Məʃʃina iwwəddab

aɣrəm wa fəl təkma ta dawan-iga.»

²¹ Təzzar idkal angalos iknân təla ən tarna təhunt zəwwərat tolât əd ta fəl itawazad alkama, igar-tat daɣ agarew igannu:

«Ənta da da əmmək was din-z-itəwəgər

əɣrəm wa zəwwəran ən Babəylon

əs təməwit labasat,

amaran wər z'iləs ətəwənay dəffər adi.

²² Wər ilkem ad əlasan aytedan

tesalay daɣ əɣrəm wen

i səwat win əganen əs təhərdânt wala asak,

wala win əganen əs təsənsəq, wala esək.
 Wər ilkem a daɣ-as itiwanaɣ əşşəxəl
 wa n əfus, wala win tu-tagginen.
 Wər ilkem a daɣ-as itiwasla y əməsli
 n əzed n attayam.

²³ Wər ilkem a daɣ-as imilawlaw
 ənnur ən fətəla
 za wər ilkem a daɣ-as ilas ətəwəsla
 y əməsli n əmərmuš əd təmazlayt-net.
 Amaran ənta da əddəlil wa fəl iga adi:
 "Kəl jola-nak, əntanay a ogarnen
 təla ən batu daɣ əddənet kul,
 işayawan-nak deɣ əssixrakan šimattiwen kul.

²⁴ Kay aɣrəm wa n Babəylon,
 a daɣ itawaxal əzni n ənnəbitan
 d əzni ən mizdagan ən Məşşina
 d aytedan kul win tawaxanen daɣ əddənet."»

19

Təmmalen əgânen daɣ batu n əhluk ən Babəylon

¹ Dəffər awen əsleɣ daɣ jənnawan y arat olân d əməsli issohen n əljəmaɣat tagget
 təgannit:

«Alleluya!

Efsan, əd tanaya,

əd tarna in Əməli-nana Məşşina,

² fəlas əlxəkuman-net tidət a əmosan, oɣâd deɣ.

Obaz s əşşərixa-net təkərwat ta labasat

təssəxrakat əddənet əs tişit-net təməggit n əzzəna,

izzəzal deɣ azni ən naɣbidan-net

wa inɣal əfus ən təkərwat ten.»

³ Təlas aljaməɣat ten tənna:

«Alleluya!

Əhu ən təmsay ta təsaqqadat aɣrəm wen,

ill-ay har faw.»

⁴ Təzzar garaffen əmɣaran win sanatat təmərwən d əkkoz, əntanay əd mudaran
 win əkkoz, əɣbadan Məşşina, iqqiman fəl təxawit ta n taɣmar-net, gannin:

«Amin! Alleluya!

Təmmal i Məşşina!»

⁵ Iɣmad-du əməsli təxawit ta n taɣmar en, inna:

«Aɣiwat təmmalen y Əməli-nana,

ketnawan inəɣbidan-net, win t-əksudnen

gər win wər nəla almaqam wala win t-əlanen!»

Takrəst n Əjemar

⁶ Təzzar əsleɣ y arat olân d əməsli ən tiddawat tagget, olân d əjit n aman aggotnen,
 ola deɣ d eggagan labasnen as inna:

«Alleluya!

Fəlas Əməli Məşşina di ən məşşis ən tarna,

issəbdad taɣmar-net.

⁷ Fəliwəsətana, naknu tədəwit, nəssəxmər Məşşina,

fəlas izəzlay n Əjemar ewadan-du,

amaran təmazlayt-net təsimatag.

⁸ Tətawakfa tabdoq ən lin wa n ələsəl, itibələzzen, iqqitasan, y a tat-talsu.»

Tabdoq ən lin wa ihossayan en, almaɣna-net imazalan oɣâdnen win əgan mizdagan ən Məşşina.

⁹ Inn-i angalos ad əktəbəɣ as: «Əbbilalan win tawayranen s ad əggəzan izəzlay n Əjemar!» Dəffər adi inn-i: «Batuten ən tidət awa âs Məşşina iman-net as tanat-iga.» ¹⁰ Təzzar garaffe ɣur daran n angalos wen y ad t-əɣbədə, inn-i: «Alak! Ad wər tagəɣ adi! Nak ənəɣbid ən Məşşina a mosa wa da təmosa kay əd mədrayan-nak əd təmədrayen-nak a tagəyyatnen fəl ɣaysa. Məşşina as kay-iwar a tu-təɣbədə. Amaran, təgəyya fəl ɣaysa, almaɣna-net emel ən salan ən ɣaysa win d-izazzabbat Infas wa Zəddigan.»

Ənəfilal n awedan iwânan ays mallan

¹¹ Dəffər awen oggeɣ ijənnawan as ənnolaman, ih-en ays mallan, amaran wa tiwanan esəm-net «wa imosan Alɣadil, imos Tidət». Əlxəkuman-net oɣâdan, itamagar deɣ fəl tidət. ¹² Şittawen-net əmosnat zun abalagleg ən təmsay, eɣaf-net əwarnat-tu təkəbba ən təɣmar aggotnen. Iktâb fall-as esəm as wər t-illa i t-issânan ar ənta. ¹³ Amawan n ays wen esəm-net «Awal ən Məşşina», amaran ilsa tabdoq təlmâɣat daɣ əzni. ¹⁴ Əlkâman-as gənan ən jənnawan əwannen əggəsan mallolnen. Ketnasan əqqânan tabdoq ən lin wa n ələsəl, iqqitasan, igân təməllay təsiraqqet. ¹⁵ Təgmaddu takoba təkənât tawala imi ən wa iwanan ays en, fəl ad tanɣu şimattiwen n əddənet. Amaran wa iwanan ays en ad ixkəm fəl təməttiwen n əddənet əs təɣmar təkənât assahat. Ad azmu aɣanab daɣ təgdayt zəwwərat y a sər-əs agu esmad immittalan alham labasan wəllen ən Məşşina di ən Məşşis ən tarna. ¹⁶ Təkadkat-net əd təɣmanet iktâb fall-asnat «Əmənokal ən mənokalan d Əməli ən malan.»

Ənəfilal ən saksas zəwwəran ən matsan ən təməxsə

¹⁷ Dəffər awen oggeɣ angalos ibdâdan daɣ təfuk. Isayɣarat s əməsli issohen wəllen i gədad kul win əggadnen daɣ təsəggərigərəyt ən jənnawan, inn-asan: «Ayewat, idawat-du ketnawan i mensewan əknânen igət win Məşşina, ¹⁸ fəl ad tatşim şiməxsə ən mənokalan əd muzaran ən sojitan, əd nammagaran, əd təməxsə n əggəsan əd win tan-əwannen, əd təməxsə n aytedan kul, gər wa imosan əlləlli wala akli, gər wa wər nəla almaqam wala wa t-ilan!»

Ənəfilal n əmudar d ənnəbi ən bahu

¹⁹ Oggeɣ əmudar səksədan, əd mənokalan n əddənet, əd gənan-nasan əddewan y ad ammagaran əd wa iwanan ays, d agan-net. ²⁰ Təzzar ittərmas əmudar ittərmas deɣ ənnəbi ən bahu wa dər iddew. Ənnəbi ən bahu wa, iga aɣalamaten zawwarnen dat əmudar wen. Əmmək en daɣ as issəxrak win iwar ejwal n əmudar, əɣbâdan deɣ şaşşelan-net. Əmudar wa, ənta harkid ənnəbi ən bahu wa, tawagaran da əddâran daɣ aɣazar ən təmsay d adayəs-ən-tahart irɣân. ²¹ Awa d-iqqiman daɣ agan wen ketnet tənɣ-ay takoba ta du-təgmadat imi ən wa iwanan ays. Təzzar əyyəwanan gədad wəllen daɣ təməxsə-nasan.

20

Ənəfilal n əməxluk iqqânan har əgim n awatay

¹ Dəffər awen oggeɣ angalos itazabbat-du igmâd-du ijənnawan, ittâf daɣ əfus-net təsassarut n əɣəɣi wa wər nəla eder, ittâf deɣ asassar zəwwəran. ² Obaz əməxluk, a t-imosan aşşol wa irəwan, a imos Iblis, itawann-as deɣ Aşşaytan, ig-as tewaynay a za tagit agim n awatay. ³ Igar-tu angalos daɣ əɣəɣi wen, ihar-tu fall-as, iɣfal-tu s əllux

fəl ad wər iles əsəxrək ən təmattiwen har agu agim n awatay. Dəffər awen ilzâm ad annalam ammaru har arat n azzaman.

Ənəfilal n ətəwərna n Aşşaytan

⁴ Oggeş šixiwa ən taşmar. Win fall-asnat əqqimnen əgrâwan tarna n ad əqqəlan imaşrayan. Oggeş iman n aytedan win as tawasaben rawan-nasan fəl əddəlil ən təgəyya tolâxat ta taggin daş batu ən Ƴaysa d awal ən Məşşina. Oggeş dey aytedan win wər nəxbed əmudar wa səksədan za wər əssəjadan i şaşşelan-net, wər tawajajwalnat təkannaren-nasan wala ifassan-nasan. Aytedan win den əqqalan-tan-du man-nasan, namaggazan taşmar d Əlməsix, amaran awen ad agu agim n awatay. ⁵ Ənta den da tanakra ta tazzarat ən nəmməttan. İnəmməttan win hadatnen, wər d ənkeran har inda əgim n awatay wen. ⁶ Əbbilalan aytedan zaddoggen win d-ənkarnen daş tanakra ən nəmməttan ta tazzarat! Aytedan win di wər tan-in-təkka Jahannama əd wala! Əntanay a z'əqqəlneen ilimaman ən Məşşina d Əlməsix, amaran a dər-əs nəməggəzan taşmar-net har agim n awatay.

⁷ As inda əgim n awatay wen, a d-itəwəyyu Aşşaytan daş kasaw wa iha, ⁸ aglu ad isaxrak šimattiwen a əwarnen tesayt n amaḍal, əmosnen Yajuj əd Majuj. A tan-d-işşidəw y əmögər, amaran əgân igət wa n təblalen n amaḍal a dabayyaknen daş afay n agaraw. ⁹ Əssəwalan əddənet ketnet, əbazan aşrəm wa iknan ətəwəra, Ʒalayyalayan imizdagan ən Məşşina. Mişan təzzəbbat-du təmsay daş jənnawan, təsarrakammat-tan. ¹⁰ İblis s ənta dasan-azzaran, isaxrak-kan, itawagar daş aşazar ən təmsay təgât s adayəs-ən-tahart wa iha əmudar d ənnəbi ən bahu. Den daş a dasan-z-itəwəggu ətəwəzəxəzzab səksədan ehad ezal har faw.

Ənəfilal n əşşərixa ən Məşşina

¹¹ Ogge təxawit ən taşmar təkna təzzəwwərt, təkna dey təməllay, əd wa fall-as iqqiman. Əddəggagan-as jənnawan əd mədlan, əggugan-tu, wər d-oyyen wala ədəriz. ¹² Dəffər awen oggeş inəmməttan win wər nəla almaqam, harkid win t-əlanen əbdâdan dat təxawit ta n taşmar en. Ənnolaman əlkəttaban. İnəmməttan s awa ihan əlkəttaban win den, ewâl awen əs mazalan-nasan. ¹³ İkfa-du agaraw inəmməttan win t-əhanen, təkfa-du təməttant d alaxirat inəmməttan win-nasnat, itawaxkam akkiyyan daş-san əs mazalan-net. ¹⁴ Tətawagar təməttant d alaxirat daş aşazar ən təmsay. Aşazar ən təmsay wen ənta a imosan Jahannama. ¹⁵ Awedan ketnet was wər ikteb esəm-net daş əlkəttab wa n təməddurt, itawagar daş aşazar ən təmsay wen.

21

Ənəfilal ən jənnawan d amaḍal win aynaynen

¹ Dəffər awen oggeş ijənnawan aynaynen, d amaḍal aynayan. İjənnawan win ərəwnen, d amaḍal wa irəwan, ab'as t-əllan, igərwan dey ab'as t-əllan.

² Təzzar oggeş aşrəm wa zəddigan, a t-imosan Yerusalam ta taynayt, tətazabbat-du daş jənnawan, issigl-et du Məşşina. Təsimatag zun təmazlayt təgât əddəlugan-net win hossaynen y ad tammanay d aləs-net. ³ Əsleş y əməsli issohen a d-igmâdan təxawit ta n taşmar igannu:

«Əmərədda ehan ən Məşşina illa gər aytedan.

A dər-san inəməxsər, əqqəlan šimattiwen-net.

Məşşina iman-net as Ʒur-san z'iməl, iqqəl Əməli-nasan.

⁴ A dasan-iməs id t-əllân məttawan,

ib'as tu-təlla təməttant,

wala təweşkənt, wala təkurayt, wala tisanant,

fəlas aratan win d-azzarnen, ab'as t-əllan.»

⁵ Inn-i wa iqqiman fəl təxawit ta n taɣmar: «Ənəy! Aratan kul sammattayaq-qan əge win aynaynen.» Təzzar inna: «Əktəb, fəlas batuten šin əssiflasnat, əmosnat deɣ tidət.» ⁶ Inn-i: «Arat wa, iga! Nak a imosan Alfa, əmosaɣ deɣ Omega, almaɣna wa azzaran ilkâm. Wa iha fad, nak a das-z-agin təhəkkut təmosat tessay daɣ šat ta daɣ du-naggayan aman win sidurnen. ⁷ Awedan kul wa d-ornan, a ɣur-i igrəw aratan win, əmosan-as təhəkkut, əqqələɣ deɣ Əməli-net, iqqəl barar-in. ⁸ Mišan awedan wa imosan əddəyyus, d aytedan win wər nəɣdel əd win tamazalnen awa labasan əd maggan ən man əd win tagginen əzzəna əd maşşaxawan əd naɣbidan n əssənəman əd nəsbuha kul, əntanay tədaɣart-nasan iguz ən Jahannama təmosat aɣazar ən təmsay tərɣât s adaɣas-ən-tahart.»

Awa inafalalan i Yaxya alwaq wad iwar adɣaɣ wa zəwwəran: Yerusalem ta taynayət

⁹ Təzzar ikk-i-du iyyan daɣ angalosan win əssâ əttâfnen əssayət təkərwasen šin ədnaynen əssa alwabatan win əlkammen inn-i: «İyyaw, a kay-assaknaɣ tantut ta n təmazlayt n Əjemar.» ¹⁰ Eway-i angalos s afalla n ədɣaɣ iyyan zəwwəran, zagren, tobaz-i tarna n Infas wa Zəddigan, issəkn-i aɣrəm wa zəddigan, a t-imosan Yerusalem, a d-izzibben daɣ jənnawan, ifal-du ɣur Məşşina. ¹¹ Aɣrəm wen igrâw tanaya ən Məşşina. Iga əmələwləw a n təhunt təlât almaqam as itawannu jasfa, təgât əɣətəs wa n təlfənjart. ¹² İɣlay-tu aɣalla zəwwəran zagren, ilân marawat təsəhar əd sanatat a ɣur əllân maraw angalosan d əşšin. Šisəhar šin den əktâban fall-asnat esmawan ən marawat tawşeten əd sanatat šin maddanəs n İsrayil. ¹³ Taɣərt n aɣalla en ta n dənnəg təla karadat təsəhar, ta n tamasna deɣ təla karadat, ta n agala təla karadat, ta n ataram deɣ təla karadat. ¹⁴ Aɣalla wen ila marawat təsəttəytay əd sanatat a das-əmosnen šiɣurad, amaran əwaran-tanat maraw esmawan d əşšin əmosnen esmawan ən maraw nəmmuzal d əşšin n Əjemar.

¹⁵ Angalos wa di-işşewalan ittâf əsəkət imosan agabal ən telant igân daɣ urəɣ y a sər-əs ikət aɣrəm əd təsəhar-net, d aɣalla wa t-iɣlayan. ¹⁶ Aɣrəm wen ogda fəl gannatan-net kul win əkköz. Tamawen-net kul togda təzzəgrət-nasnat, harkid sa sər afalla. İkat-tanat angalos s agabal wa n urəɣ en, əqqalnat əşšin gim ən kilaw əd sanatat təmad. ¹⁷ İkat angalos təzzəgrət ta n afalla n aɣalla wa iɣlayan aɣrəm en, iqqal temeday n əɣil d əkközat təmərwən d əkköz. Takkot ten ig-et angalos s əmmək was tat-taggin aytedan fawda. ¹⁸ Aɣalla n əɣrəm wen igâ əs təhun əhossaynen əlânen almaqam as itawannu jasfa, aɣrəm amaran iman-net iga daɣ urəɣ wa izdaran igân əɣətəs wa n təlfənjart. ¹⁹ Šisəttəytay šin əmosnen šiɣurad n aɣalla ədlâgnat s əzzənəfan ən təhun kul šin hossaynen əlanen almaqam. Təsəttəytəyt ta tazzarat təga daɣ jasfa, ta n sanatat təga daɣ təhunt as itawannu safır, ta n karadat təga daɣ təhunt as itawannu kalsaydun, ta n əkközat təga daɣ təhunt as itawannu emrod. ²⁰ Ta n səmmosat təga daɣ təhunt as itawannu onəyks, ta n sədisat təga daɣ təhunt as itawannu sardwan, ta n əssayət təga daɣ təhunt as itawannu kərzolit, ta n əttamat təga daɣ təhunt as itawannu beril, ta n tazayət təga daɣ təhunt as itawannu tofaz, ta n marawat təga daɣ təhunt as itawannu kərizofəraz, ta n marawat d iyyat təga daɣ təhunt as itawannu həyasint, ta n marawat əd sanatat təga daɣ təhunt as itawannu ametist. ²¹ Šisəhar šin marawat əd sanatat en, marawat təhun n əljuhər əd sanatat a daɣ əganat. Əkkulluk ən təsəhərt təga daɣ təhunt iyyadda n əljuhər. Amaran tarrayt ta zəwwərat n əɣrəm en, təga daɣ urəɣ wa izdaran igân əɣətəs a n təlfənjart.

²² Aɣrəm wen wər daɣ-as hənnəya ehan n əlyibada. Awalla Əməli Məşşina di ən məşşis ən tarna a imosan ehan-net wa n əlyibada, ənta d Əjemar. ²³ Aɣrəm wen wərmad iddirar s ənnur ən təfuk za wala wa n təllit, fəlas tanaya ən Məşşina a

tu-təsammalawlawat, amaran Əjemar a imosan ənnur-net. ²⁴ Ənnur-net a dağ-as jəwənkətnat təmattiwen, asin-t-idu mənokalən n əddənət əssəxməran-tu. ²⁵ Şisəhar n əxrəm wen wər əhhirnat dağ təzzəgrət ən jilan, amaran wər ilkem ad əhərnat fəlas ehad s ab'as t-illa. ²⁶ Şimattiwen n əddənət kul a d-awəynat s əxrəm wen aratan a tu-z-akfinen tanaya d ətəwəsəxmar. ²⁷ Wər tu-z-iggəz a immidasan, wala deş i itamazalan talbast, wala bahu. Kalar wər tu-z-iggəz ar win as əktaban əsmawan-nasan daş əlkəttab wa n təməddurt n Əjemar.

22

¹ Təzərəst n awen as di-issəkna angalos agarew was əhakkin aman-net təməddurt, əgān aman-net əxətəs a n təlfənjart. Aman win əngāyan-du daş təxawit ən taymar ən Məşşina d Əjemar, ² əkkan-du ammas ən tarrayt ta zəwwərat n əxrəm. Şigadamayen n agarew wen əwāran-tanat eşkan win əhakkinen təməddurt tarawnen maraw əzzənəfan n aratan d əşşin, əkkulluk ən təllit. Ifərkak n eşkan win, zuzəyan şimattiwen n əddənət. ³ Aşrəm wen wər tu-z-iggəz arət təwār tulşant. Təxawit ta n taymar ən Məşşina d Əjemar ad təggəz aşrəm en da, təşbəd tamattay-net Məşşina. ⁴ Aytedan win əhanen aşrəm wen ad ənəyan udəm n Əməli, iktəb deş esəm-net fəl təkannaren-nasan. ⁵ Wər z'iləs ahad igi, za wər z'ələsan addararat s ənnur ən fətəla, wala ənnur ən təfuk, fəlas Əməli Məşşina a tan-z-isəmmələwləwan, amaran əxkəman har faw.

Təsəxtəmt: Assa ən Ƴaysa

⁶ Inn-i angalos: «Batuten şin əssiflasnat, əmosnat deş tidət; Əməli Məşşina, s ənta a imosan Əməli n ənnəbitan a d-issəgəlan angalos-net fəl ad assaknu inaybidan-net arət as kundaba iga daş azzaman wər nəggug.»

⁷ Inna Ƴaysa: «Ənəy! Əzayaş-in tarmad! İbbilal wa izzəgzanan ibbirdağ deş i batuten a nafalalnen daş əlkəttab wa əmosnen isalan n aratan win əmərədda əd win d-əzaynen!»

⁸ Nak Ƴaxya a islan y aratan win, amaran ənāyaq-qan. As əsleş y aratan win, ənayaq-qan, fataqqəş şur daran n angalos wa di-tan-issəknan y ad t-əşbədə. ⁹ Mişan inn-i: «Alak! Ad wər tagaş adi! Nak ənəşbid ən Məşşina a mosa şilat-nak kay əd mədrayan-nak win ənnəbitan, əd win əbbərdagnen y awal wa ihan əlkəttab wa. Əşbəd Məşşina!» ¹⁰ Dəffər awen inn-i: «Ad wər təşbərə isalan win nafalalnen daş əlkəttab wa əşşewalnen daş batu n aratan win əmərədda əd win d-əzaynen, fəlas alwaq ihoz! ¹¹ Wa wər noşed, aqliwet daş iba n taqqat-net, wa immədasan, aqliwet daş ammadan-net. Wa oşadan amaran aqliwet daş taqqat-net, wa zəddigan deş işşitiwet tazdak.»

¹² Inna Ƴaysa: «Awalla! Əzayaş-in tarmad, amaran ewayaş-in ərruzmatan-in y ad akfaş awedan kul arozan win tu-şəşşawadan mazalan-net. ¹³ Nak a imosan Alfa, əmosa deş Omega, almayna wa azzaran ilkâm, təsəntit əd təzərəst.

¹⁴ Əbbilalan win rabbaznen şikadkaden-nasan zazdagan-tanat fəl ad əgrəwan alxaq daş aşək wa n təməddurt, əggəzan deş aşrəm wa zəddigan en əs təsəhar şin as itawaggaz! ¹⁵ İdan əd məşşaxawan ədəganət sədi, əntanay əd maggan n əzzəna əd maggan ən man əd nəşbidan n əssənəman d awedan kul wa iran bahu itagg-ay!

¹⁶ Nak Ƴaysa, əssiglaş-in angalos-in y a dawan-itagayyat daş Əlkənisanen fəl aratan win di. Nak əzzurrəyya ən Dawəd a d-əgmada, əmosaş atri imilawlawan wa d-igammadan s aşora.» ¹⁷ Inna Infas wa Zəddigan əd təntut ta n təmazlayt: «Asa-du!» I isallin kul anniwet: «İyyaw!» Wa iffudan kul asiwet-du. I iran adi kul aşwet aman win sidurnen tawagrawnen wala inazzan!

¹⁸ Nak iman-in Ƴaxya, əggəyyəş y awedan kul wa islan isalan win nafalalnen daş əlkəttab wa əşşewalnen daş batu n aratan win əmərədda əd win d-əzaynen as: I

işşotan arat fəl salan win, a das-işşitu Məşşina daḡ albalatan win əttəmalnen daḡ əlkəttab wa. ¹⁹ I daḡ-san ikkasan arat deḡ, ad ikkəs Məşşina adagar-net daḡ ašək wa isiduran d əḡrəm wa zəddigan win əttəmalnen daḡ əlkəttab wa.

²⁰ Wa igəyyen fəl aratan win, isattadd-en, inna: «Awalla, əzayəḡ-in tarmad.» Amin! Iyyaw, Əməli Ḡaysa! ²¹ Ya Əməli Ḡaysa təkfeq-qawan arraxmat ketnawan.